

清
實
錄

穆宗毅皇帝實錄(二)

卷五四至卷八九
同治二年

清實錄

第四六冊

中華書局影印

清 實 錄

(第 四六 冊)

穆 宗 實 錄 (二)

•

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

•

787×1092 毫米 1/16•56 1/4 印張

1987年1 月第1 版 1987年1 月北京第1 次印刷

印數 0,001——1,500 冊

統一書號: 11018 • 1355—46 定價: 42.00 元

清實錄第四六冊目錄

穆宗毅皇帝實錄(一一)

卷五四	同治二年正月上	一
卷五五	同治二年正月中	一六
卷五六	同治二年正月下	四六
卷五七	同治二年二月上	六二
卷五八	同治二年二月中	一〇〇
卷五九	同治二年二月下	一三一
卷六〇	同治二年三月上	一五八
卷六一	同治二年三月中	一七八
卷六二	同治二年三月下	二〇三
卷六三	同治二年四月上	二二四
卷六四	同治二年四月中	二五七
卷六五	同治二年四月下	二八三
卷六六	同治二年五月上	三一二
卷六七	同治二年五月中	三三三
卷六八	同治二年五月下	三六四
卷六九	同治二年六月上	三八八
卷七〇	同治二年六月中	四〇七
卷七一	同治二年六月下	四三〇
卷七二	同治二年七月上	四五〇
卷七三	同治二年七月中	四六七
卷七四	同治二年七月下	四九二
卷七五	同治二年八月上	五一三
卷七六	同治二年八月中	五三四
卷七七	同治二年八月下	五五八
卷七八	同治二年九月上	五八四
卷七九	同治二年九月中	六一一
卷八〇	同治二年九月下	六三一
卷八一	同治二年十月上	六五〇
卷八二	同治二年十月中	六七五
卷八三	同治二年十月下	七一二
卷八四	同治二年十一月上	七三三
卷八五	同治二年十一月下	七六三
卷八六	同治二年十二月上	七九六
卷八七	同治二年十二月下	八二四

穆宗實錄

卷八八 同治二年十二月中

八四三

卷八九 同治二年十二月下

八六六

大清穆宗繼天開運受中居正保大定功聖智
誠孝信敏恭寬毅皇帝實錄卷之五十四

此卷實錄係臣等奉命纂修臣等謹將臣等纂修實錄恭摺具奏

臣等謹將臣等纂修實錄恭摺具奏

臣等謹將臣等纂修實錄恭摺具奏

臣等謹將臣等纂修實錄恭摺具奏

臣等謹將臣等纂修實錄恭摺具奏

敘修

同治二年癸亥春正月戊申朔

上詣

奉先殿行禮○遣官祭

太廟後殿○詣

大高殿

壽皇殿行禮○詣綏履殿

慈安皇太后前行禮平安室

慈禧皇太后前行禮○是日不御殿受賀王大

臣於乾清門外眾官暨朝鮮國使臣等於午
門外行禮○實授吏部左侍郎張之萬河南

巡撫○擢江蘇候補知府劉卹膏為按察使○

○以記名道萬啟琛為安徽按察使○己酉

上詣綏履殿問

慈安皇太后安平安室問

慈禧皇太后安至丙子皆如之○諭內閣徐桐

著授鍾郡王讀○諭議政王軍機大臣等崇

厚奏南宮緊急調兵扼堵並文煜奏擊賊於

胡賈村目寨各摺片據奏崇厚於十二月二

十九日馳抵南宮縣催調後起春霖所帶馬

步官兵並咨令文煜飛撥馬隊兜剿擬暫紮

南宮縣城居中策應請飭文煜所督兵勇前

截後追等語合之文煜所報賊於二十四五

等日由成安竄至邯鄲闖入縣城復即奔竄

二十六日姜國仲余承恩等帶領兵勇迎至

永年縣北胡賈地方擊之獲勝並於是夜賊

屯目寨乘勢掩擊賊由東北奔竄難澤一帶

等情形是賊又由難澤一帶東北竄至南宮

縣境崇厚自應飛催後路春霖所帶之兵迎

頭截擊。並卽檄催姜國仲。余承恩等兵勇。緊跟追。薩薩布帶領馬隊京兵。於二十六七日。已行抵順德。文煜令由任城馳赴鉅鹿。與姜國仲等南北兩路夾攻。於地勢軍情是否悉協。成保此時應亦趕到。卽著崇厚與之商同調度。四面兜圍。無難乘我兵新銳。一鼓殲除。惟直東邊界伏莽甚多。崇厚所奏南宮之賊。是否卽係文煜所奏竄至雞澤一股。抑係另股。著崇厚確切探明具奏。如股數不少。卽須分兵勦辦。應如何分布堵擊之處。卽與成保妥籌辦理。崇厚務當懷遵前奉諭旨。實力圖功。毋蹈瞻徇欺飾種種惡習。嗣後軍前事宜。並著與成保聯銜具奏。文煜摺片均著發交崇厚閱看。將此由六百里諭令知之。○調工部左侍郎單懋謙為吏部左侍郎。以大理寺卿曹毓瑛為工部左侍郎。○以刑部左侍郎齊承彥署戶部右侍郎。管錢法堂事。吏部右侍郎孫葆元署管戶部三庫事。○以光祿

寺卿潘祖蔭署宗人府府丞。○展綏直隸開東明長垣武清薊東安束鹿安任邱青靜海滄南皮鹽山晉鉅鹿永年邯鄲成安廣平元城大名南樂新豐豐潤玉田衡水柏鄉甯晉深武強饒陽肥鄉雞澤磁三十五州縣被擾地方額賦有差。○庚戌。高宗純皇帝忌辰。遣官祭裕陵。○諭內閣御史孟傳金奏據署侍郎王發桂聲稱。前往同鄉王姓宅內慶賀。見有一人陪坐。頭戴藍頂。身穿貂褂。查詢旁人。知係前任安徽巡撫王植之門丁陳姓。卽陳小山等語。僕隸下人。分居卑賤。何以藍頂貂裘。儼然與長官抗禮。殊駭聽聞。著王發桂查明陳小山是否捐有官職。抑係冒充職官。交巡城御史照例辦理。○諭議政王軍機大臣等。崇厚奏賊撲南宮。旋即竄逸。譚廷襄奏擬飭宋景詩赴淄川勦賊。並催德楞額等專勦南捻。各摺片。直隸匪徒糾眾攻撲南宮縣城。現雖竄

逸。究未大受懲創。薩薩布已抵南宮。興福等所帶馬步先後可到。成保所統馬隊亦抵甯晉。諒卽日可以到齊。但兵分力薄。此股匪徒。飄忽靡定。著崇厚晤商成保。統籌全局。分途兜剿。赴此該署督初到之後。申明賞罰。一鼓作氣。以期剋日勦除。不得徒託空言。仍蹈文煜等覆轍。宋景詩所部。如無不法情事。准其調赴淄川助剿。以贖前愆。該前撫務飭在事員弁嚴為防範。如再有反側。惟譚廷襄是問。

黃國瑞圍攻長城。兵力已敷布置。德楞額。富和。自應恪遵前旨。追剿李城股匪。何以譚廷襄節次飛催。尚無跟蹤覆信。是德楞額等有怠遲延。不遵調度。挾從前被參之嫌。以縱賊為報復。如此居心。看來不能受朝廷保全之恩。著譚廷襄傳旨嚴行申飭。如再不實力追剿。卽著據實奏聞。候旨懲創。以肅軍律。其長城匪眾。並著嚴飭黃國瑞迅卽殲除。張錫珠股匪。據譚廷襄奏稱尚在館陶。其南宮等處

匪徒。是否卽係該匪黨與。張玉懷究在何處。並著崇厚確切查明具奏。再本日據孟傳金奏冀州牧丁學易性耽安逸。以致民團破敗。各等語。並著崇厚查明奏聞。其餘該御史所陳勦賊各情。雖文理未能通暢。議論亦未見切實。惟崇厚初次權篆封疆。遇事尤應格外留心。原摺著鈔給閱看。如有可採擇之處。亦不當以人廢言也。將此由六百里各諭令知之。○又諭唐訓方奏偵探巢縣賊情及派兵

勦撫捻圩各等語。運漕鎮踞匪經蕭慶衍督軍會同水師攻克。向銅城牯遁去。而巢縣逆黨踞守如故。將來水陸官軍會攻巢縣。該逆勢必窮蹙思竄。唐訓方自應督飭張得勝扼住梁園嚴防竄越。定遠縣西鄉土匪雖經攻毀四圩。招撫餘匪。仍應防其反側。著唐訓方飭令唐啟虞會同該縣知縣李益林嚴密稽查。如稍有蠢動。卽趕緊撲滅。毋令勾結為患。王才秀等進軍蒙城。誘殺擒首。進官標等先

後收撫賊圩二十一處。官軍聲勢甚重。著卽激勵將士。迅將西陽高鑑一帶捻圩攻拔。以期節節掃蕩。會合僧格林沁所部直擣捻巢。廓清皖境。唐訓方另片奏三河尖釐局向係接濟臨撫兩營軍餉。嗣勝保帶兵援賴。在三河尖北岸立卡抽釐。李續宜遂於南岸設局。現在勝保被逮。北岸釐局應歸皖營接辦。請飭河南撫臣無庸派員設局等語。三河尖本係皖省地面。該鎮既有兩局。自未便再行添設。重累商民。所有張之萬前請於三河尖設立釐局之處。著卽停止。將此由五百里各諭令知之。○辛亥。諭議政王軍機大臣等。都興阿奏裁撤水師舊船。並布置江防情形一摺。據稱江防師船。並新調紅單船。及在楚打造長龍船礮划。共四百六十三隻。茲酌覈裁撤朽爛紅單拖罾各船。共一百二十九隻。以節糜費。惟師船月餉積欠甚多。紅單船既已裁撤。必應裁給舊欠。由兩廣總督補發。並先由

蘇撫籌給口糧。俾作川資。拖罾等船亦應酌給遣散各等語。此項欠餉。自係萬不可緩之需。著晏端書於所裁紅單師船到粵時。按照糧臺細冊查明積欠船價勇糧照數補發。並著曾國藩李鴻章先行飭司籌給一月口糧。俾作回粵路費。其拖罾各船迅速籌給前欠。以資遣散。所有裁撤師船著責成統帶回粵之陳國秦將船戶夫役人等妥為彈壓照料。免致沿途滋事。現在逆賊時思紛竄江防極關緊要。都興阿所奏按段分撥防守情形。布置尚屬周妥。卽著照所擬督飭吳全美李起高等責成派出之參將梁正源等嚴密防範。廣東新到師船尚須訓練。並著吳全美責令各統領嚴申紀律。勤加操演。禁絕騷擾。俾成勁旅。將此由五百里各諭令知之。○又諭。張之萬奏汝軍分路剿賊獲勝一摺。陳大湛被勒回竄桐境。游弋於固鎮吳城一帶。與林振山匪徒勾結。現在張曜督率馬隊追至平昌

聞著張之萬會同毛昶熙嚴飭該總兵調集步隊探蹤前進會合各路兵團四面兜圍毋令再行竄逸。邢集踞匪負隅未下。疊經李續燾進兵擊敗。並著飭令該總兵趕緊合圍。盡殲醜類。如邢集業已得手。即飛調李續燾一軍分兵西進。為張曜後路策應。其汝東一帶伏莽尚多。仍著飭令陳祿興等扼守岳城一帶。鎮壓就撫各寨。以防反側。張之萬現調袁甲三舊部來汝。並調余際昌全隊馳回汝郡。

該撫等務當酌度緩急。相機策應。肅清南圉。以副委任。將此由五百里各諭令知之。○以江西廣豐縣捐輸軍餉。永廣學額二名。○以勦賊勇敢。賞河南守備王文行巴圖魯名號。○予浙江紹興傷亡洋將勒伯勒東祭葬世職加等。○貸河南永城汝陽正陽新蔡確山信陽六州縣難民兩月口糧。○壬子。諭議政王軍機大臣等。崇厚奏賊竄冀州境內。請增兵籌餉迅速勦辦一摺。現在各起馬步兵勇。

陸續到齊。著崇厚飭令星夜馳赴冀州以北。繞出賊前會合堵剿。成保所帶京營馬隊四百名已至南宮。著即會商該副都統妥籌調度。於要隘地方設伏邀擊。毋令再行竄越。其調赴山西之後起馬隊官兵二百五十名。著准其暫留直隸軍營。歸成保薩薩布統帶。以厚兵力。俟直境匪勢稍鬆。仍飭赴山西防所。天津所練京綠各營洋槍隊原較各營兵勇更為得力。至原教之外國兵弁在海口百姓

習見不驚。今令隨同前赴軍營恐畿南各處人情疑懼。該署督務當嚴為約束。俾兵民得以相安。如大股迅就撲滅。即將洋槍隊仍調回天津練習。不得久留。以節經費。所籌寬備糧餉各情均著照所議辦理。將此由五百里諭令知之。○又諭曾國藩奏欽奉豐次諭旨。併案覆陳一摺。所陳察看苗練。除軍及上游水師未能分紮下游。學習洋人兵械禁約軍士屠掠各條。籌畫均屬周至。金陵城外各賊。

壘現尚死力抵抗各路賊勢如偽忠逆侍逆等股均尚未即窮蹙原難遽冀賊之獻城乞降其中如有自拔來歸者該大臣自必能嚴禁屠戮以為隨時解散之方也壽正防軍之撤原係移緩就急現在該練尚無踞城以叛之跡或係因僧格林沁之軍勦擒亳州相離尚不甚遠自足以資控制惟將來僧格林沁一移他處則苗練無所鈴束勢必又生枝節該大臣等總宜豫為之所設法散其黨與使

日後不能再有反側方為妥善李世忠桀驁未化朝廷亦所深知該大臣所陳委曲優容各節具見苦心然亦不可不隨時隨事量為裁制除營餉銀子藥等件固宜陸續接濟若如那勒豐阿等遣撤官兵被其卡員阻毆等事亦未可專事姑容李世忠為部眾所蒙蔽尤當使其早自儆省以為保全著曾國藩嗣後察看如該提督有必須加懲究之處著即據實奏明辦理所稱上游水師楊岳斌等各

備巢湖東壩之賊不能移紮下游自屬實在情形均如所奏辦理外國銅冒自來火既飭工匠試造即可於造成後飭令各營演放熟悉以利攻勦另片奏近日各軍情均已覽悉韋志俊進攻青陽既未得手朱品隆之軍由池州繼進著即飭令迅克青陽以期次第掃蕩太平石埭等股賊氛俾金陵之賊羽翼漸除庶可徐圖進取將此由五百里諭令知之○以湖南東征局官紳籌餉出力予升仕道

員譚世臨等加銜升敘開復有差○蠲緩山東臨清濟甯廕城鄒平長山長清德平原東平東阿平陰惠民青城陽信樂陵霑化鄒滕汶上陽穀單定陶鉅野濮觀城朝城費聊城堂邑茌平莘館陶高唐樂安壽光昌樂臨朐嘉祥章邱齊河齊東濟陽臨邑泰安海豐蒲臺曲阜泗水壽張荷澤城武曹鄆城蘭山郟城莒沂水博平原冠恩益都臨淄博興邱魚臺六十六州縣暨德州東昌臨清濟甯

四衛東平所。被水被旱被風被蟲被擾地方。本年額賦並租課有差。○緩徵兩淮富安。安豐梁垛東臺河垛丁溪草堰劉莊伍佑新興廟灣板浦中正臨興十四場被水。竈地。上年額賦有差。○癸丑諭議政王軍機大臣等。穆騰阿奏。抵任察看省垣布置情形。請派員赴陝署理副都統。並籌發旗兵餉銀各摺片。穆騰阿現已行抵省垣。所有西安防堵事宜。卽著商同瑛榮嚴密布置。實力巡防。毋稍疏懈。

城北濠池。平淺無水。瑛榮何以不早行挑挖。其平日之因循廢弛。漠不關心。已可概見。著卽起緊飭令民夫挑挖深通。設法引水。以資憑守。回匪距城一二十里外。時以游騎往來。壅遏糧道。城內百物昂貴。穆騰阿瑛榮務當挑選兵勇。不時出城巡邏。遇有匪蹤。卽行痛擊。以期疏通餉道。不得閉關自守。致成坐困。前因平利賊勢猖獗。諭令馬德昭馳赴該處迎剿。續因甯陝廳告警。諭令多隆阿酌度情

形。或親帶兵勇。或酌撥精兵。交馬德昭統帶前往。計馬德昭此時已可起程。省垣兵力既分。恐回匪窺伺撲城。益形猖獗。著多隆阿仍行撥兵馳赴西安。協同防剿。該大臣督辦陝西全省軍務。責無旁貸。務當妥籌兼顧。不得顧此失彼。西安駐防旗兵欠餉已及兩月。著瑛榮趕緊籌撥款項。設法接濟。嗣後月餉務當按四成實銀發給。儻再推諉膜視。致令士氣不振。惟瑛榮是問。穆圖善現在同州督兵

勦賊。德興阿現防蒲津。均難卽赴任所。西安駐防旗營需人。著英桂飭令伊昌阿前赴西安。暫署副都統。幫同穆騰阿辦理。俟省城防務稍鬆。再往烏什本任。將此由五百里各諭令知之。○

上以孟春時享

太廟。自是日始齋戒三日。○甲寅

世祖章皇帝忌辰。遣官祭

孝陵。○諭內閣。現在記名水師總兵將次用竣。

著兩江閩浙兩廣總督於水師副將內遴選堪勝水師總兵者。各保奏數員。候旨記名簡用。其水師參將遊擊都司守備各員。如有材藝出眾可備器使者。並著覈實開單具奏。曾國藩所部內江水師。向稱得力。都興阿督辦揚防。所統水師將弁不少。各該營自總兵以下各員。其謀勇兼優。熟悉風濤沙線。堪膺外海水師之任者。定不乏人。均著出具考語。據實具奏。以備錄用。○又諭。前因升任給事中

林壽圖奏。叅福建藩司裕鐸等狎妓荒蕪等款。前任閩浙總督慶端含糊覆奏一味欺飾。諭令耆齡等秉公審辦。嗣又據御史朱潮奏。叅捐局委員章琮等營私舞弊。並曾國藩奏。遵查慶端袒庇私人。聲名甚劣。復經諭令耆齡等嚴密查叅。茲據奏稱。藩司裕鐸等在紳士姚鏡圖家挾妓飲酒一節。據妓女翠英。優人秀林。先後指證確實。其捐務積弊。查出官吏分用部飯火耗銀兩各情。請分別革審監

追各等語。此案藩司裕鐸等被叅貪劣各款。或供證確鑿。或案據分明。該官吏等猶敢飾詞強辯。顯係恃符狡展。若不從嚴懲辦。何以肅吏治而整紀綱。除章琮。李鼎。胡斌。朱仁。來埴。屠塹。姚鏡圖。葉經。革職外。解任藩司裕鐸。候補道劉翊宸。興泉永道秦金鑑。候補知府陳謙恩。王慶成。知縣王柄。曹學偉。著一併先行革職。交耆齡。徐宗幹。提同全案人證。嚴行審訊。務得確供。按律擬辦。至章琮。陳謙恩等。

尤為刁健。並著加以刑訊。至該員等侵吞捐項銀兩。著照耆齡等單開各數著落追賠。其劉翊宸。秦金鑑。應追之款。既據聲稱設措完繳。卽責令迅速繳清。其始終玩抗之章琮。朱仁。來埴。李鼎。曹學偉。陳謙恩。書吏林玉堂等。並著照例監禁。勒限一箇月。如數追完。丁憂道員司徒緒。英樸。丁憂革員屠塹。均已各回旗籍。並著該部行文該旗籍。查收親供。咨明福建歸案辦理。並將屠塹解往福建勒追應

繳款項。杭州將軍前任閩浙總督慶端任用私人多方袒庇。於屬員荒淫飲譙。侵利營私。毫無覺察。迨經降旨交查。仍敢代為徇隱。實屬欺罔。著交部嚴加議處。尋議慶端應照溺職例革職。從之。○又諭崇厚奏請將目力昏花步履艱澀之冀州直隸州知州丁學易勒令休致等語。丁學易現有被參各款。著先行革職。仍交崇厚從嚴審辦。○諭議政王軍機大臣等。崇厚奏賊勢鴟張。連日追剿情形一

摺。另片奏。飛催宋景詩來營調遣等語。張錫珠股匪竄陷武邑。經姜國仲等揮軍進逼。收復縣城。該匪向東南竄走。馬匹甚多。行蹤飄忽。全賴馬隊官兵追躡。乃薩薩布所帶馬隊六百名不遵該副都統調度。被匪衝散。若不申明紀律。奚以整飭戎行。著崇厚成保確查。此次接仗。首先遁逃之將弁。及不遵號令之官兵。卽在軍前正法。以肅軍令。大名鎮標兵在何處滋事。崇厚自應將約束不嚴之該管

官據實參奏。並將首先滋事之兵勇查拏正法。毋得稍涉寬縱。宋景詩回東省後。譚廷襄前有調赴淄川之奏。現在直隸防勦喫緊。著照崇厚所請。准其催調來營。並著譚廷襄速飭宋景詩趕緊督隊啟行。惟宋景詩降眾與張錫珠本係舊夥。安知張錫珠不與之通信糾合。惟在崇厚詳加審度。察看其實能出力與否。隨時妥為駕馭。毋稍大意。布特哈等馬隊。天津洋槍隊。計先後趕到。兵力不為不厚。

該署督務當激勵諸軍。及各路團勇。分投截擊。盡殲醜類。通賊貽誤。縱兵搶掠之王思第。李鴻塤。伊綿阿等。並交查之案。該署督當迅速遵旨。分別嚴行查辦。以懲其餘。豈可延緩姑容。致玩法者毫無儆懼。昨據寶山奏。已自古北口起程。著該署督迅卽飛催前進。俾得會同祝壇辦理軍務。將此由六百里各諭令知之。○又諭據張凱嵩奏。官軍計擒逆首。收復蓮塘一摺。蓮塘地稱險要。該逆負隅日久。

前經劉長佑勦撫兼施已有端緒張凱嵩接辦以來卽能使將士不稍鬆懈剋期收復洵屬不負委任惟官軍所殺逆匪無多其中必有逃竄伏匿各匪張凱嵩務飭各軍實力擒捕毋使官軍凱撤卽復萌滋擾潯州軍務現在漸已得手劉坤一到後卽著飭令將黃逆殲除其餘容縣之范亞音永淳之孫仁廣永康之吳凌雲各股匪亦當次第殲滅該撫肅膺疆寄務宜事事實心實力認真辦理朝廷

惟以地方之安否繫疆臣之功罪斷不可遷延玩泄致負期望勉之慎之將此由六百里諭令知之○又諭洪毓琛奏郡城防守猶定現擬先靖近城各路再勦彰逆一摺臺灣匪徒猖獗彰城尚被匪踞嘉義及郡城時形喫緊必須添兵濟餉方足以資攻剿前已諭令耆齡徐宗幹迅飭曾玉明吳鴻源諸軍厚集兵力進攻彰化保全嘉義肅清臺境著該督速飭該總兵等督率兵勇會合前進力圖埽

蕩如兵力不敷卽添撥內地官軍迅速渡臺以資勦辦至臺灣餉需並著該督等趕緊設法籌濟洪毓琛現在郡城一切籌防及餉項事宜仍著悉心籌辦就現有兵力分投攻勦不得專恃援師致匪勢日形猖獗將此由五百里諭知耆齡徐宗幹並傳諭洪毓琛知之○以正白旗滿洲副都統文盛暫署鑲藍旗護軍統領○廣東陽江鎮總兵官黃禮鈐因病解職以記名總兵官任星元為廣東陽江

鎮總兵官○擢記名道張銓慶為福建布政使○以廣西勦匪獲勝收復蓮塘賞副將黃仲慶巴圖魯名號道員易元泰守備謝繼貴花翎千總馮鼎有藍翎餘升敘有差○乙卯上以孟春時享

太廟前期親詣行禮○諭內閣沈葆楨奏請將藉辦捐輸影射蒙混之知縣懲處一摺江西代理貴溪縣知縣陸長慶藉捐米為名輒敢將邵姓捐項侵蝕二千兩之多迨經該管道

府及捐局委員舉發。詳請撤任。陸長慶見事已敗露。復以邵姓等所捐銀兩。係捐濟浙江布政使蔣益澧軍餉。稟請蔣益澧委員守催。藉端蒙混。實屬狡詐已極。陸長慶著卽行革職。永不敘用。並勒令該革員將前項捐銀。自行措解。以濟軍需。不准稍有延宕。○諭議政王軍機大臣等多隆阿奏。移營進逼賊巢。並興安府城被圍甚急。各情形一摺。多隆阿自抵同郡後。督軍疊破賊營。回眾技窮。屢次上

稟求解。並有投賊之鮮玉農。哈連陞等。先後遞稟乞和多隆阿分別批斥。所辦甚是。現在王閣村羌白鎮附近賊營。均被官軍焚毀。該匪勢已窮蹙。著卽激勵諸軍。乘勝進攻老巢。將陝省東路各匪。次第削平。其涇陽咸陽各回巢。自不難迎刃而解。瑛榮將新募四營留省防守。該撫務當內察奸細。外捍逆氛。毋得有名無實。髮逆陳得才等竄撲興安府城。有賊營四十餘座。郡城勢甚危急。多隆阿進逼

回巢。正當喫緊。恐難親督兵勇。前赴興安。著仍遵前旨。酌派勁旅。交馬德昭統帶。由子午谷迎勦曹逆。節節掃蕩。馳解興安之圍。瑛榮務當催令馬德昭兼程前進。馬德昭亦當振刷精神。力圖報稱。興安毗連楚境。梁作楫等自應就近馳援。著官文嚴樹森嚴飭該道員等。懍遵疊次諭旨。迅卽繞出賊前。遏其北竄。仍分派得力將弁。會同興安兵勇。力解城圍。如該員等遷延不進。定當從重治罪。並將官

文等嚴行懲處。漢中藍逆未除。甯陝復有川匪滋擾。著駱秉章速派知兵大員。馳赴陝境。先將曹逆殄除。相機援勦。以助陝省兵力。之不及川陝唇齒相依。諒該督必不稍分畛域也。多隆阿另片奏。請將戴鷹翔。祥恩。解交刑部嚴訊治罪等語。著多隆阿派員將該革員等解赴山西省城。交愛仁。王茂蔭就近嚴訊。至前交多隆阿查辦之案。類似祥恩戴鷹翔者。如多隆阿亦因軍務紛繁。難於兼辦。並著

一併移交愛仁等嚴行訊辦至聞不敏施鵬二員罪無可逭著多隆阿於審明後卽行正法鮮玉農前經投賊甚屬可惡哈連陞在潼關紮營被賊擄去朝廷方深惋惜謂其必能殉節不料此次尚列名遞稟求撫如此稟非出自逆回捏造則哈連陞之甘心從逆百喙難辭實屬罪不容誅著多隆阿訪查確實再行具奏將此由六百里各諭令知之○又諭多隆阿自接辦陝西軍務以來覽其所奏留心體察該大臣於陷陣衝鋒頗有將才而於諸事未能通籌全局卽如勝保所部固多桀驁不馴之輩亦當次第遣撤乃旬日閒遣歸兵勇已至七起之多卽不免操之過嚴現在成事不說以後必須事事謹慎方能膺茲重任該大臣身在行間於辦理文案未能親自料理必得公正和平能顧大局之員方可與之參酌軍務辦理合宜否則執持偏見甚至倚勢作威口中之所念或非奏牘中所書該

大臣尤不可不防其弊務當隨時與官文嚴樹森相商訪求正人辦理文案斷不可先橫成見於胸偏聽獨任致有債事現在督軍進剿前有強悍逆回後無策應勦旅內防疑貳之兵外慮勾結之捻必須謀定後動計出萬全該大臣前在楚皖均有威望然當時尚有官文等為之調度故能樹立勳名現在獨當一面尤應虛懷集益不可稍存自是之念一切顧全大局不可意存見小稍自滿假朝廷於該大臣拔自行間畀以統帥不憚諄諄教誡庶幾廓清全陝早奏膚公僕該大臣自謂身為統帥高自位置驕矜自滿則何以克當名將該大臣當時引勝保以自傲省本日據該大臣奏稱目不交睫者三十餘日自因軍情緊急寢食俱廢然該大臣為國宣勤膺茲鉅任亦當倍加慎重以副愛惜成全之意將此由六百里密諭知之○又諭前因多隆阿奏副都統祥恩有寄頓勝保貲財情事該將

軍遵旨派員前往查訊。祥恩輒將派去員弁毆捆當經降旨將祥恩革職。抄交多隆阿嚴訊。復因道員戴鸞翔在勝保軍營舞弊。將該員革職歸案審辦。茲據多隆阿奏該二員屢經研訊堅不吐實。請解部嚴審等語。本日已諭令多隆阿將該二員押赴山西並將原案供招一併移送。卽著愛仁王茂蔭秉公嚴審確情按律定擬具奏。祥恩戴鸞翔均係業經革職之員。如再堅不吐實。著卽以嚴刑審

訊。將此諭令知之。○丙辰享

太廟遣醇郡王奕譞恭代行禮。○遣官祭

太廟後殿。○遣官祭

太歲之神。○諭內閣沈葆楨奏請將不諳文理之同知等官勒休一摺。各省佐貳州縣等官均有地方公事。若文理不能通曉。必至文移訛牒。為胥吏蒙蔽。貽誤實非淺鮮。江西九江府同知博恩。南安府同知唐廷銓。瑞金縣知縣胡長芝。試用知縣袁樹柄。陳大文。吳光

業均屬不通文理。著卽一併勒令休致。○湖北巡撫嚴樹森奏本年舉行大計。部文未到。應請展限辦理從之。○降調兩廣總督勞崇光奏本年廣西軍政請俟軍務稍鬆展限舉行從之。○調奉天府府丞程祖誥為鴻臚寺卿。鴻臚寺卿王映斗為奉天府府丞兼提督學政。○命江西學政馮譽驥。福建學政厲恩。官山西學政洗斌。湖南學政白恩佑來京。以右春坊右中允何廷謙提督江西學政。翰林

院修撰章鋈提督福建學政。編修黃鈺提督山西學政。左春坊左中允錢寶廉提督湖南學政。○以湖南均州等處禦賊出力。予知州熊登瀛。知縣應臺。階林瑞。枝升敘。○以湖北隨州京山。應城各城被賊竄陷。旋即收復。革代理知州馬元驤。署知縣張慶雲職。免治罪。署知縣景匯。革職留任。○丁巳諭內閣。前因耆齡及御史華祝三先後奏參勞崇光任用非人。調度乖方。各款當交穆克德訥。羅敦衍

查覆所叅均非無因。旋以該前督久歷封圻。受恩至重。諭令查明覆奏。經該前督將被叅各款逐一覆陳。並自請嚴議。復經諭令晏端書。覓壽再行查辦。以期平允。嗣據勞崇光先後將販私行劫之陶昌培。章昇耀等遵旨正法。及晏端書奏遵查釐金積弊。將分肥說合之知縣許慶容。劉承緣等降旨革職提訊。並以勞崇光任用非人。照部議降三級調用。茲據晏端書。覓壽奏查明勞崇光覆陳各款。如

所叅該前督將參將卓興調往平遠。以致信宜失陷。及悉索廣東財賦。以應攻潯軍需各條。實因另股賊匪。竄陷平遠。潯梧為東西兩省咽喉。並非調度乖方。虛糜帑項。又副將潘其泰屢著戰功。實非庸懦。嗣因高州勒匪未能得手。業經勞崇光撤回。亦未姑容。其克復梧州。保舉各員。均照總局及各原稟所敘列。會同覓壽等參酌去留。並無不實。候選道馬逢亨捐貲一萬四千餘兩。經勞崇光奏保。雖

訪查尚無拜認師生確據。而原保未免過優。應俟另案訊結再奏。又該前督於商捐京餉及京倉要需。並無私自侵挪。任意稽延情弊。詳加訪問。勞崇光所陳各情。尚無隱飾。所有該前督自請嚴議之處。可否免其再議等語。勞崇光被叅自陳各款。既據晏端書等查明。並無文飾。該前督既經降調。即著免其再議。其廣東釐金事務。著晏端書嚴剔弊端。實力整飭。未結各案。仍著速行審結。以免稽延。○

諭議政王軍機大臣等。景綸奏流匪竄入山場。嘯聚分兵。勒辦一摺。熱河朝陽流匪。葛城澄等。竄至三姓黑背地方。復突至城南烏斯渾屯。搶掠焚燒。聚集至四五百人。裹脅商民至數千名。該將軍副都統等何以並未陳奏。直至滋蔓難圖。始行調兵勒捕。實屬形同贗。著嚴行申飭。景綸現派佐領常喜等帶兵馳赴阿勒楚克三姓一帶。會同富隆額及富尼揚阿所派官兵。會合攻剿。著卽嚴飭帶兵

將領實力勦除。務將首逆殲擒。不准一名漏網。如兵力尚單。卽由景綸等添派兵勇。馳往合剿。以期迅速。藏事至賊由三姓地方糾眾潛匿。富尼揚阿養癰貽患。尤屬咎無可諉。儻再不能奮勉。勦洗力圖自贖。恐難當此重咎也。三姓等處與黑龍江所屬地界毗連。並著特普欽派兵一面嚴扼要隘。杜其紛竄。並一面會合吉林官兵實力勦捕。不得以未經闌入本境。意存吟域。任令蔓延。將此由四百里

各諭令知之。○又諭崇厚奏匪蹤紛竄連日截擊已遏北犯一摺。賊蹤剽疾。自武邑以至阜城景州。所過又數州縣。並未大受懲創。官軍從後尾追。究能殄除幾許。如果賊之所到。兵圍前截後追。使賊不容喘息。則稟脅日見其少。堵剿亦易為功。著崇厚卽速赴東。強嚴遏北路。並嚴飭姜國仲等及催提天津洋槍隊各路兵勇。乘勢痛加勦洗。一面檄諭各屬團練四面兜截。務將此股就地殲除。毋再任

令肆行奔突。景州西南與山東德州臨清壤地毗連。著譚廷襄派兵堵遏。飭令所屬文武激勵團勇。與直隸兵團齊力兜剿。不得任賊伺隙蔓延。亦不得以驅賊出境。遽為了事。宋景詩由東赴直。並著催令迅率所部迎前攔截。奮勉圖功。聞直隸肥鄉縣知縣楊毓楠人甚出色。永年縣知縣謝恕縱賊殃民。難澤縣知縣高樹庠餽賊銀兩。當此地方有事之際。尤應分別勸懲。均著崇厚卽行確切查明具

奏。遮克敦布何以不將王恩第迅卽交出。可見其通賊等情。必係的實。著崇厚懍遵前旨。嚴行提訊。卽於軍前正法。該署督前奏薩薩布馬隊在王家莊被賊衝散。而姜國仲等卽於是日在該處擊賊獲勝。何以彼此勝負兩歧。是否分路並進。抑有臨陣不相援應等情。著崇厚訪查據實陳奏。將此由五百里各諭令知之。○以直隸故城縣團出力。賞署知縣王文田藍翎。餘加銜升敘有差。○予廣東四

會陣亡把總翟超龍等祭葬世職

大清穆宗繼天開運受中居正保大定功聖智
誠孝信敏恭寬毅皇帝實錄卷之五十四

大清穆宗繼天開運受中居正保大定功聖智
誠孝信敏恭寬毅皇帝實錄卷之五十五

同治二年癸亥正月戊午

孝全成皇后忌辰遣官祭

慕陵○諭內閣李鴻章奏審明藩司受傷出城
從重定擬一摺已革前署江蘇藩司候補道
蔡映斗於蘇州失陷後潛逃出城疊經奉
旨拏問交前任巡撫薛煥嚴訊按軍律定擬具
奏茲據李鴻章奏稱該革道於逆賊攻陷蘇
城時巷戰受傷遇救出城雖與棄城潛逃者
有間究屬守禦不力應比例從重問擬發往
新疆效力贖罪事犯雖在恩詔以前不准援

免等語。著刑部覈議具奏。尋議蔡映斗罪名。應如該撫所奏定擬從之。又諭李鴻章奏舉劾州縣各員以示勸懲等語。署崇明縣知縣補用同知直隸州知州錢德承有守有為。循聲卓越。著以知府補用。署丹徒縣知縣田祚見利不趨。見害不避。著以同知直隸州知州儘先補用。署海門同知補用知州梁悅馨廉靜愛民。悃悃無華。著以同知直隸州知州遇缺卽補。代理吳江縣知縣補用縣丞沈錫

華。守潔才優。習勤耐苦。著補授吳江縣知縣。並賞加同知銜。以昭激勸。題補通州直隸州知州依勒通阿辦事鹵莽。不洽輿情。著以知縣降補。荆溪縣知縣田濤貪庸疲劣。崇明知縣姚曾翼年老多病。均著以原品勒令休致。又諭官文嚴樹森奏請將聲名平常年衰體弱之知縣分別降補休致一摺。湖北遇缺卽補知縣羅嘉穉虛浮誕僞。補用知縣陳恩需性情浮躁。均著以府經歷縣丞降補。陳

恩需著仍留雲騎尉世職。應城縣知縣趙慶齡年力就衰。補用知縣汪銘體弱多病。均著以原品休致。以肅官方。又諭毛鴻賓奏查拏土匪生擒首逆等語。湖南南路土匪侯潰隴隨同粵逆洪秀泉起事。旋復折回湖南。糾結夥黨。經前任江蘇按察使陳士杰訪查明確。卽派把總周世烈等將侯潰隴並逆黨吳觀保一併擒獲。解營正法。其偽統戎曹翳子等亦經陸續弋獲。並將蔣木生餘黨馬華華

等擒斬多名。辦理甚為妥速。未獲各犯仍著該撫嚴飭在事各員趕緊緝拏。以清餘孽。而靖地方。又諭毛鴻賓奏委員侵盜餉銀請卽正法等語。所奏甚是。湖南幫辦營務從九品梅潮瀧赴省領餉。私啟印封。捏稟開銷。並攙換低銀。侵盜入己。計贓至二百九十餘兩之多。實屬膽大可惡。非尋常侵盜可比。梅潮瀧著卽革職。交毛鴻賓提至軍前正法。以為營員貪劣者戒。諭議政王軍機大臣等。李

鴻章奏常昭被圍降眾堅守派軍分路進剿一摺據稱逆首偽忠王圍攻常昭官軍進攻太倉偽暮王又率大股赴太協守崑山之賊出竄焚掠各等語常昭周興隆等殺賊獻城上海官軍為崑太兩城所隔不能聯絡駐守本屬可慮該撫現派程學啟李鶴章等分路進紮太崑交界之望仙橋等處著卽督飭各軍嚴密扼剿並設法援應常昭與倫李恆嵩帶常勝軍由松江徑趨太倉與程學啟等會

商進剿著卽將常勝軍妥為籠絡並飭令我軍將士和衷共濟務將太倉攻拔與福山一軍前後夾剿方可以掣援賊之勢而解常昭之圍福山各口關繫緊要著卽督令黃翼升統帶水師並派令劉秉璋等督催常勝軍添調輪船會合鞠耀乾等各部攻奪要隘力遏賊氛並著都興阿飭令吳全美等添撥師船會合夾擊富明阿既赴下游查看卽著隨時相機策應毋稍貽誤將此由六百里各諭令

知之○又諭瑛榮奏探聞興安府鎮兩城於上年十二月二十等日先後被髮逆攻陷覽奏曷勝憤懣現在咸陽喫緊曹逆竄踞江口另股回匪竄入鄆縣省垣糧道梗塞拏獲奸細譯出回教番書又有約期攻撲省城之語據該省紳士李宗沆等公懇暫留馬德昭仍駐省垣以資保衛經瑛榮錄呈具奏權衡緩急不能不俯允所請馬德昭著准其暫留西安所有省城防剿事宜著責成瑛榮會同穆

騰阿馬德昭實力籌辦至興安南通楚蜀北接省垣若該匪盤踞日久必與曹逆勾結蔓延漢南為患甚巨是勦辦興安髮逆又刻不容緩馬德昭既不能帶兵出省仍著多隆阿抽撥兵勇派明幹大員統帶由于午谷迎勦曹逆遏截北竄之路力保省垣再行相機進剿並著官文嚴樹森嚴飭梁作楫等趕緊馳赴興安力圖收復該道員驅賊出境並不跟蹤追躡以致興安被陷本有應得之咎儻再

不知奮勉。卽著從嚴叅辦。卽屬帶兵將領。均係鎮道大員。彼此不相統屬。未免意存推諉。官太嚴樹森相距太遠。亦恐呼應不靈。卽著察看情形。如必須該撫前往調度。卽著嚴樹森迅赴鄖陽督率諸軍越境援剿。儻該撫不能親往。務須於派出帶兵大員內責成一員統率。以一事權。據瑛榮奏毛震壽勦辦漢南賊匪。一時恐難歲事等語。毛震壽所部本係川省兵勇。卽著駱秉章速派知兵大員來陝。

接辦漢南軍務。仍遵前旨酌調勁旅會剿。曹遂以濟陝省兵力所不逮。西安無賴回民。既有勾通外匪之信。著穆騰阿瑛榮馬德昭隨時嚴密查察。相機妥辦。城外糧道馬德昭務當督率兵勇設法疏通。毋為該匪所困。多隆阿進攻王閣村等處回巢計可得手。仍著隨時兼顧省垣。以副委任。雷正綰督軍援陝。有幫辦軍務之責。著激勵將士進攻咸陽一帶回巢。牽制賊勢。一切進止機宜。多隆阿當隨

時與雷正綰往返函商。推誠相與。切不可各存意見。貽誤大局。將此由六百里加緊各諭令知之。又諭毛鴻賓奏遵籌赴東將弁並收復蓮塘各一摺。湖南距東較遠。若募勇成軍。需費浩繁。不如就地取材。卽著飭令丁寶楨揀調文武將弁。由湖南酌給行資。攜帶赴東募勇訓練。現在東省軍務毫無起色。丁寶楨旣久歷行間。務令剋期前赴新任。至江忠義一軍。前因皖南北軍情喫緊。諭令率部赴

皖。嗣據毛鴻賓奏派席寶田東下。已降旨令江忠義署理廣西提督篆務。現在潯州軍務尚未肅清。江忠義仍著赴粵。以專責成。鄧子垣等一軍。粵西是否尚有應勦之賊。著毛鴻賓張凱嵩籌商妥協。再酌量遣留。毛鴻賓能顧大局。該省紳民亦能以公事為急。均堪嘉尚。其蓮塘善後事宜。按捕餘匪。清查戶口。追繳器械。乃地方官應辦之事。卽著張凱嵩派委幹員。妥速辦理。其查辦土匪案內之舉人

李波卽李博身厠科名句通逆匪務須緝獲重辦以申國法將此由六百里各諭令知之○兩江總督曾國藩奏請展緩本年大計俟軍務稍平再行舉辦從之○以山東按察使吳廷棟為大理寺卿○以署陝西按察使丁寶楨為山東按察使已革江西布政使張集馨為陝西按察使○以湖南官軍援勦廣西收復蓮塘賞總兵官王永章巴圖魯名號餘升敘有差予陣亡參將李澤明等祭葬世職

加等○蠲緩江蘇華亭婁丹徒寶山上海崇明奉賢金山南匯川沙十廳縣暨蘇州太倉鎮海金山鎮江五衛被擾地方節年額賦有差○蠲緩江蘇儀徵江都甘泉沭陽泰興靖江桃源山陽阜甯安東清河銅山宿遷十三縣暨大河淮安揚州徐州鎮江五衛被擾地方新舊額賦並雜課有差○

上以次辛祈穀於

上帝自是日始齋戒三日○己未諭內閣前因

御史劉其年奏裁減河工經費並請將河東河道總督一缺裁去降旨交張之萬詳悉妥議具奏茲據奏稱河東河道總督一缺兼轄兩省黃運河工關繫非輕未敢率議裁撤俟詳加體察再行奏請惟南岸所屬四廳北岸所屬三廳河道均已乾涸各廳員一無所事均可裁撤等語所有山東所屬之曹河曹單二廳著山東巡撫酌量辦理其河南所屬之蘭儀儀睢睢甯商虞曹考五廳著照該撫所

請卽行裁撤並著該部援照南河裁缺成案查議具奏尋閣敬銘奏遵查曹河曹單二廳自應一律裁撤吏部等部奏查豫省五廳業經裁撤其撤回各員應請仍留東河照例歸卽用班補用其各廳員廉俸役食暨各廳每年工費均可節省並所屬灘地若干應收租銀若干應令該督撫一併查明報部從之○又諭前因塔布囊丹巴及孟古勒津旗達拉瑪等以苛派苦累等詞赴都察院呈訴均經

降旨交熱河都統提審嗣因喇嘛林沁復以前情呈控當派侍郎阿克敦布前赴熱河會同都統瑞麟提集人證秉公查辦茲據阿克敦布等奏審明互控情形按例定擬一摺此案梅倫格位扎拉散明知阿勒巴圖差重不惟不加體恤反於求恩減差時喝阻不允幾至激成事端雖訊無私斂入己情事實屬任意苦累屬下協理旗務土布丹扎布因與格位扎拉散係屬姻親輒坐視眾困厥罪惟均

格位扎拉散著革去梅倫土布丹扎布著革去協理均永遠不准當差齊達勒糾眾訛錢實屬兇惡著照兇惡棍徒極邊軍例枷號九十日塔布囊丹巴先因捏控畏質情虛逃匿復敢糾眾赴京將已結之案翻控實屬健訟著革去塔布囊照積慣訟棍極邊軍例枷號九十日達拉瑪以傳聞無據之詞砌飾呈控著照丹巴軍罪上減等杖徒例枷號三十日塔布囊棍丹得吉特屢次售賣阿勒巴圖之

女雖據供不諳例文究屬任性著革去塔布囊從重鞭責另片奏體察熱河所屬蒙古地畝差項情形請明定差錢數目並添派委員會同卓索圖盟長清查地畝力除積弊及嚴禁塔布囊不准例外加增牛一語所籌尚屬周妥即著瑞麟斟酌情形明定章程奏請辦理又諭張之萬奏請將玩泄地方之府縣各員懲辦等語河南南陽府知府金梁桐柏縣知縣邱仲坦自逆捻陳大禧敗竄楚境

後屢經該撫劄飭齊集團練扼堵竄越乃該逆竄至桐柏境內距縣城僅二十里並不聞該縣督團扼守且無一字稟報實屬形同聾瞶邱仲坦著即革職查明如有畏葸別情再行從嚴參辦金梁於賊竄所轄縣境毫無布置該撫僅請革留尚覺寬縱著一併革職以為玩泄地方者戒又諭議政王軍機大臣等前因熱河朝陽流匪竄至三姓搶掠焚燒當經諭令景綸等會同特普欽派兵會剿茲據

景綸等奏匪首葛城澄等糾匪萬人分路撲城經佐領凌祥等督兵截擊副都統富尼揚阿督率兵勇接應葛逆身受重傷逆勢不支向南敗走四散等語此股賊匪前據景綸等奏聚集四五百人裹脅至數千人此次奏稱約有萬人是其嘯聚日多一日雖官軍接仗小勝而匪眾四散仍未大受懲創該處山勢雜沓賊匪最易藏匿著景綸麟瑞特普欽懷遵前旨督令派出兵勇會同甯古塔阿勒楚

喀副都統一體進兵跟蹤追躡入山窮搜並飭令各該地方官督率兵團次第勦捕查拏毋令日久蔓延吉林三姓與昌圖毗連該匪業經南竄設被闖入盛京根本重地又復喫重著玉明迅即豫派得力將弁督帶兵練實力扼勦與吉林黑龍江官軍會合兜拏毋留餘孽將此由五百里各諭令知之○又諭僧格林沁奏勦辦捻棍各匪疊勝情形並譚廷襄奏各匪被擊回竄各摺片此次僧格林沁

督軍攻毀蘇添才馬村橋捻巢即移營皮橋擬進攻唐家寨等處先清後路以期節節進逼所籌甚合機宜惟蘇添才尚未擒獲著僧格林沁督軍殲除毋任死灰復燃張落刑窮蹙思竄實在意計之中該大臣務當嚴防不令他竄方為妥善李城股匪竄至山東日照經該地方官督勇迎勦該匪全股竄回著僧格林沁嚴飭德楞額等認真攻勦毋任紛竄僅譚廷襄布置未協則罪無可逭如德楞額

挾嫌坐視亦責有攸歸文彬本係初任之員所帶之兵恐難獨當巨擘德楞額不得稍涉推諉其長城賊圩著譚廷襄責成黃國瑞迅速殲除張錫珠現由武邑竄近景州崇厚督兵堵勦德州相距甚近著該前撫飭令該州文武帶勇集團會同直隸官軍夾勦以期剋日蕞事雷鳳鳴既與宋景詩積不相能准其調至兗州軍營務當妥為駕馭毋稍大意將此由六百里各諭令知之○又諭張之萬奏

直東寇氛擾及北部。飭各軍會同地方兵練扼剿各摺片。陳逆疊經官軍痛剿。負隅固鎮。此次潰圍而出。計窮勢蹙。當不難力圖翦除。著張之萬嚴飭張曜等跟蹤追剿。搗穴擒渠。以清巨患。並著咨會楚省官軍。兩面夾擊。肅清南圍。至河朔一帶。據該撫奏稱。自楊長春等擊退邯鄲竄匪後。該副將回紮豐樂鎮。惟直境匪徒肆擾。臨漳一帶。伏莽尚多。難免不互相勾結。仍著飭令該副將會同該地方官

嚴密搜捕。毋留餘孽。將此由五百里諭令知之。○又諭前聞陝西漢中鎮總兵哈連陞欲將家眷接至潼關。又聞將家眷送回古北口。該總兵後在潼關。為回匪裹去。聞至今尚在賊中。著瑞麟密派妥員前往古北口一帶訪問。該總兵家眷是否尚在該處居住。此時本不辦理。不過訪查下落。以覘該總兵為回眾裏去。是否出於猝不及防。抑或先通消息之據。諒該都統當能體會此意也。將此密諭知

之。○又諭阿克敦布瑞麟奏會同審明蒙古京控案件。按例定擬一摺。另片奏體察熱河所屬蒙古情形。明定章程。出示曉諭等語。阿勒巴圖生齒日繁。既無可耕之地。又無可牧之廠。該官員等不知體恤下情。復將逃丁應交之差。派各丁交納。以至益形苦累。現經瑞麟飛飭卓索圖盟長喀喇沁王色伯克多爾濟會同查辦。先將該旗差項弊竇嚴行禁革。該都統仍當留心稽察。如查有藉端影射。任

意加增情弊。卽隨時從嚴懲辦。所有該旗地畝。並著嚴飭添派之委員等。會同該盟長委員按照成案逐一清查。如今昔情形不同。必須量為變通。該都統務當平心體察。妥籌辦理。總期積弊盡除。差項輕減。俾官民永遠相安。方為妥善。至塔布囊陪嫁侍女。向例准減而不准增。塔布囊何得濫派。著瑞麟行令該盟長轉飭塔布囊。將例外加增侍女。迅卽給親完聚。不准藉詞延宕。蒙古民情質樸。雖經

該都統等督飭司員詳切開導該老頭會眾人等恐未必坦然無疑著照該都統所奏迅將辦理地畝差項緣由明定章程剴切曉諭以杜訟端而安藩部將此諭令知之○以湖南衡山縣續捐軍餉永廣學額一名○予河南固鎮陣亡副將鄒見思等祭葬世職加等○庚申諭內閣翰林散館歷科均用詩賦考試因近來積習相沿專於研揣聲律不求實學前經降旨自癸亥科起庶吉士散館改詩

賦為策論原期講求實用培養真材茲據御史陳廷經奏稱歷代取士法制屢更行之既久莫不有弊惟在用法得人不必遽改定制庶常散館嗣後請仍用詩賦等語翰林院為人才淵藪膺是選者平日於古聖賢經史性理諸書果能講明切究身體力行自然學問優長體用兼備發為策論既不同陳言勦襲作為詩賦亦不徒競尚聲華該庶吉士等必應兼擅其長始為名實相副著自癸亥科為

始嗣後遇散館之年該衙門於先期一月具奏請旨於詩賦策論兩項內不拘何項出題考試該庶吉士等仍當研求經術修明正學求為本末兼賅之士俾詞章經濟相輔而行用副朝廷樂育英才至意○又諭左宗棠奏查明失守城池之情節可原各員開單懇請免罪留營一摺咸豐十年十一年間賊匪竄擾浙省署諸暨縣知縣許瑤光等失陷各城例有應得之罪惟據該撫聲稱各該員或到

任未及數日倉卒被陷或平日官聲素好臨時殺賊受傷或事後隨同收復城池雖罪有應得而情尚可原與聞警先逃棄城不守者究屬有聞所有單開之補用知府候補同知署諸暨縣甯海縣知縣許瑤光代理海甯州知州海甯州州判宋昭綸奉化縣知縣徐傳冕補用同知代理平湖縣知縣汪元祥升用同知餘姚縣知縣陶雲升均著革職免其治罪准其留營差委○諭議政王軍機大臣等

有人奏崇厚庸劣畀以重任難期得力一摺。直隸地方軍務緊要前因劉長佑一時未能卽到令崇厚暫行署理總督原以畿疆軍務不可一日無人督辦責任綦重茲據奏稱崇厚聲名甚劣歷任通永各道甚屬平庸升任運司及升侍郎駐津後亦多劣蹟倚任春霖及劣弁郭文奎等於海防並不認真操演查辦許誦恆之案一味彌縫如籌通商則見輕外國辦釐金則提保官階節壽陋規多至數

倍並收買部民之女為妾等款如果屬實均干例禁雖屬權任畿疆必至徇私妄作現在董恂已赴天津接辦三口通商事務著卽按照所參各款秉公確切查明據實具奏原摺著鈔給閱看將此諭令知之。又諭有人奏直隸深州紫金山廟內匪僧長太於上年夏秋間聚眾多人投往東省此次東匪入境卽係長太與上年投誠王洛月之弟王貫三王貫四乘騎前導賊過之處止有鄉團抵敵官

兵但隨後跟追沿途擄掠等語王洛月前在勝保軍營投誠後何時復回深州現在該匪首及其弟王貫三等並匪僧長太及所聚黨與蹤跡均著崇厚確切查明具奏該匪眾等導賊擄掠難保不潛回本境並著崇厚飭令地方文武隨時嚴密掩捕絕賊內應毋稍疏縱田家莊團勇為賊畏忌匪眾必欲報復恐該團勢孤無援或致失事該署督務當聯絡附近鄉團四面援應並酌撥兵勇協助毋令

賊勢益張致各處團勇望風退怯沿途搶掠之官兵卽著查明懲辦以肅軍律宋景詩由晉赴東經過州縣地方有無索餽酒食銀兩及搶掠等事一併查明據實具奏原片著鈔給閱看將此諭令知之。又諭左宗棠奏官軍圍攻龍游湯溪兩城截勦金華蘭谿援賊疊獲勝仗一摺官軍進攻龍游湯溪全浙之賊亦併力西趨堅圖抗拒湖紹兩郡賊首偽戴王等各率其黨廣聚金華城外連營數十

里新昌等處之賊與蘭谿踞匪譚星合勢亦連營數十里十一月十三至十二月初十等日龍游各營截擊出城之賊約斃數百名蔣益澧圍湯溪等軍自十一月二十二日至十二月二十一日一月之中疊有擒獲官軍因攻壘未下亦有傷亡尚未能十分得手現在龍湯之賊接濟已斷不能久存著左宗棠督飭蔣益澧劉典等軍乘勢進攻毋稍鬆勁該逆等注意西竄欲抄官軍後路不可不嚴為

防範常山江山等處路路可通著卽飛咨閩浙總督江西巡撫一體派兵嚴防左宗棠亦應豫為部勒於江皖道路嚴密布置毋任乘間竄突甯波官軍漸偏曹娥江距紹興府城僅五十里如漸偏漸緊該逆等亦未必不分兵回援該撫務當激勵中外各軍實力進剿以牽賊勢近日軍情仍著隨時馳奏以慰廑繫將此由五百里諭令知之○浙江巡撫左宗棠奏請以己革總兵官羅大春留營差遣

允之○予浙江杭州合門殉難乍浦副都統傑純祭葬世職加等諡果毅於死事地方暨任所並建專祠眷屬人等分別旌卹附祀○予浙江仁和殉難知縣吳保豐祭葬世職加等入祀杭州昭忠祠○予浙江蘭谿陣亡參將王浮龍祭葬世職○辛酉祈穀於上帝遣惇親王奕訢恭代行禮○宣宗成皇帝忌辰遣官祭慕陵○

上詣

奉先殿行禮○諭議政王軍機大臣等崇厚奏賊竄東境分兵越境追剿一摺此股賊匪自王家莊武邑擊敗後盡力狂奔官軍從後尾追總未及賊接仗焉能逐漸殲除茲復據奏賊竄棗強邊界復由山東武城境內直奔威縣東南之尖莊乘夜偷渡河東餘匪竄至館陶縣屬之方兒寨一帶意圖抗拒何以賊之所向官軍總未能繞出賊前攔擊而所過州

縣亦長驅無阻。山東邊界所派帶兵防剿。係屬何人。竟致賊之所到。如入無人之境。該地方文武所司何事。著譚廷襄查明據實。嚴參崇厚。訪查明確。亦即從嚴參奏。前據遮克敦布繪圖貼說。於尖莊河添設礮船。現在已將遮克敦布之兵歸祝壇統帶。該處有無礮船。何員帶領。何以任賊渡河。著崇厚譚廷襄一併查明具奏。其前此奏報故城及東鹿田家莊等處。擊賊出力之團練人等。並著查明速

卽保奏。以示鼓勵。此次摺內所稱山東武城境內。又被團練截擊。奪獲大車數十輛。如果實係與賊見仗。有所斬獲。卽一併查明擇尤保獎。毋令掩抑。現在賊既竄至館陶之方兒寨。意欲負隅抵拒。正可乘此痛加勦洗。其前隊騎賊渡過河東。現抵何處。崇厚已馳赴威縣。著卽就現到各營兵勇。越境進剿。調集各路鄉團。在於西北東北兩面兜截。並再飛催天津洋槍隊及黑龍江後起官兵。迅速圍剿。

並著譚廷襄飛速派兵。嚴飭所屬地方文武。調集團勇。迎頭攔截。與直隸官軍聯絡策應。務將此股賊匪就地殲除。毋任賊氛分合。自如。及與各處伏莽勾結。再行回竄。此股賊匪一日未滅。畿疆一日不安。賊蹤剽疾異常。必須得力馬隊追剿。方能制其死命。著僧格林沁於所部馬隊酌量派撥一千或數百名。遴委熟經行陣之員帶領。星馳前來。以利攻剿。方兒寨係賊熟到之地。前此文煜遮克敦布。

卽因賊竄該處。遽報畿疆一律肅清。旋復任賊回竄。又肆鴟張。崇厚等如不能將此賊迅速殲除。前車可鑒。卽譚廷襄亦不能以賊氛屢入東境。任其往來。謂朝廷寬典之可數邀也。懍之。將此由六百里各諭令知之。○又諭張之萬毛昶熙奏。擒獲巨擒。及追剿陳大澐獲勝各摺片。捻首張鳳林赴營詐降。意圖嘗試。經張之萬等密飭張曜等設計誘擒。所辦甚妥。張鳳林與陳大澐狼狽為奸。張鳳林業

經就戮。陳大禧逆勢已孤。現經我軍跟蹤追剿。該逆逃入土扶橋。霍光玉寨內。經張之萬嚴飭張曜等四面合圍。毛昶熙派軍繞出東面。遏賊竄路。著卽督飭該總兵等乘勝攻剿。一鼓殲擒。若再縱令他竄。定惟張曜等是問。尹寨李灣既經攻拔。著該撫等卽責令趙鴻舉余本初等。乘此聲威。將東南各寨節節掃蕩。務期一勞永逸。迅速奏功。張之萬另摺奏河南軍務地方情形。所陳吏治諸弊。軍務諸

難。持論頗見真切。吏治一節。則曰當用慈祥愷悌之人。不用武健嚴酷之吏。軍務則曰俟南圍肅清後。擬將全省兵力。分為四軍。扼紮陳州太和等處。已得提綱挈領之要。惟為治之道。貴能行。不貴能言。該撫到豫兩月。於豫省積弊。卽能言之歷歷。瞭如指掌。如果隨時體察。次第施行。不倦。河南雖係殘破之區。無難日有起色。張之萬既經朝廷特簡。斷不拘以常格責效。目前該撫務當躬行實踐。慎始

圖終。以副委任。勉之望之。原摺留覽。將此由六百里諭令知之。○又諭平瑞奏勸捐濟餉。並文永奏請飭哈密協餉各一摺。烏魯木齊所屬各城。因歷年餉需缺乏。兵丁困苦難支。經平瑞勸諭商民捐輸。已獲實銀五萬餘兩。分撥本城及巴里坤古城吐魯番各城俸餉。兵心藉以稍定。甚屬可嘉。該商民等急公好義。自應迅予獎勵。以昭激勸。著卽查明速行具奏。其各城捐戶。俟報有成數。亦卽速為奏

獎。惟所捐銀數。僅數去冬今春之用。該處所屬各城缺餉日久。兵丁窮困已極。若再無接應。大局不堪設想。著熙麟恩麟於應撥該處餉項內。速行籌撥解往。並著英桂將烏魯木齊等城協餉。趕緊撥解甘肅。以便轉解烏城。毋得視為具文。致滋貽誤。至巴里坤官兵俸餉積欠甚多。前經諭令興泰等於所收稅課內。每年提借銀數千兩。俟甘省撥款到日。陸續歸還。現在甘餉未到。而巴里坤待餉甚迫。

哈密稅課儘有贏餘可撥。興泰等何得藉詞推諉。置鄰境危急於不顧。著卽趕緊提銀三千兩。迅速解赴巴里坤。以資接濟。並將起解日期卽行奏聞。儻再推諉遷延。恐不能當此重咎也。巴里坤兵丁。有因困餓凍斃。並短見輕生者。情殊可憫。所有甘省欠解該城餉銀。著照麟恩麟卽為籌撥。陸續解往。毋再延宕。將此由五百里諭知平瑞文永興泰文祥端昌熙麟英桂。並傳諭恩麟知之。○古城領隊

大臣文祥奏。請開懇草湖地畝升科濟餉。並本營牧馬草廠。開懇升科。如所請行。○以河南計擒擒首張鳳林。賞總兵官張曜翰林院檢討吳元炳等。加銜升敘有差。○壬戌。

上詣

大高殿

壽皇殿行禮。○諭內閣。前因升任內閣侍讀學士王拯奏。參廣西學政張正椿貪污各款。當經降旨。將該學政撤任。並諭令勞崇光劉長

佑嚴行訪查。據實具奏。茲據奏稱。該學政按試平樂梧州。所取永安州寄籍新生。捐輸銀三千九百五十兩。容縣新生軍餉銀七千兩。均由各該地方文武經理。該學政尚無侵蝕。入己情弊。至加索新進童生內規卷價各款。並自行笞責童生。肆行陵辱。尚無實據。惟容縣捐籍一事。士心不服。眾議譁然。且該學政精神短少。閱卷草率。去取未當。輿論不平。等語。學政為風教所關。試卷去取。理宜精心校

閱。張正椿一味草率。何以丕振文風。雖據奏稱尚無貪污實蹟。但其補行容縣歲科考五次。所取新生。僅土著一名。餘均係籍隸廣東。捐貲收考。且未經縣府考錄申送。其是否身家清白。有無過犯。該學政並未稽查。實屬故違定例。辦理荒謬。且於各新生繳捐銀兩時。當堂秤兌。尤乖體制。張正椿著交部嚴加議處。尋議張正椿應照違制例革職。從之。○又諭勞崇光等。奏查明已革紳士。並無受賄包

庇鄉團請開復原官等語。此案已革廣西紳士唐岳督辦通省團練。因署平南縣知縣羅綱聽信北團一面之詞。輒將南團紳士舉人劉彥文等擅行殺害。該舉人家屬及平桂團紳等致信唐岳求其代為申雪。唐岳覆書許為代稟總督及致信御史。虛詞撫慰。羅綱將信截回。遂稟許唐岳受賄包庇。經前任巡撫曹澍鍾將唐岳羅綱一併奏參革職。其實該革紳並未代為稟訴。亦並無平桂團紳致信

時隨寄銀物。及每年收取例規情事。其非把持包庇已不辨自明。若概予褫革殊不足以示區別。而昭公允。已革鴻臚寺卿銜候選郎中唐岳著開復原官。並賞還花翎。仍責令督辦通省團練。輔助官兵勦賊。以收實效。羅綱擅殺有功團紳。罪有應得。業經身故。著無庸議。○諭議政王軍機大臣等都興阿奏查探遠近賊情。並富明阿奏遵查沿江情形各一摺。常州逆首。打造鐵練。豫辦麻繩。火藥。綫。欲

於正月分股攻撲鎮江。如江北兵勇過江救護。即乘虛由餘塘等處過江。直犯靖泰。偽護王等帶賊二十萬。已抵金陵之淳化溪。聲言由下關渡九洲。大股下竄儀揚。從邵伯直撲裏下河。是賊匪情形巨測。大江南北均形喫緊。鎮江為濱江要郡。馮子材等扼守數年。頗著威望。著該提督探明賊蹤所向。奮力擊勦。毋稍疏懈。曾國荃大營甫臻安穩。該逆大股已抵淳化溪。雖聲言欲竄裏下河。難保非

聲東擊西。著曾國藩轉飭曾國荃加意防範。該藩司分防蕪湖等處。儻賊匪再圖攻撲。大營兵力是否足敷防勦。並著該大臣悉心籌畫辦理。都興阿因江防緊急。據奏已咨曾國荃將前此赴援各營兵勇撥回原防。並著飭曾國荃察看情形。先其所急。酌量妥辦。上游和巢官軍擊賊獲勝。將來賊勢不支。必回竄渡江。而儀揚等處必應豫備不虞。著該將軍會同富明阿隨時探明。刻刻防範。毋任紛竄。

富明阿察看江面已竣。布置一切均尚妥協。如下游靖泰等處喫緊。卽著富明阿親自前往調度。富明阿另片奏裏下河抽釐積弊。已明降諭旨。將知府嚴邈等革職矣。該都統於辦理此事。甚屬認真可嘉。若能將釐局歸併。委員裁撤。則浮費可減。商旅亦便。於軍餉民情。均有裨益。本日諭知吳棠認真裁汰。著都興阿富明阿悉心籌酌。應如何歸併。以裕軍餉之處。卽咨商吳棠辦理。不必稍存越俎之嫌。將此由六百里各諭令知之。○又諭富明

阿奏稱沿江各港口及裏下河一帶南北臺設立捐卡。大小約有百餘處。有一處而設數卡者。有一卡而分數局者。委員多而局費濫。徒飽私橐。何由涓滴歸公。請飭整頓等語。釐捐為江北軍餉所賴。釐卡紛歧前已疊次被人參奏。諭令吳棠嚴行裁汰。現經富明阿目覩情形。據實具陳。亟應歸併裁汰。以蘇民困。江南紳士大半避居江北。以釐卡為謀食之

所。其牟利肥己者。斷不止嚴邈彭蘊括二人。著吳棠嚴查各卡委員。如有侵吞情弊。卽行據實參辦。不准再有瞻徇。至各處捐卡。應如何歸併及裁汰冗糜之處。並著悉心妥辦。總期涓滴歸公。以裕餉源。原片著鈔給閱看。將此諭令知之。○又諭恩麟奏漢南軍營餉匱兵譁。瑛榮奏省城賊氛緊逼。糧道不通。各一摺。毛震壽自上年督兵來陝。將鄧逆一股殲除。後洋縣失陷。迄未攻克。雖係餉絀兵單。究

因該藩司調度未能得力。本日已諭令駱秉章酌撥軍餉。解赴漢南接濟。仍著瑛榮嚴飭毛震壽激勵兵勇。迅圖攻拔。洋城毋再遷延。致干重咎。據瑛榮奏稱省中倉糧將盡。詳潰堪虞。雷正綰駐紮三原。每日派隊運糧接濟。成祿軍營不能顧及防剿。涇陽現係空城。成祿駐此亦屬無益。請將雷正綰調回省垣。先清附近賊巢。並令成祿移紮三原就食等語。涇陽雖無居民。不可無兵駐守。若將成祿撤

回三原該匪占踞涇城。勦辦又覺費手。雷正綰馬步各營。應否調回以拯省垣之急。著多隆阿察看情形。酌量調遣。馬德昭一軍。現在紮營何處。何以瑛榮未經提及。著馬德昭恪遵前旨。將附近回巢。盡力勦洗。多隆阿身膺重寄。必須統籌全局。相機調度。省垣關繫甚重。尤當妥籌兼顧。如果賊勢太盛。糧道梗阻。馬德昭兵力單薄。不敷攻勦。該大臣務當先其所急。卽雷正綰等不能前往。必當撥兵救

援。像株守一隅。置省垣於不顧。設有疏虞。朝廷賞功罰罪。一秉大公。豈能於多隆阿稍加寬恕耶。懷之勉之。瑛榮另片奏烏勒興阿常海二員。所帶吉林黑龍江馬隊三百餘名。因人馬疲乏。經多隆阿遣赴潼關調養。又有無馬之兵二三百名。頗可訓練。請飭多隆阿調赴省城助勦等語。著多隆阿迅令烏勒興阿常海統帶所部。前赴西安。以備調遣。將此由六百里各諭令知之。○又諭前因陝西藩司

毛震壽在陝南勦賊日久。無功疊被叅劾。諭令駱秉章查明具奏。尚未據該督覆奏。現據恩麟具奏。該藩司以洋縣藍逆衝陷官軍營盤。兵飢餉絀。貽誤大局。稟請奏叅治罪。察其所稟各情。該藩司一籌莫展。斷難望其復振。而陝南賊勢日熾。不可不急易一統兵之將。以專責成。易佩紳陳天柱名位雖卑。其才力是否足以獨當一面。或川省另有武職大員。可以派往。均著駱秉章酌擬具奏。藩司關繫緊要。如有知兵之員。固屬人地相宜。儻一時未得其人。但得實心任事之賢員。亦可望其勝任。駱秉章素能留意人才。著卽迅速奏聞。候旨簡放。或川省未得其人。卽於該督平日所知。可以迅速到任者。亦不妨出具考語。據實具奏。甘肅回匪滋擾。提督馬德昭尚在西安。未能赴任。而該省總兵亦俱在各路軍營。現委副將遊擊護署。難望得力。肅州鎮總兵何勝必。巴里坤鎮總兵熊煥章。近在川省。著

駱秉章卽飭該二員迅帶所部。取道白馬關。馳赴甘省。用資會剿。再署湖北提督江長貴。前經給假回籍。著該督卽飭迅速馳赴直隸。聽候簡用。並著傳諭該提督卽日起程。不必俟假滿再行北上。至駱秉章所患咯血。是否痊愈。老成耆宿。中外無多。如病體稍痊。卽行馳奏。用慰廑念。將此諭令知之。尋奏易佩紳。陳天桂。非統帥才。川省無員可派。陝藩緊要。知兵者難其人。現任臬司吳昌壽官聲卓著。

王榕吉明幹有為。前任藩司賈洪詔辦事實。心謹就所知所聞。酌舉三員。報聞。○又諭傳諭護陝甘總督恩麟。恩麟奏攻勦靈州回匪。獲勝。匪勢窮蹙。乞降。並甯夏平羅回匪。乘閒竊發。河州回民悔罪乞恩。懇陳餉絀。兵單。不得不從權辦理。各摺片。道員侯雲登督兵勦捕靈州賊匪。解圍後。親率兵勇。馳往平羅救援。因未能審度地勢。率行前進。以致挫敗。本有應得之咎。惟侯雲登以文員請署武職。尚

屬勇於任事。非畏縮不前者可比。著加恩免其議處。協領奎林等於郭家橋之戰。應援遲緩。念其併力救護。轉敗為勝。一併從寬免議。平羅一帶回匪。誤聽流言。膽敢肆行紛擾。經侯雲登選派妥弁。及回民掌教人等持諭解散。已有悔悟之意。著卽責令速將起意滋事。及造言煽惑各要犯。縛獻究辦。如敢抗違。仍應實力勦除。毋稍遷就。其靈州股匪。現旣畏威懾服。著責成定安。楊柄銓等查明真偽。分

別辦理。河州回眾。因爭渡啟釁。肆意搶掠。本應嚴行懲辦。惟大兵未集之先。已悔罪投誠。不無一綫可原。著照恩麟所奏。飭令崇保等督同在事文武。秉公查辦。惟該回眾是否真心就撫。總約馬萬詳等跪道哭訴。是否出自至誠。須詳加體察。不可為其所愚。如該回眾不肯縛獻首犯。交還據去財物。卽著調集大兵。痛加勦洗。斷不准稍事姑容。致貽後患。○以貪鄙不職。革江蘇釐局委員知府嚴邈。知

州彭蘊括職交署漕運總督吳崇查辦。○予甘肅平羅陣亡佐領吉星防禦慶連署守備郭宗魁教諭包叶恆等祭葬世職加等。○癸亥諭內閣國家愛育黎元體恤商民從無苛刻之事。近因軍餉浩繁設局抽釐乃朝廷萬不得已之舉。疊經明降諭旨嚴禁擾累。並因御史丁紹周條陳江北釐捐積弊復經通諭各直省督撫於釐捐委員概行裁革統歸地方官經理。按月申報實數。由該管督撫按照例限報部。並照部定章程酌定簡明條款分晰開載榜示通衢以昭覈實。乃昨據富明阿奏稱親赴裏下河一帶南北糧臺設立捐卡大小約有百餘處。有一處而設數卡者。有一卡而分數局者。委員既繁局費尤濫。每月局用少者二百金多者至千餘金。委員嚴邀等貪鄙不職。因降旨將嚴邀等革職以示懲儆。而吳崇於奉旨後迄今數月並未遵照辦理。該署漕督受恩至渥尚復如此瞻徇甚負委

任著傳旨嚴行申飭。卽著歸併裁革以清積弊。因思江北如此他省可知。聞地方不肖紳士往往夤緣入局百端侵漁商賈不勝其擾。而軍餉仍無裨益。是以朝廷不得已之舉。為不肖委員紳士分肥之地。利歸於下怨斂於上。亦安用此釐局為耶。著再行通諭各直省督撫恪遵前旨將各釐局酌量歸併裁革劣員派委賢能地方官經理毋得以不肖官紳充數。儻仍前瞻徇濫行派委別經發覺或經科道叅奏必將該督撫等從嚴懲處毋謂不戒視成也。○甲子諭議政王軍機大臣等譚廷襄奏叛匪回竄東境現飭各軍截擊一摺。所奏賊由景州故城館陶以至臨清州搶渡擾及堂館之王家隄清水鎮等處與前崇厚所報大略相同。本日又據崇厚奏賊由館陶方兒寨竄至邱縣之東目寨經候補道劉策先帶兵追剿賊復竄至臨清州屬之邵家莊現飭各軍進剿等語亦與譚廷襄所奏略同。

惟賊至邵家莊其與擾及堂館及冠縣境內之賊。是否卽係一股。直隸境內。現尚有無餘黨竄匿。著崇厚趕緊催提洋槍各隊到齊。會合諸軍偵探確實。一面查明具奏。一面派兵分路並進。痛加剿洗。賊既意圖回竄北路之防。尤關緊要。並著嚴密布置。毋得稍有疏虞。譚廷襄懷遵前旨。速卽派兵迎頭截擊。守備馮勝林所部兵勇若干。能否得力。著卽飭令與直隸官軍會合夾擊。並飭所屬州縣激勵

團練四面堵遏。毋再任賊紛竄。宋景詩雷鳳鳴等。均願勦賊自效。自當因勢利導。惟宋景詩雷鳳鳴能否認真勦賊。著崇厚譚廷襄隨時察看。至宋景詩現欲添募馬步三千名之多。崇厚於鈐制駕馭之法。尤須審慎周詳。確有把握。方可辦理。此輩狼子野心。其與張錫珠等暗中有無勾合。既不可知。若招之卽來。而適為張錫珠等添其羽翼。狼奔豕突。為害豈可勝言。至將來此股賊匪蕩平後。宋景詩

等所部人數過多。應如何安插遣散。亦須豫為籌及。著崇厚譚廷襄悉心妥辦。毋貽後患。王恩第既據崇厚奏稱業已到營。卽著崇厚遵照前旨。迅於軍前正法。不准稽遲時日。遮克敦布伊綿阿負罪尤重。著迅速嚴行提訊。伊綿阿並不得任令藉病稽延。崇厚初膺劇任。務須事事破除情面。勉自振刷。其李鴻墾丁學易裴福德等案。均卽一一認真查辦。薩薩布所部不遵號令之官兵。尤應趕緊查拏

遵辦。毋稍姑容。祝塏業已接帶遮克敦布之兵。寶山是否業已到營。並著崇厚飛催前進。毋任延緩。譚廷襄另片奏溜川進攻各情。其用地雷轟塌城牆外皮等語。恐仍敷衍搪塞之詞。陳顯彝既經撤回。卽著譚廷襄將該員並吳載勳前次交查之案。速行查辦。毋許意存迴護。吳台朗人甚平常。未必知兵。譚廷襄委令前往接辦。仍恐不能得力。總兵曾逢年日內既可到營。卽責成迅速辦理。早拔堅城。

悉殲醜類。李城等股匪伺隙奔突。各路兵團迎剿。德楞額等亦卽星夜跟追。卽著譚廷襄嚴行催督。該已革副都統等及各文武兵團乘勢追剿。蘭費另股棍匪乘官軍追擊李城等股出巢肆擾。現雖截擊回巢。尤應督飭文彬奎芳等嚴密堵截。並令知縣王成謙等各軍分路進剿。以期埽穴擒渠。毋留遺孽。將此由六百里各諭令知之。○又諭馮子材魁玉奏蘇常老賊糾合丹陽踞逆。分犯鎮營。防剿

戒嚴一摺。鎮江郡城實為大江上下游關鍵。賊所必爭之地。全恃防守嚴密。無隙可乘。賊始不得往來逞志。昨據都興阿等奏。偽護王等帶賊二十萬。已抵金陵之淳化溪。意圖下竄。儀揚等處是鎮營江防。尤為喫緊。茲據馮子材魁玉奏稱。逆黨三萬屯於句丹兩邑。並探有蘇州踞逆。遣黨假扮官兵四竄。復調蘇常老賊上犯金柱關。現在已有偽懷王等率賊三萬餘人。竄踞句容之荻塘等處。又有丹

陽踞逆。糾黨擾及大港等處。陸路三面俱形喫緊。與都興阿所奏情形大略相同。鎮營以有限之兵。當逆賊六七萬眾。其勢不可以浪戰。該提督等堅守孤城有年。自必洞明形勢。據奏業經飭令水營先固江防。並派總兵田宗揚等將東路羣逆殲除。西南一帶因有重賊。未卽深入。並多派偵探。覘賊情形。俟其臨近而痛剿之。進止頗合機宜。嗣後該提督等仍當竭力固守。雖賊眾紛乘。總示以不可動

搖之勢。如鎮城稍有疏失。必惟該提督等是問。以後軍情務須隨時與都興阿會同。荃等聲勢聯絡。毋稍疏虞。將此由六百里諭令知之。○又諭奕梁奏遵查軍務情形。並現辦撫局一摺。甯夏所屬回眾。現經定安侯雲登辦理撫局。已有端倪。如果真心悔罪。自無庸重煩兵力。亦不必因該處紳民呈請勦辦。曲為遷就。以致勦撫兩歧。該將軍等現將請調陝西官兵。並東西兩旗蒙兵。及諭調之阿拉善

等處之兵。分咨聽調。著卽照所擬辦理。惟零星回匪。仍有焚掠等事。必須嚴緝重懲。以安閭閻。庶漢民不至益生疑懼。回眾滋事首惡。必須擒縛送官。方見悔罪真情。且可免貽後患。儻該匪以乞撫為緩兵之計。始終反側。卽著奕梁等迅催備調各路兵丁。星馳往剿。毋得稍涉游移。惟必須與定安侯雲登妥為商酌。方免辦理兩歧。侯雲登既有不洽輿情。致招物議之處。該將軍等何以隱約其詞。並不

詳細具奏。著卽據實詳奏。毋許含混。將此由五百里諭令知之。尋奏侯雲登自辦撫後。派兵保衛回地。以防漢民構釁。致招物議。且於零匪滋擾。未能及早擒捕。尤屬措置失當。應請議處。得旨。免其議處。○又諭張凱嵩奏遵查粵西股匪。次第辦理情形一摺。所稱粵西各處股匪名數。與前次劉長佑遵旨查覆情形。大略相同。該省股匪雖多。而平潯兩處。尤為巨患。負隅最久。自應先其所急。以全力攻

拔。則其餘各股。自無難次第蕩平。張凱嵩所奏各情。尚能洞悉機宜。權衡緩急。現在蓮塘巨股。業經鎮平、潯州踞匪。復與賓州、橫州、永淳、岑溪、容縣各股。聲氣潛通。尤宜乘勢分道進兵。以收破竹之效。卽著張凱嵩照所籌情形。次第辦理。務先將潯州之賊。剋日掃除。毋得頓兵糜餉。縱令各處股匪。蔓延煽惑。日久稽誅。致負委任。至江忠義一軍。諭令仍遵前旨赴粵。現據張凱嵩奏稱。擬俟江忠義到時。

面商統帶所部。直擣賓州賊巢。使潯逆腹背受敵。茲聞江忠義奉調援皖。精捷一軍。悉數拔營回楚等語。是該署提督之軍。仍未遵旨赴粵。豈前次所降諭旨。毛鴻賓尚未接奉。遵照辦理耶。廣西兵勇無多。江忠義之軍。旣克蓮塘。自當乘此聲威。迅克潯州巨股。豈可稍涉鬆勁。著毛鴻賓飛咨該署提督。剋日赴粵。毋稍稽延。其精捷一軍。卽速飛檄阻止。以資調度。張凱嵩於該署提督到時。並著將分道

進兵機宜。迅速籌商。勦辦。以奏膚公。將此由五百里各諭令知之。○又諭前因法國公使與總理各國事務衙門照會內。有廣東省官政失宜。賊匪欲占省城。及旗兵亦有漸亂之勢等語。當經密諭劉長佑。黃贊湯。穆克德訥等。悉心查察具奏。茲據穆克德訥等奏稱。上年閏八月。因糧餉支放無期。八旗貧苦寡婦。約有四五十人。同到該將軍署外。稟告乞恩。其時觀看人多。未免嘈雜。洋人未知其詳。心

懷疑慮。以為漸亂。現經穆克德訥等飭各協領將積欠數目清查。據稱八旗糧餉。自辦理洋務後。家口米陸續積欠十一萬一百九十餘石。米料草折銀積欠八萬餘兩。孤貧錢糧陸續欠銀一千五百餘兩。搭錢陸續積欠九千四百餘串等情。八旗錢糧。為駐防兵丁生計所關。似此積欠累累。該旗丁等嗷飢號寒。在所不免。著晏端書。黃贊湯。無論何款。先行設法籌撥。以濟兵食。而免譁譟。不得稍存膜

視。穆克德訥等另片奏。自會匪黃金龍拏獲正法後。並無另黨賊匪。欲占省城。惟匪首黎梅石在逃未獲。恐與高州等匪徒暗地勾連等語。黎梅石逃匿何處。是否與高州匪徒有勾結情事。著晏端書密飭購緝。拏務獲。毋任遠颺。省城地方。防守未可稍為疏懈。仍著實力稽查。以顧根本。穆克德訥前經被人叅奏縱容家丁索賄勒捐各情。著晏端書迅即查明。叅奏。毋稍瞻徇。將此由五百里諭令知

之。○命參將成桂前往甘肅軍營。交護總督恩麟差委。○以廣西遷江等處勦匪出力。予知縣曾春昂。吳夢桂升敘。陣亡代理知縣林則璋。祭葬世職加等。○乙丑諭內閣。刑部等衙門奏審明監犯結夥反獄拒捕脫逃。將同謀助勢各犯。按例定擬。疏防各員。分別懲處一摺。監獄重地。該犯周六等。膽敢糾邀反獄。拒捕脫逃。不法已極。亟應拏獲。盡法懲治。馬。楊二立。聽從周六糾眾反獄。立被拏獲。實

屬皆不畏法。賈三姚三張大幅雖畏懼中止。尚未逃出。惟業經同謀助勢。亦難姑容。均照刑部等衙門所擬。即行正法。以昭炯戒。楊二立姚三。本係強盜。仍著照奏定章程。梟首示眾。在逃之周六等六犯。著步軍統領衙門順天府五城直隸總督一體嚴拏務獲。按例懲辦。解任司獄祥安在內廳直班。於該犯等反獄脫逃。未能認真稽查。致有疏失。著即行革職。解任署提牢主事穆克登布在外廳直班。

亦屬咎有應得。著交部嚴加議處。漢提牢候補主事朱壽霖雖未直宿。究係失於查察。著交部照例議處。刑部堂官於此等要犯未能先事豫防。咎無可諉。並著交部議處。其田五一犯所供情節。諸多疑竇。刑部等衙門請酌照未定罪名人犯。例監禁二年。尚覺輕縱。著改為永遠監禁。再行嚴訊。俟緝獲周六一併質訊辦理。禁卒張汶漬等均照所議分別革役懲辦。刑部為刑名總匯之區。監獄要地。宜

如何小心防範。慎重周詳。乃該堂官等平日於公事既不甚留心。司員賢否勤惰亦不能認真稽覈。以致諸務廢弛。甚至書吏卑役人等。翫法舞弊。無所不至。司員等為其把持蒙蔽。不能實力整頓。殊堪痛恨。該大學士尚書侍郎等。嗣後務當振刷精神。詳加查察。毋得再有疏虞。致干重咎。懍之慎之。尋吏部議。刑部堂官周祖培等均照司監疏失重犯督撫降一級留任例。降一級留任。得旨准其抵銷。

○又諭巡視南城給事中志文等奏。城上直班旗兵偷拆堆撥木料。請飭懲辦一摺。京師城上設立堆撥分派旗兵。各專責成。原以防奸宄而重城守。該管官宜如何悉心稽查。督率直班官兵認真巡邏。以昭慎密。乃南城直班旗兵馬甲海全竟敢招同領催定福養育兵吉升黃夜偷拆正陽門城上空閒堆撥木料。緹城售賣。前後至十餘次之多。以防奸巡夜之兵。竟至身為盜竊。尤屬目無法紀。其空

閒堆撥所有直班官兵。曠誤因循已可概見。該管官於城垣重地。屢次被竊。毫無聞見。究竟所司何事。廢弛積弊。至於此極。實屬不成事體。殊堪痛恨。所有海全、定福、吉升三犯。卽著交刑部嚴行審訊。按律懲辦。查城大臣稽查是其專責。何以於空閒堆撥無人直班。未能查出參奏。可見平日全未留心。嗣後務當振刷精神。力圖整頓。不得虛應故事。其該管官及各該堆撥直班旗兵。並著各旗都統查

明分別嚴叅懲辦。以儆玩泄。○諭議政王軍機大臣等。據兵部奏稱員外郎余上華呈請簡派重臣督辦三省邊防一摺。陝西、漢中與安兩府界連川楚。延袤二千七百餘里。山林深到處險阻。現在興安府城被陷。川匪曹燦漳一股竄至甯陝廳。窺伺子午谷。洋縣股匪踞城日久。毛震壽所部各營近又失利潰散。是川粵股匪兇燄日張。勢將連成一片。漢江南北所在燎原。若非三省合力會剿。則賊

蹤乘閒四竄。必至益形滋蔓。前經諭令官本嚴樹森飭梁作楫越境馳赴興安一帶追剿。陳得才股匪並已諭令駱秉章派兵赴甯陝地方剿辦。川匪迄今未據覆奏。現在漢江北軍情緊要。多隆阿一軍為同朝回匪牽掣。未能兼顧。余上華所稱合三省兵力另設知兵大員督辦之處。著官文、駱秉章、嚴樹森、瑛、榮斟酌情形迅速會議妥籌具奏。其各處興修寨堡及責成該管州縣堵截並派員分道

董勸復行堅壁清野之法。均著官文等一併會議籌辦。原摺著鈔給閱看。將此由六百里各諭令知之。○又諭吳棠奏東匪宋三岡等竄突山東蘭山莒州日照一帶距海州贛榆縣境止十餘里。當咨會富和德楞額就近剿辦。並派隊馳往堵剿等語。沂屬賊匪充斥。此拏彼竄。現將擾及贛榆。若不認真堵剿。恐賊蹤竄入則裏下河完善之區均行震動。著吳棠飭令派出之參將張祖雲等帶隊迅赴贛

榆。嚴密布置。以勦為防。不得株守本境。坐待賊來。致滋貽誤。並著譚廷襄飭令富和德楞額於沂州各軍內。酌撥勁旅。就近勦辦。富和等在沂勦匪。屢次遷延貽誤。若再意存諉卸。縱令該匪闖入贛榆。卽著譚廷襄嚴叅治罪。將此由五百里各諭令知之。○實授吳昌壽廣東按察使。○以廣東辦團籌餉出力。賞知府三多。遊擊尚昌懋等花翎。布政司經歷葉滋鈞藍翎。餘升敘有差。○以廣東潮州勦匪

出力。賞同知潘銘憲。守備李瑄芳等花翎。知縣張麟寶等藍翎。餘加銜升敘有差。○以廣東惠州韶州勦匪出力。賞知縣洪先岳等藍翎。餘加銜升敘有差。○以追賊遲延。革江南副將張得魁職。仍留營。○予山東長城陣亡把總葉景春等祭葬世職。○貸廣州駐防旗營修理衙署銀。○丙寅。諭內閣。按察使銜記名道趙煥聯。前經左宗棠。毛鴻賓。先後保奏。堪備任使。茲復據毛鴻賓奏。稱該員深明韜

略。熟悉湖南情形。與各營俱相聯絡。前年石逆竄擾湖南。規畫調度。頗資襄助。兵事吏事。均極優長。實近今不可多得之才。各等語。趙煥聯著加恩。賞加布政使銜。交軍機處記名。遇有按察使缺出。請旨簡放。以示任官惟賢之意。○諭議政王軍機大臣等。曾國藩等奏。官軍攻克運漕鎮後。進勦巢縣小挫。旋在銅城牯獲勝一摺。另片奏。偵探南岸賊情。銳意圖竄江北等語。竄踞巢縣之賊。分撥悍黨。踞

守數隘。意圖牽掣官軍。不克進規金陵。該逆詭謀百出。亟須將皖北踞匪。次第掃除。然後會師金陵。可期得手。現在運漕克復。水師計可乘勝進攻。著曾國藩嚴飭諸軍。進取銅城牯要隘。乘此春水方生。水陸並進。圍攻巢縣。力拔堅城。其和含等處逆匪。踞守甚固。並著相機進取。毋令乘隙他竄。青陽縣城業經收復。朱品隆一軍。已抵池州。軍威益振。圍撲涇縣之賊。亦經鮑超率師來援。會同易開俊等

立解城圍賊匪麇集寒亭清弋江等處。鮑超謀勇素裕。著曾國藩飭令嚴密戒備。毋為該匪所乘。偽忠逆調集羣賊圍攻常熟。擬率二十萬眾再犯江北。下擾揚州。上窺皖楚。曾國藩搜獲偽文。與都興阿李鴻章等先後奏報。大約相符。著曾國藩都興阿富明阿等仍遵前旨。於江面各要隘嚴密守禦。以備不虞。該逆既有上窺皖楚之說。並著曾國藩迅即咨會官文等妥為布置。毋令逆蹤上竄。並著李

鴻章速飭各軍進取太倉。援應常昭。俾該逆眾回顧。蘇常巢穴不暇徑趨江北方為妥善。曾貞幹戰功卓著。朝廷方期大用。前以力疾督戰。遽焉病故。深為惋惜。特加優卹。嗣又據李鴻章詳敘該員戰績入奏。復加恩照二品例議卹。並准其予諡。於本籍及死事地方建立專祠。仍宣付史館立傳。諒該大臣手足之痛。藉可稍慰。將此由六百里各諭令知之。○以湖南官紳防勦粵匪出力。賞知州雷壽南

等花翎。都司單理謨等藍翎。餘加銜升敘有差。○予安徽巢縣陣亡總兵官彭星占等祭葬。世職加等。○予湖南西路陣亡遊擊蔣仲芳等祭葬。世職加等。○丁卯諭內閣。前因御史呂序程奏請飭河南各州縣徵收地丁銀兩。每兩均以制錢三千為率。並分成藉充軍餉一摺。當經諭令張之萬督飭藩司體察情形。有無窒礙。茲據奏稱豫省地丁完銀完錢各處向來章程不一。皆因銀價貴賤無定。以

致參差不齊。斷不能以一處為準。南路州縣向無雜派差徭之處。地丁錢糧間有每兩連耗銀收至制錢三千有零者。東西北三路各州縣應徵糧銀大抵每兩二千五六百文不等。若通省概以三千制錢為率。則向來收數不及三千之處。轉恐疑為加賦。反致紛擾等語。河南頻年以來疊被竄匪蹂躪。民困未蘇。此時正宜休養生息。豈容以催科再累吾民。既據奏稱該御史所陳每兩以三千為率。窒

礙難行。著卽毋庸置議。州縣為親民之官。必須仰體朝廷德意。實心愛民。興利除弊。方為無忝厥職。著該撫嚴飭各屬。按照各該地方情形。分別徵收。不得任意科派。如有不肖州縣。藉端苛索。該撫務當嚴叅懲辦。以儆貪劣。而靖閭閻。○又諭。前因鄭元善奏虞城商邱等縣紳士劉錫嘏等稟控歸德府知府祝塏藉口軍需。苛派草料。並剝削民財。摧折士氣等情。當照所請。將該員撤任查辦。茲據張之

萬奏查明祝塏官聲尚好。並無貪殘實蹟。一摺。據稱虞城縣紳士劉錫嘏所控苛派草料未遂。將該職員陵辱一節。係因僧格林沁軍營馬隊需用草料實繁。祝塏稟明巡撫酌派捐辦。並非擅自苛派。劉錫嘏因隨堂接見。疑失體面。旋經祝塏明白曉諭。亦卽輸服。實無陵辱情事。祝塏向來辦事認真。於練勇局給發薪水等事。覈實經理。從不假手丁役。不逞之徒。無從染指。以致布散流言。侯履中等甫

進練局。未及詳查。遽卽赴司呈控。實係得自傳聞。並無實據等語。祝塏居官尚稱廉潔。辦理地方公事。亦能奮勉。累經有人保薦。是以於此案未結之先。擢署大順廣道。其在歸德府任內被控各節。既據張之萬查明並無其事。卽著無庸置議。惟官紳必須聯絡一氣。方能保衛地方。若因傳聞之詞。疑似之見。輒卽駕詞誣陷。致有守土之責者。事事掣肘。或竟因此貽誤大局。此風斷不可長。嗣後各省紳

士。務各安分守法。遇有地方公事。不得擅自把持。地方守令。如有必須商辦之件。亦當選擇公正紳士和衷商酌。毋許各存意見。儻該守令等秉公辦事。而紳士中不肖者。仍敢任意阻撓。藉端妄訴。卽著該省督撫從嚴叅辦。以儆梗頑。○諭議政王軍機大臣等。崇厚等奏擊賊南館陶獲勝。並已圖隆阿不遵約束。各摺片。此次洋槍隊及馬步兵勇。於南館陶地方追殺百餘名。生擒擊傷數十名。因天已

昏黑未便窮追。擬於次日再行進剿。該署督已飛催姜國仲等夾擊。並飭候補道劉策先會同格乃等管帶洋槍隊屯紮下堡寺。嚴防尖莊河口。力遏東匪回竄。所籌尚屬周妥。惟賊匪未受懲創。勢尚鴟張。必須四面兜剿。方可制賊死命。著崇厚成保嚴飭官軍奮力追剿。並著譚廷襄飭令東省官軍會合兜剿。迅殲醜類。此股匪徒現在究有若干。賊情若何。崇厚屢次奏報從未聲敘。殊屬疏忽。著卽迅速查明隨時具奏。宋景詩本非善類。該署督等駕馭籠絡原係不得已之舉。其情尚有可原。現在任令募足三千名。如果奮力勦賊於地方不無裨益。儻或濫收賊黨漸成尾大不掉。則後患不可勝言。著崇厚譚廷襄恪遵前旨。察看情形。如勦賊不能認真出力。卽迅速設法將其眾遣散。妥為安插。以遏亂萌。此時一味遷就將來致有他虞。惟該署督等是問。決不寬貸。前鋒校巴圖隆阿經薩薩布飭令

集隊該弁膽敢不遵約束實屬可惡。著卽斥革監禁。惟此等劣弁必應隨時嚴懲方足以振士氣。此時姑如所奏辦理。嗣後各營中有似此不遵約束者卽按照軍法從事毋稍姑息。著崇厚卽宣示合營將士俾知懍遵。薩薩布前在王家莊衝散之官兵現在回營者已有若干何以並未據崇厚陳奏且屢次諭令查明正法而該署督尚未懲辦片內所稱已將不法滋事之兵勇四名正法係屬何人統帶均著查明具奏將此由六百里各諭令知之。○又諭前因由潼關赴陝驛路不通諭令愛仁等折回山西省城將員杜氏一案逐節根究茲復有人奏員杜氏謀命誣節一案賊款累累藩司鄭敦謹並未親提僅委府縣數員審訊因案內楊學正咨提未到遂將全案犯證發縣保釋原審誣節之沈長材亦未審訊迨聞愛仁等有回省之信始委員赴該縣提人而得賊過付之要犯縣役李泳逞竟敢

潛逃捏報病故。嗣將楊學正提到。至今仍未訊結。並風聞當時承審審轉各員。婪索多贓。半由太谷城內員氏公眾開設之德生大鋪內過付。若嚴密調取底帳。細加鞠審。情節不難畢露。各等語。此案延閣多年。層層疑竇。承審各官。竟至含糊了結。難保無賄屬徇庇等弊。愛仁。王茂蔭均係奉旨特派大員。事關誣節斃命。亟應秉公訊鞠。以期水落石出。愛仁等業經訊有端倪。著再按照所指各節。嚴飭

隨帶司員。提集全案犯證。徹底根究。不必令該省各官經手。致啟蒙混輕縱之弊。該尚書等前由山西省城馳赴平陽時。鄭敦謹於此案是否並未親提。保釋各犯。有無輕縱情事。並著查明具奏。原片著鈔給閱看。將此諭令知之。○以湖南官軍越境勦賊。克復湖北來鳳縣城。賞總兵官王永章。周達武。副將朱升開。三代封典。副將黃仁。遺都司李榮發。江忠偉。已圖魯名號。同知趙煥符。遊擊王照南等

花翎。訓導周星耀等藍翎。餘加銜升敘開復有差。○予直隸平鄉雞澤陣亡典史李汝南。黃珣。祭葬世職。如知縣例。

大清穆宗繼天開運受中居正保大定功聖智誠孝信敏恭寬毅皇帝實錄卷之五十五

大清穆宗繼天開運受中居正保大定功聖智
誠孝信敏恭寬毅皇帝實錄卷之五十六

[illegible]

同治二年癸亥正月戊辰

孝穆成皇后忌辰遣官祭

慕陵○諭內閣瑛榮奏請將縱勇擾害及猥鄙
恇怯各員革職等語候選同知戴齡經毛震
壽派令帶隊馳赴漢南防守其部下勇丁輒
與團民藉端尋仇搶掠衣物當經查明滋事
勇丁范占魁等九名正法該員縱勇擾害實
屬咎無可辭候補府經歷蕭焱隱匿藥鉛二
百餘斤經巡弁挖出實屬猥鄙不堪戴齡蕭
焱均著卽行革職候補參將鄒學鏞派辦城

固巡防。輒因兵潰擅離防所。該員有統帶之責。似此怙怯貽誤。情罪較重。瑛榮請將該員革職。不足蔽辜。鄒學鏞著改為革職發往新疆效力贖罪。以示懲儆。○諭議政王軍機大臣等。駱秉章奏遵查毛震壽帶兵攻勦洋縣未能得力。瑛榮奏查明斗山股匪下落。隴州回匪來去蹤跡。並附陳藍曹等逆竄擾情形。各一摺。陝西藩司毛震壽攻勦漢南賊匪日久無功。且有縱勇騷擾情事。疊經諭令駱秉

章等查奏派員接辦茲據奏稱石逆一股賊勢蔓延川省兵將不能分撥等語本日已諭令沈葆楨飭江西藩司李桓馳赴漢中軍營接統毛震壽所部兵勇前因陝南軍情緊急疊經諭令駱秉章將派赴川北勦賊之周達武等軍就近飭赴陝南勦辦迄今未據覆奏現在洋縣甯陝一帶需兵甚急他處又無可撥駱秉章仍當飭令周達武等軍迅速前往交李桓接統以厚兵力毛震壽須俟李桓到

後再行撤去李桓未到以前瑛榮仍飭毛震壽認真督勦毋令再事延誤隴州甯陝鳳翔汧陽等處匪勢俱形喫緊瑛榮已飛咨多隆阿分兵勦辦該大臣有督辦全陝軍務之責務須隨時體察情形處處兼顧方為不負委任馬德昭既留防省垣又有穆騰阿在省練習旗兵根本重地當可無虞雷正綰一軍應否調回省垣疏通糧道並著多隆阿酌度辦理近日軍情仍著隨時馳奏以慰廑繫興安

界連楚省現在楚省無事著嚴樹森卽日出省駐紮秦楚適中之地扼要策應督率梁作楫等軍援陝務將興安府城先行克復節節掃蕩以靖狂氛李桓到尚需時嚴樹森能否卽督楚軍進紮漢中先將毛震壽奏撤飭令赴川聽候查辦之處著嚴樹森酌度辦理該撫夙矢公忠情殷桑梓斷不稍存吟域之見其應如何詳審局勢外勦內防仍隨時與官文多隆阿會商妥辦所有出省督勦日期著

嚴樹森迅速具奏石逆股匪自黔滇回竄川境其眾數倍於前劉蓉向來勇於任事曉暢戎機著駱秉章仍飭該藩司迅赴敘南認真勦辦其由巧家廳闖入會理州之窪烏司股匪並著飭令該藩司分兵截勦務須就地殲除毋令竄入滇境將此由六百里各諭令知之○又諭潘鐸徐之銘奏堵擊竄滇髮逆節次獲勝各摺片石逆股匪十餘萬眾分起行走由黔竄滇至平彝宣威一帶肆擾經宣威

州兵練擊退連夜潛逃欲由東川過蜀其分股竄擾東川逼近郡城之賊亦經兵練擊退竄至崇禮鄉復經署知府黎新德督同文武追至該處接仗獲勝惟逆匪人數眾多各處堵勦擊斃者不過數百人於賊勢並無所損宣威之賊暫時卻退難保不去而復來東川逆眾連亙數百里該處兵練究有若干是否足資攻勦應否添調他處兵練及得力將弁前往助勦該督撫均應詳慎妥籌不得僅以

劄飭地方府營籌防及彙據地方文武稟詞一奏了事滇省閭閻彫敝元氣未復設粵匪再久踞迤東勢必蔓延益廣辦理更形棘手潘鐸等務宜厚集兵練迅速殲除不可稍涉大意賊因宣威地方野無存糧卽連夜逃往東川是堅壁清野之法必當亟行籌辦該署督等亦宜督飭地方官實力舉行俾賊匪無糧可掠無人可裹殲除自當較易也參將楊振鵬等辦理安撫及堵剿事宜均屬出力惟

大理撫局尚未就緒迤東髮匪亦未殲除馬聯升前已經該督等奏獎此時該二員均未便再給獎敘著卽責成楊振鵬等始終其事俟辦理實在妥協後再行奏獎至署總兵福陞之子與把總高姓率眾至法國傳教士人寓所滋事武弁辛姓等搶奪教士物件該署總兵失於禁約昭通府知府夏廷楫不能彈壓均著先行摘去頂帶福陞之子及武弁土棍均著查明從嚴辦理該教士等被搶物件

並著酌給賠償銀兩迅行辦結將此由五百里諭令知之○命江西布政使李桓馳赴陝西接辦漢南軍務○以四川會理勦辦回匪出力賞守備嚴德高等花翎鹽大使張錫嘏等藍翎餘升敘有差○以雲南拏獲戕害大員要犯賞雲騎尉李榮芳花翎軍功岑啟秀等藍翎餘升敘有差○以雲南省城防守出力賞按察使花詠春守備楊發貴等花翎在籍主事王汝礪等藍翎餘加銜升敘有差○

己巳諭內閣前因署兩廣鹽運使廣東候補道羅勳候補知府段詰節次被叅辦運鹽斤牟利分肥等款當令晏端書等查奏茲據奏稱羅勳辦理廣西各埠奏銷含混造報存倉公鹽數萬包變價動用並不詳請奏咨作何歸補於陶昌培等販私各案一味瞻徇疏縱委署鹽場各缺必令場官捐餉藉圖需索聲名狼藉物議沸騰請革職拏問段詰以籌給勇糧為詞率請撥配鹽包販運變價並將應

繳款項藉端抵扣顯有牟利分肥情弊所發
勇糧細數亦未經覈銷尤難免暗中蒙混請
革職歸案查辦等語羅勳著卽行革職拏問
並撤銷花翎按察使銜記名鹽運使交晏端
書提集各案卷宗徹底查究分別更正追繳
從嚴懲辦段詰著一併革職歸案確查究追
毋稍徇縱○諭議政王軍機大臣等崇厚成
保奏擊賊獲勝並請飭王榕吉酌帶兵勇來
直各摺片張錫珠股匪竄踞黃金隄一帶經

姜國仲余承恩等乘夜剽營餘賊敗竄西北
復經徐廷楷春霖追至館陶將該匪兩次擊
敗並經薩薩布鄧啟元等馬隊迎截追殺河
西步賊現已殲除殆盡崇厚成保務宜乘此
聲威速將河東股匪盡數殄滅一面嚴扼沿
河要隘毋令賊蹤偷渡並著譚廷襄嚴飭在
防文武會合直隸兵勇四面兜剿毋任紛竄
晉省平定州地方去賊尚遠防務較鬆直省
兵力又形單薄著英桂卽令王榕吉酌帶平

定州防所得力兵勇迅速赴直協勦前任大
名道劉煦所募勇丁勦捕土匪頗稱得力此
項勇丁散居鄉里難保不流而為匪著崇厚
飭令王榕吉酌量情形就近招募令其隨同
勦賊以厚兵力直東地勢平行馬賊倏忽往
來無隘可扼惟有挑挖深廣濠溝俾賊騎無
可馳騁則鄉團可以隨地扼截兵勇可以立
時追及著崇厚譚廷襄曉諭近賊各州縣鄉
團迅速辦理王榕吉所遞及劉錫穀稟詞經

軍機處呈覽所稱選募順德各屬練勇及籌
餉挖濠築堤調團等事均中竅要卽著崇厚
斟酌時勢妥速辦理劉錫穀已據崇厚派令
管帶練勇卽可盡其所長以收指臂之助將
此由六百里各諭令知之○又諭劉長佑奏
高州等處近日軍務情形一摺據奏高州軍
情自上年十月羅定各鄉踞匪敗回信宜後
石骨南山大井雙合田各處賊巢添匪愈多
出撲潮勇營盤雖經各勇奮擊收回勦辦尚

未得手羅定化州等匪均未大受懲創是高州等各屬軍務亟須趕緊認真辦理著晏端書等嚴飭卓興方曜等激勵士卒務將逆匪陳金缸信宜老巢設法進攻飛調守備侯勉忠所部速由西甯馳赴信宜擣其後路使該逆腹背受敵聚而殲旃其羅境之賊現竄何處化州賊已侵偏州城以及陽春電白各處土匪均即分飭各地方文武督率兵練就近殲除毋任延蔓將此由六百里各諭令知之

○兩廣總督劉長佑等奏請將奉差在粵前任湖北按察使裕麟留於廣東差委允之○以鑲藍旗滿洲都統伊果東阿為杭州將軍○命廣州將軍穆克德訥來京陛見以左翼副都統庫克吉泰署將軍○庚午

孝聖憲皇后忌辰遣官祭

泰東陵○諭議政王軍機大臣等譚廷襄奏黃河修防緊要請飭河南巡撫採辦歲料一摺近來庫款支絀河工浮費原當力求撙節而

稽料一款實為必不可緩之需本年節氣較早現已解凍各廳尚未設廠購辦轉瞬桃汛漲發必至倉卒不能應手現在張之萬已赴汝甯一帶若俟回省後勘明險工再行飭司撥銀購辦誠恐趕辦不及致誤要需著張之萬迅飭藩司酌籌料價或較向例先撥數成發交廳員趕緊購備稽料以重工儲而資修守將此諭令知之○又諭前據駱秉章景紋先後馳奏中瞻對野酋工布朗結強占土司

地方擾及明正邊界當經諭令駱秉章派員彈壓持平剖斷或懾以兵威俾斂跡歸巢茲據滿慶等奏瞻對夷酋工布朗結糾合德爾格特土司擾及霍爾章谷等土司地方不日由巴塘江卡卽到乍了官覺等處其子東登工布糾眾圍困裏塘正土司官寨大路橋梁俱被拆毀拆閱文報捆縛通事現經達賴喇嘛等已派番員多帶土兵前往乍了官覺江卡等處分投堵禦隘口並飭三十九族酌帶

土兵一千五百人馳赴巴塘駐紮及令戴琿期美奪結馳赴江卡以為聲援各等語。瞻對為赴藏要道該酋工布朗結任意滋擾亟宜及早辦理。賂秉章前派委員馳往剖斷是否辦有端緒著即仍遵前旨迅速妥辦。儻或不遵理諭亦當懾以兵威。川省兵餉雖不敷分撥而土兵尚屬可用。即著酌量情形妥籌辦理。福濟景紋前諭迅即馳赴西藏即著兼程前進毋許再涉遷延。其逃赴西藏之霍爾章

谷人眾三百餘竄流離遷徙不肯從逆可嘉可憫。即著福濟景紋滿慶恩慶加意安撫周濟毋使一名失所以示懷柔。所稱指地安置之處即照滿慶等所擬辦理。將此由五百里各諭令知之。○以故駐藏二等台吉策點邊吉約爾子策忍旺曲襲職。○以禮部右侍郎存誠為理藩院尚書。○調鑲藍旗蒙古都統寶璽為鑲藍旗滿洲都統以禮親王世鐸為鑲藍旗蒙古都統鑲白旗滿洲副都統存誠

署正白旗漢軍都統。○以防河不力革山東參將宗權職仍留營。○辛未諭內閣前因勝保督辦陝西軍務種種貽誤降旨拏問進京交刑部治罪迄今計已兩月未見到京勝保係奉旨拏問之員何得任其藉端延宕著山西巡撫直隸總督沿途查明該革員現在行抵何處迅即催令來京聽候刑部治罪毋許逗遛。○又諭前因張之萬奏稱訪查知縣殘惡巧滑究出帶兵將弁捏稟邀功各情當經

降旨交張之萬併案審辦茲據該撫將該員弁等劣款審明定擬具奏此案河南汝州團首李瞻因辦團派費與富戶彭宋二姓尋仇將該二姓所居之張寨率眾圍困署汝州知州任愷以李瞻藉團滋事稟經鄭元善派令副將楊飛熊帶兵與已革洛陽縣知縣任桂已革汜水縣知縣劉定敷前往會勸任愷伴與李瞻說合旋同任桂楊飛熊將李瞻捆縛並其隨同團眾一併殺害楊飛熊等捏造李

瞻執旂開礮任桂率眾迎擊等情稟請將任桂等開復原官至其殺害會元局團練李書聲等一節緣任桂隨同楊飛熊在洛陽勦匪時李書聲等有誤殺商民奪獲銀兩之事楊飛熊聽信營弁稟詞輒以殺兵搶餉情同叛逆派令參將盧得勝會同署洛陽縣知縣徐光第任桂等勦辦盧得勝所帶兵丁焚掠村莊徐光第任桂復將盤獲之李豹子指為會元局攻城內應卽行正法河南府知府厲文

煒與楊長春徐光第任桂復將李書聲等誘至營中斬梟捏報弋獲各等情除楊長春盧得勝業經另案革職外任桂於會辦李瞻等案冒功開復原官且其代理偃師縣任內奉調出境聞警不卽折回以致被賊蹂躪實屬罪有應得著發往新疆效力贖罪楊飛熊捏詞稟報任意殺戮並有不能禁止勇丁違例演戲情事著卽革職從重發往軍臺效力贖罪事犯雖在恩詔以前應不准其援免惟念

該革員現在傷病未痊著加恩暫緩發遣留於河南軍營養傷隨同勦賊戴罪圖功任愷厲文煒均有隨同捏稟情事各亦難辭惟該員等平日官聲尚好均著加恩改為革職留任徐光第在洛陽署任內於擒匪竄擾不能力為堵禦著與帶勇不力之參將李春華一併革職以示懲儆劉定敷因會辦李瞻一案開復原官亦屬冒濫仍著革職留營效力前汝州直隸州知州舒亨熙於彭鳳臺等具控

李瞻各情不早訊辦致釀巨案著交部嚴加議處所有李瞻案內保舉之官紳人等著該部查明一併撤銷前任河南巡撫降補道鄭元善於捏稟情節率行入奏亦著交部議處尋議鄭元善降一級留任准其抵銷從之○諭議政王軍機大臣等崇厚奏匪蹤撲滅直境肅清並密陳東省隱患請飭僧格林沁等帶兵馳勦各一摺此股匪徒節據崇厚奏稱連次殺賊名數並不甚多何以遽能淨盡該

署督務當認真勦辦毋得任聽州縣稟報之詞敷衍了事致貽後患其竄擾河東股匪現在開寬長濠藉資堵禦卽著崇厚親赴河干督率辦理惟東省兵力不厚該署督當不分畛域越境追勦豈可畫疆自守前諭將遮克敦布所帶兵勇交祝塏管帶此項兵勇堪用者若干著寶山祝塏認真挑選並著寶山迅卽帶赴館陶等處會同東省官兵相機進勦譚廷襄一體嚴飭各員弁聽候寶山調度毋

得意見參差以專責成祝塏本係被參撤任之員經朝廷特簡大順廣道自當感激報效著崇厚飭令督率三府守令將該處團練妥為辦理酌募勇丁加意訓練於向來盜賊淵藪極力搜捕毋得以州縣一稟轉詳了事其沿河一帶鄉團並著崇厚督飭地方官嚴查保甲築寨濬濠妥為聯絡以輔兵力之不逮寶山赴東以後所需口糧仍著崇厚隨時接濟毋令缺乏僧格林沁現在進勦擒巢正當

喫緊之時所調馬隊未能分撥崇厚譚廷襄務就現有兵力分投勦辦不得專待援師至勝保以獲咎大員解京治罪該署督遽請飭赴東省勦賊顯係意存嘗試甚屬非是該署督務當以文煜為前車之鑒毋專見好於人置公事於不顧致負委任所請保獎出力文武員弁現在首逆張錫珠並未擒獲亦未將全股殲除何得濫行獎敘著崇厚存記統俟股匪肅清再行請旨酌保再崇厚屢次奏報

聲敘殊屬簡略嗣後務將賊情戰狀詳細具奏不准稍有疏漏將此由六百里各諭令知之○又諭僧格林沁奏督軍進攻擒巢將逆首趙浩然等擒獲並勦辦擒棍各匪情形張之萬奏陳大濬逃入阜境添兵會勦皖擒西竄沈項各一摺擒首趙浩然盤踞張家瓦房老巢擒惡最久此次僧格林沁督率馬步各隊攻其不備突將該圩合圍該逆勢窮力竭始行出寨投誠自應明正典刑以申國法惟

各股擒匪震懾兵威多思反正若將趙浩然等卽行正法恐該匪等聞風疑懼轉堅其從逆之心僧格林沁現將趙浩然等暫交歸德府嚴禁所籌甚合機宜卽著依議妥為辦理現在直境匪眾悉竄山東館陶一帶該省兵力本弱難望剋日殲除富和及舒通額等各隊儻能早日歲事則移勦畿南股匪自必得力並著僧格林沁嚴飭該員等將李城一股及竄豫各匪迅速勦滅不准稍有遷延復致

滋蔓陳大禧亡命東奔竄伏阜境之華莊吳老莊寨等處張曜等各率所部合力前進竟使元惡稽誅餘燼復熾實堪痛恨已明降諭旨將張曜等分別懲處矣此時皖捻西竄沈項處處喫緊僧格林沁已派舒通額等帶領馬步隊千名跟蹤追擊卽著張之萬督飭張曜率領所部馳赴沈項扼要堵截並著毛昶熙飭趙鴻舉統率馬步兵勇迎頭堵剿以收夾擊之效豫省千里平行非厚集騎兵不能

制賊張之萬滙陳棘手情形請調東三省馬隊千名未始非策惟自軍興以來東三省馬隊大半徵調遠出已無可撥之隊毛昶熙前次奏請購買口馬抽練騎兵現在所買馬匹尚未入關卽著迅催前進趕緊訓練較之遠調客兵更形簡捷此時防務緊急該撫等惟當激勵將士聯絡民團就現有兵力實力籌勦不得藉口於兵單餉絀稍有疏虞至陳大禧一犯尤應迅速擒獲不准再令竄逸致與

毫捻勾結將此由六百里各諭令知之○又諭傳諭護陝甘總督恩麟恩麟奏南路勦賊失利一摺楊永魁統帶官兵二千四百餘員名駐紮近隴州鎮之常家堡正宜督率兵勇實力勦洗乃據護都司楊天興稟報輕信賊匪詐降之說並不密察虛實輒行撤兵以致中賊伏陣全軍奔潰而該護鎮則稟稱連次與賊接仗被賊匪四面設伏官兵失利何以與奉武等先後稟報均屬不符顯係該護鎮

並未奮勇勦匪藉詞粉飾是其喪師失律之咎實堪痛恨著該護督卽將楊永魁等嚴訊確情按律懲辦瑋武有督辦防勦之責並著嚴飭該署道趕緊收集散亡就現有兵力幫同新任道員林之望將龍山鎮蓮花城股匪痛加勦洗力扼要隘如再遷延貽誤卽著從嚴叅辦恩麟統轄兼圻責無旁貸務當振刷精神督飭各軍迅速勦辦毋滋貽誤致干重咎○護理陝甘總督恩麟奏甘肅省標存兵

過單請將各營停募糧缺一千二百名暫行由省募補以備緩急下部議行○以內閣學士綿宜為禮部右侍郎寶珣署兵部左侍郎○調鑲黃旗蒙古副都統全慶為鑲白旗滿洲副都統鑲紅旗蒙古副都統載容為鑲黃旗蒙古副都統以記名副都統蘇倫保為鑲紅旗蒙古副都統未到任前以乾清門侍衛照祥署理以甯夏協領瑞雲為涼州副都統○派內閣學士全慶吏部左侍郎單懋謙

知貢舉○以打仗出力予河南軍營千總銜李加英以守備候補○以河南小王寨勦匪不力總兵官張曜李續燾分別革職摘頂仍留營○以甘肅秦安勦賊失利護總督恩麟等下部議處草護總兵官楊永魁護遊擊方明通職並建問知縣趙桂芳革職留營○予浙江湖州殉難生員沈清來等紳民婦女五十名口分別旌卹如例○賞山東等省壬戌恩科鄉試年老諸生于代榮等九十五人

舉人副榜有差○壬申諭內閣本年輪應查閱直隸山西陝西甘肅四川五省營伍之期直隸著卽派劉長佑山西卽派英桂陝西卽派瑛榮甘肅卽派熙麟四川卽派駱秉章逐一查閱認真簡校如查有訓練不精軍實不齊卽將廢弛之將弁據實叅奏現在該五省均有防勦事宜尤須隨時加意整頓毋得視為具文○調盛京副都統恩合為錦州副都統以前奉天府府尹景霖署盛京副都統○

癸酉。諭議政王軍機大臣等有人奏河南新野縣知縣丁嘉言性情懶惰。舉止輕浮。泌陽縣知縣溫逢春專務貪婪。襄城縣知縣錢增鴻殘暴性成等語。州縣為親民之官。若如所奏該地方官等視練為仇。誣良為盜。以及種種貪劣各情。實出情理之外。著張之萬按照所參各節。嚴密訪查。據實參奏。毋得稍涉徇隱。原摺著鈔給閱看。將此諭令知之。○又諭張之萬奏追勦陳大喜獲勝。並扼堵西竄。擒

匪一摺。陳大喜股匪遁入阜境。吳家老莊。經張曜督軍進攻。正在得手之際。而皖捻大股已竄至侯家寨。張曜分軍回顧華莊。一面知會余際昌督隊北來。合軍堵勦。皖捻大股西來。與陳逆互相勾結。意圖牽掣官軍。為餘燼復然之計。張之萬務宜督飭張曜。余際昌合力堵勦。將此股擒匪。先行擊退。以孤陳逆之勢。一面飭令尹嘉賓率領所部嚴防前敵。以杜陳逆他竄。其由亳州出竄之孫四瞎股匪。

欲由朱圩會合前股西竄。沈邱境內之紙店一帶。亦有賊蹤。又欲渡河北擾。著毛昶熙趕緊督率所部偵賊所向。於商水臨潁一帶扼要駐紮。並著張之萬派兵探蹤迎勦。毋令竄入腹地。是為至要。前據僧格林沁奏稱擒首孫醜與劉大老冤。二老冤楊二等股由渦河南岸向鹿邑西竄。已派蘇克金舒通額等馬隊陸續馳往皖豫地方追擊。並著張之萬。毛昶熙知會蘇克金等前後夾擊。以期力掃兇

鋒。該撫摺內所稱之阜境。是否即係潁郡阜陽縣境。張曜現回紮之華莊。及皖捻所竄之侯家集。均係何縣所屬。擒首孫四瞎。是否即係孫醜。均著張之萬查明具奏。嗣後軍營摺報。所奏地名。務將係何州縣所屬。一併詳敘。以清眉目。毋得仍前含混。將此由六百里各諭令知之。○甲戌。諭內閣。四品銜兵部候補員外郎王家璧著吏部即行帶領引見。告病回籍之前任浙江候補同知劉書田並著張

之萬飭令迅速赴京。一併交吏部帶領引見。又諭候補三品京堂朱蘭奏請飭官常以勵風俗一摺。國家設官分職。所以宣上德而通下情。民俗之厚薄。每視官常為之表率。近來州縣等官。遇有蠲緩恩旨。輒敢延閣多時。始行張貼。賸黃又僅於城市張貼。鄉僻未能周知。其殷戶已先期輸納。餘則畏差役之騷擾。依期畢輸。若稍遲數日。則一分一釐之錢糧。必加一二三兩之催費。是朝廷蠲租賜復

之恩。止為官吏分肥之地。官恐生監上控。略取餘平與之。以閒執其口。士習之壞。民心之漓。皆由於此。由是劣紳蠹吏。莠民互相牟利。或私墾湖田。或起議團租。甚至持械偏官。斂錢入局。始則官非其有。而取諸民。繼則民非其有。而奪諸官。利端一啟。上下交征。為患何可勝言。其中一二廉潔愛民之吏。又因悃悞無華。不肯隨俗波靡。或為同官讒閒。或為大吏所抑。朝廷視民如傷。勤求司牧。而督撫大

吏。乃惟諂媚利口。掊克剝削之員。是喜欲吏治之肅。斯民之治。其可得乎。嗣後各省督撫。大吏務各整躬率屬。獎拔循良。必令久於其任。嚴懲貪墨。毋或徇庇其私。庶問問疾苦。可以上陳。國家德澤。無不下究。民氣日蘇。風俗日厚。實有厚望焉。又諭本日穆騰阿瑛榮。由六百里馳奏。直隸軍務喫緊。請飭勝保前往勦辦。一摺。覽奏。不勝詫異。勝保以軍營獲咎革職。問罪之員。生殺予奪。朝廷自有權衡。

穆騰阿瑛榮。何得輒為此請。意存嘗試。且陝省軍務。正在喫緊。而瑛榮由六百里馳遞摺報。並無一字提及。該將軍巡撫等。於分內應辦公事。置之不顧。而於瞻庇朋好。代為乞恩之舉。輒敢擅發急遞。若惟恐遲則不及。者。舍己芸人。實屬膽大。穆騰阿從前在安徽軍營。曾經奏請簡派旗員。協帶馬隊。為勝保表暴功績。蒙

文宗顯皇帝明燭其隱。降旨申飭。此次復以此

等伎倆形諸奏牘亦豈能逃洞鑒耶上年勝保曾為瑛榮請派幫辦軍務今瑛榮即為勝保瀆請可見伊等互欲見好不顧大局此風斷不可長穆騰阿瑛榮均著傳旨嚴行申飭諭議政王軍機大臣等朱蘭奏浙東事宜難拘成例請稍為變通等語據稱重甯紹台道事權以資策應官兵義勇歸該道統制並用包立身謝敬兩軍與官軍相為犄角紹郡不難克復及請於甯波地方照滬局章程辦理貨捐以濟軍餉各等語左宗棠一軍現在進逼龍游規取金華浙東軍務漸有起色甯紹等郡應辦事宜該撫諒籌之已熟原奏各情是否可行有無窒礙著該撫體察情形酌量辦理原片著鈔給閱看將此諭令知之○又諭前據瑛榮奏鳳翔危如懸釜汧陽回匪勢亦猖獗茲據給事中王憲成奏鳳翔被圍半年援兵不至城中糧薪已匱危在旦夕等語鳳翔為西路要區該郡被圍半年無兵援

救萬一為逆回占踞將來巢穴既成與甘省連為一氣剿辦必至費手多隆阿有督辦全陝軍務之責現雖未能分兵西顧亦不可聽其圍困雷正綰在咸陽相距較近且有成祿之軍著即商度機宜即由雷正綰統帶所部迅速進剿以解鳳翔之圍若該提督兵力不敷仍著多隆阿抽撥勁旅以資攻剿其涇陽城守事宜並著多隆阿隨時督飭成祿妥籌防剿該大臣前奏東路回匪不出半月可望肅清迄今距奏報之日已及二旬未見該大臣續奏王閣村等處是否攻克何時可以西行朝廷方以秦事為憂而多隆阿奏報何以如此稽遲著即迅速具奏嗣後一切軍情並著隨時奏聞以慰廑念將此由六百里各諭令知之○又諭鳳翔為西路要區該郡被圍半年無兵援救瑛榮身任地方清夜自思何顏對此士民雷正綰近在咸陽即著咨商令其統帶所部各軍馳赴鳳翔迅解城圍鳳翔

士民困守半年。可憫可嘉。並著瑛榮派員前往傳旨嘉獎慰諭。且告以援軍指日可到。庶民心愈形固結。該撫不得以統帥有人。置軍務於不問。省城為根本重地。穆騰阿務當會同瑛榮馬德昭相機防剿。毋稍疏懈。瑛榮貽誤地方。久當治罪。宜如何力圖晚益。以贖前愆。若仍毫無振作。恒怯偷安。則軍律具在。亦不能屈法以拂輿情也。懍之勉之。將此由六百里各諭令知之。○又諭前據景綸等奏報。

朝陽流匪葛城隆等竄至三姓黑背地方。復突至烏斯渾屯。裹脅數千人。負隅橫恣。嗣復據奏。葛城隆等糾匪萬人。分擾烏斯胡果匣子溝等處。分路撲城。疊經諭令景綸等會派各路兵勇一體兜拏。並未據該將軍等將此股賊匪如何痛加剿洗情形詳細續奏。茲據景綸等奏。葛城隆勾結金匪出巢。被擊四散。該逆帶同百餘賊向東奔逃。官軍分路進剿。足資搜捕。無庸鄰省援兵助剿。各等語。景綸

等前後所報匪眾數目多寡。何以如此懸殊。前奏由數千至萬人之眾。究竟何往。是否係前次偵探不實。抑係此次粉飾奏報。著景綸等確查覆奏。黑龍江與三姓以江為界。現既經特普欽派兵嚴防。即著景綸等知照。特普欽嚴密堵擊。毋令匪徒逃竄。並嚴飭富尼揚阿派出之佐領訥爾吉等跟蹤追剿。務將首逆拏獲。匪眾殲除。毋得貽誤。致干重咎。黑龍江官兵如可無須助剿。即著景綸等知照。特

普欽暫停調派。將此由五百里各諭令知之。尋奏遵查。葛逆嘯聚。初止四五百人。疊經偏魯各處商民金夫數幾及萬。嗣因沿路逃亡。復經官軍設法解散。故所餘無幾。前後奏報懸殊。實出有因。非敢稍存欺飾。報聞。○又諭。崇厚等奏遵覆軍務各情一摺。另片奏已革參將王恩第查無通賊實據。請暫免正法等語。竄擾南宮雞澤等處股匪。據崇厚等查明係止張錫珠一股。其回竄館陶等處之匪。馬

步亦僅二三千人。自不難於殄滅。著崇厚等
懍遵前旨。仍由寶山等酌量帶兵越境追剿。
宋景詩尚在東昌。卽著嚴飭該革員會同夾
擊。以期盡殲醜類。迅就廓清。至宋景詩先後
調到馬步練勇千餘名。該署督恐其流而為
匪。未便遽行遣散。自係從權辦理。仍當妥為
駕馭。毋得稍涉大意。王恩第通賊情事。雖查
無實據。惟孫治因其添募勇丁未敢拏辦。崇
厚復因其招致宋勇。責令殺賊自贖。是王恩

第挾宋景詩以自固。崇厚之不能操縱自我。
已可概見。該署督致軍機處另函聲稱。如該
革員故態復萌。另有辦法等語。恐仍是紙上
空談。未必確有把握。王恩第雖暫緩正法。仍
著崇厚嚴密查察。隨時設法懲辦。洋槍隊黑
龍江馬隊。計先後到齊。崇厚等務當振刷精
神。刻刻為自強之計。毋使恃宋勇以勦賊。致
王恩第有所恃而不恐。宋景詩氣燄日盛。蔑
視官軍也。嗣後崇厚務當以實情上達。不可

徒以敷衍為能。又蹈文煜覆轍。遮克敦布貽
誤各情。朝廷早已知之。無庸再行查辦。著崇
厚卽派員押解來京。交兵部解赴戍所。寶山
業已到營。嗣後崇厚奏報軍情。著准其列銜
具奏。將此由五百里各諭令知之。○署直隸
總督崇厚奏遵查直隸肥鄉縣知縣楊毓枬。
盡心吏治。洵屬賢員。永年縣知縣謝恕。縱賊
殃民。屬實。應請革職查辦。雞澤縣知縣高樹
庠。訪無餽賊情事。仍俟彙案查辦從之。○署

兩廣總督晏端書等奏請將咸豐六年九年
並同治元年三屆計典。統俟新授督撫到任。
再行舉辦從之。○予直隸王家莊陣亡護軍
參領烏什杭阿等祭葬。世職加等。○追予江
蘇松江殉難附生范臺暨孫女迪姑廩生張
恩普暨女玉姑素姑陣亡在籍縣丞張初釐。
分別旌卹如例。○乙亥。予山東登州府屬殉
難紳民婦女一萬二千三百七十二名口分
別旌卹。並入祠建坊如例。旌表守正捐軀

陝西鳳翔縣民翟忍兒妻戴氏

上以祭

社稷壇自是日始齋戒三日（丙子）

孝儀純皇后忌辰遣官祭

裕陵○諭議政王軍機大臣等侍講沈秉成奏

請撥兵迅援鳳翔岐山各摺片並鈔錄陝西

紳士信函二件呈覽鳳翔岐山兩城被圍日

久情形萬分危急昨據給事中王憲成奏當

經諭令穆騰阿瑛榮咨商雷正綰移軍往解

城圍該處地方界連漢中為川陝往來要道

且與甘省接壤設被賊眾占踞與甘省回匪

連成一片則勢成燎原益難收拾多隆阿督

師秦省全陝軍務皆應籌及不得專顧同州

一隅置全局於不問著即迅速撥兵前往援

應並著雷正綰統率所部星夜馳赴鳳翔岐

山一帶力解城圍以救倒懸不准稍涉遲延

致誤大局同州軍情若何朝廷日深廛念該

大臣務宜懍遵昨日諭旨將軍情隨時奏聞

毋得仍前疏略鳳翔岐山兩城糧盡餉絕百

姓至以樹皮充腹億萬生靈殘喘待斃情形

慘不忍言而瑛榮於該郡守令專派員丁赴

省告急多次並飛文驛遞告急四十餘次置

若罔聞其膜視地方情形萬分可恨該撫身

任封疆於所屬郡縣安危毫不關心既無一

旅之師前往援應且無一卒一使前往偵探

誠不識該撫是何肺腑若該撫尚有天良即

當迅速籌兵前往援應不得專以軍務推諸

多隆阿一人置所屬地方危急於不顧至岐

鳳紳士信函內所稱該縣令鄺豫誤信回役

馬侍魁縱令勾結同教匪黨焚殺嚴禁團勇

開礮擊賊復因忌功轟斃在籍兵部差官楊

盤珠等數人並毛震壽遣援鳳翔之縣丞劉

春堂所部川兵通賊情形均著多隆阿瑛榮

雷正綰嚴切查明具奏不准一字含糊錄呈

原信二件均著鈔給閱看將此由六百里各

諭令知之○以故郭爾羅斯鎮國公揚贊巴

拉孫嘎爾瑪什迪襲爵

大清穆宗繼天開運受中居正保大定功聖智
誠孝信敏恭寬毅皇帝實錄卷之五十六

大清穆宗繼天開運受中居正保大定功聖智
誠孝信敏恭寬毅皇帝實錄卷之五十七

教修

同治二年癸亥二月丁丑朔

上詣綏履殿問

慈安皇太后安平安室問

慈禧皇太后安至丙午皆如之祭

先師孔子遣大學士賈楨行禮○諭內閣據
吏部奏前經簡放湖南岳常澧道之劉達善
查於上年七月己丁母憂請另行簡放等語
劉達善前經毛鴻賓奏准留於湖南差委係
屬得力之員該員現在丁憂所有湖南岳常
澧道員缺著即改為以劉達善署理○又諭

左宗棠奏攻克湯溪龍游蘭谿三縣及金華府城一摺。與者齡所奏情形大略相同。浙江金華踞逆恃湯溪龍游蘭谿為犄角。官軍圍攻湯溪。疊次擊敗援賊。逆勢窮蹙。正月初十日。藩司蔣益澧密約投降賊目彭禹蘭內應。將李尚揚等賊目八名誘擒。旋啟西門。官軍衝入。該逆無路奔逃。巷戰逾時。先後斃賊五千餘名。其奪門越濠逃出者。復經知府康國器擊斃四千餘名。城中之賊殲除殆盡。當將

湯溪縣城克復。城外賊壘同時攻克。援賊向金華一帶狂奔。總兵高連陞等督軍乘勢掩殺。斃賊二千餘名。自酤坊開化村至白龍橋等處。賊壘數十座一律焚毀。龍游之賊屢經官軍擊敗。初九日忽出悍賊千餘名。圍撲官軍營壘。參將余佩玉等督軍奮擊。斃賊數百名。餘賊敗入城中。十二日賊開東門向湯溪大路竄去。金華總兵劉培元一面收復城池。按捕餘逆賊目張可城等。率黨千餘名。款營

乞降。一面派隊追剿竄賊。沿途截殺。斃賊約近萬餘名。十三日追近湯溪。復經蔣益澧等擊斃數千名。餘賊得免者無幾。蘭谿之賊先經臬司劉典擊敗。其勢已孤。十二日分兩路逃走。劉典派兵追剿。先後斃賊千餘名。當將蘭谿縣城克復。金華府城踞逆劉政宏見官軍進紮白龍橋。遂於十二日率黨由東門逃竄。高連陞等乘勢奪門而入。殺賊二千餘名。立將金華府城克復。金華等處逆賊負隅已

久。此次官軍連克四城。生擒首逆。洵足以寒賊膽而快人心。左宗棠調度有方。深堪嘉尚。仍著督飭各軍節節進剿。盡殲醜類。浙江布政使蔣益澧戰功卓著。著賞給小卷江紬袍料一件。江紬馬褂料一件。白玉翎管一支。白玉搬指一箇。大荷包一對。小荷包兩箇。並交部從優議敘。○又諭左宗棠奏浙江失事。應行查辦文武各員。訊明分別定擬。一摺。浙江各府縣或被賊久踞。或曾經竄擾。該地方失

事各員。均應一律查辦。現經該撫訊明。已革署杭嘉湖道劉齊昂。雖無帶兵專轄之責。惟杭城陷後。展轉偷生。難從末減。已革金華府知府王桐。於賊匪未至之先。業經到任。兩月該府城堅固。易守。如果布置嚴密。何至一攻卽陷。雖因兵單失守。該革員亦曾受重傷。究屬罪無可逭。劉齊昂、王桐均著發往新疆充當苦差。已革副將余永椿。雖無聞警先潰情事。惟打仗不力。屢次挫退。著發往軍臺效力

贖罪。革職留任。署於潛縣知縣包容。該縣本無城郭。杭城旣陷。勢實難支。第責重守土。咎無可辭。著革任。發往軍臺前署安吉縣知縣周冕。委署在兩次失守之後。又無防兵力難堵禦。至據稱失守之時。係奉調進省。實屬意圖掩飾。前署新昌縣知縣楊詩益。該縣本無防兵。賊至尚無棄城先走之事。前署甯海縣知縣黎定攀。於縣城失守。實因眾寡不敵。所致。前署雲和縣知縣柯沅。該縣本無城池。致

被闖入。前代理龍游縣知縣衢州府經歷朱毓榮。委代在失守之後。城中又無官兵駐守。失陷情節尚輕。惟以上五員均有守土之責。豈可稍涉寬縱。周冕、楊詩益、黎定攀、柯沅、朱毓榮均著革職。發往軍臺前署金華府知府徐慮。善於失事。本案情節最輕。惟府印被搶。究屬咎有應得。著革職。毋庸留營效力。○又諭左宗棠奏甄別道員廳縣。請分別勒休革職一摺。浙江溫處道支方廉。年老才庸。難膺

表率之任。著勒令休致。署玉環廳同知白讓卿。年力衰頹。昏鄙不職。署常山縣知縣王蘭貌。似有才心。殊狡詐。開化縣知縣曹建春。庸懦糊塗。不堪造就。試用知縣江允中。輕佻放縱。有玷官箴。先用知縣劉心濂。性情狡猾。工於作偽。升用知縣候補縣丞王恩溥。性情乖謬。嗜好甚多。著一併革職。永不敘用。以肅吏治。○諭議政王軍機大臣等。崇厚奏嚴防河岸。籌辦濠工一摺。據奏連日河東賊匪在大

營河口尖莊等處乘夜來擾意圖搶渡經隔河開槍轟斃數名賊遂不敢近岸遙見火光向東南冠縣一帶竄去崇厚前赴尖莊親歷河岸查看水淺可涉者多處長濠工程現飭糧臺酌發銀兩興工挑挖並稱沿河紳民樂有此舉卽著崇厚督飭委員人等妥速勸諭催集民夫趕緊挑挖務令濠工一律寬深足資守禦並不得稽延時日致令賊匪突行衝撲其水深崖陡有險可守之處均須督令帶

領兵勇各員弁嚴密豫防毋稍疏懈至各紳民等如能將長濠認工捐挖自應覈計工價給與獎敘所請頒發五六品等職銜部照及國子監照均於本日飭令各該部監照數頒發矣河東騎賊向東南冠縣一帶竄去河東現在有無餘匪東省有無兵勇迎頭截擊崇厚前奏查明張錫珠一股回竄館陶等處僅止馬步二三千人自不難於殄滅著懷遵前旨仍由寶山酌量帶兵越境追勦與東省兵

勇會合卽將此股賊匪悉數殲除並將追勦及賊蹤所到地方情形偵察明確詳細奏報河西平鄉邱縣一帶近河處所既有聯莊會良莠不齊卽責令祝塏及副將劉景芳等酌帶兵練前往各處嚴密按拏如果居民人等能將伏匿匪徒捆獻亦卽加之獎勵惟不得令不肖員弁藉端騷擾善良是為至要正在寄諭間譚廷襄奏到捻棍各匪援應長城被擊東竄並張錫珠股匪擾及堂冠派兵勦辦等摺片據稱張錫珠股匪渡河後由堂邑竄往范家廠一帶另有冠縣匪徒孫德邈乘機嘯聚與張錫珠股匪欲由魏家灣一帶偷渡運河東犯譚廷襄所派海羣馬隊及陳顯彝勇隊均已趕到並飛飭總兵保德馳赴堂邑一路兜擊著卽嚴飭該總兵等會同直隸追勦之軍併力埽蕩寶山趕到卽親督所部與東省兵勇前後夾擊毋稍延玩宋景詩既不十分出力其隊目程順書竟至隨賊而去狼

子野心勢難歸正崇厚譚廷襄務各懷遵疊次諭旨嚴加防範如果心跡漸形不軌卽當密速妥籌先發制其死命設法殲厥渠魁再行解散餘眾如或辦理不善不能臨機觀變或不善控馭以至釀成巨患必惟崇厚譚廷襄等是問陳顯彝聲名甚劣且既經該前撫由淄川撤回何以此次仍令帶兵著查明如不得力仍行撤去不准姑容李城等糾集棍教各匪欲援長城之賊經譚廷襄咨令德楞

額探蹤扼截專辦北路卽以兼顧長城何以德楞額仍駐坊前並不移軍及賊竄至長城黃國瑞之軍腹背受敵德楞額仍敢坐視不相援應殊出情理之外該已革副都統明係挾譚廷襄奏之嫌並因其不日交卸東撫輒敢屢次故相違拗置地方軍務於不顧意將何居著僧格林沁嚴行查叅督令速與東省官軍合力勦賊自效現又經譚廷襄咨令追勦北竄之賊如再不能迅速進兵則是有

心延誤惟有卽時軍法從事諒僧格林沁亦斷不肯為之姑容也江南海贛境地毗連著譚廷襄飛咨吳棠派兵堵勦並嚴督同知奎芳與知縣王成謙等各隊將紫荆關竄出之匪兩面夾攻痛加殄除毋令與淄川之賊為援再與李城等股匪勾合總兵曾逢年督攻淄川辦理如何著卽催督進攻豫防外匪赴援早期肅事教匪疊次潛撲泗水及鄒滕等處民寨仍不得以派兵截擊卽行追回防範

稍疏東昌北路所關尤要該前撫將兗州軍事布置交恩錫暫行督率擬卽日親帶馬步兵勇馳赴東郡督辦均著隨時具奏將此由六百里各諭令知之○又諭左宗棠奏攻克湯溪等縣並金華府城生擒首逆者齡奏克復湯溪等三縣城池各摺片覽奏曷勝欣慰金華等府縣四城地踞上游最為扼要且為大股賊匪屯聚之所現已同時攻拔賊之精銳亦為官軍殲盡下游杭紹諸逆自必聞而

膽喪者齡左宗棠務當乘此破竹之勢會督
閩浙諸軍星夜進擣杭州為一鼓殲除之計
一面分軍規取永康武義以清後路並嚴飭
浙東兵勇迅速攻拔紹郡及所屬各縣城以
期節節進剿為四面合圍杭城之舉毋稍延
誤前據朱蘭奏稱包立身謝敬兩軍可與官
軍犄角克後紹郡並保舉餘姚縣生員朱祭
等曾經諭令左宗棠分別籌辦察看包立身
所部鄉團是否業已散遣該團首現在避居

何處其領隊之陳紹瑩並餘姚紳士謝敬力
戰情形均著左宗棠按照朱蘭原片所陳詳
細查奏將此由六百里各諭令知之○又諭
官文等奏遵籌募勇赴晉現無堪以統率之
將請仍俟袁復清等到晉後察看如果得
再令來楚添募多隆阿協餉仍由楚省按月
報解英桂請以募勇之費抵解多隆阿協餉
徒滋輾轉轉恐有誤征糈應請無庸置議袁
復清等成軍後行糧擬籌撥銀數千兩以資

口食即作鄂省協濟晉餉無須籌還等語湘
勇因南北風氣異宜不願應募赴晉此時將
領未得其人即令勉強召募亦屬難資得力
著照所請毋庸添募俟袁復清等到晉由英
桂察看該二員如果打仗得力再令攜銀赴
楚添募以收實效多隆阿月餉三萬五千兩
仍由楚省按解毋庸抵作募勇經費以免輾
轉楚省既籌袁復清等行糧作為協濟晉餉
所為鄰省計者已屬周到英桂即派員迎提

令袁復清等赴晉防剿仍隨時察看再行具
奏前據英桂奏晉省練勇未經戰陣率多恇
怯而奉調吉林黑龍江馬隊暨正定天津兵
亦均疲弱且多不守紀律非嚴加訓練難資
得力等語兵丁不守紀律其害甚於無兵亟
宜整肅營規勤加訓練以期克當大敵方不
至虛糜餉需有名無實各處兵勇到防已非
一日英桂與德興阿均有統率之責何以數
月之久不行整頓德興阿現在何處駐紮所

辦何事著英桂查明具奏該撫務當振刷精神力圖自強之計毋徒恃鄰省援應為也將此由六百里諭令知之○又諭官文等奏迎勦豫擒獲勝楚邊防勦緊要未能分兵馳援豫陝及參贊多隆阿軍務現在無員可派各摺片豫擒陳大禧前竄隨州經楚軍擊敗回竄豫境此股賊匪屢經敗衄已成强弩之末諒不難剋日殲除惟皖捻西趨沈項誠恐與該逆勾合勦辦又形棘手著張之萬毛昶熙

迅飭余際昌李續燾等軍併力殲除毋任再行免脫並一面飭令張曜趙鴻舉等嚴扼皖捻西竄之路以固藩籬楚豫邊境處處毗連官文等以防務緊要未能分兵赴豫自係實在情形卽著該大臣飭令沈俊德楊朝林等軍嚴扼隨州等處要隘儻該逆回竄卽與豫軍會合夾擊毋稍疏虞至張之萬前奏上年十二月二十八九日我軍攻克固縣鎮陳逆失其巢穴奔竄隨州此次官文等奏報則稱

十二月二十八日豫軍李續燾余際昌進勦失利該逆乘勢南竄隨州等語何以兩處奏報迥不相符難保非帶兵各員捏詞稟飾張之萬率行據稟入告軍情奏報豈容稍涉粉飾著張之萬查明嚴叅懲處以儆將來至陝省漢南軍務喫重疊經諭令官文等飭令梁作楫一軍越境追勦復以興安失守情形萬緊諭令江西布政使李桓馳赴漢南接辦並疊諭嚴樹森卽日出省駐紮秦楚適中之地

督率梁作楫等軍克復郡城此次該大臣等尚稱鄂邊喫緊未能越境進征自係尚未接奉寄諭興漢為川陝楚三邊要區毛震壽株守洋縣毫不得力李桓到尚需時設被該逆久踞旁出肆擾三省邊患伊于胡底著嚴樹森仍遵前旨卽日馳赴秦鄂交界地方扼要駐紮督飭梁作楫歐陽正塘等軍由竹谿一帶掃蕩餘賊剋日越境馳勦興安收復郡城以副委任毋得株守邊隅藉口兵力不敷致

千嚴譴李桓遠在江省即使剋日抵泰亦無得力兵勇足資勦辦興漢軍務非楚省力籌兼顧資以兵力萬難藏事且恐日形滋蔓更無了期該大臣等尤當力顧大局毋得以接統有人稍涉推諉至嚴樹森現在亟須出省自應添募勇丁督率前往以備策應並可兼顧泰鄂邊防所有山西奏請添募之勇自難兼及卽著照官文等所籌俟袁復清等抵晉時再由該省備銀至鄂以資招募陝省兵餉

卽著毋庸抵撥本日已諭知英桂照請辦理矣多隆阿軍務參贊需員官文等以道府大員中實無諳練戎機之員堪膺此選自係為慎重軍務起見仍著官文等隨時留心如有練習兵事宅心公正大員仍行奏明派往以資臂助將此由六百里各諭令知之○又諭勞崇光奏行抵湖南募勇改道兼程前進一摺勞崇光由粵赴黔因沿途風水阻滯本年正月始抵湖南省城現在鎮遠路阻欲改由

銅仁石阡等處前進並自募勇丁二百名隨帶差遣所籌均尚合宜著卽探明道路迅速入黔會同張亮基並函商崇實賂秉章將應查案件設法辦結以副委任哥士耆因教民一案未結屢向總理各國事務衙門呈遞照會並鈔送貴州主教胡縛理寄該公使信函經該衙門節次行文函知該前督諒已陸續接收查照辦理總之賠償不妨俯允抵償則斷不能行該前督更事最久自能於國體民

情兩無所失也將此由六百里諭令知之○浙江巡撫左宗棠奏請以廣西左江鎮總兵官高連陞留浙勦賊允之以克復浙江金華湯溪龍游蘭谿各府縣城賞道員王德榜父母二品封典總兵官劉培元巴圖魯名號餘加銜升敘有差予陣亡把總鄔勝高外委周進鏐祭葬世職加等○戊寅祭大社
大稷遣醇郡王奕譞恭代行禮 諭內閣前因

道員黃元吉將參將曹福雲擅行正法。當令僧格林沁唐訓方確查辦理。茲據奏稱黃元吉營內帶兵官曹福雲勇數太虛。經管理營務已革知縣楊繼煥等查出。裁撤一半。適山西解到餉銀。曹福雲仍以原數冒領。經黃元吉駁斥。曹福雲竟將黃元吉推跌倒地。復因黃元吉將其棍責。聲稱必欲起隊向楊繼煥等報仇。黃元吉恐滋事端。因將曹福雲正法等語。曹福雲冒領勇糧。膽敢將統帶官推跌。

本有應得之罪。惟黃元吉既將該參將棍責其事已結。何以聞有起隊報復之言。不復詳察。輒將該參將正法。是否有架禍唆使之人。亟應徹底根究。以成信讞。著唐訓方即提已革知縣楊繼煥參將范文英李安邦來營研訊確情。按律定擬。候補道黃元吉著暫行革職聽候查辦。○諭議政王軍機大臣等李鴻章奏籌備京米情形一摺。前因戶部奏請籌款由江蘇省購運。商米以實倉儲當。經諭令

李鴻章趕緊購買。陸續運津。茲據該撫奏稱現擬責成商人分赴湖廣等處採辦。並設局勸辦各等語。江蘇省各府縣產米不敷。民食向賴湖廣等省商賈販運。近來米商斷絕。採購維艱。自係實情。即著照該撫所議。責成商人分赴湖廣江北一帶採辦。由該商承運。赴津交兌。著官文等查照。遇有採辦京米商船過境。其關稅釐捐概予寬免。驗明有無應完他稅。分別放行。毋許留難。以示體恤。前諭李

鴻章將革守俞斌罰款銀二十萬兩。為購買京米之用。如有不敷於江海關洋稅項下湊撥。現在該革員罰款既難如數著追。而江海關洋稅一項又屬入不抵出。京倉關繫緊要。自應設法接濟。著照李鴻章所請。迅即勸諭商紳各富戶無論粳私洋米或自行捐運或湊繳銀錢交商購運。儘捐儘解。藉濟要需。並著妥議章程。設局勸辦。不得令經手各員從中舞弊。該商紳等捐有鉅款。准其隨時奏獎。

其湊捐各散戶並准其彙案分別咨部覈辦
李鴻章另片奏請飭湖廣江西採辦米石從
漕折內開支等語漕糧改徵本色及採買米
石運京前經戶部奏咨湖廣等省遵辦旋據
官文等以事多窒礙奏請停止茲據李鴻章
奏請飭湖廣等省酌提漕折採辦米石解至
安慶大通一帶由曾國藩添委委員督同照
料仿拖帶鹽船之法附輪船拖過金陵駛至
上海比照海運章程勸令沙衛各船陸續運
津其由滬接運放洋時由李鴻章妥籌辦理
湖廣江西等省距安慶尚不甚遠既不若解
滬解京長途阻隔而以輪船護送亦非冒險
挽運事屬可行所有湖北之武昌漢陽荊州
襄陽黃州等府湖南之長沙衡州澧州岳州
等府州江西之南昌瑞州臨江吉安撫州建
昌等府均堪採辦著官文嚴樹森毛鴻賓沈
葆楨飭令該藩司糧道等體察情形責成各
該州縣動用漕折採辦米石各視漕折舊額

或二三成酌加運費折耗派員按照前法辦
理如此沿江轉運聯為一氣於京倉必當大
有裨益不至支絀為患將此由六百里各諭
令知之○又諭崇厚等奏直隸軍務萬分危
迫請飭僧格林沁北來兜剿暨寶山請調提
標等兵各摺片前據崇厚等奏匪蹤撲滅全
境肅清當以所奏情節可疑恐係據屬員一
面稟詞敷衍了事數日之間旋稱河東匪勢
燎原情形萬分危迫前後奏報不符殊堪詫

異僧格林沁剿辦皖捻正在喫緊之際豈能
抽身北來崇厚寶山成保膺茲重任均屬責
無旁貸且疊次奏調兵勇為數不少著懷遵
前旨飭令派出各員弁激勵兵勇聯絡鄉團
嚴密防剿儻敢藉口兵單專待援應並不實
力剿辦致令逆匪回竄擾及畿輔恐崇厚等
不能當此重咎也寶山前赴館陶剿賊所統
遮克敦布兵勇本屬單薄著照所請准其將
古北口提標兵五百名迅調來營以資攻剿

所請調熱河駐防兵五百名已諭令瑞麟遵照調撥矣除將此次所奏情形再行寄諭僧格林沁妥籌外仍著崇厚等相度機宜以勦為防毋得稍涉疏懈遮克敦布隨營員弁內護衛榮俊主事王仲姓均著不准留營餘均准其留於寶山軍營以資差委將此由五百里各諭令知之○又諭李鴻章奏官軍進攻太倉援勦福山各情形一摺太倉為常昭門戶李鴻章進攻太倉原為救應常昭起見而賊援踵至官軍連日進勦雖疊有斬獲竟不能攻拔堅城且中外兵勇傷亡過多常勝軍已退回松江是太倉之師攻取尚難得手著李鴻章密飭李鶴章郭松林等堅守營壘毋為該逆所乘仍責令程學啟等遏截崑山援賊俾官軍得以併力太城相機進取常昭城外營盤先後被逆匪攻陷孤城岌岌可危李鴻章因周興隆等望援甚切調派潘鼎新等帶陸勇三千附輪船繞赴福山援勦著卽飛

飭黃翼升將移紮鹿苑港之水師星速前進會同潘鼎新等攻取福山要隘藉通常昭消息以安降將之心黃翼升毋得以沙灘無可停泊為辭稍涉推諉浦東浦西防守最關緊要李鴻章所部業已分赴太倉福山等處後路不免空虛該撫仍當妥籌兼顧嚴密防範俾松滬各營一律穩固方為妥善將此由六百里諭令知之○又諭唐訓方奏提督強占鹽利把持淮河絕皖餉而壞釐網勢必釀成巨患一摺據稱李世忠於奏定鹽釐之外私增多卡重累商民並派總兵楊玉珍帶領洋槍隊突赴西壩將各棧餉鹽商鹽盡行封錮有運鹽出棧者卽行斬首兇惡萬狀其各營已捆之鹽經過高良澗該卡用纜船堵住水口勒捐釐金甚重各營眾氣憤莫遏打開纜船恐難無事該提督於盱眙舊縣私立城池派營防守家產復於五河縣兩岸對立礮臺安置纜船橫截水口不知是何肺腑唐訓方

現令李世忠之族叔李銜華馳赴滁州勸令改弦易轍尚未知能否聽從等語李世忠貪婪無忌壟斷鹽利不但皖營軍餉被其攘奪而壩商竈丁無所仰食必至盡驅為盜於全局大有關礙唐訓方前經函致曾國藩屬為寄書開導以冀就我範圍惟李世忠貪黷性成恐未必翻然改悔而一味姑容含忍勢必坐擁厚貲招集亡命釀成巨患收拾更難本日據吳棠奏接准李世忠咨稱偽忠逆糾眾

二十萬陸續渡江今已四日上接和舍之賊並分股徑向東竄等語是江北軍情益形喫重而李世忠各軍分紮於浦口江浦一帶逼近賊營是其暗中勾結亦不可以不防著曾國藩斟酌現在情形妥為駕馭仍嚴飭李世忠將派赴西壩之洋槍隊即日撤回所有各棧封錮之鹽悉聽各商販營員自行起運不得恃勢攔阻該提督若能翻然改悔減釐裁卡恪守舊章固屬妥善儻始終驕橫略無忌

憚亦不可不加以裁抑即著該大臣相機妥籌辦理以杜異日尾大不掉之漸將此由六百里密諭知之又諭唐訓方奏接奉疊次寄諭遵即籌辦情形及請催李續宜星速來皖各摺片李續宜續請假期刻下已滿計必能星速就道而長途跋涉到皖尚需時日臨淮軍務緊要唐訓方責無旁貸現在巢和各城尚未攻克本日據吳棠奏偽忠逆糾眾二十萬陸續渡江是皖北情形萬分喫重且僧

格林沁攻擣捻巢該匪窮蹙紛竄亦意中事臨宿一帶防剿均未可稍鬆該署撫務當振刷精神於一切戰守事宜妥籌熟計斷不可存五日京兆之見稍涉鬆懈蔣凝學等軍現因防剿髮逆自不暇進擣朱圩仍著督率太和紳團認真防守一俟兵可分撥即圖進剿苗練近頗恭順據奏無庸添兵駐守俾釋猜疑現雖暫從該署撫所請惟苗練陰鷙性成仍當隨時與曾國藩僧格林沁熟商駕馭鈴

束之法不可稍涉大意張蘭勳業經訊明正法傳首各圩足昭炯戒克蒙額雖無藉詞退避情事該署撫仍當隨時察看如不得力卽據實嚴叅毋稍姑息將此由五百里諭令知之○又諭前因李續宜奏懇賞假四十日當經批准俟假期滿後卽迅速起程不准再有續請現在假期將滿該撫自當懍遵前旨剋日起程矣渡江竄皖之賊現麇聚於含和巢縣一帶該省軍情一切戰守事宜在在均關

緊要必須李續宜抵任後懾服悍練埽蕩擒巢皖北軍務方有頭緒直隸山東賊氛偏地偪近畿輔亟盼僧格林沁分兵前來埽蕩惟必須該撫到皖以後僧格林沁方能察看情形抽身一行或撥兵助勦是李續宜之赴皖為三省軍務安危所繫尤為刻不容緩該撫忠義性成深為朝廷倚賴著卽迅速起程以副委任毋稍遲延將此由六百里諭令知之○又諭吳棠奏准提督李世忠咨稱偽忠逆

糾眾號稱二十萬陸續渡江今已四日聲稱上接和含之賊並分股東竄等情當卽飛飭總兵安勇等嚴防將壩等處要隘並添派副將蔡觀賢等督帶礮船協防湖面各等語前據都興阿奏偽護賀齊三逆均抵金陵號稱五十萬實數確有二十萬眾有由下關渡九洲洲竄撲儀揚從邵伯直撲裏下河之信此時偽忠逆糾合大股陸續渡江四日之久尚未畢渡其人數之多已可概見都興阿等於

上下游分設統領四員派定地方各專責成布置尚屬周密富明阿親往沿江察看亦稱聲勢均極聯絡惟該逆垂涎裏下河完善之區蓄謀已久現在悉眾東趨其勢甚銳都興阿等務當嚴飭水陸各營加意防範先固藩籬然後乘間挫其兇鋒擊其惰歸不得稍有疏虞致令掣動全局前次派援金陵大營之楊心純等軍並著趕緊調回原防以厚兵力至江陰等處逆匪前據都興阿奏有分竄江

北之意。都興阿已派馬隊翼長杜嘎爾親帶練卒詳察各路溝渠險要。遠近形勢。豫籌破敵之策。現在各該處賊情。若何杜嘎爾操練兵隊。已否嫻熟。並著隨時具奏。以慰懸繫。將此由六百里諭令知之。○又諭吳棠奏派兵扼防蘭郅股匪。並黃國瑞一軍。偪攻長城逆壘情形等語。捻匪李城等股。援應長城踞逆。圍撲官軍營盤。經黃國瑞督兵迎擊。頗有斬擒。而援賊馬步萬人。復由西北兩路擁至。長城踞匪亦開門衝出。復經黃國瑞等分投衝殺。殲賊無算。賊始敗退。黃國瑞一軍自入東境後。疊次出力。甚屬可嘉。惟該營兵力太單。恐成腹背受敵之勢。昨據譚廷襄奏攻勦北路情形。當因黃國瑞營盤緊要。諭令僧格林沁嚴催德楞額迅速進兵。此時該處賊援麇至。亟應厚集兵力。以遏賊氛。著僧格林沁遵前旨。嚴飭德楞額趕緊前往策應。並飭富和等軍一併相機會剿。崇厚現辦直東軍務。

具奏急迫情形。非該大臣親率兵勇督剿。不能得力。原摺鈔給閱看。卽著妥籌辦理。譚廷襄吳棠督飭黃國瑞等。就現有兵力。迅克堅圉。毋留餘孽。蘭郅海贛境地毗連。李城等股若為官軍擊敗。不能與長城踞匪勾結勢必悉眾東竄。譚廷襄吳棠務當嚴飭在事員弁實力扼堵。毋令賊蹤闖入本境。儻有疏虞。惟該前撫等是問。偽忠逆糾眾渡江。其蔣壩三河等處險隘。已據吳棠飭令總兵安勇等妥籌防範。並添撥礮船協守。卽著飭該總兵等嚴密防勦。不得稍涉大意。以固北路藩籬。將此由六百里各諭令知之。○予安徽甯國陣亡縣丞沈煒祭葬。世職監生許錫賞卹如例。均入祀甯國府忠義祠。○撥熱河駐防官兵五百名赴署直隸提督寶山軍營聽候調遣。○己卯春分朔日於東郊遣定郡王溥煦行禮。○遣官祭文昌帝君廟。○諭議政王軍機大臣等崇厚。

等奏體察賊情會籌勦辦一摺據稱直東賊匪原係白蓮教直隸之大順廣三府山東之東昌臨清曹州各屬均有此項匪人散則為民聚則為寇館冠革朝一帶卽為該匪老巢現若分兵進勦卽係擣其巢穴惟兵勇太單全行東勦則直境空虛若酌留直境防守則東勦不敷恐致顧此失彼請飭僧格林沁帶隊北來等語僧格林沁一軍勦擒正當喫緊未必卽能北來昨已寄諭該大臣斟酌辦理

崇厚等仍當就現有兵力妥籌防勦以遏賊匪回竄之勢張錫珠等擄掠所得輜重聞在河西一帶存寄是該處伏莽重重亟應盡力挖拏以除後患著崇厚等出示曉諭該處各村莊限以期日捆獻匪徒送官懲治儻敢容隱窩留過期不首一經官兵訪捕則玉石俱焚必將全村勦辦如此明白曉諭庶聞風震懾可以散其黨與而河東之匪無從再與河西各村互相勾結惟仍應嚴防胥役藉端誣

陷兵勇乘勢騷擾所稱馬步各隊得力者少此項不得力之兵勇如係未經戰陣者卽趕緊訓練以成勁旅儻查有疲病老弱並著認真裁汰妥為散遣毋令逗遛滋事將此由五百里各諭令知之○以故輔國公載荻子溥泉降襲不入八分輔國公○以直隸肥鄉擒獲匪首張兆采賞知縣楊毓珩知府銜花翎楊汝為等藍翎餘加銜升敘有差○庚辰遣官祭昭忠祠○諭內閣都興阿等奏請將營

員懲處等語乾清門侍衛吉勒圖善經都興阿派令統帶馬隊乃縱容披甲依薩布在營聚賭未經懲辦並因委參領德壽恆泰查看地勢落後稟請查辦業經副都統杜嘎爾摘頂懲處吉勒圖善復以該參領等謁見不恭遽加鞭責實屬寬嚴倒置任性妄為都興阿等請將該侍衛交部議處不足蔽辜著改為交部嚴加議處委參領春全呈控吉勒圖善縱容聚賭及擅加鞭責各情語多裝點亦屬

不安本分著交部議處以儆效尤尋議吉勒圖善應照溺職例革職春全降三級調用照例帶所降之級留營效力從之○諭議政王軍機大臣等都興阿富明阿奏水師截勦寬渡賊船獲勝及調撥水陸各情形一摺據稱忠逆調集常州等處逆匪晝夜渡江正月十三日副將馬步雲挑選礮划衝過九洲洲迎勦擊壞賊船無數殲斃逆匪甚多後因九洲洲賊船駛動開放大礮我軍未能深勦遂卽

收隊回防並據該副將等探稱賊眾大半皆於黑夜乘間偷渡自初十起至今渡過髮逆實有三萬餘眾偽護逆已率眾繞越江浦上竄安省現有數千賊在九洲洲之下紮營聲言仍有後隊尚未過江一俟到齊由偽忠逆帶領下竄儀揚等情又據副將劉成元探稟四墩子土橋等處皆有長髮男丁多者數千少亦二三十四五十百餘不等迨經盤詰均稱難民來往船隻間有槍礮經該將軍等

飛飭劉成元妥為稽查彈壓並通飭各營一體禁止復飭吳全美親帶師船駐江靖一帶查禁北渡各船運司喬松年將北岸港汊酌量釘塞裁減局卡函商鮑超將王可陞劉連捷兩軍抽撥以應北岸之急等語所籌均尚周密此時該逆銳意東竄都興阿富明阿務須飭令水陸各將弁晝夜嚴防毋稍疏懈如逆蹤徑犯儀揚該將軍等以逸待勞定能出奇制勝痛挫兇鋒四墩子等處長髮男丁稱

係難民甚屬可疑何不令其趕緊薙髮設法安置且既係難民何以來往船隻間有槍礮必須嚴為盤詰如係假託難民卽當認真擒捕使逆賊聞而膽寒自不敢遽行竄撲劉成元駐紮泰興兵勇如果不敷分布卽趕緊撥派馬步以厚兵力鮑超等軍旣已得手上游賊勢較鬆如能抽出王可陞劉連捷兩軍赴北岸助勦自更得力著曾國藩酌度迅調該逆渡江後如分竄各處則力單易制各處兵

勇尚可制賊如合併一處卽就近抽撥兵勇以全力應之不得稍有疏失都興阿等呈遞軍機處信函據稱李世忠與苗練因爭鹽利在洪澤湖打仗將礮划等調去多隻現當江浦浦口防務萬分喫緊之時該提督受恩至渥宜如何激發天良及時圖報乃因一時小忿調兵赴鬪置大股賊匪於不顧實屬貽誤戎機著曾國藩飛飭該提督趕將兵勇調回防所毋任該逆得以逞志江北該提督勇敢

夙著諒不至樂私鬪而忘公戰也信一件著鈔給曾國藩閱看此旨並著曾國藩節錄與李世忠閱看不可使該提督知此事係都興阿等所言致生嫌隙為要將此由六百里各諭令知之○又諭張之萬奏皖汝各匪逼近汝郡飭軍扼截並擒獲臨漳等處匪首各摺片皖捻麇集阜陽境內與陳大禧各股勾合經張之萬毛昶熙督飭諸軍合擊匪眾焚巢西遁竄至李莊橋等處與陳逆平與舊巢甚

近若不及早殲除必至益形滋蔓張曜現已繞出賊前扼賊去路並經張之萬催集各路追剿之師一面激勵鄉團為四面兜圍之計著卽嚴飭兵團奮力攻勦務將陳大禧迅速殲除以免與皖捻勾結劉狗等股匪已經蘇克金所部及僧格林沁續派馬隊先後在鹿邑擊敗不至西竄該撫現已咨行僧格林沁俟蘇克金將此股擊退卽令其率得勝之師馳赴豫境與汝南各軍會勦陳大常等股匪

惟賊騎飄忽靡常深慮此勦彼竄官軍追躡常至落後張之萬等務當認真扼截俾該逆不能另行遠竄庶蘇克金等馬隊可以追及汝南與豫軍會合夾擊至臨漳內黃土匪崔懋現經地方官訪獲正法其支汶炳一犯仍著迅飭所屬嚴拏務獲毋任漏網崔懋係聚眾滋事首犯謝三既將該匪首窩藏豈有不知情之理嗣後該撫於此等通匪要犯務當立行嚴辦以儆奸頑毋須再事研訊轉致稽

遲寬縱也將此由六百里各諭令知之○又諭熙麟奏甘省軍情緊急一摺據奏接准恩麟咨據隆德縣知縣李超羣飛稟固原突被回匪擁入焚殺漢民殆盡道員萬金墉等被害現在回匪大股仍踞瓦亭道路梗塞當經咨行延綏歸化及蒙古東西兩旗等官兵星馳赴固熙麟帶同黃得魁兵勇繞道赴甘將於慶陽暫駐請飭多隆阿雷正綰等派撥勁旅交馬德昭統帶繞路慶陽取道赴甘或卽

令雷正綰回固原提督本任辦理等語又據多隆阿片奏回匪攻圍盤鄂係省城糧路現今雷正綰迅調新募四營移紮咸陽馬德昭一軍仍駐省城與穆騰阿等辦理西安防守並陳近日力攻王閣村等賊巢情形陝省軍情東西兩路均形喫緊陝南興漢各匪又復紛乘多隆阿之軍業已不敷分布固原重鎮為陝甘兩省咽喉突為回匪竄陷尤須迅速撥兵勦辦雷正綰專辦陝省西路須馳解鳳

岐之圍並兼顧涇原盤鄂等處斷難分身卽馬德昭留防西安省城勢亦難卽移動固原被陷萬不可令賊久踞要地惟有速催所調延綏及歸化城蒙古等兵星速併集以利攻勦著熙麟飛催所調延綏鎮兵一千名德勒克多爾濟及塔清阿速將恩麟咨調歸化城官兵二千名剋日由定邊等處馳往固原會勦並著奕梁將前次咨行聽調之阿拉善等處及東西兩旗蒙兵一併飛檄由甯夏鹽茶

一帶星馳赴固毋稍稽延固原等處前據恩麟疊奏布置情形何以此次猝被回匪擁入焚殺毫無豫備可見平時俱屬紙上空談全無實際著熙麟恩麟將此次固原被陷及萬金墉等被害情形均卽查明詳悉具奏前由英桂轉解多隆阿軍營之京營炸礮子一項多隆阿曾否收到此時攻擣王閣村等處賊巢正資利用此項炸礮京營火器營員弁善於施放該大臣營中定不乏此項員弁卽可

用其所長督率兵勇速圖擣穴擒渠以彰捷
伐多隆阿疊奏成功卽在指顧故於各路請
撥請援皆不肯分其兵力該將軍當以全力
迅奏膚公以副殷望毋稍存輕率之心或至
中賊詭計是為至要穆圖善等受傷應不甚
重省城防守仍飭馬德昭等妥辦雷正綰西
路進兵如何分布均著隨時具奏甯夏等處
勦撫辦理如何著奕梁隨時具奏將此由六
百里各諭令知之○又諭駱秉章奏攻克橫

江等處賊巢續辦按糧津貼張亮基奏髮逆
分竄副官村等處擊退情形各摺片石逆盤
踞橫江雙龍場兩處蓄意搶渡金沙江經臬
司劉嶽昭提督胡中和等攻克堅巢斬馘數
萬洵足大振軍威惟前據駱秉章奏該逆由
滇裹脅至十餘萬之眾現雖經此大挫紛竄
滇境而張亮基所奏復有大關等處迎擊石
逆賊仍返奔川境之語且披閱軍機處呈遞
張亮基所獲逆書該逆注意徑取敘郡屏山

副官村之賊欲由昭通渭林直抵回溪司造
橋渡河是其蓄意渡江回竄敘郡已可概見
駱秉章現派唐友耕等嚴扼安邊屏山檄湘
果果後各軍徑渡橫江西岸追擊卽著飭令
帶兵各員實力堵勦毋任回竄至該逆中旗
一股前已竄至會理州之窪烏司等處此次
竄滇之賊如內巧家廳接踵前往亦在意中
總兵朱桂秋所帶楚勇三千卽著飭令速赴
甯遠會同該處兵練相機勦辦並著潘鐸張

亮基徐之銘督飭帶兵員弁將竄入滇境之
賊與川軍會合夾擊大張撻伐毋留餘孽石
逆現竄何處並著駱秉章等確探具奏至川
省擬請續辦按糧津貼一節前因有人奏已
革藩司祥奎改畝捐之名為按糧加派苛勒
民怨沸騰曾諭駱秉章查明參奏此次該督
所請自係實在情形但使籌畫妥協自不妨
照議辦理著將前件查明覆奏再行降旨本
日據韓超奏接據徐之銘咨稱黔省回教張

翎翔圍攻興義商令馬如龍派委馬助國前往議撫飭安義鎮總兵趙德昌停兵止仗旋又稱馬助國在滇有經手事件另派回民皇甫遜前往辦理以致趙德昌停兵止仗逆回愈肆彼倡疊陷安南興義二城等語徐之銘前委桂金輪赴黔議撫曾諭該撫查明撤回尚未接據覆奏何以此次復欲派員前往咨令停兵致令該二城被陷究竟是何意見馬如龍如果辦理確有把握何以反令回匪益

肆猖獗疊陷城池著潘鐸徐之銘迅將辦理情形據實覆奏將此由六百里各諭令知之○又諭韓超奏回匪連陷安南興義分擾郎岱等廳州進剿情形並沈宏富難任提督及覆陳臬司未能和衷各摺片此次黔省因誤信徐之銘撫議致興義等城為賊攻陷所有帶隊之總兵趙德昌著准其暫免叅處韓超與田興恕亦免其議處仍著韓超督飭在事文武迅將安南等城力圖克復將回匪痛加

剿除毋令分擾他處貴州提督已令張亮基前往署理韓超自請暫行兼署之處著毋庸議仍著韓超催令田興恕剋日赴川剿賊不准藉詞再為奏留自干重咎田興恕赴川後如張亮基尚未到黔著將貴州提督印信暫行封存俟張亮基到時交其接收韓超覆陳龔自閱未能和衷情形並俟張亮基到黔時由該前督查明情由具奏再降諭旨將此由六百里諭令知之○又諭前因貴州教民一

案疊經諭令勞崇光迅速赴黔會同崇實等查辦本日崇實奏委員查明教民案件情形請將戴鹿芝曲賜矜全多文送部引見各摺片並鈔錄與胡縛理議單呈覽均交總理各國事務衙門速議具奏崇實另奏查明田興恕叅款暨黔省地方軍務情形各摺片並著留中俟總理各國事務衙門覆奏之日再降諭旨將此由六百里各諭令知之○四川總督駱秉章奏審明郭安邦控訴暫革遊擊徐

璋舞弊營私一案多係虛誣合依誣告律加等治罪徐璋駕馭失宜致被摭拾請開復原叅處分留營以都司降補下部議從之○以貪鄙不職河南知縣張同洛革職查辦予安徽潁州陣亡知州陳學仁祭葬世職加等○予四川橫江等處陣亡遊擊胡萬浦等二十六員祭葬世職加等○辛巳諭內閣前因戶部議覆御史朱文江奏湖北省釐局流弊甚多請飭該督撫酌量裁撤當經諭令官文嚴樹森遵照辦理茲據官文等奏稱湖北省自舉辦釐金以來每年抽收實數約在一百三四十萬兩全賴分設小局稽查偷漏大局之徵收始旺各處釐捐零卡勢難議裁且湖北省以一隅財力協濟數省軍餉亦多藉資釐金若不統籌兼顧輕議更張恐入款頓減本省防兵口糧及鄰疆協餉均難籌措等語所陳自係實在情形著照所奏湖北省原設釐局均暫免其裁撤該督撫仍當隨時稽查

各局委員僅有不能潔己奉公藉端侵蝕卽行從嚴懲辦務令有裨軍餉無病民生俟各路軍務平定庫款稍充卽由官文等體察情形酌議裁撤○又諭前因御史丁紹周奏各省釐捐流弊滋多當經諭令各該督撫裁撤委員統歸地方官經理茲據嚴樹森奏湖北省辦理釐金經前任巡撫胡林翼仿照唐臣劉晏用士類不用胥吏之法歷年舉行著有成效今若改歸地方官經理諸多窒礙就該省情形臚陳八弊所奏甚是各直省舉辦釐捐藉充軍餉原期有利無弊涓滴歸公嚴樹森所奏州縣有地方之責事務殷繁若責以釐事勢不能親歷鄉鎮必至假手吏胥從中舞弊其州縣中之不肖者又或視為利藪藉飽私囊甚至門印狼狽為奸紳矜扶同掩飾縱有弊端無從舉發且交代那移侵漁虧空諸弊從此而起均係實在情形所有湖北省釐捐著照嚴樹森所請仍照舊章毋庸改歸

地方官辦理。惟各局委員該督撫仍當隨時稽察。派委賢能之員。妥為經理。如查有營私舞弊情事。即著從嚴叅辦。毋稍徇縱。○又諭。前因官文等奏。湖北署應城縣知縣景匯。於失守縣城後。旋即隨同官軍克復。請將該員革職留任。當經降旨允准。茲據吏部奏。該員克復城池後。並未另有勞績。與奏定章程不符等語。署應城縣長陽縣知縣景匯。失守城池。例有應得之咎。惟該員與賊接仗。身受多

傷。與空言隨同克復者。究屬有間。景匯著仍照前旨。准其革職留任。○諭議政王軍機大臣等。上年因戶部奏庫儲支絀。當經嚴定限期。寄諭各督撫監督等。迅籌提解。嗣因年內報解均未足數。復經降旨。統限本年三月以前。埽數解清。茲據戶部奏稱。各省欠解銀兩。統計尚有三百四十餘萬之多。如三月以前。延不報解。則四月分放款無可支應。請飭迅速趕解。並將本年京餉銀七百萬兩一併源

源報解。另片奏廣東欠餉最鉅。請飭該督等按限籌解。各等語。京餉為部庫要需。各督撫監督等。以上年奉撥專提之款。逾限至今。已屬不成事體。若再遷延。致令京師放款無著。貽誤急需。咎將誰諉。著各該督撫鹽政藩司運司監督等。迅將該省關欠解銀兩。限於三月以前。如數解清。儻再逾限不完。即由戶部查照新章。指叅懲辦。其本年京餉。雖未屆限。並著一併源源報解。以資接濟。至廣東省欠

數最鉅。該省較他省尚屬易於籌畫。且戶部所提均係有著之款。豈容稍涉玩延。著晏端書督飭藩司文格鹽運使蔣志章。迅即按限籌解。儻再意存推諉。致誤開放。則前鑒具在。恐不能當此重咎也。其山西省京餉。業於去年十二月內。埽數全清。尚知緩急。仍著英桂督同藩司。將本年京餉陸續報解。以供支放。將此由六百里各諭令知之。○又諭景綸等奏追勦逆匪。擒斬多名。並分兵搜捕一摺。朝

陽流匪葛城澄等經官兵擊敗後帶傷東逃。經佐領訥爾吉等督兵尾追將首逆宋把什等擒獲。該逆折向南趨由興凱湖西南逃遁。富尼揚阿現派佐領常喜帶兵前往會合訥爾吉追擊著景綸等卽飭各員盡力搜捕務將匪首葛城澄擒獲其餘匪黨亦著悉數殲擒毋任一名漏網興凱湖西南一帶山深路險嶺南毗連琿春均與俄界接壤景綸等現已知照甯古塔一體搜捕著卽行知喀通阿無分畛域合力堵截毋令竄入俄界致貽後患黑背地方有無餘匪並著景綸等行知富尼揚阿實力搜捕毋留餘孽將此由四百里諭令知之○又諭前因風聞哈連陞家眷由潼關送回古北口居住當經密諭瑞麟派員嚴密訪查確實具奏茲據覆奏哈連陞父母妻子復回石匣地方均在伊姻親回民楊六家居住等語哈連陞前在潼關被回匪擄去其是否甘心從逆及現在存亡均無確實消

息其眷屬自應仍聽其在石匣居住哈連陞如果從逆必思接取眷屬前往著瑞麟密飭地方員弁將其眷屬隨時暗地防守儻搬移他處須派人尾隨不得任令遠颺無蹤如徑向西行卽著截拏嚴訊實情具奏將此密諭知之○又諭馮子材等奏請飭催廣東協餉一摺南路逆氛膺集鎮防萬分喫重若不速籌接濟飢軍譁潰堪虞於全局大有關礙且上年應解該營銀六十五萬兩僅據報解二千兩多寡之數未免太相懸殊著晏端書黃贊湯不論何項先措銀十餘萬兩迅派委員會同賴鎮海解赴鎮營一面查照前後派數酌量隨時撥解毋再遲逾推諉昨據都興阿等奏稱賊匪現在九洲之下紮營聲言後隊尚未過江一俟到齊由偽忠逆帶領下竄儀揚又探得四墩子土橋等處皆有長髮男丁迨經盤詰均稱難民等語都興阿現飭各軍實力防守恐該逆不得逞於江北或變計

旁竄鎮江。馮子材等務當嚴密布置。毋使有隙可乘。方為妥善。此項長髮男丁甚屬可疑。且往來船隻間有槍礮。難保非賊匪假託。難民分投埋伏。如鎮江亦有此項長髮男丁。必須詳細盤查。毋墮該逆詭謀。是為至要。將此由六百里各諭令知之。又諭官文嚴樹森奏蘇常髮逆圖竄皖北以擾鄂疆一摺。皖北和含巢一帶尚有賊蹤。若忠逆復率大股前往。勾結上犯楚疆。該省穆正春王桐柏所部

兵力尚單。殊不足禦此狂氛。著曾國藩督飭皖北各軍實力勦洗。或添撥勁旅前往協剿。或進擣蘇常。攻所必救。以分其勢。俾不至竄入楚邊。方為妥善。左宗棠在浙勦匪。現在極為得手。若乘此聲威。直擣杭嘉等郡。則該逆勢必回顧。蘇常無暇圖犯鄂境。應如何進剿。浙西以掣賊勢之處。著左宗棠悉心籌畫。妥為辦理。將此由六百里各諭令知之。又諭嚴樹森奏仇殺多命重犯潛逃赴營請飭軍

前正法一摺。據稱湖北隨州民人謝開基。赴多隆阿軍營充當親兵。著有戰功。據多隆阿咨請將該犯從前在籍殺人之案註銷。留營效力。並將該親兵之子謝順由棗陽縣監提省釋。一併留於軍前。勦匪查辦。謝開基謀殺謝登台一家七命。復挾監生畢太和指拏之仇。糾黨多人放火焚毀畢太和住屋。延燒多家。畢太和之妻女等均被燒死。畢太和與雇工李大貴逃出。亦被該犯殺斃。旋逃至豫省。招

集匪類。時圖嘯聚。請飭多隆阿立提巨惡。於軍前凌遲處死。其子謝順解鄂審辦等語。刑部律例。殺死一家非死罪三人。即應凌遲處死。此案謝開基先後殺死兩家多命。均在三人以上。查拏之後。復糾聚兇徒。為抗官拒捕之謀。實屬罪大惡極。亟應照例處以極刑。以申國憲。著多隆阿立提謝開基到案。於軍前凌遲處死。並照例於處決時加割刀數。不得以該犯殺賊立功為詞。致令窮兇極惡之犯。

得以幸逃顯戮伊子謝順等派令安員押赴湖北審辦毋稍疏縱近來犯事人犯多以軍營為遁逃淵藪該大臣軍律素嚴嗣後務當申明禁令以肅營制本日據都察院奏紳士周建豐等以鳳翔岐山兩城被圍日久專丁赴京呈控情詞甚為迫切鳳岐地關緊要若有疏虞則匪勢聯成一片愈不可制著多隆阿迅派勁兵星馳赴援都察院摺一件並著鈔給閱看正在寄諭間據多隆阿馳奏攻克羌白鎮王閣村老巢覽奏深為欣慰著該將軍將東路餘匪辦理肅清毋令一人一騎渡河竄至蒲州等處附近各匪一律鏟除然後分兵西路先其所急次第勦辦仍當謀定後動未可戰勝而驕俟詳細情形奏到後再降諭旨將此由六百里諭令知之○又諭嚴樹森奏鄂省舉行武闈鄉試循例辦理主考事宜一摺前因漢南軍務喫重疊經諭令嚴樹森卽日出省馳赴秦鄂交界地方扼要駐紮

督飭梁作楫等越境馳勦現在興安未復賊氛甚熾陝南無兵可調勦辦正當喫緊嚴樹森仍當懍遵疊次諭旨星馳出省督飭各軍剋期規復興安郡城以副委任所有該省武闈主考事宜著派員辦理以專責成將此由六百里諭令知之○補鑄陝西潼關協副將關防從巡撫瑛奏請也○予江南鎮江軍營病故總兵官李逢春祭葬卹廕○予安徽甯國陣亡都司韋上元祭葬世職○壬午諭內閣瑛奏興安兵團收復新舊兩城一摺髮逆陳得才等竄陷興安府城意圖久踞團總監生邱振家招集團勇於本年正月十四日會同知縣方傳理督率水陸各勇及城守官兵乘夜薄城該匪猝不及防放火奔逃官兵一擁而進當將興安舊城收復縣丞周錫齡等乘勢趕至新城適該匪出城奔竄兵團併力尾擊追殺十餘里興安新城同時收復監生邱振家激於義憤奮勇殺賊克復城池實

屬異常出力著先行賞給六品藍翎以示優獎○諭議政王軍機大臣等前因張之萬議覆御史呂序程條陳河南地丁錢糧諸多窒礙當經明降諭旨該御史所奏毋庸置議茲復據該御史奏稱該撫到豫後既查明各州縣徵漕每石浮收二兩地丁錢糧諒不無浮收之處風聞各處徵冊皆係兩本卽調取徵冊亦難稽考各屬銀價貴賤不等因而完納銀數參差不齊惟貴時既增賤時何遂不減錢糧完至二千五六百文者固不可加而完至三千數百文者又何以不議減請飭定徵收限制各等語朝廷軫念民瘼孜孜求治近日言官陳奏凡有關小民之依者無不令地方大吏詳查確陳以恤民隱前據張之萬滯陳河南官民積弊情形極思整頓足見該撫尚能留心吏治以濟民艱此次該御史所陳浮收各節是否均係實在情形著張之萬再行詳細確查如果有窒礙難行之處卽著分

晰陳奏不必因該御史所陳曲為遷就若查有地方官加倍徵收錢糧罔恤民艱者卽行隨時嚴叅毋稍迴護該撫務須振刷精神徹底清查釐剔弊竇毋為府縣等官所蒙蔽原摺著鈔給閱看將此諭令知之○又諭崇厚等奏東匪大股直撲河岸官軍併力擊退一摺張錫珠等股匪敗竄河東現在糾合大股直撲大營河口等處搶渡經官軍擊退仍在沿河一帶游弋時思北竄是該逆狡謀迄未稍息著崇厚督飭黑龍江馬隊並飛調洋槍隊併力扼截並分飭沿河各營弁嚴密梭巡來則攻擊毋稍疏懈寶山成保已赴館陶著就現帶兵勇往來策應遏其紛竄毋令逆匪偷渡河西譚廷襄計日可抵東昌距直省較近當與崇厚等聲息相通著飭令馬步兵勇並海軍等軍會同直隸官軍併力掃蕩迅殲醜類崇厚請調之王佐臣趙喜義均係勝保舊部平日打仗尚稱奮勇著准其劄調來營

以資差委。但勝保平日治軍不嚴。所部兵勇多無紀律。王佐臣等到營後。著崇厚隨時察看。儻驕恣不守營規。或有任令部眾騷擾情事。務當從嚴懲辦。毋稍姑容。將此由五百里各諭令知之。○又諭據曾國藩奏代陳李世忠因勝保逮京治罪。懇請褫職立功贖罪。一摺。將帥為國家大臣。貽誤軍務。罪有攸歸。刑章憲典。稟之

列祖

列宗。非朝廷所得而私。勝保以督師大員。種種貽誤。疊經中外叅劾。猶恐被人誣毀。復密派大臣確切訪查。始行逮京治罪。此豈臣下所得代為乞恩。曾國藩據李世忠之稟。率行具奏。揆諸體制。殊有未協。現在江南逆匪紛紛渡江。李世忠受恩優渥。官居專閫。自當迅速立功。以圖報稱。卽前此該提督經勝保拊循保全。亦由仰承

文宗顯皇帝如天之度。准其投誠。得以邀此

異數。該提督自應力矢公忠。不得專顧私誼。如此瀆請。姑念李世忠本係武夫。不深責備。所有李世忠自請褫職之處。加恩改為革職留任。曾國藩卽轉飭該提督迅將九洑洲等處賊匪奮力擊勦。不使該逆旁竄。辦理確有成效。由該大臣奏聞聽候諭旨。勝保功罪朝廷自有權衡。固無庸臣下喋喋為也。將此由六百里諭令知之。○又諭賞罰大權。操之自上。非臣下所能干預。李世忠以間外武臣。竟敢

瞻顧私恩。實屬膽大妄為。曾國藩接閱信。據理駁回。自是正辦。卽據情代奏。亦應將李世忠請加處分。以肅綱紀。覽曾國藩所奏。但云李世忠係勝保招撫之人。此次籲陳私悞。何敢壅於上聞。而於此事如何處置。不贅一詞。是該大臣此奏。委婉曲折。於現在時勢。權宜輕重。亦甚費苦心。前因勝保貽誤各情。被叅多款。革職逮治。將來如何發落。朝廷自有權衡。乃李世忠忽有此立功代贖之請。固不

能因之激怒而有所增加亦何能因此遷就而遽從未減惟和含未復護逆復率眾渡江皖北軍情喫緊勦辦正需兵力著曾國藩乘機激勵飭令李世忠認真勦賊奮勉圖功如該提督果能鼓勇前進盡力掃蕩俾渡江逆匪不敢窺伺儀揚或協助官軍攻取巢和各城於軍務亦甚有裨益也總之勝保之罪實由自取卽按軍法懲治亦何足惜惟李世忠陰驚性成越分瀆請若遽繩以法律重加嚴

譴是堅其犢悍之性轉與江北軍務無益且昨據都興阿等寄軍機處信函有現與苗練因鹽務構釁在洪澤湖械鬪之語是李世忠不顧大局已可概見現在自願立功以贖勝保之罪卽當因其機之可轉責以立功惟在該大臣相機而驅策之俾不得以空言嘗試方為妥善本日已另有寄諭一道該大臣奉到後卽酌量宣示李世忠其未便宣示之意特再寄諭該大臣以便參觀互證將此由六

百里諭令知之又諭曾國藩奏鮑超督軍進解涇縣城圍及前赴金陵巡視無為州蕪湖等處各摺片九洲洲江面賊船晝夜趕渡曾國藩恐前敵各營未能穩固自應親往察看俾攻守悉臻妥善惟江浙軍務互為表裏此次賊匪徑趨江北若浙師出奇制勝直擣杭州自可牽制賊勢現在金華等處均已克復紹興賊勢已孤指日可下乘勢規取杭城易如反掌第杭城不難於取而難於守嘉興

未復則賊由石門等處可以西趨湖州未復則賊由德清等處可以南竄左宗棠克復杭城後若拘泥成例駐紮會垣賊以游師擾之必有應接不暇之勢不如督率勁旅相機進勦杭州雖復不必固守仍分兵徽州以清皖南之賊俾朱品隆等酌撤渡江會合毛有銘等軍迅克和含等處水陸兩路併力規取九洲洲肅清江面則皖北可期穩固然後合鮑超甯國等軍攻取金陵或酌分奇兵旁取句

容丹陽以圖常州似勦辦較易得手著曾國藩左宗棠酌度機宜妥籌辦理將此由六百里各諭令知之○又諭僧格林沁等奏追勦西竄捻股大獲勝仗並派投誠降眾截勦張落刑等股匪情形一摺據稱捻首孫醜等股西竄鹿邑柘城一帶經翼長舒通額蘇克金等督兵追勦屢獲大勝惟竄往沈項皖捻余際昌一軍迎勦未能得手而僧格林沁大軍又因張落刑等時思出巢紛竄不得不移營進逼賊巢斷難分兵援豫各等語皖省捻匪經此次痛加懲創其膽已寒自可無虞西竄惟張落刑一股最為兇悍此次率眾思竄雖經僧格林沁派令投誠降眾截殺回巢而其勢未威必應趕緊勦滅現在僧格林沁偪賊而軍卽著相機進兵將渦河迤南各捻匪分別勦撫以孤張落刑之勢庶巨憊易於成擒不至四出滋擾直東股匪甚熾譚廷襄雖調撥馬隊與直隸官軍會合而匪眾兵單恐難

藏事該大臣將張逆一股迅速辦結仍須回顧直東至沈項等處賊巢林立張之萬毛昶熙務當督飭余際昌等就現有兵力迅速防勦不得專待援師致滋貽誤將此由六百里各諭令知之○又諭瑛蔭奏收復興安新舊兩城及探聞梁作楫等越境追勦並裒城失守旋卽克復各摺片此次兵團會合克復興安新舊兩城洵屬迅捷惟該逆西竄漢中設與藍曹各逆勾結則勦辦更形棘手梁作楫等已帶楚軍由竹山等處越境追勦頗能不分畛域著官文嚴樹森飭令跟蹤西進並著瑛蔭飭令邱振家乘勝帶團力追卽傳諭毛震壽派兵會同夾擊以期盡殲醜類此股髮逆人數究有若干未據瑛蔭具奏旣稱竄入漢陰紫陽一帶何以又有繞竄四川之語著駱秉章查明迅速前旨飭令周達武等節節追勦會同楚陝各軍相機殲除以清邊患瑛蔭另摺奏多隆阿函稱回匪勢大勦不勝勦

屬該撫由省城次第招撫以冀早日竣事現在兗氣正盛未可輕易議撫等語昨據多隆阿奏稱已將王閣村羌白鎮攻克勦辦正當得手何以該大臣忽有招撫之議是否此信係逆回偽造抑或多隆阿欲以此解散勾結之心著多隆阿據實具奏褒城雖已收復該文武所司何事著瑛蔭查明下落參奏該匪現回寶山老巢並著飭令毛震壽剋期殲除毋稍遲誤再瑛蔭另片奏知府馬百齡由回

巢進省請撤銷卹典等語馬百齡在回巢十月之久今忽從賊中來省所稱被匪拘留各情未可輕信著瑛蔭派員看守毋令出外滋事並毋得再為所欺如有逃逸惟該撫是問將此由六百里各諭令知之○山西巡撫英桂奏陝回鴟張驛路梗塞阿克蘇辦事大臣崇恩烏什辦事大臣奕慶不克赴任請飭暫行回京得旨昨據多隆阿奏王閣村等處業已攻克崇恩等著即探明前進毋庸回京

以鑲藍旗漢軍副都統慶明署鑲黃旗護軍統領○以直隸大名順德勦辦竄匪出力賞遊擊長春等花翎縣丞余沛恩等藍翎餘加銜升敘有差以雲南永北廳城失陷捏報克復同知胡廷良革職訊辦○予安徽節次陣亡參將羅國才等六十七員暨涇縣陣亡參將倪昌明等五十一員祭葬世職加等○予河南鹿邑陣亡副管旗章京拉普丹多爾吉佐領興喜祭葬世職加等○予陝西興安

陣亡殉難知府林映棠知縣吳靖府照磨馬篤堃遊擊趙濟川都司張夢銀祭葬世職加等均建專祠○蠲緩山東嶧沂水益都臨朐長山蒙陰博山萊蕪金鄉日照十縣被災被擾地方新舊額賦暨倉漕銀兩有差○癸未孝淑睿皇后忌辰遣官祭

昌陵○諭議政王軍機大臣等都興阿等奏江防緊要請飭馮子材另行派員赴粵提餉一摺前因馮子材奏廣東協餉積欠甚多惟賴

鎮海熟習廣東情形擬令前往提解當經允其所請茲據該將軍等奏稱江防情形甚關緊要已派定賴鎮海等為統領分防石埠橋至國山關等處未可遽易生手請令馮子材另行派員守提粵餉自係為慎重江防起見現在九浚洲之賊聲言渡江下竄儀揚又有長髮男丁假扮難民渡江此時江防自宜慎之又慎賴鎮海業經都興阿等派為統領應按照派定地段自石埠橋至國山關督率所

部實力整頓以專責成鎮江粵餉雖亦緊要然催提餉需不必派打仗得力之大員前往著馮子材另行揀派妥靠員弁前赴廣東所有前派之賴鎮海一員著毋庸派往將此由五百里各諭令知之○又諭著齡奏官軍克復湯溪縣城殲賊殆盡並連克龍游蘭谿金華永康武義各城一摺此次閩浙官軍奮勇殺賊於三日之間連克府縣六城我軍勢成建瓴可期席卷而進即著著齡左宗棠嚴飭

各營將弁乘此聲威次第掃蕩趕緊規復紹興毋得稍有稽延致失時會著齡另片奏閩軍節節前進相去浦城漸遠擬移紮浙境以便調度惟探聞各城敗匪分竄桐廬分水二縣如歸併杭州擬進紮金華督戰儻竄入徽郡則江西戒嚴仍須駐紮浦城力顧邊界等語所奏不為無見第金華等處既有蔣益澧一軍駐守又有左宗棠督率調遣以之進剿必可收破竹之功而桐廬分水一帶賊蹤未

淨其或竄徽郡或竄江西均不可不防閩江毗連隘口林立仍應妥籌守禦著齡總以仍紮浦城為是遠可策應湘軍近可籌防閩境所有一切進止機宜該督隨時與左宗棠熟商籌辦尤宜嚴飭諸將毋因驟勝而驕稍涉大意將此由六百里各諭令知之○以鑲黃旗蒙古副都統寶善暫署正黃旗護軍統領以克復浙江金華龍游蘭谿永康武義府縣等城賞遊擊吳光亮都司古捷芳巴圖魯

名號都司林木等花翎予知府康國器等升敘有差○甲申遣官祭

先賢之神○諭內閣署鑲紅旗漢軍都統福興等奏礮局被竊請將專管兼管各員分別議處並自請議處一摺二月初三日礮局被竊銅礮三尊此項礮位係屬笨重之物如果被賊偷竊何至毫無覺察且據馬甲所稟因夜間聞有人聲巡邏柵欄似有撬開痕跡恐係裝點之詞其中必另有情弊亟應徹底根

究以期水落石出所有看守礮局之馬甲南清泰等五名著解交刑部嚴行審訊礮營參領福年等有專管兼管之責非尋常疏忽可比該署都統等所請分別議處之處未免輕縱參領福年驍騎校金長保均著改為革職副參領玉書著改為嚴加議處均聽候刑部傳質該署都統等未能先事防範亦屬疏忽著一併交部議處○諭議政王軍機大臣等崇厚奏軍餉難繼將領乏人並飭王榕吉總

理軍需局各摺片直隸軍營餉項每月需銀五萬數千兩延至四五月間卽難勉強支持該署督既知餉需難繼卽當抽撥兵勇早渡河東迅速進剿不可畫疆自守稍分畛域致令河東賊燄日張寶山現署提督成保現在軍營督隊該二員身當前敵責無旁貸據云寶山身弱多病成保所部不全得力如果屬實著崇厚隨時查叅據實陳奏免致貽誤軍務仍一面飭令越境攻剿以期早殄寇氛一

面知照譚廷襄令其督率兵團會合夾擊以分賊勢前調之古北口及熱河官兵各五百名諒可計日到營兵力應足敷用崇厚仍當激勵民團於河西隄岸一帶分布防守以助兵勢並著將河西一帶伏莽趕緊掃除務淨根株至勝保係獲罪大員自應解赴刑部審訊靜候朝廷處置崇厚前已旨昧代請令其帶兵勦賊意存嘗試已屬非是此次又代為請請王榕吉復擅向崇厚呈遞稟詞請令勝

保赴營實屬膽大妄為崇厚王榕吉均著傳旨申飭至王榕吉現帶晉省兵丁赴直須責令督隊勦賊以資得力軍需支應等局本有承辦各員經理該臬司止可隨時稽覈不得藉詞局務羈身置勦匪事宜於不顧有人奏已革臬司孫治前在天津管理糧臺任意浮冒僧格林沁曾以不勝道員之任咨令前直隸總督恆福奏參該已革臬司復有引用親戚楊國杞等隨辦糧臺夤緣超升並所行劄

諭告示不妥以致州縣紛紛諱盜被人參劾經文煜代為彌縫各案該臬司屢次被人參奏必非無因僧格林沁如果實有不勝道員之咨現在必有卷可查孫治任內印劄告示亦可向各州縣調取著崇厚嚴切查明據實具奏不得以保奏在先稍存迴護儻有意欺飾代為消弭將來別經發覺恐崇厚不能當此重咎也原片著鈔給閱看將此由五百里諭令知之○又諭德勒克多爾濟等奏綏遠

歸化存兵不敷調撥已檄催伊克昭盟鄂爾多斯前調蒙古官兵赴甘一摺前因固原失守甘省軍情萬分緊急當經諭令德勒克多爾濟等速將恩麟咨調歸化城官兵二千名剋日由定邊等處馳往固原會勦茲據該將軍等奏稱歸化城蒙古兵一千名已全數調赴僧格林沁軍營綏遠兵除派撥沿河駐紮防堵外存城官兵實已不敷分布邊防河防在在喫重設有緩急恐有微調不及之虞已

檄催伊克昭盟長選派精兵剋日赴甘所奏尚係實在情形鄂爾多斯蒙古官兵先後派出八百名赴甘仍恐不敷調遣著熙麟等遵照前旨迅飭該盟長續行調派並將派撥數目及起程日期趕緊奏報其阿拉善蒙古兵曾否派撥赴甘並著熙麟奕梁恩麟迅卽檄催到防候調昨據多隆阿奏報王閣村羌白鎮業經克復如東路肅清多隆阿兵力足敷勦辦自可令馬德昭赴任熙麟等可隨時函

商多隆阿等妥籌辦理綏遠等城官兵既無可撥卽著毋庸調派其與陝甘接壤之處著德勒克多爾濟等認真防範毋令勾結為患將此由五百里諭知德勒克多爾濟塔清阿奕梁熙麟並傳諭恩麟知之（乙酉）諭內閣刑部奏已革兵部侍郎勝保押解到部請派大員會同審訊一摺著派議政王軍機大臣大學士會同刑部審訊按律定擬具奏（）又諭前因平瑞奏營兵聚眾脅官索餉當經諭

令平瑞等秉公查辦茲據奏稱首從各犯業經訊明分別懲辦請將約束不嚴之該管各官分別嚴議察議並請將提督議處各摺片兵丁聚眾索餉雖無毆官不法重情惟該管官平時既不能約束臨事復不能彈壓實屬廢弛平瑞於訊明後將此案首要各犯分別正法懲辦辦理尚為妥協所有專管官守備護都司德印署千總佛萬春署把總史祥牛祥署外委王萬斗陳倫韓文昇均著交部嚴

加議處兼轄之參將索煥章著交部察議提督業布冲額以專閫大員一味姑息致長刁風亦難辭咎著交部議處以肅營規（）諭議政王軍機大臣等譚廷襄奏馳抵東昌追勦並蘭鄭等處勦辦情形各摺片張錫珠股匪由直隸回竄東境經兵團於李官莊樊潭等處邀擊仍回堂邑冠縣等處屯聚賊因官軍勢壯不敢東向復分趨冠莘兩縣境內現在東省已有保德所帶馬步兵二千七百餘名

雷鳳鳴等隊一千餘名合之寶山所帶之兵並各縣團勇聲勢不為不壯直隸官兵現已越境追勦譚廷襄身任封圻於本省勦辦事宜更屬責無旁貸著卽激勵兵團奮勇進攻將該匪就地殲除毋任蔓延他處並著崇厚遵奉前旨添撥兵勇迅赴河東助勦一面知會寶山與東省聯絡聲勢兩路夾攻一面飭令祝壇嚴扼西路毋令竄入大名一帶地方李城等股匪蓄意由沂郡北竄紛擾郟城莒

州境內均經兵勇擊敗復潛撲鄒縣城池被兵擊退著譚廷襄督飭在事文武嚴密扼截並飭曾逢年豫為籌備以杜淄川股匪句合德楞額勦賊不力屢次遷延貽誤現由坊前進軍蘭山之大埠莊賊已折向莒境直趨沂水德楞額處處落後儻再不趕緊邀截任令該逆竄入青萊境內即著譚廷襄據實嚴參按照軍律懲辦將此由六百里各諭令知之○護陝甘總督恩麟奏回逆竄擾請將甘省

上年計典俟新任督臣熙麟到後展限舉行從之○以都察院左都御史李崇階為工部尚書仍兼署禮部尚書吏部左侍郎單懋謙為都察院左都御史轉吏部右侍郎孫葆元為左侍郎調刑部右侍郎王茂蔭為吏部右侍郎未到任前以禮部右侍郎龐鍾璐兼署○調工部左侍郎曹毓瑛為兵部左侍郎兵部左侍郎黃倬為工部左侍郎仍留四川學政任未到任前以都察院左副都御史王

發桂署理○以通政使司通政使吳存義為工部右侍郎兼管錢法堂事仍兼署刑部右侍郎○以翰林院侍講童華充日講起居注官司經局洗馬胡瑞澗翰林院編修趙新署日講起居注官命兵部員外郎王家璧前往欽差大臣曾國藩軍營聽候差委○以甘肅勦撫撤回出力賞遊擊張悅巴圖魯名號道員楊柄銓遊擊王德恆等花翎知州李協中等藍翎餘加銜升敘有差○予故工部尚

書李崑祭葬諡文恪 丙戌遣官祭

文昌帝君廟○諭內閣恭親王等奏哲里木副盟長扎薩克圖郡王索特那木倫布木扎賚特郡王阿勒坦鄂什爾等呈稱情願捐輸馬匹代奏請旨一摺該王等因各路軍營需馬稟請願捐馬匹實屬出於至誠深堪嘉尚著即賞收哲里木扎薩克圖郡王索特那木倫布木扎賚特郡王阿勒坦鄂什爾著加恩交理藩院查明伊之子弟奏聞此項捐輸馬

匹卽照所請曉諭該王等照數備齊聽候調撥○又諭前因江蘇四江口解圍巡撫李鴻章之弟知縣李鶴章擊退援賊與在事員弁功足相埒該撫意存引嫌未經請獎當經諭令李鴻章查明勞績一體奏請獎敘茲據該撫遵查克復嘉定各案出力人員請獎另片奏李鶴章雖隨同剿賊乃義分所當為仍不敢仰邀議敘等語五品銜分發補用知縣李鶴章戰功卓著豈可沒其微勞著賞加四品

銜以知州用又諭前因徐之銘奏參熊夢昌高青雲卑鄙惡劣當將該二員革職復諭張亮基查明覆奏茲據奏稱遵查熊夢昌在雲南頗著戰功委署昆陽州事因州城被賊占踞不能赴任與規避不同高青雲在雲南鎮雄州署任內官聲甚好平日並無招搖情事該二員均請開復原官等語已革運同銜雲南補用同知直隸州知州熊夢昌已革雲南補用知縣高青雲均著開復原官○諭議

政王軍機大臣等李鴻章等奏中外官軍進攻紹興歷陳常昭福山近日軍情遵查俞斌所買禁物及購回朝珠等件各摺片常熟孤城被圍甚急太倉尚未攻克滬軍勢不能前往救援李鴻章調派各營進攻福山獲有勝仗著卽激勵黃翼升潘鼎新等乘勝進攻節節掃蕩以期直達常熟立解城圍如慮後軍不繼並著飛催常勝軍星速前進穩紮營壘如敢仍蹈前轍任意退回該撫卽從嚴懲辦

以肅軍令俞斌所買靈珀朱草與顏真卿詩卷墨蹟業已交出楊坊購回之東珠朝珠洋金蟒袍料既經遵繳卽從寬免其深究俟有進京委員委令齎繳仍著該撫留心訪察如松滬一帶民間尚存有禁中物件務卽設法盡數收繳毋令遲久散失李鴻章另摺奏請飭廣東仿照同文館設立學館學習外國語言文字等語已諭令廣州將軍等查照辦理惟該館學生專習外國語言文字不准西人

藉端影射將天主教暗中傳習該撫仍當隨時稽察毋令滋弊將此由六百里諭令知之○又諭前據總理各國事務衙門奏遵議設立學習外國語言文字學館為同文館當經照所議行該衙門已行知該將軍等遵照矣因思總理衙門固為通商綱領而中外交涉事件則廣東上海為總匯之所現據李鴻章奏稱上海已議設立外國語言文字學館而廣東事同一律亦應仿照辦理著庫克吉泰

晏端書於廣州駐防內公同選閱擇其資質聰慧年在十四歲內外或年二十左右而清漢文字業能通曉質地尚可造就者一併揀擇延聘西人教習兼聘內地品學兼優之舉貢生員課以經史大義俾得通知古今並令仍習清語厚其廩餼時加查考僅一二年後學有成效即調京考試授以官職俾有上進之階此事為當今要務該將軍等務當實心辦理不得視為具文儻將來日久無效惟該

將軍等是問所有一切章程及薪貲工食各項經費著即咨商李鴻章並參以總理衙門原議或酌提船鈔妥為辦理議定後即行具奏候旨裁定遵行前任湖北臬司裕麟據劉長佑等奏請留粵差委曾降旨允准茲據張亮基奏請飭該臬司赴黔現在張亮基前赴貴州差委乏人亦係實情著晏端書即飭裕麟兼程赴黔聽候張亮基差委俟貴州事畢仍回粵東毋許延緩將此由六百里各諭令

知之○又諭張亮基奏折回成都取道赴黔並請將陸傳應開復原官及隨帶各員仍請帶往各摺片黔省教民一案前經崇實將查辦大概情形先行覆奏當即諭令張亮基迅赴黔省妥籌會辦現在張亮基已行抵成都擬由水路下駛重慶取道綦江遵義徑達貴陽即著星馳前進剋日抵黔將諭令查辦事件趕緊辦理降調道員陸傳應從前被叅之案情節較重此次並無卓著之功何得即請

開復該員現已先赴黔省曉諭軍民將來果
能辦事妥協始終勤奮再行奏明請旨張亮
基隨營委員均准其帶赴貴州差遣委用將
此由六百里諭令知之○命翰林院編修丁
培鑑仍在上書房行走以不遵軍律革湖
北參將周紅泉都司李得勝守備毛文魁千
總張洪勝等職永不敘用○以江蘇克復嘉
定縣城並北新涇四江口解圍出力賞都司
陳忠德同知桂嵩慶等花翎守備汪玉林等

藍翎餘加銜升敘有差○以江蘇拏獲奸匪
予知縣龔寶琦等升賞有差○以湖北援剿
襄河疊獲勝仗賞參將羅應貴魏元祿趙金
聲周得升王得勝黃金山遊擊楊清和劉占
魁宋得路都司常順守備周欽海防禦巴順
參領烏保副管薩尼佈巴圖魯名號守備向
文富等花翎千總謝明德等藍翎餘加銜升
敘有差○予湖北襄陽東陽陝西咸陽涇陽
等處陣亡驍騎校奎春金壽阿克達春順德

千總蔣榮先祭葬世職加等

大清穆宗繼天開運受中居正保大定功聖智
誠孝信敏恭寬毅皇帝實錄卷之五十七

大清穆宗繼天開運受中居正保大定功聖智
誠孝信敏恭寬毅皇帝實錄卷之五十八

同治二年癸亥二月丁亥

實有主謀賄賊情事。抑係雷玉堂戴鸞翔等。有心誣捏鍛鍊。著多隆阿按照呈詞。秉公查訊確情。按律定擬具奏。原摺原呈。均著鈔給閱看。將此諭令知之。○又諭耆齡奏援師克復永康武義兩縣詳細情形。並東陽義烏浦江等縣踞賊逃遁一摺。逆匪盤踞浙東各城。並分股屯聚永康武義。牽掣我軍。自攻克湯溪龍游各城後。復經林文察等將永康等城克復。義烏浦江之賊。俱渡江竄往杭州。是浙東賊勢日漸窮蹙。現在耆齡已飭林文察。康國器等率臺廣南康各勇。由義烏東陽分路前進。會合浙師。埽蕩浙東。卽著飭令派出各軍。會同左宗棠所部將弁。乘此聲威。迅克紹郡。進規杭嘉湖三府。以靖全浙。至賊匪時思旁竄。其界連江西福建各隘口。該督仍應處處兼顧。前諭該督居中策應。以仍駐浦城為宜。卽當遵旨酌量情形辦理。毋稍疏虞。將此由五百里諭令知之。○戊子。諭內閣。給事中

博桂奏刑部反獄重案。蒙混定案。請飭查辦。嚴定獄卒罪名。並將聲名狼藉之承審司員。參奏一摺。據稱刑部定案。總應覈明情節。以律例為憑。越獄反獄。判囚。律分三等。而該部辦理疏防。反獄一案。將同謀之監犯。照判囚。科罪。將主守之獄卒。照反獄減等。又將管獄有獄各官。照越獄查參。辦理歧異。又於問擬流罪之禁卒田文玉。背例聲請留養。於逸犯周六之戚田五。冒名進監。所訊情節。前後自相矛盾。亦未將失於稽查之司務參處。其提牢司獄直宿及臨時督率禁卒追捕情形。並未查詢明確。又不將收管周六等犯之獄卒。嚴訊治罪。種種蒙混支離。實屬草率定讞。各等語。著派寶璽、沈桂芬會同都察院堂官。秉公覆查究辦。務期水落石出。以成信讞。並將摺內所參聲名狼藉之司員余光倬。遇案宣揚於承辦馬錫碌之案。求堂派審。迴護處分。鑽營取巧等情。及將此次反獄一案含混定

案於禁卒田文玉違例聲請留養。是否另有別情。一併確查。據實嚴參。其所請飭刑部嚴定罪名之處。著於定案時聲明。請旨。○又諭。吳棠奏請將臺局庸劣各員。分別革職勒休。降補等語。江蘇管理北臺軍裝火藥之候補知府方長澤。才具平庸。肆情游宴。南河通判劉虞采。前在南河釐局。著名侈蕩。現在北臺。尤為騷擾。候補縣丞張文耀。候選縣丞姚曉蘭。辦理釐捐。聲名狼藉。姚曉蘭於撤委後。又

營求米捐。差使把持。尤甚。知府銜候補通判陳啟鍾。辦理南臺寄籍捐輸。苛求勒索。擾累商民。同知銜候補知縣顏培咸。辦理北臺房捐。延繳解款。不協輿情。候補通判黃銘仁。候選知縣魏耆。同在南臺辦理行棧捐務。聲名惡劣。前任合肥縣典史唐維森。浮收局費。屢被訐控。方長澤、劉虞采、陳啟鍾、黃銘仁、顏培咸、魏耆、張文耀、姚曉蘭、唐維森。均著卽行革職。劉虞采並著勒令卽回山東原籍。不准再

入軍營。姚曉蘭著交該本籍地方官嚴行管束。不准出外滋事。唐維森尚有未結控案。著吳崇提訊。歸另案辦理。又兩淮候補運判許大鼎信用劣董。不知自愛。著以鹽知事降補。候補同知許樾身。候補知縣金養瀾。性情浮躁。習氣甚深。均著以縣丞降補。○諭議政王軍機大臣等。前經疊次寄諭耆齡。左宗棠。以浙境軍聲丕振。勢成破竹。即當進取紹興。先復浙東。並令耆齡仍應駐紮浦城。以防賊復。

竄由皖南江西滋擾。令左宗棠仍當分兵嚴州。以清皖境。而顧全局。現在金華敗賊。竄赴諸暨。後聞官軍將至。復向義橋遁走。自係回竄杭州。其諸暨逸匪。已回竄紹興。著左宗棠飭令蔣益澧之軍。乘勢進攻。痛殲醜類。速復紹城。粵賊譚星一股。由浦江敗竄。為李秀城之黨所阻。不敢回杭。而竄桐廬。即著飭令劉培元迅率所部水師順流而下。會同魏喻義所部。合擊之。以遏西趨。左宗棠現在移軍蘭

谿。擬俟金華等處布置稍定。親赴嚴州調度。其劉典等軍。仍須由嚴赴徽。肅清皖南。俾左宗棠無後顧之虞。方能一意進取。著即照所擬辦理。昨據李鴻章等奏。中外官軍進攻紹興。法國兵官中槍陣亡。洋將賈忒勒繼之。現當進攻紹興之際。耆齡所派赴浙援剿之康國器一軍。及閩粵各軍。著即飭令暫駐東陽縉雲一帶。以壯蔣益澧後路聲援。傳聞紹興已有克復之信。各軍均屬在事出力。自可同

膺懋賞。又聞上年粵勇與洋兵頗深構隙。自當豫為防範。毋令糅雜。以致別滋事端。並著該督撫密飭諸將。與洋兵共事。總須守禮示信。毋許計功攘利。致啓爭競之端。且為外國人所竊笑也。紹城克復。及籌定戰守各情。仍著隨時速奏。將此由六百里各諭令知之。○又諭。左宗棠奏兵增餉絀大局堪虞。各省奉撥協餉。請旨飭催等語。浙省復地漸廣。需兵愈多。添募新勇。轉瞬到齊。臺庫早空。無以為

計此外尚須添造戰艦雇募水師亦因經費無出未能舉辦且積欠各軍之餉已九箇月時有譁潰之虞亟應速籌接濟以拯飢軍而利攻勦著官文嚴樹森又清耆齡徐宗幹晏端書黃贊湯迅速籌撥大批解赴左宗棠軍營以後仍按月報解如再遲延卽由左宗棠將各藩司從嚴叅辦浙省軍務現正極為得手儻因停兵待餉致誤戎機恐該將軍督撫等不能當此重咎也毛鴻賓沈葆楨於浙省

軍餉頗能不分畛域竭籌協濟嗣後仍著該撫等源源報解以贍軍食將此由六百里各諭令知之○又諭潘鐸等奏東川解圍並攻勦巧家廳屬逆匪一摺髮逆由米糧壩等處過江入川官兵分路追襲並於江岸截擊該逆不能竄渡折入巧家廳界復由碧谷壩等處竄踞那姑連日攻撲東川府城經兵練殲擒殆盡餘匪竄入川省會理州屬之窪烏等處勦辦尚為妥速現在川省兵勇俱集南路

防堵該匪儻被川兵截擊難保不回竄滇境著潘鐸等督飭在事文武將毗連川境各要隘嚴密設防毋令逆蹤復行回竄至後股逆匪尚在巧家廳盤踞務當飭令知府黎新德等乘勝進勦並分兵截其渡江北竄之路毋令再行紛竄將此由六百里各諭令知之○以直隸東鹿等縣官紳團練出力賞知州李全義花翎知縣吳履泰等藍翎餘加銜升敘有差○以江南徐州勦辦山東竄匪暨守城

出力予同知路崇等升敘有差○以雲南克復楚雄祿豐府縣兩城出力賞遊擊田仲興楊發貴都司李維述守備梁士美楊國發巴圖魯名號知府李增榮等花翎守備楊有貴等藍翎餘升敘有差○予山東郟城陣亡守備邵法國等祭葬世職加等傷亡把總蕭真發祭葬世職○己丑遣官祭關帝廟○諭內閣前因鑲紅旗漢軍礮局被竊降旨令福興等將馬甲南清泰等五名解

交刑部審訊。並將福興等分別革職議處。茲據福興等奏稱。馬甲南清泰等五名。屢飭已革參領福年小心看押。乃存泰一名。忽然脫逃等語。是否係該管官疏縱所致。亟應徹底根究。已革礮營參領福年著一併交刑部審訊。印務參領安泰等於存泰脫逃。毫無覺察。實難辭咎。安泰溥泰均著交部議處。署都統福興。署副都統明瑤均著交部再行議處。其在逃之馬甲存泰著步軍統領衙門順天府

五城一體嚴拏。務獲歸案審辦。尋刑部奏。遵訊福年於存泰脫逃。實非故縱。至礮位被竊。委因南清泰等貪眠熟睡所致。南清泰應革去馬甲。杖六十。徒一年。續獲之存泰應革去馬甲。杖八十。徒二年。馬甲如海等均已病故。應無庸議。從之。○又諭。僧格林沁奏追剿竄擒連獲大勝生擒擒首張落刑等多名。並王懷義等投誠各情形一摺。安徽蒙亳一帶擒匪。節經僧格林沁督軍痛剿。勢已窮蹙。巨擒

張落刑。劉狗。劉學淵。蘇添才等股。尚廣聚尹家溝。意圖竄突。二月初一日。僧格林沁派令翼長舒通額。蘇克金等帶領各起馬隊。馳往圍攻。該逆拌死出撲。經官軍截殺多名。遂向西南逃遁。侍郎國瑞帶同托倫布等馬步進攻。雉河集張落刑老巢。該逆聞風逃竄。遂將雉河集尹家溝兩處賊巢。全行平毀。初二至初七等日。舒通額等追至渦河。迪南之張村堡地方。遇擒首王廣一股。抗拒官軍槍箭齊

施。追斬殆盡。陣擒擒首韓四萬程二坎就地正法。復探知李莊擒首劉登瀛。圩內有巨擒藏匿。舒通額等調集鄉團四面合圍。該圩團總畏懼。將劉二老冤。卽劉玉淵並其弟劉四麻子。張延生獻出。舒通額等查明與窩匪之劉登瀛一併解營。凌遲處死。其楊二卽楊瑞璣。王懷義。龔耀等股。先後投誠。經僧格林沁派令翼長全順等駐紮花果集。王懷義寨內探蹤進剿。擒首蘇添才卽立校眼。並其義子

賀繞兒等九名。誤投該寨。復經全順等按名弋獲解營。當將蘇添才卽立校眼凌遲處死。餘俱正法。梟示。擒首李勤邦。劉添詳。頭號雷卽張慎得。王鳳潮。羅克有。卽羅麻子。侯泳固等。赴宿州知州英翰處。懇請歸正。旋據李勤邦等將張落刑。並其子張禧義子王碗兒誘擒。經英翰等解送大營。據僧格林沁訊明屬實。錄供呈覽。擒首孫臭。卽孫葵。汶姜台凌。俱率眾赴營乞降。又據投誠之鄭如。先將劉大

老冤。卽劉學淵。誘入圩內。僧格林沁派令參領祥恩等帶兵前往拏獲。到營將劉學淵凌遲處死。從匪三名。正法。梟示。辦理甚為得手。巨擒張落刑。曾受粵逆偽封。擾害東豫江皖。荼毒生靈。罪惡貫盈。豈容稍稽顯戮。著僧格林沁卽將張落刑一犯。在營極刑處死。並其子張禧義子王碗兒。一併正法。傳首安徽河南山東等省。被擾地方。以申國法。而快人心。其餘投降各擒。著僧格林沁分別妥辦。蒙毫

一帶漸次肅清。所有善後事宜。著唐訓方慎選牧令。招集流亡。妥為經理。安徽蒙亳等處。自遭擒患。幾及十年。田野荒蕪。瘡痍滿目。言念吾民。殊堪矜惻。著加恩蠲免錢漕二年。以蘇民困。僧格林沁銳意勦擒。卒能將各股擒首。擒獲收撫。使積年巨患。剋日埽除。洵屬調度有方。謀勇兼備。著加恩仍以親王世襲罔替。前奉

特旨。賞用章服等項。並仍准其服用。以示優異。

侍郎國瑞隨同進剿。亦屬著有微勞。著交部從優議敘。所有擒獲首逆之宿州知州英翰。本日已簡放。潁州府知府仍著賞加道銜。投誠之李勤邦。著賞給六品頂帶。並賞戴藍翎。其餘在事出力各員。弁團勇。著僧格林沁擇尤保奏。用示鼓勵。○諭議政王軍機大臣等。僧格林沁等奏擒獲擒首情形。並請派皖撫來蒙會商善後。分兵直東合剿。各一摺。覽奏。岳勝欣慰。皖北軍務漸有就緒。辦理甚屬得

手該大臣業將劉大老冤等及趙浩然趙欣然先後正法。梟示所有張落刑及其子張禧等三犯。即著於軍前以極刑處死。以儆兇頑而快人心。在逃之該逆首家屬。仍著嚴密緝拏。毋任漏網。至擒首王懷義姜台濠楊二。即楊瑞龔耀劉添詳羅麻子張慎得。即頭號雷孫吳。即孫葵汶等。犯均係積年著名擒首。屢經擾害本境。及竄擾鄰首地方。稔惡已久。現因勢窮力竭。始行投誠。若遽准其免死。不足以申國法而洩眾憤。且狼子野心。將來大營官兵撤退後。難保不招集餘黨。為死灰復燃之計。著僧格林沁酌量情罪輕重。將積惡頭目速行正法。以絕後患。現在渦河南岸擒圩。尚有若干。潁毫鹿邑及蒙宿一帶餘匪。共若干股。均著查明詳細具奏。前由鹿邑竄向柘城擒股。雖經蘇克金等擊敗。而匪首孫醜劉尿等尚未擒獲。該大臣務當督飭兵勇。迅將該匪首等及未獲之蘇添幅等設法兜捕。以

靖閭閻。其竄赴汝郡與陳大濬合夥之皖擒各股。及潁郡宿州未盡餘匪。均著該大臣次第翦除。毋留餘孽。俟皖北肅清後。再行親赴直東一帶。勦捕該處賊匪。副都統恆齡馬隊七百餘名。現因連日追賊。馬力疲乏。著緩程前行。俟到東省後。會合海軍所部及前次直隸截留之黑龍江布特哈官兵。合隊進勦。以資得力。至皖北清查撫恤事宜。必須地方大吏前往經理。著唐訓方即速馳赴蒙城一帶。

與僧格林沁會商妥為辦理。僧格林沁軍營將士勤勞日久。未邀獎勵。所有此次出力將弁兵勇。即著查明從優保奏。以昭激勸。僧格林沁摺內聲敘蘇添幅等尚未拏獲。而張落刑供詞則稱龔瞎子蘇添幅等五犯均已殲斃。是否確實。並著查明具奏。將此由六百里各諭令知之。○又諭僧格林沁等奏請派皖撫來蒙會商善後事宜一摺。蒙毫一帶巨憊雖已殲除。惟瘡痍未復。人心未定。唐訓方資

望較淺。恐尚不足以資鎮撫。且臨淮一帶亦須有大員坐鎮。前據官文等奏。已令催李續宜起程赴皖。著李續宜懍遵前旨。迅速馳赴安徽巡撫署任。將軍務地方。及蒙亳一帶善後各事宜。妥籌辦理。將此由六百里諭令知之。○又諭官文等奏。竹谿尾賊遁竄。防務緊要。未能督師援陝。並覆陳員外郎余上華請派重臣督辦三省邊防各摺。片前因陝南興漢緊要。諭令嚴樹森馳赴秦鄂交界。督師進

勦。茲據奏稱。盤踞竹谿之尾賊。經道員梁作楫馳勦。餘賊由關垵子等處竄往興安一路。梁作楫一軍僅二千五百人。越境追征。難操勝算。且恐賊蹤回竄。進退維艱。其穆正春周鳳山等軍。扼紮黃州德安等處。南禦髮逆。東防皖捻。疆事孔亟。竟無一兵一將。堪以抽調隨征。隻身前往。無濟於事等語。所籌自係實在情形。著卽飭梁作楫李雲麟兩軍嚴扼。二竹鄭西兩路邊隘。藉防為勦。以遏該逆回竄

之路。如下游軍事稍鬆。兵力足敷。抽調該督撫。仍當於陝南力籌兼顧。毋得稍分畛域。本日據瑛榮奏。興安府鎮。雖經收復。該逆尚竄漢陰紫陽一帶。窺伺漢中。曹逆又由甯陝分竄藍鄠。藍逆久踞洋縣。伏莽甚多。官文等摺內。復有興安踞逆偽啟王等圖竄川境之語。是陝南軍事毫無頭緒。嚴樹森又未能前往該處。並無得力兵將。滋蔓堪虞。前經疊諭駱秉章飭令駐紮川北之周達武一軍。越境馳

勦。卽著迅催該員督率所部。就近入陝。迅殄賊氛。其四川界連平利甄坪之城。口大甯等處。並著先行嚴密防範。以杜紛竄。至員外郎余上華所呈簡派大員督辦三省邊務之處。前已諭令官文。駱秉章瑛榮等斟酌速奏。現在官文等奏稱。另設大員督辦。事關三省全局。鄂省現無堪膺斯選者。川省軍務稍鬆。正可先撥勁旅。其如何合力會勦之處。已咨商駱秉章等再行具奏。並著官文嚴樹森駱秉

章等迅速會議一面調派一面具奏免致稽遲將此由六百里各諭令知之○又諭恩麟奏鹽茶平遠所首逆伏誅靈州等回眾投誠平涼漢回互殺回匪現踞瓦亭並固原被陷請處等摺片瑛奏奏回匪連日撲城一摺及甯陝解圍曹逆分股圖犯藍鄆並請飭所調烏勒興阿等馬隊赴省助勦各片平涼現被賊匪圍攻瓦亭要隘被匪占踞若令久踞要地東西阻隔不通各路之匪勾結蔓延更將

不可收拾此時張家川踞匪又復屢向華亭竄撲陝西鳳翔之賊亦時撲擾崇信地方甘省東路匪徒麇集所有恩麟由南路改調赴東之遊擊楊克成李友伏等兵現在自己趕到著卽飭令護總兵呂元等督帶與署平涼府知府田壽增等聲勢聯絡妥籌戰守並嚴催署遊擊周勝所部之官兵一千名星馳前往仍遵前旨將延綏鎮及阿拉善等旗官兵迅速飛催到齊以資攻勦熙麟恩麟身任地

方均屬責無旁貸務須督率各軍及地方文武保全平涼速克瓦亭攻復固原毋任賊得久踞其張家川蓮花城賊巢既據分飭道員林之望督率兵勇進攻隆德等處臬司楊柄銓馳往駐紮均著飭令妥籌防勦甯夏平羅及鹽茶等處業經招降仍令各該地方官妥為安撫毋令再生反側並令署提督定安總兵萬年新等將靈州等處北路嚴防陝省回匪撲擾省垣雖經擊走難保不復行窺觴仍

著馬德昭穆騰阿等分籌戰守毋稍疏虞所調烏勒興阿常海馬隊著多隆阿迅催前赴西安以資守禦多隆阿近已連克王閣村羌白鎮賊巢諒倉頭鎮等亦必可卽克復當此得手之際兵力斷未可以輕分該將軍惟當乘機進取此路勢如破竹賊中驍悍自必奔救不遑不但省城可免攻擾卽西連甘省一帶回匪亦將不敢肆其締突甯陝解圍川匪曹逆一股復欲分竄藍鄆一帶該處近接省

城且一出山口到處平原勦辦更屬費手雷正綰專辦西路之賊著卽懍遵疊次諭旨妥籌兼顧並飭張在德之軍擇要扼守臨潼縣城內留防之驍騎校張德斌膽敢為回匪假稱苗練賺城情尤可惡據瑛榮奏業將張德斌正法梟示惟此股回匪千餘人因城門不開向西北而去究竟逃往何處務當飭令各地方官隨時防範張德斌係何處旗弁並著查明具奏將此由六百里各諭令知之尋奏

回匪竄向西北歸入十三村一帶老巢查無蹤跡至張德斌前供稱係京旗鑲紅旗漢軍四甲庚寅佐領下人報聞○改派內閣學士桑春榮知貢舉○以陝西省城防勦出力賞千總李廣進都司銜花翎把總王振聲等藍翎餘加銜升敘有差○以甘肅鹽茶廳回眾投誠擒斬首逆馬兆沅予署按察使楊柄銓優敘賞知府莊裕崧都司馬世勛等花翎把總文占魁等藍翎回目王大桂等五名賞擢

有差○以募勇勦賊疊著戰功復陝西已革副將盧又熊職○以玩視軍情革安徽知府全陞職○以甘肅固原州城被賊竄陷護總督恩麟提督經文岱下部議處予陣亡遊擊張悅守備年啟榮祭葬世職加等均建專祠○庚寅諭內閣昨日據都察院代遞山西貢生朱德秀條陳時務各件內有團練一條語尚可採朱德秀著飭回原籍交英桂派令隨同趙德轍等辦理團練並著英桂督飭各該

地方官會同紳士各就地方情形認真興辦毋得有名無實○諭議政王軍機大臣等多隆阿奏官軍進克王閣村羌白鎮老巢詳細情形並續獲勝仗一摺同州一帶逆回以王閣村羌白鎮為巢穴經多隆阿督軍攻克回逆自己喪膽惟官軍兵弁陣亡至三百餘名受傷者千餘名具見該將弁踊躍用命奮勇血戰而念其攻勦之苦欣喜之餘倍覺憫惻著多隆阿傳諭各營將弁宣布朝廷憫念之

懷朝廷命將出師為民拯命並不其貲財所得財物著多隆阿隨時分賞兵弁以旌勞勩倉頭鎮援匪疊經擊退即著乘破竹之勢迅速攻克第回逆兇悍異常屢經痛創猶復抵死抗拒該大臣身膺統帥為國宣勞但能嚴明賞罰調度有方自可戰無不勝總當於奮勇之中常存保重之意用慰馳念雷正綰染患時疫勢不能赴鳳翔現在病勢已否輕減該營將弁是否不至傳染塵念實深著多

隆阿傳知該提督即在三原加意調攝一經痊愈即行相機進剿副將王夢麟前經瑛榮派令帶兵援救鳳郡現在西安情形稍鬆著責成瑛榮催令王夢麟迅速前進如省城尚有可派之兵並著酌量添撥以厚兵力毋得株守省垣稍涉推諉將此由五百里各諭令知之○又諭前因田興恕殺害教民疊經諭令崇實駱秉章將田興恕查提到川羈禁昨據惲世臨奏黔省髮逆及苗教各匪猖獗田

興恕由川赴黔行抵楚境懇請留楚帶勇辦理鳳晃防務已令其募勇千人一摺所奏殊堪詫異已寄諭該撫嚴行申飭並責令該撫派員押解入川聽候崇實駱秉章辦理田興恕之案若再耽延不結非惟錯失機會且恐大起波瀾覽惲世臨所奏是田興恕現尚徘徊於黔楚之間且仍令帶勇尚復成何事體著崇實駱秉章迅飭前次所派查提田興恕之員會同惲世臨所派之員馳赴該處仍將

田興恕押解入川即行監禁迅速奏聞慎毋令其逃回黔境致令又生枝節將此由六百里密諭知之○以陝西攻克王閭村羌白鎮賊巢賞副都統穆圖善黃馬褂委參領常安巴圖魯名號餘加銜升敘開復有差○展緩山西臨汾縣歉收地方未完咸豐十年上忙額賦○辛卯諭議政王軍機大臣等譚廷襄奏東昌剿匪獲勝請飭直隸官兵會剿暨勦辦李城等股匪並羈縻宋景詩各摺片張錫

珠等股匪。經保德等向燕店集一帶進剿。斃賊千餘。但馬賊尚多。步賊聚散不定。且賊中並有粵逆陳玉城舊隊。尤為兇悍。若不迅圖撲滅。深恐賊勢日張。蔓延難制。保德一軍。兵力過單。不敷攻剿。現在寶山業經渡河。成保患病。計已痊愈。著崇厚催令該提督等迅調各隊渡河。與東省兵勇兩面夾擊。合力截剿。昨日崇厚奏報。由臨清州拜發。自係因近防不如遠剿。惟既有寶山。成保等督兵出境。崇

厚總宜駐守直隸邊境。防賊回竄。不可使本境邊防空虛。致有疏失。僧格林沁已派恆齡帶馬隊七百名到東。與海軍所帶馬隊合軍剿賊。俟該副都統到時。崇厚、寶山、成保、譚廷襄各宜飭派出之兵。與之會合。將張錫珠股匪四合圍殲。擒首要各犯。如再觀望。定以軍法從事。陳逆舊隊何時併入賊股。賊首係何姓名。著該前撫確查具奏。李城股匪竄至新泰羊流店一帶。教匪繞竄新泰之谷裏等

處。幅匪亦出巢紛竄。雖經兵團截殺。惟無成隊之軍。分投攔截。儻該匪合股徑犯泰安。去省城不過一百餘里。該處防守空虛。實屬可虞。若由東北直犯博山。既係青州大路。毫無阻遏。尤恐與淄匪勾結。所關更鉅。德楞額節節逗遛。已諭令僧格林沁嚴行查催。仍著譚廷襄催令整隊進剿。毋許耽延。並著檄令派出之焦其洲帶同兗營前敵兵勇。由閒道迎剿。毋任賊匪紛竄。鄒縣教匪不時出巢。兗郡

一帶防兵無多。思錫業經接防。著卽飭令嚴密防範。毋稍大意。宋景詩與良團尋仇。意存反側。雷鳳鳴雖隨同剿賊。竟敢與楚勇鬪殺。均屬跋扈。程順書等前據該撫奏稱投入賊夥。此次自訴迫於脅從。並非安心為賊。若輩首鼠兩端。實為日後隱憂。現今東省兵力未足。譚廷襄止可於羈縻之中。寓防範之意。俟兵力可以剿辦。必須盡數殲除。方免後患。將此由六百里各諭令知之。○又諭張之萬等

秦臺汝各匪句結南竄張岡餘黨同時蠢動會籌布置一摺此股皖捻陳大常等經陳大澐句結竄至正陽所屬之張岡由新蔡一帶南竄沿途並未大受懲創雖賊眾兵單究屬追剿不加張之萬等現飭余際昌趙鴻舉等軍杜其句結南路土扶橋賊巢卽著嚴飭各軍伺隙進剿不可株守一隅致賊益無忌憚其陳逆餘黨竄入荒坡張曜業經前進卽飭迅速規取毋稍遲誤該總兵前因陳逆竄逸

獲咎此時若不能奮勉圖功必將重治其罪南陽與汝郡接壤浙川內鄉均係捻匪入陝之路著張之萬飭署南陽府知府顧嘉衡督率民團於該郡廳縣一帶認真防剿毋令旁竄陝境皖捻人數眾多陳大澐本屬渠魁復句結陳大常等各股恐正陽各軍未能迅圖掃蕩該處軍務甫有轉機新撫各寨人心未定若日久不能殲除必至蔓延僧格林沁自擒獲張落刑後軍威遠震捻逆無不聞風畏

懾雖亳州距正陽較遠如由沈項一帶派撥得勝之軍進剿不過兼旬定可奏功著該大臣酌量情形妥籌辦理該大臣所派兵到後余際昌等軍或不能堵禦任陳大澐等南竄定以軍法從事其僧格林沁派兵未到之先仍著張之萬等督率各將弁嚴防毋得專待援軍以致曠日持久貽誤事機再據譚廷襄奏李城股匪竄至新蔡而德楞額仍在芒沂之間並未尾追等語著僧格林沁嚴飭該已

革副都統迅速追剿並查明逗遛不進各情嚴行叅辦以肅軍律將此由六百里各諭令知之○又諭陝省逆回以王閻村等處為巢穴經多隆阿督率各軍將王閻村羌白鎮攻克賊膽已寒倉頭鎮計可剋期掃蕩惟回巢已破該匪窮蹙無歸或繞赴北山或東渡黃河均不可不豫為防範德興阿一軍與其株守晉疆坐耗餉項不如進紮同朝以壯多隆阿後路聲勢兼可就近截剿竄匪著英桂傳

諭德興阿剋日渡河。毋稍遲誤。並著多隆阿斟酌同朝一帶情形。何路緊要。飭令前往駐紮。該副都統係棄瑕錄用之員。官如何激發天良。力圖報稱。如敢意存玩泄。賊至不擊。賊去不追。任令乘閒竄越。貽誤戎機。卽著多隆阿從嚴叅辦。擒首張落刑等。業經僧格林沁督軍擒獲。潁毫漸就肅清。歸陳一帶亦漸臻安謐。豫省西北現可無虞。捻氛竄擾。晉省茅津渡等處防務亦可稍鬆。著英桂酌量抽撥。

該處在防兵勇調赴蒲州。德興阿原駐河防處所。擇要安營。以資接替。而重防務。德興阿渡河以後。英桂責無旁貸。尤當督飭文武員弁嚴密戒備。以固河防。將此由六百里諭知多隆阿。英桂並傳諭德興阿知之。○又諭奕梁等奏甯夏平羅各處回匪悔罪投誠一摺。據稱甯夏縣屬之通昌通貴二堡回匪滋事。竄入平羅地方。肆擾經知縣長謙等前往開導。回目馬仲沅等遂自行背縛。率眾投誠。其

甯郡南北各堡回匪經知縣彭慶章等勸導。良回馬明起等亦將滋事之回目馬奠惻等設計誘殺。呈繳軍械一律歸順等語。該將軍等所奏係據參將塔斯杭阿等稟報大概情形。入告其甯夏道侯雲登辦理撫局迄今咨呈未到。是塔斯杭阿等所稟恐尚不實不盡。況該匪並未懲創。何以卽行乞降。僅藉詞緩兵。徐圖反覆。則為患益大。總之辦理此事不可草率從事。著熙麟等督飭侯雲登等將勦

撫事宜妥為籌辦。不得稍涉遷就。致貽後患。奕梁等仍當將存營官兵認真操練。不得以回匪投誠稍形疏懈。致墮賊計。奕梁另片奏病勢日增。請回京調理等語。該處軍務未竣。不可無大員督率操防。奕梁俟慶昫到後。方准交卸回京。不得以印務交常陞接管。遂謂可以卸責。將此由六百里諭知奕梁常陞熙麟並傳諭恩麟知之。○甯夏將軍奕梁因病解職。以察哈爾都統慶昫為甯夏將軍。○以

屢著勞績。賞還河南已革知州金朝棟。知縣趙寶仁。原銜頂帶。予已革知縣沈宣昭。以府經歷縣丞補用。○壬辰。遣官祭黑龍潭。

照靈沛澤龍王之神。玉泉山。

惠濟慈佑靈瀨龍王之神。昆明湖。

安佑普濟沛澤廣生龍王之神。密雲縣白龍潭。

昭靈廣濟普澤龍王之神。○遣官祭圓明園惠濟祠。

河神廟。○諭議政王軍機大臣等。有人奏。廣東高州府屬信宜縣城被匪占踞。兩年未復。該上司欲俟收復後。代該管道府乞恩。或以保守府城。藉詞免議。延不參奏。勞崇光奏請。優卹之道員劉式恕。前在陽春縣任內失守城池。蒙混未辦。反得保舉。升任後督辦西江軍務。及土客事宜。並未與賊接仗。該前督以積勞病故。奏請優卹。又保舉餉局出力之知州華廷傑。知府許文深。皆係葉名琛委辦。洋

務之員。咸豐六七年。廣東省城不靖。實由該二員辦理不善所致。華廷傑舉止猥瑣。許文深聲名尤為狼藉等語。辦理軍務全在賞罰。公明。若如所奏。縣城失守兩年。尚未將該管道府參辦。殊堪詫異。著晏端書。秉公確查。有無情弊。並將該管道府及延不參辦之督撫上司。查明奏請分別議處。其劉式恕及華廷傑。許文深等。被參各款。亦著嚴查復奏。毋許稍涉含混。該署督甫經到任。無所用其迴護。

諒不至代人受過也。原片著鈔給閱看。將此諭令知之。○以廣東海豐防勦出力。復已革知縣梁鳳輝職。○加賞普濟堂功德林。煮賑小米二百石。展期兩月。○癸巳。遣官祭歷代帝王廟。○諭內閣。崇厚等奏東匪過河西竄。現在分兵截勦。並請將疏於防範各員。分別懲處。各摺。姜國仲駐軍小灘。專守河口。此次任賊竄渡。實屬堵勦不力。著大名鎮總兵儘先副將姜國仲。著暫行革職。仍留署任。

該地方府縣各員既未能先事豫防且於該署督飭令趕完濠工調練協堵諸事未能迅速遵辦均有應得之咎署大名府知府長啟大名縣知縣劉傑代理元城縣知縣胡源均著摘去頂帶大順廣道祝塏甫經回郡尚未到防惟督催究屬不力著交部議處署直隸提督寶山督兵勦賊是其專責乃任賊竄逸過河未能力遏實屬貽誤事機不知緩急寶山著撤去提督署任並交部議處以示懲儆

尋議上得旨前署直隸提督盛京副都統寶山著照部議降三級調用不准抵銷仍暫停開缺留於直隸軍營效力以觀後效○諭議政王軍機大臣等崇厚等奏東匪由小灘過河西竄現籌堵截各摺暨臬司王榕吉到營遵覆飭查王洛月等蹤跡各片崇厚等疊經奏報河岸設防濬濠並飭各軍分撥梭巡何以此次賊由娘娘廟等處搶渡竟任其趨沙爬岸過河至千餘人之多姜國仲致被兜圍

雖經都司崔福泰等接應得解重圍而渡河之匪已竄至曲周西北馬廠地方其為姜國仲等疏於防範寶山並未親督所部截勦可知如果河岸真有防兵自可及賊半渡奮力轟擊何至任賊爬渡現在賊之後股未能過河者亟應嚴加堵遏姜國仲等尤當知所愧奮力贖前愆崇厚親臨河岸總當申嚴軍律續來股匪不准再任竄渡其竄曲周馬廠是否過河之匪均在其中抑有分竄他處不可

不嚴密確探寶山摺報自肥鄉發已落賊後總兵徐廷楷知府余承恩與成保春霖所帶各軍均已分路繞赴廣宗會合夾擊即著崇厚飛催各軍迎頭進剿以顧北面之防如果後股不能續渡前股曲周馬廠之賊僅止千人不難聚而殲旃能令此賊渡河匹馬不還即河東餘匪自然膽落不敢再思偷渡其河東之匪譚廷襄已到東昌著即嚴飭帶兵員弁乘機勦擊此次小灘搶渡之賊東省兵練

何以未見從後尾擊著譚廷襄嚴行查叅恆齡已自皖起程赴直並著崇厚飛速迎催以資統率王榕吉已到營著卽飭令督率所部專意勦賊該員於地方情形較熟一切布置進止崇厚可與之商籌定資得力其總辦軍需局務卽飭該員總其大綱以為兼顧王洛月已經更名隨同陳顯彝帶勇其弟王貫三王貫四亦赴山東有無與匪僧長太勾結及帶引東匪竄擾直境情事著譚廷襄查明具

奏並隨時嚴密訪拏毋任兔脫小灘迤南豫東壤地相接仍著崇厚譚廷襄咨會張之萬豫籌堵截以杜紛竄將此由六百里各諭令知之○又諭本日已明降諭旨將寶山撤去提督署任令恆齡署理直隸提督前據僧格林沁奏稱擬派副都統恆齡帶馬隊七百名馳赴直東會勦並令沿途緩行以養馬力現在賊已渡河擾及曲周畿南軍務緊要統領乏人恆齡歷經戰陣熟悉直東股匪情形著

僧格林沁飭令該署提督迅速馳赴畿南接統各營馬隊並令成保薩薩布海羣等幫同管帶以一事權而資攻勦毋稍延誤將此由六百里諭令知之○又諭前據崇厚等奏稱張錫珠股匪由直隸回竄東境直境已無匪蹤現在該逆復又渡河竄至直隸大名府屬一帶崇厚於防勦機宜絕無把握難期得力賊匪現在直東交界倏往倏來毫無攔阻若無知兵大員前往督辦畿疆重地何堪設想

著劉長佑懍遵前旨迅速起程由海道北上馳赴直隸總督新任以期迅掃逆氛劉長佑自調任直隸總督迄今已閱五旬尚未見該督奏報起程殊深廕繫並將由海道起程日期一面先行馳奏將此由六百里諭令知之尋奏於正月二十八日由海道起程北上報聞○又諭馮子材等奏西南竄逆句結丹句逆匪下犯官兵迎擊獲勝各摺片鎮城為濱江要地此次逆首偽懷王等會合丹陽踞匪

陳逆沿途築壘分黨抄糧為步步進逼之計。經總兵張文德等分投追擊將牧馬口柏林村等處逆壘焚毀陣斬匪首陳逆追賊直至丹陽城下洵足振軍威而褫賊魄。惟偽懷王一股悉眾西遁難保不乘閒思逞與丹陽各匪密圖報復。馮子材等仍當激勵在防將士相機防勦毋得以賊鋒屢挫稍涉大意。現在金陵賊勢日增上游九洲渡江之賊連日不絕鎮江江防關繫緊要該提督等防守多

年諒能斟酌機宜豫籌布置以副委任也將此由六百里諭令知之。又諭英桂奏晉兵怯懦難期得力仍擬察看情形添調楚軍一摺據稱晉民向以商賈為生學費不成始肯入伍前募本省勇丁二千名膽識未壯以言乎守尚足以壯聲威以言乎戰實難冀其勇往今鄰氛未靖擬另備一軍為四路救援之用庶於防檢防回稍有把握官文代募之勇僅有楚北一千何時起程尚未准該省咨會

等語晉省兵勇雖素怯懦如果統率得人教練有法何至不能轉弱為強著英桂督率各將弁認真訓練不得有名無實虛糜帑項袁復清等前經官文等令其募勇赴晉何以此時尚未到防其勇丁一千名是否募齊何日起程著官文嚴樹森查明嚴催袁復清等迅速帶勇赴晉該二員到晉後由英桂隨時察看如果得力再令攜銀赴楚添募以資得力現在羌白鎮王閭村業經克復晉省防務當

可稍鬆昨有旨諭令英桂傳諭德興阿統率所部移駐同州一帶其茅津渡防檢兵勇即酌移德興阿原駐防河處所以便多隆阿節節前進著英桂傳知德興阿即遵前旨與多隆阿商酌飭令該副都統移紮要地以期與晉疆不准稍有疏懈將此由六百里各諭令知之。○命工部尚書李崇階為實錄館總裁官戶部左侍郎沈桂芬為副總裁

官○以正紅旗蒙古副都統阿克敦布為察
哈爾都統○以鑲黃旗漢軍副都統恆齡署
直隸提督未到任前以山海關副都統成保
暫署○甲午清明節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

文宗顯皇帝

孝德顯皇后暫安寢殿○遣官祭

端慧皇太子園寢○諭議政王軍機大臣等

前因思麟奏甘肅軍務緊要請飭戶部陝西

山西及附近各省籌撥銀四五十萬兩統道

解甘當經諭令戶部妥速議奏茲據戶部奏

稱現在陝西辦理軍務勢難籌措惟所撥協

甘餉內山西欠解歷年餉銀共二百五萬餘

兩河東鹽課項下欠解餉銀八十四萬兩均

屬該省應解之項至川省地丁等項銀兩尚

可通融協撥擬於山西欠解項內先酌提銀

二十萬兩河東應解餉內先酌提銀二十五

萬兩四川無論何款項下如何湊解亦酌撥

五萬兩統共銀五十萬兩均令就近解往甘

肅各等語所籌尚屬可行即著駱秉章英桂

迅飭各藩司暨山西河東道立即遵照該部所擬山西提銀二十萬兩河東提銀二十五萬兩四川撥銀五萬兩派委委員星速起解探明繞道赴甘以濟急需並將起解日期咨明戶部至山東省欠解協甘餉銀三百七十餘萬兩河南省欠解協甘餉銀四百餘萬兩疊經戶部咨催該省總未報解邊疆重地兵餉要需豈容如此膜視並著譚廷襄張之萬督飭藩司於奉文五日內將應解甘餉各先籌銀數萬兩設法繞道解甘交納毋稍延緩其山西山東河南等省積欠餉銀除此次提撥外仍著該撫等陸續籌撥源源報解以重兵糈而維大局將此由六百里各諭令知之○又諭據唐訓方奏稱兵練收撫賊圩甚多宿境漸就肅清並馳赴蒙城與僧格林沁面商善後事宜各等語臨准距蒙城不遠唐訓方此時諒與僧格林沁面晤所有善後事宜即著妥商籌辦現在著名巨捻均已擒獲其

餘零星股捻不難指日蕩平並著該大臣等會商應勦應撫各圩相機辦理蒙亳一帶久經兵燹民不聊生亟須循良之吏巡行勞徠招集流亡勸課農桑用蘇民困聞道員馬新貽在皖年久民情愛戴如能得力即著該大臣等調往差委惟自下蔡以北苗沛霖所收各圩尚多現在該練雖不敢稍涉鴟張日久仍恐為患應如何清理之處並著豫籌機宜以期一勞永逸其陳大常等股捻竄至豫省之正陽前諭僧格林沁派兵協勦是否業已前往即著酌量辦理該大臣督軍皖豫以來已近一年衝鋒冒險夙夜宣勤此時夙志已償方擬令暫行休息而直東降眾張錫珠等股勢頗猖獗昨復竄越河西曲周等處畿輔重地豈可令其蔓延交界往來自如現在淮北零星捻股諒唐訓方督率各軍亦可次第辦理著僧格林沁酌量情形統帶馬步數千名先回直東將張錫珠等股悉數掃蕩成保

寶山等恐未能迅速奏效諒該大臣公忠體國自能籌畫咸宜也將此由六百里各諭令知之○以內閣學士恩齡為刑部右侍郎○以禮部右侍郎綿宜兼正紅旗蒙古副都統○乙未諭內閣左宗棠奏克復紹興相廬府縣城池一摺浙江自攻克浦江等城後逆匪何汶濤由紹興竄撲諸暨經高連升等率兵馳擊賊眾敗遁而東陽永康等處敗匪復紛紛竄至官軍合隊縱擊斃賊甚多劉典乘勢

規取紹興署提督葉炳忠等已於正月二十六日將紹興府城收復敗匪萬餘與相廬踞賊合併沿江修築石壘圖抗官軍我兵併力圍攻遂將相廬縣城克復辦理甚為得手著左宗棠飭令蔣益澧劉典各軍分道進攻盡掃妖氛所有攻克紹興府城詳細情形仍著查明具奏○諭議政王軍機大臣等譚廷襄奏擒棍各匪西竄克屬教匪潛襲民寨暨勒辦張錫珠股匪各摺片李城等匪由泰安西

南竄入甯陽曲阜邊界教匪卽出巢襲破徐八寨嶧陽寨是該匪等聲息相通意圖勾結已可概見雖經德楞額跟蹤尾追總未能奮力兜擊遏其逆蹤克營兵勇多不得力更無知兵之將甯陽曲阜均係擒匪熟徑且密邇鄒縣匪巢與沂郡亦壤地相接一經勾結盤踞將數百里聯為一片官軍更難著手前據譚廷襄奏稱教匪竄至新泰之谷裏等處此次又稱襲破嶧縣民寨是已分股出巢其勢

更張恩錫既接兗州之防並有該前撫留防兵勇何至任令出竄毫無堵遏且該處兵少勇多尤恐有匪類溷跡其中與賊通氣若不急籌攻取貽患何窮德楞額現已趕到著卽催令督率兵勇會同恩錫所帶防兵並飭令焦其洲等軍探蹤夾擊分投進剿俾擒教各匪不至勾聯再行節節殲除廓清兗境張錫珠等分股搶渡河西南股仍在堂莘一帶仍著譚廷襄督飭保德統率各軍力圖掃蕩不

得稍事鬆懈。恆齡馬隊既據僧格林沁咨會。派令北來。昨已有旨令恆齡署直隸提督。著譚廷襄迅催該大臣飭令星馳北上。與海軍馬隊合力進擊。並著迅飭保德等揮軍會合兜剿。迅殄逆氛。知縣李煊前於張錫珠倡亂之始。毫無覺察。厥咎甚重。現在仍令代理冠縣。該前撫何以始終信任。受其蒙蔽。著訪察該員平日劣蹟。迅卽撤任查辦。毋令貽害地方。將此由六百里諭令知之。○又諭左宗棠

奏克復紹興桐廬。浙東肅清。並飭富紳措款辦賑。沈葆楨奏浙東敗逆西趨。派兵嚴防要隘。各摺片。前因浙東軍務得手。杭城不難攻復。第取之雖易。守之甚難。不如先清皖南。勦辦較易得手。曾經諭令曾國藩左宗棠妥籌辦理。此次左宗棠摺內所陳乘勝長驅。杭城無難速克。惟逆首譚星一股。已由於潛昌化竄入皖南。必將句結太平石埭諸城。擾我後路。偽王黃呈忠等聞已由富陽渡江。欲與李

秀城合勢北犯。現飭蔣益澧規取杭州。而催劉典一軍回嚴。以向皖南。並飭劉培元率所部三營前赴開化。會合王德榜全軍相機截勦。又分撥八營扼紮淳遂之衝。各等語。所籌與前旨大略脗合。卽著照所議妥為辦理。至檄飭各營勿貪克復省城之績。勿憚江皖迂阻之勞。將來總以殺賊多寡為勞績之高下。尤屬洞中窺要。並著隨時策勵各軍。迅奏膚公。同膺懋賞。現在浙東敗賊竄入績溪。並句

結大股聚於石埭。意圖西趨。劉典一軍既已赴徽援勦。江西廣信尚可無虞。惟該逆若橫竄建德。則與饒九處處接壤。不可不豫為之防。沈葆楨已飭段起等嚴扼景鎮湖口。並令韓進春偵賊所向。迎頭截擊。卽著督飭該員等嚴密防勦。毋稍疏虞。浙江此次之變。吾民顛沛流離千里。赤地朝廷軫懷民瘼。哀憫殊深。左宗棠現擬散錢煮粥。拯救飢民。招集流亡。給資耕種。具見該撫能體朝廷德意。惠我

烝黎而富紳楊坊俞斌毛象賢等十數員非但膜視邦族不加拯恤且欲乘機賤置產業實屬忍心害理為富不仁著照所擬飭令力措鉅款廣購米石迅救沾危如敢不遵卽行嚴辦將此由六百里各諭令知之○又諭徐宗幹奏臺灣各路官軍疊獲勝仗並內地援師抵郡會剿一摺臺匪久踞彰城攻陷斗六分撲嘉城嘉灣道洪毓琛等派撥義首李成龍等由鹽水港進剿北路其另股分撲嘉城之賊亦經參將湯得陞等先後擊退保全嘉城是臺境軍情已有轉機彰城踞匪無多吳鴻源現已統領全軍抵臺軍威益振卽著耆齡徐宗幹督飭該署提督等會合曾玉明洪毓琛水陸各軍聯絡一氣迅將彰城斗六攻克肅清臺境逆首戴萬生遁入番社賊黨難保不思他竄並著迅速拏獲以清後患本日據左宗棠奏紹興克復浙東已就肅清閩防稍鬆如臺境兵力不敷卽著耆齡等酌撥兵

勇前往以便及早廓清臺境刻下各路援師赴臺一切軍火糧餉卽著洪毓琛悉心妥籌解濟毋稍貽誤將此由六百里諭知耆齡徐宗幹並傳諭洪毓琛知之○又諭多隆阿奏遵提謝開基等監禁並覆陳撫回情形及因病請假各摺片謝開基及伊子謝順旣據多隆阿劄交大荔縣監禁並行文湖北派員提解卽著照所議辦理俟湖北委員到陝卽令押解赴鄂照例懲處該大臣督軍勞苦徧體生瘡竟至不能騎乘實深廕念著賞假半月在營加意調治以資休息穆圖善傷痕漸愈而雷正綰病勢沈重尤所繫懷著卽傳知該提督安心調理用慰馳念多隆阿等儻假期已滿尚未全愈仍可在營休養至回民應勦應撫朝廷本無成見該大臣職任統帥諒可隨機辦理無俟朝廷遠為指示現在雖經給假一切調度機宜仍由該大臣酌量辦理將此由六百里諭令知之○又諭傳諭江西布

政使李桓沈葆楨奏馳報藩司起程日期一摺據稱接據李桓稟報於二月初四日卸事將經手事件趕緊清釐卽於十三日馳赴長沙募勇千人捐辦一二月口糧及軍械所需星夜進發迅速入秦等語李桓於接奉傳諭後卽能剋期就道並捐貲募勇帶赴陝南具見該藩司以國事為重奮勉可嘉多隆阿督兵攻拔王閣村羌白鎮兩巢該匪復糾合西路逆回拌死抗拒現在進攻倉頭鎮尚未得手勢難兼顧漢中一帶而毛震壽株守洋縣師久無功亟須李桓前往接統其眾楚南將士李桓所素信者既不乏人自不難招募成軍著卽趕緊部署星速入關一俟行抵陝境該藩司卽迅速馳奏以慰廑念○以克復浙江紹興桐廬府縣兩城予按察使劉典優敘賞副將熊建益楊政謨黃少春楊芳桂黃有功劉清亮知府朱明亮參將周廷瑞遊擊鄧受福守備徐文秀邑圖魯名號都司翁桂秋

等花翎餘加銜升敘有差○予江蘇無錫殉難生員華士鶴媳彭氏孫沛霖等分別旌卹如例○予河南各屬殉難紳民兵勇婦女一千六百四十三名口分別旌卹如例○丙申諭內閣前因軍營積習日深疊經通諭各營痛除積弊並令兵部將臨敵退縮遇賊觀望等項劣員應得處分罪名從嚴定擬茲據賈楨等奏遵議軍營各項劣員處分罪名請旨遵行等語用兵以紀律為先近來各省軍務

未竣其間文武同心協力折衝禦侮者固不乏人而各營員弁狃於積習退縮不前遷延貽誤者尤屬不少若不嚴定章程無以振軍心而昭炯戒著照兵部刑部所請嗣後盜賊侵犯城池蹂躪地方帶兵員弁如有畏葸觀望貽誤事機者卽照律定擬斬監候如係兵餉充足之區先期逃散者著照奏定章程請旨卽行正法如有盜賊入境及已奉調遣不能星馳策應以至賊勢蔓延卽照律擬軍其

有文員當先陷陣而武弁擁兵坐視者卽照律斬監候請旨卽行正法如有軍營武職日事恬嬉不習軍旅傲慢規避及擅離汛守者卽照例革職不准留營如鄰境有賊帶兵員弁坐糜糧餉不妥籌堵禦以致賊至潰散失守地方卽照例革職不准留營仍從重發往軍臺新疆由該督撫及統兵大臣酌覈情罪重輕定擬具奏其該管上司及原派之上司均照本例分別加等議處如聞鄰境警報將軍提督以下各官不親身領兵馳往會剿託故遷延貽誤事機者著照例加等革職不准留營至於軍營帶兵武職如有不能約束兵丁以致生事擾民殺傷人命者除該兵丁照軍法從事外其帶兵員弁均照本例加等降三級調用不准抵銷經此次明定章程之後各路統兵大臣及各直省督撫務當轉飭所屬員弁一律遵照實力奉行儻仍蹈從前惡習卽按現定章程據實叅辦以肅軍律將此

通諭知之又諭景廉奏遵查徵收過稅情形一摺已革葉爾羌參贊大臣英蘊擬在巴爾楚克添設過稅並不待奎英函覆率憑已見辦理迨奎英奏有窒礙情形復以日久未見覆函飾詞具奏實屬始終矯執英蘊業經片案革職著毋庸置議喀什噶爾辦事大臣奎英接據英蘊函商既未與福珠凌阿商辦又不速行登覆輒行單銜揭叅亦屬始終負氣奎英著交部議處前任葉爾羌幫辦大臣武隆額於英蘊矯執已見未能阻止遽聽會銜入奏亦屬不合武隆額著一併交部察議諭議政王軍機大臣等崇厚奏賊竄西北截往東路請將追賊遲延之副都統議處並自請嚴議一摺賊匪來間過河竄至曲周縣境後復經余承恩等軍擊之於雞澤之司徒堡王榕吉所部擊之於隆平之坵底村賊始折而東竄成保追賊遲延經崇厚屢次督催始帶馬隊跟隨步隊而行實屬畏葸不前成

保著暫行革職責令留營帶隊自效崇厚督催不力亦難辭咎著交部嚴加議處現在總兵徐廷楷及姜國仲余承恩等均已趕過隆平仍著崇厚嚴飭奮力追剿嚴防北路成保經此薄懲如再不能奮勇前驅轉以慄悍之賊專委之於各步隊以致節節落後坐誤事機試問該革副都統與該署督能當此重咎耶昨經寄諭僧格林沁令其酌量情形統帶馬步數千名先回直東掃蕩張錫珠股匪現

在此匪駁駁北竄成保寶山均不能得力直省軍情尤為緊切卽著僧格林沁將蒙毫等處善後事宜一切悉遵前旨與唐訓方面為交代迅卽統帶馬步各隊馳回北路將直東之賊迅速掃除並著將籌定布置及何日可以啟行之處先行馳奏以慰懸盼恆齡所統馬隊七百名不日可抵直境著僧格林沁飛催前進崇厚並派員先行迎提到後卽可合力夾剿崇厚原摺著鈔給僧格林沁閱看正

在寄諭間譚廷襄奏攻克長城賊圩及攻擊淄川踞匪情形等摺片長城為郟境著名匪寨黃國瑞與知縣周士溥埽穴擒渠辦理尚為得手譚廷襄所奏與黃國瑞籌定攻克長城後進取之方以鳳凰山為最要蘭山之作子圩及寶泉峒等處次之近日教匪潛襲嶧山民寨希圖梗塞大道窺伺前敵營盤李城等匪又竄入甯陽雖經德楞額等從後追剿並由譚廷襄調令遊擊焦其洲等各軍馳往

夾擊而賊勢一與教匪句合更將延蔓黃國瑞之軍當令赴兗進剿先由費縣攻克寶泉峒後卽由鳳凰山東南紮營與克軍西北會合夾擊教匪一經破滅則蘭費餘匪均當瓦解所籌尚合機宜卽照所擬著譚廷襄每月由東省添助黃國瑞軍餉一萬兩以兩三月為期務令悉殲羣醜仍將郟境西哨等寨乘勢分別剿撫並遵前旨催督德楞額及焦其洲等軍將李城等匪奮力兜擊毋許稍涉遷

延觀望。其淄川踞匪負隅已久。譚廷襄奏稱近日進攻。疊有斬獲。賊之精銳僅餘數百。又將最為驍悍之賊目姬魁擊斃。其勢甚窮。即著督飭總兵曾逢年等。剋日將淄川縣城攻克。不准再事遲延。黃國瑞進止機宜。並著譚廷襄會商吳崇。妥籌速辦。毋得輒以空言塞責。將此由六百里各諭令知之。尋吏部議崇厚。照不應重公罪。降二級留任。例上加等。議以革職留任。從之。○又諭。本日據崇厚奏報。

東匪乘間過河。已由曲周竄至平鄉。直隸軍情緊要。劉長佑行抵津沽。即著董恂探明傳旨。令其毋庸來京。即由天津迅速前往崇厚軍營。接直隸總督之任。辦理軍務。以資得力。並著將到津及赴營日期。速即奏來。以慰殷盼。將此由六百里諭令知之。○又諭。毛震壽奏。遵覆漢南軍務情形。自請嚴議。並請飭駱秉章。迅催張由庚等軍。赴陝援勦。各摺片。現在藍逆仍踞洋縣。興安竄匪。欲由紫陽漢陰。

一帶窺伺漢中。曹逆又由甯陝圖竄。藍郭張逆回踞寶山。老巢伏莽甚眾。儻致勾結蔓延。勦辦愈形棘手。駱秉章前派分駐綏定之張由庚周達武兩軍。距陝較近。即著該督迅飭由城口太平等處。星馳赴援。與易佩紳等軍聯絡聲勢。合力防勦。務將洋縣寶山等處踞匪次第殲除。以靖地方。毛震壽仍當督率所部。與川省官軍會合夾擊。力圖勦賊。以贖前愆。毋得藉口兵單餉絀。坐待援師。致賊勢更。

形滋蔓。儻再遷延畏葸。致誤戎機。恐毛震壽不能當此重咎也。將此由六百里諭知。駱秉章並傳諭毛震壽知之。○又諭。劉長佑奏。甯縣東西兩路客家。勾結匪類。突入廣海寨。挾仇焚殺。現派文武大員。馳往查辦。並籌辦肇慶府屬土客互鬪。請將知縣陶鑒先行議處。各摺片。上年廣東恩平開平各縣土著。將赤水鄉攻破。本年正月。客眾竄擾西村雙門臨田大洋等各土鄉。復撲入廣海寨。肆行殺。

戮遊擊黃連安等不知下落經劉長佑與晏
端書等會商派令臬司吳昌壽副將衛佐邦
帶兵赴新甯勦辦所籌尚妥劉長佑現由海
道來直著晏端書責令該臬司等相機妥辦
設法解散儻敢恃眾抗拒卽行痛加勦洗該
寨文武下落並著查明具奏高廉道英秀由
省赴任為恩平客民攔截擁護到鄉求為申
雪經都司塔清阿等開導始行送出其中情
節恐有不實不盡著催令總兵陳佐光速回

陽江縣城趕緊籌攻務將織篲各鄉踞匪剋
日掃蕩以清道路英秀被阻情形仍著查明
具奏所失餉銀若干責令朱維城等迅追清
款不准短缺代理恩平縣事陶鑒於地方匪
徒漫無覺察致令大員被匪邀截餉銀遺失
實屬疏忽著交部先行議處廣東土客互鬪
歷有年所此次復敢踞寨焚殺截留大員明
目張膽皆不畏法若不趕緊殲除必至釀成
巨患晏端書身任兼圻責無旁貸務當督飭

在事各員認真勦辦毋稍玩忽劉長佑另片
奏法國領事李添嘉請撥兵教練情詞急迫
該督與晏端書等籌商已在旗營酌撥官兵
會同法國派來弁兵一體練習等語法國以
英國為中國教練官兵亦願派兵教練原無
他意惟外國人性愛體面若有畸輕畸重之
處恐不免別滋口實著晏端書一切持平辦
理所有應支薪糧等項務須查照前辦英國
教練官兵成案畫一辦理並著隨時查察毋

致有名無實是為至要將此由六百里諭令
知之○又諭毛鴻賓奏遵籌緩急情形請旨
調派一摺江忠義一軍原為曾國藩指調疊
經諭令毛鴻賓催其赴皖嗣因廣西蓮塘踞
匪正資勦辦復諭毛鴻賓飭赴粵省並令江
忠義署理廣西提督以專責成及蓮塘攻克
尚恐餘匪未淨潯屬賊股尚多又諭毛鴻賓
通籌緩急其江忠義一軍應令赴粵赴皖酌
度情形具奏茲據奏稱蓮塘克後江忠義舊

部已次第拔回新甯。廣西潯州股匪有劉坤一、易元泰兩軍會剿，不至旁竄。而皖省軍情緊要，曾國藩等亟盼江忠義提軍前往共支危局。江忠義著仍遵前旨，馳赴皖省。並著曾國藩妥為調度。何路緊急，即派往何處，以資得力。其廣西提督著張凱嵩酌保得力之員奏明署理。潯州軍事劉坤一接辦後，能否得手。張凱嵩身任疆圻，責無旁貸，即督飭劉坤一、易元泰等實力埽蕩，毋許玩延。將此由六

百里各諭令知之。○又諭景廉奏體察徵收過稅情形，並酌擬現辦緣由一摺。內地商回運貨至喀什噶爾，既在經過之阿克蘇及喀什噶爾兩處納稅，若於巴爾楚克再添過稅，則物價騰踊，商民裹足，勢必各城稅課皆形短絀。況巴爾楚克地極偏小，貨物難售，商賈每因盤費不足，將貨物扣留，暫押作抵。隨後持錢取贖，多有怨言。在喀什噶爾遞字稟訴，既據景廉查明情形，諸多窒礙，著即停止徵

收，以順商情而顧全局。至葉爾羌加增正稅，商民既皆樂從，且於喀什噶爾運販行銷，亦無窒礙。現經該參贊按照英、蘊等原議徵收清單酌量減裁，並派員詳立章程，出示曉諭試辦。著即照所擬辦理。葉爾羌等城均係邊疆要地，英、蘊等前在該處辦理各事諸多未善。景廉務當隨時查察，將英、蘊任內弊端加意釐剔，力求整頓。至巴爾楚克加增正稅之處，商民是否樂從，現在辦理情形如何，和闐

稅課是否可照葉爾羌一律加徵，均著景廉查明辦理。將此諭令知之。尋奏巴爾楚克加徵正稅試辦並無窒礙，惟和闐地方不能一律照辦。報聞。○又諭滿慶等奏請揀員督領番眾勦辦瞻逆，破格錄用糧員由川撥運火藥餉銀各摺片。瞻對逆匪久圍裏塘，梗塞驛路，該酋工布朗結復令期美、工布大股逆賊行抵三壩地方，劫去糧員行李，搶奪由藏發出摺報公文，其格吉地方亦有告急夷信。該

逆前於道光年間滋事。前任川督琦善帶兵往辦。並未力攻。僅以敷衍了事。以致該逆毫無畏懼。將附近各土司任意蠶食。現在川藏商賈不通。兵餉轉運維艱。漢番均有饑饉之虞。若巴塘再為吞并。則江卡亦難堅守。自應力籌攻剿。以靖逆氛。滿慶等現經派委番員徵兵借餉。並約會三十九族。調集各處土兵防剿。瞻逆西北兩面。其東南兩面。必須川省派員調集土兵四路進攻。方可收事半功倍

之效。該逆勢甚囂張。非口舌曉諭所能了事。駱秉章現派道員史致康督飭打箭鑪及裏巴二臺文武各員辦理。著即迅飭該員星夜前往。並督同明正土司及大小金川等處土兵約會藏中委員四路夾擊。並添派得力知兵大員前往督剿。以期速行掃除。糧員李玉圃既據滿慶等奏稱督辦勦撫瞻逆軍務。才可勝任。即著責令該員統率西路漢番官員及番土各兵前往。乍丫察木多一帶與川中

委員會合攻勦。將來如有成效。自可量予恩施。此時未便遽行超擢。諾們罕汪曲結布於征剿事宜。既經熟悉。即著滿慶等飭令在藏坐辦。與李玉圃遙為籌商。至藏中調集各處土兵。已有一萬三百餘名之多。止能備辦四箇月口糧。該處庫款既竭。火藥鉛丸尤缺。亟須川中接濟。著駱秉章速撥餉銀四五萬兩。並火藥三四萬斤。酌帶鉛彈。派員由會理州繞道滇省之維西廳至藏巴交界之南墩。或

至察木多所屬之擦瓦岡地方。相繼前進。毋得稍稽時日。至藏地西南兩面。及西北界外各部。落已多歸附。披楞廓爾喀又屢為披楞助兵。侵占各處土地。所有撫綏番眾。以廣招徠。毋令再為披楞誘惑之處。著滿慶等會同妥商辦理。其藏中邊備。更宜豫為籌畫。滿慶等務當咨會駱秉章。速將瞻對股匪先行勦除。以清內患。仍一面留意邊防。嚴申警備。毋稍大意。糧員李玉圃參案。既據滿慶等奏稱

係川中委員捏稟該督所致著福濟景紋卽行繞道迅速赴藏遵照前奉諭旨查明辦理並著景紋將地方軍務於抵任後妥行籌辦將此由六百里各諭令知之○兩廣總督劉長佑奏遵查粵省鹽務向歸總商六人綜理認餉納課責無旁貸其各埠商販悉由總商招徠雖無行票之名隱寓行票之法道光二十九年以前正課從無短絀自軍興各埠糜爛私販充斥以致嵯網日敝但使嚴緝梟匪

奏

主

官引自可暢銷若令改引用票恐零星小販散漫難稽一切帑本息銀轉致無人專任於公項殊多窒礙至釐剔陋規追繳欠款已飭屬嚴查次第整頓下部知之○以督勦不力陝西布政使毛震壽下部嚴議○以阿克蘇捐修城工予都司馬秀等升敘有差○以喀什噶爾勦賊出力賞阿奇木伯克庫吐魯克世襲二等台吉○以擊退喀什噶爾卡倫賊匪賞防禦達興阿等花翎筆帖式富爾遜布

等藍翎餘升敘有差○旌表守正捐軀山東惠民縣民商丁頭母呂氏奉天承德縣民婦傅韓氏河南臨潁縣民女董氏

奏

主

大清穆宗繼天開運受中居正保大定功聖智誠孝信敏恭寬毅皇帝實錄卷之五十八

大清穆宗繼天開運受中居正保大定功聖智
誠孝信敏恭寬毅皇帝實錄卷之五十九

同治二年癸亥二月丁酉以幫辦熱河糧臺

出力予知縣朱克揚等升敘有差○戊戌諭
議政王軍機大臣等崇厚奏截勦竄匪獲勝
一摺據稱賊由隆平竄踞大釣魚臺等處經
成保等督率馬步進勦斃賊多名崇厚調集
各軍駐紮甯晉匪眾竄近縣城劉景芳等率
兵邀擊潘永春與洋槍統教官克迺等繞至
上風連開大礮賊隊登時散亂潘永春復挑
奮勇數十名衝入賊中施放洋槍賊輒應聲
落馬官軍縱橫抄擊賊始大敗追殺三十餘

里等語此次官軍截勦竄匪一日兩獲勝仗
屢挫兇鋒該匪現向東南奔竄亟宜跟蹤追
躡盡殲醜類著崇厚嚴飭帶兵員弁乘此聲
勢拔隊窮追務將此股匪徒殲除淨盡毋令
乘閒折回東境貽患將來英國統教官克迺
首先衝入賊隊奮勇異常已諭知總理各國
事務王大臣知照該國公使嘉獎暫行毋庸
明降諭旨都司潘永春把總李萬祥及在事
尤為出力員弁兵勇均著崇厚分別存記俟

直境肅清或擒獲首逆後再行奏請獎敘此
股搶渡河西匪首是否仍係張錫珠降眾頭
目楊朋山自莘縣潛逃後是否與張錫珠合
股滋擾楊朋山是否一同潛逃與該匪合夥
並著崇厚查明具奏將此由六百里諭令知
之○予山東冠縣被戕縣丞沈兆璵祭葬世
職○予浙江紹興陣亡洋將達爾第福賞卹
如總兵官例○己亥祭
先農之神遣順承郡王慶恩行禮○諭議政

王軍機大臣等官文奏請撤換吉林黑龍江馬隊官兵西丹一摺。據稱吉林委參領常德等黑龍江委防禦薩英額等並甲兵西丹九十四員名。或打仗受傷。或久病不愈。請一併遣撤回旗。並請飭下吉林黑龍江各選派馬隊官兵。卽由楚省委員就地勸捐籌備經費。各等語。此次楚省遣撤之官兵等。著照官文所請。交桂廉富森保統帶回旗。並著無庸開其底缺。以示體恤。現在楚軍東征。必須有馬

隊供其調遣。方足以利攻勦。著景綸特普欽各認真挑選精壯馬隊官兵西丹一百五十名。合共三百名。仍交桂廉富森保管帶赴楚。所有經過沿途用兵省分。概不准藉詞奏請截留。官文業經發給委員桂廉等部照功牌。就地勸捐所收捐項。卽作為現調官兵等安家軍裝路費之用。將此由五百里各諭令知之。○以正黃旗蒙古副都統富明暫署鑲白旗護軍統領。○庚子遣官祭賢良祠。○諭內

閣御史丁紹周奏請籌弭盜之方。以資整頓。一摺。京師比年以來。劫案層出。疊經嚴諭申誡。整飭緝捕。而盜風並未少息。捕務仍形廢弛。總由各該管地面官及直班官兵等。平時於賊匪窩頓處所。漫無覺察。事後又不能認真躡緝。有犯必懲。以致宵小肆行。毫無忌憚。似此因循玩愒。幾輔重地。為害曷可勝言。著步軍統領衙門。嗣後務益嚴飭營弁兵役。於所轄地段。不分晝夜。嚴密巡查。如遇搶刦等

案。除失事之地面該管官。從嚴叅辦外。並將獲犯供出窩頓地方。及事後俵分寄頓處所之該管地面官及直班營弁等。照失事地面官律一體懲辦。至刑部反獄及礮局失礮各案。犯著步軍統領衙門迅速勒限嚴緝。務將案犯悉數弋獲。不准一名漏網。儻限滿無獲。卽行從嚴懲辦。毋稍姑容。○諭議政王軍機大臣等。劉長佑奏。由粵抵津。由津定期赴營。各一摺。並自陳籌兵籌餉各片。劉長佑聞命

北上。卽日前赴軍營。甚慰盼懷。直隸大順廣所屬地方。前因降匪張錫珠等為亂。冀州南宮等各州縣。橫被蹂踐。入春以後。疊經崇厚奏報。各軍分投堵剿。該匪已由臨清渡河。竄過東境。本月望後。復由小灘等處襲渡河岸。竄擾曲周平鄉甯晉等縣境。節據崇厚奏報。賊復渡河。馬隊千人。嗣復沿路裹脅步賊二千名之多。雖據聲稱現飭馬步各軍趕過甯晉。向東南追剿。殊恐此賊未經痛剿。所至

又復蔓延。畿南密邇京師。北路之防尤要。第僅將賊驅逐出境。直東交界地多平衍。運河一衣帶水。窆濠築壘。亦難恃以為固。賊蹤往來剽疾。必得痛加剿洗。迅將全股殄滅。方足以儆兇頑而靖畿輔。劉長佑久歷戎行。聲威頗著。到營後察看賊情地勢。將直省現有馬步各軍。將及萬人。申之軍律。布以方略。定能所向有功。該督所奏治兵籌餉其源皆出於察吏。洵為探本之論。直隸吏治廢弛。清釐整

飭。自當積漸為之。不求速效。不恤人言。方能有所裨益。該督到任。總當盡其心力。慎毋有所顧慮。致多牽掣。朝廷亦斷不為一切遙制也。現在直隸軍營。已有吉林黑龍江馬隊合五百名。署提督恆齡所帶馬隊七百名。又有由京派出成保薩薩布所帶京旗馬隊。統計為數已復不少。該督所擬派撥吉林黑龍江及蒙古馬隊。自可無庸再調。僧格林沁剿辦毫擒。已將張落刑等巨逆擒戮殆盡。昨已飭

令酌帶馬步各隊北來。先剿直東之賊。儻能迅至。更可商同剿辦。山東臨清一帶。節經譚廷襄奏聞。派兵調圍堵剿。應如何設法兜擊。隨時知照。譚廷襄併力辦理。其宋景詩等降眾。前經崇厚譚廷襄請令隨同剿賊自效。誠恐狼子野心。仍懷反側。此時雖在東境。與直省軍營聲息相通。著劉長佑到營後。悉心體察。並酌量應勦應撫。抑應暫為羈縻。如何控馭之處。妥為籌定。具奏辦理。將此由五百里

諭令知之尋奏宋景詩等降眾擬仍暫為羈繼以孤賊勢而紓兵力報聞○又諭劉長佑奏馳抵直隸日期並稱軍務吏治委任需人等語直隸為畿輔重地現在賊氛回竄隆平甯晉一帶攻勦正形喫緊且劉長佑到任伊始一切籌兵籌餉整飭吏治在在需員著毛鴻賓飭令李明惠等迅即招募成軍由輪船駛赴天津以期迅速所需口糧路費即由湖南廣東籌給覈實開報以利軍行並著曾國

藩晏端書黃贊湯張凱嵩毛鴻賓迅即分飭該督所調之郭崑燾等剋日馳赴直隸交劉長佑差遣委用以資指臂將此由六百里各諭令知之○又諭李續宜奏定期起程赴皖並請開缺專辦軍務一摺李續宜假期已滿因父病未愈請寬限二十日於三月初十日起程著即迅速起程赴皖該省軍情自僧格林沁擒獲逆首張落刑後近雖尚稱平穩惟和合等城踞匪時圖由皖竄楚以牽掣金陵

後路援師防務仍形喫重其淮北零星股匪仍須次第勦除至下蔡以北苗練所收各圩尚多現雖不敢鴟張恐該練日久生心復形反側一切籌辦淮防駕馭苗練亟須李續宜相機妥辦諒該署撫必見及此不至稍涉延緩也至軍務與地方應辦事宜必須聯為一氣始能收臂指之功李續宜請開皖撫之缺專辦軍務誠恐事權分屬或致呼應不靈於軍務地方轉無裨益李續宜惟當身任其難

力圖報稱以副委任毋庸固請開缺將此由五百里諭令知之○又諭多隆阿奏起獲賊贓充餉現在籌辦情形並甘回不可輕撫穆騰阿奏請飭司道籌濟軍食並調回西安馬隊各摺片多隆阿一軍自去冬赴陝至今已閱五月僅收到湖北山西直隸協餉銀兩陝西河南山東等省協款尚未接到分釐以致該營五月以來僅發一月之餉情形十分竭蹶現經各營兵勇在王閣村挖出窖銀二十

一萬三千有零。由多隆阿運回封存。卽將此項支發月餉。作正開銷。具見該大臣辦事認真。著卽照所議辦理。前因該大臣攻拔王閣村。羌白鎮回逆老巢。移軍進取倉頭。恐同州一帶空虛。特經諭令德興阿督帶所部。由蒲州渡河。進駐同郡。為大軍後路聲援。該大臣現辦情形。與朝廷前降諭旨。適相符合。著卽飭令德興阿遵奉前旨。迅速移軍同州。以資防堵。至甘肅鹽茶廳等處。回眾曾將滋事首

要各犯。捆獻投誠。尚可准其悔罪自新。若固原回匪。因該地方有招撫之議。竟乘官民不備。襲陷州城。致居民慘遭荼毒。非痛加勦洗。不足以儆兇頑。而申國法。據多隆阿奏甘省又有議撫之說。請飭該督慎重辦理。著熙麟恩麟轉飭在事文武。審度機宜。不可輕行議撫。其業經就撫各回眾。仍著隨時防範。不可稍涉大意。西安駐防官兵月餉。瑛榮欲自二月起。每月改以二成實銀給發。又欲將月需

兵米。僅給二升五合。不敷米豆。折價發給。實不足以資餬口。該處城垣均賴駐防旗兵登陴固守。豈能責令枵腹荷戈。該撫於回匪起事之初。並未飭令司道豫儲倉庫。致令城中坐困日久。兵餉無出。因循玩誤。實堪痛恨。著卽督飭該藩司糧道設法籌畫。務將駐防兵餉。仍按四成實銀發給。米糧折半六斗。不敷米豆。折價支放。以濟急需。儻仍前膜視。致令饑軍譁潰。恐該撫及司道等不能當此重咎。

也。省垣城大。兵單。防兵二千。不敷分布。穆騰阿現擬將雷正綰軍營派援鄆縣之馬隊二百八十餘員名。及防守北關營盤兵丁二百名。一併撤令歸伍。分撥守陴。惟鄆縣一帶。亦須兼顧。著會商多隆阿瑛榮酌度情形。辦理山東軍務。正當喫緊。所有該處軍營之西安馬隊。斷難撤回歸伍。穆騰阿務當督飭現有兵力。妥為防勦。毋稍疏忽。將此由六百里諭知多隆阿穆騰阿熙麟瑛榮。並傳諭恩麟知。

之○又諭慶昫奏由草地臺站赴任請准隨帶兵弁等語。慶昫擬由草地取道綏遠城等處。以入甯夏。該省軍情方亟。所請之張家口員外郎保順。蒙古佐領伊什貢布。滿洲佐領額勒洪額。驍騎校祿彭。均著准其隨帶前往。其平日所練官兵。有技藝嫺熟。通曉蒙語者。並准其酌帶二三十員。名以資得力。甯夏匪股現已投誠。仍當妥為安撫。固原被陷尚未克復。附近一帶匪股尚多。必須勦撫兼施。方

能有裨大局。該將軍部署既定。卽須剋日起程赴任。與熙麟、恩麟等會商妥籌辦理。毋負委任。該將軍起程後。阿克敦布未到任以前。察哈爾都統印務。著廉至暫行署理。將此諭令知之。○又諭德勒克多爾濟奏請將玩視軍務之扎薩克郡王議處一摺。前因甘肅靈州回匪肆擾。飭調蒙古兩盟兵於沿邊衝要駐紮。原以保衛該旗遊牧邊界。乃鄂爾多斯扎薩克郡王額爾奇木畢哩克。於鄰省需兵

孔亟之時。並不卽時督率前往分段設卡。迨經伊克昭盟長催促至再。仍敢故違期限。託病遷延。實非尋常玩誤可比。額爾奇木畢哩克著交理藩院議處。蒙古部落散處邊地。各省用兵從未輕易調派。此次甘回變亂。鄂爾多斯七旗遊牧地方。與陝甘兩省毗連。前經諭令將兩盟兵調防。為保全該旗邊防起見。該郡王何得任意耽延。著德勒克多爾濟催令趕緊設卡。探明賊蹤。認真防範。不可再有

貽誤。並宣示朝廷意旨。使知防邊實以自衛。若能奮勉圖功。必當優加獎賞。德勒克多爾濟身任邊疆重地多年。於一切防勦事宜。緩急輕重。自當諳悉。且於蒙古官兵必能聯絡一氣。務卽明白曉諭。俾各知踴躍從公。藉收指臂之助。將此由五百里諭令知之。○又諭前因黔省官民擅殺教民一案。必須持平辦理。特賞給勞崇光頭品頂帶。馳往查辦。並諭令張亮基以總督銜署理貴州巡撫兼署貴

州提督。於到黔時。將明發諭旨宣示。會同崇實勞崇光。將此案迅速妥辦。茲據崇實奏。疊奉寄諭。密陳籌辦情形。請先聲明何冠英田興恕之罪。宣示中外。再命廷臣嚴議罪案。並先將韓超交部議處。以存國體。而服遠人。各等語。所奏不為無見。何冠英雖獨創異議。係屬已故之員。且據該教民鈔呈。何冠英等辦理教民信函內。係與田興恕聯銜。若專坐何冠英之罪。該公使等恐難允從。至田興恕不

遵諭旨離黔。日形跋扈。殊干法紀。卽從嚴懲辦。亦不得謂非情法之平。惟案內關涉教民。必須中外均無異議。方可施行。張亮基已自成都起程。二月內可抵黔省。著俟到黔時。卽將前寄諭旨宣示。一面遵照前旨。催令田興恕起程赴川。解其兵柄。其前此錄寄田興恕被參各款。並著一面查明。會同勞崇光。崇實覆奏。屆時再降諭旨。宣示田興恕之罪。較之憑空結撰者。差勝。如田興恕仍敢抗違。是其

跋扈不臣。萬難寬貸。卽著張亮基傳旨革職。拏問。嚴行審訊。至教民案件。如何完結。能否不至抵償之處。崇實張亮基。仍應先行定擬具奏。不得專候總理各國事務衙門之信。韓超欲以此事專罪戴鹿芝一人。難免非受田興恕挾制。斷不可行。崇實所請將韓超先行交易之處。著一併俟張亮基等奏到時。再降諭旨。張亮基奉到此旨。務須慎密。俟勞崇光到時。酌覈情勢。會商妥辦。崇實摺著鈔給閱

看。將此由六百里各密諭知之。○以奉天各屬捕盜並承審出力。賞防禦穆特布花翎。叢登甲等藍翎。餘升敘有差。○追予浙江杭州殉難副都統傑純入祀京師昭忠祠。○豁免四川青神縣被擾地方咸豐十一年暨同治元年額賦。○辛丑諭內閣吏部奏戶部郎中員缺聲明請旨一摺。戶部候補郎中王正誼係發往河南差委之員。其於該部郎中缺出。應否擬補。自有定章。卽使原定章程內有未

經議及之處。不妨將章程詳加酌議。奏明辦理。若似此等尋常事件。動輒請旨。亦安用設有專司銓選之吏部為耶。此摺著吏部再行覈議具奏。○壬寅。

孝昭仁皇后忌辰。遣官祭。

景陵。○諭內閣。御史劉毓楠奏。祈祀兩廡新章。尚未允協。請飭大學士。軍機大臣。再行覈議一摺。先儒升祔學宮。久經。

列聖論定。至為精當。咸豐十年。復經。

文宗顯皇帝飭令酌定章程。以示限制。原以宮牆巍峻。祀典至崇。必其人學術精純。足為師表者。方可俎豆馨香。用昭勿替。茲據該御史以新定章程過嚴。如宋儒黃震等均經禮部議駁。謂士人皆以聖賢為難幾。必至人心風俗。日流於奇袤異端。而不及覺。推該御史之意。必將舉古人之聚徒講學。著有性理等書者。悉登諸兩廡之列。方足以資興起。而德行。之儒。平日躬行實踐。師法聖賢。實為身後從。

祀之計。議論殊屬迂謬。所奏著毋庸議。○又諭御史劉毓楠奏。請整頓各學教習等語。據稱滿漢各學設立教習。統於國子監。現充教習者。傳補後並無生徒肄業。期滿僅尋數人赴監。謂之交功課。其實並無功課可交。即可得官。各等語。著國子監堂官查明。認真整頓。稽覈功課之勤惰。分別勸懲。毋得有名無實。敷衍了事。以昭覈實。○又諭御史劉毓楠奏。自京師各城門添派海巡。百般訛詐。其冒充海巡者甚多。或於城內附近空曠地方。持械結夥。為害行旅。即會試舉人進城。亦不免攔阻陵辱。各等語。輦轂重地。豈容此惡棍充斥。擾害士商。亟應設法拏辦。以儆其餘。其如何稽查嚴密。以杜匪棍冒充之處。著崇文門監督妥議具奏。○又諭張之萬奏。甄別州縣佐貳。以維吏治一摺。河南署襄城縣知縣張紹英。舉動輕浮。居心險詐。署永甯縣知縣候補知州余銓。辦案顛預。行事狡猾。署盧氏縣知。

縣楊彬行同市儈。性情貪鄙。捐納通判陶居正。狂妄無知。動作乖謬。吳維祚年少輕薄。行止有虧。均著卽行革職。以示懲儆。○諭議政王軍機大臣等。御史吳台壽奏奉省閒曠之地未墾實多。錦州廣甯義州一帶官荒馬廠儘可設法變通。該地方官總以畏難苟安。不肯推行盡利。直隸山西等省西口北口外馬廠荒地均經陸續開墾。著有成效。奉天土厚泉甘。尤應培養國脈。以圖久遠。請飭實力履

勘。以開利源等語。並擬繕清單呈覽。近來庫款支絀。奉省餉需不敷。撥解僅借釐捐日捐。權宜濟餉。如果荒地可以開墾。則各項可漸次裁撤。裕課便民。洵屬妥善。惟所稱錦州廣甯義州一帶官荒馬廠。恩合前次覆奏已革翼領烏雲泰案摺內。於旗民各戶侵占地畝。及所蓋房間。有勒限令其拆退之語。該御史所陳開墾一事。是否可行。有無窒礙。該副都統向能實心任事。著按照單開詳細體察情

形妥籌具奏。至所陳東邊一帶地方千有餘里。良田數百萬頃。從前僅墾田三萬餘畝。其閒曠未墾者實多。恩合係盛京旗員。必能熟悉情形。有無閒荒地畝。可以開墾。辦理有無窒礙。並著該副都統悉心查訪。一併奏聞。再行酌量降旨。原摺單均著鈔給閱看。將此諭令知之。○又諭張之萬等奏官軍追勦光山賊匪獲勝。並克復楊寨情形。及勦辦荒坡股匪各摺片。陳逆糾合毫捻。由銅鐘一帶南竄。

經余際昌等督率馬隊疾馳進勦。追至光山所屬吳褚店。斃賊甚多。該匪竄至縣南白雀園一帶。著張之萬速飭余際昌跟蹤追躡。會同楚皖防兵併力兜勦。務將此股竄匪悉數殲除。以杜後患。楊寨雖經克復。而捻匪張中與林振山戴應華等尚踞守張岡。負隅抗拒。著毛昶熙親督趙鴻舉陳祿興等剋期攻拔。毋任久踞。如該總兵等攻勦不力。致該匪乘閒他竄。卽著從嚴叅辦。張曜督軍進逼荒坡。

攻擊甚力。寨民內應開門。張曜督率各隊一擁而進。殲賊無數。乘勝克復曹窰。勦辦頗屬得手。著張之萬仍飭張曜等激勵兵勇。迅將新項境內各賊寨。節節掃蕩。並將首惡陳大禧殲除。以清伏莽。土匪支汶炳。業經該地方官訪獲正法。惟臨漳內黃兩縣境。毗連畿輔。現在張錫珠股匪尚未殄滅。彰屬餘匪尚多。恐不免聞風思逞。仍著張之萬督飭所屬嚴密搜查。毋留遺孽。張錫珠等竄渡河西。豫境

防範不可稍鬆。並著飭令楊長春會同地方文武員弁認真偵探。如該匪竄近豫疆。卽迎頭截勦。毋得稍涉大意。本日有人奏降補道員金國琛為守兼優。將略實能獨當一面。賊擾安陸。由穆正春在河口不能扼截所致。乃不歸咎穆正春。而以不遵調度坐保襄樊。奏叅金國琛以同知降補。人人稱冤等語。金國琛業經張之萬調營差委。該員才具人品。諒必知之甚悉。其降補之案。是否實有貽誤之

處。抑或真有冤抑。並著該撫秉公查訪。據實奏聞。將此由六百里各諭令知之。○又諭平瑞奏統籌全局。擬辦開墾屯田一摺。另片奏巴里坤兵多糧少。請酌量遷移等語。已降旨令議政王軍機大臣會同該部議奏矣。新疆兵餉歲需銀三百餘萬兩。而烏魯木齊所屬地方。卽需三分之一。近來內地接濟。不能周轉。兵民困苦。勢甚可虞。平瑞於到任後體察情形。擬將烏魯木齊及古城等處閒荒馬廠

一律開墾。升科並擬將孳生馬匹歸併巴里坤牧放。飭交該處營員經理。俾有名無實之馬政亦歸實用。至屯田之地。分給屯兵餉需。既無缺乏。操防卽可講求。所籌各情。尚能因時擘畫。就地制宜。具見該都統實心任事。卽著照所議次第辦理。惟事體重大。必須斟酌盡善。實力舉行。俾積弊咸除。成效可觀。方為不負委任。其密陳一摺。卽著留中備覽。至馬匹移併牧放。將來於隨時調撥有無窒礙。並

開墾之後。應如何升科抵餉。追繳馬價。裁屯歸伍。酌減兵額。並著平瑞妥議章程。詳晰具奏。另摺奏添設養濟院。收養貧民。請動用倉糧等語。烏魯木齊地方。貧民日增。嗟號寒情形可憫。著准其動用倉糧以資拯濟。所有一切支放章程。並著督飭委員妥為經理。務令實惠均霑。毋任侵欺剋扣。將此諭令知之。○又諭興泰端昌奏參營員乖鄙庸劣。懇請查辦。並鈔錄兵丁原稟呈覽。一摺。據稱哈密

營兵馬錢糧。多年不清。營書藉端侵扣。以致兵丁等列款稟訴。請將營員分別嚴懲等語。哈密軍餉支絀。兵丁困苦已極。署副將恩賢於錢糧重款。並不留心查察。任令字識百端剋扣。迨經兵丁呈控。仍復置若罔聞。難保無通同分肥情弊。恩賢業已撤任。即著聽候查辦。字識李兆幅等五人。均著嚴行監禁。以憑質訊。護中軍都司全齡承辦兵馬錢糧。是其專責。乃於各兵糧餉牽混。未能詳察。署哈密

營千總張積慶兼管汛地。職司彈壓。乃於兵丁遞稟呈控時。未能先事約束。聽其譁躁。均有應得之咎。若不嚴切查究。何以肅營政而成信讞。著平瑞迅派明幹妥員。秉公查辦。文祥甫經到任。更無所用其迴護。著會同端昌並平瑞派出之員。提集全案人證卷宗。詳細清算。如恩賢等有通同舞弊剋扣兵餉之處。即據實從嚴參辦。呈內所訴通融豫借短放等款。情弊顯然。為數甚鉅。務須將侵吞數目

詳細訊明。著落李兆幅等五人照數追賠。不准絲毫無著。應得罪名。仍著按律懲辦。將此諭知熙麟。平瑞。文祥。端昌。並傳諭恩麟知之。○以隱匿兵餉。甘肅防禦剛安革職訊辦。○以乖鄙庸劣。哈密副將恩賢署千總張積慶革職訊辦。撤護都司全齡任下部嚴議。○癸卯。諭議政王軍機大臣等。崇厚奏東匪被勒南奔。並恆齡擊賊獲勝。譚廷襄奏逆首伏誅。及籌辦進剿情形各摺片。此次東匪被官軍

擊敗。紛向館陶一帶逃逸。經崇厚馳赴臨清州所屬之下堡寺地方。督軍進剿。適恆齡一軍由臨清拔隊擊賊。斃賊數十名。達爾濟海羣等隊亦斃賊數十名。敗匪由西南竄去。惟大股尚在曲周地方盤踞。恆齡已督兵繞赴曲周西北追躡。即著乘勝進攻。毋令該逆得容喘息。至賊蹤飄忽靡定。崇厚現已折回威縣。籌備前營糧餉。著飭令余承恩、姜國仲各軍實力追殺。兩面夾擊。毋稍鬆勁。其萃堂等

處著譚廷襄督飭保德。就現有兵力相機扼截。總期步步進逼。設法兜剿。聚而殲旃。李城擒悉已久。此次為部向魁、郅貴等斬首來獻。餘賊潰散。洵足快人心。而申國法、郅向魁等應得獎賞。准俟僧格林沁查驗無誤。即由譚廷襄酌覈辦理。其夜襲賊營並跟蹤剿賊出力各員弁。准其先行存記。彙案請獎。至敗匪東遁。與嶧山漸近。勢必勾通教匪及劉雙印等負隅抗拒。著譚廷襄督飭德楞額、恩錫等

軍迅速會剿。毋令日久蔓延。黃國瑞一軍該前撫擬令先破費縣寶泉峒。紮營鳳凰山東。南以斷教幅句結要路。所籌尚是。即著責令迅籌進剿。不得稍有稽延。李城任縛得均係著名擒首。現在李城已誅。而任縛得尚在宿南一帶竄踞。並著譚廷襄嚴飭東省員弁趕緊殲擒。以除後患。知縣李煊辦理降匪貽誤大局。屢令該前撫查參。何以始終信任。輒為鋪敘戰功。殊屬非是。仍著懷遵前旨。將該員

撤任查辦。一面遴選勝任之員前往接署。不得再為瀆請。自干咎戾。將此由六百里各諭令知之。○又諭都興阿等奏賊撲北岸軍情喫重。師船遭風沈溺。失去礮位各摺片。前因江浦等處防務喫緊。諭令曾國藩督飭李世忠實力防守。毋任該逆得以逞志江北。茲據都興阿等奏稱賊勢大股北趨。竄陷江浦縣城。李世忠何以未派一旅之師迎頭攔截。該提督身膺專閫。受恩深重。坐視賊勢猖獗。絕

不援應實屬有心貽誤著曾國藩傳旨嚴行申飭並檄令懷遵前旨將衡陽各隊兵勇調回防所責令將江浦縣城迅圖克復並嚴防江口不得再令匪蹤偷渡儻仍前玩泄必將該提督重治其罪江浦既陷六合可危既據該將軍等派令刁經明前往查探卽著相機策應揚防關繫緊要裏下河一帶尤係完善富庶久為該逆垂涎都興阿富明阿現在專顧揚防恐賊取明攻揚州而乘虛分竄裏下河尤不可以不防著都興阿等妥籌兼顧務令該處有備無患並著吳棠仍遵前旨督飭在防兵勇實力防範毋稍疏忽為賊所乘致落後著福山船隻遭風碰划沈失著都興阿飭令郭定猷等趕緊修整以利攻剿現在和合等城尚未克復該逆既陷江浦勢必駁駁上犯唐訓方雖赴蒙城會辦善後仍須酌派勁軍遏剿毋令匪勢西趨益致延蔓前日有人奏道員吳坤修治軍嚴整殺賊勇往其弟

同知吳欽修曉暢營務善馭士卒該二員現在楚營請飭赴山東剿賊等語吳坤修等平日帶勇能否得力著曾國藩酌量情形如該二員人材可用卽令其酌帶平時勇敢將弁親兵迅赴山東歸間敬銘調遣一面由曾國藩迅速具奏皖省江北軍情同時喫緊兵力不敷分布並著曾國藩飛咨毛鴻賓催令江忠義迅率所部前赴該大臣軍營聽候調撥再據都興阿奏前次逃出長髮難民已紛紛

回渡靖泰一帶照常安靜等語既係逃出難民何以又復回渡江南行蹤殊屬可疑著都興阿富明阿吳棠派員確切查明如有續來者務須嚴究來歷分別妥辦毋墮奸計將此由六百里各諭令知之○又諭前因管帶常勝軍之白齊文不遵調遣將道員楊坊毆傷並搶刦餉銀四萬餘圓當將白齊文革去三品頂帶交李鴻章嚴拏按照中國制度辦理茲據總理各國事務衙門奏稱美國公使蒲

安臣為白齊文表功辯誣。白齊文潛逃來京。該衙門王大臣未經傳見。亦未接其摺件。英國公使復為緩頰。美國公使亦代為認罪。現飭白齊文仍行回滬。聽候李鴻章辦理各等語。白齊文刦餉毆官。不遵調遣。律以中國軍法。其罪萬無可逭。而英美公使在京饒舌。若遽允其所請。則封疆大吏。無復操縱之權。自應照總理衙門所議。由李鴻章酌量辦理。現在白齊文赴滬。該撫即欲稍寬其罪。必當使所犯各罪一一認伏。然後量為施恩。則白齊文既畏該撫之威。又感不殺之惠。且遇有交涉事件。中國官員。或偶傷犯外國人。各國饒舌。亦可援此案以自解。李鴻章慮事明決。著於白齊文到後。體察目前軍情。並久遠大局。妥籌辦理。俾知中國軍律。悉由封疆主持。總理衙門不能遙制。於辦理軍務。亦不至有所掣肘也。原摺並照會八件。均著鈔給閱看。再據都興阿等奏。總兵郭定猷派赴福山策應。

適狂風大起。各船槓樁皆有損壞。聞黃翼升所部各船。亦有沈溺各等語。前據李鴻章奏。稱黃翼升以該處沙灘無可停泊。移紮福山上三十里之鹿苑港。並未有師船沈溺之事。何以都興阿等忽有此語。現在潘鼎新等兵到後。福山情形如何。常昭能否解圍。該降眾深明大義。必得官軍援救。方不阻其反正之忱。而他處義民。亦可聞風響應。所有近日該處軍情。即著迅速具奏。將由此六百里諭令知之。○又諭晏端書等奏。通籌高潯兩路軍務。請飭江忠義由東省進兵一摺。江忠義部曲。本在湖南。由楚起程。計日即當抵皖。勢不能再令回粵。而陳金缸占踞信宜。負隅已久。不可不急圖殄滅。卓興方耀兩軍。素稱勁旅。必得大員統率調度。則事權歸一。呼應較靈。著崑壽迅即前赴高州。督飭卓興等奮力進攻。務將陳逆等股匪剋日殲除。以副委任。晏端書另摺奏。新任撫臣抵韶。業經交卸撫篆。

仍回總督署任。惟自揣年逾六旬。精力不及。深懼負荷弗勝等語。晏端書現經署理督篆。卽屬責無旁貸。惟當振刷精神。遇事力圖整頓。斷不可存五日京兆之見。稍涉推諉。黃贊湯陸辭出京。沿途並無梗阻。何以到粵如此之遲。實屬不知緩急。該撫現在韶州接印。卽著星馳進省。毋再耽延。黃贊湯荷朝廷知遇之恩。膺茲鉅任。當感激圖報。與該督等共拯時艱。儻敢意存玩泄。不知振作。則是自外生成。恐不能長承恩眷也。懍之勉之。前據羅惇行奏。廣東省賭風最盛。劉長佑下車伊始。卽將白鴿票花會。並閩姓番攤各賭博。先行禁絕。號令一新。百姓亦樂於從命。現在該督離任。恐各種賭博。故態復萌。請飭晏端書一體嚴禁等語。賭博為害閭閻。往往破家蕩產。弱者轉於溝壑。强者流為盜賊。不可不嚴行查禁。著晏端書督飭所屬。出示嚴禁。以裕民生而端風化。將此由六百里各諭令知之。○補

鑄江蘇常州府知府常熟昭文金匱江陰荆溪嘉定等縣知縣蘇州松江兩府儒學各印信條記。從巡撫李鴻章請也。○以貪鄙不職。革江蘇同知沈光曾職。○以山東嶧山攻勦不力。暫革遊擊姚長齡職。仍留營。○予直隸大名被戕知府金秉忠祭葬世職加等。○予山東卽墨等縣殉難知州江恭先等紳民婦女二千四百六十八員名口分別旌卹如例。並予建祠。○甲辰諭內閣。本日據耆齡奏。紹興府城克復後。蕭山踞賊亦同時渡江。紛竄浙東。肅清等語。浙江省金衢嚴甯紹台等府屬地方。經賊竄擾。惟衢州府一城。未經失陷。其餘各郡邑。均為賊踞。年餘以來。地方百姓慘遭荼毒。卽經耆齡左宗棠各督所部。由閩皖分道進兵。將各府州縣次第克復。浙東全境已就肅清。前據左宗棠奏稱。浙東人物彫敝。田土荒蕪。遺子殘黎。喘息僅屬。閭閻之殊堪哀憫。吾民何辜。罹此慘酷。所有浙東新復各

府州縣地方著加恩蠲免二年錢漕以蘇民困。該督撫卽刊刻謄黃。徧行曉諭。並督飭各該地方官吏。安集流亡。加意撫綏。務使吾民均霑實惠。毋任吏胥弊混。用副朝廷軫恤窮黎。屢念民艱至意。○諭議政王軍機大臣等。曾國藩奏查閱沿江各軍。現抵金陵大營一摺。曾國藩於正月起程。沿途查看蕪湖金柱關等處營壘。二月至金陵雨花臺營盤。逐段查閱。均尚穩固。惟忠逆之黨。偽愛王黃崇發等股。續渡九洲。陷李世忠部將陳自明營盤。浦口亦經失守。該逆分撲江浦橋林。圖竄西梁裕溪。再犯無為廬州。該大臣以南岸局勢較鬆。調劉連捷等營北渡。協守石澗埠及廬州等處。俟金陵戰守事宜商定。卽赴九洲。洲相度地勢。回舟西上。至蕪湖一帶布置。所籌均尚周妥。浦口被陷。江浦等處岌岌可危。李世忠自應親督兵勇。認真防勦。何以遠駐五河。任令匪蹤竄擾。實屬玩誤取巧。昨經諭

令該大臣傳旨申飭。並令調回衡陽各隊。將江浦縣城迅圖克復。著卽懍遵前旨。飭李世忠親赴前敵。奮勉圖功。儻仍前貽誤。卽行據實參奏。該大臣赴九洲後。著將詳細情形。及如何辦理之處。趕緊具奏。李續宜、江忠義均已疊次催令赴皖。該大臣卽派弁迎探商酌。會勦之策。由巢含遞遞而下。庶上下游一律穩固。迅奏膚公。用慰殷盼。將此由六百里諭令知之。○又諭吳崇奏攻克長城及孫疇等圩。擒斬首逆一摺。長城賊圩前據譚廷襄奏報攻克。並將殲除李城首逆。續行具奏。疊諭該署撫飭令黃國瑞移軍進攻沂沭賊巢。現在黃國瑞一軍勦辦得手。鋒勢甚銳。著吳崇卽飭該總兵乘此聲威。進攻寶泉峒賊圩。將沂郡巨匪先行翦除。卽由鳳凰山東南紮營。與西北充軍會合。四面夾攻。以期速殲巨股。毋稍延誤。卽家花園及孫疇賊圩。既經攻克。逆首任縛得正法。宿州一帶情形當已稍

鬆著吳棠卽飭黃開榜一軍將宿州未淨各
擒股迅速埽除毋留餘孽將此由六百里諭
令知之○又諭前據耆齡奏報克復永康武
義等縣情形當經諭以賊匪被勦時虞旁竄
其江西福建各隘口該督仍應處處兼顧居
中策應總以仍駐浦城為宜本日復據該督
奏報紹興府城克復蕭山踞匪渡江遠遁浙
東肅清皖南喫緊現在抽調各軍豫籌防勦
一摺耆齡現飭林文察一軍仍駐武義壯紹
郡之聲勢固台處之藩籬康國器等率各勇
移紮蘭谿以資防勦並擬將來雇募海舶添
造戰船循江而下駐紮蕭山一帶進攻杭城
東南與浙師西南會合以成夾攻之勢分兵
規取海甯海鹽聯絡上海官軍圖攻嘉興使
賊蘇杭中斷不能援應等語浙東軍務得手
杭城不難乘勢攻復惟逆首譚星一股由於
潛昌化竄入皖南必將勾結太平石埭諸賊
為患逆偽王黃呈忠亦由富陽渡江欲與李

秀城合勢北犯左宗棠飭令蔣益澧規取杭
州而催劉典一軍回嚴以向皖南並飭劉培
元等軍會合開化相機截勦及分紮淳遂之
衝茲據耆齡所奏亦稱蕭山踞賊渡江已由
富陽分水竄往徽州此時皖南及江西之廣
饒到處皆虞分竄卽閩浙交界處所亦不可
不豫為之防浙西地方如何規復一時尚難
豫定耆齡若移紮蕭山進規杭城則與福建
江西皖南相距寫遠設浙西之賊窺伺福建
等省必至援救莫及耆齡總宜仍駐浦城嚴
扼要隘是為至要所有閩軍進止機宜隨時
與左宗棠會籌妥辦毋稍疏虞將此由六百
里諭令知之○廣西提督馮子材奏請將革
職遣戍之副將陳步高暫緩發遣留營戴罪
效力允之○以山東攻克長城賊圩擒斬首
逆任縛得賞副將鄧得勝遊擊熊朝鑑巴圖
魯名號都司張保聖等花翎餘升敘開復有
差○以江蘇通州團練出力賞守備錢銓等

藍翎餘加銜升敘有差。○乙巳祭

先蠶之神。遣總管內務府大臣明善行禮。○

諭內閣。前因刑部奏情實人犯馬錫碌朝審

呼冤。當經派令瑞常會同刑部覆訊。茲據奏

稱。訊據馬錫碌供稱。咸豐八年間。該犯虧短

宇豐官號票存八十萬八千吊。於八九兩年

先後兩次繳過錢鈔等項。其時鈔票尚堪行

使等語。復經行查戶部。詢知該犯於八年十

一月間。繳過鈔票銅當十錢等項。其時九號

因係空鈔。未肯承領。經戶部飭令該犯換繳

延未領換。九年七月。該犯復以所繳空鈔。俱

已掣字入筒。又將掣字鈔及銅當十錢一併

領出。改換空鈔白鈔。交八十萬八千之數。並

未繳過實在錢文。而該犯任意狡賴。希圖搪

塞免罪。惟原案前由刑部定擬。此次翻異。前

供可否另派大員會同瑞常等覆訊。各等語。

馬錫碌虧短官款為數甚鉅。此次朝審翻供。

復敢將所交空鈔等項。捏詞抵賴。冀圖免繳。

實錢。實屬奸詐狡猾。若任令一味狡展。致使

欠款無著。而侵挪正項數逾億萬之犯。反得

任意宕延。此等刁風。斷不可長。仍著瑞常會

同刑部嚴加刑訊。勒令將虧短之項如數完

繳。再將該犯定擬。不得任令藉詞拖延。以懲

刁頑而重款項。○諭議政王軍機大臣等。前

因閻敬銘奏懇賞假營葬於本年春二月。即

行馳赴山東署任。當以東省軍務緊要。諭令

趕將葬事辦理。迅即前往接署撫篆。現已將

屆暮春。該署撫營葬一切計已早竣。且距二

月十七日。該署撫百日孝滿之期。為時又已

歷旬。尚未據報起程。現在山東軍務毫無起

色。兗沂一帶棍教各匪充斥。張錫珠股匪久

踞運河以東。近又分股回竄。直境擾及曲周

甯晉等縣。東省勦辦不能得力。則運河時虞

搶渡。畿輔之防日無暇晷。譚廷襄現駐東昌。

五日。京兆更慮呼應不靈。辦理殊形棘手。閻

敬銘務當仰體朝廷破格奪情之意。迅即馳

赴山東東昌府接署撫篆。將軍務事宜。妥為辦理。並將起程日期。一面馳奏。以慰廑繫。毋稍遲緩。將此由五百里諭令知之。○又諭都察院。奏甘肅貢生道以德等。呈訴回匪馬化澂糾黨焚掠。圍攻靈州。戕害官兵。慘殺百姓。提督定安。敗遁入城。以致賊勢復張。都司鐵秉忠。引來馬化澂戚黨馬承青等。聲言馬化澂已在固原投誠。該逆等雖假意輸誠。仍肆搶掠。其黨納青。汰赫。汶選。攻陷平羅之寶豐。石嘴山等處。河東河西。百十餘堡。悉成灰燼。若竟許馬化澂投誠。必至養癰成患。懇恩勦辦等語。前據恩麟奏。靈州回匪被勦窮蹙。乞降。當經傳諭該署督。令其責成。定安楊炳銓等。查明真偽。分別辦理。茲據該省貢生道以德等。來京滙訴。如果屬實。顯係該提督等任意粉飾。實堪痛恨。著恩麟查明。實在情形。儘回匪以就撫。為名。仍肆焚搶。卽應趕緊痛勦。不得遷就。貽誤慶昫。前奏由草地赴甯。

夏新任。現在已否起程。著卽馳抵任所。將前後情形。確查具奏。該貢生等。以垂暮之年。遠來呈訴。自係創鉅痛深。無門呼籲。恩麟。身任地方。責無旁貸。務卽督飭定安等。認真籌辦。如該回民。真心悔罪投誠。必應呈繳器械。遣散餘黨。方屬可信。若空言就撫。尚恐墮其奸計。該將軍等。固不可輕聽該貢生一面之詞。概行誅戮。亦不可於該貢生之言。漠不加察也。原呈著鈔給閱看。熊煥章。何勝。必二員。前諭賂秉章。飭令赴甘。本日據賂秉章奏。何勝。必現在敘南防勦喫緊。未能到任。已飭熊煥章。募足勇丁二千名。由白馬關取道赴甘。該總兵到後。恩麟等。察度何路軍情最緊。飭令駐紮何處。以資得力。將此由六百里諭知慶昫。恩麟。並傳諭恩麟知之。○又諭李鴻章奏。官軍籌援常昭。進紮福山。並崑太各路防勦情形。一摺。常昭縣城。雖經周興隆等同心固守。而忠聽各股援賊。圍攻兩月有餘。層

層阻隔。聲息難通。城中諸物缺乏。勢難持久。若非迅速救援。恐該降眾亦難苦守。常昭必至復陷。且此次周興隆等若因援絕受害。則以後如有真心反正自拔來歸者。未免中存疑懼。著李鴻章督飭水陸各軍分路進兵。設法救援。務使常昭縣城得以保全。方為妥善。該撫屬英國官兵。戈登添派隊伍。借買槍礮軍火。協勦。即著迅催該兵官趕緊備齊。馳赴福山。會合進攻。以解長城之圍。太倉崑山。為

蘇州門戶。極關緊要。現在蓬南石營既已築成。官軍追至崑太城下。雖該逆抵死抗拒。我軍已有難再撤退之勢。著李鴻章督率程學啟等軍。步步為營。以圖進取。務將戰守事宜。妥籌辦理。迅拔崑太。以通救援常昭之路。將此由六百里諭令知之。○又諭。路秉章奏。疊奉寄諭。縷悉覆陳一摺。並請飭嚴樹森親率各軍。馳赴陝南片石。逆自敗遁。滇境近復勾結滇匪。竄及川省之珙縣。高縣。興文。敘永。一

帶。又分股自窪烏司竄撲甯遠。川南自甯遠以至綦江。數千里間。節節須防。兵力勢難更議抽調。而陝省竄陷興安之匪。蔓延於平利。甄坪。紫陽等處。所在與川境毗連。仍虞其與洋縣。路匪勾結為患。川北僅有護軍。嚮導兩營防勦。總兵周達武一營現駐渠縣。為保甯綏定適中之地。上下策應。刻難責令越境進勦。尚屬實在情形。駱秉章以陝南軍務孔亟。查有候選員外郎李雲麟。現在鄂省。擬令帶

隊赴川。由該督撥添數營赴陝。李雲麟前經官文等奏飭。令與梁作楫兩軍嚴扼郿西二竹。以防為勦。此時如郿西一帶防務稍鬆。著官文等即飭該員就近越勦。並將梁作楫之軍一同派往。以厚兵力。三省會勦之事。前本以興漢地方緊要。諭令嚴樹森帶兵出省。馳赴秦鄂交界督辦。嗣據官文嚴樹森奏。自梁作楫一軍而外。穆正春等扼紮黃州。德安等處。嚴樹森並無一兵一將。堪以抽調。隨征。隻

身前往。無濟於事。現尚未能督師援陝。所籌諒亦實在情形。惟興漢為川陝楚三省連界。誠恐羣醜蔓延。勦辦愈形棘手。官文、駱秉章、嚴樹森等均能素顧大局。鄂省兵力如有可分。仍著隨時妥籌兼顧。卽周達武一軍。川省但能騰那。仍著駱秉章飭令赴陝。以期得力。總之陝省力難自振。漢南軍務紛如。必得川楚兩省協力相資。方冀廓清有日也。川南一帶。石逆窺伺分竄。敘南等處尤為喫緊。著駱

秉章督飭臬司劉嶽昭、總兵唐友耕等軍實力防勦。毋稍疏虞。將此由六百里各諭令知之。○又諭明誼奏行文俄國約期分界。妥籌防守。並查勘木房等情。各摺片。俄人蓄謀詭譎。必須杜其狡謀。豫為籌備。前經總理各國事務衙門將議覆西北兩路分界事宜摺件行文知照。明誼該將軍於接到行知後。卽行剴諭厄魯特、烏梁海等部落不得供俄人驅使。並不可貪利為所搖惑。嚴密設防。以備俄

人逞兵侵界。並行文科布多一體照辦。所籌甚屬妥協。卽著明誼隨時知照塔爾巴哈台一律辦理。以期撫綏藩服。同心禦侮。現據西悉畢爾總督衙門照覆內稱。必欲依該國使臣所指常駐卡倫為界。方令分界。使臣前來該將軍察度情形。仍行給與照會。咨行常清。令由伊犁就近交俄國領事官轉行西悉畢爾衙門。令該國分界大臣約定地方。訂期分路前來會議。俟該國照覆到後。卽由常清拆

閱。分路知照備辦。卽著照所議辦理。其所給西悉畢爾衙門照會據定條約。剖析詳盡。措詞亦頗為周妥。至蒙古兵丁若果與俄人爭戰。亦未見遽能得力。明誼惟當聯絡該部落藉壯聲威。俾俄人不敢遽萌輕視之心。仍當斟酌事勢。剛柔互用。毋使遽行決裂。是為至要。俄情多詐。每以虛聲恫喝。或未至遽行稱兵。明誼仍當嚴密偵探。有備無患。毋稍大意。庫什業圖地方所蓋木房二間。雖據委員拉

瑪扎布等查覆係為巡邏弁兵棲止而設並非俄夷所蓋惟恐尚有隱飾著仍飭該委員等詳細查明辦理錫霖現已赴任所有塔爾巴哈台分界事宜卽責令錫霖會同常清明緒辦理將此由五百里諭令知之○予江蘇福山陣亡千總袁定邦祭葬世職加等○予浙江新倉陣亡副將軍聯陞祭葬世職加等○蠲緩江蘇山陽阜甯清河桃源安東鹽域高郵泰東臺江都甘泉興化寶應銅山豐沛蕭礪山邵宿遷睢甯海沭陽贛榆通泰興靖江海門二十八廳州縣暨淮安大河揚州徐州四衛節年被災被擾地方新舊額賦有差○丙午諭內閣工部錢法堂奏寶源局續辦勦土請將滿漢監督獎勵等語此次寶源局續辦勦土煎鍊廢銅該監督等招商督辦雖屬著有微勞究係分內應辦之事且據援引上屆成案亦僅止於加銜何以不行照辦率請優獎豈以是區區者尚未足饜該局員等

干進之心耶文興係京察未經記名人員乃率請記名以道府用殊屬非是且與新章不符劉名馨係刑部員外郎向來由郎中截取者僅以知府簡用所請俟補郎中後作為二年期滿截取以道府用尤與定例相悖所奏著不准行工部兼管錢法堂事務署右侍郎阜保右侍郎吳存養均著傳旨申飭近來各衙門司員往往以辦公為夤緣保舉之券而各該堂官亦惟知以保舉見好屬員相習成風幾至不成政體嗣後各該衙門司員務各知立品自愛勿尚聲華各該堂官亦宜知慎重名器破除情面於屬員賢否覈實舉劾嚴絕干謁奔競之風以作人才而資治理將此通諭在京大小衙門堂司各官知之○又諭前因御史延椿奏參署直隸總督崇厚貪劣各款當經諭令董恂確查具奏茲據奏稱遵旨逐款詳細訪查如所稱崇厚前在道員任內迎接州縣往來宴會一節並無其事其任

內公事亦無貽誤及升任運司催科督運事
事認真實無舞弊營私情事調到奏銷原卷
覈與開報已完分數相符至所參撤兵逃避
一節亦係奉有欽差劄委並非聞警遠颺州
縣升遷調補以及委署一切皆係藩司主臺
原參所稱崇厚干預各情並無實據通商衙
門與藩臬鎮道文移統用平行崇厚在津於
道員李同文等均係隨到隨見並無守候多
時方能傳見之事至春霖護理總兵係由總

督奏准此外查無崇厚奏參冷慶之案又查
新鑄炸礮均係崇厚募匠親身督造外國官
幫同演試並無經手剋扣之人又查海防兵
勇口糧崇厚稽覈認真實未虛糜糧餉自設
防後逐日操演時常派出緝捕馬賊現又親
歷戎行隨時調遣尚非擁以自衛其文煜募
交天津府管帶之馬勇各州縣並未解過口
糧前任知府潘霽無從侵吞新任知府費學
曾亦無意欲稟揭之舉此項馬勇打仗尚稱

得力實無乞勾充數情事又查崇厚與許誦
恆係前後任運司各有應辦公件未聞有酒
食徵逐之事崇厚在津亦未聞有猝遭戲侮
各情所參驗貨遲延致商船不肯納稅實係
傳聞之誤又查孫竹堂卽孫士達所得官階
係由前督慶祺所保張汝霖之鹽運司銜係
由前督恆福所保均與崇厚無涉惟姚經陞
一員係天津開辦通商獎敘由崇厚奏准其
餘均係恆福等所保所參博多宏武等拜認

師生餽送節壽各情查無其事其於李同文
辦理支應覈實給發並無挑剔亦無請兵請
勇批駁不行之案所參買部民為妾一節查
係在清河道任內曾買天津張姓之女使喚
並非部民各等語崇厚被參各款既據董恂
調集案卷暗訪明查均無確據著無庸議又
御史曾協均亦以崇厚署任總督眾望未孚
臚款參奏與延楷所陳大略相同現在延楷
所參業經董恂查明未盡確實曾協均所奏

亦著無庸置議○又諭僧格林沁等奏遵旨將逆首張落刑等處死並續擒擒首多名一摺覽奏曷勝欣慰安徽擒首張落刑偏脅良民滋擾蒙亳等處曾受粵逆偽職罪大惡極不容稍稽顯戮前據僧格林沁於擒獲該匪後奏請解京處死當諭以安徽等處民情痛恨已極卽在該處極刑處死以快人心茲據該大臣奏稱遵旨將張落刑及其子濬兒等三犯在軍前極刑處死並傳首潁州地方洵足以彰國法而洩眾憤其孫臭卽孫葵汶並擒首姜台凌怙惡不悛屢抗官兵現據該大臣等一併極刑處死辦理均屬妥協所有逃逸之擒首蘇添幅劉銀卽劉養才胡四卽胡林彪伊中平四犯均係著名擒首糾眾擾害山東等處地方現在悉經僧格林沁等派兵擒獲一併正法其餘零星股匪均經隨時捕拏並張落刑等逆眷悉行正法鹿邑亳宿蒙城等處已無匪圩地方漸次肅清從此與吾

民共享昇平安居樂業著該管督撫慎選牧令薄賦輕徭刪除煩苛與民更始用副廛念殘黎至意○諭議政王軍機大臣等崇厚奏馬步各軍連日在肥鄉雞澤等處截剿竄匪並續有賊匪數千渡河在邱縣一帶游弋張之萬奏東匪竄偏大名河朔邊防告警派兵馳赴臨內一帶防剿各摺片張錫珠股匪先後由小灘渡河而西行將竄入直境現在賊勢蔓延官軍分投堵截大有應接不暇之勢自應酌度機宜先其所急或將雞澤肥鄉股匪剋期撲滅再行督率大隊兜剿廣平縣前股匪徒著崇厚會商恆齡激勵諸軍相機進剿崇厚現派威縣存城兵勇截剿邱縣竄匪並著嚴飭該員弁實力防剿毋得徒託空言致該匪乘間闖入劉長佑前已由天津啟行計日卽可蒞任該督久歷戎行聲威素著著卽馳赴軍營將現在馬步各軍申明紀律認真策勵俾將士人人奮勉痛殲醜類廓清畿

輔以副委任直省勦辦股匪得手勢必向東南竄遁豫疆東境正宜厚集兵力遏截賊蹤據張之萬奏匪蹤已渡河逼近大名楊長春駐防龍王廟隘口之軍已落賊後張之萬現派遊擊徐連陞等分帶馬步各勇赴臨漳內黃一帶會同楊長春等兩軍及各該地方團練扼要駐紮著卽嚴飭河北道周煦徵妥為調度如該匪竄近邊境卽迎頭截擊力保完善之區毋得稍有疏虞致干重咎上年十二

月初五日曾諭張之萬查明河北鎮牛浩然能否得力尚未據該撫覆奏實屬遲延本日該撫摺內有歸周煦徵調度之語其牛浩然現在曾否帶兵亦未之及該鎮究竟能否得力著仍遵前旨速奏山東股匪屢次西竄該省竟不能派一旅之師豫先攔截以至貽患畿疆殊屬可惡此後如該匪被勒回竄譚廷襄務當嚴檄各營會同直省官軍合力兜勦絕其歸路方可聚而殲旃永除後患儻該員

弁堵勦不力任令該匪來往自如必當重治其罪不稍寬貸將此由六百里各諭令知之○又諭僧格林沁等奏督軍清查寨圩及密籌駕馭苗練各一摺辦理均屬周妥鹿邑亳宿一帶已無匪圩亦無成股賊黨該大臣現飭派出之軍駐紮淝河以北清釐各寨搜捕餘匪自應趁此聲威淨絕根株惟張錫珠股匪又復分股竄入直境經恆齡等分投追勦而賊勢過重恆齡所統馬隊猶形單薄不能

制其死命總督劉長佑雖已到直既無親兵同來而人地又不免生疏恐難責效於旦夕該大臣提得勝之師剋期回東相機進勦聲威所播羣匪震懾自收事半功倍之效唐訓方旣得民心則蒙亳善後事宜卽可交該署撫辦理諒可悉臻妥協著僧格林沁於接奉此旨後將該處應辦事宜移交唐訓方籌辦卽行帶兵北上先勦除張錫珠各股匪以清畿輔門戶其汝甯捻匪如必須撥兵往勦並

著該大臣酌量情形。或挑選投誠馬勇千名。前往援助。以資協剿。苗沛霖自聞張落刑被擒後。驚慌失措。原不難於勦辦。第苗沛霖既面稟願散練歸農。釐卡歸官。自可趁此解散。消患無形。該大臣等所出示諭。甚屬周妥。洵為良策。即著照所議辦理。督飭各圩。散歸農畝。從此輕徭薄賦。生聚招集。庶吾民得以休息。各安生業。如有不遵諭示。藉端苛斂者。即從嚴懲辦。並著唐訓方督同馬新貽慎選牧令。勸課農桑。興起學校。以期共享昇平之福。毋令稍有滋擾。德楞額既查無逗遛情事。即著無庸置議。昨據譚廷襄奏長城孫疇等圩均已攻破。李城已為宿州人部向魁部貴等所殺。其首級現經解送該大臣軍營。部向魁等云。即係該大臣諭令黃開榜所募者。亦一快事也。將此由六百里各諭令知之。○又諭韓超奏。官軍勦辦思南等處賊匪情形。並貞豐回匪竄陷歸化廳城。旋即收復各一摺。思

郡河東鳳凰山大小垞等處。為匪徒巢穴。必須迅速掃蕩。方能節節進剿。著韓超飭記名總兵金太文等督率各軍奮力攻剿。盡殲醜類。其河西匪黨。復糾眾攻撲塘頭等處。以圖牽掣我師。印江並有分股竄擾。該署撫現添調騰越鎮總兵劉義方帶隊赴援。著即嚴飭該總兵會同各路兵勇。實力捍禦。毋致該匪紛竄。其貞豐之賊。分三路竄擾歸化。即係永甯。均形喫緊。雖歸化失而旋復。而賊股尚多。興郡尚未攻克。賊勢仍未少衰。著飭總兵趙德昌等軍會同各地方官。痛加勦洗。恢復興郡各城。毋再貽誤。致干重咎。至署歸化通判束燦南失陷城池。本有應得之咎。據奏該員調團克復。素得民心。即著照所請革職暫留署任。辦理善後防勦事宜。將此由六百里諭令知之。○河南巡撫張之萬奏。蘭儀儀睢。睢甯商虞曹考。五河廳業經裁撤。應將所屬十一汛州判。縣丞。主簿。巡檢等員。缺一併裁撤。

以昭畫一如所請行。○以安徽勦辦捻匪擒獲逆首張落刑賞台吉克興額諾林丕勒雙眼花翎章京那木薩賚扎布公銜太常寺卿恩承翰林院侍讀學士全順副都統舒通額蘇克金侍衛卓明阿章京薩音吉雅圖博勒霍委營總那遜蒙克黃馬褂侍衛托倫布隆春遊擊何建鰲營總達爾濟巴圖魯名號佐領富興知州李德均等花翎餘升敘有差。○以四川克復青神縣城並踴毀鐵山賊巢出力賞總兵官劉景春陳再益楊耀關二品封典王友勝蕭德見毛福益譚獻定劉維耕副將洪金元譚世魁蕭集山李啟貴毛芳恆蕭餘勝參將傅定陞劉厚基巴圖魯名號都司鄧玉恆等花翎千總張學謨等藍翎餘加銜升敘有差。○予貴州思南陣亡總兵官吳宏盛都司傅得勝祭葬世職加等。○予貴州龍里殉難署知縣鶴年祭葬世職媳那拉氏旌表如例。○蠲緩直隸安隆平天津三州縣歉

收村莊新舊額賦有差。

大清穆宗繼天開運受中居正保大定功聖智誠孝信敏恭寬毅皇帝實錄卷之五十九

大清穆宗繼天開運受中居正保大定功聖智
誠孝信敏恭寬毅皇帝實錄卷之六十

聖祖皇帝御製日講起居注上上卷之六十五
聖祖皇帝御製日講起居注上上卷之六十六
聖祖皇帝御製日講起居注上上卷之六十七
聖祖皇帝御製日講起居注上上卷之六十八
聖祖皇帝御製日講起居注上上卷之六十九
聖祖皇帝御製日講起居注上上卷之七十
聖祖皇帝御製日講起居注上上卷之七十一
聖祖皇帝御製日講起居注上上卷之七十二
聖祖皇帝御製日講起居注上上卷之七十三
聖祖皇帝御製日講起居注上上卷之七十四
聖祖皇帝御製日講起居注上上卷之七十五
聖祖皇帝御製日講起居注上上卷之七十六
聖祖皇帝御製日講起居注上上卷之七十七
聖祖皇帝御製日講起居注上上卷之七十八
聖祖皇帝御製日講起居注上上卷之七十九
聖祖皇帝御製日講起居注上上卷之八十
聖祖皇帝御製日講起居注上上卷之八十一
聖祖皇帝御製日講起居注上上卷之八十二
聖祖皇帝御製日講起居注上上卷之八十三
聖祖皇帝御製日講起居注上上卷之八十四
聖祖皇帝御製日講起居注上上卷之八十五
聖祖皇帝御製日講起居注上上卷之八十六
聖祖皇帝御製日講起居注上上卷之八十七
聖祖皇帝御製日講起居注上上卷之八十八
聖祖皇帝御製日講起居注上上卷之八十九
聖祖皇帝御製日講起居注上上卷之九十
聖祖皇帝御製日講起居注上上卷之九十一
聖祖皇帝御製日講起居注上上卷之九十二
聖祖皇帝御製日講起居注上上卷之九十三
聖祖皇帝御製日講起居注上上卷之九十四
聖祖皇帝御製日講起居注上上卷之九十五
聖祖皇帝御製日講起居注上上卷之九十六
聖祖皇帝御製日講起居注上上卷之九十七
聖祖皇帝御製日講起居注上上卷之九十八
聖祖皇帝御製日講起居注上上卷之九十九
聖祖皇帝御製日講起居注上上卷之一百

同治二年癸亥三月丁未朔

上詣綏履殿問

慈安皇太后安平安室問

慈禧皇太后安至丙子皆如之○以詹事府少

詹事桂清為詹事○戊申諭議政王軍機大

臣等有人奏知縣典史貪劣害民請撤任查

辦一摺據稱署羅山縣知縣周祜帶領書役

赴縣南各約挨戶勒派勇費凡於有糧各戶

勒借次年錢糧並於地方紳士應納糧銀外

多給糧條數倍勒向各戶轉散轉借約得制

錢一萬餘串盡歸私橐典史趙廷璽與該縣

係同鄉表親狼狽為奸請飭查辦等語州縣

為親民之官最關緊要似此貪墨虐民為害

地方亟應嚴行懲辦著張之萬將周祜趙廷

璽均即撤任提省按照摺內所參各款秉公

確查從嚴懲辦據實奏毋得稍涉瞻徇豫

徵次年錢糧一節斷不可行且恐不止羅山

一縣如此並著張之萬出示一體嚴禁該二

員所得保舉係因何案保奏是否捏報功績

一併查明具奏原摺著鈔給閱看將此諭令

知之尋奏遵查周祜趙廷璽於本境防堵擒

匪並未捏報功績亦未得有保舉至周祜被

參勒借錢糧各款俱無確據惟審理楊之懷

罪應擬杖之案任聽認罰究難辭咎請交部

議處趙廷璽查無代理詞訟受賄詐贓情事

應免置議至豫徵錢糧重干例禁現經一體

嚴行禁止從之○又諭譚廷襄奏官軍勦撫

蘭費圍寨並進攻中村幅匪截勒教匪各情

形一摺。據稱蘭費匪圍。經譚廷襄督令奎芳及知縣長賡王成謙等疊次攻克。不下二三十處。現在進攻費縣之梁邱關。陽由吳岵及蘭山之磊石圍等處。疊有新擒黃國瑞之軍。復將朱柳莊匪圩攻破。各匪爭自投誠。黃國瑞現攻中村踞匪等語。即著譚廷襄督飭黃國瑞等速克中村。以次進攻梁邱寶泉峒及鳳凰山賊巢。並飭恩錫等迅將嶧山教匪夥黨設法進攻。掃除羣醜。其投誠之宋斌。宋三

岡萬家生等。兇狡之徒。固不可靠。即張芳義杜鳳儀等。亦須察其誠偽。毋得任令各該文武輕率受降。致日後頻多反側。淄川近日軍情如何。著查明速奏。續派之曾逢年。聞其年老不能乘騎。究竟帶兵能否出力。著一併迅速覆奏。另片奏近日河東張錫珠股匪。疊被勦擊已極窮蹙。現在河東冠館一帶。並無大股。河西徐村一帶。僅聞尚有敗匪。當可迅就廓清等語。與崇厚近日奏報情形殊多歧異。

崇厚近日奏稱東匪分股竄至雞澤肥鄉。經恒齡等分兵兜勦。又東省續有敗匪數千渡河在邱縣一帶游弋。此次譚廷襄摺內並未提及於河西情形全形隔膜。恐僅據各屬及帶兵員弁稟報之詞。枝梧搪塞於地方賊情並未確加偵探。昨經寄諭該前撫等以山東股匪屢次西竄。該省總未能豫為攔截。飭令此後如賊被勦回竄。務當嚴檄各營會同直省官軍合力兜勦。著譚廷襄懍遵前旨。嚴督

所屬實力辦理。並將賊情確探與劉長佑等隨時聯絡聲勢。毋致此拏彼竄。任令逆蹤延蔓。自干咎戾。將此由六百里諭令知之。○己酉諭內閣吏部奏請將漏未移付之司員嚴議一摺。前因平瑞奏前任烏嚕木齊都統法福禮奏寶迪局鑄額加增請獎出力人員各案尚未接准部覆。當經降旨令戶部迅即查覆。茲據吏部奏稱查戶部議覆原文兩次知照。考功司應由該司移付文選司呈堂辦理。

乃該司員等僅將遣戍釋回之員先經辨結而於應行議敘各員漏未移付以致事隔年餘尚未議覆實非尋常疏忽可比請將經手遺漏之司員嚴加議處等語各衙門交議案件曾經諭令妥速辦理逐日清釐毋任稽壓此案吏部考功司司員於戶部議覆烏魯木齊請獎原文時閱年餘並未移付文選司覈辦雖據聲稱並無別項情弊實屬遺漏疏忽所有經手遺漏之司員著交都察院查取職

名嚴加議處以示懲儆因思各衙門應辦案件似此等遺漏之處仍必不少著各衙門堂官督飭司員悉心查覈趕緊清釐毋得稽延干咎經此次申諭之後儻仍前因循玩誤任意延閣或為書吏蒙蔽不能破除積習認真整頓必當從重懲處毋謂不戒視成也○又諭禮部奏舉人到京已逾覆試之期可否照上年成案先行會試一摺江西舉人臧淵雅等於去歲十二月由本籍起程赴京覆試本

年二月二十八日始行到京已逾覆試之期係因道途梗阻並非有心遲誤所有江西舉人臧淵雅等著仍照上年成案准其先行一體會試俟場後再令補行覆試如其中有應行罰停會試者即由禮部知照知貢舉將該卷扣除此外各省如有續到者均准其一體辦理嗣後道路疏通仍不得援以為例○諭議政王軍機大臣等張之萬奏東匪竄偏臨漳續派新募楚勇迎剿並會毛昶熙奏豫擒

竄偏楚疆現與楚軍會剿各一摺前因直省東匪被擊南竄當經諭令張之萬等以賊南竄正當豫疆即嚴飭河北文武探蹤迎擊力保完善茲據奏稱賊已竄近臨漳副將楊長春於張里集迎頭截擊屢卻賊鋒聞東南一帶喊聲賊馬盡向東南狂奔旋又有馬賊繞出臨漳之南張村集竄至三台駐紮及由曹村孫陶各口直撲河岸並有步賊數百潛蹤偷渡均經河北地方文武悉力堵禦河北邊

防。僅隔漳河一水。亟應竭力嚴防。豫省各軍分勦陳大禧及正陽新蔡項城各路之賊。均屬不能抽撥。著張之萬督飭楊長春與遊擊徐連陞等兩軍併力堵勦。與直隸省渡河追勦之軍會合兜圍。將股賊速行殄滅。並催令參將敖天印所帶新募楚勇星速馳赴河北地方。以厚兵力。劉長佑計當到營。著卽督率諸軍將河西股匪迅圖勦辦。飭令渡河追賊之軍跟蹤緊躡。僧格林沁何日可由淮北啟

行。此時如由亳州北來。正可迎勦河朔竄匪。著卽一路探蹤攔頭勦擊。河朔接壤晉省。如果南北兩面勦賊喫緊。恐賊鋌走橫逸潞澤一帶。並著英桂豫為嚴防。飭令各該地方認真備豫。毋或疏虞。陳大禧以漏刃餘生。勾結毫捻。被汝軍於張岡勦敗之後。鋌險南竄。余際昌一軍由白雀園虎頭關節追勦直至麻城縣境。辦理尚屬得手。張之萬早經會鄂省派兵兜勦。本日嚴樹森所奏總兵楊朝

林卽係駐紮麻城。業經諭令該撫速飭迎勦。如其兵力尚單。卽令添兵協勦。仍著張之萬飭令余際昌乘勢進擊。與楚軍前截後追。諒此敗殘餘匪不難一鼓殲除。第須將其全股殄滅。渠魁擒戮。毋任再行漏網。復滋延蔓。信陽州之明港驛業經收復。所有該州應行修復驛道買補驛馬之處。著張之萬飭屬迅速辦理。並飭確山遂平郟城臨潁等縣一體遵照。信陽地方被賊蹂躪。如須酌予津貼。或暫

時借撥經費。在後籌還。歸款均卽酌量辦理。總期往返迅速。有裨軍務。正在寄諭間。崇厚奏報南竄股匪追過河東。其北竄股匪並續經渡河之賊已竄至南宮冀州之間。一摺。河西軍務竟屬毫無布置。劉長佑到營後。著將馬步各軍迅速調度。確探賊蹤。究有幾股。督率進勦。嚴扼北路之防。其竄徧豫境賊股諒卽徐廷楷所跟追之由西南竄逸一股。仍卽飭令該總兵實力追擊。與豫省之軍會合兜

勦僧格林沁素顧大局著卽趕緊北上沿途偵探何路緊急卽向何路迎勦邱縣之賊又已竄渡河西應令山東省如何聯絡堵截之處並著僧格林沁劉長佑等隨時咨會譚廷襄併力辦理將此由六百里各諭令知之○又諭嚴樹森奏親赴下游查閱營壘並豫擒竄擾光山鄂北喫重各摺片前因皖北軍情喫緊已令嚴樹森暫緩興漢之行現據該撫奏稱忠逆大股由九狀洲陸續渡江一竄六合等處一竄和含擄糧之賊已至廬州之柘皋店埠一帶又據探稱李世忠駐防九狀洲營壘被陷現在該逆圍攻江浦橋林圖撲西梁裕溪再犯無廬等語與前日曾國藩所奏情形大略相同皖北舒廬潛太一帶處處空虛鄂防甚關緊要該撫已於二月二十四日起程親赴黃州府屬之上巴河查閱前敵營壘卽著妥為布置飭令駐紮之穆正春王桐柏等督率各軍嚴密防範毋稍疏虞並一面

知照李續宜迅速起程赴皖相機防勦毋再延誤湖北武闡鄉試主考事宜卽著官文入闈辦理至陳大喜句合毫捻南竄本日據張之萬等奏到該逆在光山縣境經余際昌連日督軍馳勦擒斬約以千計現已竄至麻城縣境期會楚師前後夾擊等情此股逆匪行蹤飄忽來往楚豫之交已成熟徑若得楚軍邀其前豫軍蹙其後敗殘之匪何難一網殲除本日已諭張之萬飭令余際昌一軍越境追勦並著官文嚴樹森督飭駐紮麻城之總兵楊朝林督率防兵前後夾擊如兵力不敷卽著速行添調馳往協勦務將此股賊匪就地殲除免致蔓延腹地嚴樹森俟下游布置稍定卽著取道麻城一帶將會勦事宜妥為籌辦毋誤事機其姜台凌一犯業經僧格林沁生擒正法該撫所稱與陳大喜合股之毫捻姜台凌是否另股託名並著偵探明確實力勦辦將此由六百里各諭令知之○又諭

吳崇奏酌留徐宿防兵。飭黃開榜仍回高郵。並撥隊前赴蘭郟。一摺。宿州永亳一帶。雖經肅清。惟徐宿地方。界連四省。民風素稱強悍。自應酌留隊伍。以資彈壓。吳崇現擬留馬步三千名。派副將姚廣武統帶。往來徐宿。照舊巡防。著卽照所議辦理。髮逆渡江。甚眾。淮揚一帶。防務喫緊。該署漕督。已令黃開榜酌帶所部。折回高郵。以重湖防。務當慎重防維。毋稍大意。沂蘭一帶。與海贛地方毗連。非將該

處匪圩掃除淨盡。則江南連界地方。勢難靜謐。吳崇現擬於徐宿軍內。抽撥往助。並交黃國瑞統帶。攻勦中村。先將蘭費圩匪節節剪除。再行會合山東兵勇。攻勦克屬。昨譚廷襄亦奏稱。擬令黃國瑞進攻中村。曾經諭令該前撫督飭黃國瑞。速將該圩克復。以次進攻梁邱寶泉。峒及鳳凰山賊巢。並著吳崇卽飭黃國瑞節節蕩。迅速殲除。惟江北情形。勢甚喫重。黃國瑞一軍。應紮淮沂一帶。交界地

方。不可深入東境。恐至腹背受敵。且與清淮相距日遠。勢難兼顧。有人奏請停止江北畝捐。一摺。據稱此項畝捐。從不造冊報銷。戶部無從稽考。又山陽縣捐挑市河。有地方官嚴刑追比。帶勇威脅情事等語。江北畝捐。前據吳崇奏稱。勢難驟停。惟所收捐項。總須覈實開銷。該署督於收捐動用數目。何以並不報明。一味顛頑。致令戶部無從稽考。著卽速行造冊報部。其釐捐等項。收發數目。亦著一併

詳細造報。以憑稽覈。毋許遲延干咎。其勒捐追比。及帶勇威脅之地方官。並著嚴行查叅。原摺著鈔給閱看。將此由五百里諭令知之。尋奏遵查畝釐各捐。均係列入糧臺收款。曾於上年十一月間。專案報部。至山陽縣捐挑市河一案。現未舉辦。並無勒捐威脅情事。請免查叅。下部知之。○又諭張亮基奏苗教各匪竄擾。遵義桐梓督兵進剿。擬由開道赴黔。一摺。張亮基由川赴黔。行至松坎。探聞白號

教匪及苗匪圍攻桐梓縣城分踞元田壩等處由遵義進省之嫩板磴等處亦有黃號教匪及苗匪紮營阻道該前督飭楊發貴等帶兵一千名率桐梓各團練丁數千人並調副將張開友分路攻勦且戰且進如勦辦需時擬由間道赴省所籌尚屬妥協著卽督飭楊發貴等激勵團勇奮力進勦務將驛路節節疏通取道前進貴州地方緊要韓超一籌莫展張亮基必須迅赴省城接署撫篆將交查交辦各案妥速籌辦以副委任如桐梓等處賊勢過眾暫時不能辦結卽由小路探蹤前進毋稍遲誤勞崇光現已行抵何處曾否到省連日未曾得其奏報並著張亮基探明馳奏將此由六百里諭令知之○以河南正陽攻克賊寨擢守備王文行以遊擊用並賞花翎○賞廣東等省壬戌恩科鄉試年老諸生陳大年等七十人舉人副榜有差○庚戌諭內閣前因羅惇衍保奏雲南鹽法道吳惠元

請留於直隸差委曾經降旨令吏部帶領引見茲據羅惇衍奏吳惠元聞已起程可否仍留直隸差委抑令赴任等語吳惠元係實任人員現在旣已起程著卽迅赴雲南鹽法道本任毋庸調取引見○又諭譚廷襄奏溜川路匪旁竄請將截勦不力之副將等革職留營等語副將春祺等帶兵勦辦溜川路匪並不實力合圍致賊匪潛由東關竄出繞越該副將等營盤又不奮勇截殺任令賊匪回巢縱賊失利實堪痛恨譚廷襄請將統帶不力之膠州協副將春祺都司王宗元暫革留營之處不足蔽辜春祺王宗元均著革職拏問交譚廷襄嚴訊懲辦○諭議政王軍機大臣等瑞麟奏請開墾圍場閒地以資接濟並繪圖呈覽一摺熱河駐防旗兵所需俸餉因庫款支絀未能按月支放眾兵時虞困乏自係實在情形所籌招佃展墾荒地以濟兵食自屬可行著照該都統所擬將圍場四面邊界

荒地八千餘頃。展出開墾。其押荒升課章程。卽著妥議具奏。但事當創始。必須妥籌盡善。方可有利無弊。尤須不避嫌怨。認真興辦。所有此項荒地。著招募家計殷實。素業稼穡之人。具呈認墾。不准濫招無業游民。致滋流弊。尤須畫清界址。不准越墾。以息爭端。其與民地毗連者。並當禁止侵占。方可日久相安。紅椿以外。前墾兵租地畝。歷年較久。越墾成熟之地。竟至數百頃之多。著勘定界限。安設卡

倫。以杜侵越之弊。圖內所指伊親王地。係何項地畝。於此次開墾荒地。有無妨礙。並著查明具奏。圖留覽。將此諭令知之。尋奏遵查。正黃旗西北邊界。有怡親王荒地草廠。與此次開墾並無妨礙。至所指伊親王係前次傳聞之誤。報聞。○又諭譚廷襄奏河西敗匪回竄。截剿獲勝一摺。前因東匪疊次西竄。譚廷襄一軍總未能豫為攔截。諭令嚴督所屬實力兜剿。並因該前撫奏報情形。與崇厚所奏殊

多歧異。復諭令確加偵探。不許枝梧搪塞。此次西竄股匪。雖經恆齡擊退。回竄河東。惟據崇厚奏大股東匪陸續渡河。已竄至南宮冀州之間。是賊勢並未少挫。乃本日譚廷襄摺內。僅據保德等稟詞。輒稱河西敗賊疊被官軍痛剿。或全股殲滅。或分路逃匿。勢極窮蹙。等語。該前撫帶兵日久。於軍情賊勢。並不留心籌辦。於竄往直隸之股匪。亦置之不議。但憑稟報之詞。鋪敘零星。斬獲以自了門面。無

怪乎迄無成功也。嗣後務當嚴督所屬實力偵探。遇有回竄賊匪。嚴飭各軍痛加剿洗。截其西竄之路。儻敢仍前疲玩。賊去則以鄰為壑。賊回則捏報勝仗。致誤戎機。惟譚廷襄是問。將此由六百里諭令知之。○又諭前因進剿信宜縣陳逆之卓興等軍。不可無大員統率。諭令崑壽馳赴高州。督率卓興方耀兩軍。剋日殲除陳逆。該提督接奉前旨。計已出省督剿。著卽嚴飭在事將弁。奮勇前進。務將積

年巨憝一鼓殄除。毋稍遷延。致滋延蔓。前據劉長佑奏。新甯縣東西兩路客家勾結匪類。焚掠廣海寨。嗣據晏端書奏。土客之禍。始於肇屬恩平。現在縱橫八九縣。焚殺不已等語。該土客居民仇讐已深。必須懾以兵威。方可逐漸解散。劉長佑前派臬司吳昌壽副將衛佐邦帶勇數千。前赴新甯妥辦。著卽責成。該臬司等分別良莠。持平辦理。如敢恃眾抗拒。無論為土為客。卽督兵進剿。大加懲創。俾兇

頑知所做畏。被脅良民。可以聞風解散。休致臬司張敬修。籍隸廣東東莞。該縣鄉勇素稱强悍。著晏端書黃贊湯檄令該臬司迅卽調集本縣鄉勇數百名。相機援應。以助官軍。所不逮。粵東本富庶之區。籌解庫儲。接濟他省軍餉。均關緊要。若高州賊匪及肇廣土客互鬪之案。不能迅圖辨結。將征勦靡有已時。餉需必至匱乏。晏端書黃贊湯身膺重寄。均屬責無旁貸。務當通盤籌畫。實力整頓。任用敢

戰之將。俾該省軍務日有起色。殲除醜類。靖海疆。方為不負委任。將此由六百里各諭令知之。○賞郭爾羅斯扎薩克鎮國公嘎爾瑪喜底花翎。在乾清門行走。○以截勦竄匪不力。革山東軍營騎都尉王汝忠千總王世俊把總王慶清等職。仍留營。○辛亥。諭議政王軍機大臣等。御史福寬奏。逃兵不法。請飭嚴密查拏。一摺。據稱馬兵張恩前經僧格林沁帶往軍營。旋即逃回。現在京西蕭家河地

方居住。綽號小霸王。張三多行不法。膽敢窩藏奸宄。夥同搶劫。安河倉米行蹤詭秘。聲勢甚大等語。兵弁潛逃。本干例禁。復敢糾眾妄為不法。已極。著步軍統領衙門迅派明幹員役密速掩捕。務獲懲辦。毋得稍露風聲。致令遠颺。別滋事端。原摺著鈔給閱看。將此諭令知之。尋刑部奏。准步軍統領衙門將張恩拏獲解部。訊無夥。搶倉米情事。惟前經僧格林沁派令守城。輒敢乘閒潛逃。應按例擬斬立

決業經病故。應無庸議。從之。○補鑄福建泰甯縣知縣印信。從巡撫徐宗幹請也。○以縱勇滋擾浙江護總兵官遊擊黃載清革職訊辦。○壬子諭議政王軍機大臣等劉長佑奏在途接印日期及現在勦辦大概情形一摺。劉長佑於三月初三日在衡水地方接印任事。恆齡等軍據報擊賊獲勝。現追至東鹿所屬之智邱村。該督擬一面激勵將士。速籌兜勦。一面馳赴威縣軍營。察看地勢賊情。並即

酌帶馬步小隊會督勦辦。所籌甚是。著即照所議妥為部署。如賊匪分股狂竄。當豫計匪竄之路。調派各軍暗為兜截。並飭令王榕吉督率鄉團嚴密防勦。毋任再有紛竄。其劉策先、余承恩等如果尚能得力。亦須授以機宜。洋槍隊及鄉團素稱得力。宜設法策勵調遣。至賊匪股數有幾。每股若干人數。其由某處竄至某處者。股匪係何人為首。均著詳細查明具奏。寶山所帶之兵與直隸各軍均歸劉

長佑節制。該督其中申明軍律。殄茲羣醜。繼靖畿疆。以副委任。將此由五百里諭令知之。○以工部尚書李棠階為會試正考官。都察院左都御史載齡單懋謙。戶部左侍郎沈桂芬為副考官。○以吏部尚書朱鳳標兼署工部尚書。戶部尚書羅惇衍。刑部左侍郎靈桂兼署都察院左都御史。工部右侍郎吳存義兼署戶部左侍郎。管三庫事內閣學士殷兆鏞暫署兵部右侍郎。○以鑲黃旗漢軍都統春

佑署正紅旗漢軍都統。○賞鴻臚寺卿常明頭等侍衛為喀什噶爾辦事大臣。○癸丑諭內閣。都察院奏奉天生員秦福慶以堂叔胞弟殉難請卹。並懇投效等詞。赴該衙門呈訴。前因署直隸大順廣道秦聚奎在桑阿鎮地方勦賊陣亡。當經降旨優卹。茲據該故員堂姪秦福慶呈稱。該故員死事情形受傷甚慘。並伊胞弟第六品軍功生員秦福泰隨同秦聚奎勦賊被賊砍剝。同時殉難。陣亡兵勇家人

等一百餘名等語。秦福泰等同仇殺賊力竭捐軀。洵屬深明大義。殊堪憫惻。著劉長佑將秦聚奎死事情形再行詳查。及軍功秦福泰等同時陣亡各情。一併查明奏請議卹。至該生秦福慶因堂叔胞弟均被賊害。呈請投效軍營。勦賊復讎。自屬激於義憤。秦福慶著卽准其前赴劉長佑軍營效力勦賊。○又諭前因玉明等奏坐補承德縣知縣奎壽在昌圖廳任內拏獲鄰境盜犯多名。當經降旨將該

員免補原缺。以同知不論班次遇缺先補。用茲據和潤奏稱該員任內僅獲王蒞等三犯。內惟王蒞一名係鄰境盜犯。其索吉順等四犯拏獲均在該員未經到任之先。且原詳該犯等均係昌圖廳民。具詳後又改寫東遼外民。顯係有意捏作鄰境盜賊。意存蒙混。請撤銷奎壽保舉查辦等語。奎壽前次獲盜案內所得保舉著吏部查明卽行撤銷。其如何捏改詳文蒙混邀功之處著交和潤德椿秉

公查辦。務得確情定擬具奏。尋奏遵查該犯等籍隸昌圖。曾在廣甯開原地方搶掠。實係昌圖鄰境。其東遼外字樣係從前幕友筆跡。覈與保案無足重輕。尚無捏改蒙混等情。惟獲盜日期在奎壽到任之先。前任兼尹倭仁府尹景霖將奎壽奏保係屬錯誤。應請交部議處。從之。○諭議政王軍機大臣等。前署大順廣道秦聚奎督帶兵勇追勦張錫珠股匪。在桑阿鎮地方力戰陣亡。前已有旨將該員

交部照道員陣亡例從優議卹。現據秦聚奎之姪秦福慶呈稱當時隨同陣亡者尚有隨員蒯遐齡、蔡玉麟及伊胞弟秦福泰並兵勇家人標手等共有一百三四十名。又總兵伊綿阿帶兵一千名。於秦聚奎被賊圍困時相去三四里。並不援救等語。著劉長佑將秦聚奎死事情形再行詳查。其秦福泰及隨員蒯遐齡等並兵勇家人標手等陣亡姓名一併查明。速行奏卹。以慰忠魂。至地方文武會辦

勦捕事宜。往往文員帶兵前進。而將弁反擁兵在後。觀望不前。以致失事。深堪痛恨。並著劉長佑將伊綿阿擁兵不救情形。嚴切查明。據實奏請懲辦。以肅軍律。毋稍徇隱。至桑阿鎮係賊匪老巢。前於秦聚奎帶兵勦捕時。童穉婦女皆執木掀埽。揚土助賊聲勢。非痛加勦洗。不足以儆兇頑。而正人心。著劉長佑確切查明。如果屬實。卽行派兵力加埽除。以靖逆氛。而除後患。原呈二件。著鈔給閱看。秦

福慶投效軍營。能否得力。並著劉長佑隨時察看。酌量去留可也。前因王恩第通賊。疊經諭令文煜崇厚訊明正法。嗣據崇厚奏稱。王恩第所部人數甚眾。未便輕動。請暫緩正法等語。王恩第甘心從逆。罪不容誅。豈可令其幸逃法網。崇厚人本怯懦。閱歷又淺。恐其中存畏葸。該督久歷戎行。自能將此案密速籌辦。著仍遵疊寄文煜崇厚諭旨。將王恩第通賊之事。訪查明確。斟酌辦理。該督務當不動

聲色。密益加密。毋得稍有漏洩。致誤機宜。知縣李鴻塤把持營務。諱敗為勝。濫收降眾。殺害良民。大名鎮標官兵滋事。冀州牧丁學易雖經崇厚奏參。尚有應查之款。著冀州牧裴姓亦有被參各款。均經諭令交文煜崇厚查辦。未據覆奏。均著劉長佑秉公分別遵照。前奉諭旨。次第查辦。迅速具奏。此外寄諭文煜崇厚查辦各案。著一併檢查原卷。次第奏結。宋景詩狼子野心。反覆無常。實屬意中之事。

劉長佑務當時時嚴防。妥為駕馭。不可稍涉大意。將此密諭知之。○又諭曾國藩奏由金陵回皖沿途查閱近日軍情。暨密陳可懼可喜數端各摺片。逆賊續陷江浦縣城。新河口營壘。迤邐西竄。巢穴全椒之閒。九洲逆壘尚未攻克。賊蹤分竄江北。時切隱憂。曾國藩所奏賊將分黨一攻西梁山。無為州。以取廬和之米。一攻蕪湖金柱關。以取甯太之米。欲還賊踞舊地。以保金陵巢穴。逆情詭秘。不可

不防。至金柱關。徽州青陽休甯紛紛告警。該大臣已令鮑超等軍分道馳援。著卽與左宗棠所派劉典之軍會合。攻勦保全徽境。並與江省隨時聯絡。以杜賊黨竄越之路。其劉連捷毛有銘等營分紮地面甚寬。務與西梁山運漕鎮及無為廬州竭力固守。俟李續宜江忠義到皖。兵力較重。再行相機進取。至池州兩岸及西梁山。大勝關等處。難民編葦而棲。析骸以食。死亡灰燼之餘。不堪目擊等情。閱

之殊深憫惻。如有可為倡率捐賑之處。卽著該大臣酌量辦理。以蘇殘喘。其賊中之食。及羣酋漸不相能。勢將變為流賊。更難收拾。原在意計之中。若無撫綏安定之方。終是不了之局。此時惟有將皖南北已克各要地嚴密守備。毋令復為賊有。仍俟李續宜江忠義到皖。再圖節節進取。至所稱逆賊日將渙散。其如何招撫之處。該大臣諒已早有辦法。刻下賊勢旣形渙散。卽可乘機辦理。不必待金陵

克復以後。饒景發源賊蹤。必將竄擾。該大臣已知照沈葆楨。豫為防範。諒該撫必能以全力共維危局。惟裏下河一帶。係江北膏腴。賊所垂涎。疊經諭令都興阿富明阿吳棠竭力防維。諒能不至疏懈。該大臣如有所見。仍著飛速知照。都興阿等。俾得先事綢繆。保全完善。李世忠失陷江浦後。自往五河。並不回顧。其桀驁情形。終難相安無事。該大臣旣知其部卒疑貳。激變亦不足慮。業將革留諭旨宣示。俟李續宜等軍合攻江浦。其應如何嚴叅懲究之處。惟在該大臣相機辦理。此間不為遙制。本日都察院奏道員吳文錫遣抱告。以應詔陳言等詞。赴該衙門呈訴。披閱所陳。大致在請辦鹽餉。以濟軍需。減釐捐。以蘇民困。卽著曾國藩將該道員所陳得失利弊。詳細酌覈。是否可行。奏明辦理。原呈著鈔給閱看。將此由六百里各諭令知之。○予江蘇等省軍營陣亡傷亡副將王友勝等一百三十九

員祭葬世職加等○追予安徽祁門殉難知縣唐治建立專祠巡檢鍾普塘附祀○予安徽舒城合門殉難監生韋斌等六名口分別旌卹並立祠建坊如例軍功韋恩義等男婦一百四十七名口一併附祀○予江南各屬陣亡殉難紳民婦女五百八十二名口分別旌卹如例○甲寅諭議政王軍機大臣等前因多隆阿於攻克王閣村羌白鎮後患病請假半月當經降旨寬予假期以示優眷迄今

已近兩旬該大臣自當乘得勝之機攻克倉頭鎮肅清東路以顧西安以西而至今並無捷報殊深懸盼現在倉頭鎮何日可以攻克自西安以達潼關大道已否疏通西安防守情形如何雷正綰病體已否痊愈是否前赴藍鄂追剿曹逆抑赴鳳翔援救鳳郡情形能否稍鬆副將王夢麟能否得力咸陽一帶軍情若何髮逆由漢陰石泉西竄究在何處固原失守以後回情是否猖獗瑛榮形同木偶

無足深責該大臣身任統帥全省均歸統轄朝廷宵旰焦勞日昃不遑體諒臣工無日不以為念該大臣感激知遇自當力圖埽蕩豈得稍自暇逸或與在事文武稍存忌克之心不能和衷共濟以致軍務不能迅速蕘事殊非朝廷委任之意著多隆阿將近日進兵情形並垂詢各情詳悉覆奏以慰廑念聞王閣村羌白鎮克復時於地窖中挖掘銀三百餘萬兩黃金六萬兩朝廷惟以拯民水火為急

原可置之不問第此項銀兩若不分給有功將弁兵丁則無以鼓其奮勇之氣而該兵丁挾此重貲恐意存已滿不肯力戰或紛紛挾貲告假回籍大非朝廷優待勇丁之意並著該大臣據實具奏毋稍隱飾將此由六百里諭令知之○又諭熙麟奏馳抵慶陽察看回勢滙陳籌辦情形並設法安置塘汛密速運餉各摺片熙麟行抵慶陽本擬進攻固原而瓦亭峽等險隘悉為賊踞熙麟僅帶黃得魁

等數百兵勇勢難冒險前進該督因奉有解散脅從諭旨遂擬作定勝二說講解一篇一併張貼曉諭予限四十日令各處回眾一律輸誠值此進退維谷之際權宜辦理亦是應變之法惟該回未受懲創恐非虛聲所能懾服且轉瞬限期將屆萬一該匪負隅如故而各路援兵未集我軍虛實為賊所知則情見勢絀更難措手熙麟前調延綏鎮兵一千名現在已否到齊歸化城兵計已起程著該督迅催前進並飛調各路援兵齊會慶陽相機進剿攻破瓦亭峽口以通大路庶可迅赴固原不至日久延蔓至平涼府城既未被圍回蹤現在虜集何處其平涼收存協餉既擬陸續運回慶郡總當督飭地方官弁嚴密運送毋齎盜糧前據恩麟奏回目王大桂等真心投誠又據貢生道以德等呈訴馬化澄匪黨納青汰等勢甚猖獗等語此次熙麟摺內所稱王大桂已稱偽號是否即係前次投誠之

人至降賊知州馬文偉開門迎賊實堪痛恨其納姓回子是否即係納青汰等一股並著查明覆奏甘省兵單餉絀而回種之繁十倍他省該督現在辦理苦衷朝廷自能洞悉該督惟當通盤籌畫計出萬全以副委任將此由六百里諭令知之○又諭沈葆楨奏法國傳教士羅安當到潯現飭九江道將應給該教士賠款五千兩就近提銀交付其吳城地基亦由該道轉飭該同知遵照辦理惟據南昌縣呈驗通衢揭帖有四維不日來省商集照前議行事等語羅安當上年到京經總理各國事務衙門再三開導令其暫緩回江該教士堅執不從止得准其前去復諭令官文於該教士到漢口時設法挽留該教士並未謁見官文現已由湖北護送到潯是其即欲晉省已可概見沈葆楨令九江道付給賠款吳城同知照給地基若該教士聞知省城物議紛騰自知慎重不即赴省該撫自可相機

辦理。如果執意前來。沈葆楨務當遵照和約。熟籌妥辦。揣該教士晉省之意。無非欲謁見大吏。以為體面。遇有與地方士民交涉事件。隨時可以稟明剖斷。該教士如果安分傳教。該省士民亦何必無故尋釁。致滋事端。如該教士藉傳教為名。陰行不法。或干預地方公事。該撫卽據實咨明總理各國事務衙門。會同該國公使懲辦。總之與外國交涉事件。一切須持平辦理。該撫斷不可稍存成見。致有

偏抑。現在軍務方殷。沈葆楨務當仰體朝廷不得已之苦衷。曉諭紳民。權宜時勢。如該紳民不遵約束。恃眾滋事。是止知逞忿沽名。不知顧全大局。必至又生枝節。沈葆楨身膺疆寄。不為一己利祿計。獨不為國家時勢計耶。該撫其妥為綏輯。務使中外相安。為要。沈葆楨奏。逆匪圖犯江境。嚴飭各軍扼守。以杜寬越等語。昨據曾國藩奏。浙東之匪無巢可歸。蓄意就食江西。該大臣業經玉致該撫。豫為

防範。卽著速飭各路帶兵員弁認真扼截。毋令闖入善地。撫郡為饒廣後路聲援。且係省垣門戶。最關緊要。該撫仍當妥為布置。以備不虞。毋專恃景鎮饒防。致有疏失。將此由六百里諭令知之。○予江蘇金匱殉難婦女孫許氏等二十三口旌表如例。○乙卯諭議政王軍機大臣等瑛榮等奏詳報省城一帶情形。匪撲藍田擊退。派員馳赴鳳翔防剿。並漢陰石泉解圍後。髮逆合股西竄。漢中喫緊各

摺片。逆匪四偽王由石漢西竄。距漢中府城僅三十里。城固被圍甚急。川匪藍大順與該逆勾通一氣。現在毛震壽駐紮城固。分飭盧又熊專顧漢中。惟隘口紛歧。兵力單薄。該逆全注漢郡。設有疏虞。勦辦又覺棘手。多隆阿雷正綰各軍均因攻勦回巢。勢難兼顧。是陝南軍情十分緊迫。前經寄諭官文等飭令李雲麟會同梁作楫督率防守。鄖西二竹之兵越境追剿。此時鄖屬已無賊蹤。豈可藉防賊

回竄為辭株守楚境且此股髮逆本係由楚入秦更不得以驅賊出境遂可以塞責了事嚴樹森現因察看下游營壘不克督兵西上卽著官文等嚴飭梁作楫李雲麟等剋日督率所部馳赴漢中相機進剿儻該員弁意存吟域玩愒不前則是以鄰為壑該員等其能當此重咎耶周達武一軍前據駱秉章奏稱現駐渠縣策應保甯綏定第漢中不靖蜀境亦難安堵自應先其所急廓清邊患著駱秉

章速飭周達武星馳赴陝會同漢南各軍協力勦洗聚而殲旃俾川陝楚三省邊陲永除後患官文駱秉章等務當力顧大局毋稍推諉貽誤事機伊昌阿行抵藍田回匪率眾來撲經該副都統督率各軍固守遊擊陳德隆等督勇接仗將賊壓退此項楚勇一千三百名卽著留守藍田以通文報往來之路王夢麟前往鳳郡被回匪設計截殺不克前進實屬怯懦無能仍著瑛榮嚴飭該副將迅赴鳳

郡毋任逗遛多隆阿進取回巢自應以肅清東路為要但該大臣係督辦全陝軍務省垣為根本重地豈可不思兼顧仍當調派數營前往援應疏通餉道遏截逆氛毋稍大意雷正綰病已痊愈卽著多隆阿遵照前旨檄飭該提督迅赴鳳翔以拯危急省垣附近一帶回匪出沒靡常穆騰阿務當會同瑛榮馬德昭隨時派兵出剿毋令該匪來去自如益形猖獗瑛榮奏陝省軍需孔亟現派在籍湖北

候補知府趙晏清赴楚勸捐等語陝商在鄂省者較川省為多瑛榮擬仿照在川陝商一體捐輸自屬可行卽著飭令趙晏清妥為辦理如有需地方官幫同勸導之處並著官文等委派妥員會同辦理前據駱秉章奏盧又熊移營進逼斗山被賊將營盤燒毀此事未據瑛榮陳奏本日瑛榮摺稱令其帶領所部專顧漢中是否得力著多隆阿駱秉章瑛榮查明具奏前命張亮基署理黔撫此旨令張

亮基於到黔後宣示何以韓超遽得聞知。是
石川省於行文黔省時。未經檢點。竟行直書
新銜。外省於此等要件。往往不知慎密。致生
枝節。著駱秉章查明覆奏。將此由六百里各
諭令知之。○又諭據駱秉章韓超先後馳奏
雲南省城失陷。一摺。覽奏曷勝憤懣。此時雲
南全省糜爛。惟東川昭通尚未被回匪占踞。
該郡與川黔毗連。若分道進剿。自是正辦。而
川黔軍務未靖。兵餉兩絀。恐亦徒託空言。惟

有力守東昭。防其四竄。並於川滇接壤處所。
一體嚴防。留為他日進兵地步。韓超已派李
有恆帶兵馳赴東昭。援剿而兵力仍恐不厚。
並著駱秉章酌派官軍一併馳往。協同防守。
不准稍涉疏虞。致令滋蔓。廣南與粵西接壤。
著張凱嵩一體防範。毋任竄越。賈洪詔等尚
在川省。著駱秉章即行知照飭令迅赴東昭。
協同防剿。以繫人心。不得任意逗遛。川境致
干重咎。到任後即將滇省一切情形迅速陳

奏。駱秉章摺內所稱逆回馬榮。是否卽係馬
如龍。滇省文武下落。究竟若何。督撫司道等
死難情形。均著一併詳查具奏。其總督一缺
現尚未得其人。著俟簡放有人。再令前進。張
亮基現在諒已早抵黔省。勞崇光亦將次可
到。卽著會商妥籌堵禦。毋得稍涉推諉。韓超
另片奏因病請假。並請飭催張亮基到省接
印等語。韓超以道員擢署巡撫。受恩優渥。豈
得以接署有人。輒思諉卸。著傳旨申飭。張亮

基未到以前。韓超於一切應辦事宜。仍著認
真辦理。不得存五日京兆之心。將此由六百
里各諭令知之。○又諭韓超奏回匪占踞雲
南省城。東昭等府喫緊。調派鎮將帶兵赴援。
請飭催欠餉一摺。回匪占踞雲南省城。並圖
窺伺東昭兩郡。必須竭力保全。方有進兵之
路。韓超現派李有恆統帶所部由東川昭通
一路進剿。惟滇省餉項久絀。軍需萬難措手。
現當防剿。在在喫緊。一應軍裝口糧。不可不

寬為籌備著駱秉章晏端書黃贊湯毛鴻賓沈葆楨各將欠解黔餉每月撥解四五萬兩以濟要需該督撫等務當顧全大局先其所急按月如數解往毋稍延誤將此由六百里各諭令知之○以前任雲南布政使賈洪詔為巡撫擢臨安府知府林鴻年為按察使○以陝西紫陽縣城被賊竄陷旋即收復並漢陰石泉廳縣等城解圍予署通判金鑑以知府用並賞花翎把總馬全等藍翎餘升敘有

差革知縣袁詩熙都司孫泰猷職仍留任○丙辰諭內閣上年冬閒因陝甘總督熙麟奏接到發回報件釘封斷拆顯有情弊當經降旨令兵部暨沿途各督撫挨站查明究辦並妥議章程嚴行稽察茲據李鴻章奏稱前辦理通商事務大臣薛煥於本年二月十七日接到軍機處發回二月初五日四百里夾板一副兵部與軍機處印封俱已拆損並奏事摺一件失去該撫查閱兵部火票粘單有清

口驛馬夫張順聲明夾板內並無印花切結一紙自係清口驛以上驛站私拆請飭查究等語驛遞軍報要件膽敢私行拆閱並竊去摺件尤屬可惡之至除飭軍機處將摺內所奉諭旨補錄知照外著兵部於清口驛以上地方逐站挨查並將此件係何站何人舞弊之處行令各該督撫嚴切根究從重懲辦以肅郵政○諭議政王軍機大臣等李鴻章奏官軍水陸大勝攻克福山常昭解圍各摺片

常昭被圍日久降將駱國忠等竭力固守經李鴻章調派水陸各軍援救先將福山口要隘克復該降眾亦奮勇出擊遂解常昭之圍辦理甚為得手戈登接帶常勝軍奮勇明白此次復力克福山著即授以中國總兵職任仍著李鴻章傳旨嘉獎常勝軍積習太壞並責令戈登嚴加約束以期消患未萌駱國忠等請獎副將翎支等職未免過優惟念該降將等自拔來歸後血戰苦守兩月有餘力保

孤城非尋常降眾可比。且該撫已許其破格優保。若不俯如所請。無以示信義而勸將來。著李鴻章將明發諭旨宣示駱國忠等。並責令仍駐守常昭。將附近一帶賊營掃蕩。俾知格外感奮。不可因賊氛少遠。稍涉大意。此後投誠之人。仍宜漸次保升。免貽諸將口實。且恐此輩驟膺顯秩。志得意滿。不復勉圖上進。不可不示以限制。崑山太倉。必須攻克。方可聯為一氣。著卽激勵諸軍。乘勝攻拔。為先發

制人之計。該撫現飭劉銘傳等紮福山口。令黃翼升留三營防守。調潘鼎新回金山衛。以防浙西。所籌均尚周妥。卽督令該員弁等認真防勦。福山敗匪。竄向何處。未據聲明。恐其渡江北竄。著李鴻章查明具奏。仍隨時相機辦理。江北隘口。處處喫緊。疊經諭令都興阿。富明阿。嚴密布置。此時江南得手。賊必全注江北。尤須自固藩籬。方免竄擾。完善通州靖江等處。口岸甚多。著都興阿等督飭水陸各

軍晝夜防範。毋得稍有疏虞。致干重咎。將此由六百里各諭令知之。○以江蘇常鎮通海道李鶴年為河南按察使。○以克復江蘇福山港口。暨常熟昭文兩縣城解圍。賞副將周國興參將周興隆。色圖魯名號。餘升敘有差。投誠賊目駱國忠等七名。分別擢用。均賞花翎。

大清穆宗繼天開運受中居正保大定功聖智誠孝信敏恭寬毅皇帝實錄卷之六十

大清穆宗繼天開運受中居正保大定功聖智
誠孝信敏恭寬毅皇帝實錄卷之六十一

教修

同治二年癸亥三月丁巳

孝賢純皇后忌辰遣官祭

裕陵 諭內閣步軍統領衙門奏營員稟訴同
官侵扣馬乾銀兩請交部審辦給事中恩霽
奏營員會席欽貲請飭查究辦各一摺南營
都司汪夢熊以該汛兵丁所領馬乾銀兩數
目短少恐有營員侵扣等情向存誠等面稟
復將該汛營弁兵丁等所具領結十九件知
會一紙呈遞並牽涉御史孟傳金禮部員外
郎豫璋到署看視查問所領馬乾銀數及參

將孫毓傑等說合各情南營西珠市口汛弁
兵所領馬乾分兩不足是否係該營將官侵
扣抑係汛官別有情弊著交刑部傳集人證
研訊確情按律懲辦御史孟傳金既據都司
汪夢熊供稱素無往來因何親赴該都司衙
門會晤查問馬乾銀數豫璋於領銀使費等
項有無染指參將孫毓傑等如何到該都司
署內說合馬乾均未據明白供敘殊多疑竇
著刑部將應提之西珠市口汛官汪夢熊等
並案內牽涉人證一併傳提按照供詞各件
嚴訊確情務令水落石出不准稍有實不
盡恩霽所參都司汪夢熊在福隆堂張筵請
分如果屬實殊屬卑鄙著交刑部一併歸案
審訊○又諭景綸等奏生擒首惡解省一摺
朝陽匪首葛城澄逃至興凱湖西南一帶藏
匿經佐領瑞徵等飭民夫張義幅等跟蹤追
捕殺斃餘匪四名立將葛城澄擒獲解省即
著景綸等訊明正法仍飭該官兵等按捕餘

匪以靖地方○諭議政王軍機大臣等景綸等奏擒獲匪首葛城澄一摺已明降諭旨令將該匪首訊明正法矣惟此股首匪尚有才實善在逃未獲豈容日久任其漏網著景綸卽親提葛城澄嚴行審訊務將才實善蹤跡究出一面督飭在事將領嚴密緝拏毋任潛逃致貽後患黑背等處地方餘匪仍著責成瑞徵接捕淨盡不得草率了事致令餘燼復然將此諭令知之 又諭譚廷襄奏擊退中

村援匪攻克旗山等寨賊巢分別勦撫蘭費各圩一摺中村匪首孫化詳之弟孫化青勾結李城餘黨及張守義等匪合力與官軍抗拒圖保窩巢現經官軍擊退並進克旗山等處孫化青就戮附近數十里各寨業經該前撫勦撫兼施漸次清釐中村勢成孤立自必指日可破著譚廷襄督飭黃國瑞一軍將中村賊圩趕緊進攻迅圖規取並令長賡等併力協勦以期迅埽逆氛蘭費收撫各圩譚廷

襄務當督飭在事員弁妥為辦理分別遣散安插毋得稍事粉飾致令再生反覆貽患無窮會匪張守義擒匪李城餘黨因無可依託竄赴嶧山句聯教匪仍圖負固西路兗州甚形喫重該前撫擬令黃國瑞攻克中村後移師進勦兗州教匪前因江北軍情喫緊清淮兵力空虛曾諭令吳棠令黃國瑞駐紮交界地方不可深入東境致與清淮相距日遠勢難兼顧此時兗州教匪著卽嚴飭德楞額等

及駐兗各軍認真勦辦以專責成黃國瑞能否前赴兗州協勦之處著俟攻克中村後再行咨會吳棠相機辦理另片奏總兵曾逢年尚非不能乘騎年力亦未甚衰等語譚廷襄既因該總兵在東有年情形較熟卽著准其將曾逢年暫留淄川會籌防勦迅克堅城如實不能得力仍著卽行撤回將此由六百里諭令知之 又諭閻敬銘奏起程赴東日期一摺閻敬銘營葬已竣已定三月十二日由

臨晉起程赴東著卽探明臨清德州道路星
速前進馳赴東昌接署撫篆山東軍務日漸
疲玩將領多不得人以致兗沂一帶任賊縱
橫日久不能戡事該署撫到任後惟當申明
軍律嚴定賞罰務使壁壘一新地方文武咸
知遵懷其各路股匪頭緒紛繁尤宜審定機
宜先由何路下手以期次第鏟除肅清境內
該署撫於抵東昌後卽將辦理情形迅速馳
奏該署撫其迅速成行毋稍濡滯以慰廑繫

將此由五百里諭令知之 戊午諭內閣前
因沈葆楨奏請將吉安府知府高延綬與南
康府知府曾省三對調經部議以吉安府係
請旨要缺對調與例未符茲據該撫奏稱吉
安府為江省第一繁難之區非熟習情形恩
威並濟之才不足以資整頓曾省三在江年
久且樸直廉明到任數月已著成效以之調
補吉安府實屬人地相宜高延綬明白謹慎
尚非棄材宜暫予以中簡之缺俾資歷練等

語著照所請曾省三准其調補吉安府知府
所選南康府知府員缺准其以高延綬對調
此係因人地相需從權辦理嗣後不得援以
為例○諭議政王軍機大臣等官文等奏皖
豫股捻闖入鄂疆逼近武漢調兵進剿一摺
此次捻首陳大澹等句合毫捻由羅山新息
竄至麻城現竄踞白果鎮該處距黃州甚近
官文等已調派穆正春等移紮舊街沙河等
處並調周鳳山舒保等馬步各軍及沿江水
師分投巡防辦理均尚周妥該逆陳大澹等
人眾雖多而屢經挫敗已失巢穴毫捻亦無
巢可歸官文等所調各軍均係鄂省得力之
將卽著嚴飭各軍實力兜剿余際昌一軍已
至兩路口並著張之萬毛昶熙飭令會同楚
軍合力攻剿盡殲醜類此股捻逆久為豫患
豫軍旣未能殲除以致闖入鄂疆同為兩省
邊患自當不分畛域若豫省再不能遏堵復
令回竄迄無了期則豫軍之咎更重務當趁

此該逆離巢之際與楚軍和衷商酌悉數殲除永除後患官文等亦當同心討賊不得以驅賊出境卽爲了事嚴樹森著俟擒逆勦除後再行酌量情形馳赴上巴河察看軍情此時卽無庸出省其武漢防堵事宜並著官文等妥籌辦理毋稍疏懈將此由六百里各諭令知之江西巡撫沈葆楨奏上年計典因接奉部文已遲請展至本年五月舉行從之○以鎮紅旗蒙古都統景壽署鎮紅旗滿洲

都統○命五城賁賑再展期兩月○己未諭內閣前因浙江金嚴甯紹台等府縣地方先後克復而人民彫敝田土荒蕪甚爲可憫已加恩蠲免二年錢漕以蘇民困惟念衢州一城雖未失守城外之民已疊遭荼毒西安縣爲該府附郭首邑各鄉村亦均久經賊踞焚掠殆徧民不聊生若將應徵錢糧照常徵收殊不足以示體恤著左宗棠查明衢州所屬之西安縣地方錢漕加恩照新復府縣一體

蠲免二年以紓民力該撫卽刊刻謄黃徧行曉諭務使實惠均霑毋任吏胥舞弊用副軫恤窮黎恩施普徧至意又諭戶部奏內倉米石被竊請將監督議處一摺據稱三月十一日內倉監督瑞琛等赴倉挑晾米石見牆根拋灑米粒該監督等逐處查看惟第十六廠封條揭損失去白米尚屬無多詹事府朝房後檐有扭斷木椽情形等語倉庾重地該匪等膽敢於兵丁巡邏不及之處乘間肆竊

實屬目無法紀著步軍統領衙門順天府五城將竊米匪犯一體嚴拏務獲究辦該監督職司收放未能嚴密稽查殊屬疏於防範內倉監督戶部員外郎瑞琛升泰均著交部照例議處該倉係在長安門內所有該門直班官兵何以毫無覺察著該管大臣查明懲處並嚴飭嗣後當晝夜嚴防毋得疏懈其各朝房應修處所並著工部查估修理以昭嚴密○諭議政王軍機大臣等僧格林沁等奏攻

克朱圩收復馬家等寨督兵北上分路勦辦河北股匪一摺朱圩賊匪業已殲除蒙亳一帶善後事宜業經僧格林沁交唐訓方接辦該署撫現紮蒙城卽著妥為經理其蒙城西鄉之賈家圩亦經唐訓方督軍攻克所有附近各圩自不難次第清查責令歸地方官鈐束苗沛霖現因張逆殄滅首惡已除由雙澗退回鳳臺縣本寨有散團撤卡之約諒不敢以詭言搪塞惟苗沛霖居心叵測僮僧格林

沁督師北上該革員故態復萌不將各處之練散撤各處釐卡一併交官則是心懷狡詐終為後患屆期計李續宜亦已可到著唐訓方迅卽與之斟酌機宜隨時辦理朝廷亦不為遙制直東賊匪奔竄靡定僧格林沁現派蘇克金帶領馬隊由衛輝府赴臨漳一帶繞至賊西著卽飭令該翼長會同豫省派出之楊長春等軍向東截勦力保完善本日據譚廷襄奏捻會各匪竄擾甯陽距省城不及三

百里譚廷襄意欲由東昌回顧省城而尚為張錫珠一股牽掣本日已諭知該撫俟僧格林沁行抵東昌該撫卽可帶兵回顧省城僧格林沁係督辦四省軍務直隸山東各股賊匪應如何分勦之處卽由該大臣妥籌辦理宋景詩不遵多隆阿調遣擅自回東且一路訛索州縣銀兩擄搶民財前經崇厚等令其添募勇丁千餘人殺賊自效嗣據崇厚等亦奏稱其擁眾觀望並不協助官軍且屢與本

地團練為仇並收用四眼狗死黨數百人雷鳳鳴所部前因與東省兵勇口角殺斃兵勇至五六百名之多其目無法紀已可概見該大臣到東後並著酌量緩急如其尚懷觀望卽當設法殲除以靖直東邊患王恩第通賊各情先經文煜奏疊有旨交孫治崇厚密拏正法崇厚等因其添募勇丁較多力不能辦該革員現在挾宋景詩以自固前經諭令劉長佑拏辦正法如聞風折回東省卽著該

大臣密速掩捕以軍法從事毋稍姑容將此由六百里諭令知之。又諭譚廷襄奏擒會各匪竄向西北調派各軍截剿一指擒匪李城餘黨及會匪張守義等由嶧山竄撲兗郡復竄至南土柳牯及楊家窪一帶雖經官軍擊敗而永林遇伏陣亡軍威稍挫賊蹤愈張亟宜趕緊撲滅俾免延蔓現在賊竄甯陽西北卧牛山等處滋擾該處距省城不及三百里肥城平陰長清一路處處可虞而泰郡尤

當其衝防守萬分喫重譚廷襄現調守備郭大勝等帶隊繞赴甯陽迎擊並令各州縣調團防堵惟兵力太單恐難抵禦德楞額一軍已與賊接仗即著飭令星夜追躡會同富和等軍痛加勦洗毋令賊氛趨近省垣是為至要僧格林沁已於初九日由皖回軍取道東昌勦辦降匪譚廷襄務於此軍未至之前將降匪張錫珠等實力擒剿毋稍疏懈甯陽匪勢猖獗本日已諭知僧格林沁酌量辦理一

俟僧格林沁督軍行抵東昌譚廷襄即可回顧省垣根本之地將此由六百里諭令知之。以勦匪不力摘山東知府孫家穀遊擊焦其洲頂帶暫革督司毛貴守備劉志和職仍留營。庚申諭內閣左宗棠奏浙省軍務吏治需材孔亟請調京員赴浙差委並請將即用知縣之本科進士多掣十數員赴浙等語戶部候補員外郎顧菊生湖南在籍戶部主事謝寶鏐內閣中書吳士邁均著發往浙江

交左宗棠差遣委用並著吏部於本科進士引見後將即用知縣人員於定例分發外多掣十數員分發該省以資差委。又諭左宗棠奏請飭江蘇道員督辦松所鹽務等語浙江鹽務惟松所引地最稱旺銷現在所屬之華亭等處早經一律肅清據該撫奏稱各場大使並不將每年應納各課新舊蕩額及連年所徵電課錢糧據實稟報其為意存欺隱已可概見著派蘇松糧道郭嵩焘妥為經理

督同金華府知府徐寶治就近將松所引地查明務使各項弊端逐一釐剔以重疆務而裕餉源。諭議政王軍機大臣等左宗棠奏水師進攻富陽陸軍防剿皖南獲勝並沈葆楨奏江省官軍連日在休甯縣境截剿獲勝各一摺。浙省官軍剿賊得手羣賊鼠竄恆欲由皖南就食江西現在太平石埭之賊時窺黟縣祁門邊界為總兵丁長勝等軍擊敗並經道員王文瑞等各軍於藍湖米阮等處痛加截殺胡古兩逆之勢已衰祁黟可以無事。惟休甯尚未解圍徽境之賊日聚日多據左宗棠奏稱花旗之賊業經合併而譚星一股亦已由昌化過千秋關竄徧徽州與沈葆楨摺內所稱同知王沐等於巖寺等處擊走之賊皆為花旗廣匪正相符合。草市地方既為休婺藩籬王沐等所部僅二千人防剿殊形單薄此次雖由屯溪一路疊次擊賊獲勝仍著沈葆楨督飭該文武等實力嚴防不得以

甫經獲勝致或疏虞為賊所乘劉典一軍據沈葆楨奏已由威坪抵大川口經左宗棠復飭其催新募之勇由廣信以趨婺源是已。繞出賊前機勢湊泊定能力遏奔衝以解休甯之圍。江省信防足資穩固即著左宗棠督飭劉典等乘機妥辦並與江省官軍隨時聯絡互為防剿以全大局。桐廬既克杭州上游關鍵止富陽一城業經左宗棠飭令水師大加轟擊並蹋平其江岸堅壘軍聲日振著即飭令蔣益澧所部之高連陞等及魏喻義等軍水陸會合將自杭來援之賊擊斷進拔堅城或令蔣益澧分軍自率所部由富陽下據杭城以規杭郡即可輟賊竄擾江北詭謀均著左宗棠相機辦理另片奏請調顧菊生等各員本日業經明降諭旨允准惟由外補一節須俟各該員到浙後由該撫察看隨時奏明請旨此時未便概行照准恐致效尤而生奔競將此由六百里各諭令知之。又諭多隆

阿奏更番移營接仗情形並派兵扼紮鄠縣
長安各摺片德興阿由蒲郡移師渡河分駐
同州城外及三河口兩處多隆阿現將原駐
三河口楚軍撤回大營調遣所籌自屬周妥
現在陳德才等股匪裹脅日眾西逼漢中鄠
縣回匪未平鳳翔岐縣被圍日久未解甘肅
固原回匪兇熾日熾亟盼同州一帶早行肅
清方可分兵四路援應該大臣督辦全陝軍
務所有全陝地利賊勢軍情嗣後務當隨時

詳晰奏報現已移營孝義鎮奮千自可迅速
攻克進拔倉頭老巢盡殲悍賊以清東路省
垣糧路梗塞瑛榮惟知閉關自守竟不能出
一旅之師扼要駐紮束手無策坐以待斃馬
能取勝多隆阿現派總兵曹克忠管帶烏拉
馬隊前往省城將瑛榮前後所募楚勇七營
一併交該總兵帶領責令在鄠縣長安交界
地方紮營先通糧運繼圖進剿著瑛榮即將
楚勇交曹克忠帶往鄠邑不得仍留省城擁

以自衛致誤戎機省垣防勦尚有旗綠各營
及勝保留防之兵足敷應用著穆騰阿瑛榮
會同馬德昭妥為布置並著隨時出隊與曹
克忠一軍互相聯絡庶南路糧運可以及早
疏通盧又熊前有冒功並縱勇殃民等情曾
經諭令多隆阿查明並咨查川省是否由駱
秉章派令赴陝續據駱秉章奏明並非由該
督派往並據瑛榮奏請以盧又熊在陝累著
戰功開復原參處分茲據兵部議奏以該撫

所請開復處分聲敘既未明晰而該革員應
行查辦各情亦尚未經查奏著多隆阿瑛榮
將盧又熊前被譴延襄奏參各情迅速詳查
具奏毋稍遲延將此由六百里各諭令知之
○又諭崇實駱秉章奏四川委員姚寶銘前
赴湖南迎提田興恕本擬正月二十三日起
程來川因憚世臨奏懇將田興恕留楚辦防
事遂中止耽延日久案情恐有反覆請飭憚
世臨就近提解田興恕至省收禁候旨結案

等語。田興恕之案。可以將就了結。實萬不可失之機會。前因惲世臨請留田興恕募勇辦防。所陳實屬冒昧。當經降旨切責。並諭令該撫將田興恕迅速解川。復恐此事久稽。另生枝節。又諭令崇實駱秉章嚴飭派出之員。會同楚省官員。解押田興恕入川。即行監禁。想該將軍督撫等。必能欽遵辦理。至田興恕籍隸湖南。若即在本省羈禁。殊不足以昭慎重。崇實駱秉章所請留楚監禁之處。著毋庸議。

惲世臨日前覆奏。據稱已派副將田連考接帶新募之勇。一面查明田興恕如過期未行。即委員會同姚寶銘催解赴川等語。著惲世臨嚴飭派出委員會同姚寶銘迅速將田興恕押解入川。僅任令藉端延諉。託故不前。是此事皆為惲世臨所誤。必惟該撫是問。崇實駱秉章仍恪遵歷次諭旨。趕緊迎提監禁。一面具奏。一面飛咨勞崇光張亮基以便迅速定擬具奏。教民一案。疊經派令崇實駱秉章

在川妥籌辦理。現在事體已有端倪。自應乘機速了。免其抵償以存體制。該將軍總督等總當極力圖維。顧全大局。不得因事有周折。遂行推諉。勞崇光張亮基務遵歷次密諭。一俟田興恕到川收禁後。即迅速定擬具奏。毋令案懸不結。致日久反覆。又成不了之局。將此由六百里各密諭知之。○以浙江勸辦軍食出力。賞還已革按察使段光清頂帶。○以浙江克復嚴州府城出力。賞守備趙大任等

花翎。教諭張兆熊等藍翎。餘加銜升敘有差。○追予浙江乍浦陣亡副都統錫齡阿謚武烈。於湖北荊州府旗籍建立專祠。殉難家屬一併附祀。○旌表守正捐軀湖南甯遠縣民周三保妻胡氏。○辛酉諭內閣吏部奏革員直揭部科。據實奏參。請飭查辦一摺。已革四川候補道趙友泰前因濫派兵差夫馬。申覆含混。被參後挾嫌訐告。業經照部議革職。乃該革員於本年三月間復在吏部揭稱前署

川東道王廷植因該革員前管防勦局務曾駁其墊辦兵差之項藉清查局務挾私報復該革員曾以王廷植勸捐侵蒙及侵吞鹽釐各款稟請四川總督查辦乃總督全不查察反以為挾嫌報復請交部議處寬押無申等語是該革員知該督已經奏參無疑覈其具揭日期係在駱秉章奏參之後不候部議復行直揭部科顯係意存挾制且該革員已卸署川東道篆務何以揭文外封尚用川東道

印信又揭文係於元年閏八月間專丁齎投遲至本年三月始行到部更難保非已經奉旨交該督嚴訊倒填月日希圖狡脫情節種種支離該革員以聲名狼藉現飭嚴訊之員此次揭內復牽涉原查總督袒庇不公儻有誣捏等情尤應嚴查懲治以儆奸頑著駱秉章歸入濫派兵差夫馬案內一併從嚴審訊據實參辦○漕運總督吳棠疏覆湖北巡撫嚴樹森奏請停補江浙兵額查漕標及江北

各鎮標汎地被擾無多汎堡如常不容稍有曠缺現當整頓營伍之際應請無庸更張以符舊制下部知之○以山東攻克朱留屯等處賊圩擢把總李福以守備用並賞花翎外委謝殿元藍翎餘升敘有差○追予直隸滄州殉難城守尉德成等祭葬世職紳士軍民婦女九千一百四名口分別旌卹如例○壬戌諭議政王軍機大臣等本日據洪毓琛奏派隊進攻鹽水港賊匪獲勝臺灣郡城防守

已固署提督吳鴻源援師進發一摺與上月徐宗幹奏到各情形大略相同惟據徐宗幹奏稱逆首戴逆仍踞守彰化縣城現在賊勢窮所奏則戴逆仍踞守彰化縣城現在賊勢窮感西螺義民請給劉諭清莊練勇即著寬其既往飭令迅將戴林二逆擒獲毋得徒託空言儻能迅速肅事即准破格保獎俾知感奮吳鴻源已由鹽水港進發諒近日嘉義城外匪黨早可肅清即著著齡徐宗幹轉飭該署

提督等仍遵前旨。剋期將彰化斗六克復。毋得稍涉稽延。至有竄逸之虞。其鹿港營盤。並著轉飭曾玉明嚴密防守。毋稍疏懈。再四川成綿龍茂道鍾峻。前因該省清查捐務案內。有該員經手事件。聽候查辦。現在員缺久懸。如該員應查事件。業已完結。即飭迅赴新任。僅一時不克赴任。即著奏聞。毋稍遷就。將此由四百里諭知。著齡徐宗幹並傳諭洪毓琛知之。○予福建彰化陣亡守備劉國標等祭

葬。世職加等。○蠲緩福建崇安縣被水村莊新舊額賦。○癸亥。以京畿雨澤愆期。

上詣

大高殿祈禱行禮。○遣恭親王奕訢詣

時應宮。惇親王奕誼詣

昭顯廟。鍾郡王奕詒詣

宣仁廟。孚郡王奕譞詣

凝和廟。拈香。○諭內閣。譚廷襄奏官軍截剿

河西竄匪。殲戮殆盡。生擒匪首及戕官要犯。

一摺。匪首楊朋山一股。敗竄過河。疊被官軍擊敗。復由南館陶一帶搶渡。經東省兵勇截殺多名。該匪勢力窮蹙。董道平設計將楊朋山誘擒。其逆首張錫珠之子張金堂。即張豁子。亦被官軍擒獲。訊係下手戕害前署大名道秦聚奎要犯兇惡尤著。尤須盡法懲治。以洩公憤。而快人心。楊朋山、張金堂、即張豁子。著譚廷襄訊取確供。即在軍前正法。梟示。並著嚴飭各路帶兵員弁。撥捕匪黨。務絕根株。

毋留餘孽。○諭議政王軍機大臣等。劉長佑奏到營後。督飭各軍。剿賊獲勝。譚廷襄奏截剿河西竄匪。誘擒匪首及戕官要犯各一摺。劉長佑自馳抵威縣大營後。督飭各路員弁兵勇。分投剿截。其北竄之賊。經徐廷楷等沿途兜擊。斃賊甚多。該匪由深州之新莊等村奪路南奔。其南竄一股。在廣平縣小張固地方。被姜國仲、恆齡擊敗。退竄打兒寨一帶。與新莊等村敗賊合為一股。勦辦尚屬得手。著

劉長佑迅督所部乘此聲勢合力兜擊聚而殲旃母令乘隙他竄楊朋山並張錫珠之子張金堂均經東省官兵擒獲匪黨自必聞風膽落所有莘冠各境餘匪不難悉數殄除即著譚廷襄嚴飭各軍盡力搜捕淨絕根株毋留餘孽至張金堂供稱伊父張錫珠於二月二十六日在威縣境內被白旗馬隊洋槍擊斃等語是否屬實著劉長佑確切查明毋令漏網稽誅致貽後患李城餘黨及張守義等

匪向萊蕪一帶竄逸意在勾結淄川踞匪譚廷襄飛催德楞額等追剿並飭令淄川軍營扼要迎截德楞額跟蹤前進當可追及著卽飭令認真勦辦盡殲醜類以免蔓延蘭山中村之賊業已殲除費縣之曬書臺賊寨亦經官軍攻克仍著譚廷襄激勵諸軍乘勝進攻務將蘭費一帶教幅各匪迅速蕩平毋再遷延致負委任將此由六百里各諭令知之○又諭馮子材等奏江皖竄匪糾合丹句各逆

分偏鎮城相機布置一摺浙皖等處官軍聲威甚振常昭亦復解圍該逆窮而思竄本在意計之中而鎮江地當衝要待逆等糾股分偏馮子材等不以浪戰為能而以堅守為主以逸待勞所籌尚屬周妥即著督飭將士嚴密防守伺其懈怠潛軍痛勦務當慎之又慎毋墮奸計第該逆不得逞於鎮城必將渡江而北都興阿等駐軍五臺山已及年餘該營將士久未接仗恐養成驕逸之性不可復用

著都興阿富明阿隨時探明如有北渡逆匪卽行相機截擊裏下河一帶並著會同吳棠設法嚴防毋任肆意紛竄至江皖軍情得手常州溧陽各匪首均離巢北竄恐其突犯雨花臺營盤著曾國藩轉飭曾國荃加意嚴防賊至卽剿以固大營儻該逆渡江上竄地廣兵單尤慮奔軼並著飭令毛有銘等妥為防守毋令西竄廬郡以致重煩攻剿將此由六百里各諭令知之○又諭張之萬奏東匪疊

撲臨漳縣城官軍擊退仍探蹤堵剿並遵查
省城回民情各摺片東匪退回直境現在
直省屢獲勝仗諒因僧格林沁帶隊來直派
蘇克金統帶馬隊由河北進剿該逆聞風震
懾退回肥鄉等處計蘇克金馬隊不日可到
李世玉等所部無多自未便追入直境著該
撫飭令該將士等擇要扼紮如有直省擊敗
餘匪竄入豫境卽行相機截剿汴垣回民素
稱安分其寄寓之陝回各有生業該撫已查

明年歲籍貫姓名住址隨時稽查奸宄自不
致涸入第漢回構釁總因猜疑而起該撫尤
當示以坦白嚴飭該府縣使之照常相安毋
稍滋擾驚疑至河洛回民攜帶馬匹器械結
隊赴陝不可不嚴行堵截並著張之萬轉飭
該地方官認真稽查毋任結隊西行該撫前
陳豫省鎮道未能得力並吏治廢弛情形至
今甄劾寥寥諒慮叅劾之員捏造謗言未能
實踐所言第朝廷於此等情狀早能洞悉隱

微而劣員充位必致軍務吏治毫無起色該
撫務當破除一切毋待諭旨詢問始行甄劾
也將此由六百里諭令知之又諭熙麟奏
平涼被圍調派兵勇往援並查明平涼漢回
仇殺情形及遵覆剿撫機宜各摺片固原回
逆大股攻撲平涼府城勢甚危急雖經熙麟
調派兵勇前往援救第倉卒湊派兵力過單
恐難得力該督前次所調各路援兵仍著迅
速飛催剋期會集乘銳進剿力解城圍並嚴

飭在事員弁實力防守以待援師毋得稍有
疏懈河東協餉銀十三萬兩均在平涼城內
縣庫存放經熙麟飭令該守等運赴慶陽供
給兵餉而署守田壽增稟覆枝梧延不遵解
實屬可惡著熙麟查明嚴行叅辦此時熙麟
一軍當防勦萬緊之時而餉需不繼將士斷
難枵腹荷戈前聞多隆阿軍營於攻破回巢
後有起獲窖銀鉅萬之說此次熙麟摺內亦
稱該營續挖窖銀幾及一二百萬所奏必非

無據即著該大臣酌量提出二三十萬兩派員解交熙麟軍營以救然眉多隆阿素顧大局想必能妥籌辦理也本日據議政王等面呈熙麟咨文據稱雷正綰現丁母憂懇請回籍守制等語已明降諭旨將雷正綰固原提督一缺改為署任並賞給銀四百兩治喪以示體恤矣現在陝省軍務方急雷正綰當念移孝作忠之義勉抑哀思一意勤賊以副委任恩麟奏遵查定安遷延不進情形請俟熙

麟到任查叅此等怯懦之員豈可令其日久尸位貽誤事機已明降諭旨將定安革職拏問矣熙麟未到以前即著恩麟查明該革員退縮情事按律定擬具奏將此由六百里諭知多隆阿熙麟雷正綰並傳諭恩麟知之○又諭勞崇光奏行抵黔境探知前途道梗改由四川繞越前進一摺黔省查辦教民各案均關緊要必須趕緊赴黔速為完結方為妥善據勞崇光奏稱現因銅仁府屬之張家寨

等處均有大股賊匪盤踞道路梗阻擬由松桃廳繞至四川秀山等處赴黔即著該前督探明道路節節前進迅速赴省於應辦之件設法妥籌毋稍宕延前據張亮基奏因遵義匪徒竄擾擬由間道赴黔此時計可抵省法國公使在總理衙門呈遞稟詞等件該前督未經接到已諭知總理衙門補行鈔寄矣將此由六百里諭令知之江南提督李世忠奏勝保情有可原才有可用請從寬議罪得

旨前據曾國藩轉奏已諭知該大臣轉飭該提督仍遵前旨迅速立功毋得徒託空言嗣後有應陳事件仍著稟明曾國藩覈定奏聞以一事權○改丁憂陝西提督雷正綰為署任賞銀四百兩治喪以防堵不力降河南河北鎮總兵官牛浩然為副將以記名總兵官余際昌為河南河北鎮總兵官○以直隸大名勦賊獲勝開復總兵官姜國仲暫革處分○以河南臨漳等處勦匪獲勝復已革副

將楊長春職並賞還花翎○以山東攻克中村等處匪巢予知府文彬以道員用知縣吳炳麒以知州用並賞花翎餘升敘有差○以甘肅靈州解圍賞佐領吉星巴圖魯名號道員侯雲登騎都尉朱綸等花翎千總郭宗魁等藍翎餘升敘有差○以勦賊遷延革甘肅提督定安職並逮問○予江蘇丹陽陣亡通判林昌鎡祭葬世職○緩徵甘肅阜蘭固原靈平羅河狄道渭源靖遠隴西安定鹽茶安

化甯甯夏甯朔碾伯涇崇信靈臺鎮原二十廳州縣暨沙泥州判所屬被水被霜被風被凍地方新舊錢糧草束○甲子諭議政王軍機大臣等本日明降諭旨將耆齡補授福州將軍左宗棠補授閩浙總督兼署浙江巡撫並諭令耆齡即將所辦閩浙兩省防勦事宜及所部各軍移交左宗棠接辦左宗棠接辦後耆齡即赴福州將軍之任左宗棠現駐浙省軍務正當緊要其浦城防所應即遴委大

員前往抑當如何接辦之處即由左宗棠酌度奏明辦理閩浙兩省軍務兵勇均歸左宗棠節制耆齡所部廣勇並著左宗棠於閩浙軍營內選擇善於駕馭之員派令統帶如廣勇實係不能得力有害無利即著左宗棠酌量撤遣浙省係左宗棠兼轄省分既兼署巡撫尤責無旁貸曾國荃仍統前敵之軍駐紮雨花臺一意相機進取以圖金陵無庸以浙事為念此時曾國藩巡江諒已旋至安慶仍

著隨時與曾國荃熟籌戰守機宜東南軍務惟在該督撫等勦力同心通籌全局共圖挽救國家異數酬庸尤為地方擇人起見該督撫等諒能益矢公忠以副委任也福建省地方一切應辦事宜即著徐宗幹認真整頓妥為經理左宗棠身任兼圻遇有地方公事應行兼顧者與徐宗幹隨時咨會辦理將此由五百里各諭令知之○又諭有人奏降眾通賊有礙直隸山東軍務請密飭剪除一摺據

稱叛匪張錫珠等。以山東堂革冠館等縣地方為巢穴。與直境逼近。往來甚便。必須東省擣其巢穴。直隸兵勇追剿夾擊。方可聚殲。惟欲清東境。必須先除降眾。該降眾等均與張錫珠股匪為犄角之勢。等語。宋景詩等狼子野心。本非善類。現復由陝西擅回東省。招集黨與。通賊殺圍。並戕害兵勇多名。致官軍民團均受牽掣。不能專力剿賊。若復再事羈縻。恐該降眾聚集益多。乘隙舉事。愈難勦洗。僧

格林沁現由亳州移師北上。計可行抵東省。著即相度機宜。將宋景詩雷鳳鳴設計調至大營。訊明正法。一面將所部降眾分別解散。其桀驁者盡行搜捕。以清後患。惟宋景詩等耳目眾多。恐其聞風遠颺。豫為防範。僧格林沁務當不露聲色。慎密將事。斷不可稍有洩漏。致誤事機。原摺著鈔給閱看。將此由五百里密諭知之。○又諭有人奏京東一帶。有騎馬賊匪。持械行劫。遊擊毛文藻觀望不前等

語。盧龍遷安地方毗連邊要。竟有匪徒糾眾行劫。地方官弁宜如何嚴密緝捕。乃該遊擊毛文藻聞賊不敢遽往。臨事又復潛回。怙怯貽誤。殊堪痛恨。現在新定章程。凡盜賊入境。文員當先陷陣。而武弁擁兵坐視者。一經查明。即應請旨正法。定例。蔡嚴劉長佑到任伊始。無所用其迴護。著即將摺內所指各情。認真查辦。據實陳奏。其來聞脫逃之匪。仍著飭令地方官悉數搜捕。毋留遺孽。原摺著鈔給

閱看。將此諭令知之。○禮部以宗室會試中額請得旨。取中二名。○命福州將軍文清來京。以閩浙總督耆齡為福州將軍。○以浙江巡撫左宗棠為閩浙總督。江蘇布政使曾國荃為浙江巡撫。未到任前。以左宗棠兼署。○以安徽按察使萬啟琛為江蘇布政使。記名道馬新貽為安徽按察使。○免福建本年例貢果品。○免琉球國遭風夷船進口貨稅。○乙丑諭內閣。前因光祿寺卿潘祖蔭等奏。恭

勝保自督辦皖豫及陝西軍務以來跋扈貪污欺罔無忌種種劣蹟法難姑容降旨革職拏問交刑部治罪嗣因該革員到部派議政王軍機大臣大學士會同刑部審訊特以該革員情罪重大必須審明確實始足以彰國憲而重紀綱本年二月間據給事中趙樹吉奏勝保罪狀昭著雖置重典無以蔽辜而該革員黨與甚多誠恐謠誣紛騰危詞聳聽請特申乾斷以正刑章復經諭令原派王大臣等覈實辦理嗣據該王大臣等訊取勝保原遞親供呈覽與原叅各摺件及陝省信函呈詞迴不相符並聲明摘錄情節再行駁詰本日據該王大臣等將駁訊勝保親供具奏並據御史吳台壽奏勝保有克敵禦侮保衛地方之功無失地喪師貽誤大局之罪有私罪而無死罪給事中趙樹吉所奏實為過當懇請持平辦理各等語勝保所遞親供多屬矯辯此次復行駁詰條款內如逆首陳玉城之

妻投河身死並不將伊弟陳安城等即行正法及安坐省城按兵不動剋扣軍餉縱勇殃民各情該革員或稱事出有因或謂原叅失實覈其情節殊難憑信朝廷執法一秉大公斷難據該革員一面之詞遽為定讞况其被叅被控各節如果屬實均有軍營冊籍地方文報及營員官吏等可查無難徹底根究以成信讞若如趙樹吉所奏遽將該革員明正典刑固無以折服其心若竟謂該革員過止一身罪應未減如吳台壽所奏亦無以服天下後世總之準情科罪朝廷並無成見惟須情真罪當方足以定爰書而申憲典著原派王大臣等再將該革員被叅各款內應查文卷應提人證迅即酌量分別查提無論已認未認一併切實根究質證明確按律定擬毋任執詞狡展吳台壽摺一件並前交趙樹吉摺一件均著彙案覈辦○又諭愛仁王茂蔭奏審辦員楊氏一案檢驗骨殖司員桂迂衡

呈懇撤退請飭刑部酌覈知照並請另派大員審擬一摺此案員楊氏骨殖經愛仁王茂蔭督同委員司員仵作等細心檢驗既無產死確據何以桂迂衡呈稱謀命誣節事本相因既非毒死即係產死無疑仍請照原案審結實屬挾有成見自未便仍令承審桂迂衡著即撤退並著刑部將向來檢驗因產身死之婦以何為憑有無辦過成案詳細查明迅即知照愛仁等辦理仍選派熟悉案情司官

二員馳赴山西隨同審辦務期水落石出以成信讞愛仁等所請另派大臣赴晉審辦之處著毋庸議○諭議政王軍機大臣等愛仁王茂蔭奏檢驗員楊氏骨殖司員桂迂衡請照原案辦理並呈請撤退請飭刑部酌覈知照並另派大臣馳驛赴晉審擬一摺員楊氏骨殖既經檢驗明確並非毒死亦非產死何以司員桂迂衡云既非毒死即係產死無疑欲照原案審擬且所具呈詞大半為沈長材

辯白實屬挾有成見不可不撤至此案件作檢驗該氏以顙門骨近右相連額角係淺黑色無血暈遂斷為舊日疤痕該氏生前有無疤痕仍應傳提熟諳該氏之人細加詰問方可憑信沈長材往驗之時距楊氏之死若干時日亦可與鹽墊死孩一節互相印證所究出之贓銀一萬兩究係何項使用何人得受必須一一根究得實方能水落石出著愛仁王茂蔭悉心訪詢是否另有別情據實具奏

該尚書等承審此案豈容置身事外著俟刑部查覈案據另委司員到晉後督飭該委員等細心研訊定擬以成信讞不得遷就了事將此諭令知之○又諭步軍統領衙門奏革員遣抱呈訴被參冤抑一摺前因耆齡奏查出福建候補知府陳謙恩曾往紳士姚鏡圖家挾妓飲酒並欠解稅釐銀至四萬餘兩之多又創立貼息名目盤剝重利當經降旨將陳謙恩革職交耆齡等加以刑訊嚴行究辦

勒繳虧款茲據該衙門奏稱該革員陳謙恩遣抱告劉斌呈稱閩省福州口及省外各處抽收稅釐係委員暨各道府督辦該革員署福州府任內所徵茶稅業已清完至借用洋商餉銀及息銀補水係由藩司委員會辦奉准貼給紳士姚鏡圖母壽該革員在署福州同知任內尚未相識並未往祝乃被叅案內將業已解清奉准抵撥及並未經手之款均勒令賠繳並將該革員原遞未往姚鏡圖家

祝壽親供勒改往祝字樣等語陳謙恩居官貪劣聲名平常疊經被人叅奏此次所控各情難保非懼罪畏刑希圖藉詞抵賴仍著徐宗幹提集人證卷宗秉公研訊將該革員已徵未解各款勒令照數賠繳並魯繼周有無夜至陳謙恩寓所傳諭勒改字樣各情逐一查訊明確按律定擬具奏耆齡現已補授福州將軍此案即歸徐宗幹專辦無所用其迴護如陳謙恩所控各節查明盡屬虛誣仍復

飾詞狡展即著仍遵前旨加以刑訊毋稍輕縱原呈著鈔給閱看將此諭令知之尋奏姚鏡圖母壽陳謙恩曾經往祝魯繼周催取親供該革員即畫押供認並非抑勒其應繳各款未據全完現在按款清查報聞又諭總理各國事務衙門奏請飭禁止商船運濟賊糧等語據稱自長江通商後不但洋商惟利是圖易以米糧濟賊即內地商船往往借豎洋旗闖過關卡暗以米糧運濟金陵賊匪近

聞江北之米商船任意裝載運赴金陵銷售船上亦並不借豎洋旗各關卡亦並非毫無覺察而淮安等關分卡希圖收稅裏下河一帶釐卡希圖抽取釐金一經徵完釐稅即不問其所之各情現在官軍徵兵籌餉規取金陵朝廷日深懸盼若有商船暗中濟賊攻勦安能得手關卡釐卡各員希圖抽收稅課明知故縱尤屬貪小利而忘大害實堪痛恨著李鴻章吳棠督同淮安關監督妥議章程將

前項情弊設法禁止嗣後如再明知故縱卽著李鴻章吳棠將管理關卡監督釐卡委員從嚴叅辦毋稍姑容將此由五百里諭知李鴻章吳棠並傳諭永存知之○又諭沈葆楨奏甯國逆匪繞由青陽竄至東流建德江省現籌堵剿等語據奏江省防軍隨同劉典剿賊於巖寺街贛南道王文瑞擊賊漁亭均有斬獲休祁兩路可以無虞而青陽兵守頗單甯國之賊繞由此路竄至建德東流一帶殷

家匪等處地方是江省信防稍鬆饒防更復喫緊沈葆楨飭令參將韓進春副將孫昌國水陸各軍前往鄱陽毗境扼截並催飭道員王德榜馳赴浮梁防所以為堵禦所籌尚屬周妥並據奏稱接曾國藩函知甯國各逆西竄已飭鮑超回軍南陵青陽一帶截剿惟此時賊蹤已至東流建德鮑超一軍勢難繞至賊前如果江省防兵布置得宜到處迎頭堵剿後路得有鮑超勁旅跟踪緊躡當不難收

前後夾擊之效著曾國藩卽飭該提督之軍乘機追剿並著沈葆楨嚴督饒防各路官軍探蹤迎擊與鮑超之軍隨時聯絡毋稍疏虞徽境之賊雖疊經堵剿而休甯尚未解圍尤恐賊因青陽一路不得逞志乘閒由徽休之路逞其圖犯江境詭謀並著左宗棠沈葆楨嚴飭徽屬及信防各軍加意嚴防毋稍鬆懈本日又據總理各國事務衙門奏請飭嚴禁商船運米濟賊等語著曾國藩督同各關監

督等妥議章程設法禁止以儆如再明知故縱卽由該督撫將管理關卡監督委員從嚴叅辦毋稍寬貸將此由六百里各諭令知之○又諭嚴樹森奏皖豫捻逆竄向東南追剿情形並駐紮黃州就近調度一摺捻逆陳大禧等由豫省竄擾光山擾及麻城之白果鎮等處經官文等調派總兵穆正春等進剿該匪折向東南現踞竹瓦店但店等處嚴樹森現已帶兵出省馳抵黃州之團風鎮扼紮就

近調度著官文嚴樹森即飭舒保成大吉等痛加遏勒以收夾擊之效現在賊勢逼近黃州雖距武漢較遠而與皖省潛山太湖一帶壤地相連深慮該逆蓄意東趨與巢含和一帶髮逆互相勾結嚴樹森務當督飭諸軍繞出賊前迎頭截勒毋得任賊竄入皖境致滋蔓延並著唐訓方選派兵勇激勵鄉團於交界地方嚴密堵遏毋令賊蹤闖入皖境前因此股捻匪竄入鄂疆諭令張之萬毛昶熙飭

令余際昌一軍會同楚師合力攻剿張之萬等務宜不分畛域飭令余際昌越境會剿毋許觀望遲延致滋貽誤將此由六百里各諭令知之○又諭前據多隆阿奏遵提罪犯謝開基及伊子謝順擬交大荔縣監禁並行文湖北派員提解當經諭令即照所議辦理茲據嚴樹森奏謝開基兩犯重辟實屬情真罪當無待質審而該犯頻年在桐泌一帶屢圖嘯聚黨類甚多遠道派員往提勢須撥隊押

解既乖政體萬一黨類先通消息致被中途截奪流毒更無底止所慮不為無見著多隆阿即行知照瑛榮飭令同州府知府大荔縣知縣速將謝開基凌遲處死其子謝順一犯如訊不知情律止緣坐即由瑛榮按律定擬多派兵役解交襄陽府收審原片著鈔給閱看將此諭令知之○予秦儒毛亨明儒呂枬從祀

文廟從江南道御史劉慶請也○丙寅諭內

閣唐訓方奏旌別道守牧令請將庸劣各員分別懲辦一摺安徽省頻年寇患戶口彫殘亟須慎選賢能之吏以挽頹俗而奠民生唐訓方於通省屬吏中留心察看所稱人地相宜將來大堪造就之廬州府知府唐景皋頤州府知府英翰安慶府知府陳濬署亳州知州李文森署六安州知州何家驄署定遠縣知縣李益林署靈璧縣知縣候補知府李銜華署休甯縣知縣李蔚均著交軍機處存記

至安徽候補縣丞石崇瑾捐納道員改名石乾行同鬼域署祁門縣知縣史懌恣貪鄙狡悍補用知縣談燮和奸險卑污候補知縣陳雨田奸邪刁詐均著革職永不敘用署阜陽縣知縣候補同知莫嘉煦糊塗卑鄙補用知縣景慶雲計便營私補用知縣沈鏤前署定遠縣任內刻民肥己均著革職署天長縣知縣文錫椿庸行有虧貪鄙不職前因天長失守業經革職著永不敘用○諭議政王軍機

大臣等劉長佑奏分軍勦匪獲勝籌防北路情形咨催僧格林沁先赴直境各摺片直隸竄匪經官軍擊敗後復分兩股一由隆平等處向西北竄逸一由平鄉等處向南路奔逃疊經徐廷楷等分路截勦頗有擒斬第該匪分合無定蹤跡飄忽非分紮步隊扼其竄路而以馬隊追勦不足以制其死命現在直省馬隊尚嫌單薄劉長佑初到直省人地究尚生疏僧格林沁於北路情形本係熟悉而威

望素著自能酌度緩急先清畿輔之患直隸股匪巢穴雖在山東然必須直隸賊蹤淨盡劉長佑督兵扼紮邊界屆時僧格林沁進兵東省可無後顧之患該大臣現在行抵何處著即統帶全軍迅赴直境督兵攻勦以期及早肅清毋為東匪牽掣將此由六百里各諭令知之○又諭劉長佑奏直隸餉需支絀請飭各省按月協撥銀兩等語現在直隸勦辦降眾股匪需餉孔亟而僧格林沁已統帶全

隊移營北來兵數益增餉項愈絀亟應豫為籌撥以濟要需著晏端書黃贊湯沈葆楨於廣東江西兩省每月各撥銀一萬兩官文嚴樹森毛鴻賓於湖南湖北兩省每月各撥銀七千兩徐宗幹英桂於福建山西兩省每月各撥銀六千兩各該省均著自四月起無論何款迅速如數籌撥按期委員解交直隸毋令缺乏畿疆重地關繫緊要官文等務當顧全大局設法撥濟不得以辦理防勦籌款維

艱稍存諉卸也將此由五百里各諭令知之○又諭唐訓方奏辦理善後並蒙城勦擒獲勝及請令馬新貽署理廬鳳道篆務各摺片蒙城巨捻賈汶彬現已殲除而張總愚程二老坎等尚復稽誅現在徐鶚等四營駐紮蒙毫之交王才秀亦駐蒙城僧格林沁復派馬步勇千名助勦為數已不為少如有餘匪蠢動或張總愚等大股回竄著唐訓方飭令該總兵等實力勦洗趕緊撲滅僧格林沁已督軍北上蒙毫一帶善後事宜唐訓方責無旁貸著相度機宜悉心籌辦新撫各圩降眾過多必須妥為彈壓方可消其反側至招集流亡撫綏瘡痍尤宜加意安輯毋令失所臨淮一帶現尚安謐唐訓方辦理蒙毫地方事務甚關緊要不必急於折赴臨淮馬新貽昨已簡放安徽按察使仍著駐紮蒙毫一帶督同英翰將穎宿等處勦撫各事宜妥為清理以期永遠相安方免流弊將此由五百里諭令

知之○又諭瑛榮奏沔縣失守漢中鳳翔等府軍情日緊一摺另片奏髮逆圍攻漢郡勢甚危急等語現在漢郡軍情日見緊迫而所調楚蜀各軍無一至者設有疏失後患曷可勝言據瑛榮奏接梁作楫周有全等來稟以未奉本省劄飭不敢出境援陝等語著官文嚴樹森懍遵前旨速飭李雲麟會同梁作楫等督率所部馳赴漢中援勦毋得稍有遲延致干重咎並著駱秉章遵照疊次寄諭先其所急迅飭周達武督勇星馳赴陝會合漢郡諸軍盡力勦洗毋稍推諉貽誤事機甄坪廩城復經邱振家等帶勇收復該團總屢著戰功著瑛榮飭令邱振家等隨時激勵團勇協助官軍勦賊如果續有勞績即著該撫據實奏請獎勵王夢麟折回後曾經諭令趕緊前赴鳳翔該郡被圍已久情形益緊著瑛榮飛催雷正綰迅由藍鄠一帶節節掃蕩直抵鳳郡瑛榮毋得以防守省垣疏通餉道為詞致

雷正綰再有牽掣。不能尅期進剿也。沔縣業經失陷。略陽又復告警。該撫疆寄躬膺。責無旁貸。何以毫無布置至此。並著妥籌兼顧。毋得再有貽誤。將此由六百里各諭令知之。○又諭毛鴻賓奏黔省苗教各匪復行勾合起事。現派兵勇越境援剿一摺。貴州苗教各匪叛服無常。最為楚南邊界巨患。此次思南石阡等處苗教各匪勾結起事。而銅仁之降匪蕭汶魁相繼復叛。擾及印江思州鎮遠施秉

各屬。黔省下游幾於無處非賊。毛鴻賓現派總兵周洪印等移師大魚塘扼要駐紮。並令參將楊洪明一營馳赴銅仁會剿。知府戈鑑副將滕加洪各守要地。所籌均極周密。即著督飭周洪印等軍嚴密布置。乘賊初起之時會合黔省官軍迅圖撲滅。以靖疆宇。上年楚軍越境援黔。援粵所向有功。具見該撫不分畛域辦事認真。此時所派各軍皆係得力勁旅。諒必能奮勇殺賊。保境恤鄰也。毛鴻賓另

摺奏湖南釐金辦有成效。請仍照舊經理等語。所陳均係實在情形。即著照舊辦理。毋庸另議。更張該撫仍隨時認真稽覈。毋令日久弊生。以收裕餉便民之效。將此由六百里諭令知之。○又諭韓超奏逆匪竄擾江內。經官軍截擊全勝。內江肅清一摺。逆匪何二強盜糾約苗匪竄入江內。占踞黃精大小頂卡。四出分竄。經總兵羅孝連等督隊先後擊退。攻克賊巢多處。該匪悉竄外江而去。韓超現已

分派各軍過江進剿。即著嚴飭各路兵勇乘勝追剿。並飭各該地方文武所轄地面派團一體堵禦。務將賊氛迅速掃蕩。毋任再至。內竄本日據毛鴻賓奏黔省苗教各匪分股竄擾銅仁思州青谿等處。下游各郡幾於無處非賊。毛鴻賓已飭總兵周洪印等移師大魚塘。就所部抽撥參將楊洪明一營馳赴銅仁與黔省官兵聯絡防剿。著韓超迅飭黔省帶兵將士與楊洪明會合夾擊。痛殲醜類。張亮

基現在尚未到黔韓超責無旁貸務宜振刷精神嚴督各路將士迅掃賊氛將此由五百里諭令知之○又諭韓超奏前任思州府知府高振洛前署玉屏縣知縣候補同知直隸州陸用康前署畢節縣知縣候補同知汪金麟經田興恕先後奏參革職高振洛陸用康於被參後在思州鎮遠一帶帶團勦匪疊次獲勝勤奮出力汪金麟於上年匪竄遵義黔西時該革員募練集團赴烏江一帶堵擊斬

獲甚多尚知愧奮均請開復原官等語所奏是否可憑著張亮基確切查明詳晰具奏韓超原片著鈔給閱看本日據韓超奏逆匪何二強盜經官軍擊退江內地面一律肅清等語著張亮基到省後即將該省現辦軍務情形迅速詳細奏聞將此由六百里諭令知之○改丁憂甘肅提督馬德昭為署任仍留陝西勦賊並賞銀四百兩治喪○以江西弋陽縣捐輸團練永廣學額三名以陝西省城

防守出力賞道員德純遊擊劉科甲等花翎知縣王浩等藍翎餘加銜升敘開復有差○以貴州節次克復城池暨防勦出力賞守備莫芝茂等花翎縣丞張炳坤等藍翎餘加銜升敘有差

大清穆宗繼天開運受中居正保大定功聖智誠孝信敏恭寬毅皇帝實錄卷之六十一

大清穆宗繼天開運受中居正保大定功聖智
誠孝信敏恭寬毅皇帝實錄卷之六十二

秋

同治二年癸亥三月丁卯諭內閣前署漕運

總督江甯布政使王夢齡曾於咸豐十一年
十一月間令其來京以五品京堂候補迄今
已逾年餘該員尚未抵京顯係任意延宕王
夢齡著即勒令休致 又諭前因侍衛吉勒
圖善在都興阿軍營縱容兵丁聚賭並將委
參領德壽等擅行鞭責當照兵部所議即行
革職並不准其留營茲據都興阿奏稱吉勒
圖善自被參後尚知愧奮該革員兼有公中
佐領可否以佐領留營差委等語四等侍衛

吉勒圖善業經革職其所兼公中佐領已一
併革去該革員任性妄為難期得力著仍遵
前旨不准留營以肅營規而懲頑劣 又諭
曾國藩奏遵保堪勝水師總兵人員一摺記
名總兵王吉彭楚漢周惠堂譚勝達均著交
軍機處記名遇有水師總兵缺出請旨簡放
又諭曾國藩奏逆賊竄陷浦口江浦兩城
並橋林要隘李世忠引咎自請革職撤去勇
號據情代奏並曾國藩自請議處一摺據稱

九洑州浦口各營自被粵逆圍攻後糧路梗
塞軍火無繼賊黨驟增二萬餘名四面環攻
該將弁等堵禦兩晝夜勢難再振遂將浦口
各營撤回江浦城內該逆繞城密圍城中食
盡火藥又罄該將弁等冒死潰圍而出其橋
林營盤復被賊眾六七萬開放巨礮轟塌礮
臺緣梯直上並踰濠越牆而進守將邱昌良
身受重傷退至大勝橋以致江浦浦口橋林
被陷李世忠具呈自請革職撤去勇號不准

留營另請派員接辦據情代奏請旨等語李世忠以提督大員辦理浦口等處防務不能竭力固守以致營盤被陷咎實難辭卽照其自請予以嚴譴亦所應得惟念該提督此次失守各營實因糧盡援絕眾寡不敵尚非有心貽誤上年攻克六合等城頗著戰功該提督業因另案革職留任著加恩撤去幫辦軍務免其革職以示薄懲該提督疊經朝廷恩施逾格始終保全嗣後務當奮勇殺賊立功

堅守滁州六合等處毋為賊擾以贖前愆曾國藩節制江浙提鎮各員不能申明約束先事籌防致令江浦等城失陷實屬調度無方著交部議處仍著該大臣嚴督李世忠在營各將弁明定賞罰迅圖恢復毋任稽延尋吏部議曾國藩照不應重公罪例降二級留任從之 諭議政王軍機大臣等曾國藩奏賊渡九洑州攻陷浦口江浦兩城及橋林要隘並密陳李世忠挾賊自重情形請撤去幫辦

軍務仍准留營及皖南逆匪上竄闖入江西之彭澤鄱陽境內各摺片李世忠眾架驚不馴平日擁眾自雄斷不肯遽釋兵柄誠如該大臣所奏該提督自請革職不准留營之處未必出於至誠現在江浦等城隘被陷偽忠逆復率眾猛撲石澗埠營盤江北軍情正當喫緊天六一帶防勦亦不可鬆勁若竟准李世忠所請則該提督轉得置身事外將來接統其眾者或暗與賊通或公然犯順李世忠皆

得諉為不知朝廷又豈能無故加之以罪此等詭謀該大臣想亦知之甚悉已明降諭旨將李世忠撤去幫辦仍留本任並將曾國藩交部議處矣本日據都興阿等奏稱賊竄江浦之時駐防豫勝營兵勇被賊擄去者不少今擬竄蔣壩圖犯裏下河之舉卽係此起投賊之勇擬為引導等語是其自陳竭力苦戰情形恐不可信且其呈稱橋林守將邱昌良家眷尚在該處營陷後該將因受傷退至大

勝關各等語現在邱昌良家眷是否尚在賊中大勝關偏近雨花臺大營邱昌良何以到彼養病有無偵探詭謀必須加意查察此時髮逆紛竄江北原未可激之生變另起一波而尾大不掉終為異日之患曾國藩前有李世忠部卒疑貳且不善戰激變亦不足慮之奏諒該大臣已有成算在胸嗣後李世忠之舉動務須隨時訶察其如何設法鈐制之處惟在該大臣隨時相機辦理不為遙制皖南

大股逆賊由建德闌入彭澤鄱陽鮑超改旆渡江既不克赴援景鎮卽曾國藩所調之喻吉三李榕各營亦落賊後江省素無大支勁旅恐不足以禦茲狂寇江忠義一軍計日亦應東下著該大臣一面飛催前進一面酌量情形如果屆期巢舍等處兵力足敷勦辦此軍卽可令其改道馳赴饒州一帶迎頭截擊如賊已竄入腹地能否飭調該提督駐師江境相機進勦並飭喻吉三等拔營追躡俾與

江省各軍收夾擊之效均著該大臣迅籌辦理江省為浙皖諸軍後路關繫東南大局該大臣身膺重寄諒能妥籌援應與沈葆楨共相維持不至有誤事機密片著留中將此由六百里密諭知之又諭都興阿等奏水師勦賊獲勝兼陳陸路軍情並請簡派大員督辦糧臺各一摺另片奏遊擊李世恆索餉滋事派員赴泰查辦等語揚防水師於上游之七里洲等處下游之圩塘各港口疊獲勝仗

而上自包港下至江陰石牌處處均有賊蹤時思北竄亟應嚴密防範著都興阿等督飭上下游水師統領實力梭巡相機勦截如下游情形喫緊卽著富明阿馳赴靖泰一帶嚴防毋得稍涉鬆勁至江浦之賊議欲分股窺犯儀揚牽掣我軍餘逆悉由和州等處合窺蔣壩從裏下河後路包抄是逆情詭譎將圖大逞且擬竄蔣壩之舉卽係豫勝營投賊之勇擬為引導尤不可不加意嚴防本日已將

吳棠補授漕運總督並明降諭旨將江北軍務地方一切事宜均仍歸吳棠節制該漕督責無旁貸所有將壩等處要隘卽著吳棠嚴飭在防將士實力扼守不得稍涉大意都興阿等仍隨時會籌防勦保全完善要區是為至要許道身既呼應不靈已降旨毋庸辦理糧臺以喬松年補授江甯藩司專辦江南北糧臺矣專摺奏事一節體制未協且恐他處糧臺紛紛效尤所有糧臺應辦事宜喬松年

宜隨時稟商吳棠都興阿等卽由吳棠陳奏以一事權該藩司雖專辦糧臺遇有地方應辦公事並著稟商吳棠實力經理整頓一切毋許推諉北渡難民露宿江灘顛沛流離情殊可憫第人數較眾恐易聚而生事仍著都興阿吳棠等飭屬妥為辦理應拊循者加意拊循應盤詰者嚴加盤詰務令難民不至失所而奸宄不能涸跡方為妥善江北糧臺專供揚防軍需乃李世忠營中遊擊李世恆膽

敢在泰需索軍火帶隊赴臺開放洋槍藉端滋擾實屬目無法紀都興阿等現派副將刁經明等前往查辦卽著飭令認真嚴查將為首滋事之人卽行正法並將李世恆拏獲嚴訊按照軍法從事以儆兇頑將此由六百里諭知都興阿富明阿吳棠並傳諭喬松年知之○禮部以會試中額請得旨滿洲取中七名蒙古取中二名漢軍取中五名直隸取中二十名奉天取中三名山東取中十八名山

西取中七名河南取中十九名陝甘取中六名江蘇取中十四名安徽取中七名浙江取中十一名江西取中十七名湖北取中十一名湖南取中八名福建取中八名廣東取中十二名廣西取中十一名四川取中五名雲南取中三名貴州取中三名○實授江南江甯布政使吳棠漕運總督仍節制江北軍務○以兩淮鹽運使喬松年為江南江甯布政使並辦理江南北糧臺事務○予安徽甯國

陣亡參將李芳菲等二十六員祭葬世職加等○戊辰諭議政王軍機大臣等譚廷襄奏擒會各匪竄徧淄川擬回顧省垣仍留軍東昌一摺李城餘黨及張守義等匪由萊蕪縣境竄至博山徑撲淄川欲與劉得培股匪合併雖經副將范正坦在龍口山截勒未容聯合而淄川城內賊匪已由東關撲出高唐青州兵失利移營城北東關無兵扼紮儻兩股匪蹤合併則勢成燎原長山鄒平章邱等縣

路路可虞更恐延及省垣譚廷襄因省東防守空虛擬派兵回顧省垣隨即回省並留軍東昌揆捕餘匪惟莘堂冠館等屬雖僅餘逃散零匪而直隸股匪紛竄靡定難保不渡河而東復回老巢前因畿南軍情緊要諭令僧格林沁移師直境先清畿輔再赴東省此時重兵俱聚河西莘堂等屬兵力較單深慮賊匪乘隙東渡譚廷襄務當嚴密布置將該處防務辦理妥協後再行斟酌緩急相機回省

毋得顧此失彼東路賊匪若由淄川西趨省垣則鄒平章邱均係經由大路該撫務須派撥兵勇前往迎截並迅飭德楞額富和及楊通廉各軍繞至西北將擒匪一股徧向東南毋令與淄川股匪合併西徧省垣是為至要雷鳳鳴勇隊既經調赴淄川即著譚廷襄飭令曾逢年妥為駕馭並嚴加約束毋許於經過地方逗遛滋擾宋景詩勇隊留交保德防堵莘堂等處能否靜聽約束仍著譚廷襄酌

度情形隨時留心防範毋稍大意將此由六百里諭令知之又諭多隆阿奏遵旨覆奏近日軍情一摺倉頭賊巢中隔孝義喬千等鎮雖因軍馬疲乏未能得手然亦不可示之以弱自當簡選精銳更番輪替使該逆不得休息俟各營疾疫稍平然後出奇制勝自不難一鼓攻克該大臣瘡疾未平內疾復作著再行賞假二十日在營安心調理王萬年等槍傷是否平復著隨時查奏以聞軍士前因

村鎮井水不潔飲之多生疾病現更多瘋癲
輭腳之證回性兇狡恐其於河水上流置毒
可多鑿新井以汲水或多置解毒之藥於水
中並可將疾疫之人另為一營派弁照料毋
令仍居大營以免傳染至所稱掘得窖銀二
十餘萬兩前已奏充正餉嗣後並無掘得三
百餘萬兩之事請派員查驗等情朝廷前有
風聞原知或係訛言未必真確不得不一為
垂詢嗣復據熙麟奏稱聞營內掘得多金故

有撥二三十萬兩赴甘充餉之諭既據該將
軍奏聞並無其事自係實情況前此數萬及
二十餘萬兩疊據多隆阿詳悉奏聞果有如
此鉅款諒該大臣斷無不奏之理省城兵力
實不為單乃聞逆回游騎竟敢於郭門之外
營壘之旁追殺漢民焚毀村莊以致糧路不
通人心疑懼瑛榮身任疆圻全無布置實堪
痛恨著穆騰阿瑛榮將省城存兵若干詳細
查奏應留若干守城若干駐紮城外其餘俱

須分別隊伍自近而遠步步進紮遇賊即剿
既可疏通餉道並免該逆擾近城垣毋再擁
兵自衛一籌莫展株守貽誤致干重咎嗣後
多隆阿奏報如不甚關緊要者著毋庸發
六百里加緊以示區別而符體制將此由六
百里各諭令知之○撥武備院箭五萬枝工
部火藥十萬斤解赴欽差大臣多隆阿軍營
備用○己巳
萬壽節遣官祭

太廟後殿 遣官祭

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵（遣官祭）

文宗顯皇帝

孝德顯皇后暫安寢殿（遣官祭）

顯佑宮

東嶽廟

城隍廟（）

上詣

大高殿

壽皇殿行禮、詣綏履殿

慈安皇太后前行禮平安室

慈禧皇太后前行禮（御乾清宮王以下文武

大臣暨蒙古王貝勒貝子公等行禮）眾官於

午門外行禮、諭議政王軍機大臣等熙麟

奏平涼緊急請飭派兵赴平會剿一摺據奏

甯州鄰近白吉原地方本有陝回勾結近又

有三原回匪竄至復有宜君回匪盤踞三水

土橋而平涼府城為回匪攻撲勢甚猖獗涇

甯二州又俱戒嚴該督現由慶陽派勇赴援

而為數無多暫紮涇州要隘以扼陝甘兩省

之衝並已咨行甯夏派撥滿營官兵五百名

赴平會剿即著該將軍如數派撥迅速前往

熙麟仍當添募壯勇赴涇與滿兵會合進取

力解平涼之圍該督身任兼圻責無旁貸當

此事機緊要惟當竭力以圖補救恩麟前奏

甘省各路布置尚周自應隨時妥為策應不

得以熙麟現到慶陽於甘境東南一路輒思

諉卸並著熙麟將籌兵籌餉各事宜商同辦

理延綏官兵頭起已到定邊兩旗蒙兵亦由

該縣前赴固原並著飛催前進仍將各路後

起之兵星速催提前來俟陸續到齊即著熙

麟相機調遣驛遞軍報極關緊要所請由韓

城洛川各州縣添設腰站安化定邊等屬暫

行雇募走卒之處卽照所議辦理將此由六百里各諭令知之 又諭熙麟奏甘餉支絀晉省未能如額報解請飭四川將按糧津貼銀兩儘數撥解等語甘肅平涼被圍甚急前此河東撥餉十三萬兩尚在圍城之中此外毫無指望兵勇罄罄待哺情形萬分危急四川前辦按糧津貼如有可撥之款著駱秉章酌量撥解若干前赴甘肅慶陽軍營以濟眉急甘省固原未復平涼又復被圍該省軍務

緊急而各路援兵未到熊煥章所募川勇二千名此時亦尚無到甘信息並著駱秉章飛催前往卽赴慶陽候熙麟調遣山西協甘之餉欠解甚多著英桂督飭該藩司趕緊籌撥源源報解以顧邊陲而維大局將此由六百里各諭令知之 撥火器營火箭三千枝武備院擡槍一百桿烏槍二百桿解赴甘肅慶陽軍營備用 庚午諭議政王軍機大臣等唐訓方奏密陳苗練叛跡復著請飭僧格林

沁等會勘一摺據稱苗練所撤隊伍藏於渦河兩岸蠶食新撫各圩且增修懷遠縣城添隊死踞其散練歸農之議則以僧格林沁殺姜台凌為詞煽惑眾志以圖先發制人唐訓方所部糧舟小隊往來渦河皆被攔奪現擬率親軍四營由宿州馳回臨淮力顧根本惟逆眾且悍詭譎百出較直東股匪輕重緩急判若天淵請飭僧格林沁來皖曾國藩李續宜撥兵會合堵剿各等語僧格林沁兼程北

來日內計已馳抵東省此時若卽令其折回蒙毫不但徒勞往返且恐直東匪眾聞風思逞餘燄復張著仍遵前旨先將直隸股匪全數剿滅再赴東境酌量賊情分別剿辦俾畿輔重地迅就肅清將來移師皖境庶無後路牽掣之虞僧格林沁駐皖已久於苗練情形知之甚悉該練叛逆既著唐訓方兵分力單雖經僧格林沁酌留馬勇千名亦恐不敷剿辦該大臣仍當設法援應其應如何辦理之

處卽著詳細奏聞。唐訓方現已馳回臨淮。力扼東路。西南壽州正陽霍邱一帶防兵已撤。甚覺空虛。曾國藩前奏所部兵勇制髮逆則不足。制苗練則有餘。諒能先事籌維。妥為布置。李續宜現在行抵何處。著曾國藩迅速咨催。令其星馳赴皖。與曾國藩熟商。將壽州等處要隘派兵扼剿。截其南竄之路。唐訓方就現有兵力分投防剿。毋稍疏虞。毫餘匪未淨儻為苗練勾結。勢益鳴張。且新撫各圩亦

當力為保護。俾為我用。著飭馬新貽督同蒙亳一帶地方員弁。妥為經理。苗沛霖屢降屢叛。被脅各圩未必甘心從逆。唐訓方仍當出示曉諭。剴切開導。令附近良圩不至為苗練所煽誘。或卽懸立賞格。其有擒獻首逆協助官軍殺賊者。卽著該署撫奏請破格獎勵。庶賊黨日孤。剿辦較易得手。將此由六百里各密諭知之。以江蘇高郵辦理糧臺出力。予道員許如駿等優敘。賞知府金成等花翎。縣

丞金養瀾藍翎。○壬申諭內閣。前因僧格林沁等奏保剿擒出力人員。當經降旨。將侍衛托倫布隆春。以陸路總兵用。並賞加勇號。副都統舒通額。蘇克金。賞穿黃馬褂。茲據僧格林沁等奏稱。查明前次請獎單內。開寫聲敘未能明晰。請分別撤銷改獎等語。侍衛托倫布隆春。既經得有勇號。所有前次以陸路總兵用之處。著卽撤銷。阿勒楚喀副都統舒通額。著改為以都統記名。簡放福州副都統。蘇

克金著改為賞給頭品頂帶。諭議政王軍機大臣等。僧格林沁奏督軍馳至山東。先將竄擒剿辦獲勝。現擬進攻淄川。暨遵查宋景詩等情形。各摺片。僧格林沁因探悉擒匪李城餘黨。與張守義等各股擾及泰安等處。遂由濟陽改道甯陽前進。派令趙康侯等步隊駐紮鄒縣。該大臣會合德楞額之軍。在淄川迤東進剿。雖連日疊有斬擒。而該匪盤踞淄川城東。暗與城賊勾合。經官軍追至狼山均

遁入淄川城內該大臣現紮淄川城北一俟礮位到齊卽行移營進逼賊巢相機攻勦所辦甚合機宜著卽催提礮位到齊激勵各軍乘機進取務將劉得培等兇渠就地殲擒毋任外竄直隸股匪雖有蘇克金等軍勦辦該大臣如能早靖東匪迅速來直必更得力所查宋景詩等情形均悉卽照所議妥為駕馭仍將雷鳳鳴是否曾有擅殺海軍馬隊情事查明辦理正在寄諭間譚廷襄奏到籌防東

路並攻克嶧山七寨收復雲谷香山賊巢現仍催兵進勦遵查王洛月等各摺片嶧山與鳳凰山東西犄角而雲谷山久為嶧匪巨巢此次官軍設法攻取辦理尚為得手惟現在嶧山餘匪遁回老巢雲谷山敗匪併入鳳凰山合夥負隅恃為逋逃淵藪必須乘勢迅速攻擣著譚廷襄嚴飭恩錫等速籌進取嚴防各匪乘間奔突並著飛催黃國瑞乘此聲威速將蘭費餘匪殄除掃蕩附近一帶賊巢以

靖地方鳳凰山賊勢既孤攻勦較易為力著卽飭趙康侯何建鰲步隊會合恩錫等併力攻取僧格林沁卽可就近督飭相機勦辦譚廷襄現已回省著卽嚴飭曾逢年等速將淄城兗濠等事剋日妥辦豫備僧格林沁大軍進攻毋稍延誤山東省城至章邱鄒平一帶防務並著妥為布置責成守備張大富等認真防勦畿南股匪現飭劉長佑督飭諸軍辦理僧格林沁仍應隨時偵探與劉長佑聲息

聯絡催飭蘇克金星速前進與恆齡馬隊合力馳勦仍將譚廷襄督飭保德將冠縣堂邑一帶餘孽掃除務淨並嚴防河西敗匪回竄與直省官軍隨時策應毋再任賊往來自如致干咎戾所查王洛月卽王冠珠現在恩縣並未回籍滋事其弟王貫三等亦均未在東等情仍著隨時詳細訪查毋令奸匪得以潛匿將此由六百里各諭令知之 又諭張之萬奏皖匪竄徧豫疆派兵堵勦並飭余際昌

回豫各摺片皖省朱圩踞匪因僧格林沁派兵往勦避兵竄出糾集各黨四出焚掠甚屬猖獗張曜等各營兵力過單現在攻勦項城等處各匪勢難兼顧該撫已將派赴河北堵勦之款天印一軍調回輔以劉自順馬隊令其馳赴沈邱探明賊蹤所向迎頭截擊著張之萬毛昶熙卽飭該參將等迅速進兵一面激勵鄉團隨同助勦毋令寇蹤闖入邊境並飭張曜尹嘉賓速將尚店袁安愚等寨土匪

撲滅免致勾結為患此股捻匪本係皖省餘燼現復擾及兩省邊界誠恐此勦彼竄蔓延日廣著唐訓方迅卽派兵會合豫軍兩面夾擊以期及早肅清毋稍遲延觀望致誤事機直隸賊匪蹤跡飄忽分合靡常現在廣平大名一帶紛竄難保不再擾豫疆蘇克金現已管帶馬隊擬由河南衛輝一帶前進著張之萬速行咨催令其迅赴直隸迎頭堵擊並嚴飭楊長春等軍扼守臨漳內黃一帶不可任

令匪蹤竄入僧格林沁現已督兵行抵山東淄川縣境攻勦踞城賊匪及竄入淄城之李城餘黨股匪勢難遽回皖省俟東省直隸軍務次第肅清再行移師南下唐訓方惟當聯絡渦河南北民圩協助官軍毋令被苗練裹脅並將壽鳳兩處城鄉兵團嚴密布置相機進勦余際昌越境追賊已及麻城兵疲餉乏勢難再行前進張之萬因廬州戒嚴該省逼近皖疆飭令該總兵回豫酌留三營分防商

固邊境餘兵俱撤回汝郡著卽照所擬辦理陳大澐等股匪既擾至蘄州有謀竄黃梅廣濟宿松東下之說則黃州東路防堵益當嚴密官文嚴樹森務當督飭諸軍繞向東路兜截迅將該匪就地殲除不得以驅賊出境卽為了事穆正春等各軍尚紮巴河楊朝林一軍由白杲進紮黃麻坳成大吉一軍屯紮圍坡均距蘄州數十里何以尚未接仗著官文等查明具奏並著嚴督諸軍速行進勦毋任

玩延將此由六百里各諭令知之。又諭張之萬奏請飭撥天津炸礮等語。皖豫捻逆屯踞正陽項城新蔡阜陽等處。牆峻濠深。芻糧火藥充牣。其中勝則肆擾。敗則負固死守。官軍肉薄。徒傷精銳。不若借資火器相機轟擊。攻勦較易得手。天津所鑄炸礮。如尚有存儲。自應量為分撥。著劉長佑崇厚迅速查明天津新鑄炸礮。現在有無存儲。如能照該撫所請撥給五尊或八尊。解赴豫營。著即配齊合

鏜炸礮子五六百出。趕緊解交河南張之萬軍營。並著揀派善於施放之員弁兵丁管解前往。此項弁兵到豫後。即著留於豫省軍營交張之萬調遣。仍一面先行覆奏。至由天津撥給炸礮礮子。此項鑄造經費。仍由河南籌銀撥還津局。以清款項。山東李鴻章餘黨。經僧格林沁擊敗後。竄入淄川。與劉得培股匪互相勾結。此時僧格林沁一軍不得不先其所急。將淄匪掃除。再行移師赴直。惟現在直隸

股匪恐其日益蔓延。劉長佑身膺疆寄。責無旁貸。著即就現有兵力認真攻勦。仍隨時與僧格林沁會同籌商妥為辦理。毋稍鬆勁。將此由五百里各諭令知之。以太僕寺卿汪元方為通政使司通政使。以山東嶧縣攻克賊寨。賞知州張體健花翎。餘加銜升敘。開復有差。 癸酉

上復詣

大高殿祈雨行禮 遣恭親王奕訢詣

時應宮惇親王奕誥詣

昭顯廟鍾郡王奕詒詣

宣仁廟孚郡王奕譞詣

凝和廟拈香。諭內閣本年入春以來雨澤稀少。疊經虔申祈禱。尚未渥霑甘霖。因思天心與民心默相感召。近來各該問刑衙門疲玩之習。牢不可破。於現審案件往往積壓不辦。甚至株連無辜。羈禁囹圄累月。經年以致愁苦之氣上干天和。亟應破除積習。以消沴

戾著問刑衙門將現審案件逐一趕緊清理務當速審速結無枉無縱毋再任意延閣致滋拖累以示矜恤而迓和甘 又諭前因駱秉章韓超各奏雲南省城被匪襲陷督撫司道均被戕害當經降旨令駱秉章派兵援勦該省文武下落及督撫司道等死難情形一併詳查具奏乃本日忽據徐之銘報稱迤西逆匪杜汶秀勾結武定嵩明尋甸等處賊匪於正月初旬帶練眾數千先後至省十三日

馬榮又帶練三千來省署總督潘鐸令將該練等攔截在城外住宿止准馬榮帶跟丁五六十人入城十五日潘鐸在南門彈壓復親赴五華書院勸諭解散該逆等抗不遵依卒然鼓譟該署督身受六傷登時遇害徐之銘會同署藩司岑毓英等分投巷戰署雲南府知府黃培林署昆明縣知縣翟怡曾均力戰陣亡二月初一日署總兵馬如龍帶隊進城將五華書院等處賊營攻破生擒偽都督李

俊並將偽都督馬士麟殺斃城內一律肅清並於李俊身邊搜獲杜逆所給偽劄當將李俊凌遲處死各等語與駱秉章等前奏大相歧異徐之銘在滇有年於回眾勾結進城未能先事防範致令督臣被戕府縣殉難該撫尚覲然苟活實屬咎無可辭徐之銘著卽革職來京聽候議罪署雲貴總督潘鐸萬里赴滇不避艱險卒能見危授命大節凜然實堪痛惜潘鐸著加恩照總督陣亡例交部從優

議卹並入祀雲南省城昭忠祠其靈柩由雲南回京時著沿途地方官妥為照料伊子四人著俟服闋後由吏部帶領引見尋予祭葬世職謚忠毅 諭議政王軍機大臣等御史陳寯奏直隸奉天未經報舉黑地請飭催查一摺據稱直隸近畿一帶及奉天大小凌河等處呈報黑地者俱有部文行查至今除昌平州外升科者甚屬寥寥均由地方官吏徵收入己且遇報地之人奉部行查必多方勒

索令其認誣甚或加以非刑等語地方官徵收錢糧絲毫皆應歸公豈容任意隱匿若如該御史所奏竟有將呈報黑地私行徵收延不呈報升科甚有將報地之人抑勒刑逼令其認誣者實屬可惡著萬青藜林壽圖劉長佑將順天直隸所屬各州縣呈報之黑地確切查明並著玉明和潤德椿恩合於奉天錦州所屬地方一律清查其大小凌河等處已經報部之黑地並著速行詳查報明戶部存

案其漏未呈報者一併清查該兼尹府尹將軍總督副都統等務須揀派妥員分路查勘認真清理固不得率行招告致啟奸民攘奪之風亦不得任聽州縣藉詞延宕如有隱匿稽遲卽行據實叅辦毋稍徇隱原摺著鈔給閱看將此各諭令知之 又諭徐之銘奏迤西逆匪杜汶秀勾結武定等處賊匪謀襲省城署督臣等被戕現經勦辦省城內外一律肅清一摺前因駱秉章韓超先後奏報雲南

省城失陷當經降旨宣布寄諭駱秉章等以川黔軍務均尚未竣勢難卽行進剿惟當力守東昭防賊四竄於川黔接壤處所一體嚴防以為他日進兵地步茲據徐之銘所奏雲南省城失陷情形與前駱秉章等所奏均各歧異閱徐之銘所奏迤西逆匪杜汶秀遣其偽大都督李俊等乘馬如龍出省未回勾結武定嵩尋等處回匪數千賺入省城經督臣

潘鐸在五華書院被戕回匪全擁入城徐之銘赴掌回教馬德新寓所會議防守並好言撫慰飛催馬如龍檄調各路練勇於二月初一日回省商同署藩司岑毓英等分投攻打城內賊營賊已敗潰出城城內肅清並將擒獲之李俊等處死等情種種支離殊難憑信雲南省城現在情形殆不堪問賈洪詔亟應赴任惟貿然前往於事亦屬無濟著卽仍遵前旨率同林鴻年等前赴昭東駐紮將滇省

實在情形確查具奏並卽出示曉諭仍分良莠不分漢回一切持平辦理將徐之銘屢有被叅之案此次省城之變自請治罪朝廷另簡該撫赴滇係為安輯地方並非以徐之銘撫回為罪等語剴切開示以杜奸人從中煽惑韓超前派李有恆帶兵馳赴東昭援勦兵力尚單曾經諭令駱秉章酌派官軍前往協同防守所有東昭各軍卽著賈洪詔妥為統率以資鎮遏張亮基何日行抵黔省勞崇光

計亦可到卽著會同將滇省情形偵查的實如何辦理與駱秉章熟籌迅速具奏此時川黔與滇接壤各路防堵尤應嚴密該督撫等務當妥為布置以防奔突並為將來進勦地步張亮基未到以前韓超仍屬責無旁貸不得輒思諉卸潘鐸帶有家丁八人是否均被戕害著駱秉章賈洪詔查明詢悉此事啟釁根由具奏徐之銘原摺著鈔給駱秉章等閱看將此由六百里各諭令知之 予雲南省

城殉難署知府黃培林署知縣翟怡曾千總鄭秉忠沈國標祭葬世職加等 甲戌諭內閣著齡奏甄別貪劣不職各員請旨革職一摺福建候補同知章基操守平常屢遭物議候補同知許廷昌委辦釐捐諸多弊混候補同知王于宗委辦捐輸卑污貪鄙候補同知慶琛不洽輿情詔安縣知縣錢寶懿任性妄為勸捐尤多流弊候補知縣吳榮鄙陋無能難期振作候補知縣丁嘉瑚當差嬾惰吏治

茫然候補知縣李鉞品行卑鄙惟利是趨試用從九品葉珍當差懈怠試用未入流丁桂芬言多荒謬崇安縣典史胡世亨不守官箴致招物議均著一併革職章基慶琛錢寶懿吳榮丁嘉瑚李鉞等所有承辦捐釐舞弊縱容兵役械鬪及欠解地丁糧米均著各歸本案交左宗棠徐宗幹查辦參追 諭議政王軍機大臣等劉長佑奏親督各軍截勦股匪殆盡餘匪悉數渡河一摺另片奏東省革堂

冠館之間賊巢林立請飭山東撫臣於大兵進剿之日調派柳林團勇助剿等語逆匪竄擾直境分南北兩股意在牽掣官軍經劉長佑督飭各路帶兵文武員弁合力兜剿先後在冀州沙河臨洺等處殲斃賊匪甚多該匪被剿狂奔由尖莊東北之蔣家莊等處悉數渡河著劉長佑督同臬司迅將河西防守事宜嚴密布置並酌派馬步各軍齊赴沿河擇要駐紮力杜回竄之路河東捻教各匪甚多

該匪現已竄回老巢東省官軍亟應盡力勦洗著譚廷襄嚴飭保德督率各營兵勇會同直隸各軍將竄回河東股匪兩路夾攻務須責令悉數殲除不可粉飾遷延再貽後患僧格林沁進兵淄川蕞爾縣城諒不難剋期攻拔此股竄回河東之匪如東省兵力不敷分剿仍著該大臣妥籌策應東省匪徒蔓延十餘州縣匪首之多以革冠為最百姓被其煽惑脅從以致良莠不分將來大兵進剿該匪

散歸各縣各村甲長既不敢據實舉報地方官復從而諱飾之凱撤後該匪乘間嘯集餘燼復然貽患伊于胡底堂邑之柳林團不肯從賊各匪與之為仇誓必破其團而後快朝廷早有所聞該團勢成孤立若地方官與之聯為指臂該團無不樂効前驅著僧格林沁譚廷襄選派明幹大員酌調該團勇丁隨營助剿導引前路庶可以指賊所在按殺無遺被脅良民亦不至無辜被戮程順書李汶光臨陣乞降日久終恐反側劉長佑現雖設法羈縻務須妥籌區處將此由五百里各諭令知之又諭耆齡奏臺灣官軍剿匪情形添派曾元福馳往夾剿及嘉義解圍並遵將閩省援師分駐金處各屬情形各摺片臺灣逆匪本係烏合之眾乃勦辦幾及一年兵勇愈多而未能得手即此次嘉義解圍亦屬笨港紳民之力居多是否吳鴻源等不能得力抑係事無專責各相觀望該郡為閩省屏蔽豈

可任令肆擾現在義勇等得有勝仗軍聲漸振左宗棠雖駐紮嚴州相距較遠第身膺兼圻責無旁貸該督曉暢戎機即著統籌全局嚴飭各將士迅將斗六彰化克復及早藏事並著徐宗幹洪毓琛就近商辦毋任稽延者齡援浙各軍前諭統歸左宗棠調度現在分紮東陽等處尚足為後路聲援惟據該將軍奏稱經費支絀量為裁減左宗棠所統兵勇是否足敷布置儻閩軍尚可裁減自應酌量

裁汰以節餉需並著該督妥籌辦理以副委任將此由六百里諭知左宗棠徐宗幹並傳諭洪毓琛知之又諭前因已革呼徵呼圖克圖解送到京特派文祥會同都察院堂官審辦並令將滿慶先後奏報情形彙案秉公查覈茲據該大臣等查明覆奏據稱呼徵不能約束僧俗致因布施小事啟釁實有應得之咎惟據供稱滿慶調汪曲結布來藏曾收受元寶八十箇案關徇私納賄虛實均應徹

底根究至滿慶所奏呼徵專權驕橫調兵滋事並使蒙古喇嘛假冒王公名色及拆橋逃遁各情均與呼徵現供不符請飭福濟會同景紋逐款訊辦等語呼徵呈訴汪曲結布賄送滿慶元寶一節雖據供稱傳說之張喇嘛業已身故無憑提質惟滿慶前後各摺始則奏請京中能事喇嘛赴藏繼又懇派汪曲結布輔佐達賴喇嘛已屬自相矛盾又屢次奏報均稱兩造鬪殺該大臣開導勸解迨奉旨

查詢呼徵逃走情形又稱諭令僧俗圍住惜德寺並派兵追緝呼徵是此事皆由滿慶主持調派尤與前後情節不符且汪曲結布果係外番畏服何以當呼徵稟革之時滿慶不為保留且回文內稱辦理甚善前據駱秉章奏查訪西藏啟釁情形一摺亦與滿慶奏報情形迥異種種疑竇誠難保無別項情弊著福濟景紋提集人証秉公逐款詳訊一俟得有確實情形定擬具奏不准稍有迴護瞻徇

自千咎戾至滿慶所奏酌揀番目請補噶布倫等缺及籌議變通章程五條皆係轉據李玉圖注曲結布二人稟詞辦理有無情弊並著福濟景紋查明核辦呼徵呼圖克圖等如令其赴川對質道途多梗恐致耽延時日已交理藩院轉飭喇嘛印務處看管矣原摺著紗給閱看將此各諭令知之署貴州巡撫韓超奏遵查逆首姜映芳委係臨陣生擒現已正法餘黨亦均逃散報聞補鑄雲貴總

督關防從雲南巡撫徐之銘請也○以約束勇丁不嚴革江西遊擊蕭耀煜等職○以貴州勦辦安順等處苗教各匪出力賞參將曹元興二品封典知縣張師敬副將全祖貽吳得勝都司張開友何顯仕巴圖魯名號同知王作舟都司胡永福等花翎知縣庭中杰等藍翎餘加銜升敘有差○

上以孟夏時享

太廟自是日始齋戒三日

乙亥以神靈顯應

加山西襄垣縣

昭澤王封號曰康惠○諭內閣鑲紅旗滿洲奏已革副都統所兼世職應否仍留本身之處請旨遵行等語已革副都統侍順所兼二等男爵勳舊佐領均著加恩仍留本身無庸另行揀送承襲○又諭前因御史何福咸奏叅署沭陽縣知縣蔣懋勳貪酷不職玩視民命各款當經諭令曾國藩李鴻章查明懲辦茲據奏稱蔣懋勳被叅貪酷各款尚無實據

惟於顧喜毆傷朱日昌一案僅委典史相驗實屬不合又於訪聞監生徐德嘉窩匪分贓一案並不虛衷研鞫錄供詳辦輒因徐周氏潑悍辱罵即將該監生夫婦一併當場殺斃實屬任性妄為請旨革職訊辦等語江蘇補用直隸州知州署沭陽縣知縣蔣懋勳著先行革職典史錢步高著一併撤委交吳棠就近提集人證卷宗秉公嚴訊確情會同曾國藩等按律定擬具奏○諭議政王軍機大臣

等御史王蘭谷奏髮逆渡江北竄軍務萬分
緊急天長盱眙防守空虛查有六安州紳士
記名鹽運使李元華謀勇兼優從前六安失
守該員毀家紓難募集練勇連克六安英霍
州縣各城所向有功惟生性抗直致為營員
所忌良將置散投閒殊為可惜請飭令帶勇
駐紮天長盱眙一帶以收得人之效各等語
李元華現在何處其從前所練之勇已否遣
散其人是否可用著吳棠唐訓方查明據實

具奏如該員才幹謀略實能如該御史所陳
卽一面奏聞一面飭令迅帶練勇數千前往
天長盱眙一帶扼要駐紮防逆匪窺伺裏下
河之路於保全完善實有裨益原摺均著鈔
給閱看將此由五百里各諭令知之○又諭
李鴻章奏官軍攻克太倉州城殺賊淨盡一
摺覽奏甚為欣慰逆首蔡沅澄踞守太倉敢
以乞降詭計誤我軍情實屬罪大惡極經程
學啟將該逆生擒裂屍並將城內餘匪悉數

圍殺自應如此辦理以儆兇頑現在太倉既
復則崑山賊膽必寒乘此破竹之勢不難剋
期攻復著李鴻章督飭程學啟會同戈登指
日攻克進規蘇城以牽忠逆北竄之勢常昭
雖甫經解圍而現與滬上各軍聲勢聯絡可
保無虞若駱國忠等能出奇伺隙亦足以擾
賊謀並著該撫密籌辦理以收多方誤賊之
效本日據御史王蘭谷奏金壇三次被圍均
由紳民捐貲辦團協同官軍戰守請飭查明

獎勵等語金壇以彈丸小邑固守至一百三
十日之久該紳民等捐貲協守情殊可憫著
李鴻章查明奏請補獎以昭激勸至該御史
所稱該紳民等現在附居鎮江左近希冀招
集流亡辦團助勦克復金壇揆之情理恐難
有成且難保非該御史因欲速邀獎敘為此
聳聽之詞並著該撫酌量辦理原摺著鈔給
閱看將此由六百里諭令知之○又諭譚廷
襄奏督軍勦辦沂屬棍匪全境圍寨一律肅

清一摺另片奏親帶小隊馳赴淄川會勦等語沂州府屬民風强悍蘭費等縣匪圩林立分旗別寨各自稱雄現雖懾於兵威不敢抗拒恐撤防以後故智復萌暗長潛滋不可不加意防範著僧格林沁譚廷襄嚴飭該員弁搜捕餘匪務盡根株並密飭該地方官隨時偵察新撫各圩如稍萌反側卽迅速拏辦從重懲治以儆其餘現在教匪與劉雙印等合股由鳳凰山竄向新泰縣之三里莊翟家莊

一帶教匪老巢自必空虛譚廷襄催令黃國瑞拔隊由寶泉峒一路進攻著卽飛飭該總兵迅速會同各軍乘虛進擣埽穴擒渠廓清兗境並著檄飭都司楊通廉等軍馳往泰安扼賊北竄之路淄川踞匪醜類甚多僧格林沁督窵長濠並添調礮位進攻不難克復第該匪窮蹙他竄亦意中事不可不豫為之防譚廷襄現赴淄川務當嚴飭章邱等縣調集團勇四面兜擊第該匪遁竄無路官軍一鼓

殲除方為妥善將此由六百里各諭令知之○署山東巡撫譚廷襄奏山東省補行同治元年大計請俟軍務稍定舉行從之○以江蘇上海等處團練出力賞在籍郎中潘曾瑋按察使銜員外郎銜主事潘馥等花翎同知吳世琳等藍翎餘升敘有差以甘肅隆德攻破賊巢予知縣李超羣等加銜升敘開復有差○予甘肅秦安陣亡知州托克清阿祭葬世職如道員例於死事地方暨本旗建立

專祠○丙子

上以孟夏時享

太廟前期親詣行禮 諭內閣軍興以來各直省百姓慘遭荼毒凡有臨難捐軀守義殉節者一經地方大吏奏聞無不立沛恩施優予卹典因思漢回皆朝廷赤子國家一視同仁原無歧異去年陝省逆回滋事以來延及甘肅地方亦有被其煽惑者朝廷命將出師分投勦辦特以該逆回等攻城戕官叛跡昭著

非大加懲創不足以戢暴亂而安善良並非以凡屬回民卽應概行誅戮也各該省回民受國家二百餘年養之恩豈盡甘為匪類聞各省良回中深明大義或被脅不從以致仗義捐軀全家遇害者頗不乏人哀此無辜殊堪矜憫前已疊經降旨諭令統兵大員等止分良莠不分漢回諒各地方官吏及帶兵員弁等必能仰體祇遵辦理惟念各處殉難被害回民轉致淹沒不彰與甘心叛逆者同

歸於盡不得與漢民一律同邀卹典殊不足以示矜恤而廣皇仁著陝西甘肅等省地方大吏及統兵大員等於各該地方回民中確切訪查如有實係良回不肯從賊被逆回偏脅奮身死節及合門殉難者一體分別查明奏請旌卹毋得稍存漢回成見以示大公○
上以常雩祀

天於

圓丘自是日始齋戒三日

大清穆宗繼天開運受中居正保大定功聖智誠孝信敏恭寬毅皇帝實錄卷之六十二

大清穆宗繼天開運受中居正保大定功聖智
誠孝信敏恭寬毅皇帝實錄卷之六十三

蚊

同治二年癸亥夏四月丁丑朔享

中集卷六三

太廟遣惇親王奕誼恭代行禮○

上詣綏履殿問

慈安皇太后安。平安室問。

慈禧皇太后安。至乙巳皆如之。○諭議政王軍

機大臣等。沈葆楨奏。漁亭先後獲勝。及巖寺。

街會勦獲勝饒防喫緊。近日布置情形各摺

片江西道員王文瑞駐防祁門在漁亭疊次

獲勝。偽對王洪春沅等分擾柏溪等處。王文

瑞飛飭丁長勝等軍橫抄追截。雖有斬擒賊

未大創。著沈葆楨督飭該道等相機進剿。將
祈夥各鄉踞匪力圖掃蕩。毋稍鬆勁。徽屬之
巖寺街防軍屢勝。據探稱該逆現欲糾合旌
太各股。再到草市決戰。如不得逞。卽改走池
州等情。著左宗棠、沈葆楨飭令劉典、王沐等
將徽州附近各鄉鎮匪股分投剿洗。以期一
律肅清。如該逆糾大股來犯。務當激勵各軍
痛加剿除。毋任竄犯。其由彭澤湖口敗竄之
賊。東併石門大股。合力窺饒。現在大田埠石
門街等處。賊蹤徧地。逆酋黃汶金等欲糾合
偽尤王等會攻饒州。沈葆楨已飛飭韓進春
等拔隊進剿。並飭段起等軍進援。布置甚屬
周妥。著卽嚴飭各軍以剿為防。保固完善。地
方毋令匪蹤深入腹地。江省團練亦頗得力。
該撫仍當激勵地方紳團。輔助官軍之不足。
席寶田一軍已由湖南啟行。本日已諭令毛
鴻賓催令迅統所部赴江。該撫卽派員迎提。
令其扼要駐紮。以資得力。逆匪不能逞志於

皖必將上竄江西。恣意蹂躪。沈葆楨身任封圻。責無旁貸。如本省兵力不敷。仍隨時與曾國藩左宗棠籌商調派。毋致稍有疏失。是為至要。將此由六百里各諭令知之。○又諭沈葆楨奏。江省防剿緊要。請飭催道員來江助剿等語。皖南髮逆。由建德分路入江。窺伺饒州景鎮等處。偏地賊蹤。據生擒賊供。該逆遇沿塘河者。已三四萬人。逆首黃汶金等均在石門一帶。建德後路。尚有偽尤王蕭王等眾。

軍機處

三

各數萬。均約明會攻饒州等語。是江省饒防甚形喫重。其祁門一路。復有偽襄王等號稱十數萬。欲由婺源入江。信防亦形喫緊。該省兵力單薄。不敷防剿。而曾國藩所派赴援景鎮之鮑超一軍。又因逆賊渡江。改旆北渡。扼守無為州。江省完善之區。為皖浙諸軍後路。設有疏虞。大局均為掣動。毛鴻賓前奏新募之道員席寶田一軍。諒已整隊在途。著毛鴻賓迅速馳檄飛催。令該員即率所部兼程前

進。馳赴江西。聽候沈葆楨調遣。毋稍逗遛。以固江右而全大局。將此由六百里諭令知之。○又諭前因平瑞奏擬開地利以濟餉需。並移營截兵各摺片。當交議政王軍機大臣會同該部妥議具奏。茲據奏稱烏魯木齊孳生及各營馬廠地土肥沃。該都統所籌擬令商戶人等開墾。當年升科。並古城濟木薩瑪納斯等處孳生馬廠及各處閒荒曠土。各營馬廠騰出地畝。逐細丈量。招戶承領。察看可以

軍機處

四

布種者。自本年為始。照例升科。並請飭伊犁將軍。葉爾羌塔爾巴哈台各參贊大臣。將伊犁各城一律辦理。其歸併馬廠及巴里坤移營裁兵。均准照辦。令該都統等妥議章程覆奏等語。烏魯木齊牧馬廠地土脈肥饒。地面寬曠。現經平瑞將該處閒曠地畝。招戶開墾升科。並將古城濟木薩瑪納斯等處孳生馬廠歸併巴里坤廠內騰出地畝。一併開墾升科。以充兵餉。實係經久良圖。自應實力經營。

以裕經費。所有清楚段落界限。彈壓稽查。及豫防拋荒拖欠等弊。均著該都統督飭員弁詳慎辦理。其馬匹選用挑變及變價銀兩數目。均著分晰咨報戶兵二部。以備查覈。所有商戶人等領馬交價等事。並著平瑞密訪詳查。毋令委員擡價抑勒。致滋擾累。其以屯地分給屯兵及裁減綠營兵額。遇缺扣留之處。亦係為節省經費。因地制宜起見。並著照所議辦理。仍著將裁減扣留名數。隨時報部。所有未盡事宜。平瑞即會商文祥。文永妥籌章程具奏。巴里坤地方瘠苦。兵食維艱。該都統擬將滿營兵丁酌留三百名。其餘七百名俱遷移於糧多兵少之區。綠營兵丁亦量為裁減。該處形勢是否足資控馭。滿營兵應遷駐何地。綠營兵擇要安置。究屬何地。應裁數目若干。均著照麟常清平瑞酌歸入該都統妥議章程內。詳細具奏。至新疆南北各城官俸兵餉需用甚多。近來內地軍務未平。經費

勢難接濟。各該城地方幅員甚廣。不乏閒曠沃壤。自應亟籌開墾。以濟餉需。著常清景廉錫霖於所屬各城。孳生墾營馬廠地及閒荒地畝內。一體履勘。查明報墾。以實邊儲。該將軍等務當通籌全局。開源節流。為國家力圖久遠之謀。不得以無利可興。藉詞推卸。以空言覆奏了事。議政王等摺片。均著鈔給閱看。將此各諭令知之。○漕運總督吳棠奏遵訊韓富春並無習教傳徒。飲錢不法情事。惟設

上詣

大高殿行禮報謝。○遣恭親王奕訢詣

時應宮。惇親王奕誼詣

昭顯廟。鍾郡王奕詒詣

宣仁廟。孚郡王奕誥詣

凝和廟。拈香。○諭內閣。前因御史吳台壽奏

陳勝保獲罪一摺。荒謬誕妄。肆無忌憚。實為

臺諫中卑鄙無恥之員。惟因勝保案情尚未審明。未經降旨將該御史懲辦。茲據御史劉其年奏稱。吳台壽朋黨撓法。飾詞挾制。並稱伊兄吳台朗賁緣入勝保軍營。保至道員花翎。招權肆惡。中外皆知。吳台壽效命私門。甘心鷹犬。各等語。所論該御史挾私誣罔各情。朝廷早經洞悉。諒大小臣工亦無不知其奸詐。吳台壽甫升御史。即敢肆意妄為。將來伊于胡底。著即行革職。山東候補道吳台朗。本係因案革職之員。復賁緣勝保軍營。招權肆惡。此次吳台壽挾私陳奏。其為感激私恩。已可概見。吳台朗著一併革職。拔去花翎。以為賁緣朋比者戒。近來科道中因朝廷詔求直言。隱惡揚善。遂有譏開忠良。袒庇私人。冀圖熒惑者。殊不乏人。該科道以諫為職。宜如何正直剛方。指陳得失。何得巧為嘗試。顛倒是非。朝廷格外優容。不加譴責。該科道等清夜捫心。能無自愧乎。經此次訓飭之後。務當各

矢公忠。遇事直陳。不得稍存私曲。亦不得緘默自容。用副厥職。至勝保罪案。現派王大臣等公同審訊。自必權衡至當。用協於中。無俟揣測為也。將此通諭知之。○又諭前據僧格林沁。唐訓方奏稱。自擒獲逆首張落刑等。蒙毫等處地方肅清。被脅各圩。悉皆歸正。並稱苗沛霖面稟唐訓方。訂期散練歸農。當以皖北地方。被擒髮各逆蹂躪十年。小民流離失所。因降旨蠲免錢糧二年。並飭地方督撫招集流亡。以資生聚。庶幾出吾民於水火之中。而登之衽席。明知苗沛霖罪在不赦。但能散練歸農。亦不咎其既往。以示寬大之恩。俾吾民不至再罹鋒鏑。乃茲據唐訓方奏稱。苗沛霖怙惡不悛。叛跡復著。襲攻蚌埠。水師營盤。占踞懷遠。圍攻壽州。請飭四面兜剿等語。苗沛霖以練總擢至道員。復因暗受偽職。襲踞壽州。革職治罪。上年因官軍追剿。陳玉城該練畏懾聲威。誘擒首逆。免其查辦。復經僧格

林沁開誠相待。賞給餉銀。該逆稍有人心。受此天高地厚之恩。自當沒世不忘。乃敢因大軍撤退之時。煽惑愚眾。圖襲營盤。占踞城池。如此反覆無常。梟獍其性。實屬覆轍所不容。若再稍事姑息。何以振綱紀而安閭閻。本日已諭僧格林沁。由山東統帶馬步。馳回安徽。進剿。並著曾國藩。李續宜。吳棠。唐訓方。各撥重兵。四面兜剿。殲厥渠魁。用彰天討。懷遠縣知縣英俊。雖未聞警先逃。而漫無覺察。咎實難辭。著卽革職。署鳳臺縣知縣蔡鏐。事前既不知防範。事後又擅離職守。著卽革職。永不敘用。其苗逆黨與張建猷。鄒長青。苗金開。苗添慶。苗希年。童維翰。袁有功。張士端。張誠心。王金奎。金汝霖。苗長春等十二名。著吏兵二部查明。從前所保官階。卽行革職。僅能悔過自新。檢斬苗逆。方准開復。懷遠縣典史魏文潮。慘罹鋒刃。殊堪憫惻。著交部照例議卹。苗逆陰鷙殘殺。小民被其偏脅。並非甘心附從。

著唐訓方出示曉諭。其新經投誠各圩。如能同心協勦。或竭力固守。均准擇優獎勵。其被苗逆逼從各圩。深明順逆。自拔來歸者。亦當妥為安撫。毋令失所。儻始終甘心從逆。抗拒官軍者。卽著督軍痛剿。毋任漏網。以示除暴安良至意。○諭議政王軍機大臣等。唐訓方奏。馳回臨淮。調集各軍。堵剿苗練一摺。據稱苗逆襲攻蚌埠。經參將張得勝迎擊。獲勝。逆黨麇集懷遠縣城。插旗安礮。復分隊進逼蒙城。圍攻壽州。該逆蓄謀數年。練多糧足。此次四路舉事。較前勢更鴟張等語。苗沛霖心懷叵測。反覆無常。朝廷因軍務方殷。勉事羈縻。早知其不可久恃。頃因僧格林沁督師北來。該逆遂以姜台凌投誠被戮等詞。搖惑眾志。竟敢襲踞城邑。抗拒官軍。亟宜聲罪致討。以中國憲而除巨患。前據僧格林沁奏。調齊礮位。進攻溜川。蕞爾縣城。不難攻拔。如相待尚需時日。則溜川一邑。似不足牽掣大軍。該大

臣能否將攻取淄川事宜妥速布置酌留兵勇交譚廷襄督攻後該大臣卽督率馬步各隊返旆南征卽著酌度機宜權衡緩急迅速辦理該逆屢降屢叛無端倡亂名不正而言不順部眾攜貳諒僧格林沁軍至蒙毫該逆黨勢必瓦解土崩如該逆被勦勢窮詭詞求撫僧格林沁當一意拒絕斷不可為其所搖致蹈前車之轍李續宜計已行抵皖境著卽星馳前進與曾國藩妥速籌商由舒六直趨

壽州正陽力扼西南乘勢進剿唐訓方固守臨淮要隘毋令東竄仍飭令馬新貽等就近曉諭新撫各圩毋為苗練所迫脅並將本日發去明發勦辦苗練諭旨於各處宣示張貼如有殺賊立功擒獻首逆者該王大臣等卽隨時奏請破格獎勵俾反正者益堅其志而被脅者不至甘心從逆則勦辦自易得手苗沛霖詭譎伎倆現值髮逆擾及皖北或與之暗中勾結或因李世忠撤去幫辦唆令起事

均未可知著曾國藩速飭各營員弁嚴密防範仍遵前旨密察李世忠動靜相機辦理苗練赴清淮捆鹽往來絡繹此時苗沛霖公然背叛其捆鹽練眾曾否撤回著吳棠確切查明嚴拏懲辦並檄飭水陸各營及徐宿各軍以備不虞潁亳一帶在在與豫境毗連張之萬毛昶熙務當豫撥勁兵嚴防邊境並飭各該地方官督率兵勇激勵鄉團防剿兼施毋使該練眾得以竄越袁甲三回籍時所帶練

勇千名現在是否仍留陳州何員統帶著張之萬毛昶熙妥籌調撥扼要守禦直隸股匪現雖渡河而東而大順廣等屬伏莽尚多所有恆齡馬隊卽著留於劉長佑軍營搜捕餘匪如察看沿河各要隘布置已定卽飭恆齡等督飭所部渡河會同東省各軍勦除竄匪譚廷襄亦當嚴飭保德等併力兜勦毋再觀望遷延致干重咎其劉長佑所調李明惠等統帶之後起各勇並著該督飛催來直以資

調遣僧格林沁所部馬隊本不甚多。此次攻
勦苗練。必須厚集兵力。著該大臣卽飭蘇克
金一軍迅速折回蒙亳。以便調遣。壽州米糧
軍火均極絀乏。唐訓方署理撫篆。責無旁貸。
並著設法運解。以濟急需。唐訓方摺著鈔給
僧格林沁。張之萬。吳棠閱看。將此由六百里
各諭令知之。○又諭唐訓方奏。滯陳兵勇困
殆情形。請飭各省指撥協餉。剋期趕解一摺。
現在苗練肆逆。分道圍攻各城。亟須大張撻

伐。情形萬分緊迫。著譚廷襄。張之萬。無論何
款。卽將部撥臨淮軍營關稅專款銀各二萬
兩。趕緊籌撥。交唐訓方派往委員。星夜兼程
馳解回營。毋稍延緩。其以前積欠協餉。並著
英桂。曾國藩。李鴻章。文清。張之萬。迅速籌款
源源批解。以拯飢軍而顧大局。將此由六百
里諭知曾國藩。文清。李鴻章。譚廷襄。張之萬。
英桂。並傳諭永存知之。○又諭前據閻敬銘
奏起程赴東。當經諭令迅速赴任。復據毛鴻

賓奏。臬司丁寶楨募足勇丁千名。由水路前
赴湖北。改由陸路赴東。此時諒均已起程在
道矣。山東捻教各匪。疊次肆擾。淄川縣城為
團匪劉得培等所踞。而東昌降匪復嘯聚直
隸山東交界處。所肆意焚掠。軍務處處喫緊。
僧格林沁督師北上。勦辦正當得手。而苗沛
霖於該大臣離皖之後。又復糾眾占踞懷遠
縣城。公然分道犯順。不得不令僧格林沁權
其緩急。移師南下。惟山東軍務緊要。該省既
無得力之兵。又無知兵之將。譚廷襄交卸在
邇。尤恐呼應不靈。閻敬銘簡署山東巡撫。日
久尚未到任。該省設有疏虞。大局何堪設想。
著懍遵疊次諭旨。兼程前進。接印任事。將一
應事宜。趕緊布置妥協。迅速馳奏。先慰廑念。
丁寶楨所募勇丁。定能得力。前已據報啟行。
著卽星速馳抵東境。遇賊卽擊。務將各股匪
次第翦滅。俾東省早就廓清。方為不負委任。
將此由六百里諭知閻敬銘。並傳諭丁寶楨。

知之○又諭穆騰阿等奏旗營官兵自上年月餉不繼餓殍相望請旨迅飭瑛榮速籌接濟等語西安旗營兵丁缺餉日久因飢殞命者不下二千餘人覽穆騰阿所奏情形實堪矜惻現在省城防守緊要豈忍令荷戈殺賊之人飢餓垂斃至於此極著瑛榮恪遵疊次諭旨督同司道等迅速籌款源源接濟務令士飽馬騰不得再有遲誤致干重咎至回匪詭詐百出一經官軍勦辦每以卑詞乞撫冀

緩我師瑛榮從前曾有不可主撫之議此時回氛方熾省城糧運未通瑛榮擁兵不為不厚務當督飭將士認真勦賊疏通糧運不得株守省垣一籌莫展妄冀回民就撫而以回弁等為腹心致蹈滇南覆轍也將此由六百里諭令知之○又諭前因興泰等奏泰署副將恩賢於錢糧重款並不留心查察以致該營書識藉端侵扣當經降旨將恩賢革職交平瑞等查辦護都司全齡放餉牽混復行交

部嚴加議處一併歸案茲據興泰等奏稱恩賢等被參後所有副將都司印務委令章京達薩杭阿護都司丁國泰前往暫行接管該參員等抗不交印復經護巴里坤總兵派員前往接印仍敢抗不遵交且將案內應訊之字識李兆幅等隱匿署內並不交出請旨定擬等語此案已革副將恩賢等既經被參自應將印信移交委員接管聽候查辦乃敢把持印信抗違不交並將案內應訊字識隱匿

實屬膽大謬妄業經明降諭旨將恩賢全齡革職拏問交平瑞等嚴行查辦著平瑞仍遵前旨迅派公正妥靠之員秉公查訊文祥已經到任著會同興泰瑞昌並平瑞派出之員提集全案人證卷宗詳細研鞫按律懲辦李兆幅等犯並著飭令恩賢等迅即交出歸案審究儻敢仍前隱匿即著嚴參從重治罪哈密協副將印務前經陝甘總督委令穆克金布前往護理即著熙麟恩麟催令迅赴署任

以重職守。將此諭知熙麟、平瑞、興泰、文祥瑞、昌、並傳諭恩麟知之。○又諭明緒奏遵旨豫籌勘界辦法一摺。俄國使臣上年在塔爾巴哈台議界。不遂所欲。隱忍回國。僅今年再來會議。難保不帶兵豫占地方。以為強詞奪理地步。明緒現已會同明誼等。曉諭蒙古人等。齊心禦侮。並委員赴北吹河一帶查勘地趾。豫籌辦理。所辦尚屬周密。惟科布多伊犁兩處邊界。究應由何處議分。必須豫行勘明。臨

事方有把握。現在伊犁卡外游駛之俄人。業經全行撤回。趁此春融凍釋。即可將該處界址詳細查勘。著常清迅派委員同原派之委員哈布齊賢等。將伊犁本境邊卡何處可以議分。有無關礙。哈薩克及布魯特生計之處。逐一詳查。繪圖貼說。由常清覈准。咨送明緒妥籌辦理。此時已交夏令。恐俄使即須前來。該將軍等務將勘界一事。趕緊辦妥。不得稍有遲誤。明緒另片奏塔爾巴哈台回民聞陝

甘回匪滋事。疑懼謀亂。經明緒傳令回民掌教石金斗等明白開導。該回民均各遵服。照舊安業。各等語。新疆地方回種極多。明緒於釐端初生。即能設法解散。消患未形。辦理甚是。掌教回子石金斗。鄉約陳生福、海玉珍等。勸導出力。著照明緒所擬分別給與頂帶。以示獎勵。嗣後仍著該大臣不動聲色。彈壓撫綏。毋稍疏忽。前因陝回搆釁。往往時造洗回謠言。冀煽同類。曾明降諭旨。令帶兵官及地方文武。務分良莠。不分漢回。於抗拒滋事者。盡法勦滅。安分守業者。妥為保護。以示一視同仁。至意。西域萬里。恐尚未接奉此旨。茲令軍機處鈔錄二分。發交常清。明緒於伊犁塔爾巴哈台等處刊刻謄黃。徧行曉諭。以安反側。將此各諭令知之。○又諭前因霍罕伯克等互相搆兵。布魯特攜屬附從俄國。恐有俄國人從中唆使。當經諭令景廉密探具奏。茲據該大臣奏稱。密派委員等會同喀什噶爾

城伯克選派回子出卡密探據實陳奏並將該委員等稟詞呈覽據稱霍罕互闖並非俄人唆使喀什噶爾迪西一帶亦無俄人蹤跡偵探情形與奎英原奏大略相同惟俄人狡詐性成貪得無厭前次議分西界諸多狡執此次據該大臣奏稱探得哈哈沙爾等處均皆隨從俄國乃仍與喀什噶爾阿奇木投遞信函呈送馬匹實屬首鼠兩端信內有春間俄人欲往喀什噶爾修葺房屋之說究竟是

否係通商之故俄人詭譎不可不防該大臣現以咨會奎英等妥為防範仍著景廉加意偵探得有確實情形隨時奏聞逆首倭里罕在霍罕城內是否被害斜黑阿渾之子孫二人是否現住烏什均著景廉隨時偵探消息貢古魯斯各愛曼布魯特聞係附近伊犁烏什邊界並著常清文興派員密加查探毋稍大意景廉另片奏妥集延置買田產一節若紛紛查訪恐啟界外疑畏之端反令得所藉

口或滋釁隙有礙大局擬請暫緩查辦所奏亦係實情卽著照所擬辦理此係因邊疆重地思患豫防該將軍等接奉此旨務宜倍加慎重嚴密咨商妥籌辦理不可稍涉大意致使外間私相傳播別生枝節將此各密諭知之○調山海關副都統成保為盛京副都統實授正黃旗滿洲參領慶春山海關副都統○以抗不交印已革哈密副將恩賢護都司全齡均逮問○己卯常雲祀

天於

園丘遣禮親王世鐸恭代行禮○諭議政王軍機大臣等張亮基奏督師擊退遵義桐梓等縣各匪並出示免抽釐穀一摺另片奏飭令田興恕前赴四川聽候查辦等語貴州民氣彫敝已極而吏治亦甚廢弛各軍營將士奮勇打仗者雖不乏人而黃白號匪及苗教各匪總未能剋日殲除張亮基接署撫篆亟應振刷精神力圖整頓著卽飭沈宏富等迅將

螺螄堰逆匪各營。掃除淨盡。激勵帶兵員弁。次第將上下游踞匪一律削平。以期綏靖巖疆。永除後患。屬吏中材能出眾。惻悞無華者。自當隨時保奏。如有貪劣不職各員。卽著據實嚴叅。以肅官常。而蘇民困。至黔省庫款蕩然而兵練。整待哺。若將各屬應派兵糧釐穀等款。概行豁除。轉恐軍需無出。而按括太甚。又恐民力不支。惟在該署撫慎選良吏輔以公正紳耆。妥為抽收。無苛派抑勒之弊。庶

勦賊撫民。兩有裨益。至道員張心培。謝葆齡。冷超。儒錢登選。被劾各款。與殺害教民之案。兩不相涉。自應分別查辦。著卽查拏張心培。謝葆齡到案。提集趙畏三。冷超。儒錢登選等。將以前被叅各款。逐一審訊。並將教民呈訴之開州青崖兩案。提集戴鹿芝。趙畏三等。秉公審訊。勞崇光由川赴黔。計日可到。張亮基先行審有頭緒。一俟勞崇光抵省。卽迅速會商奏結。俾免教民曉瀆。據張亮基奏。田興

恕卽日遵旨赴川。想沿途不敢逗遛。著駱秉章於到省時。飭屬妥為約束。靜候查辦。雲南省城漢回情形。著駱秉章。張亮基就近偵探。隨時奏聞。將此由六百里各諭令知之。○又諭張凱嵩奏貴縣各軍進逼登龍橋。勦賊獲勝。並慎重邊防。嚴遏石逆竄越。各摺片。貴縣黃逆阻險負隅。日久稽誅。自劉坤一啟行後。沿途偵探確實。分兵縱擊。進逼登龍橋。賊眾殺賊無算。亟宜乘此聲威。力圖掃蕩。惟賊眾

且悍。黨與甚多。黃逆被勦。勢蹙。必將糾約逆黨。拌死來援。著張凱嵩飭令劉坤一嚴督調派各員弁。先將盤踞龍巖嶺底各股匪。剋期殲除。斷賊援應。方可以全力勦賊。老巢不至有牽掣之虞。駐紮荔浦各軍。卽著催調到營。與各軍會勦。以厚兵力。石逆分股竄擾黔蜀之間。餘黨復擾及歸化。貞豐一帶。與廣西泗城府之西隆州邊境毗連。著張凱嵩嚴飭該府州會同營弁。督飭紳團於黔蜀交界先事

布置確探嚴防。俾免竄越。以固邊圉。將此由五百里諭令知之。○以貴州遵義勦辦苗教各匪獲勝。賞都司馬朝龍花翎。貢生祝直藍翎。餘升敘有差。予陣亡千總張得功祭葬。世職加等。○庚辰諭內閣。曾國藩奏請將代理知州補授實缺等語。據稱安徽代理無為州知州穆其琛到任後。鉅躬親實事。求是上年十月間。賊氛逼近。該員固結民心。保衛危城。厥功甚偉。支應軍需等件。辦理亦屬裕如。

自應照所請。破格錄用。穆其琛著即補授無為州知州。以示鼓勵。○又諭曾國藩奏請將揀調各員留省補用。並請多發卹用。知縣赴皖一摺。據稱安徽省州縣各城需人治理。該省候補人員甚屬寥寥。遴委署補各員。間有與例未符。請從權變通辦理。著照所請。除穆其琛一員。本日業經降旨准補無為州知州外。所有前任四川梁山縣知縣曾化南分發江西試用知縣蔡家馨二員。均著准其留於

安徽酌量補用。安徽省現在地方吏治需人尤為緊要。嗣後均著准其照此辦理。他省不得援以為例。並著吏部於本科進士引見後。將卽用知縣人員。於定例分發外。多掣十六員分發該省。以資差委。○又諭多隆阿奏請將丁憂知州改為署任等語。陝西商州直隸州知州曹熙聞訃丁憂。例應回籍守制。惟據多隆阿奏稱。該員素得民心。委辦採買轉運糧草。經理裕如。未便遽易生手。曹熙著准其

改為署任。俟軍務告竣。再行回籍守制。○諭議政王軍機大臣等。張之萬毛昶熙奏苗逆舉兵背叛。戕官踞城。請飭僧格林沁回軍勦洗。並鈔錄偽示呈覽一摺。前因苗沛霖叛跡顯著。業經明降諭旨。聲罪致討。令僧格林沁酌度機宜。回軍蒙亳。迅速勦辦。並令張之萬毛昶熙嚴防邊境。本日據張之萬等奏稱。豫省邊防緊要。各兵不敷調撥。請飭僧格林沁回軍。由歸陳一帶痛加勦洗。卽著該大臣酌

量緩急應由何路進兵務須先其所急力掃
兇鋒不為遙制壽州賴上等處是否已被占
踞地方官被戕如何情形未據唐訓方奏及
著該署撫詳細查明具奏並著懍遵前旨固
守臨淮要隘聯絡新撫各圩俾知感奮出力
以孤苗黨之勢仍須保固完善以待大軍會
剿不得任其蠶食肆意滋擾張之萬已添募
馬步兵勇並抽調數營進紮太和歸德如有
緩急即須派隊策應毛昶熙務須親赴歸陳

將該處地方團練認真整頓若任令該逆竄
入豫疆定惟張之萬毛昶熙是問潼關協副
將黃鳴鐸前在署壽春鎮任內固守壽州與
苗練為仇苗沛霖入壽城時將該員執去割
耳雞髮陵虐備至曾經諭令勝保查辦嗣據
勝保奏黃鳴鐸並未被害亦未言其現在何
處該副將向來打仗頗能得力且與苗練向
為仇敵必能不避艱險力圖滅賊著僧格林
沁唐訓方確切查明黃鳴鐸是否被害現在

何處據實奏聞候旨簡用如實已為苗沛霖
所殺亦當查明奏請賜卹以作忠義之氣張
之萬等摺著鈔給僧格林沁唐訓方閱看又
片奏請將袁保恆調營差遣等語著照所請
即飭該員統率舊部赴營助剿如陳州一帶
有警即令該員在本籍督團堵禦以資得力
該撫即酌量調度將此由六百里各諭令知
之○又諭曾國藩奏近日軍情等語逆賊欲
解金陵之圍分黨由徽甯窺伺江西由和含

一帶圖犯湖北疊經官文嚴樹森左宗棠沈
葆楨等奏聞江省饒信兩防守備尚嚴與左
宗棠派往皖南之劉典等軍聲勢聯絡賊不
得逞而逆謀竄江之意迄未少息和含一帶
賊眾游弋已久勢必欲越皖境上犯鄂疆又
有由豫竄鄂之捻股可分黨下竄以應之茲
據曾國藩奏巢縣大股竄撲廬江由界河分
竄桐舒其由鄂東竄捻股已自蘄水分為兩
股一股回竄黃州一股竄皖攻撲宿松越潛

太以撲桐城。廬江桐城守將雖均能嚴備。出擊各有斬擒。而桐舒擒逆勢已聯成一片。並擒獲忠逆偽文。有將由舒六而竄英霍。分道擾犯鄂境等情。誠如曾國藩所奏。逆謀甚狡。而規畫甚大。總欲圖解金陵之圍。此時曾國荃兩花臺之軍。自不得輒自移動。墮賊詭謀。湖北為數省樞紐。誠不可以稍有疏失。前諭官文嚴樹森飭令舒保成大吉等軍。將擒股痛加遏剿。豫截豫擒與皖省逆匪勾結之路。

嚴樹森已出駐團風。親督各軍分投布置。當不至任賊竄入。肆其披猖。著卽迅籌堵剿。李續宜已自湘啟行。道出鄂疆。自可與嚴樹森面為商酌。皖鄂兩省堵剿機宜。惟苗練叛跡復著。已踞正陽。圍攻壽州。李續宜亟應趕緊赴皖。迅圖剿辦。唐訓方資望稍淺。且恐未能面面兼顧。所請飭令僧格林沁回軍勦苗。雖已諭令該大臣酌量進止。而僧格林沁現在圍攻淄川。踞賊東省羣匪。方資鎮壓卽直隸

邊界之賊。甫經劉長佑擊勦渡河。回竄直東。接壤防剿。綦嚴。北路情形均望僧格林沁之軍。掃蕩其能否回軍皖省。尚未可知。李續宜到鄂。與嚴樹森商定一切。著卽仍遵疊次諭旨。兼程赴皖。石埠橋雖已解圍。巢含大股賊氛正肆。鮑超之軍仍應在北岸相機擊剿。當此羣醜蓄謀。紛竄皖鄂。曾國藩所督各路之軍。幾有應接不暇之勢。該大臣素能鎮定。惟當毅力精心。以圖萬全。浙滬兩軍事機尚順。

節據左宗棠李鴻章各奏進攻富陽及崑山均可得手。著該督撫卽嚴督各軍迅速進取。左宗棠以杭城不難卽克。而難於杜賊紛竄。是以不急旦夕之效。固屬老謀。此時賊既分投北岸及長江上游。圖解金陵之圍。浙滬兩軍如能一克富陽。以取杭州。一克崑山。以取蘇郡。則金陵之賊腹背受敵。或卽可收擄穴擒渠之效。諒該大臣督撫等必能因時審勢。以赴事機也。將此由六百里各諭令知之。○

又諭多隆阿奏攻破龐谷莊等處回巢並雷正綰攻勒永樂店情形各摺片逆匪於龐谷莊沙窩雷化喬千等處挑挖長濠緣互三十餘里並於東北西三面設立重濠木賊拒守甚堅經多隆阿督率諸軍移營進逼搶上沙包先將雷化鎮攻克破其長濠並將龐谷莊喬千兩處續行攻拔即於長濠內紮營八座以防逆匪復行來占辦理甚為得手該大臣病尚未愈即親往前敵力疾攻克賊巢數處

實屬奮勇著即乘此聲威將孝義鎮連行攻破以期直搗倉頭埽除逆黨毋稍遷延雷正綰進攻永樂店老巢未能得手僅殲斃賊匪數十名且該匪分股在涇陽淳化三原耀州等屬地方盤踞滋擾冀斷官軍糧道必須分軍四出力行掃蕩以靖逆氛著雷正綰督率兵勇實力勒除毋得株守一隅致成坐困將此由六百里各諭令知之○又諭前因甘肅軍務緊要諭令張之萬將欠解甘餉先籌銀

數萬兩解甘以資接濟茲據張之萬奏稱豫省協甘餉銀必須取道陝西解往現在陝回奔突靡常即遴委熟悉該省地利人員押解亦難節節偵探設有疏虞關繫非輕查山西河東道每年協豫軍需銀二萬兩同治元年分應解前項銀兩迄今尚未解到此次提撥甘餉本有河東道庫銀兩請將山西協豫同治元年分軍需銀二萬兩就近附解甘省以抵豫省應解甘餉等語豫省各路勒匪正在

喫緊之際不但由豫取道關中道路節節梗阻且恐籌款難期迅速似此量為轉移撥解較為徑捷著英桂飭令河東道將應解豫省同治元年分軍需銀二萬兩迅即就近附解甘省交納抵作豫省應解甘餉以濟要需將此由五百里諭令知之○又諭前因吳棠奏淮關應解部庫洋藥稅銀四千兩就近撥赴清江浦以濟急需諭令張之萬將解存清淮漕捐劃解部庫抵作淮關應解洋藥稅之款

茲據張之萬奏稱豫省有漕州縣援照上屆成案派令每石捐銀五分嗣據各州縣以同治元年漕糧每石折價銀三兩三錢銀價日昂正項尚有不敷力難再捐紛紛具稟從前州縣辦漕本屬稍有贏餘清淮捐餉尚易集事上年漕糧改折各州縣徵辦甚形拮据勢難兼顧捐款請飭漕臣另行指項劃解等語豫省有漕州縣欠解正項甚多若再責令籌措捐款自必更形竭蹶該撫所奏亦屬實情

著吳棠將撥借淮關應解部庫洋藥稅銀四千兩另行指項劃解以清部款將此諭令知之○以山西防河出力賞道員劉子城副將和昌等花翎知府文梁等藍翎餘加銜升敘有差○以河南克復龍井等寨出力賞參將殷先意巴圖魯名號都司戴煌花翎雲騎尉趙寶德等藍翎餘升敘有差○以河南攻克邢集捻巢予道員葛承霖等優敘○予江南蕪湖金柱關等處陣亡遊擊姜固國都司潘

泗知守備李得貴千總鄒正坤把總謝德發外委彭禹明等祭葬世職加等○予陝西永樂店陣亡參將何成江祭葬世職加等○予安徽望江舒城兩縣殉難紳民婦女一千八百三十四名口分別旌卹如例○辛巳諭議政王軍機大臣等御史洪昌燕奏請將從賊在逃之知縣嚴拏懲辦等語據稱咸豐十年二月間浙江省城失守錢塘縣知縣袁忠清甘心從賊身任偽監軍之職並按難民中婦

女獻於逆首聞該員曾潛往上海兼至江北請飭嚴拏懲辦又該省司道大員除林福祥外無下落者甚多請飭查辦知縣袁忠清於杭城失陷時甘心從逆身受偽職且虐民媚賊尤屬罪不勝誅袁忠清現在究竟逃匿何所抑或潛回湖北本籍著左宗棠李鴻章吳棠嚴樹森飭各該地方官嚴密查拏務獲將該員從賊各情逐一嚴訊得實即行正法以儆奸宄並著左宗棠將杭州失陷時司道以

下查無下落各員是否畏罪潛逃抑係業經殉難迅卽確切查明具奏辦理將此由四百里各諭令知之○追予浙江殉難學政刑部右侍郎張錫庚祭葬世職如尚書例○予浙江杭州殉難在籍內閣中書陳錫慶等紳民婦女一百七十九員名口分別旌卹如例○壬午諭內閣袁甲三奏已革貴州遵義府知府高振洛潔已愛民惻悞無華歷任山東知縣循聲卓著嗣在遵義府任內經田興恕以釐務奏參革職回籍可否飭令該員赴部引見候旨錄用等語高振洛著張之萬飭令來京交吏部帶領引見○諭議政王軍機大臣等劉長佑奏匪眾東渡剿河又圖北竄督兵防剿一摺河東股匪被直隸官兵追剿窮蹙不敢遁回莘冠等處老巢由東昌府南七集村偷渡剿河擾及茌平地方復竄至高唐州迤北之朱家莊一帶該逆避兵而行是其慣技此次因恩縣德州等處防守空虛徑欲乘

隙北竄該督已檄調李同文督率該管地方官厚集團練扼要堵截並飭熱河古北口官兵一千名馳赴景州匪眾若一路北竄該處正當其衝卽著嚴飭該道員嚴扼運河西面賊至迎頭截擊以遏竄越儻有疏縱情事卽惟該道員是問恒齡蘇克金業已渡河卽著催令繞出賊前會同譚廷襄派出各軍實力兜剿徐廷楷余承恩等亦著飭令各率所部折向東北覘賊所向悉力截擊務須四路兜擒杜其回竄莘冠等處伏莽尚多河防仍關緊要著飭王榕吉嚴密扼堵毋稍疏懈劉長佑奏閭敬銘函致該督三月十三日由晉省啟行計程當在景德之交而張錫珠股匪現由東昌偷渡剿河在茌平焚掠距德州景州不遠德州民團陳冠甲據劉長佑奏稱聞其志切同仇最為齊整卽著閭敬銘就近訪聞如實在可用卽行飭調迎剿以資得力正在寄諭聞據閭敬銘奏行抵阜城探悉東南兩

路現皆不通。設法繞路前進。各摺片著卽探明路徑。馳赴軍營接印任事。僧格林沁現派施紹恆帶勇赴皖。勦辦苗練。該大臣尚在淄川攻勦踞匪。能否卽赴蒙亳。著俟閻敬銘抵任後。與該大臣妥籌會商。斟酌辦理。將此由六百里各諭令知之。○又諭僧格林沁等奏督軍進攻淄川踞匪情形。並派馬勇南征一摺。淄川踞匪與捻逆勾合。後經僧格林沁督軍攻勦。捻逆乘隙南竄。逆首劉得培之勢已孤。而官軍所調礮位已到。諒可指日攻拔。南竄捻匪現竄何處。舒通額等督兵追勦。已否追及。著僧格林沁將淄川踞匪迅速攻克。並嚴飭舒通額等將竄匪趕緊追勦。毋任遠竄。以致重煩兵力。直南股匪現雖回竄河東。而東昌各屬伏莽尚多。譚廷襄止知敷衍目前。遽謂已無股匪。殊不可信。且該匪因劉長佑馳赴臨清。卽折由荏平等處北竄。著卽飭蘇克金、恆齡等會同直隸官軍繞前夾擊。以期

殲除淨盡。現在閻敬銘將次抵東。臬司丁寶楨由楚募勇千名赴任。已催令迅速前進。該署撫等雖情形未能熟悉。而素來辦事尚稱結實。著該大臣於閻敬銘到東後。或令前赴東昌搜捕餘匪。令丁寶楨赴鄒縣統帶官軍勦辦教匪。該大臣仍遵前旨。馳赴蒙亳勦辦苗逆。卽著豫籌辦理。本日據袁甲三奏苗逆非占踞長淮。以專鹽米之利。恐上踞壽正。下踞臨鳳。北窺徐州。西窺陳汝。莫若乘此初起。飭令僧格林沁回軍直搗懷蒙。為搯吭拊背之勢等語。該大臣甫由皖回東。已屬勞瘁。而觸熱南征。尤塵於懷。第恐逆練之羽翼一成。為患滋大。事機所值。深慮皖省兵力不能迅速奏功。仍著該大臣酌量緩急。妥籌辦理。都司施紹恆所帶投誠勇一千名。諒已起程。卽著迅催前進。施紹恆可卽作為該大臣前隊解散。苗練脅從告示及擒獻苗沛霖賞格。該大臣卽可迅速刊刻。交其帶往張貼。庶良團

之心有所恃。不為苗沛霖所脅。更可冀有人割取其首級以獻。一如前此辦理李城等故事。該大臣聲威素著。人望所屬。儻能設計除之。亦可不煩兵力。所請派員督辦直東豫交界軍務一摺。不為無見。著暫行留中備覽。以便妥議施行。將此由六百里諭令知之。○又諭前因苗沛霖叛跡復著。疊諭僧格林沁回軍勦辦。並諭張之萬唐訓方派兵分勦。茲據袁甲三奏稱。苗練復叛。請飭僧格林沁等進勦等語。自係未悉現在辦理情形。苗沛霖蓄志叛逆。已非一日。而從前調援京師。調赴陝西。均不肯往。本係自守之賊。未肯遠離巢穴。第恐蒙顧等處。為所占踞。則西窺陳汝亦在意計之中。惟僧格林沁因東匪牽掣。尚難統軍南征。本日奏稱派都司施紹恆管帶投誠勇一千名。前往交馬新貽差遣。尚恐未能得力。張之萬已撥兵前赴太和歸德一帶。是否足資堵截。而陳州為太和後路。袁甲三現雖

告病回籍。著即會商該處紳耆。激勵團練。昨諭毛昶熙如探有警信。即行馳赴陳州。諒袁甲三等以本地紳士。必能稍收成效。俟毛昶熙赴陳。更可會同妥籌辦理。袁保恆已准張之萬調赴軍營。如陳州團練分辦無人。袁保恆即著毋庸前赴汝甯軍營。唐訓方身權撫篆。於苗逆一事。責無旁貸。僧格林沁即能返旆南征。亦恐尚需時日。著恪遵前旨。相機辦理。毋得專待援師。致誤事機。袁甲三所奏分遣遊兵。一西巡光固。以斷淮南上犯之路。一東巡歸德。以斷永夏西趨之路。自係扼要之策。並據稱以勦辦汝匪。專委毛昶熙。而張之萬親赴東北一帶。適中駐紮。以便調度。各等語。著張之萬。毛昶熙酌量情形。豫行籌辦。其駐顧之蔣凝學一軍。並著唐訓方妥籌調度。以資攻勦。將此由六百里各諭令知之。○又諭官文嚴樹森奏。官軍勦辦捻逆情形。及抽派郎中李雲麟率師援陝。各一摺。捻逆竄擾。

鄂境經嚴樹森馳紮圍風鎮調派各軍分路
擊剿先後在望花東界嶺及游河背栗子灣
等處獲勝頗有斬擒而該逆東奔西突總未
大受懲創昨據曾國藩奏鄂東擒匪於蘄水
分為兩股一股回竄黃州一股竄入桐舒與
髮逆聯合該逆黨與雖眾業已分股下竄其
在鄂境游弋者勢欲諒已稍衰亟應乘勢剿
滅著該大臣等嚴飭各營將弁併力兜剿務
將此股竄匪就近殲除毋得觀望遷延致干

重咎陝南郡縣匪徒麇集若不迅圖剿滅不
獨西安省垣可慮卽川楚邊陲亦無安謐之
日官文等現飭李雲麟率所部三千餘人由
鄭陽渡漢而南著卽飭令該員剋期進剿漢
中待援孔亟毋得駐守興安城內致誤事機
前因漢南軍情緊急卽經諭令駱秉章檄調
周達武督軍援剿現在賊氛甚熾恐非李雲
麟一軍所能殄滅駱秉章自當力顧大局仍
遵前旨速飭周達武星夜馳援與李雲麟兩

路夾攻俾收聚殲之效如用達武一時不能
赴陝卽著藩司劉蓉出省督率勁旅踰劍閣
而北與鄂軍會合攻剿之處由該督酌量迅
速辦理李雲麟師至漢中去楚較遠所有該
營軍餉等項並著駱秉章隨時協濟就近由
夔關稅課項下撥給俾免飢潰仍著官文嚴
樹森飭屬設法轉輸源源接濟毋得以道遠
難至為辭稍涉推諉將此由六百里各諭令
知之○又諭多隆阿奏官軍攻破孝義回巢

大獲全勝一摺陝省東路回巢林立經多隆
阿督軍剿辦連破龐谷莊等處堅巢此次迎
剿西路援匪大獲全勝乘勢攻拔孝義鎮並
平毀附近小村七八處軍威大振破竹之勢
已成倉頭老巢拒守雖嚴想不難指顧掃蕩
該大臣自入陝後所向克捷調度有方倉頭
之克計在旦夕尤當慎益加慎不可屢勝而
驕西路援賊經此巨創其膽已寒一俟東路
肅清卽可鼓行而西節節剿洗想該大臣必

能斟酌辦理也將此由五百里諭令知之○又諭都興阿等奏水師堵剿圩塘江面續獲勝仗並將長江兩岸情形繪圖貼說呈覽及查辦豫勝營弁滋鬧糧臺各摺片圩塘各港口逼近江陰賊巢而北岸靖江實當門戶之衝現在南岸軍情正在得手該逆必時思北竄是江北一帶亟宜嚴密防守以固藩籬此次逆匪竄擾圩塘各港口均經我師擊退現在該將軍等復派總統水師吳全美親帶師船駐紮下游布置防剿著即督飭該總兵加意嚴防不可稍有疏虞至北岸河汊紛歧之處現既派侍衛芮楞阿等帶領馬步各隊駐紮仙女鎮等處務飭該侍衛等嚴巡下游各港口以期防範周密其豫勝營弁李世恆於滋鬧糧臺後竟至逃遁不知去向實屬可惡即著飭駐紮六合之記名提督李顯發查明該劣員是否回營務期拏獲解營懲辦將此由五百里各諭令知之○又諭晏端書等奏

高州一帶軍務及勦辦廣海客匪情形一摺高州軍興日久卓興方耀兩軍苦戰數年迄無成效廣西容縣逆匪范亞音一股又與該逆互相勾結若再遷延疲玩必至勢成蔓延愈難撲滅前已有旨令崑壽前往督辦即著該提督統率卓興等審度機宜實力勦辦並將所部各營裁汰老弱簡練精銳以期壁壘一新迅速肅事其陽江一帶匪蹤出沒無常並著嚴飭遊擊賴建猷等認真防剿斷其紛竄之路總之以本省之兵辦本省之賊果能信賞必罰寬備餉需無不可速了之理正不得專待客兵也江忠義雖由湖南拔隊前赴廣西而皖南髮逆猖獗亦待此軍防剿晏端書等鼓勵各營兵勇乘銳進攻不得專待援軍致滋貽誤至廣海客匪踞城拒守甘心叛逆實屬罪不容誅吳昌壽等現擬滾營進紮先破近城伏匪然後設法圍攻如果該匪悔罪自投仍行分別辦理所籌尚妥惟匪勢已

成。非創以兵威。豈能革心革面。晏端書等務當督飭吳昌壽等盡力勦辦。不可稍存將就了事之見。致貽後患。海廷琛添募之勇。已否成軍。該員前經調赴直隸。如勦辦廣海匪徒。必需該員前往協助。即著據實奏聞。將此由五百里各諭令知之。○以大理寺卿吳廷棟為刑部右侍郎。○以山東鄒縣勦匪出力。開復佐領富爾孫暫革處分。○予山東淄川陣亡頭等侍衛卓明阿。佐領永林。副管旗章京

薩音布彥。參領德奇滿珠爾。祭葬世職加等。

○予江南圩塘陣亡千總鄒玉廷祭葬世職。

○予湖北望花東界嶺陣亡都司擺似龍祭葬世職加等。

○賞福建省壬戌恩科鄉試年老諸生蘇松齡等五十五人舉人副榜有差。

○癸未以神靈助順。頒江西萬載縣

城隍廟扁額曰宣威遏寇。○諭內閣。前因浙

江省金嚴甯紹台等府地方。均為賊踞。百姓慘遭荼毒。曾經降旨。將浙東新復各府州縣

均蠲免二年錢漕。以蘇民困。嗣因衢州一城雖未失陷。而西安縣各鄉亦俱被匪焚掠。復降旨將該縣錢漕。照新復州縣一體蠲免。茲據左宗棠奏稱。同治元年分錢糧業於咸豐十一年冬間奉旨豁免。所有前奉恩旨請飭遵行等語。浙江被陷地方。同治元年分錢漕既已有旨豁免。即著將同治二年分應徵錢漕一體豁免。並著於原降諭旨二年上添註同治二字。以示區別。而免牽混。該撫其迅即

頒發謄黃。徧行曉諭。○又諭左宗棠奏請將在籍惡紳。先行革職審訊等語。浙江蘭溪縣在籍刑部郎中唐志歐。平日倚勢欺壓平民。無所不至。本年二月間復誣民人吳和君竊伊洋煙。擄捉拷詐。並將吳姓田產契券。徧勒交付。復有詐勒唐姓財物。及藥店洋銀之事。種種兇惡。實屬衣冠敗類。若不嚴行懲辦。何以安良懦而儆兇頑。唐志歐著先行革職。交左宗棠查明劣蹟。從嚴按律懲辦。○諭議政

王軍機大臣等前因江皖軍情緊要。屢命江忠義赴粵之師。東行赴皖。茲據江忠義奏。該營已次第啟行。前赴粵西。旋接奉赴皖之命。現已檄調頭隊五營。旋楚一面。咨商毛鴻賓籌給餉項。即行就道。惟廣東高州賊勢甚熾。屢接晏端書函催。望援甚切。粵東為完善之區。餉源所出。亦當力籌保全。各等語。現在援皖之師。既有席寶田周寬世新募各軍。諒已可資分布。而廣東陳金缸一股。蔓延日久。若

與潯郡各匪句結一氣。必為兩粵巨患。江忠義所部頭隊五營。此時計已前抵桂林。若再檄調回楚。不特為期迂緩。無補皖事之急。且以得力勁旅。僕僕道途。亦屬非計。江忠義著毋庸赴皖。即日率領各營。前赴粵省。酌量賊勢重輕。先其所急。相機剿辦。其軍行口糧。並著毛鴻賓迅速籌款接濟。毋令缺乏。致滯師期。至席寶田一軍。現在行抵何處。並著曾國藩毛鴻賓。催令剋日進行。應由何路進取。覘

賊所向。實力迎剿之處。著曾國藩相機調遣。湖南現在四境無警。其駐守省垣之趙煥聯一軍。及總兵王永章等。臬司陳士杰。知府戈鑑所部各營。何員可以調令援皖。著曾國藩與毛鴻賓隨時咨商。迅速辦理。毋誤事機。將此由六百里各諭令知之。○又諭左宗棠奏官軍進剿富陽援賊大獲勝仗。並勦辦徽休賊匪。疊獲大勝。沈葆楨奏老湘營迎剿祁西巨股獲勝。及韓進春等軍在陳家嶺一帶擊敗竄匪各摺片。首逆李秀城之黨。自杭嘉興合醜類。援救富陽。經藩司蔣益澧等痛加剿擊。兇猷稍衰。左宗棠現在添造長龍戰船。並檄調甯波水師。駛進錢塘江助剿。著即嚴飭水陸各軍。合力進剿。迅拔堅城。務將此股悍賊悉數殲除。毋留餘孽。其竄擾徽休之賊節。經臬司劉典督率兵勇。先後在嚴寺街潛口等處迎擊。退竄太平縣。其圖竄祁門之賊。亦經道員王文瑞督率丁長勝等。以少擊眾。

疊獲奇捷。微防可期。穩固。惟各股逆賊。麇聚
休祁一帶。原圖竄越江西。現雖擊退。而績溪
旌德。太平。石埭等縣。尚為賊踞。敗賊復竄回
建德。饒郡之防。殊為喫緊。韓進春率勇在陳
家嶺灣里周村一帶奮力攻剿。賊由洋塘山
路東趨。尚有偽愛王一股。由建德後河跟蹤
而上。彭鄱各縣鄉團。雖尚能聯絡。而賊數太
多。必須厚集兵力。方可以埽蕩羣兇。著沈葆
楨督飭在防員弁。認真堵剿。並激勵各屬團

勇。就近策應。以輔官軍。所不逮。毋得稍有疏
虞。饒廣為浙軍後路。關繫緊要。此時賊匪分
道竄逼江西。王德榜一軍。尚恐兵力不厚。並
著左宗棠妥籌兼顧。如皖事稍鬆。即飭劉典
等軍。毋分畛域。隨時相機援剿。俾該逆不能
竄越浮景。方為妥善。左宗棠另片一件。著留
中。將此由六百里各諭令知之。○又諭本日
據多隆阿奏。官軍攻破倉頭老巢。東路肅清。
一摺。覽奏欣慰。逆回糾眾盤踞同朝一路。以

倉頭鎮為老巢。多隆阿自入關後。督飭將弁。
奮力攻剿。連克堅巢。肅清東路。據奏南北兩
岸。均可紮營。與省城聲氣相通。是陝省軍務
一大轉機。著多隆阿迅將敗殘餘匪。挖捕淨
盡。一面率得勝之軍。仍遵前旨。鼓行而西。節
節埽蕩。或先赴咸陽涇陽一帶駐紮。與雷正
綰之兵會合。或先顧省城。將附近各賊巢。一
律鏟除。疏通糧道。多隆阿身為統帥。責無旁
貸。即著通籌全局。權其緩急。迅籌妥辦。不為

通制。甘肅固原失陷。平涼被圍。靈州甯夏情
形喫緊。亟盼馬德昭帶兵前往。多隆阿如能
分兵協助省城。即可令馬德昭帶所部前赴
甘省。勦洗。以免蔓延。並著多隆阿酌辦。同朝
既經肅清。晉防西路。似覺稍鬆。惟回匪被剿
四散。仍恐其到處勾結。自西而北。由綏遠城
一帶繞路竄越。擾及晉疆。牽掣多隆阿大軍
後路。著英桂仍飭在防文武員弁。於晉省西
北邊界。實力扼堵。毋稍疏懈。並行知綏遠各

城將軍等督率兵弁嚴密遏剿毋令竄逸將此由六百里各諭令知之○以江蘇鎮江防勦出力賞遊擊汪桂元都司古龍光巴圖魯名號知府李文安都司陳秀成等花翎知縣張熙等藍翎餘加銜升敘開復有差○予安徽徽州等處陣亡參將張顯榮守備左萬明等祭葬世職加等○予浙江富陽陣亡守備王宗元祭葬世職如遊擊例○追予浙江殉難學政張錫庚諡文貞按察使甯曾綸祭葬

三

七

世職加等均入祀杭州府昭忠祠副將鄂爾霍巴於湖州府建立專祠○甲申諭議政王軍機大臣等唐訓方奏蒙城力戰卻賊苗逆分踞潁上等縣圍攻壽州現復句通髮捻大舉合圍六安臨淮兵單餉絕情形請飛催南北援軍迅速赴剿一摺苗逆親督悍黨萬餘於蒙城附郭搶築營壘計圖困逼馬新貽激勵所部擊走各軍盡力窮追痛加剿殺惟兇渠張建猷數營堅持未下逆賊復添調醜黨

三

下

開挖長濠深營進逼現在逆黨分踞潁上殺害該署令濮煒及署鳳臺令蔡鏗復添大隊踞守正陽其黨潘壇復踞三河尖卡圍攻六安壽州霍邱潁州同時告警舒六一帶正值髮捻交乘之際苗逆遂復乘機勾結並出偽示誘惑蒙城新撫捻股遣人密招李城敗黨回巢又有串通李世忠以正陽懷遠易五河縣之信苗逆復行叛亂兇燄驟張現已遣黨四出太有并吞長淮之意其南句髮逆北招捻黨東連降勇誠如唐訓方所奏不可不早為消弭以致不可收拾僧格林沁現在督軍圍攻淄川踞匪據該大臣奏已遣施紹恆所帶勇隊千名赴皖此時苗逆驟熾非該大臣親督大軍回軍赴皖斷不足以制其死命著僧格林沁即由淄川剋日返旆南征與李續宜唐訓方之軍南北夾擊毋誤事機李續宜早已自湘啟行前據曾國藩奏稱該署撫行經鄂省尚須與嚴樹森面籌防剿現在苗逆

叛亂事機萬緊。李續宜著卽兼程星速赴皖。毋得在途遲滯。唐訓方所部兵力雖單。務須激勵諸軍。兼籌戰守。督率蒙城壽州文武。竭力備禦。毋使賊逆得以肆其蠶食。施紹恆勇隊到皖。應由何路進取。著與僧格林沁咨商調度。一俟僧格林沁李續宜南北之軍到齊。迅卽乘機進搆。殲厥渠魁。該逆人數雖多。大半由於迫脅。如能迅將一二兇渠死黨。剿除元惡授首。餘者自可反正歸誠。六安地方尤

為緊要。髮逆酋巨股自石澗埠舒城來犯。鮑超一軍現在無為。著曾國藩飭令就近援救。與桐城之周寬世舒城之蔣凝學等軍聯絡擊剿。鄂省自蘄水分竄。捻股東越潛太。著曾國藩迅卽調派各軍分投攔剿。毋令併入六安。串合髮逆。並與苗練句結為患。並著宮文嚴樹森督飭鄂省官軍。務將由鄂竄皖。捻股前截後追。毋任東趨。以鄰為壑。淄川圍剿事宜。僧格林沁布置已周。閻敬銘昨奏由阜

城前進。不日當可到營。著卽交其督辦。譚廷襄現在淄川。地方軍務一切均可面為交代。並著閻敬銘星速前往接篆。督辦淄川軍務。俾僧格林沁得以及早南征。毋稍延誤。閻敬銘未接篆以前。譚廷襄仍須督飭各軍實力剿擊。不可鬆勁。其白蓮池教匪。卽著僧格林沁閻敬銘飭令恩錫督率在事兵練妥籌剿辦。並著飛催丁寶楨所帶楚勇星速前來以資倚任。蘇克金馬隊留辦直東股匪。自可資其得力。惟念僧格林沁南征。兵力亦不可不厚。此軍或令隨同赴皖。或可仍留直隸。著僧格林沁自為調度。本日已明降諭旨。令劉長佑督辦直東豫三省交界剿匪事宜。該督現赴臨清。所有折由荏平等處北竄之賊。仍著督飭恆齡等會合直隸各軍兵練。繞前夾擊。務令賊匪不得喘息。迅卽殄除淨盡。以絕根株。而杜蔓延。王榕吉祝壇均係素嫻軍旅。著劉長佑督飭在於交界地方。襄辦防剿。以資

臂助。該督前奏。檄調李同文督率地方團練。並飭熱河官兵。馳赴景州。扼要堵截。仍著責成該道員等。及徐廷楷。余承恩各軍。四面兜擊。李同文如尚未到。著崇厚。迅即督催前往。李鴻章前奏。劉長佑過滬。所調副將陳飛熊等弁勇三百餘名。已由海道北來。其續調總兵李明惠。湘勇五百名。亦取道廣東。附輪船前進。以上二起兵勇。如有到津消息。均著崇厚。催令前赴劉長佑軍營。以資調遣。袁甲三

昨奏。應遣遊兵分巡光固及歸德。以遏苗逆。窺覷之路。當諭張之萬等。妥為豫籌。汝匪勒辦事宜。如可專由毛祖熙督辦。張之萬應赴陳州沈項一帶。何路擇要駐紮。著即籌定奏聞。陳州切近皖疆。袁甲三務即號召紳耆團練。速為備豫。袁保恆應留陳郡幫同辦理。抑卽遵前旨。赴張之萬軍營。卽由袁甲三酌定飭遵。前有御史王蘭谷奏。六安州紳士記名鹽運使李元華。謀勇兼優。曾經諭令吳棠。唐

訓方。查明該員是否可用。所帶練勇。曾否遣散。飭令前往天長盱眙。扼紮以防渡江逆匪。窺伺裏下河之路。刻下六安喫緊。如果李元華足資任使。卽著吳棠。唐訓方。飭令迅速招集所帶練勇。會同該地方官軍。合力戰守。以期得力。苗逆雖有以懷遠與李同忠。易五河縣之信。而吳棠昨奏。李世忠近有函致該漕督。以苗練生變。宜早籌備等語。李世忠與苗沛霖。本有仇隙。此時可激勵用之。使不遽與

苗合。著曾國藩。吳棠等。妥為駕馭。唐訓方原摺。著鈔給僧格林沁。曾國藩。李續宜。閱看片一件。著鈔給吳棠閱看。將此由六百里加緊各諭令知之。○又諭羅惇衍奏。請飭粵東督撫。修築省垣礮臺一摺。據稱廣東省城。自咸豐六年用兵以後。險要地方。均經焚毀。礮臺百無一存。肇慶客匪猖獗。日甚。請飭該省督撫。籌畫經費。為征剿兵餉。及修復礮臺之用。等語。粵東省城。全恃水陸礮臺。以為守禦。必

須及早修築。現在運關兩庫及釐金款項均
莫拉撥。那移著晏端書黃贊湯。即另行籌畫。
經費將省城內河及城北各地方礮臺。擇要
興修。以資禦侮。肇慶客匪聚黨已十餘萬人。
攻陷電白之廣海寨。復圍攻陽江縣城甚急。
吳昌壽所部勇糧無出。並著晏端書等籌款。
源源接濟。毋令缺乏。昨據江忠義奏。現已督
率所部。行抵桂林。已諭令該提督。毋庸赴皖。
即赴粵省剿賊。著晏端書黃贊湯。崑壽。即知

會江忠義由粵西撥兵會剿。以期早靖寇氛。
將此由五百里各諭令知之。○命直隸總督
劉長佑督辦直隸山東河南三省交界地方
勒匪事宜。○以江西萍鄉等縣辦團出力。千
總曾金榜以守備用。並賞花翎。丁惠良等
藍翎。餘升敘有差。○以江西新昌紳團克復
縣城出力。賞衛千總張弼臣藍翎。餘升敘有
差。○乙酉。諭議政王軍機大臣等。譚廷襄奏
河西股匪渡運北竄。被擊遁向西南。暨按捕

沂州餘匪情形各摺片。據奏賊之大隊由尖
莊偷渡。復經保德等擊之於堂邑之定遠寨。
及許家新村。冠縣白塔河店燕店等處。並由
譚廷襄飭令東昌府調團。於清博河岸一帶
嚴防。訊據賊供。欲搶渡運黃二河。赴白蓮池
入夥。復經保德由沙鎮追至王灣。與蘇克金
成保等馬隊合剿。大有斬獲。餘匪由老君塘
偷渡。至徐家莊朱北樓等處。趨向西南。蘇克
金等跟蹤緊躡。恆齡向西夾剿等語。如果屬

實。所獲殘匪。不過六七百名。自不難於殄滅。
惟須乘其窮竄。前截後追。總不令賊得以喘
息。所至裹脅。方能奏功。此時賊勢就衰。著劉
長佑。譚廷襄。閻敬銘。嚴督直東兩省官軍。迅
即乘機覘賊所向。四面兜剿。盡殲醜類。蘭費
餘匪。經黃國瑞及該府縣等疊次按殺。仍著
飭令黃國瑞所派駐紮尚嚴作子圩一帶之
參將吳鳳柱等。會合沂州守令。督率民團。盡
力按捕。毋留遺孽。現在由老君塘渡河之匪。

業已無多。直隸沿河一帶。必有伏匪潛匿。著劉長佑飭令王榕吉。祝壇等嚴督所屬地方。及派出各兵練。一律按捕。務期淨盡。白蓮池教匪。昨諭飭令恩錫督勦。茲據譚廷襄奏黃國瑞卽行帶隊取道嶧縣。進勦教匪。卽著閻敬銘飭令該總兵會同恩錫辦理。俾速成功。將此由六百里各諭令知之。○又諭沈葆楨奏。繼果營疊獲勝仗。會同浙師攻克黟縣。及韓進春一軍。擊賊獲勝。各摺片。逆匪垂涎江右。自皖之績溪。西至饒境。橫亘數百里。王沐一軍。屢戰屢捷。茲復會同左宗棠所派之劉典一軍。克復堅城。徽境漸可肅清。江防賴以保障。實屬異常出力。惟黟縣克復之後。餘匪追出北門。轉入山谷。伏賊四起。劉典令親軍助勦。伏賊右路潰出羊棧嶺。左路潰出方干嶺。現已歸併何處。恐其再來撲城。著左宗棠。沈葆楨。飛飭劉典。王沐等。各率所部。四面按擒。務將祁夥一帶零匪除盡。毋任再有勾結。

另片奏。韓進春一軍。擊勦遇田股匪。頗有新擒。其尾隊復由石門竄向建德界上。其大股仍在時山許家山一帶。段起現赴梔田街驪看地勢。擬與韓進春會商進勦等語。刻下黟縣已復。祁門解圍。軍威益振。賊勢日孤。該撫卽催令韓進春等。迅將大股賊匪認真掃蕩。以勦為防。又安邊境。將此由六百里各諭令知之。○又諭官文等奏。豫擒被擊西趨現籌兜勦。穆騰阿等奏。漢中被圍日久。請飭催川楚援軍。並河南籌辦軍火各摺片。豫擒自上巴河官兵擊走後。由但店東趨蘄水蘄州。分竄廣濟。經該州縣等攔頭扼截。設伏擊敗。折回蘄水。適成大吉等軍趕到。先後斃賊多名。該逆由蘄水北之團陂回竄三里畈。但店一帶。擾及黃岡縣屬之夫子河。此次該逆回竄湖北。官軍雖頗有新擒。並未大加懲創。且據生擒賊供。該逆以兩股游弋蘄廣一帶。以六股折回。欲由黃安黃陂窺伺武漢。如有官兵

扼截卽由舊路回竄河南等情。逆蹤慄悍靡常。亟宜嚴為備禦。著官文嚴樹森卽飭舒保穆正春等軍分投堵截。與成大吉。王桐柏等軍前後夾剿。務令就地殲除。毋任紛竄。黃陂致武漢。又形震動。其豫鄂毗連地方。賊蹤往來已成熟徑。並著張之萬毛昶熙飭令余際昌等軍嚴密堵遏。償賊蹤逼近卽行越境會擊。以剿為防。毋任闖入。曾國藩前奏擒匪由新水分股東越潛太竄撲舒桐。已與渡江髮

——

——

逆合股。何以官文等兩次奏報並未提及。是否游弋蘄廣之賊。業已東竄皖疆。著嚴樹森仍遵前旨。迅將此股賊匪前截後追。毋任陸續東竄。與髮逆苗練勾合。貽禍鄰封。至陝省漢中被圍日久。兵單餉缺。岌岌可危。官文等前已遵飭李雲麟率師援陝。著卽恪遵前旨。迅飭統率所部星馳前進。速解漢中之圍。並著路秉章仍飭周達武一軍就近援剿。會合陝鄂諸軍力圖埽蕩。以靖鄰氛。其川省應協

陝餉。卽著速為籌撥。以資接濟。至多隆阿軍火向由湖北轉運。茲據穆騰阿等奏接據官文函稱。恐鄂省籌解稍有不敷。請咨鄰省協濟等語。多隆阿大軍現在攻克倉頭鎮老巢。正在得手之際。償致軍火缺乏。貽誤非輕。本日已諭令英桂籌辦解運。並著張之萬每月籌撥火藥二萬斤。火繩二萬盤。按月委解潼商道收儲。以備要需。其湖北應解軍火。仍著源源接濟。毋得以晉豫分任其事。稍存諉卸。

——

——

將此由六百里各諭令知之。○又諭穆騰阿瑛榮奏新募楚勇到省。擬令紮營三橋。並令曹克忠統帶駐紮各摺片。西安省城糧道不通。餓殍載途。民情恟懼。非早為疏通。勢將內變。省城兵數本已不少。瑛榮閉關自守。不肯派隊出城。分扼要隘。致成坐困。前多隆阿奏派總兵曹克忠管帶烏拉馬隊前往省城。將前後所募楚勇七營一併交該總兵帶赴鄧縣。茲據穆騰阿等奏稱。回匪巢穴盡在北路。

鄂縣之匪。皆由北路竄入。且須由咸陽之三橋一帶經過。擬令曹克忠紮營三橋。斷北路回匪援鄂之路。以安省城西路等語。自係實在情形。惟昨據多隆阿奏稱。倉頭賊業已攻拔同朝一律肅清。諒華渭一帶零星餘匪。不難剋期勒盡。此時該大臣軍營。已與省城聲息相通。西安東路之防。即可稍紓。該大臣督辦全省軍務。自應兼顧西路軍情。旦夕異宜。曹克忠一軍。應否移紮三橋。或仍在咸陽

書奏卷六三

六

鄂縣交界地方駐紮之處。著多隆阿酌度情形。咨照穆騰阿。瑛榮辦理。曹克忠到後。馬德昭一軍。能否即派赴甘肅赴剿之處。著多隆阿仍遵前旨。酌量調派省城附近賊匪。仍著穆騰阿。瑛榮督飭諸軍。出隊接剿。以期及早廓清。不得專恃多隆阿援軍。亦不准輕行議撫。致滋貽誤。回紇馬百齡前隨張芾及省城委員繆樹本等赴倉頭勸諭。回眾嗣張芾等均被戕害。馬百齡獨晏然無事。在賊中幾及

一年。仍復輕身回省。其中難保無通匪情事。瑛榮前僅奏請撤銷卹典。並未將該回紇查辦。殊屬輕縱。著多隆阿不動聲色。嚴密確查。據實具奏。將此由六百里各密諭知之。○又諭瑛榮奏請飭山西籌濟軍火。並飭催湖南協餉各等語。秦省製造火藥。皆赴鄰省採辦。近日道路多梗。採辦甚難。多隆阿大營所需火藥。向由湖北轉運。現亦不敷協濟。該大臣勦辦東路。正在得手之際。尤不可令軍火稍

書奏卷六三

六

有缺乏。致誤戎機。著英桂每月籌辦火藥一萬斤。火繩一萬盤。解赴陝西。交潼商道收存。以備多隆阿軍營攻剿之需。毋得稍涉遲誤。前經陝省請撥湖南協餉。迄今未據報解。該省各屬糜爛。錢糧既無從徵收。捐借更難以彙集。窘迫萬分。若不速籌接濟。飢軍譁潰堪虞。著毛鴻賓先其所急。將應解陝省協餉。先行籌撥若干。以濟急需。將此由五百里各諭令知之。○又諭瑛榮奏請飭兩淮籌撥陝餉。

等語。西安省防各營兵勇欠餉累累鄰省所撥協餉又均未解到若非量為接濟勢必譁潰堪虞。瑛榮所請飭下兩淮鹽運使照舊將江運八萬引仍撥陝省派委道府大員前往接辦招商捆運以充軍食之處是否可行著曾國藩督飭兩淮鹽運使體察情形妥籌速奏將此由五百里諭令知之尋奏苗逆復叛淮河梗阻皖營之鹽疏銷無路勢難兼顧陝餉報聞○以前任江蘇巡撫薛煥署禮部左

軍機處

卷三

侍郎並在總理各國事務衙門辦事○以陝西鳳翔守城出力賞知府張兆棟參將德勝等花翎並升敘有差○以克復安徽黟縣城賞知州王沐巴圖魯名號○以辦事玩延革湖北知縣陳五典職○以湖北竹山竹谿兩縣城被賊竄陷旋即克復革遊擊謝聘環署都司楊得陞守備色期音達職免治罪○予湖北蘄水等處陣亡副將謝鴻禧遊擊易瑞需都司艾正和守備蕭復勝千總唐品山等

祭葬世職加等。於死事地方暨原籍均建專祠○丙戌諭內閣前因陝西回逆煽亂命將出師恭行天討復念漢回皆朝廷赤子明降諭旨令陝甘統兵大員止分良莠不分漢回如實係良回不肯從賊被逆回偏脅奮身死節及合門殉難者仍准分別奏請旌卹茲據趙光奏雲南與陝西事同一律該處殉難官紳士庶暨良回被害人戶歷年均未奏報請旨准卹等語雲南省自漢回構釁仇殺日久

軍機處

卷三

漢人之官紳士庶慘遭殺戮者為數甚多迄今未據該省奏請旌卹致忠義之氣湮沒未彰實堪矜憫至安分良回或被漢人枉殺或被逆回威脅受害情亦可慘國家威德覃敷豈可令萬里邊隅不沾一視同仁之澤著雲南巡撫賈洪詔督飭各府廳州縣等設局採訪其通省漢人官紳士庶之殉難者著該撫飭令各屬詳查具報彙請旌卹其回人中素行良善不肯從逆致被殺害者著一併確切

查明彙請旌卹以示優卹無私至意○八旗都統議覆詹事府少詹事桂清奏請酌定城上界址堆撥查城上八旗界址實屬多寡不均現已責令各該旗按照方位均勻分管並於分旗後再行分段滿洲管十分之五漢軍管十分之三蒙古管十分之二其馬道口五十六處除留八處為官兵上下之路其餘四十八柵欄全行封鎖至坍塌堆撥卽應一律修葺並於應修五十六座外在各該旗適中之地添建堆撥各一座為三固山參領輪流直班公所以便管轄從之○予雲南昆明永昌等處殉難文生尹培煜等紳民婦女一萬九千七百四十二名口分別旌卹如例○予雲南大理楚雄殉難監生李鴻昇等紳民婦女八十戶分別旌卹如例

大清穆宗繼天開運受中居正保大定功聖智誠孝信敏恭寬毅皇帝實錄卷之六十三

大清穆宗繼天開運受中居正保大定功聖智
誠孝信敏恭寬毅皇帝實錄卷之六十四

臣等謹將英桂奏請將蒲州英桂於回省後即著責成和昌等嚴加防範毋得以回匪已遠稍涉鬆勁其平定防務尤應隨時偵探鍾秀雖駐紮遼州英桂仍當妥籌兼顧以保完善另片奏遵解多隆阿軍營炸礮子八十箇等語此項炸礮最為行

散修

同治二年癸亥四月丁亥諭議政王軍機大

臣等英桂奏陝省同屬漸就肅清擬即回省一摺現在倉頭鎮克復後晉省河務較鬆英桂自可回省料理公事惟蒲州與陝省僅隔一河難保回匪不思竄越新到楚勇已留駐蒲州英桂於回省後即著責成和昌等嚴加防範毋得以回匪已遠稍涉鬆勁其平定防務尤應隨時偵探鍾秀雖駐紮遼州英桂仍當妥籌兼顧以保完善另片奏遵解多隆阿軍營炸礮子八十箇等語此項炸礮最為行

軍利器山西產鐵尤佳製造更當合用副參領祥安等均能製造著英桂於省城內選擇嚴密處所飭令隨時製造接濟多隆阿軍營但利器不可示人務須慎重秘密不得令他

上於

人窺探學習致滋流弊慎之將此由五百里諭令知之○戊子以雨澤未霑

大高殿設壇祈禱親詣行禮○遣恭親王奕訢詣

時應宮悖親王奕詒詣

昭顯廟鍾郡王奕詒詣

宣仁廟孚郡王奕誥詣

凝和廟肅親王華豐詣

覺生寺豫親王義道詣

黑龍潭拈香○諭內閣僧格林沁奏請將貽

誤事機之城守尉等分別議處等語德州城

守尉富明知州張應翔於翼長蘇克金追賊

至該州時閉門不肯放行以致竄匪乘夜北

渡雖據該知州稟稱恐係賊匪冒充未便開城惟於賊蹤北竄不能堵遏迨官兵追至又復不察虛實任意阻滯實屬貽誤事機僅予議處尚覺過輕富明張應翔均著交部嚴加議處以示懲儆○諭議政王軍機大臣等有人奏縣令貪黷劣蹟昭著請飭提省究辦一摺據稱直隸雄縣知縣顧肇域與劣紳武舉張凌閣弟兄為莫逆交該縣民人王晉遣抱京控張凌閣謀殺伊姪王長有一案係奉旨

發交本省提訊之案張凌閣係此案正兇顧肇域一味袒護延不解省張凌閣弟兄與棍徒李廷弼宋雲詳聯為一氣欺壓鄉愚李廷弼平毀龐姓墳墓並挾仇淹斃民人李老句串張凌閣弟兄勒派各村加攤護田費用匪徒李添才等搶劫溫崔兩姓被獲送官經張凌閣向顧肇域屬託反以溫崔兩姓及村民為賊嚴加看押將李添才等即時釋放上年因差額外苛派地丁錢糧每兩按制錢四千

徵收並多徵額外本年考試文童將張姓答責二百請飭查辦等語州縣為親民之官似此貪黷乖謬肆意妄為如果屬實大為閭閻之害著劉長佑將顧肇域被叅各款密派妥員嚴切訪查如實有端倪即行撤調來省按照所叅各款秉公查明據實奏奏毋稍徇縱原摺著鈔給閱看將此諭令知之○又諭僧格林沁奏追勦南竄股匪及北路獲勝現籌南北軍務緩急情形一摺暨譚廷襄奏東省

近日各路軍情及恭報交卸撫篆密陳宋景詩應暫事羈縻各摺片現在圍攻淄川及籌勦白蓮池教匪僧格林沁所籌均極周至其追勦南竄之張守義等股匪及北路追勦竄匪於在平等地方獲勝等情與譚廷襄劉長佑奏略大略相同此股竄匪據稱僅餘馬賊六七百名經僧格林沁飭令恒齡及成保薩薩布海等各軍探明賊蹤實力追勦與劉長佑所派直省各軍前後夾擊其蘇克金一軍

僧格林沁飭令馳赴河間。豫備迎擊。嚴防北
面藩籬。辦理甚為妥協。卽著僧格林沁劉長
佑嚴督諸軍。務卽乘機速將此股竄匪探蹤
四面兜剿。殄除淨盡。仍著劉長佑閻敬銘嚴
飭直東所屬各該地方。實力嚴防。毋任餘匪
被剿乘虛衝突。並將沿河伏匪一律搜除。嚴
飭防河員弁認真巡察。毋稍鬆懈。前因唐訓
方張之萬袁甲三疊次奏報苗沛霖復行叛
亂。逆談驟張節經寄諭僧格林沁將淄川圍
剿事宜移交閻敬銘督辦。卽行返旆南征。茲
據僧格林沁奏稱。目睹直東情形。若不立籌
掃蕩。其患更有甚於苗沛霖者。擬俟直東賊
匪剿除淨盡。再行回軍蒙亳等語。苗沛霖陰
鷲狡詐。蓄謀甚久。而煽脅尤眾。若不早圖。勢
將謀距淮甸。蔓延東豫。以窺中原。其患實非
淺鮮。唐訓方現有兵力。不敷攻剿。非得僧格
林沁回軍。斷不足以制其死命。惟直東軍情
緊急。自應布置妥協。方可返旆而南。但亦不

能定俟直東兩省全行肅清。始議南征。久稽
時日。著僧格林沁趕緊部勒。飭催恆齡及蘇
克金等軍。將北路竄匪剋日掃除。其淄川城
匪及白蓮池教匪圍剿事宜。卽可交閻敬銘
等督辦。淄川城小而堅。攻搗定需時日。白蓮
池亦負隅自固之賊。未能遠出。但能將四面
圍剿。布置周妥。閻敬銘雖初任封圻。辦事認
真。當能接辦。該署撫現已到任。於東省軍務
責無旁貸。並著飛催丁寶楨迅速來東。以資
任使。張守義等竄匪。如果竄入白蓮池。卽可
會合德楞額黃國瑞等軍。併力進剿。聚而殲
旃。其譚廷襄摺內所奏。又有另股竄由泰安
上下嶠峪等處至甯泗境內之賊。並著閻敬
銘嚴督地方兵團。實力剿辦。東省荏苒甚眾。
各屬地方似此散股。恐尚不少。該署撫履任
方新。均須督率整頓。毋得率聽屬吏粉飾因
循。致負委任。譚廷襄已卸撫篆。卽著前赴工
次。將河東河道署任事宜。專心辦理。現在節

逾小滿。所有勘工催料。均關緊要。毋稍疏忽。宋景詩與柳林團互殺。顯係有意尋仇。其能否暫事羈縻。著劉長佑。閻敬銘。詳加調察。相機辦理。將此由六百里各諭令知之。○又諭李桓奏陝南協餉緊要。請旨飭查一摺。據稱該藩司行抵長沙。選將募勇。捐辦行費銀二萬兩。定於四月初一日起程入陝。惟聞陝南川楚各軍。欠餉甚鉅。向由何路供支。應先行催提。並請飭部查明陝南軍餉。係指某省。迅速協撥等語。本日已諭知戶部。查明趕緊飭撥矣。陝南各軍。兵疲餉絀。若不亟為籌畫。恐有譁潰之虞。瑛榮身任疆圉。責無旁貸。著將該處軍餉。妥為籌解。隨時接濟。俾李桓接手之時。不至以軍食分心。其李桓未到以前。仍責令毛震壽相機防勦。毋稍疏失。駱秉章素能不分畛域。漢南切近川疆。尤應源源接濟。俾無缺乏。漢南軍情。萬分緊急。李桓摺內奏稱。須兩月方能到陝。未免紆遲。仍著督催兵

勇趨行。庶早到一日。早收一日之功。用副朝廷倚任之重。將此由六百里諭知駱秉章。瑛榮。並傳諭李桓知之。○又諭毛鴻賓奏攻克青山等處賊巢。籌畫靖邊界防堵。並續辦土匪各摺片。會匪張芝蘭等。由澈浦逃入芷江辰谿交界之帽子坡。復竄踞蘆坪等處。經遊擊田宗營等分路進攻。連日將青山帽子坡兩處賊巢攻克。勦辦尚屬得手。惟逆首尚未就獲。現在敗殘餘匪。均向楠木山竄去。著毛鴻賓即行督飭士卒。嚴密圍捕。務將此股悉數殄滅。並將匪首斬擒。毋留遺孽。黔省清江苗匪。糾合教匪。襲陷古州城池。並分股竄近永從縣。以拒楚師。勢將圍攻黎平郡城。從前投誠積匪。余老科。唐一輔等。陰附賊匪。益以游勇痞棍。近數萬人。黎平勢甚危急。毛鴻賓擬飭戈鑑一軍。酌察事勢。先往靖州邊界堵勦。著即相機辦理。並俟本境土匪肅清。即飭防界各軍。赴黔援勦。至黔省清江苗教各

匪勢成燎原。迤東各處亦徧地糜爛。非痛加勦洗。不足以戢兇頑而靖地方。張亮基務當籌撥兵勇。迅速馳援。黎平會同楚軍合力夾擊。以期掃蕩逆氛。並將思銅一帶教匪會勦淨盡。以消兩省邊患。毋得因循貽誤。其湖南衡永郴桂一帶土匪伏匿甚多。經毛鴻賓飭屬訪查。將常甯之李功名。衡陽之黃惲積等謀逆各犯。擒獲多名。分別正法。訊辦並將益陽縣等處會匪頭目胡花臣捕獲。消患未萌。辦理甚屬妥速。著卽將此兩案餘黨實力挖捕。毋任一名漏網。該撫務須嚴飭在事文武認真辦理。不可稍存姑息之見。將就了事。貽患將來。將此由六百里各諭令知之。○以故阿巴噶郡王阿爾塔什迪子瓦全達拉襲爵。○予湖南帽子坡陣亡千總段文鳳把總侯文華祭葬世職加等。○朝鮮國使臣尹致秀等三人於神武門外瞻謁。○庚寅諭議政王軍機大臣等。劉長佑奏官軍越境勦匪獲勝。

逆首畏罪輸誠。一摺。據稱馬步各軍追賊於平原曲周等處。屢獲勝仗。首逆楊朋嶺等悔罪乞降。現已令其呈繳器械馬匹。暫留軍營。派都司唐建勳等妥為照管等語。楊朋嶺屢降屢叛。此次被擊窮蹙。又復乞降。劉長佑因宋景詩等相距不遠。暫將該犯留營。固屬一時權宜之計。惟若輩狼子野心。終難馴服。著嚴督都司唐建勳等妥為羈束。毋令再有逃逸。至前此投誠之程順書等。及此次楊朋嶺等首夥各賊。該督能否派令隨同官軍作為前敵。察其勇怯。以覘其真偽。或卽咨商僧格林沁。分撥該大臣軍營。妥為安插。如該匪等首鼠兩端。心懷反覆。卽可不動聲色。設法殲除。以絕後患。儻敢敷衍目前。貽患後日。必惟劉長佑是問。直境雖就肅清。而河東伏莽尚多。仍須及時挖勦。閻敬銘到任後。疊經諭令進紮淄川。俾僧格林沁得以統兵南下。該處軍務一日未竣。該署撫卽一日不能他往。其

莘冠一帶防勦善後均關緊要必須遴委明幹大員前往辦理總兵保德平日帶兵尚無貽誤或卽責成該員會同直隸官軍認真撲捕能否得力之處並著劉長佑閻敬銘會商妥辦將此由五百里各諭令知之○又諭恩麟奏賊匪竄圍靜甯經兵圍擊退及鹽茶廳被陷憑陳甘肅急迫情形請飭催馬德昭赴援各一摺此次賊匪竄圍靜甯該署知州恩祿與參將李友伏等痛加堵勦生擒黃袍黃褂賊目數名以致身受矛傷洵屬奮勉而隆德神林鋪圍首趙合璧等越境赴援尤能深明大義深堪嘉尚所有在事出力員弁准其查明奏請獎敘惟此股逆回雖竄回固原等處老巢難保不乘隙復竄思麟現飭王吉利駐紮隆德王德恆駐紮靜甯卽著責成李友伏等會同民團實力防勦毋稍疏懈至王大桂前赴固原城內責詰穆喇二逆該逆等既俯首伏罪何以忽又四門緊閉王大桂為該

逆揆之人何能絕城逸出所稱各情節殊多支離恩麟何以於此等緊要關鍵不加詳察據探廳城失陷後王大桂與子王明忠等逃回團莊調人被賊追獲是否實係被害回性詭譎恩麟不可純以忠厚待人致墮奸計務當隨時留心察看如有端倪卽行嚴辦以杜內應並著就現有兵力督飭員弁相機堵禦以待援兵現在多隆阿已將東路肅清若由三原進兵則西安北路可以無虞潼關至省城雖有回匪諒多隆阿已乘勝掃蕩計可肅清卽著斟酌形勢若能由三原馳赴西路則馬德昭卽可退回甘省穆騰阿瑛馨防守省垣之滿漢兵勇為數不少但能調度合宜何至一籌莫展著卽商同多隆阿妥為布置毋得輒形懼怯馬德昭於接奉此旨後卽著咨商多隆阿迅速帶兵馳赴慶陽會同熙麟節節進勦迅解平涼之圍疏通道路以靖邊圉熙麟馬德昭均係本省文武大員責無旁

貸務當妥籌至計以副委任多隆阿行抵西路即著與雷正綰和衷商酌應如何分投勦辦之處即行妥籌辦理將此由六百里諭知多隆阿穆騰阿熙麟瑛榮雷正綰馬德昭並傳諭恩麟知之○以甘肅靈州勦辦撤回出力擢知州張瑞珍以知府用○以甘肅鹽茶廳城失陷護總督恩麟等下部議處革護都司趙喜職並逮問○予直隸高邑陣亡知縣畢世榕祭葬世職如知府例於死事地方暨

原籍建立專祠外委鎖慎言祭葬世職如守備例附祀畢世榕專祠○辛卯以神靈顯應加福建歸化縣福順夫人封號曰靈應諭內閣步軍統領衙門奏步甲把持地面侵蝕錢糧請交部嚴審等語正藍旗蒙古地面步甲城兒即杜小兒鑲藍旗滿洲地面步甲鄭五幅即毛兒窩膽敢把持該甲喇事務侵吞空名錢糧包庇冒名雇替不法已極並據供稱有與本管各官通同侵蝕兵餉情事虛實

均應澈底根究城兒即杜小兒鄭五幅即毛兒窩均著交刑部嚴訊確情按照步軍統領衙門新章章程從重懲辦其受雇頂替步甲之常海一名著一併交部歸案審辦正藍旗蒙古協尉趙那蘇錦副尉毓琬委協尉玉海步軍校薩斌慶林伊凌阿玉秀常陞鑲藍旗滿洲步軍校全興署協尉雙山協尉崇禧副尉德恆委協尉慶福步軍校德山色克圖委步軍校文通均著回旗當差聽候傳質在逃

之步甲崔大得呂大印富得等仍著步軍統領衙門順天府五城一體嚴緝務獲歸案辦理○諭議政王軍機大臣等前因御史吳台壽奏奉省東邊閒曠之地多未開墾錦州廣甯義州一帶官荒馬廠儘可設法變通請飭實力履勘以開利源當經諭令恩合悉心查奏茲據恩合奏稱錦州牧馬之區名為西廠水草豐茂足敷牧放此外則廣甯所屬之間陽驛小黑山等界名為東廠地勢平坦內有

窪陷於牧放不甚相宜。若將東廠裁撤一律開墾可得田一百萬畝。惟東邊一帶近有流民在彼私墾。聚集日眾。查辦甚難。請派封疆大員詳酌籌辦等語。閭陽驛小黑山等界舊設牧廠。既據恩合奏稱地勢低溼。於牧馬不甚相宜。而大凌河西岸地勢寬廣。即官馬多至一萬餘匹。亦足敷用。即著照該副都統所議將東廠裁撤歸併西廠牧放。遵照舊章妥為經理。其應墾廠地。即照恩合所擬令盛京六十六佐領下甲兵按名分領招佃取租。除交升科租銀外。餘資津貼常差。其按年應徵租銀。即責成各該佐領催交造報。以收裕餉。便民之效。該副都統本係盛京旗員。情形熟悉。所陳墾田一百萬畝之說。諒必確有把握。即著該副都統妥為經理。實力舉行。不准稍存諉卸之心。至盛京東邊一帶曠閒山場林木稠密。奸民流民聚眾私墾。歷年既久。人數過多。經理稍失其宜。即恐激成事端。利未興

而害立見。於根本重地殊有關係。著玉明會同恩合將東邊自鞍陽邊門以北何處必應照常戍守。何處可以展墾地畝。流民之屯聚者。何以化梗為良。隱患之未形者。何以潛消默化。不動聲色。嚴密訪查。妥議具奏。候旨遵行。此事朝廷早有所聞。利害攸關。固不能不消患未萌。亦不肯孟浪從事。王明恩合務即密查據實具奏。不准一字欺飾。俟奏到後再行妥籌辦法。亦決不咎其既往。將此各諭令知之。○又諭英桂奏。潞鹽銷路積滯。請飭嚴禁侵越。停止抽釐一片。河東鹽課為現今餉需大宗。河南行引地面。既有蘆鹽侵越。且抽釐較前過重。以致商販視為畏途。新舊各引諸多積滯。於國課大有關礙。著劉長佑通飭所屬。嚴定蘆鹽行銷界限。查禁私銷。毋得侵及路鹽行銷之地。張之萬將魯山等處抽收鹽釐各局卡。酌量裁減。以紓商力。而利行銷。該督撫等務當通籌全局。俾各省引路釐局

均無窒礙。方為妥善。將此各諭令知之。○以山東兗州等處勦匪出力。賞知府曹丙輝守備張永清等花翎。通判陳兆慶等藍翎。餘升敘加銜。開復有差。○緩徵山西榆次洪洞兩縣節年民借倉穀。○壬辰以神功顯著。領三姓地方。

關帝廟扁額曰威震挹婁。

城隍廟扁額曰靈昭黑水。○諭內閣給事中徵麟奏外省寄有匿名公啟。關係地方情形。

據實奏聞一摺。投遞匿名揭帖。例不准行。雖據該給事中所陳各情。有關軍務吏治與挾仇訐告似稍有閒。何以不在都察院步軍統領衙門呈訴。輒用匿名公啟。假託泰安府署緘寄。又何以知鴻儀錢鋪之鋪夥與給事中徵麟認識。令其轉送私宅情節。展轉支離。難保中無別項情弊。所有投遞匿名公啟之鴻儀錢鋪鋪夥李連珠一名。著交刑部嚴訊。所遞匿名公啟究係何人寄交。務即確切根究。

奏明辦理。○又諭沈葆楨奏官軍擊賊大獲勝仗。並陣斬巨逆各摺片。據稱偽堵王黃老虎與許家山等處踞匪。由祁門進逼。與參將韓進春對河而陣。營官王大魁等率槍隊憑河扼之。該逆分路渡河。蜂擁來撲。韓進春親率死士。衝其右翼。楊必遇等統馬隊撼其左翼。韓鳳飛等直搗中堅。殲其前鋒甚多。偏至河邊。三面夾擊。賊遂大潰。殺賊一千餘名。並將陣斃偽孝王胡鼎汶梟首示眾。該將士等齊心殺賊。血戰解圍。辦理甚為出力。仍著沈葆楨督飭韓進春等乘勝進剿。將退屯楓樹龍之賊悉數掃除。毋留餘孽。所有此次在事出力員弁兵勇。著該撫查明保奏。以示鼓勵。○諭議政王軍機大臣等。給事中徵麟奏外省寄有匿名公啟。關係地方情形一摺。據稱前門內東交民巷鴻儀錢鋪鋪夥李連珠送到信一封。拆閱係東省士民公啟。所稱皆山東近日軍務吏治等事。謹將原信呈覽等語。

匿名揭帖本應立案不行惟所陳各款均關繫該省軍務吏治等事未可概置不問且聞敬銘甫經到任正須整頓地方積弊無所用其迴護著按照原信所陳各款逐一嚴密訪查據實奏聞如查明實有其事卽著嚴密查辦秉公奏參不准一字欺飾又前據徵麟奏參東省文武庸劣各員摺暨譚廷襄辦理降眾一意主撫各摺片各該員被參各款如果屬實亟應嚴行懲辦並著閔敬銘一併查辦再前據山東試用道鍾文呈遞酌擬東省急務十二條是否悉中竅要著閔敬銘按照所呈各條悉心體察如有可以採擇之處卽著奏明辦理徵麟摺片三件並匿名公啟鍾文條陳均著鈔給閱看將此諭令知之○又諭沈葆楨奏韓字營血戰解圍並逆首胡鼎汶陣斃各摺片偽堵王黃老虎等由祁門界桃墅鎮一路率悍賊十餘萬渡河撲營韓進春親督死士奮力擊賊以少勝多殺賊無數陣

斃偽孝王胡鼎汶一名實屬異常出力惟黃老虎尚未就擒該逆現退至離營三十餘里之楓樹龍一帶難保不乘隙復出滋擾仍著督飭韓進春一軍加意嚴防毋任竄越段起一軍前據該撫奏報已赴楓田街躡看地勢擬與韓進春會商進剿刻下祁門賊勢甚蹙卽著飭令該道員等一鼓作氣實力勦辦務將黃逆殲除勿留餘孽以靖邊防將此由六百里諭令知之○又諭沈葆楨奏請將江海關代徵九江洋稅抵解京餉等語京餉為目前要需現在度支告匱各該督撫自宜竭力籌撥以濟急需此項洋稅本係應行解江之款以之抵解江省京餉誠為兩便著曾國藩李鴻章迅飭江海關速將前項稅銀勻月分批解京充餉抵作江省應解奉提地丁之項毋稍延宕其尾欠銀數仍著沈葆楨於地丁項下徵存搭解以清款目而裕度支將此由四百里各諭令知之○又諭特普欽奏俄人

赴省要求。按約駁阻。並請飭總理各國事務衙門禁止各摺片。海蘭泡俄酋布色依不聽攔阻。擅赴齊齊哈爾。謁見該將軍。呈遞公文。懇求在省城通商。並乞由齊齊哈爾省城。借道前往吉林。自松花江水路回國。經該將軍按照條約指駁。語塞而止。俄人復欲在雅克蘇對岸江右地方種地。並懇暫行借給。又欲暫給瑗瑋城江右地方開墾打草。均經該將軍正言拒絕。並派員彈壓。伴送該俄人回行。所辦甚屬妥協。俄人貪得無厭。詭譎異常。現雖廢然而返。難保不另生枝節。別啟狡謀。特普欽惟當隨時防範。如俄人續有要求。仍當按照條約嚴詞阻止。不可稍事游移。該將軍所奏摺片各一件。本日已諭令總理各國事務衙門辦理。將此由四百里諭令知之。○予安徽黟縣陣亡千總晏維中等祭葬世職加等。○癸巳。

孝端文皇后忌辰遣官祭

昭陵○諭內閣。此次病痊補行大考之翰林院編修徐申錫著附入二等末。由該衙門帶領引見。○又諭前因升任給事中順天府府丞卞寶第奏。江防水師各員侵吞釐金。縱勇通賊等款。當交曾國藩李鴻章嚴行查辦。茲據奏稱遵查被參各員。除黃彬業經革職解交該大臣審辦。應另案奏結。李德麟業經都興阿奏參革職。外。其總兵陳國泰所部紅單船勇。不免有濟賊情事。賴鎮海打仗尚稱奮勇。惟所部勇丁。亦有出入賊中。售物圖利者。現在勇丁已多遣撤。遊擊張瀚船勇駐守靖江一帶。不免有勒收商船捐款之事。刻下沿江卡局。均歸糧臺經理收放。該船勇不得再有干預。參將郭定猷船在劉河地面。剗商分財。捏報勝仗。尚無確據。總兵泊承陞亦無領餉肥己之事。惟年逾六十。難期振作。其子亦無生事滋擾等情。參將常海於咸豐八年揚州失陷時。因兵單力竭。退守萬福橋。實非先行

逃避惟誤認殉難廩生汪桂家藏有木料指為惡勇私拆民房並將汪桂之妻郭氏掌責實屬不合。遊擊文裕亦無交結劣紳專事遊宴情事。其咸豐十年駐防九里溝因警信疊至撤保城池實非逃匿。以上各員請分別辦理等語。除賴鎮海郭定猷張瀚文裕四員或部勇業經裁撤或叅款並無確據均著無庸置議外。福建金門鎮總兵陳國春以專閫大員於上年賊竄江北未能實力堵禦且於所部弁勇通賊失於覺察實屬約束不嚴。陳國春著卽行革職。江南狼山鎮總兵泊承陞年已衰邁難期整頓卽著以原品休致。陳國春泊承陞二員均著不准留營。揚州營參將常海擅責殉難廩生之妻調停息事殊屬不合。著卽行革職以示懲儆。現在江防正關緊要水陸帶兵員弁正宜嚴加整飭以期紀律嚴明賊氛速殄。仍著曾國藩李鴻章等隨時申明軍律嚴密訪查儻有通賊濟匪之員及縱

勇殃民等劣蹟卽著嚴叅懲辦如情節較重並卽於查明後軍法從事毋得稍涉姑容。○又諭李續宜奏途次患病悲痛未釋請仍開巡撫署缺專辦軍務等語。奪情起復本係朝廷不得已之舉既據該署撫滙情陳奏至再至三自當曲體下情勉從所請。李續宜著准其開署理安徽巡撫之缺仍專辦皖北軍務迅速前赴軍營毋稍遲延。○諭議政王軍機大臣等李鴻章奏太倉全境肅清官軍進紮崑山城下攻勦獲勝一摺。總兵程學啟一軍於太倉肅清後進偪崑山東門跨河立營該逆由南門衝出我軍一面紮營一面奮勇截殺斃賊甚眾該逆敗退入城現在官軍已薄崑山城下勦辦極為得手卽著照李鴻章所擬迅借輪船大洋礮兩尊調齊水陸隊伍併力圍攻速將崑城克復以期步步進偪為進規蘇州之計。戈登既由松來滬商借英國礮火約定帶隊前往會攻著李鴻章卽飭戈登

帶同常勝軍。卽日前往崑山協勦。毋得稍涉遲滯。致誤戎機。惟崑山攻勦愈形得手。則蘇城之賊勢必圖竄江北。旣得就食裏下河完善之區。卽可掣動南岸官軍之勢。本日據李鴻章奏稱。偽忠王李秀城已帶大股赴皖北巢縣廬江等處。與鮑超各軍相持等語。是其窺伺江北狡謀已可概見。著都興阿富明阿督飭各軍嚴密布置。加意防禦。江北關繫極為緊要。該將軍務當慎之又慎。毋得稍有疏失。致為該逆所乘。將此由六百里各諭令知之。○又諭唐訓方奏臨淮官軍勦苗踴破吳家匪圩。進規懷遠壽州蒙城。擊賊獲勝等情。形暨苗逆勾合髮捻已由六安進撲定遠而徧鳳陽各摺片。苗逆自敗歸蚌埠復添水陸大隊死守懷遠。並於淮河南岸之李家嘴北岸之黑窯一帶密排營壘。其迤東三十里又有逆黨吳崑田匪圩阻我軍進攻之路。而該逆以小隊分擾壽州。親率大股合圍蒙城。逆

意專欲持久。以待官軍糧盡自潰。經唐訓方飭令總兵張得勝等乘間進兵。將吳崑田匪圩踴毀。官軍進徧黑窯攻破外壘。水陸斬獲甚眾。其圍攻壽州之賊均為署牧毛維翼等擊走。蒙邑城外賊營數十以深溝高壘困我並圍蒙東之白家圩。今與城中阻隔。馬新貽令副將程文炳等往援。與該圩練內外夾擊。頗有斬獲。惟守備李加英以追賊過猛馬蹶被擄。而程文炳等復夜砍賊營破其六壘。壽蒙守禦尚足自完。進攻懷遠之軍亦尚足以挫其兇鋒。苗逆盤踞淮甸練多糧足。唐訓方以賊欲久持困我官軍利在速戰。以伐狡謀實為切中機宜。本日李續宜復奏行抵湘鄉縣城因病耽延懇請開其署撫之缺。責令專辦軍務。業經明降諭旨允其所請。仍催令迅速前赴皖營。並已有旨將唐訓方補授安徽巡撫。該撫身任疆圉當茲巨寇猝興更屬責無旁貸。著卽督飭所部力圖懷遠並拊循各

路之軍。激勵團練。屏障鳳臨。督令蒙城壽州文武竭力戰守。惟是臨淮兵單餉絀。獨力禦苗。已虞不及。此時該逆復句合髮捻。由六安以進。撲定遠。逼近鳳陽。蔓延所屬之劉府總鋪一帶。縱橫至百餘里。逆勢鸚張。並聞苗逆盡擄下蔡民船。裝載悍黨萬人。意將乘勢東下。蒙亳永宿之降眾。阜霍靈固之苗圩。類皆首鼠兩端。特以僧格林沁之軍。早晚即可到皖。故皆跼伏未動。若今日久肆煽勢。必並起

應之。前經疊諭僧格林沁。迅即回軍赴皖。勦苗。實屬萬不得已。此時直東股匪殘敗。淄川圍攻及白蓮池進勦各事宜。該大臣當已布置周妥。著即遵前旨。移交劉長佑。閻敬銘督辦。僧格林沁即行返旆南征。仍於蒙亳擇要駐紮。節節進攻。不可輒行深入。一意直前。致為逆黨包抄後路。是為至要。蘇克金一軍。聞已由該大臣飭令回勦苗逆。其餘尚有何路官軍。即行酌量調遣。以厚兵力。壽州一路。李

續宜到皖。尚未有期。鮑超之軍。能否從廬州定遠一路進援。著曾國藩相機調遣。如李續宜病未稍減。未能即日赴皖。而鮑超之軍。又不能赴援壽境。應如何另籌勁旅。以顧壽州一路之處。著曾國藩。唐訓方。迅籌妥辦。毋稍疏虞。唐訓方既力保東路。其東北一帶。兵力空虛。著吳崇嚴。飭黃開榜等。勤加偵探。遇其北竄。豫省官軍。駐守歸陳。不若越境以勦。為防。即著張之萬等。飭令進兵。潁上三河尖等處。與皖軍四面兜勦。以期得力。唐訓方所部各軍。節經分布蒙城長淮衛等處。臨淮兵力既單。軍火餉需。在在缺乏。此時他處無可指撥。惟有曾國藩就近尚可勉籌接濟。即著該督設法運濟。諒曾國藩必能盡力籌措。以顧全局也。唐訓方另片奏捕獲附逆之訓導元繼曾。當即正法。所辦甚是。其知州陳之銑。一員既有侵吞軍餉。罔利營私。及藉端挑釁等重情。該撫請將所欠餉鹽勒限比追。發往軍

臺不足蔽辜。著卽在軍前正法。以昭炯戒。淮甸悍俗。遭值寇變。頻仍恣睢暴亂之徒。及依草附木者。必須重加懲治。其中如有恃符狡展。卽著該撫便宜從事。毋稍牽掣。致誤事機。其各圩紳董。有能激勵奮發。集團助剿者。亦卽優加獎勸。俾賊不得肆其誘脅。且使備多力分。以孤其勢。僧格林沁回軍在卽。先聲所播。自可令反側潛消。唐訓方定能因勢利導也。正在寄諭間。張之萬毛昶熙奏到。余際昌

追剿擒匪獲勝。及李世玉等勦辦直東竄匪。李續燾所帶勇丁。因病裁撤等摺片。所奏總兵余際昌追剿竄鄂擒股。於沙子岡獲勝。並將回竄之賊夾擊於淮南北等情形。卽著張之萬等飭令余際昌與添派之副將孫之友等軍。併力擊剿。盡殲醜類。直東股匪竄擾河北連界。其由成安境內被擊東竄。及臨漳屬境擊往東北竄走之賊。仍卽督飭參將李世玉等實力勦辦。與直東各路官軍隨時聯

絡兜剿。埽除淨盡。李續燾所部湘軍著張之萬酌量遣撤。參將張士元所帶馬勇卽著照所擬歸袁保恆統帶赴陳。以資防剿。其防剿機宜仍著袁甲三妥籌辦理。將此由六百里各諭令知之。○又諭奪情起復。本朝廷不得已之苦衷。現在皖北軍情緊要如此。唐訓方兵單餉絀。僧格林沁全軍為直隸山東賊匪牽掣。未能卽時南下。亟需李續宜赴皖援剿。該前撫諒能仰體朝廷盼望之殷。早赴皖北。

毋待催迫也。苗練久蓄異謀。李續宜前在皖撫任內。曾力主勦苗之議。時以苗練尚在依違。未克聲罪致討。現在顯行叛逆。李續宜正可一意進剿。藉申素志。頃據唐訓方奏稱。苗逆已勾結髮捻。由六安進撲定遠。而徧鳳陽圍攻壽州之賊。水陸環繞。並添集大隊盤踞懷遠。又訶知臨淮缺餉。於淮河兩岸密排營壘。親率大股合圍蒙城。欲為持久之計。以待官軍糧盡。賊多兵少。力難支持。情形萬分危

急李續宜務當仰體朝廷拯民水火之心力疾赴皖會勦苗練早殄逆氛以全大局並迅將起程日期馳奏以慰廑念將此由六百里諭令知之○又諭熙麟奏涇州獲勝並延綏官兵已抵慶陽飭赴平涼一摺白吉原之賊窺伺涇州直撲小垣營壘經遊擊馬天祥與駐防都司范銘分路迎擊將賊擊敗該遊擊統帶驍捷營於援兵未至之先初次接仗卽能以少勝眾甚屬可嘉著熙麟傳旨嘉獎並與都司范銘先行存記俟續有勞績再行奏請獎勵惟平涼被圍已久該逆以地雷轟塌城垣十餘丈雖經守城兵勇搶築賊仍晝夜環攻亟宜迅圖援救現在該督已飭馬天祥等帶兵馳赴平涼而參將阿章阿所帶延綏鎮官兵一千餘名又已馳抵慶郡該督已派知府和英會同阿章阿統帶前赴平涼進剿兵力旣形厚集且涇州之捷先聲已振卽著熙麟督飭該員弁等迅解平涼之圍以期節

節埽蕩大彰捷伐毋留餘孽該督另片奏前奏阿拉善兵已抵固原率據稟詞入告自請察議等語已於片內批示加恩寬免嗣後於軍情賊勢務當偵探明確以免貽誤將此由六百里諭令知之○又諭熙麟奏本年二月初八日所奉催調伊克昭阿拉善等旗蒙兵迅速赴甘會勦諭旨由五百里馳寄該督於四月初八日始行奉到查閱牌單業經破損無從考覈惟依稀有一月十三日丑時六刻到潼關驛十五日寅時初刻到藍田字樣查該廳同知劉芬兩次具稟由潼關至慶陽不過五六月日卽到何以延寄到驛使之繞越陝甘二省地面俾遲兩月始到是何居心請飭陝西巡撫查明參辦等語甘肅軍務緊要凡有批發摺報寄信諭旨宜如何飛速馳遞乃前次奏報旣有遺失此次緊要諭旨復繞越行走遲至兩月始到實屬不知緩急著瑛蔭卽行查明此件係由何處遲延因何繞越行

走兩月始到。如果有心貽誤，卽行據實嚴叅，以肅郵政，不得稍存迴護。將此諭令知之。○實授湖北布政使唐訓方安徽巡撫。○以記名總兵官王吉為江南狼山鎮總兵官。王東華為福建金門鎮總兵官。○以玩視軍務，革江蘇知州疏長庚職。○以河南攻克尚店寨賊巢，賞守備宋徵文、雷才貴、巴圖魯名號。遊擊姬成功等花翎餘加銜，升敘開復有差。子陣亡遊擊李忠奎祭葬世職如副將例。○復

江南軍營病故已革福建陸路提督曾秉忠原官。子祭葬卹廕，謚壯果。○子浙江湖州殉難知府瑞春祭葬世職加等建專祠。知縣許承岳署守備吳鳳祥等祭葬世職加等。○子安徽淮南岸陣亡都司王國元祭葬世職加等。○子安徽潁上殉難知縣濮煒在籍主事秦承壘。知縣吳景春祭葬世職。○子江蘇各屬陣亡殉難都司嚴康保等紳民婦女一千八百二十四員名口分別旌卹如例。○子

浙江陣屬陣亡殉難同知譚祖同等紳民婦女八十五員名口分別旌卹如例。○甲午諭內閣給事中王憲成奏各直省府廳州縣兩廡先賢先儒位次每多陵躐並有奉旨准從祀者神牌尚未敬製入廟等語著禮部將祀典次序繪圖頒發各直省督撫學政轉飭府廳州縣等官遵照辦理其神牌未經製造入廟者迅卽製造供奉尋禮部奏遵查兩廡位次乾隆十八年曾經釐定載在會典通禮諸

書嗣後先賢中增祀公孫僑公明儀二人擬移公孫僑為東廡第一位在林放之前蘧瑗為西廡第一位在澹臺滅明之前牧皮為東廡第三十五位公明儀為西廡第三十五位其餘先賢位次悉仍其舊先儒增祀者凡十五人擬合原定從祀之儒各就時代按其生年一東一西以次排列俾免陵躐之弊謹繕單繪圖恭呈欽定刊刻頒發各直省謹遵辦理從之。○諭議政王軍機大臣等前因御史

王蘭谷奏記名運司李元華謀勇兼優當經諭令吳棠等查明飭令前赴天長盱眙一帶防勦茲據吳棠奏李元華在六安辦團擊賊有效熟諳行陣膽識兼優請調赴清江差遣等語李元華籍隸六安所帶練勇保衛鄉里本係自備資斧若移調他處卽須籌給口糧恐清江餉需支絀未能籌此鉅款現在苗逆鴟張正須添兵攻勦六安地當衝要與前降諭旨時情形不同著吳棠唐訓方籌商如李元華尚在六安卽飭集團助勦以輔官軍之不足儻該員已赴清淮卽著吳棠酌量調遣將此由五百里各諭令知之○予江蘇常州陣亡同知朱善寶祭葬世職○予江蘇吳縣殉難文童黃元榮等暨婦女三十五名口分別旌卹如例○賞會試年老舉人陳大年等十七人司業編修檢討職銜有差○乙未諭內閣禮部奏朝鮮國王李昇遣員以先誣未盡昭雪請將謬妄書籍懇恩刊正一摺朝鮮

國王先系源流與李仁任卽李仁人者族姓迥別我朝纂修明史於該國歷次辨雪之言無不一一備載仰見

列聖睿裁折衷至當久已頒行天下中外皆知今該國王因見康熙年間鄭元慶所撰廿一史約編記載該國世系多誣遣員奉表來京籲請刊正情詞肫摯具見誼篤本根實事求是鄭元慶約編一書如所稱該國王國祖康獻王為李仁人之子實屬舛誤惟係在明史未修以前村塾綴緝之士見聞未確不免仍沿明初之訛豈足徵信該國有原奉

特頒史傳自當欽遵刊布使其子孫臣庶知所信從約編一書在中國久已不行亦無所用其改削著各省學政通行各學查明曉諭凡該國事實應以

欽定明史為正如有前項書籍流播士林其中訛載該國之事不得援據以歸畫一而昭信守○又諭前因給事中徵麟奏接有山東匿

名公啟據實封呈。當經降旨。將投遞信件之鴻儀錢鋪鋪夥李連珠。交步軍統領衙門。拏交刑部訊辦。茲據步軍統領衙門奏。將李連珠之弟李連桂。並伊家人王二。劉泳。拏獲。據李連桂供稱。此信係已革山東鹽運使桂亮。託伊送交徵宅。請交部審辦等語。李連桂。王二。劉泳。均著交刑部確切根究。審明辦理。桂亮著聽候傳訊。李連珠一名。據供現往西山未回。仍著步軍統領衙門。順天府五城一體

嚴拏務獲。歸案審辦。○又諭僧格林沁奏。直隸開墾稻田。已有成效。請歸地方官經理。並前任鹽政捐貲倡辦。請獎等語。直隸自天津迤東至新城一帶。海河兩岸水田。日久荒蕪。經僧格林沁等捐貲開墾。現居三年。辦有成效。此項水田。嗣後即著歸直隸總督派員經理。自行報部。以歸簡易。而昭覈實。其鹹水沽等地畝。酌減租米。新章是否允協。及上年所收米石。是否變價。應作何支放之處。均著劉

長佑覈明辦理。前任長蘆鹽政寬惠捐貲倡辦。尚屬急公。應得獎敘。著內務府覈議具奏。○又諭劉長佑奏。官軍擒斬首逆一摺。匪首張玉懷。怙惡不悛。久稽顯戮。上年十月間。張錫珠率眾倡亂。該匪首先慫恿。由山東莘冠一帶。擾及畿疆。迨張錫珠被勦。伏誅。該匪並有其眾直東一帶。被其蹂躪。實為積年著名悍賊。罪大惡極。現在官軍勦辦各股。竄匪漸次撲滅。該匪被勦窮蹙。意圖遠颺。乘隙再逞。

經劉長佑飭令都司唐建勳。密飭楊朋嶺將該匪擒獲。訊明後。極刑處死。實足以申天討而快人心。楊朋嶺自投誠收營後。即能擒獲巨惡。尚屬出力。不能不予以自新之路。著加恩免其治罪。○又諭前因文煜奏。總兵伊綿阿縱賊搶掠。到處逗遛。各情。當經降旨。將該總兵革職。交該督等審明。定擬具奏。茲據劉長佑奏。親提伊綿阿到營。逐款審訊。該革員與道員秦聚奎分路勦賊。在焦莊與另股賊

匪接仗而秦聚奎於白塔集失利陣亡。並非有心退縮。上年十二月間。該革員追賊至冀州。文煜催令赴衡水行營。聽候調遣。有文煜照會可憑。實非遷延不進。該革員於衡水拔隊南追。於次日趕到嗣。因行至趙莊。見有旗幟。派員往返查探。因較各隊到遲刻餘。尚出有因。其兵勇偶有動取民間物件者。均經隨時懲辦。兵勇口糧。悉由糧臺支發。並無縱兵搶掠。及任意開銷情事。惟伊綿阿以總兵大員。雖無前項劣蹟。而於本轄汛地。當賊匪搶渡過河。既不能遏賊竄路。迨逆匪到處紛擾。又不能迅速撲滅。辜恩溺職。莫此為甚。劉長佑奏請將伊綿阿發往軍臺。效力贖罪。實屬咎有應得。惟據該督奏稱。訪察輿論。該革員平日聲名尚好。著准其暫留軍營。效力贖罪。儻再不知奮勉。卽著起解。○又諭。前因文煜奏參將王思第通賊擾民各情。當經諭令該督等訊明正法。復於劉長佑到任後。諭知該

督嚴密辦理。茲據奏稱。遵旨將該革員提至軍前正法等語。所辦甚是。王思第以參將大員。輒敢廣集黨與。私通賊匪。到處擄掠。實屬罪不容誅。所有該部勇丁。業經罪坐主將。卽著妥為遣散。免其查究。嗣後各路軍營帶勇員弁。務當恪守軍律。奮勉立功。儻有通賊搶掠各情。卽著統兵大臣及各督撫等隨時查辦。毋稍姑縱。○諭議政王軍機大臣等。僧格林沁等奏籌畫南北軍務緩急情形。劉長佑奏遵籌直東豫三省交界地方勦匪事宜。各一摺。直東各股賊匪。雖經被勦殆盡。而伏莽尚多。且各處團練。率多兇惡。前此蘇克金帶兵路過德州故城等處。竟被團練攔阻。卽直省派出追賊之洋槍隊。亦曾被團練攔截。至賊匪由該團經過。但閉門自守。並不出擊。團練之設。原以助兵力所不及。似此縱賊阻兵。有名無實。若不從嚴懲辦。必至貽害無窮。劉長佑閻敬銘身任封圻。責無旁貸。著卽嚴飭

所屬實力清查。如有賊匪餘黨及惡劣團練縱賊阻兵者。卽咨會僧格林沁督飭蘇克金恆齡等馬隊盡力勦除。毋稍姑息。揚朋嶺誘擒張玉懷。已降旨免其治罪。此等匪徒屢降屢叛。且素與宋景詩相契。難保不暗中勾結。仍著劉長佑隨時密察。如再有反覆。卽按照辦理王恩第之法。立正典刑。勿得以受撫在先。稍涉瞻徇。其程順書等降股。諒該督亦必自有辦法。僧格林沁所陳南北軍務情形。慮及直東不靖。大局堪虞。自是老成之見。惟苗沛霖蓄謀已久。勢甚鴟張。若不及早剪除。任令勾合髮捻。將來盤踞愈久。根柢愈固。勦辦更難著手。且現在唐訓方止能力顧東路。利在速戰。而苗逆知我餉絀。計圖坐困。李續宜因病難卽赴皖。壽州一路未知鮑超能否赴援。情形萬分危急。僧格林沁自應仍遵前旨。將淄川圍勦事宜。交閻敬銘妥為經理。俟布置已有端緒。各營扼紮穩固。該大臣卽返旆。

南征行抵蒙亳。酌量進止。殄除巨憝。劉長佑所奏豫省之內黃滑濬等縣與大名最為切近。該處素多土匪。現派大名道祝壇前往會同河北鎮道妥辦。卽著張之萬速飭該鎮道督飭各屬集團練兵。以期緩急可恃。其與直省毗連之東昌臨清等州縣匪巢林立。降卒叛將雜處其間。必須直東兩省會商籌辦。方免彼此歧異。閻敬銘現赴淄川。不克親臨邊境。著卽遴委文武明幹大員會同王榕吉將應勦應撫及一切善後事宜。實力整頓。毋誤事機。劉長佑仍當不時親歷三省交界各州縣體察妥籌。如有不稱職之文武。隨時咨商各該撫分別查參更換。俾疆圉一律肅清。方為不負委任。將此由六百里各諭令知之。○又諭前因苗沛霖叛跡昭著。諭令僧格林沁統兵南下。茲據該親王奏稱恐督軍深入糧餉缺乏。甚為可虞。請暫緩南行等語。現在皖北髮捻各逆交乘。曾國藩所統各軍已有接

應不暇之勢。若再任苗逆得以勾結肆擾。則皖事愈難措手。唐訓方以飢軍支持於兩淮之間。情形甚屬急迫。歷據該撫請飭僧格林沁南下。亦因待援孔亟。得以及早蒞事。本日仍催令該親王南行。惟僧格林沁餉需。由山東等省籌撥。設大軍深入。而餉需不繼。亦甚可慮。著曾國藩悉心籌酌。或能於鹽課等款項下。遇僧格林沁餉項缺乏之時。就近接濟。唐訓方酌飭地方官豫備糧草。以供支用。俾該親王於抵皖後。無後顧之憂。方能一意攻勦。該大臣等營餉項短絀。朝廷本所深悉。第苗逆一日不除。則於該大臣等辦理軍務。諸多牽掣。曾國藩等身任地方。自能和衷商辦也。將此由六百里各諭令知之。○又諭傳諭山東按察使丁寶楨。前因苗沛霖復叛。僧格林沁卽當統兵南下。諭令丁寶楨迅速赴東。迄今為時已久。尚未據該臬司覆奏。著再傳諭丁寶楨。無論行抵何處。卽行兼程前進。迅

赴山東接印任事。與閻敬銘會商勦匪機宜。俾僧格林沁得以統兵南下。毋得稍涉遲誤。○又諭張凱嵩奏容縣逆匪盤踞。違員統兵進剿。暨陣斬首逆吳淩雲。攻克隴羅老巢各一摺。匪首范亞音盤踞容縣。蔓延岑溪。素與陳金缸狼狽相依。茲復勾結信宜匪黨。竄入北流縣境。勢甚披猖。雖經官弁紳團痛加勦洗。北流一律肅清。而餘匪遁回容縣老巢。是范逆一日不除。卽時時防其回竄。且與高州陳金缸逆匪東西接壤。若不亟圖殄除。勢必此擊彼竄。於潯州大軍後路尤多牽掣之虞。蔣澤春一員。本日業經降旨開柳州府知府之缺。以道員候補著張凱嵩卽飭該道員統領各營。剋期出省。督同該地方官及紳團相機勦辦。並檄令各路兵勇會集紳團。四面兜圍。務將首要各匪悉數殲滅。以除巨患。其梧州一路。卽照張凱嵩所擬嚴飭署知府趙元模調派兵練四面兜圍。毋令竄越。隴羅老巢

雖經攻克。吳淩雲亦經殲斃。而逆子吳亞終尚恐乘間脫逃。致令死灰復燃。仍著督飭吳德徵等激勵兵弁。嚴密擒捕。毋留餘孽。范陳二逆。既已聯為一氣。如能將陳逆殲除。則范逆之勢自孤。著晏端書等仍遵前旨。鼓勵各營兵勇。將高州股匪迅速撲滅。崑壽疊奉諭旨前往勦辦。此時計已出省。卽著該提督迅飭卓興等乘銳進攻。與廣西官軍聯絡聲勢。互相夾擊。將高梧一帶各股匪次第掃蕩淨絕根株。以清邊圉。將此由五百里各諭令知之。○以湖北荆宜施道厲雲官為布政使。督糧道武蔚文為按察使。○以直隸疊次勦辦竄匪出力。賞參將崔福泰。知府余承恩。巴圖魯名號。餘加銜升敘有差。○以歷著戰功。子廣西知府蔣澤春。以道員候補。○以廣西新甯攻克賊巢。予道員吳德徵優敘。賞同知陳瀚等花翎。○以勦賊勇往。開復山海關副都統成保暫革處分。○追予直隸陣亡道員秦

聚奎於死事地方暨原籍建立專祠。知縣蒯遐齡等祭葬。世職加等。附祀秦聚奎專祠。○丙申。上復詣大高殿祈雨壇行禮。○遣恭親王奕訢詣時應宮。惇親王奕詝詣昭顯廟。鍾郡王奕詒詣宣仁廟。孚郡王奕誥詣凝和廟。肅親王華豐詣覺生寺。豫親王義道詣黑龍潭拈香。○諭內閣。都察院奏候選知州以胞兄殉難。懇請投效勦賊等詞。赴該衙門呈訴。據稱候選知州甯曾笏呈稱。伊兄浙江按察使甯曾綸。於咸豐十一年九月間。在杭州守城殉節。該知州誼切同胞。情殷敵愾。懇請投效浙江軍營勦賊等語。所呈自屬激於義憤。甯曾笏著准其投效浙江軍營。交左宗棠差遣委用。○諭議政王軍機大臣等。聞敬

銘奏赴淄日期。並防勦各匪情形一摺。淄川挑它長濠。計可完竣。僧格林沁現擬製造攻具。剋期進攻。惟皖北鳳陽壽州等處。苗逆鴟張。唐訓方兵單餉缺。情形萬分危急。疊經寄諭僧格林沁移軍南旋。並令閻敬銘速赴淄營。接辦軍務。俾僧格林沁得以早赴皖。今該署撫已定期起程。著卽於行抵淄川後。會商僧格林沁辦理。淄營兵少勇多。未能恪守紀律。閻敬銘務當嚴申號令。以振軍心。城內賊糧甚多。勢難待其自斃。致稽時日。僧格林沁諒已將攻勦事宜。布置妥協。閻敬銘接辦後。卽可設法進攻。以期早拔堅城。直隸東竄股匪。擾及夏津莘冠陽穀等處。偷渡運河。在聊城茌平東阿一帶游弋。此股敗殘餘匪。為數無多。閻敬銘現已分飭保德及守備張大富分投截擊。並咨恆齡探蹤追躡。著卽督飭各路兵勇。並地方鄉團。四面兜剿。務期悉數殲除。毋任餘燼復燃。再形滋蔓。至捻棍教各

匪。分途出竄。擾及泰安兗沂各府屬州縣地方。蔓延愈廣。亟宜調集兵團。分路扼截。著閻敬銘卽嚴飭各地方文武。認真防勦。並督令恩錫迅籌進攻。以期力掃兇鋒。毋許因循延誤。將此由五百里諭令知之。○又諭官文嚴樹森奏竄鄂捻股。暫時肅清。忠逆大股。及苗沛霖黨。均圖犯鄂境。現籌布置情形一摺。所奏豫捻一股。屢經挫敗。竄回河南光山羅山等境。皖捻一股。被勦。由廣濟黃梅竄走安徽之宿松縣境。官文等令提督成大士。由蕪水鼓行而東。跟蹤追躡。並檄總兵穆正春所部。馳紮英蘄之間。相機會剿。曾國藩前奏由廬江西竄之髮逆。與由潛太東竄之捻股。已在桐城地方會合。由舒城竄圍六安。勢甚兇猛。並有捻股已至霍山縣境。挖獲忠逆偽文。所稱偽首股數甚多。計欲分黨牽掣皖軍。而自率悍賊。由舒六英霍。疾趨湖北麻城宋埠一帶。分犯漢黃。窺伺荆襄。與竄陝之陳玉城餘

黨聯成一片。逆謀兇狡。適值苗沛霖復行叛亂。偪處鄂邊。與髮捻勾結肆擾。鄂省為南北樞紐。自應力籌防剿。以圖萬全。曾國藩現調鮑超蕭慶衍等軍。由蘆舒進。以解六安之圍。令道員李榕一軍。由潛山進。以擊霍山之捻。並令成大吉回顧鄂疆。彭玉麟楊岳斌所部。各派水師赴鄂。協同防剿。官文等現飭穆正春自巴河抽出所部。前赴英山。會同皖軍。以勦為防。而令副將王桐柏率所部駐上巴河。

等處。成大吉扼紮歧亭。舒保馬隊作為遊兵。馳驟其間。並羅麻等界之松子長嶺二關兩路口。應山隨州棗陽襄樊等處。各派防兵。與內河分防武漢巴河等處分段巡邏。及專防黃郡各水師。均尚布置周妥。曾國藩所派之水師王吉一軍。即分列陽邏至漢口一帶江面。豫為策應之兵。羣逆當不得肆其衝突。即著官文等督飭水陸各軍。嚴密設防。賊如犯鄂。臨時相機聯絡接應。毋稍疏虞。致令闖入。

嚴樹森仍自巴河回駐團風。該處與巴河緊接。尤為扼要。即著隨時妥為調度。固守鄂疆。以副委任。皖省羣醜接連。逆氛甚惡。苗逆之勢復張。僧格林沁自東省移師南下。到尚需時。即抵皖境。亦應由蒙亳一路。節節進剿。其六安舒桐蔓連英霍一帶賊氛。仍著曾國藩唐訓方。迅籌勦擊。賊如犯鄂。曾國藩即飛飭各軍緊躡。與鄂省諸軍前後合力夾擊。其李雲麟之軍。現守棗陽。一時不能赴陝。而陝南

軍務極繁。現在髮逆狡謀。又有欲由襄漢勾連之信。興漢賊氛。尤應及早掃除。前諭駱秉章飭周達武一軍。由川赴陝。仍著懷遵疊次諭旨。飛飭該總兵拔隊星馳。迅往漢南。以資勦辦。李桓自報由湘起程。許久未接中途奏報。現已行抵何處。即著星速前赴漢中。督率辦理。毋稍稽延。覽官文等所奏。豫捻被勦。竄回光羅等境。方以未見豫軍截勦為疑。正在寄諭間。張之萬等奏到。截勦回竄。捻匪總兵

余際昌遇伏陣亡等摺片。覽奏殊堪悼惜。豫軍驟失此將。精銳折耗。亟應收合拊循。以冀軍聲復振。著張之萬卽飭張曜暫行統攝。余際昌所部招集散亡。加意撫綏。並與鄂軍隨時聯絡。妥籌防勦。此時豫省惟張曜一人。勢不能數調遣。毛昶熙軍營副將陳祿興參將尹嘉賓勇略如何。著張之萬毛昶熙於該二員中酌量任使。金國琛一員。前經諭令毛鴻賓飭令赴豫。本日復寄諭該撫督催啟行。一

五月十一日

五十一

俟到豫卽責令帶兵防勦。以資得力。將此由六百里諭知官文嚴樹森曾國藩唐訓方駱秉章張之萬毛昶熙並傳諭李桓知之。○又諭本日據張之萬奏鄂省捻股回竄總兵余際昌等陣亡並片奏前調之金國琛等均因事牽掣未及來營等語。豫省軍務孔亟。將領乏人。現在張罔之逆尚未勦除。捻氛復由鄂回竄。官軍敗衄。兇談甚為猖獗。而苗逆眈眈淮上。歸陳一帶防勦綦嚴。河北三府復以直

東股匪未淨。時虞禾突。金國琛以奉旨飭赴豫省差遣之員。豈容稍涉遷延。致誤軍事。著毛鴻賓迅遵前旨。飭令該員速赴河南軍營聽候張之萬差委。毋稍逗遛。致干咎戾。昨據李續宜奏行抵湘鄉患病未能前進。請開署撫之缺。俟稍痊赴皖等語。業經明降諭旨。准其所請。惟皖省疆事孔亟。非唐訓方一人之力所能支。著毛鴻賓行知該前撫。儻病勢稍痊。卽當迅速起程赴皖。以副委任。毋得以旣

五月十一日

五十二

准開缺。便可優游事外。朝廷之於該前撫。曲體下情。無微不至。諒該前撫亦當感激奮發。以圖報稱也。將此由六百里諭令知之。○派大學士倭仁協辦大學士吏部尚書瑞常戶部尚書寶馨兵部尚書萬青藜吏部左侍郎孫葆元內閣學士全慶桑春榮殷兆鏞為殿試讀卷官。○予河南方家寨陣亡總兵官余際昌祭葬世職加等。諡威毅。入祀死事地方暨本籍昭忠祠。並建專祠。賞三代正一品封

大清穆宗繼天開運受中居正保大定功聖智
誠孝信敏恭寬毅皇帝實錄卷之六十四

[illegible]

體芳等二百人於保和殿制曰朕以冲齡誕膺寶祚默荷

上蒼垂佑。仰承

列聖詒謀。業業兢兢。勤求治理。上思副

兩宮之教育。下期措四海於乂安。宵旰圖維。罔敢暇逸。深念典學傳心之要。求賢佐治之方。去奢崇儉之規。察吏安民之術。經邦要道。莫重於斯。今當臨軒發策。博訪周諮。爾多士其敬聽朕命。二帝三王之心法。不外一中。而堯

典以欽始。益稷以欽終。其與執中之理可互相發明歟。尚書而外諸經之旨何者可以相通。大學一篇分列八條目。當以何者貫乎始。終。中庸一書分列三達德。當以何者為之樞紐。真德秀作大學衍義。何以略治平不言。明邱濬補之。為目凡十有二。其立意頗可貫通歟。昔人謂帝王之學異於儒生。所以不同者安在。將空語精微而不求諸實事歟。如漢之董仲舒。匡衡。宋之程頤。胡安國。朱熹。皆宿儒

中華書局影印

二

碩學。多所闡發者也。何者為審端致力之首歟。得賢才而治天下者。帝王之要道也。古者用人之權。秉於天子。若尚書之有選部。始於何時。以選部為吏部。起於何代。唐制有試法。有集法。既察其身言。復察其書判。此試法也。裴光庭何以作循資格以矯之。集之於十月。選舉於三月。此集法也。陸贄何以立計闕例以救之。然則二者固皆不能無弊歟。夫十室之邑。必有忠信。故漢分四科。宋立六科。司馬

中華書局影印

三

光又乞設十科。至詳且備。已然人才遂可盡取。而無遺歟。且所取者果綜覈名實而無矯偽歟。今將使魁奇倜儻之士。不軼乎範圍。恂謹廉潔之儒。不拘於繩尺。其道何由。書曰。慎乃儉德。誠以儉德之共也。堯不以土階為陋。而舜忧戒於塗糞。禹卑宮。文王卑服。尚已嗣是衣弋絺。罷露臺。集書囊為帷。往蹟流傳。威德不猶可溯歟。古人臣勵羔羊素絲之操。如趙抃守成都。一琴一鶴。程燦令鹽城。一馬一僕。其高節清標。非臣下所當矜式歟。夫鏤簋朱紘。玉纓瓊弁。自昔所譏。乃積習相沿。敝化奢麗。以致不能養廉。蟋蟀山樞。民風近古。今則服食器用。務為美觀。閭閻不免踰禮。將以黜華崇實之意。訓迪臣民。何由而使風氣日臻。樸茂歟。與吾民相親者守令也。漢史循吏傳。紀守相甚備。而令長則闕。如其故何歟。夫天下郡邑至眾也。郡守之賢否。監司且難人。悉縣數倍於郡。令數倍於守。如何而後能

督察之歟。縣令賢明。則賦斂均。徭役平。訴訟簡。吾民得遂其所安。顧由儒術者。多迂而弛。事由雜流者。或奸而弄法。其餘蠹政厲民。不可枚舉。欲整齊而磨厲之。何道之從。大吏者。所以糾察守令。為天子進賢退不肖者也。乃或所薦剋者。以才能出眾為先。而留意教化者。遭沈滯。所稱賞者。以賦稅先登為最。而勞心撫字者。受譴訶。其何以懲貪墨之風。而養循良之氣歟。夫稽古以懲。純修。遠才以襄。郅

書卷之二十五

治。戒奢以端民習。課績以飭官方。皆宰世之宏模。綏猷之極則也。多士對揚伊始。其各陳謨論毋隱。○諭內閣。多隆阿奏。請將丁憂同知改為署任等語。陝西潼關撫民同知劉芬現丁父憂。例應回籍守制。惟據多隆阿奏稱。該員辦理轉運事宜。接濟軍食。半載以來。甚為得力。未便遽易生手。劉芬著准其改為署任。俟軍務告竣。再行回籍守制。○諭議政王軍機大臣等。左宗棠等奏。克復黟縣。嶺內肅

清一摺。池建青陽等處之賊。併圖上竄。饒景戒嚴。王沐回援江境。而黟縣無兵留防。賊蹤尚環伺嶺外。徽休一帶空虛。又虞闖入。劉典自未便移軍入江。致有顧此失彼之慮。左宗棠以該逆糾各大股。由廣德分竄皖南。蔓延愈廣。浙東敗賊。復竄入合股。其圖竄徽休者。意將闖越婺源。以入江西之德興樂平。竄踞黟縣。圍繞祁門者。意將闖賊浮景。東出德興樂平之閒。而抄浮梁景德之後。鬼蜮情形。瞭

書卷之二十五

上

然如見。江西饒信之防。沈葆楨辦理尚屬周妥。左宗棠督飭劉典等軍。與江省之軍聯絡一氣。江皖之閒。羣醜諒不得肆其衝突。仍著該督撫妥為辦理。惟念嶺外逆黨尚多。窺伺青陽石埭。建德東流。均有賊蹤。安慶省城隔江南岸。烽火相望。曾國藩現駐皖省。為中樞扼要。其北自巢含舒桐以至英霍一帶。賊氛密布。髮捻交乘。又值苗沛霖復叛。再北潁壽六安。逆練紛紛撲擾。兇談頓張。金陵逆黨。自

九洑洲渡江北岸。聲言就食。不卽擾及裏下河等處。而直上和合。且與捻苗各匪。均相勾結。殊恐賊之蓄謀。故為此包抄大舉。勢將圍裏安慶。以解金陵之厄。曾國荃之軍。偪城而陣。不能遽撤。計曾國藩所部。相舒守將。僅能自固。惟蕭慶衍。毛有銘等軍。翼蔽最為切近。鮑超一支勁旅。往來策應。兵力已不甚厚。昨據官文嚴樹森奏報。鄂疆疊警。曾國藩已調鮑超等軍。由廬舒進解六安之圍。並令李榕一軍。由潛山進。以擊霍山之捻。分派水師赴鄂。協同防剿。自係顧全大局。卽以固鄂為固皖之計。第慮逆謀陰狡。其南北兩岸。分路圖犯。江鄂逆黨。均難保非聲東擊西。詭謀雖兩省之防。皆我所必救。勢斷不能置而不顧。而賊得乘皖省兵分備單之際。麇集羣醜。四面圍逼。以恣狡圖。該大臣駐紮江許。實為東南全局所繫安危。南顧彌增廬念。曾國藩識略素優。當茲堵柱艱難。務宜倍加謹慎。以策萬

全。左宗棠浙軍。近日甚為得手。其不急取杭城。而先清皖境。洵屬老謀。此時劉典等軍。在甯屬一路。能否與蕪湖金柱關等處。聯絡皖省。相為一氣。或於克復富陽後。卽移得勝諸軍。由於潛昌化。進攻廣德。以圖東壩。與曾國荃偪攻金陵之師。可期前後夾攻。擣賊老巢。較之圖取蘇杭。其策較勝。而效當稍捷也。著曾國藩左宗棠隨時會商。妥籌辦理。曾國荃之軍。守局尚穩。而兵力已單。旦夕之間。如有應行變動。切要機宜。亦卽酌量進止。皖浙唇齒相依。刻下皖事孔亟。計惟浙軍尚屬切近。左宗棠務與曾國藩聲息相聯。總期緩急可為接應。不至扞格。方為妥善。長江水師。上下游聲勢尚壯。其港汊紛歧處所。有無逆黨潛藏。飭令彭玉麟楊岳斌等。加意巡邏。毋稍疏忽。九洑洲要害之地。能否飭令水師乘間攻擣。如果此處得手。則金陵城賊勢更窮。感卽皖北羣醜。歸路斷絕。亦必亡魂喪膽。勦辦更

易為力。著曾國藩與曾國荃等隨時相機妥籌進取。將此由六百里各諭令知之。○又諭多隆阿奏統籌全局分路進剿一摺。據稱現在渭河迤南。華渭俱無賊蹤。臨潼之西。僅有沙窩一處。回巢渭河迤北。高陵縣城尚被占踞。涇陽三原咸陽等縣所屬地方。匪巢林立。勦辦尚非易易。此時東路得手。恐該逆勢窮西竄。三原一帶防務最關緊要。雷正綰一軍未能撤赴鳳翔。該將軍擬令專力固守。嚴防

北山。西路一帶。仍飭王夢麟統兵往救鳳翔。不日大兵西指。並令馬德昭一軍亦赴鳳郡。鳳郡解圍。再赴平涼。並漢中近日情形。請催李雲麟周達武二軍。俟李桓到漢南後。分路勦辦。又刻下進兵有三難。難免遲滯等語。所籌不為無見。雷正綰一軍防勦涇陽三原等處。自未可輕易撤動。致賊氛肆意蔓延。惟鳳翔待援甚急。王夢麟帶兵前往。能否得力。尚不可知。且該員前經中途折回。恐再蹈故轍。

必至詒誤。著即嚴催前進。如兵力不敷。由該將軍等酌度調派。甘肅賊多兵少。亟盼馬德昭前往。前已諭令該員俟多隆阿大軍西指。省城稍鬆。仍即督兵赴慶陽。與熙麟籌商。何路緊急。赴何路救援。若先赴鳳翔。恐又需時日。馬德昭務即趕緊赴甘。不得遷延貽誤。總兵曹克忠疏通省城糧道。著瑛榮另撥數營交其統帶。責令節節進剿。將省城附近一帶匪巢迅速痛加勦洗。以通糧運之路。漢中髮

逆分攻褒沔城固等城。著飭帶兵文武及該地方官認真防守。指日李桓到陝。自可力加整頓。昨據官文等奏髮捻交乘。鄂邊緊急。將李雲麟一軍暫行留鄂。俟軍務稍鬆。方能赴陝。已有旨准其暫行留楚。其周達武一軍。昨已諭知駱秉章催令星速赴漢南一帶。該將軍等即派員催提。令其扼要駐紮。以資得力。該將軍病未全愈。將士疫氣仍重。務須妥為調攝。曲加拊循。以慰軫念。至所稱日前攻破

孝義。卽飭潼商道趕備船隻。迅速駛至渭河。以便搭造浮橋。屢經嚴催。尚未稟覆等語。著多隆阿。瑛榮。再行嚴催。如係有心玩誤。卽從嚴叅辦。以儆玩泄。德興阿一軍。前經調令駐紮同朝一帶。為多隆阿後路聲援。此時東路肅清。該副都統一軍。久駐同朝。未免虛糜糧餉。著多隆阿酌量調遣。或令赴鳳翔救援。或令赴西安省城一路會勦。毋得久置閒散。以厚兵力。現在蒲州防務亦鬆。英桂所募之楚勇。或可分撥若干。派員統帶。至同朝一帶駐防。以資接替之處。均著多隆阿。英桂會商辦理。將此由六百里各諭令知之。○以鑲黃旗蒙古副都統寶善署正白旗滿洲副都統。正黃旗蒙古副都統富明暫署正白旗蒙古副都統。鑲白旗漢軍副都統廣科署左翼前鋒統領。○以鑲黃旗蒙古副都統載容署京營右翼總兵。○以降調兩廣總督勞崇光署雲貴總督。○以儘先副將楊長春為河南河北

鎮總兵官。○以轉運遲延。暫革陝西知府呂雋孫職。○以安徽克復黟縣出力。賞道員王文瑞二品封典。按察使劉典參將喻可宗。齊蘭禮。色圖魯名號。同知李耀南。守備劉大謨。花翎。餘加銜升敘有差。予陣亡守備彭友年。把總羅廣林。祭葬世職。○追予湖北陣亡知府金雲門諡果毅。知州李樞諡剛介。於死事地方暨原籍各建專祠。○予湖北各屬陣亡殉難監生滿建洪等紳民婦女一千三百三十五名口分別旌卹如例。○戊戌諭內閣。前因駱秉章覆奏。遵查貴州提督田興恕先後被巡撫毛鴻賓。御史華祝三。奏劾各款。均屬有因。當以該提督捏報軍情信用劣員。肆行殘擾。起造府第。日事荒淫。並有擅殺外國傳教。及內地民人多命之事。降旨將該提督撤任。飭令迅赴四川。聽候崇實駱秉章查辦。嗣因田興恕藉詞抱病。抗不赴蜀。復經諭令勞崇光。張亮基。馳赴貴州審辦。現在張亮基

已據報抵黔接篆。勞崇光因沿途梗阻繞道前進。計日亦當抵省。田興恕著卽革職拏問。交勞崇光張亮基按照被叅各款及另案殺害無辜慘斃多命各節。提同案內一千人證一併秉公嚴訊確情。不准一字欺飾。迅速按律定擬具奏。○諭議政王軍機大臣等徐宗幹奏臺灣官軍獲勝。抽調官兵援勦並防捕汀州府屬游匪各摺片。吳鴻源一軍自嘉義解圍後。埽蕩附近逆莊。疊有斬擒斗六賊多敗遁。官兵追至彰轄西螺二重溝等處。曾玉明已由鹿港逼近彰城。首逆戴萬生先已竄回四張犁本莊。餘逆仍扼踞死守。曾元福現已出洋。卽著督飭該鎮星速前進。與曾玉明吳鴻源等軍合力進擊。通判張世英調集番丁督率義勇直攻四張犁。將戴逆巢穴焚毀。是該處丁壯尚為可用。著徐宗幹洪毓琛檄令張世英等激勵圍丁。乘勝擒捕。務將戴逆擒獲。毋任漏網。南路既無匪徒蠢動。可無牽

掣之慮。現在大軍雲集。兵力已厚。著卽督飭各軍奮力合擊。將彰化斗六次第克復。毋稍延緩。汀州府屬江廣游勇匪黨。擾及歸化順昌等縣地方。雖經鄉團擊敗。仍恐各處游匪乘機竊發。更難保非在逃之李阿四勾結滋擾。自應乘其初起及早撲滅。卽著檄飭參將吳連陞挑帶壯勇會同該地方官弁民團合力防捕。迅圖殲除。並將逃之李柯四訪拏務獲。以淨根株。將此由四百里諭知徐宗幹並傳諭洪毓琛知之。○又諭前因駱秉章覆奏田興恕先後被叅各款。均非無因。並因田興恕殺害教民一案。前法國公使哥士者在京多方曉諭。節經降旨將田興恕撤去欽差大臣關防。毋庸署理。巡撫先行交部議處。馳赴四川。交駱秉章差遣。並派勞崇光馳赴貴州查辦。兼令張亮基署理貴州巡撫。會同崇實駱秉章將此案秉公辦理。嗣因韓超屢次懇留田興恕勦辦黔匪。而張亮基勞崇光

又均以道遠未能卽到。致此案遲久未辦。本日據總理各國事務衙門奏。法國新到公使柏爾德密遞有照會。並另單開有五條。其意歸咎於田興恕。次及戴鹿芝。英國卜魯士來署。亦有中國背約薄待外國之言。似已聯為一氣。欲藉端啟釁等語。田興恕處分。前據兵部奏照溺職例議以革職。因案未辦結。尚未降旨。其平日恃恩驕恣。濫殺無辜。實有應得之罪。況天主教業已弛禁。卽不得妄行殺戮。且法國傳教人文乃耳。又持有護照赴黔。係屬按照條約前往。田興恕身為大員。亦止宜從權設法。開導該省官民。各安本分。毋啟釁端。以顧大局。乃田興恕因逞一時之忿。疊次慘殺外國傳教及中國習教者數人。是其孟浪從事。恣意妄為。已難辭咎。今該國公使柏爾德密既欲以田興恕一人作抵。迥非從前哥士耆來京時。屢以田興恕戴鹿芝趙畏三等相提並論者可比。此時若再含糊。終無了

局。更恐別生枝節。尤難措手。張亮基業已抵黔接篆。勞崇光昨已簡放雲貴總督。計此時亦已行抵黔省。卽著駐紮貴州。先將教民一案迅速辦結。其滇省一切情形。並著隨時訪查奏聞。再定進止。勞崇光熟悉洋務。兼能權衡輕重。顧全大局。且為外國素所欽服。張亮基遇事明敏。果斷有為。該督等務當以國事為重。不避嫌怨。方為不負委任。田興恕被參各款。業經駁東章覆奏得實。既殺良團何斗山。以致勒捐激變。而又慘殺中外教民多命。各案若不按照律例定擬。稍有偏倚。不獨無以服外國人之心。亦無以平貴州士民之憤。所有田興恕戴鹿芝等一千人證。如何比照律例定擬之處。及韓超捏詞保留。應查各件。一併迅卽馳奏。以安遠人而弭釁端。本日明發諭旨一道。總理各國事務衙門摺一件。錄出照會另單二件。均著鈔給閱看。將此由六百里各密諭知之。○以湖南道州捐輸軍餉。

永廣學額一名。○已亥。諭議政王軍機大臣等。都興阿等奏上下游水師續獲勝仗。陸路嚴為防範情形。並咨明吳棠阻止李顯發來裏下河查辦匪徒。吳棠奏髮逆由六安竄至盱眙。督軍嚴防蔣壩等處。李鴻章奏悍賊援應崑山。竄犯太倉。均經官軍擊退。併力進攻。崑城各摺片。逆匪竄撲下游之諫壁大陰沙等處。經都興阿等督飭賴鎮海等率領師船。連獲勝仗。其上游之浦口寶塔根馬步賊匪。亦被梁正源等親率哨弁。登岸擊卻。防勦均尚認真。現在太倉全境肅清。崑山援賊。疊被程學啟等水陸兩軍迎勦。獲捷。偽暮王等所築崑山城外營壘。均經官軍蹋平。戈登現帶外國礮火。前抵崑山。李鶴章復派隊由雙鳳進勦。兩路夾攻。崑山之賊。斷難久踞。著李鴻章速飭程學啟等。乘此聲威。迅拔堅城。以收破竹之效。惟江陰一帶逆賊。時圖北竄。若崑山克復。該逆窮蹙無依。鉅險渡江。尤意中事。

著都興阿。富明阿。嚴飭沿江水陸各軍。加意防守。不可以屢獲勝仗。稍涉鬆懈。髮逆捻逆。合同苗練。直犯定遠。淮揚屬境。防堵正當喫緊。滁六一帶。雖經李世忠布置防勦。而該營兵勇不足深恃。都興阿等於籠絡之中。隱寓防範之意。籌辦甚合機宜。仍著該將軍等。督飭各營將領。嚴密戒備。力保完區。並著吳棠飛飭蔣壩。衡陽。高寶。在防文武員弁。認真扼截。毋得稍有疏虞。豫勝營兵勇。屢赴裏下河滋事。李世恆在逃。尚未拏獲。而李世忠復派李顯發前來查辦。弁勇完善之區。豈可令若輩無端紛擾。吳棠並不據理阻止。竟派副將袁世功會同辦理。何不識事機。一至於此。著即按照都興阿等咨會。趕緊函商李世忠。務將李顯發迅速調回。俾不至驚擾裏下河居民。方為妥善。李世忠濫收句容降賊數百。派赴江北防堵。殊不可恃。著都興阿。富明阿。吳棠隨時留心偵察防範。毋稍大意。將此由六

百里各諭令知之。○又諭吳崇奏請飭山東撥支蒲徐兵勇餉糈等語。黃國瑞一軍前經譚廷襄奏明月撥該總兵行營餉銀一萬兩。添募勇隊前赴山東助剿。該總兵原部兵勇及續由徐浦兩處撥往各隊。均仍由清江籌防局撥款支應。現在該總兵移師鄒滕。深入東境。距清淮較遠。一切軍火糧餉。遠道供支。既多未便。而清淮軍餉。又復支絀。更恐接濟遲延。必至貽誤。所有徐浦兩處撥往各隊計

電報卷六十五

下八

月支錢一萬二千餘千。米三百石。著閻敬銘飭令藩司按月如數撥解黃國瑞軍營。以供支放。毋令缺乏。此項餉糈。卽由山東造報。以重軍需。將此由五百里諭令知之。○又諭前因吳崇借撥淮關應解部庫洋藥稅銀四千兩。請以豫省應解清淮漕捐銀兩。如數劃解部庫。抵作淮關解款。當經諭令張之萬如數劃解。嗣據張之萬奏稱豫省漕折銀兩。各州縣徵解。甚形拮据。接濟清淮漕捐一項。實難

再行捐辦。請飭吳崇另行指項劃解。復諭令該漕督將淮關應解部庫洋藥稅銀四千兩。另行指項劃解。茲據吳崇奏稱清淮別無撥餉。惟上年五月內。奏准撥廣東運庫海關各解銀五萬兩。協濟清江餉需。僅據兩廣運庫解到銀一萬兩。海關絲毫未解。請將粵海關應解清江撥餉內。劃解部庫銀四千兩。抵作淮關解款等語。現在庫餉緊要。淮關應解部款。豫省情形。難以劃解。著晏端書黃贊湯毓

電報卷六十五

下八

清。卽將粵海關應解清江撥餉內。迅速劃解部庫銀四千兩。以清部款。現在清江軍務緊要。待餉孔殷。並著該署督等嚴飭海關。除此次撥解部庫四千兩外。其餘應解清江銀四萬六千兩。並運庫欠解銀四萬兩。均著迅速按數解赴清江。以濟要需。將此由五百里諭知晏端書黃贊湯並傳諭毓清知之。○予江南寶塔根陣亡守備袁得龍祭葬世職加等。○庚子。

上御養心殿。召讀卷官入。親閱定進呈十卷甲第。○諭內閣。兵部奏遵奉恩詔。查辦軍臺效力各員。開單請旨。並未經起解各廢員。請飭查催各摺片。所有單開各員。除已革吏部主事繆冠瀛。已革理藩院郎中哈豐阿。已革戶部主事鳳山。已革御史普安。已革內務府主事慶裕。繼英。已革兵部尚書穆蔭。已革山西大同縣知縣吳承曾。已革協尉海貴。已革副尉他思哈。已革江蘇泰州營遊擊奎喜。已革把總張林。均毋庸查辦外。其已革參領祥慶。瑞禧。已革外火器營護軍參領海林。已革外火器營副護軍參領松貴。已革戶部郎中呂賡南。均著加恩。卽行釋回。至未經查明下落之廢員秋家丞等。並著各該督撫等分別查明。卽行迅解嚴緝。○諭議政王軍機大臣等。劉長佑奏蘆網疲累。請飭豫省將抽收鹽釐停止一摺。據稱長蘆商人連年以來。交款繁重。前經遮克敦布在館陶抽釐。合銀二錢上

下。已屬不支。又經豫省委員赴龍王廟等處抽釐。每包制錢五百文。計需銀四錢有奇。薪水等項。又需銀一錢餘。合計兩處。每包需銀六七錢。不啻又增正課一倍。現雖遮克敦布館陶河岸釐卡。業經停止。而龍王廟抽釐局卡尚在。請飭河南一律停止等語。長蘆商人因連年賊匪搶掠。兼之河道淺阻。不能及時起運。以致銷誤課絀。若再抽收鹽釐。必致商力難支。紛紛倒歇。於長蘆全局。大有關係。著張之萬。卽將龍王廟等處鹽釐局卡。一律停止。館陶河岸。是否一律裁撤。抑或仍有影射。並著劉長佑查明。永遠禁止。以恤商艱。而裕國課。原摺著鈔給張之萬閱看。將此各諭令知之。○辛丑。賜一甲翁曾源龔承鈞張之洞三人進士及第。二甲周蘭等七十八人進士出身。三甲景善等一百十九人同進士出身。○諭內閣。志和奏部案積壓過多。難於速結。現在力求整頓一摺。盛京刑部承審案件。民

人由奉天府府尹轉飭地方官差傳旗人由將軍衙門轉飭該旗提解。現在該部各司承審之案。現審未結者八十餘件。駁審未覆者四十餘起。或證佐催提未齊。或案犯畏罪遠遁。該管官未能迅速拘提緝獲。以致案懸莫結。積壓日多。似此積弊相沿。殊屬不成事體。著玉明和潤德椿嚴飭該地方官及各該旗等。嗣後凡遇交部審辦案件。務將案內要犯及應提人證。迅即拘提緝獲。送部歸案。其部駁覆審各案。該地官官接奉部文後。亦即隨時詳覆。儻敢仍前玩泄。卽著玉明等查明據實叅辦。至現在未結各案件。著一併迅速催提聲覆。毋許再有稽延。並著志和督飭承審司員等。將從前未結案件。逐一清釐。有可先行擬結者。迅卽審擬完結。其餘未能卽結各件。一俟案內人證到齊。亦卽隨時審辦。如該部承審司員於案犯到齊後。仍不速行擬結。並著志和隨時查明叅奏。○諭議政王軍機

大臣等。唐訓方奏擊退大股髮捻。鳳定肅清一摺。據稱苗逆句合髮捻數萬之眾。分擾定遠鳳陽一帶。經唐訓方飭令道員秦榮等督團防守。副都統克蒙額等分道擊賊於鳳陽城外。斃賊甚多。遊擊歐陽勝美等自廬州赴援。各率所部分路衝突。積年巨匪。踉蹌南遁。已飛咨吳棠等多發偵探。嚴密防範等語。髮捻併犯皖疆。現經唐訓方派集兵練。以勦為防。逆股悉數敗遁。鳳陽定遠一律肅清。臨淮復臻穩固。洵屬調度有方。深堪嘉尚。所有尤為出力之馬步兵練。均准其擇尤保奏。藉資策勵。其張總愚程三程四老坎等股敗捻。繞由懷遠之考城下洪地方。併入苗黨。深恐兇猷更熾。著該撫飭令前敵各營實力勦防。毋稍大意。至匪眾南遁。勢必遁入巢縣。而零星股匪。分走定遠之明光池河等處。或繞盱眙。或回江浦。俱不可定。著曾國藩都興阿富明阿吳棠嚴密偵探。督令在防各將士認真擊

勦李世忠雖不能十分出力。仍當暫為羈縻。俾為我用。並著曾國藩等飭知該員。固守地方。遇賊卽擊。毋任寇氛肆擾。該逆如竄犯江北。都興阿等務當認真勦洗。毋稍疏虞。臨淮餉絀兵單。唐訓方前此擊敗苗逆。此次復痛勦髮捻。均已不遺餘力。惟大敵屢臨。支持不易。曾國藩素顧大局。當妥為兼顧。以期得力。吳常近在清淮。兵力尚可分布。並著隨時籌商調派。不得稍分畛域。僧格林沁所派赴皖之馬步各隊。當已漸次到營。著唐訓方妥為調度。該撫前已授為安徽巡撫。地方軍務責任綦重。務須慎益加慎。以保皖疆。將此由六百里各諭令知之。○又諭馮子材等奏蘇常巨逆復犯鎮防。官軍獲勝情形一摺。蘇浙敗匪屢思併力渡江北犯現經滬上官軍連下堅城。進攻崑山。勢將進取吳門。蘇常江陰等處逆首避重就輕。復犯鎮城東南兩路。陸續糾黨屯聚孩溪諫壁及丹陽辛豐等處。並有

偽護侍兩逆會集十大酋。謀於常州分十路出竄江防之舉。經馮子材等督飭將士先將孩溪諫壁之賊擊敗。並扼守丹徒鎮險要。各營水陸官軍分路鏖戰。復將紛搶渡河股匪擊退。惟諫壁等處敗匪尚未遠遁。散漫各鄉距鎮城不過二三十里。丹陽辛豐等處之賊欲渡越河。侵逼南路。尚未擊退。其丹徒搶渡之賊現在敗遁何處。曾否退出鎮境。亦未據該提督等奏及。此次賊黨眾多。較諸歷次犯鎮諸賊勢尤兇悍。馮子材等務當加意慎重。嚴密防勦。將境內賊蹤迅速埽除。毋令久踞致滋延蔓。昨據都興阿等奏稱水師堵勦諫壁等處賊匪獲勝各情。與馮子材等所奏情形大略相同。並著該提督等隨時知照。都興阿等聯絡水師一體堵勦。以資得力。將此由六百里諭令知之。○又諭駱秉章奏籌辦會勦漢南逆匪一摺。漢南軍務緊要。疊經諭令川楚撥兵援勦。駱秉章以總兵周達武一軍

所部新舊僅三千餘人。萬難獨翦巨寇。已抽調駐防南江通江之道員張由庚及總兵朱桂秋兩軍。共五千餘名。由南通出境。先勦漢中之逆。惟髮逆號稱十餘萬。仍須湖北分兵會勦。且須統率得人。方能濟事。李桓到尚需時。請飭湖北調派李雲麟一軍。馳赴漢南會勦等語。陝省漢中被圍已久。城固褒沔偏地賊蹤。鄰省援師。豈容日久耽延。致形滋蔓。李桓自報起程。迄今尚無到陝消息。前已傳諭該藩司迅速趨行。卽著懷遵前旨。剋日兼程前進。馳赴漢南相機勦辦。李雲麟一軍。官文等前因髮逆圖犯鄂境。飭令留守棗陽。暫緩赴陝。現在該省防堵事宜。自己布置周妥。其棗陽一路。距皖省逆氛尚遠。不妨抽調別營駐紮。以資鎮遏。且川省援軍。旣已出境。若無鄂軍合力夾擊。終難聚殲。著官文嚴樹森卽飭李雲麟迅率所部。剋期出境。由興安取道西鄉。與川中所派之兵會合兜勦。毋稍宕延。

川省西防髮逆。東禦鄰氛。堵勦情形。亦與湖北相埒。駱秉章尚能不分畛域。抽調赴援。湖北以業經派赴漢南之軍。豈可以防務恭嚴日久。扣留置鄰疆於不顧。官文等務當剋日調派一面。將李雲麟起程日期。迅速馳奏。以慰廑繫。本日復據張亮基奏。黔省已保道員張心培。謝葆齡。營私植黨。賒民召亂。無惡不作。現在密加訪拏。實已先後遠颺等語。著官文嚴樹森。毛鴻賓。速飭所屬該二員原籍地方。嚴密查拏。解往貴州。交張亮基審辦。毋或疏縱。將此由六百里諭知官文嚴樹森。毛鴻賓。並傳諭李桓知之。○又諭駱秉章奏。中旗髮逆。自甯遠上竄。截勦獲勝。並殲斃逆首一摺。據稱髮逆自甯遠敗竄。天全等處。隨處遇兵截勦。賊首賴遇新。卽賴剝皮被殲。僅留餘匪數千人。乘間奔逃。旋據廣元。昭化。探報餘賊由平武山內。逃往甘省文縣邊界之畢口地方。度該逆必由略陽圖與甯羌之賊合股。

等語。現在駱秉章抽調駐防南江通江之道員張由庚所部三千二百人。總兵朱桂秋所部二千二百人。由南通出境。勦辦漢中髮逆。並請飭令郎中李雲麟督率所部。由興安取道西鄉。與川中所派之兵會合。以勦為防。本日已諭令官文嚴樹森迅飭李雲麟前赴漢南協勦矣。此次竄入甘省文縣之川匪。必繞由略陽糾合甯羌踞賊。若不力加擊勦。甯羌匪勢益肆。鴟張著瑛榮督飭帶兵文武及該地方官將圖竄略陽之殘匪認真按勦。悉數殲除。毋令與甯羌之賊勾結。致辦理更形棘手。張由庚等軍指日可到。並著瑛榮嚴飭漢南各軍會合川兵相機攻勦。不得專恃鄰境援兵。任本省兵勇觀望退縮。貽誤戎機。川匪現既竄入甘省文縣。未知復逸何處。抑或即擾略陽。著熙麟恩麟一體派兵嚴加堵勦。迅殄賊氛。毋令蔓延甘境。將此由六百里諭知熙麟瑛榮並傳諭恩麟知之。○又諭駱秉章

奏籌辦會勦漢南逆匪。並截勦甯遠繞竄逆股匪。遵覆現辦勸捐。及本年續辦按糧津貼各摺片。張亮基奏勦辦黃號苗教各匪。及由川竄入滇黔境內髮匪。覆陳籌辦教民案件。林自清現尚安靜。遵保遣散滇練各員等摺片。均經覽悉。又據福陞奏報雲南逆回突入省城。戕害總督各官。及探悉滇省現在情形各摺片。所奏雲南省城被逆回突陷等情。與駱秉章張亮基等前奏大略相同。現在胡中和既在川省帶兵勦賊。而福陞尚駐滇省。本日業將四川提督蔣玉龍所出之缺。令胡中和調補。福陞補授雲南提督。該提督無論行抵何處。卽行折回。駐紮昭通。與賈洪詔就近籌商。將滇省應辦事宜妥為籌辦。以資得力。川滇黔三省輔車相依。滇省糜爛。至於此極。朝廷豈忍坐視不為之所。惟黔中尚未肅清。該省地方本來力薄。川省較為殷厚。近來亦已疊遭蹂躪。石逆等股匪尚肆擾沿邊。其

與陝南毗連興漢褒斜一路軍務尤殷亟需蜀兵越境會勦前經疊次寄諭駱秉章催令周達武一軍赴陝茲據奏稱周達武所部兵力尚單留為本省雕勦之軍方期得力現已改令道員張由庚總兵朱桂秋各領所部兵勇合五千餘人由南通出境越勦漢中之賊卽著督催張由庚等星速前往李桓現在中途約計不日當可到陝現復寄諭飛催並諭官文嚴樹森飭令李雲麟之軍仍卽赴陝該員前為官文等奏留駐防鄖棗刻下鄂邊賊勢稍紓當可移師西向駱秉章所請量加階秩俾資統率之處應俟李雲麟行抵漢中再為酌辦其甯遠等處被勦由平武山內逃往甘省文縣邊界餘匪如由略陽與甯羌之賊串合張由庚等軍馳赴陝南卽可並將此賊聚殲著駱秉章飭令該道員等探悉賊蹤相機勦辦其川省東南之劉嶽昭軍西南之胡中和唐友耕等軍布置均尚周妥敘南所駐

之何必勝一軍川北一帶所留之周達武一軍均著督飭嚴密防勦保全四境川省現辦勸捐及續辦本年按糧津貼均照所擬辦理石逆一股游弋川黔等省各邊已久此賊起自廣西最為頑惡流轉東南各省現復擁眾以渡金沙分擾川滇接壤境地駱秉章與勞崇光張亮基等務宜隨時相機飭令各邊將士設法將此賊擒戮毋任蔓延黔省教民案件疊經寄諭勞崇光張亮基妥速籌辦此時勞崇光計當抵黔著卽懷遵前日密寄諭旨與張亮基迅籌辦結以服遠人而靖地方毋稍延緩田興恕已起程赴川仍卽飭令折回黔省聽候辦理如已抵川卽著駱秉章派員押解回黔張心培謝葆齡二員尤為惡劣為田興恕叢咎所由豈容遠颺逍遙法外並著駱秉章嚴密查拏其各本籍地方亦經寄諭官文等一體嚴拏解黔歸案戴鹿芝趙畏三多文均經分別摘頂撤任卽著將該員等先

行查辦。教民一案關繫緊要。前次寄諭甚詳。諒勞崇光張亮基必能悉心體察。妥為商辦。以期息事也。林自清回黔。現尚安靜。張亮基所奏。令其暫為韜晦磨鍊。再行任使。所見甚是。勞崇光抵黔後。自應暫行駐紮。將滇省事。宜如何籌辦之處。妥籌具奏。賈洪詔何日前赴昭通。察看昭東地方。能否進籌戰守。茲閱福陞所奏六難六易等情。於漢回一切情形。殊有所見。此時能否照該提督所擬辦理。著

勞崇光賈洪詔悉心籌畫。斷不可稍有漏洩。先致播揚。福陞原片著鈔給駱秉章勞崇光賈洪詔閱看。至髮逆由川入滇。竄撲昭通府城。福陞督率地方禦擊獲勝等情。並著該督撫等查明。如果實有出力員弁兵練。據實保奏。滇省辦理勦撫一切事宜。亟須籌畫餉需。張亮基前奏曾於廣東湖南等省籌備雲南軍餉。又於四川重慶瀘州分立捐局。亦為雲南軍需而設。共有銀數若干。此時自應仍歸

辦理雲南軍務之用。著張亮基與勞崇光商同撥給昭通等處。以應急需。駱秉章前奏滇省情形。總須川省事平。力量寬裕。始能認真舉辦。洵屬老成之見。第此時滇事決裂。已不堪問。僅餘東昭一隅之地。尚可進步。亦不能不及時籌辦。該督素顧大局。遇事不分畛域。滇事如何著手。如有應行接濟之處。即著駱秉章酌量緩急。隨時撥解。渝瀘二局。現存捐款。能否先行撥給。亦即妥籌可也。將此由六

百里各諭令知之。○引見壬戌科散館人員。得旨徐郁何金壽溫忠翰孫毓汶業經授職。二甲庶吉士陳彝宜綬宗室崑岡劉瑞祺曹東濬王昕張家驥龔聘英姜敏修林天齡張鴻遠平步青楊先榮馬相如薛斯來周德潤董兆奎畢保釐范德馨陳學棻譚鈞培吳文釗龍湛霖黃槐森張良璋歐壽樞王道源廖坤培尹紹甫游百川俱著授為編修三甲庶吉士孫詒經王蔭豐俱著授為檢討潘家鉉

范鴻謨周濟王桐汪正元王福保唐國翰徐聲喟童毓英李祖光趙子端宗室桂昂俱著以部屬用尋鑒晉王允謙王琛鹿傳霖同揆奎俱著以知縣用○調雲南提督胡中和為四川提督以前任雲南提督福陞為提督○以雲南遣散練勇出力予道員葆亨等加銜升敘開復有差○以貴州遵義南境肅清予副將曾紀純等加銜升敘有差陣亡知縣秦安慶副將王國珍都司沈學見祭葬世職加等○以四川天全榮經州縣兩城被匪竄陷旋即收復革副將秦華祝職撤勇號知州丁雲章知縣孫怡祿革職留任予陣亡副將鄒威彪等十四員祭葬世職加等○予四川軍營病故提督蔣玉龍祭葬卹蔭加等諡勇果○追予陝西平利殉難翰林院庶吉士邢景周建立專祠千總陳鈺武生楊應鍾附祀○貸山西豐鎮遼襄陵大同懷仁武鄉蒲七廳州縣歉收地方倉穀緩甯遠霍保德右玉陽

曲太平曲沃虞鄉臨汾靈石十廳州縣節年應還倉穀○壬寅諭議政王軍機大臣等奉宸苑奏苑外居民越牆進苑肆擾請飭嚴拏一摺據稱本月二十二日南苑圍河行宮迤南地方突有匪徒四五十名持械肆擾經巡夜官兵查問該匪直前拒捕經官兵擒獲張自保徐進幅二名送苑審訊供出同夥二十九名開列住址清單請飭步軍統領等衙門按名嚴拏等語南苑重地關繫非輕著步軍統領衙門順天府都察院五城御史按照單開住址姓名密速查拏悉數弋獲不得稍露風聲致令遠颺被獲之張自保徐進幅二名著順天府嚴行審訊按律治罪牆外雖有堆撥並無外營兵丁住班以致該匪夥黨進苑毫無知覺並著步軍統領衙門嚴飭外圍營汛兵丁嗣後務須隨時稽查晝夜梭巡以昭慎密儻查有曠誤疏懈情事即著認真懲辦毋稍姑容原摺一件單一件均著鈔給閱看

將此各諭令知之○又諭有人奏知縣玩視軍務苛派殃民請飭查究一摺據稱前直隸東強縣知縣王蘭廣在任加派差徭不願認真團練上年直東降眾滋事竄撲東強經該縣紳團擊賊出境該令恐紳民藉團抗差卽飭撤防責令團首催繳差費迨賊復犯境該令與委員何庚生潛匿北鄉任令縣城失陷陣亡團總六七十人團眾死者三千有餘賊退後該令並不分別稟請獎卹惟與何庚生串通牟利催繳差費縱令書吏尹培善增稅加徭勒折浮費及捏稱募勇侵冒入己各等語王蘭廣本係革職查辦之員著劉長佑按照此次被參各款逐一根究毋稍徇縱並將殺賊出力及陣亡之紳團一併查明分別奏請獎卹原摺片均著鈔給閱看將此諭令知之○又諭熙麟奏回匪圍攻平涼府城援剿獲勝一摺回匪圍攻平涼於城之東南東北兩處轟發地雷均經官紳兵民奮力搶護補

築完竣此次又經馬天祥等援剿獲勝賊知有備當不至併力圍攻惟援兵太少雖獲小捷未挫兇鋒究不可恃著熙麟迅將前調延綏鎮兵催提到平以厚兵力仍嚴飭馬天祥等及總兵呂元知府田壽增就現有兵勇實力防剿毋稍疏虞至敗匪西竄係向何處遁逃平涼郡城曾否解圍熙麟摺內未經聲敘仍著詳晰查明迅速馳奏將此由六百里諭令知之○廣東巡撫黃贊湯奏陳廣東吏治民生及軍務軍餉亟應籌辦情形得旨該撫甫經蒞任於該省官民利弊均能洞悉惟當力圖挽救行之以實持之以久期於吏治民生兩有裨益方為不負委任○以才不勝任降廣東高州鎮總兵官訥蘇肯為副將以記名總兵官鄭金華為廣東高州鎮總兵官○改丁憂廣西左江鎮總兵官王海清為署任○以甘肅平涼勦辦回匪獲勝予遊擊馬天祥等升敘有差○以廣東克復西甯縣城出

力。予千總馬有匯以守備用。並賞花翎從九品楊保鏞等藍翎。免已革守備鍾文彩等罪。餘加銜升敘有差。予陣亡千總李標外委區容光等祭葬世職。○癸卯。諭內閣。前因多隆阿奏副都統祥恩寄頓勝保貲財。該將軍派員往查。祥恩輒將委員捆毆。當經降旨將祥恩革職查抄。交多隆阿嚴訊。復因僧格林沁呈出郎中何恩壽信函。有道員戴鸞翔貪鄙奸詐。逢惡助虐等語。一併交多隆阿審訊。經

多隆阿奏請將該員革職歸案審辦。嗣據多隆阿奏屢經研訊。該二員堅不吐實。因軍務方殷。請解部嚴審。復經諭令將該二員就近押赴山西。交愛仁王茂蔭秉公訊辦。茲據愛仁等奏稱查明祥恩等被叅各款均訊無實。據惟祥恩於協領同慶等查起勝保寄物。並不細詢來歷。輒因口角細故。將筆帖式安成毆傷。戴鸞翔奉委勸捐。並不善為經理。因前任衛千總童維卽童登魁書捐過少。輒將其

捆縛兩手。交縣看押。又因長安縣代雇羸馱短少。將縣役棍責。實屬任性妄為。業已革職。應毋庸議等語。已革副都統祥恩已革道員戴鸞翔久在勝保軍營。最為親信。該革員等非但不能匡正勝保。復敢憑藉威勢。肆行無忌。雖被叅各款。訊無實據。而毆打委員。捆押捐戶。棍責縣役。種種妄為。其平日之倚勢作威。已可概見。況戴鸞翔未至勝保軍營以前。久已聲名狼藉。以上二員。僅予革職免議。不足蔽辜。祥恩戴鸞翔業經革職。著永不敘用。均發往軍臺效力贖罪。以昭炯戒。○又諭晏端書黃贊湯奏廣東治理需才。請飭前任運河道敬和來粵委用。並請將指發廣東試用道杜學禮刑部候補主事劉宗岱浙江候補知縣汪承緒留粵差遣等語。敬和係告病回旗人員。杜學禮指發廣東。例應來京引見。劉宗岱既係京員。尤非外省督撫所能擅留。汪承緒一員。雖經晏端書帶赴廣東。委辦釐捐。

將來仍應回浙。該員等或在粵未久。或並未到粵。人地詎卽相宜。現在廣東軍務雖未告竣。究非江浙等省可比。晏端書等何得輒為違例奏請。致開趨避取巧之風。所請著不准行。至廣東候補同知蕭燦章。隨同耆齡赴閩。晏端書等請將該員調回粵省。尚屬與例相符。卽著耆齡飭令蕭燦章迅速回粵。毋許逗遛。○又諭晏端書奏遵保堪勝水師總兵人員一摺。除衛佐邦一員。前經勞崇光保奏。業

已記名外。升署香山協副將陳佐光。升署大鵬協副將許穎升。均著記名。以水師總兵用。俟軍務告竣再行送部引見。升署水師提標右營遊擊鄭耀祥。補用遊擊香山協都司黃廷彪。升署閩粵南澳鎮右營遊擊賴建猷。升署水師提標後營遊擊湯騏照。升署海安營遊擊雷秉剛。均著俟軍務告竣送部引見。○又諭晏端書等奏請將庸劣不職各員分別降革一摺。署高廉道廣州府知府文玉。才具

中平。自署道篆以來。地方蹂躪。兩載有餘。一籌莫展。著以同知通判降補。吳川縣知縣陶楫。體弱多病。著以府經歷縣丞降補。署遂溪縣知縣喬家銑。性情拘迂。不通時務。署樂會縣知縣吳裕。微辦公竭蹶。才欠開展。均著以教職銓選。卸任三水縣知縣白世永。辦事麤鄙。聲名平常。卸任河源縣知縣梅需琳。性情乖張。遇事偏執。茂名縣知縣湯克勤。貪庸廢事。謗議沸騰。署東安縣知縣祝慶符。巧滑欺

飾。不洽輿情。卸署合浦縣知縣毛仁麟。心術不端。行為巧詐。卸署合浦縣知縣沈駿選。不知檢束。聲名狼藉。均著卽行革職。○諭議政王軍機大臣等。前因劉長佑奏軍務緊要。請調總兵李明惠等赴直差委。當經諭令毛鴻賓。飭令該總兵等募勇成軍。由輪船駛赴天津。所需口糧。卽由湖南廣東籌給。茲據晏端書等奏。輪船以販貨為主。原非專載行人。兵勇為數既多。必須數船並發。尤難同時覓雇。

且輪船定價。每人約需百金。計李明惠等募勇一千五百名。搭船一項。已需銀十數萬兩。粵東各庫。撥括已空。一時實難得此鉅款。查湖南省至廣東省。水陸計程二千餘里。加以由海赴津。輪船駛行各口。又無定期。程途實形迂折。不如由楚豫徑赴大順廣一帶。較為便捷等語。所奏亦係實在情形。卽著毛鴻賓飭令李明惠等統帶所部。徑由楚豫取道北上。俾利師行。其一切行裝口糧。仍著晏端書

黃贊湯毛鴻賓籌款支給。毋令缺乏。並著劉長佑行文催提李明惠等迅赴直省。以資攻勦。將此由五百里各諭令知之。○又諭曾國藩奏官軍苦守力戰。石澗埤廬江等處。先後解圍。並歷陳江西皖南援勦情形。都興阿等奏各路軍情喫重。分飭水陸各軍。嚴密布置。各摺片。逆酋李秀城率黨圍撲石澗埤營盤。經毛有銘等會合彭玉麟水師。併力夾擊。蕩平賊壘。立解重圍。其竄撲廬江六安州等處

之賊。該文武員弁且守且戰。疊獲勝仗。賊遂解圍而遁。勦辦尚屬得手。惟偽忠逆自六安解圍下竄。據都興阿等奏苗逆糾同髮逆。詐稱數十萬。已由滁州竄至天長之玉興集。儀邑西北鄉居民。紛紛震恐。與曾國藩所奏。或稱其圖犯揚州。裏下河。或稱其糾合苗黨。竄擾濱淮各屬之語相合。是其窺伺揚防。圖竄裏下河一帶。已無疑義。現在淮揚兩郡防勦正當喫緊。著都興阿富明阿嚴飭水陸各軍。整肅隊伍。相機迎勦。並著吳棠仍遵前旨。檄飭將壩衡陽高寶等處守將。認真扼截。淮揚唇齒相依。都興阿富明阿吳棠務當不分畛域。互為策應。力保完善之區。俾該逆無隙可乘。方為妥善。李顯發駐紮六合。並不力籌堵禦。竟欲親往裏下河查辦游勇。實屬不知緩急。著曾國藩速行劄飭李世忠。迅將李顯發調回固守六合。毋稍疏懈。並責成李世忠就近調派勇隊。遏截賊匪東竄之路。毋得意存

觀望。自取咎戾。鮑超現由廬州追擊。忠酋著
卽飭令該提督會同劉連捷等進攻巢縣。迅
拔堅城。壽州糧缺兵單。萬分危迫。該大臣當
嚴檄蔣凝學等軍。星夜馳援。尅期趕到。俾免
疏虞。僧格林沁現因圍攻淄川。功在垂成。未
便撤圍南下。雖據該親王馳奏。一俟淄川克
復。卽督率全部。回勦苗練。而此軍何日可以
南下。究難豫定。成大吉業。已由鄂旋皖。計日
可抵壽州。該提督熟習苗練情形。著卽先行
檄飭成大吉。蔣凝學。毛有銘。會師進討。其蒙
亳一帶。並著唐訓方督飭將弁。妥籌援應。毋
稍大意。李續宜已由水路北來。行將抵鄂。該
前撫受恩深重。著曾國藩飛催前進。迅速抵
皖。毋再遷延。皖南之賊。時思竄擾江西。雖經
劉典王沐等軍。埽除黔邪。賊匪而賊之竄往
鄱陽者。已由視田街近徧浮梁。且昨據沈葆
楨奏。建德踞賊。恨彭澤縣九都團練之悍。以
大股分路猛撲。民團為賊所乘。退至西河扼

守。現因饒防危急。不能分兵往援。是江省防
務。饒九均形喫重。曾國藩現調李榕一軍。由
北岸馳赴建德。著卽酌度機宜。將此軍就近
調赴彭澤。攻勦竄匪。俾該縣民團。不至潰敗。
則士氣益堅。邊防可期穩固。惟該大臣酌量
迅速辦理。鎮江軍務。昨據馮子材具奏。與都
興阿所奏略同。該將軍務當隨時嚴檄上下
游水師。認真防範。備豫不虞。並咨會喬松年
將沿江團練實力整頓。以壯聲勢。正在寄諭
閒。據李鴻章馳奏。克復崑山新陽縣。城擒斬
逆匪殆盡一摺。崑新一城。為蘇省東面切近
門戶。現經官軍尅期攻拔。擒斬逆賊至數萬
之多。蘇城踞賊。自必聞風喪膽。且據曾國藩
奏。探悉忠酋有回救蘇城之說。亟宜乘賊情
惶恐之際。迅速進攻。著李鴻章督飭程學啟
等。速移得勝之師。規取蘇城。力圖克復。俾渡
江之賊。回顧巢穴。不敢肆意分竄。則淮揚一
帶防務。可期稍鬆。現在我軍乘勝之餘。宜先

由何路攻取最操勝算之處。著該撫妥籌迅速辦理。李鴻章另片奏請將俞斌所抄家產發還變賣。令其繳足罰款等語。著照所請。所有抄過俞斌產業。准其發還。勒令自行變賣。將應繳之款。趕緊如數呈繳。如繳不足數。或任意遲延。卽著從嚴叅辦。李鴻章請將新復之太倉等州縣漕糧豁免等語。已特頒諭旨。將本年漕糧一體豁免矣。該州縣居民。疊遭蹂躪。困敝不堪。全賴良有司加意拊循。隨時安集。並著曾國藩、李鴻章慎選牧令。綏輯地方。俾流民不至失所。以副委任。將此由六百里各諭令知之。○以克復江蘇崑山、新陽縣城。賞總兵官程學啟正一品封典。總兵官陳有昇、副將成俞、卿張光泰、劉士奇、宋有勝、參將周良才、吳建瀛、巴圖魯名號。餘加銜升敘。開復有差。予陣亡千總黃虎臣等祭葬世職。○以安徽石澗、埭廬江等處解圍。賞道員毛有銘、巴圖魯名號。曾廣翼、花翎。餘加銜升敘。

有差。予陣亡參將黃仁親等祭葬世職加等。○予江蘇常州被戕知府于醇儒祭葬世職。○予安徽桐城貴池陣亡殉難監生周元貞等紳民婦女四百四十六名口分別旌卹如例。○豁免江蘇太倉鎮洋常熟昭文崑山新陽嘉定金山八州縣本年額賦。○甲辰上復詣大高殿祈雨壇行禮。○遣恭親王奕訢詣時應宮。惇親王奕誼詣昭顯廟。鍾郡王奕詒詣宣仁廟。順承郡王慶恩詣凝和廟。肅親王華豐詣覺生寺。豫親王義道詣黑龍潭。喀爾喀郡王達爾瑪詣密雲縣白龍潭拈香。○諭內閣宗人府刑部奏審明宗室圖詐控告並職員指官撞騙按例定擬一摺。據稱已故宗室色勒布之妻色克氏因已故奉恩鎮國公有鳳之妻張氏欲與胞姪

王潔分居。從中唆令控告。並以到官受辱。恐嚇張氏。代為覓人託情。曾先向輔國將軍宗室奕繡通知。當因奕繡索銀五百兩未允。復向刑部員外郎紹恆屬託。紹恆以張氏分家涉訟。自可邀准。希圖撞騙。遂捏稱託情。並飭書吏代鈔張氏前控分產結案奏稿。為張氏代覓候審坐落地方。先後得受謝銀八百兩。並衣物等件。色克氏堂姪松榮及僧人慧悟。稔知紹恆託情不實。向紹恆詐索銀一百兩。

卷之三

三八

並將前事告知奕繡。奕繡希圖控嚇得財。邀同慧悟。以色克氏串通紹恆指名撞騙等詞。赴宗人府呈控。經該衙門會同刑部審悉前情。應請按律定擬等語。此案奕繡於張氏分居涉訟。係屬事不干己。乃因詐銀未遂。捏詞訐告。實屬不知自愛。著革去輔國將軍。發往吉林安置。紹恆身係職官。輒因張氏分家涉訟。撞騙得受謝銀。實屬有玷官箴。著革去員外郎。發往黑龍江效力贖罪。色克氏素不安

分。屢次涉訟。此次所犯案情。尤為卑鄙。著發往盛京交該將軍嚴加管束。其松榮慧悟張氏等應得罪名。均著照所擬辦理。○乙巳。孝慎成皇后忌辰。遣官祭

慕陵。○諭內閣。前因上駟院奏。向敦二等侍衛世恆在良鄉縣地方。被甲長楊汰等謀害。當交順天府府尹提犯嚴訊懲辦。茲據萬青恭林壽圖奏稱。訊據巡役郭峻等供稱。侍衛世恆於本年二月間。隨鍾郡王差回行至良鄉

卷之三

三八

縣東關藥王廟地方。舊患疾病復發。隨地贖卧。郭峻起意商同甲長楊汰。牌頭蕭百歲等。竊取世恆身旁眼錢衣物等件。旋赴縣稟報。因該縣知縣飭送出境。楊汰等將世恆扶至火石溝地方。復起意剝取衣服。因世恆掙扎。郭峻等用石塊攢毆殞命。將屍掩埋。旋經屍姪榮昌報官。訪獲屍身屬實。楊汰等飭緝未獲。請將郭峻等交部審辦等語。此案良鄉縣捕役郭峻等膽敢疊毆職官身死。竊奪多贓。

並起意私埋匿報實屬目無法紀且所供世恆素有疾病復發一節並未據屍姪榮昌聲明顯係藉詞狡飾至世恆艱卧楊汰等已將其身旁衣服銀兩取去並剝取其身穿布袍世恆亦並無知覺且業經稟報該縣令其送出本境何以楊汰等必欲糾約多人將其致死情節種種支離亟應徹底究辦以成信讞郭峻任王蕭百歲均著交刑部嚴行審訊將該犯等供內不實不盡各節逐一研詰務期水落石出毋稍含混其在逃之逸犯楊汰蕭柱兒並著步軍統領衙門順天府五城直隸總督一體嚴拏務獲歸案嚴訊究辦尋刑部奏審明郭峻等圖財害命屬實除楊汰在逃未獲蕭百歲在監病故郭峻任王擬卽斬決良鄉縣知縣莊允端失察應咨吏部議處從之○又諭前因德興阿所帶兵丁在蒲州八村搶掠致釀人命諭令英桂分別查辦茲據奏稱德興阿所帶天津兵丁陸得勝等於上

年十一月間因在蒲州東門外盤獲之勝保眷口行李均寄存鹽郭村起意乘機搶擄行至中途張國安等畏罪折回陸得勝等二十四人卽至該村偏加按搶該村民人任知賢等出向攔阻均被扎傷任知賢宋得全並先後斃命少女何春娥等二口同時投井自盡陸得勝等卽在景文祿等三十八家並於距村半里許之上原村賈維棟等家搶得銀錢衣飾分攜出村時有正定營兵丁吳存德等因陸得勝等久未回歸前往查探卽在中途會遇陸得勝等告知前情分給零星物件屬勿聲張一同回防卽經德興阿訪聞查拏該兵丁宋平安等聞拏逃逸現將已獲各犯擬結並請將約束不嚴之帶兵各官分別革職嚴議等語此案陸得勝等身充營兵膽敢乘機搶掠持械行兇致該村民死傷多人少女二口同時自盡實屬目無法紀罪不容誅除謝汶奎等四犯業經病故外其陸得勝等三

犯經該撫於審明後。卽在犯事地方處斬梟示。張玉汰等五犯亦均在遼州防所處決。辦理尚為妥協。在逃之宋平安等十二犯並著一體嚴拏務獲。卽由各該地方官訊明就地正法。帶兵官遊擊田茂等於所部兵丁搶掠村莊殺傷人命。事前既毫無覺察。事後又不將該犯按名送究。致有脫逃。非尋常疏忽可比。除千總郝承恩業經病故。應無庸議外。千總賈如璧外委于興雲均著革職留營以觀

後效。遊擊田茂守備吳德元均著交部嚴加議處。○諭議政王軍機大臣等。穆騰阿瑛榮等奏擊退撲城回逆。遵查省城現駐兵勇數目。曹克忠現帶楚勇疏通糧道。咨催雷正綰馳援鳳翔。又歷陳漢南軍務。請飭李桓自行奏事各摺片。西安省城防守緊要。節經諭令穆騰阿瑛榮等妥籌備豫。自多隆阿攻克倉頭。將由沙窩高陵一路勒拏分路並進。省城尤應竭力固守。使賊不得乘間攻撲。意圖牽

掣。本日據奏回逆復撲城營。官軍擊走各情。仍著穆騰阿瑛榮等督率城營兵勇實力巡防。並籌戰守。毋稍疏懈。賊既廣造攻具。計圖攻襲。尤須嚴密防範。設法破其奸謀。俾不得逞。至城內外旗綠各營布置情形。覽瑛榮開單及穆騰阿所奏均悉。穆騰阿督率巡防各營兵親加操練。務令精熟。其補額幼丁等亦須隨時教練。以資得力。瑛榮所有城內外現存兵勇合之穆騰阿存營兵數。如果布置得

法。調度有方。與曹克忠之軍就近聯絡聲勢。自當戰守兼施。足資鎮撫。何得意存。恒怯藉口。兵單動成坐困之勢。多隆阿大兵不日西指。省城防務漸紓。馬德昭疊經諭令督兵赴甘。著卽懍遵前旨。卽日趕緊馳赴慶陽。與熙麟籌商攻勦。毋再遷延。致干咎戾。曹克忠由咸鄠交界一路疏通糧道。並可與省城就近隨時策應。所有三堡及牛東等處之投誠反正各村民人。難保非因曹克忠兵威較振。暫

圖苟免。著卽飭令該總兵察其誠偽。隨時嚴防。毋稍大意。如果係良懦漢民。為逆回迫脅者。自應寬其既往。予以自新。多隆阿前奏雷正綰之軍。因涇陽三原等縣尚屬匪巢林立。未可輕動。並令專力嚴防北山西路一帶。仍令王夢麟統兵往救鳳翔。所籌甚合機宜。著瑛榮仍遵前旨。與多隆阿通籌全局。相機辦理。其王夢麟一軍。往救鳳翔。兵力不敷。仍著該將軍等酌度調派。並督催王夢麟星馳前往。力解鳳郡之圍。不得再有遷延退縮。自干重罪。漢南軍務緊要。毛震壽辦理久成疲敝。漢郡此時仍被賊圍。而毛震壽所部健武營又被賊衝蹋於高家嶺等處。並有藍逆分黨過河。以至馬鬣灘及茶鎮一帶。逼近石泉。瑛榮所奏亟須統率得人。以圖振起。尚屬實情。李桓計日可到陝南。現在行抵何處。著卽懷遵前旨。迅速趲行。抵陝後。所有該處一切軍情。卽著李桓自行馳奏。並著將興漢軍務悉

力整頓。詳細馳陳。渭河搭造浮橋。曾否集事。沙窩高陵等處進剿情形。如何部勒。著多隆阿隨時馳奏。以慰廑念。將此由六百里諭知多隆阿。雷正綰。穆騰阿。瑛榮。並傳諭李桓知之。○又諭江忠義奏接奉寄諭。率所部赴皖。現赴湖南省城乞餉一摺。前因江忠義奏該營已於三月初八日次第啟行赴粵。業已准該署提督所請。諭令毋庸赴皖。卽日赴粵。乃本日據奏。仍將前軍調回。準備赴皖。自係未接奉以後寄諭。著江忠義仍遵照四月初七日寄信諭旨。趕緊赴粵。酌量賊勢輕重。相機勦辦。至所請於湖北省撥調馬隊一百名。如到粵尚需應用。卽著酌量採買。以資得力。將此由六百里諭令知之。○又諭明緒等奏俄兵在卡倫外居住。防範曉諭情形一摺。塔爾巴哈台。巴克圖卡倫之外。有俄兵三四百人。隨帶器械。礮車。在彼居住。意欲先占地方。潛立石壘。經明緒等派員前往曉諭。令其將兵

隊撤回。該國帶兵官執意不允。明緒等現已行文西悉畢爾衙門。令其撤隊。措詞尚屬周妥。本日已諭令總理各國事務衙門。告知該國。住京公使。轉行西悉畢爾總督辦理矣。該國既有兵隊居居巴。克圖卡倫以外。難保不於他處另派兵隊潛住。私壘鄂博。修蓋房間。著明緒等密為探訪。嚴行防範。並隨時知照伊犁及烏里雅蘇台等處。一體豫防。齊桑卓爾既有俄國派兵數千人。耕地蓋屋。並赴各

奏

奏

游牧收服眾哈薩克之說。著明緒等即探明確實情形。並隨時知照科布多地方。一律防範。不得令該國兵隊。於未經分界之先。豫行占越。至兩國分界處所。總以前次總理衙門所發地圖。折中立議為斷。固不得任令俄國任意侵占。亦不必與原定和約。大相徑庭。致該國有所藉口。著明緒等於該國使臣到卡時。斟酌機宜辦理。並著明誼迅即馳赴塔城。與明緒等妥商籌辦。此事早結一日。即早免

一日葛藤。若再稽滯遷延。恐將來又另生枝節。現值天氣和暖。正宜及時辦理。明誼務當於俄使未到以前。先赴塔城。以便及早會議。免致延及秋間。大雪封山。又將此事寢聞也。將此由五百里各諭令知之。○以縱兵訛索革山西把總周永年。外委尹得明。職遣戍新疆。○予陝西西安陣亡武生張占魁等賞卹加等。

宣統元年六月十五日

奏

大清穆宗繼天開運受中居正保大定功聖智誠孝信敏恭寬毅皇帝實錄卷之六十五

大清穆宗繼天開運受中居正保大定功聖智
誠孝信敏恭寬毅皇帝實錄卷之六十六

軟修

同治二年癸亥五月丙午朔。

上詣綏履殿問

慈安皇太后安平安室問

慈禧皇太后安至乙亥皆如之○諭內閣昨因御史奎齡承繼瑞亨引見科缺未到面諭議政王軍機大臣查明該御史等不到次數據實具奏茲據奏稱查據吏部文稱御史奎齡引見科缺四次承繼引見科缺六次均止此次告假未到瑞亨引見科缺八次共計四次告假未到等語京畿道御史遇有京察年分

向來均得保列一等瑞亨調任京畿道後引見科缺四次未到其為意存趨避顯而易見此等取巧之風斷不可長瑞亨著撤去京畿道以各道御史調補用示薄懲其所遺京畿道一缺著都察院堂官揀員請補奎齡承繼均係初次未到姑從寬免其置議向來都察院章程因京畿道及巡視西北兩城御史差務較繁京察保列一等以致捷徑爭趨反以升轉為迂途陋習相沿殊屬非是嗣後都察院堂官務當認真察覈所有京畿道及巡視西北兩城科道如果才品兼優勤能稱職仍准照舊保薦其不勝繁劇者卽當隨時奏撤毋得以揀補在前稍存迴護至各科道中有品行端方才具開展者亦當列為上考不必拘定成案致令向隅也至漢員保送御史例須考試滿員則向不與考殊非慎簡言官之道以後保送滿洲御史著卽由各衙門堂官認真考試擇其通曉清漢文字品行端謹者

出具切實考語。保送候簡。以期臺諫得人。力除積習。○諭議政王軍機大臣等。閻敬銘奏。滙陳東省兵勇民團積弊。請暫留僧格林沁駐紮。以安反側。而靖人心。一摺。另片奏。恆齡蘇克金兩軍。實為直東一帶必不可少之勁旅等語。所奏自係實情。惟皖北髮逆方熾。張落刑餘黨未盡殲除。加以苗練踞邑戕官。蔓延句結。曾國藩大有應接不暇之勢。且李續宜抱病北來。日久尚未抵皖。唐訓方兵餉兩絀。止能固守臨淮。曾國藩現雖檄調成大吉等。馳援壽州。能否解圍。尚難豫定。卽或南路攻勦得手。又恐該逆乘虛由蒙亳一帶北竄。以現在賊勢而論。南北均形喫重。亟應緩急兼權。僧格林沁惟當仍遵前旨。先將淄城攻拔。翦除巨憝。再行赴皖。期與楚師南北兜勦。共圖苗逆。庶不至有後顧之憂。而又不可曠日持久。為淄川一城牽掣兵力。以致顧此失彼。閻敬銘平日頗能實心任事。現在既膺重

寄責無旁貸。亟宜振刷精神。揀任賢能之員。將該省兵勇團練諸積弊次第整頓。俾軍務吏治日有起色。方為不負委任。劉長佑有督辦三省勦匪之責。所有直東毗連州縣各股匪。該督當不分畛域。督飭員弁越境會勦。其孤山屯聚教匪。據閻敬銘片奏。總兵黃國瑞督軍進勦。獲勝。卽著閻敬銘速飭該總兵乘勝進搗賊巢。肅清餘孽。另股匪首張廣得被勦窮蹙。率眾乞降。既據奏稱。准其暫留保德軍營。以觀後效。仍著該署撫留心密察。如果稍萌異志。卽行拏辦。楊朋嶺程順書。自就撫以來。能否真心反正。並著劉長佑嚴密偵察。毋貽後患。本日據王拯奏。降賊宋景詩於昌邑。莘縣臨清聊城四州縣村莊。暨伊旗號。勒取麥石。心甚狡而謀甚大。請密飭劉長佑計調來營。及早誅戮等語。宋景詩自陝逃歸。沿途騷擾。近復招集黨與。專與團練為仇。其心本屬叵測。若不早圖。必為直東巨患。著僧格

林沁劉長佑間敬銘體察情形妥籌辦理原摺著鈔給閱看又據御史富稼奏風聞直隸大城縣有總保長名目包辦合邑差徭從中侵肥欺索請飭詳查懲辦等語著劉長佑逐一查察如各州縣實有前項情弊速行裁汰並將該地方官嚴叅懲辦原摺著鈔給劉長佑閱看將此由六百里各諭令知之○又諭東省兵勇率皆招募烏合並無得力之軍而降眾叛卒雜出其中通賊擾民挾制官長實為心腹之患民間藉團嘯聚率眾抗官者所在林立此等情形久為朝廷所深悉惟因苗逆猖獗不得不移緩就急屢諭僧格林沁督兵南下冀得及早蕺事第東省情形如此劉長佑雖久在行間而甫經到任或民望未孚間敬銘本不知兵設該親王南征直東匪勢復張不無後顧之憂且所統馬隊冒暑南行於天時地利均不相宜實為兵家所忌因諭知該親王俟淄川克復再行南下惟苗逆盤

踞長淮唐訓方督兵進剿前已獲勝並將髮捻大股擊退於剿辦極有把握仍著督飭將弁隨時相機攻剿毋稍鬆勁曾國藩已調蔣凝學等軍會援壽州共討苗逆並著嚴飭各軍合力會攻不可專待僧格林沁之軍致有貽誤吳棠調派陳俊家等礮船五十隻馳赴臨淮五河是湖防已臻周密宿州一帶仍著飭令姚廣武隨時偵探嚴密防範其太和潁上均與豫省毗連張之萬身任疆寄責無旁貸務當抽調重兵妥為扼截並著曾國藩唐訓方設法攔堵毋令苗逆西竄豫省得力之將甚少恐不足以禦巨寇也李續宜為苗逆所畏服該前撫現雖患病但能鎮撫調度即可制其驕悍之氣前經疊次諭知曾國藩催令赴皖該前撫諒已接奉前旨即著兼程前進會商剿辦苗逆以副委任間敬銘原摺均著鈔給閱看吳棠另片奏總兵黃國瑞孤山剿匪獲勝等語東省教匪恃險負隅必當埽

其巢穴。小勝未可深恃。著吳棠飭令該總兵會同克軍迅速進攻。以期及早肅清。用靖地方。將此由六百里各諭令知之。○又諭多隆阿奏鳳翔危急。請派馬德昭馳救。並分路進剿。情形一摺。鳳翔被圍九月。情形萬分危急。儻不亟圖援應。孤城困守。勢難久持。多隆阿現已移營倉頭。在渭河搭造浮橋。分兵兩路進剿。一由高陵節節埽蕩。一由臨潼直擣沙窩老巢。兼顧西安根本重地。該大臣布置既已妥協。省防即可微鬆。著多隆阿星速進兵。埽清悍黨。將西安城外防剿各事宜妥籌兼顧。城內現存兵勇為數已不為單。即責成穆騰阿。瑛榮督飭弁兵實力籌防。不得稍形弛懈。多隆阿既稱省城可以兼顧。瑛榮即可無兵單之慮。所有馬德昭一軍。著多隆阿瑛榮令其湊足三千人之數。馳救鳳翔。力解城圍。俟解圍後。仍遵疊次諭旨。馳赴慶陽。與熙麟籌商進剿。迅解平涼之圍。馬德昭未到以前。

著熙麟就現有兵力。相機勦辦。毋稍疏虞。瑛榮亦不准再請攀留馬德昭之軍。致令株守貽誤。將此由六百里各諭令知之。○直隸總督劉長佑奏軍務未竣。請將同治元年大計再行展緩舉行之。○以江蘇攻克海州等處賊巢。暨肅清山東沂州出力。賞副將歐玉標遊擊陳順理。巴圖魯名號。守備崔陽春等花翎。知縣劉惟金等藍翎。餘加銜升敘有差。○丁未。賞河南等省壬戌恩科鄉試年老諸生陳鹿鳴等十八人舉人副榜有差。○戊申。孝誠仁皇后忌辰。遣官祭景陵。○諭議政王軍機大臣等。袁甲三奏遵籌團練。備禦及豫省兵力不敷。防剿現聞蒙城危急等摺片。並袁保恆奏遵旨留陳幫辦團練。懇請免赴軍營一摺。袁甲三以接奉前諭。因苗逆猝叛。陳州切近皖疆。飭令號召鄉團。速為備禦。並以袁保恆應遵前旨。留陳郡幫同辦理。自陳病體支離。現將團練辦法。飭令

伊子袁保恆會同地方官紳實力整頓。惟豫省兵力不敷分撥。近因余際昌戰歿。張曜等亦調赴南路。不能派往太和。東路空虛。苗沛霖占踞潁上。正陽以後。分圍蒙壽。若令得逞。勢必分路以窺汝宋。而陳州均當其衝。中州地多平衍。賊騎每多於官軍數倍。請調東三省馬隊助勦。並稱現在蒙城為苗逆圍攻甚緊。應請令僧格林沁倍道往援等語。僧格林沁疊經諭令返旆南征。該大臣以目擊直東

現在情形。北路之患有更緊切於南方者。昨經閻敬銘奏懇諭留僧格林沁暫緩南征。所見亦同。當經諭令速將淄川攻拔。翦除巨寇。再行赴皖。該大臣全局在胸。諒不至為淄川一邑久滯南征。第淄城攻克。尚未有期。直東羣匪辦理情形。亦尚未布置周妥。難即督軍赴皖。苗逆鴟張。本為巨患。唐訓方惟有懍遵前旨。拊循激勵各路兵團。督令蒙城壽州文武竭力戰守。毋稍疏虞。豫省東路歸陳一帶。

仍著袁甲三與張之萬等妥籌防勦。張之萬前奏參將張士元所部馬勇歸袁保恆統帶赴陳。其應如何布置情形。仍著袁甲三妥籌辦理。豫省兵力本不為厚。將材尤乏。金國琛一員。節經諭令官文等飭令即速赴豫差遣。仍著督催前往。由張之萬酌量委任。其李續燾之軍。業經豫省遣撤回楚。著官文等於該員行經鄂省酌度情形。如可留為鄂省之用。即著另撥一軍赴豫。派得力之員統帶以資

調遣。吉林黑龍江官軍調發過多。勢難再行檄調。並著官文嚴樹森於鄂省馬隊酌調若干赴豫。俾利馳逐。昨據巴揚阿奏荊州旗營現存馬八百餘匹。均尚臚壯。鄂省馬隊尚有舒保等軍足資分布。如荊營馬軍可以撥調豫省。亦為徑捷。即著官文等酌量調派一面奏聞。張之萬與袁甲三毛昶熙均當各就豫省兵團力籌戰守。不得專待僧格林沁南征及他省撥兵致滋貽誤。僧格林沁仍當將直

東大局趕緊籌辦一有就緒即行恪遵前旨返旆而南毋為淄城一處久稽時日以致苗逆勢愈滋蔓至已降之眾及南歸之匪均有勾結之意而僧格林沁勢難即行南下袁甲三張之萬毛昶熙唐訓方當迅速設法分別安撫截勦不可任其自然致增賊燄袁甲三片著鈔給僧格林沁唐訓方張之萬閱看袁保恆現在陳州幫辦防勦一時暫緩前赴軍營嗣後陳郡防勦事勢漸紓各路如有應行調遣之處亦應力圖報效正不得拘守常例以不忍奪情及侍疾等詞遂忘臣子墨經從戎之義也將此由六百里各諭令知之○己酉諭內閣張之萬奏知縣人地未宜仍懇對調一摺據稱河南鎮平縣知縣戴錫福人地不甚相宜經前任巡撫鄭元善奏請與伊陽縣知縣謝金誥對調旋准部咨以戴錫福任內有經徵錢糧疲玩摘去頂帶一案尚未開復到部與例不符經該撫查明戴錫福完解

銀兩已足分數業經鄭元善奏請開復奉旨賞還頂帶懇仍將該員與伊陽縣知縣謝金誥對調等語戴錫福經徵錢糧一案於同治元年七月間經鄭元善奏請業予開復其鄭元善請將該員等對調之摺係同治元年十一月奏到距該員開復頂帶之旨業已四月有餘何以該部尚稱此案未經開復到部遽行議駁奉旨發鈔之件該部斷無不知難保非該部書吏上下其手藉端需索或以往返駁詰稽延時日從中舞弊俱未可定著吏部即將前項情節速行查明據實具奏其鎮平縣知縣戴錫福與伊陽縣知縣謝金誥對調之處仍著該部一併議奏○諭議政王軍機大臣等唐訓方奏蒙城壽州及懷遠擊賊獲勝收撫宿州捻黨蒙宿軍情緊急仍請飭僧格林沁回皖勦辦各摺片張之萬毛昶熙奏擊退張岡外援之賊追勦大股捻匪偪回皖境攻克方寨等處各摺片僧格林沁目擊直

東巨患未清。不能卽行督軍回皖。非但為圍攻淄川一城。而淄城現已合圍。其勢亦難遽撤。且以北方馬隊官兵。值此盛夏。觸熱南征。天時地利。均非所宜。疊經寄知該大臣督撫等。諭令僧格林沁之軍。速將淄城攻克。直東全局。辦有就緒。再行返旆而南。此時皖省髮捻交乘。及苗逆鴟張。唐訓方務當督飭各軍。固守蒙壽。力圖懷遠。與曾國藩所部皖北諸軍聯絡策應。勉力堵拏。壽州固守危城。猶能出擊。並令團練分壁城外。攻破賊營。現在蔣凝學與毛有銘兩軍赴援。繼至。壽城當可無虞。蒙城被圍較緊。潁州守英翰等亦尚能出戰。襲奪賊之營壘。攻破賊踞穆家圩及張蔡兩圩。懷遠踞賊。經官軍苦戰。大加勦創。唐訓方激勵將卒。均能爭先用命。力挫兇謀。仍著督率各軍。齊集團練。進規懷遠。以力保東路。臨淮水軍單薄。速將所調清江戈船催提前來。以厚兵力。而資備禦。山東遁回宿捻。既經

英翰招撫。蒙城之南一帶。亦因張蔡等圩攻克。不敢復有顯然從逆。其附苗之韓村及併入韓村之李城餘黨。仍著相機勦撫兼施。毋任苗逆肆行。句合以孤賊勢。據唐訓方奏。鮑超蕭慶衍兩軍。業已攻克巢城。是皖北逆匪之勢少衰。巢縣與蒙城相距非遙。現在蒙城被困。力難久支。僧格林沁之軍。急切不能赴援。著曾國藩酌度情形。飭令鮑超等軍於懷蒙等處。擇其何地尤為緊要。相機策應。曾國藩與唐訓方於皖省軍情。均責無旁貸。惟有通籌竭力辦理。山東臬司丁寶楨一軍。自湘新募成軍赴東。計已在途。如應移調赴皖。卽著於該員行經豫省時。截留由豫東汝潁一路徑趨皖北。以資調遣。曾國藩唐訓方與張之萬等。咨會辦理。僧格林沁所派之施紹恆等隊。計當到皖。著唐訓方卽飭赴援蒙城。當可得力。張之萬所奏。截擊張岡外援之賊。並救應正陽息縣各民寨。尚為得手。著卽與張

曜飭令吳元炳趙鴻舉等與王文行各軍將張岡賊巢攻拔。埽除汝南埠等餘孽。其由沈邱新蔡追擊出境之捻股。並著督飭保英尹嘉賓等馬步越境追剿。太和固始一帶均與蒙穎毗連。張之萬等尤當飭令防剿各軍。與皖省之兵聯絡聲勢。相為接應。方寨黃寨及大小張寨攻克。戕害余際昌之賊張振全業經擒戮。出力官紳人等。准張之萬等擇尤保奏。將此由六百里各諭令知之。○又諭前因

明緒等奏俄兵居住巴克圖卡外防範曉諭情形。請飭總理各國事務衙門向該國住京公使告知。令其行文西悉畢爾總督。將俄兵撤回。並轉飭該國勘界大臣赴塔爾巴哈台會議。當經諭令總理各國事務衙門辦理。並諭令明緒等嚴密防範。令明誼趁天暖雪消時。迅赴塔城。俟俄國使臣到彼。即將分界事宜折中定議。早行議結。茲據明誼奏。科布多所屬有俄兵私越開齊防範情形。並俄人占

踞齋桑淖爾等情各摺片。與明緒前奏大略相同。俄兵九十餘名。向科布多所屬哈拉塔爾巴哈台卡外一帶前來。欲在吹河等處搭房住牧。雖經侍衛德山等開導。該夷旋即折回。惟尚有四月二十日復來之語。現值科布多巡查邊境之時。著明誼即咨行廣鳳相機阻止。並曉諭阿勒坦淖爾烏梁海等齊心禦侮。不可為俄人誘脅。仍曉諭哈薩克善為堵禦。至會議分界一事。現既由總理衙門告知

該國住京公使。行文該國。令派使臣赴塔會議。或該國竟有使臣前來。亦未可定。明誼仍當遵奉前旨。迅赴塔城。先期以待。並按照總理衙門前次所頒地圖。折中定議。速行議結。免致日久。另生枝節。不可游移稽滯。恐將來大雪封山。此事又將延閣也。明誼起程以後。烏里雅蘇台將軍事務。即著麟興暫署。所有防邊事宜。並著麟興妥為經理。至明誼所請行文該國住京公使。轉行該國圖瑪城固畢

爾那托爾禁止俄人再來尋釁及聽候兩國定界後始准建立界址之處已諭令總理衙門辦理矣將此由五百里各諭令知之○以安徽懷遠擊賊獲勝並攻克蒙城壽州賊圩免已革署知州毛維翼罪開復原官並賞運同銜予陣亡副將張起鳳都司張順喜千總張天伍等祭葬世職加等○

上以夏至祭

地於

方澤自是日始齋戒三日○庚戌諭議政王軍機大臣等劉長佑奏直東交界肅清擬仿南省營制選練兵勇並請飭崇厚籌畫兵餉及吳再升到營派令募勇訓練各摺片東竄餘匪經官軍挖殺幾盡直東沿河一帶已無賊蹤自應及時訓練軍士俾成勁旅劉長佑現將兵勇分別撤留擬仿湘軍營制分飭各營照式遵辦並派遣員黎獻等逐日督同操練所籌尚屬周妥練兵之道南北情形不同總

在因地制宜期於盡善著即就南省營制量為變通趕緊辦理一面將辦理詳細情形先行具奏該督久歷戎行所稱操練月餘可望一律整齊想必確有把握不至徒託空言也至直東豫三省交界防勦事宜一日未竣即兵勇一日不能裁撤劉長佑現在所部及各軍馬隊尚有一萬數千人每月共需銀八九萬兩餉項浩繁自應豫籌接濟著劉長佑會同崇厚將直省軍餉何項可撥何款可籌迅速妥議具奏候旨遵行天津關稅等項尚可酌量籌撥惟洋人嗜利性成知我餉需缺乏之時不惜鉅貲借貸以遂其挾之私為患非細從前各關口亦有借貸之事不過與外國商人暫時通融外國官並不與聞今外國住京官員在京已有此議恐官與官交涉將來必至各事歸其把持殊多掣肘嗣後外國有願以此見好者並著崇厚設法拒絕毋貪小利吳再升既經派令募勇訓練即著劉長

佑嚴加督飭。俾有成效。僅不能得力。仍奏明發遣。不得以有旨飭赴軍營。稍存遷就之見。將此由五百里各諭令知之。○命協辦大學士吏部尚書瑞常。吏部尚書朱鳳標。教習庶吉士。○授一甲一名進士翁曾源。翰林院修撰二名進士龔承鈞三名進士張之洞。編修○辛亥。諭議政王軍機大臣等。曾國藩奏。滬陳餉需奇絀情形。並請特派大員來南會辦。及曾國荃亦有辭浙撫之奏。各等語。已嚴飭

晏端書等將廣東釐金儘數全解。沈葆楨將九江洋稅按月如數批解矣。曾國藩督師九載。運籌決策。屢克名城。該大臣堅忍耐勞。久為朝廷所倚重。近因所轄地方太廣。所統水陸兵勇過多。而各省餉銀。又復不能源源接濟。深懼責大任重。稍有蹉跌。則大局立虞決裂。所奏自係實情。惟當此時事孔棘之時。正臣工黽勉效忠之日。曾國荃擢升浙撫。朝廷因材器使。原以左宗棠總督閩浙軍務。綦繁

而浙省不可無人分任。將來金陵克復。後曾國荃應即赴新任。一切藉資整頓。該大臣惟當督率曾國荃忠誠報國。力捍時艱。正不必受寵若驚。固辭恩命。至曾國藩籌兵籌餉。盡心竭力。勞勩殊關。廩念第各省軍務方殷。人材又不可多得。該大臣惟當勉為其難。仰體朝廷兢業之心。交相儆惕。以期天心佑順。而大局日有轉機。現在皖省賊勢已衰。惟苗練背叛。勢甚猖獗。蒙壽被圍甚急。南望不勝焦

慮。昨據唐訓方馳奏。蔣凝學一軍已至壽州。城南毛有銘亦由六安繼進。仍著該大臣迅飭諸軍援救壽城。並分兵解蒙城之圍。毋許遲誤。巢縣既克。賊勢東趨。並著檄飭鮑超蕭慶衍等乘勝進取。和含二浦。直逼九汴洲賊壘。彭玉麟亦當督飭水師駛赴下游。會同揚防舟師肅清江面。並著都興阿等隨時嚴飭梁正源等督帶礮划相機。會同擊勦。俾該匪南北隔絕。則九汴洲之師更易得手。前據都

興阿等奏賊匪擾及天長縣東之王興集該匪曾否回竄。現在鮑超等率師進剿該逆被勦窮蹙難保不分股東竄。仍著都興阿等嚴飭各營豫為防範毋稍疏虞。曾國藩另片奏雲南迤東道黃冕請暫緩赴任。擬令前赴揚州會籌餉務等語。兩淮鹽務關係餉需甚鉅。既據該大臣奏稱黃冕久宦江南熟悉漕政。著准其暫緩赴任。飭令迅赴揚州與運司郭嵩燾將漕務認真整頓俾積弊消除則餉需可期漸裕。將此由六百里各諭令知之。○又諭曾國藩奏兵事遲鈍由於餉需支絀。徽甯兩防月餉全賴江西漕折一項接濟。嗣經沈葆楨將漕折銀兩留供本省防兵而徽甯兩防遂無一毫可恃之餉。江西通省釐金又因江浙等處支去八萬致實解皖營者寥寥無幾。廣東釐金奏定專充浙皖軍餉近亦有留供本省之議。餉需匱乏。詳潰堪虞。請飭江西等省趕緊籌解等語。曾國藩所部各軍八萬

餘人。益以李續宜部下二萬人。已逾十萬之眾。而每月入款不過十餘萬。杯水車薪。豈能拯急。近來鮑超一軍。即有苦無途費部卒逃散千餘之事。毛有銘自東關起程進剿苗逆亦因餉項無出。部卒逃散數十人。若再不趕緊接濟。萬一飢疲之兵相率詳潰。東南大局何堪設想。曾國藩督兵九載。從無益餉之請。今據滬陳各情。定屬非常緊迫。晏端書本係督辦釐金大員。豈得專顧粵省。遂置皖浙於不顧。沈葆楨亦當念江皖唇齒相依。保皖即所以保江。力籌接濟。著自奉旨之日起。沈葆楨於九江洋稅項下每月撥銀三萬兩。源源解皖濟餉。晏端書黃贊湯將所辦釐金銀兩全數解赴皖。浙本省不准再有截留。晏端書等僅仍畛域攸分。不以國事為重。致誤大局。必惟該督撫等是問。將此由六百里各諭令知之。○又諭馮子材等奏水陸官軍迎剿鎮江東路悍賊連戰皆捷一摺。蘇浙敗匪屢思

併力渡江。北犯鎮江東路。丹徒鎮為水陸扼要之區。尤為賊所窺伺。此次賊由越河洪山凹下犯。而諫壁孩溪之賊。復沿江撲擾。疊經水陸各軍連戰皆捷。賊窮思竄。現已遁回丹陽老巢。勦辦尚屬得手。惟賊蹤出沒靡常。時思北渡。自越河至丹徒鎮一帶。尤應嚴密守禦。著卽督飭賴鎮海等。嚴飭各師船聯絡堵禦。並飭各路官軍。迅將鎮城東南一帶逆氛。盡力掃蕩。以期節節進剿。偪攻丹陽老巢。賊

蹤飄忽靡常。鎮防南北兩岸。均屬緊要。並著隨時知照都興阿等。聯絡水師一體嚴防。以資得力。將此由五百里各諭令知之。○又諭前因唐訓方奏皖省情形緊急。當經諭令唐訓方張之萬。於丁寶楨一軍抵豫時截留。由汝穎一帶徑趨皖北。本日據丁寶楨奏連日督勇疾行。計月之中旬可到東省等語。丁寶楨所帶勇隊連日應已將次入山東境界。如業經在豫省截留。卽著張之萬等飭令赴皖。

如已入山東地面。卽當察度緩急。相機進剿。無庸再行折回。轉至紆途延誤。該臬司到東後。閻敬銘酌量情形。妥為調遣。以資得力。唐訓方因臨淮軍營餉絀。派令參將翁廷奎到淮關守提。據永存奏該參將帶領馬步多名。鞭責號房家丁。出言無狀。以致弁勇等在署施放火槍。聲言焚毀衙庫。自轅門直至內署。逢人持刀威嚇。將書役十人結辦。吊打並有砍落髮辮者。復拆毀門窗。肆搶衣服錢物等

情。如果屬實。大千法紀。該監督已咨明吳棠查勘。卽著吳棠派委明幹道府前往查明。究竟因何啟釁。永存所奏有無不實不盡之處。務須確切查明。據實奏聞。不准一字欺飾。翁廷奎解餉到營。唐訓方卽將該參將傳問。因何藉提餉之名。縱容兵丁擅用刀槍火器。威逼勒索。並令將手下滋事各兵按名指出。仍將啟釁根由逐一供明。以期水落石出。如實係無故滋鬧。卽著唐訓方於訊明後。將該弁

兵等分別正法嚴懲以儆刁風。唐訓方軍單餉竭。仍著吳棠永存陸續籌解。力顧大局。不得藉詞延宕。致干重咎。將此由六百里諭知吳棠。唐訓方張之萬。閻敬銘。並傳諭永存。丁寶楨知之。○又諭耆齡奏交卸督篆日期。並將所辦防勦事宜及所部兵勇移交左宗棠接辦。一摺。湘師現以全力進攻富陽。閩省援軍自以嚴防賊由江西抄越後路為急。耆齡業飭飛虎等營移紮廣豐。並令留紮蘭谿之南康各營相機策應。即著左宗棠督飭在防將士實力扼守。其分防義橋聞家堰及駐守處郡各軍。並著左宗棠隨時調遣。毋失事機。順永匪勢蔓延。兵勇屢挫。亟應迅速撲滅。免致燎原。著徐宗幹督飭趙均等各營合力進勦。迅將各股匪徒悉數殲除。毋留後患。臺灣各軍自嘉義解圍後。連破賊營五十餘座。並有擊斃逆首林晟之事。是該處軍威已振。徐宗幹務當督飭吳鴻源等軍乘勝進勦。埽穴

擒渠。至副將曾元福一軍已由泉州酌渡行抵鹿港。即令會同總兵曾玉明迅速進圖彰化。縣城庶分路環攻。可望剋期蕆事。耆齡交卸事竣。即著馳抵福州將軍新任以重職守。將此由五百里各諭令知之。○又諭官文奏藩司患病請假。並催軍援陝各摺片。藩司李桓由湘募勇抵鄂。忽患中風之證。勢難即赴陝南接辦軍務。著照該大臣所請。賞假一箇月。即在湖北省城趕緊調理。俟病體全愈。即行催令起程。陝南軍務萬分喫緊。李桓因病羈留不克前進。該處現有兵勇及各路援軍。亟需知兵大員為之統率。力加整頓。本日據官文奏漢中待援孔殷。已飛催前派援陝之李雲麟一軍。速行馳抵漢南。妥籌勦辦等語。所籌甚屬妥協。郎中李雲麟先後經官文駱秉章等交章保薦。稱其曉暢戎機。堪膺統帥。本日已明降諭旨。將李雲麟以四品京堂候補。漢南在防兵勇並川省援兵均歸節制矣。

李雲麟既膺朝廷簡任當思感激奮興力圖報稱著卽督率所部星速拔隊西行不准片刻遲留到陝時卽將現存兵勇實力整頓駱秉章派往援陝之張由庚朱桂秋所部各軍卽著於抵陝時併歸李雲麟統帶妥為調度並著駱秉章飭令該員等各率所部迅速馳抵漢中不准遲延時日李雲麟於馳抵漢南後所有一切軍情著卽由李雲麟專摺奏聞以期迅速其李桓原帶之楚軍並著官文派員管帶起程交李雲麟帶赴漢南以厚兵力該京堂務當振刷精神一新壁壘迅奏膚公始為不負委任多隆阿勒辦渭河南北兩岸回匪暫難分顧漢中現既飭令李雲麟前往勒辦多隆阿卽可專意勒回兼顧省防瑛榮亦當督飭漢南各軍懍遵約束以備攻勒所有李雲麟統帶各營軍火糧餉並著多隆阿瑛榮設法分撥解濟以期士飽馬騰廓清邊圉將此由六百里各諭令知之○命候補郎

中李雲麟以四品京堂候補辦理陝西漢中勒匪事宜○以江南江甯雨花臺解圍出力賞副將王壽華蕭清世晏玉春張玉珂參將譚國泰主士元陳萬勝湯得上胡海萬吳宗國巴圖魯名號道員胡鏞遊擊劉泰財等花翎千總李星文等藍翎餘加銜升敘有差○復安徽下蔡被戕已革知縣蔡鶚原官予祭葬世職加等○予安徽巢縣陣亡千總彭勝華把總曾彩雲等祭葬世職加等○予浙江甯波陣亡把總張金高等祭葬世職○壬子夏至祭地於方澤遣睿親王仁壽恭代行禮○諭內閣沈葆楨奏訪舉賢士以備採擇一摺江西廣豐縣進士鄭維駒金谿縣舉人徐仗祖廬陵縣廩生王其淦上饒縣候選訓導報捐雙月知府曾守誠據該撫奏稱或才具練達或操守堅定均著飭令來京交吏部帶領引見○又諭

駱秉章奏分別舉劾官員以昭勸懲一摺除摺內保薦各員另行存記外四川試用知府李為幹年輕識淺難期率屬著以府屬知州降補候補知縣辛斌才具太短閤於事理著以教職改補歸部銓選試用知州吳崇福卑鄙無恥行同市儈洪錫純心術巧滑行事貪婪補用知縣李海永性情貪鄙行同無賴候補知縣姜興國才品惡劣任性妄為試用知縣易瀚志趨卑陋操守不潔開復知縣陳紹惠才質陋劣不堪造就均著卽行革職永不敘用儘先補用知縣武訪巖恃才暴戾性情乖張先用知縣曠一清行事草率聲名平常均著勒令休致○諭議政王軍機大臣等都興阿等奏賊擾天長防勦獲勝並水路堵勦李顯發復回六合各摺片吳棠奏勦逆獲勝留船防湖暨宿南軍務駕馭李世忠情形請將尹作賓免遣留營各摺片大股逆匪由來安竄圍天長復糾合捻匪廣聚於天長各路

經都興阿等派兵往勦在金家集等處接仗獲勝其由小河口搶渡之賊亦經吳棠派防水陸兵勇疊次擊退惟逆數眾多兇銳甚熾意在攻撲儀揚竄赴裏下河都興阿等務當督飭將士嚴密設防毋任竄越以期力保完善並著吳棠嚴飭水師將弁力扼小河口等處以固湖防其邵伯等處及下游水師布置防守均尚妥協仍著都興阿等飭令管帶水師各員嚴加防範毋稍疏忽李顯發前赴揚營謁見都興阿等極言並無縱放勇丁情事是李世忠之令該副將赴裏下河查拏游勇其心尚知愧勵現經都興阿等諭令折回六合防守因兵勇餉源無出擬在儀邑泗源溝及瓜洲七濠口地方設立釐卡稍資接濟自係實在情形惟任其設立釐卡必至作威倚勢層層剝削苦累商民然不准其設卡則必須設法撥給月餉若干方免為所藉口著吳棠卽行妥籌酌覈辦理現值粵苗各逆鳴張

李世忠既可激勵使為國家效力。自當妥為駕馭。不可令懷疑貳。吳棠所奏不為無見。該漕督務當加意籠絡。並著都興阿等一律辦理。不宜令生嫌隙。僧格林沁現攻淄川。未能即行南下。所有宿永等處扼勒苗逆事宜。仍著吳棠督飭姚廣武就現有兵力。實力防剿。毋得專待援兵。致滋貽誤。已革遊擊尹作賓打仗奮勇。並隨克孫疇。著有勞績。著准其暫免發往新疆。留於吳棠軍營效力贖罪。仍著吳棠察看。如不能得力。即行起解。毋稍姑息。將此由六百里各諭令知之。○又諭。前因瞻對野番滋事。滿慶恩慶奏派糧員李玉圃統帶漢番官員及番土各兵前往勦辦。當諭飭令該員會合川中委員協力攻剿。乃本日據崇實駱秉章奏藏中所派土兵已到巴塘。甫經入境。即肆搶掠。將火藥局側民房及橋梁並行拆毀。遞送公文塘兵皆被剝衣奪食。又因需索夫馬圍攻巴塘土司住寨。開放槍礮。

傷斃人命。且防剿甚不得力等語。李玉圃本係奏參查辦之員。滿慶等前奏稱其疊著勞績。才堪勝任。並懇破格錄用。乃該員於甫抵川境。即敢縱兵滋擾。肆行搶劫。行同盜賊。是瞻對之患未除。臺站已被騷動。為患曷可勝言。滿慶等於該糧員毫無覺察。乃復捏詞粉飾。欲以勦辦瞻對為詞。派令督帶土兵為冒功掩罪地步。實屬昏憤殊堪痛恨。現在川中軍務未竣。籌餉亦絀。此項土兵一萬三百餘名。防剿既不得力。何得以有限之帑金。供無益之邊費。且恐藉端尋釁。貽誤地方。著滿慶恩慶迅將李玉圃及此項土兵趕緊全數撤回。各歸本境。嚴加約束。儻因循貽患。必惟滿慶等是問。其藏中邊備。並著滿慶等嚴為備禦。不准稍有疏虞。李玉圃本有參案應行查辦。此次復圍攻土司住寨。傷斃人命。豈容任逃法網。著福濟景紋於繞道赴藏後。遵照前奉諭旨。迅將該糧員參案查明。並會同崇實

駱秉章將此次縱兵搶殺各情一併查明嚴行懲辦以肅法紀。至瞻對與裏塘土司構釁本係蠻觸相爭。駱秉章所奏無煩勞師遠涉。惟有派員開導使之斂兵歸巢等語。實為動中竅要。即著駱秉章飭令道員史致康及該處文武各員妥為辦理。務當剴切曉諭使之各釋嫌怨。斂兵歸巢。疏通驛路。方為妥善。如果不遵理論。必須警以兵威。即由駱秉章酌量調派迅圖戡事。以副委任。將此由五百里各諭令知之。○以正黃旗滿洲副都統恩醇署鑲紅旗漢軍副都統。○以浙江平陽勦辦會匪並温州府城解圍出力。賞都司陳登三花翎。知縣劉朝華等藍翎。餘加銜升敘有差。○追予浙江殉難巡撫王有齡於福建福州府原籍建立專祠。○予江南揚州陣亡千總陳龍光等祭葬世職加等。○予江西瀘溪陣亡教諭余俊千祭葬世職。○癸丑諭內閣萬青藜林壽圖奏甄別才不稱職各員。分別參

劾一摺。順天府所屬武清縣知縣石衡三河縣知縣王鍾辦公竭蹶難勝繁劇。均著開缺留於直隸以相當簡缺酌量補用。候補知州金治平才具平庸難膺民社。著以布政司經歷理問降調。候補縣丞徐必麒藉差逗遛任性自便。河西務巡檢謝敬之操守平常。不洽輿論。均著即行革職。以肅官常。○諭議政王軍機大臣等。晏端書黃贊湯奏提臣馳赴高州督勦粵省缺餉擬辦勸捐及廣海寨陽江陽春等處軍情。張敬修現仍患病。丁日昌調往高州等各摺片。廣東信宜縣城被匪陳金缸占踞已閱三年之久。復有那旦匪黨李四等糾眾萬餘與信宜竄出匪股圍攻八甲地方。直撲陽春縣城。其新甯縣之廣海寨及陽江電白等處均有匪擾。而陳金缸一股尤為巨慝。現已蔓延高屬幾徧與粵西潯鬱所屬之岑溪容縣諸匪相連。尤須早為設法勦辦。署廣西提督江忠義一軍本令前赴皖省嗣

因皖省已有道員席寶田等募軍馳往而江忠義所部有已至粵省者。因復諭江忠義毋庸赴皖。徑行入粵。將兩省情形酌度。何處最為緊要。即行相機勦擊。現在崑壽既已督軍馳赴。著即督率卓興方耀等軍奮力進攻。務將信宜賊踞險要迅圖攻奪。克復城池。並與江忠義東西夾擊。痛殄逆氛。蜚家山古隆村逆壘既經官軍平毀。著晏端書黃贊湯飭令吳昌壽督率衛佐邦等速即攻破南塘村。進

逼廣海寨。並飭守備侯勉忠等軍將陽江陽春電白等縣竄擾之匪一併迅速掃除。以免為所牽掣。丁日昌既隨崑壽赴高州。即著毋庸再行赴滬。張敬修舊疾未痊。亦著毋庸帶勇助勦。守備關鎮邦等所帶東莞勇丁務須講明紀律。毋得仍蹈東勇積習。徒滋糜費。省城巡防晏端書黃贊湯與署將軍庫克吉泰等均須認真整飭。一切妥為籌辦。毋稍疏懈。至本省軍餉既經訪有紳士龍元僊等勸辦。

捐輸。以資接濟。著即責成該紳士等秉公覈實。妥為辦理。總期有裨軍食。無病民生。斷不准有不肖紳士涸跡其中。把持侵漁。及藉端擾害等情。致干重咎。粵釐辦理究竟有無起色。仍著懍遵昨旨。速將曾國藩軍餉竭力籌濟。毋稍玩延。將此由六百里各諭令知之。○署兩廣總督晏端書奏粵省同文館現已庀材修築。選擇八旗子弟年幼性慧者二三十人。延西人及內地名師教習。至一切章程容

再悉心覈議。報聞。○山西巡撫英桂奏防兵未撤。請暫緩本年查閱營伍。允之。○古城領隊大臣隆慶因病解職。賞候補四品京堂聯捷頭等侍衛為古城領隊大臣。○以廣東克復西甯縣城出力。免知州文星瑞失守處分。賞守備侯勉忠花翎巡檢劉嵩齡藍翎餘加銜升敘有差。○以廣東廣州拏獲會匪出力。賞參將黃賢彪等花翎餘升敘有差。○甲寅諭議政王軍機大臣等前因江忠義奏起程。

赴粵頭隊計抵桂林。當卽諭令前赴粵省。毋庸赴皖。茲據毛鴻賓奏稱。皖南之賊計圖上竄江西。皖北大股賊匪計欲窺伺英霍。分擾鄂境。情形萬分喫緊。江忠義由醴陵入江。程途較近。江忠義奏籌度緩急情形。請仍遵前旨就近援江。各一摺。江忠義一軍無論援粵援皖。均期於軍事有濟。現在江忠義疊經曾國藩等函咨。催令入江。所部陳鳴志等各營已先後可抵醴陵。是其赴江程途較近於赴粵。卽著江忠義先其所急。迅率所部各營望江西進發。毋再中道徘徊。致誤戎機。入江後卽督飭席寶田等軍會同皖省之兵覘賊所向。迎頭截剿。保全江省完善之區。廣東陳金缸股匪尚未殲除。崑壽帶兵往剿。未知能否迅速蕆事。江忠義肅清江西之後。察看皖省如可無須增兵。而廣東軍情尚緊。卽照該署提督所擬。由贛州便道赴粵。相機勦辦。未為不可。江忠義既已入江。所有援皖之軍毛鴻

賓卽可暫緩添調。惟廣東陳金缸股匪蔓延日久。若與潯郡勾結。必為兩粵巨患。崑壽雖已出省會卓興等軍勦辦。而兵力尚不甚厚。恐尚未知江忠義不能赴粵。須待此軍援勦著毛鴻賓迅將江忠義不能赴粵情形咨會晏端書黃贊湯俾得就有兵力迅速勦辦。將此由六百里各諭令知之。○引見新科進士得旨。一甲進士三名翁曾源龔承鈞張之洞業經授職外。周蘭夏子錫龔顯曾陳翼廖壽恆光炘。邊寶泉楊仲愈黃體芳羅振雲。何繼儼王緒曾解煜。許振祿王炳張相宇郭懷仁曹煒呂式棟周為翰梅啟熙鐵祺蔣維垣鄒振岳鄂芳周聲澍宗室奎潤李端棻高學瀛張鵬翼李嘉樂尹琳基陳錦張懷恩劉燁馮爾昌陸爾熙王緯樓譽普沈寶枏劉曾宗室承福彭君毅劉子鏡雲茂濟陳振瀛景善張觀準文澂鄭夢錦黃桂丹黃紹薪張道淵蕭世本湯獻祥夏裕綸俱著改為翰林院庶

吉士。莊子楨朱庚。胡隆洵。胡有誠。王椿蔭。曾國霖。何文涵。白桓。黃基。吳宣璣。李萃。吉裴。蔭森。高梧。方恭。銘李端。遇李時乾。郝榮銜。劉錫金。凌卿雲。柳懷珍。胡清瑞。王炳燿。王毓藻。胡日宣。全士錡。湯肇熙。覺羅英桂。徐芝。塗蘇紱。延茂。廖鏡明。高錫疇。譚定澍。達嵩。阿。周信之。張元一。俱著分部學習。王寶善。黃謀烈。牟樹棠。饒世貞。周友檀。王允善。俱著以內閣中書用。陳樹勳。劉嘉幹。張攀桂。祁德昌。王冕。南裴。

峻德。王文榮。王鴻飛。容鶴齡。陳鳳翥。邊崇瑄。符兆鵬。張薇。楊鈞培。劉仲麓。鄭孝銘。宋家蒸。守忠。李辰輝。顏榮階。許煥方。汪夏聲。律景瑞。盛一林。譚子中。柯掄。孫雲。劉鍾麟。韓耀光。胡景辰。陳榮洙。楊郊。張旭熾。婁光。李銘。霍文瀚。卓誠。汪彥增。張瑞麟。楊正觀。周杰。松齡。歐陽燾。王家麟。姜桐岡。王槐三。蔣山。張理澄。丁鳳年。周紹達。劉福田。海煥。邢守道。羅重熙。朱景星。蕭書。蔡鍾伊。允楨。馮學培。靳先登。馬騰駿。

趙國華。王懋昭。袁允治。劉大壯。姚暹。張丙。炳常。忠。程仰周。邱銘勳。朱昌言。張蕙。團。梁士鶴。章光斗。孔廣謨。毛立之。彭九齡。李仲鸞。俱著交吏部掣籤。分發各省。以知縣即用。戶部候補員外郎。余培軒。著以員外郎即用。戶部候補主事。吳廷芬。王景賢。魏璧文。刑部候補主事。王培仁。何玉福。工部候補主事。高臚。璟。俱著以主事即用。工部學習郎中。伍錫釗。刑部學習郎中。李璵。著俟報滿作為候補郎中。後

以該部郎中。即補兵部學習員外郎。董韞琦。著俟報滿作為候補員外郎。後以該部員外郎。即補兵部額外主事。梁欽辰。著俟報滿作為候補主事。後以該部主事。即補除引見未到之中元。方朝覲。二名。應由該部照例辦理。外餘著歸班銓選。○命翰林院修撰徐郟。編修歐陽保。極在南書房行走。○乙卯。以神靈顯應。加湖南瀏陽縣溫康孟神封號。曰惠孚。○諭內閣。都察院左都御史載齡。奏特參庸

劣不職之科道請分別勒休辦理等語給事中鳳寶老悖昏庸形同木偶惟尚無劣蹟著卽勒令休致御史許其光挹持京畿道事務於尋常案件任意延閣卽特旨交辦之案經該堂官等屢向催問仍復一味枝梧御史慶保聲名平常亦難勝任均著回原衙門行走御史福珠隆阿不知自愛有玷官箴著卽革職都察院職司風憲各科道有稽察糾彈之責必須學問優長人品端正方能無忝厥職嗣後該堂官遇有似此不能稱職之員卽行隨時叅劾毋稍姑容其有平日辦事勤奮品行端謹遇事敢言有裨國計者該堂官亦當酌量保薦以收得人之效至京察年分列考仍遵照前奉諭旨不必拘定成案以抑奔競而肅臺規○又諭前因張之萬奏河南鎮平縣知縣戴錫福摘頂處分業於同治元年七月間奉旨開復請仍與伊陽縣知縣謝金誥對調當以戴錫福處分既經開復吏部斷無

不知何以率行奏駁降旨令該部查明具奏茲據奏稱上年七月間閣鈔到司該司員漏未移付並無別項情弊請交都察院嚴議等語吏部對調知縣向係文選司移付考功司查明有無事故分別准駁此案戴錫福開復頂帶係奉旨發鈔之件該司員漏未行文亦未移付註冊及上年十二月間文選司移付考功司查問戴錫福有無事故該司員復不查明率以戴錫福尚未開復處分付覆實非尋常疏忽可比所有經手遺漏之司員著查取職名交都察院嚴加議處各該部院衙門分設各司以專責成遇有應行知會之處理宜確切查明隨時知照乃近來該司員等因循疲玩相習成風於應辦事件漫不經心毫無稽覈以致書吏夤緣為奸藉滋蒙混需索苟有不遂雖以明奉諭旨之件輒敢任意藏匿迨公事辦理兩歧始藉口遺漏以巧自掩飾殊堪痛恨嗣後各部院堂官務須督飭司

員振刷精神。力除積習。稽察書吏。嚴定章程。僅仍有遇事延閣諸弊。即將經手司員嚴叅。並將承辦書吏嚴懲不貸。以清積弊。○以正紅旗漢軍副都統增慶暫署鑲白旗滿洲副都統。

清實錄

卷六十六

大清穆宗繼天開運受中居正保大定功聖智誠孝信敏恭寬毅皇帝實錄卷之六十六

清實錄 同治二年五月中

大清穆宗繼天開運受中居正保大定功聖智誠孝信敏恭寬毅皇帝實錄卷之六十七

教修

同治二年癸亥五月丁巳諭內閣前因浙江

湖州府城失陷守城之在籍道員趙景賢尚無下落當經降旨令曾國藩左宗棠李鴻章查明具奏茲據奏稱趙景賢誓守湖郡血戰三年並分兵四出恢復遠近堅城賊匪畏而不敢與戰以大股合圍斷其運道至五閱月糧盡援絕城陷後該道抽刀自砍被賊奪阻執至蘇郡多方誘脅該員百折不回至本年三月間罵賊不已被賊槍傷殞命戮其死事顛末洵屬皎然不欺其志無愧完人請照布

政使陣亡例議卹賜諡建祠並將事蹟隨摺咨送軍機處。懇付史館立傳等語。趙景賢係湖州在籍紳士。並無守土之責。集團禦侮。每戰必捷。迨至孤城困守。糧餉軍火俱盡。仍復堅持數月。力竭被擒。經賊匪誘脅百端。矢志不移。卒以身殉。勁節孤忠。實屬可嘉。可憫。布政使銜福建督糧道趙景賢著改為照巡撫陣亡例從優議卹。並加恩予諡。准其於湖州地方建立專祠。其業經議卹之趙景賢長子

趙深彥著一併附祀。所有該員事蹟節略著宣付國史館予立特傳。以彰忠藎。其子趙濱彥。趙潤彥。趙滋彥。趙溱彥。趙洙彥。均著俟及歲時交吏部帶領引見。尋予祭葬。世職。諡忠節。○又諭張亮基奏請將庸劣不職各員分別革職勒休降調一摺。貴州候補道魯經芳。鑽刺夤緣。蒙混保舉。候補同知馬彥。詔諛逢迎。均著勒令休致。思州府知府署理正安州知州李咸中。貪酷債事。幾釀大變。署思州府

知府候補同知繆煒。公事廢弛。聲名狼藉。清江通判陳鑄。貪劣不職。民怨沸騰。署都勻縣知縣段日昇。不洽輿情。難膺民社。候補知縣梁立山。性情浮躁。候補知縣劉毓林。品行卑污。署安化縣知縣張致裊。行止有虧。均著卽行革職。候補同知恩彬。官聲平常。著降為州同。候補知縣魯祖康。輿論不服。著降為縣丞。均歸部銓選。署清平縣知縣石璵。濫領公項。品行不端。候補知縣吳泰。交操守平常。經手捐項帳目無著。均著暫行革職。勒限嚴追。訊明後再行請旨。○諭議政王軍機大臣等。僧格林沁奏進攻溜川。勦辦鄒縣教匪。獲勝生擒劉雙印。及查探蒙城軍務。並懇將傅振邦留營等摺。片。又閭敬銘奏遵派大員辦理東昌按捕安撫事宜。及懇留王繼庭。曾逢年各摺。片。溜川督攻未下山。東省各軍兵少勇多。不諳紀律。積習殊堪痛恨。卽著僧格林沁嚴加督飭。期與各營官兵奮力進攻。迅速蕆事。

鄒縣教匪經各路官軍扼紮進剿東西兩路均獲勝仗並將匪首劉雙印生擒辦理尚為得手黃國瑞勇往向前實堪嘉尚仍著僧格林沁督飭該總兵探明路徑與舒通額等聯絡聲勢迅速進攻務將白蓮池鳳凰山賊巢攻破痛殄逆氛劉雙印罪大惡極屢降屢叛自應明正典刑惟既據僧格林沁奏稱該匪首自供情願暗招匪黨作為內應如果於事有益自可暫緩其死即飭黃國瑞及滕縣地方官責令趕緊設法妥為辦理如該大臣前在蒙亳所辦甚合機宜若僅係該匪首暫求免死之計其言未必的實即著將劉雙印軍前梟戮以快人心而作士氣宋景詩不軌情形亟宜早為撲滅朝廷早有所聞茲據僧格林沁所奏實難再事羈縻以致養癰成患現在直東各匪既已勦撫兼施漸就平定著劉長佑乘此聲威派撥官兵迅即知會恆齡蘇克金等軍定期會合將宋景詩股匪實力進

剿蘇克金由河間一路進兵自可兼顧北路之防其直東毗連各境應即如何嚴密設防毋任奔突著劉長佑妥籌布置毋稍疏忽如該督接奉前諭能將宋景詩等設法擒誅不煩兵力更為妥善仍須將其死黨痛加勦洗脅從之眾妥為解散以清遺孽直東地方漸就清理計其時亦近秋涼僧格林沁即可返旆南征苗逆巨患未除唐訓方等兵力甚單餉糈尤為奇絀僧格林沁前由皖省北行既已撥給唐訓方餉銀萬兩將蒙城亳州糧食撥給馬新貽以資食用茲復將歸德存糧撥給又恐皖省團練降眾備糧自效未能久持行令河南省於應解該大臣軍餉內撥銀一萬兩解赴蒙城交馬新貽激勵降眾實力防剿以待統兵南下實屬公忠體國大局通籌不遺餘力翼長舒通額等在九女關追剿張守義等竄匪馬賊數百名竄回宿州薙髮反正是否可靠嚴飭總兵姚廣武及該地方官

悉心體察毋稍疏懈。閻敬銘所派署臬司呼震與總兵保德辦理東昌按捕安撫各事宜。卽著嚴飭該員等認真辦理。僧格林沁及閻敬銘所請留營之提督傅振邦降調知府王繼庭均著准其留營差遣。曾逢年著准其帶印在營。俟克溜川後再將登州鎮印交李懋元接受任事。將此由六百里各諭令知之。○又諭僧格林沁奏蒙城餉缺現咨河南巡撫撥給軍餉等語。苗逆倡亂長淮肆行煽惑而該降勇團練等均能備糧自效甚屬可嘉。惟此項勇糧若竟日久由投誠各圩攤派殊不足以示體恤而安降勇之心。且恐日久力有未逮。一經煽誘難保不復形反側。著唐訓方飭令馬新貽等體察情形相機辦理。其蒙城戰守事宜務當加意防勦。一俟僧格林沁大軍南下卽可收併力夾擊之效。此次僧格林沁所撥蒙城餉銀實為顧全大局遇事求濟卽著張之萬於豫省應解該大臣軍餉內趕

緊撥給銀一萬兩派員解赴蒙城交馬新貽收放以濟急需。該撫務當迅籌現款剋日委解毋得稍分畛域。將此由六百里各諭令知之。○又諭李鴻章奏攻克江陰縣屬之楊庫汛城一摺。楊庫一城為南岸要隘現經水陸官軍攻克其南潯北潯西塘市踞逆均遁回無錫常州等處從此進取江陰當可漸次得手。著李鴻章督飭水陸各軍步步進逼規取江陰以收破竹之勢。江陰既克以後卽須派撥重兵扼紮聯絡通泰靖江聲勢為進取無錫常州之計。蘇常逆勢日形窮蹙或鋌而走險圖犯他處或暗設詭計撓我軍威均在意中。李鴻章務當慎益加慎戰守兼籌毋得稍有疏失致為該逆所乘。其渡江北竄之路尤須妥為兼顧毋令該逆得以偷渡教習炸礮之法國人畢乃爾呂加該撫所請酌給三四品頂帶之處是否願隸版圖卽著妥為辦理。御史丁紹周奏蘇省紳民捐輸未盡給獎請

飭催迅速查明具奏。並按照奏定章程。將各府廳州縣應廣學額。查覈捐數。請旨辦理等語。著李鴻章會同曾國藩吳棠。飭屬詳細查明分別辦理。原摺著鈔給閱看。將此由六百里諭令知之。○又諭張亮基奏擊退髮逆。獲勝古州廳城失守。請簡貴州提督。遵覆龔自閔。辦事情形各摺片。髮逆由清水塘竄擾仁懷縣屬之魯班場。遵義縣屬之松林高坪等處。經總兵沈宏富擊敗。餘匪竄往綏陽縣之望巢地方。其竄木烈鋪另股。亦經總兵李有恆等於栗樹坪等處堵擊。賊由瓢兒井逃竄出境。仍著勞崇光張亮基。飭令該總兵等乘勝跟蹤追剿。務殲醜類。毋任紛竄。此次張亮基摺內所稱清水塘木烈鋪等處。究係何縣所屬。其由瓢兒井逃竄出境之賊。究係出竄何境。此係何股賊匪。來自何處。為首者何人。聲敘殊未明晰。仍著張亮基查明覆奏。嗣後奏報軍情。於各州縣所屬地方。務當指陳明

確。毋得草率含混。古州廳城被賊匪余老科等占踞。該處究竟有無黔省兵勇駐紮。何以猝被失陷。著勞崇光張亮基迅速調派兵練相機進剿。該處距貴州省城較遠。並著毛鴻賓飛飭駐防玉屏清谿之周洪印等軍就近援剿。與黔軍夾擊。毋得稍分畛域。其該城文武下落。卽著張亮基查明具奏。貴州提督一缺。該署撫力難兼顧。亦係實情。著於該省鎮將大員內擇其平素帶兵得力者酌保數員。候旨簡放。其韓超前奏龔自閔固執偏見等情。既經該署撫查明並無不合。仍著飭令該臬司隨事認真。毋蹈愆尤。致干咎戾。將此由六百里各諭令知之。尋張亮基奏清水塘係遵義縣屬木烈鋪係大定府屬石逆部下賊目李藍自雲南境竄威甯州擊敗後由木烈鋪瓢兒井竄四川與石逆合一。賊目李宰甫敗竄綏陽經婺川官兵擊退亦竄四川黔邊肅清報聞。○又諭景綸等奏俄酋背約強搶

罪犯並欲入三姓城交易一摺黑背餘匪崔幅得等逃至赫哲抓吉地方經佐領春福派兵拏獲並帶領赫哲尋至圖勒密搜獲逸犯徐泳解至卡所訊究突有俄官西拉米起率眾持械將徐泳等二犯搶去該佐領按照條約向俄酋辯論令將該二犯送交中國治罪並經富尼揚阿備文照會該酋堅執不從必欲待伊國大臣來至伯哩再為定奪此案佐領春福於越界按捕逸匪時未經備文豫行知照俄國固屬疏漏而俄人之恃強剽奪實屬背約至該酋所稱固畢爾那托爾欲駕火輪船三隻進松花江駛赴三姓與中國大員商辦事件等語其心尤屬叵測該佐領告以應照和約備文交卡官轉送不應俄國大臣親往該酋未理而散俄人恃強要挾得步進步是其慣技本日已諭令總理各國事務衙門向該國駐京公使理諭令其轉行固畢爾那托爾將逃犯崔幅得等送交中國並將駕

船駛赴三姓之行阻止惟俄人詭詐性成難保不陽奉陰違前據特普欽奏稱俄酋曾抵齊齊哈爾城投文要求假道前往吉林自松花江水路回國經該將軍按照條約指駁語塞而止現復欲由黑河口駛抵三姓其垂涎松花江之意始終不已仍著景綸特普欽斟酌機宜隨時設法防範如有俄人船隻由黑河口向松花江前駛卽於所屬地方節節攔阻並援照和約嚴詞拒止毋令任意駛行逸犯崔幅得等仍著景綸知會富尼揚阿備文催索毋任俄人藉詞延宕將此由五百里各諭令知之○江蘇巡撫李鴻章等奏防剿喫緊請將本年秋審暫緩辦理從之○以辦事勤奮復湖南代理按察使降調道員陸傳應職○以江蘇攻克江陰楊庫汛城賞都司唐殿魁巴圖魯名號餘升敘有差○以陝西攻克王閣村匪巢出力賞委營總雙福副都統銜佐領達凌阿勝全和成富克津佈鐵清穆

騰額委參領阿克當阿烏吉佈參將馬騰雲
劉洪貴胡定坤謝洪泰陳道念朱廷顯遊擊
舒占標朱爾東李文喜巴圖魯名號委參領
德喜知州張維訓等花翎守備李學海等藍
翎餘加銜升敘有差○撥武備院戰弓一千
張解往欽差大臣僧格林沁軍營備用○戊
午

上復詣

大高殿祈雨壇行禮○遣恭親王奕訢恭祀

天神壇惇親王奕誼恭祀

地祇壇睿親王仁壽恭祀

太歲壇惠親王綿愉詣

時應宮鍾郡王奕詒詣

昭顯廟孚郡王奕譞詣

宣仁廟順承郡王慶恩詣

凝和廟肅親王華豐詣

覺生寺豫親王義道詣

黑龍潭科爾沁鎮國公棍楚克林沁詣密雲

縣

白龍潭拈香○遣官祭

關帝廟○諭議政王軍機大臣等多隆阿奏
遵旨派援鳳翔並分路進兵情形及曹克忠
疏通西安糧道各摺片多隆阿既派兵分紮
渭河以南造船運送糧食一俟兵至臨潼卽
與省城通氣是省城已可無虞馬德昭既經
派援鳳翔卽著瑛棨懍遵前旨剋日添足三
千人交該提督帶赴鳳翔督同王夢麟認真
勦辦迅解城圍不准再行藉詞截留致滋貽
誤曹克忠既經行抵西安帶兵出省連獲勝
仗長安鄠縣等處糧運漸通卽可飭令移營
三橋以通咸陽一帶道路瑛棨亦當派兵協
勦近省零星回匪紮營城外與曹克忠聲勢
聯絡毋得株守城垣仍前畏蕙並將該省應
辦事件次第辦理渭南等處已無賊蹤何以
渭南並無地方官在彼經多隆阿催調尚未
見到著瑛棨查明嚴催赴任毋任逗遛取巧

金順等業經記名副都統遇有缺出即可簡放。惟各路軍營保舉出力人員甚多，亦須俟有缺出始能陸續酌量簡放。該將軍惟當督飭各員認真出力，如勞績卓著，朝廷自有見聞，定當儘先簡授也。本日據熙麟奏賊圍平涼已逾數旬，而救兵不來，城圍未解，刻下多隆阿屢獲大捷，逃來白吉銅城之賊數逾巨萬，焚掠搶殺慘不可言，非迅調勁旅不可。甯州地方亦有賊蹤肆擾，請速派援等語。甘肅兵力單薄，且無得力之將。多隆阿務須分兵兼顧，嚴催馬德昭統兵迅解鳳翔之圍，仍卽趕緊馳赴慶陽，會商熙麟次第勦辦，以紓朝廷西顧之憂。多隆阿身為統率，自當全局通籌，不可稍分畛域。正在寄諭間，據官文等奏李雲麟丁憂請賞假兩箇月，回旗穿孝，業經降旨允准，並已諭令駱秉章迅飭張由庚督兵赴陝南，暫行節制各營。俟李雲麟假滿後，仍令前往視師。惟該員抵陝尚需時日，張由

庚能否勝統率之任，尚未可知。該處軍務緊要，仍著多隆阿、瑛棨隨時兼顧，並與駱秉章會商妥辦。毋使稍有疏失。將此由六百里各諭令知之。○又諭官文等奏李雲麟在營聞訃丁憂一摺。陝南軍務孔亟，李雲麟已有援陝之命，恐漢中軍士聞信後毛震壽呼應一切不靈，而陝南賊勢猖獗，西望不勝焦急。前據駱秉章奏檄調張由庚、朱桂秋等軍馳援漢郡，計期應抵陝境。所有漢南各營卽著駱秉章傳諭張由庚暫行統率，迅埽逆氛。俟李雲麟假滿抵陝後，仍歸該京堂節制，以一事權。梁作楫業已拔營前進，卽著官文嚴樹森迅飭扼守興安，並會合張由庚等軍籌商進取。毋得專待李雲麟，致令事機鬆懈。李雲麟部勇旣據官文飭令歐陽正墉權為兼統，卽著責成該道員就近妥為彈壓。毋令在外滋事。前因李桓患病請假調理，諭令將該藩司所募勇丁交李雲麟帶赴漢中勦賊。現在李

雲麟回鄂尚需時。此項勇下自應暫緩前進。如李桓病已痊愈。卽仍著該藩司督率所部星馳赴陝。並著該大臣酌量妥籌辦理。將此由六百里各諭令知之。○又諭。熙麟奏進剿平涼及甯州接仗獲勝。並統籌陝甘軍務。全局各一摺。平涼回匪屢撲官軍營盤。經遊擊馬天祥等督兵擊退。其甯州賊匪亦經知州宋來賓守備馬天祿等迎剿勝。惟平涼尚未解圍。而白吉銅城各賊黨悍黨日增。我兵數不滿千。實形單薄。著熙麟督飭馬天祥等就現有兵力實力防剿。毋稍疏虞。仍一面迅催各路援兵星夜來慶。立解平涼之圍。所陳甘省賊多兵少勢極急迫。自係實在情形。惟多隆阿係督辦陝甘軍務。該處剿匪正在得手。萬難分兵赴甘。且東路剿回大勝。則敗匪勢必西遁。白吉銅城等處增賊逾萬。此亦情勢所必至。非多隆阿有意驅逼。以鄰為壑也。該督身任兼圻。惟當力為其難。不得以時

局艱危遽思委卸。至馬德昭一軍多隆阿現令帶兵三千援救鳳翔。僅能迅解圍。不但可保鳳郡。且可遏賊西竄之路。馬德昭於解鳳翔城圍後移兵赴甘。先聲所懾。必於甘省軍事有裨。前已疊諭多隆阿迅飭馬德昭統兵援鳳。並令瑛榮毋得再事攀留。本日又經諭令多隆阿妥籌兼顧。毋置甘省於不問。熙麟當思和衷共濟之義。毋以小嫌而誤大局。方為不負委任。將此由六百里諭令知之。○

貴州布政使海瑛因病解職。以按察使龔自閔為布政使。前任湖北按察使裕麟為貴州按察使。○以記名總兵官趙既發為陝西漢中鎮總兵官。○辦理漢中軍務候補四品京堂李雲麟丁憂。賞假兩箇月。回旗治喪。○己未諭議政王軍機大臣等。張之萬奏河南亟需馬隊。請酌撥以利進剿一摺。據稱由楚竄皖之捻。勾結髮逆。眾逾二萬。已紛紛回竄豫省。勝負實無把握。請飭僧格林沁劉長佑將

現留三省馬隊酌撥四五百名來豫各等語所奏尚屬實在情形。僧格林沁督師東省馬隊本不敷分撥。恆齡蘇克金亦各帶所部到直。更以分而見單。何能輕議抽調。惟河南軍情正在喫緊。聞毫捻又紛紛裝旗竊恐仍竄豫境。光固一帶。捻蹤廣至。若無得力馬隊追剿。兇擊勢必任令長驅。日益蔓延。為患誠非淺鮮。直省現就肅清。有恆齡等所部馬隊已足防剿之用。成保薩薩布所統京營馬隊尚稱精壯。惟未久經戰陣。以致不能即成勁旅。此項京兵素為僧格林沁所深悉。若隸該大臣軍營。俾得歷練行陣。學習營規。足備折衝之選。即著劉長佑審度情形。將成保等所部馬隊酌撥數百。馳赴山東。以便僧格林沁於得力馬隊內抽調數百名。派員統帶發往河南。交張之萬調遣。如此一轉移間。於直東兩軍尚無妨礙。而於豫省大有裨益。該大臣等素能不分畛域。即著通籌大局。會商辦理。張

之萬原摺均著鈔給閱看。將此由六百里各諭令知之。○又諭張之萬毛昶熙奏歸陳現無警報。擬合兵圍攻張岡。及賊匪竄擾光固情形。逃將盧得勝請嚴拏發遣各摺。片張岡踞賊甚悍。現在既已合圍。即著張之萬等嚴督各將弁合力攻克。務將兇悍死黨悉數殲除。毋任突圍。他竄歸陳等處防務。即可知照。袁甲三袁保恆督同該鎮道等妥為經理。儻有警信。再行酌量移紮。毋稍疏忽。捻匪由光固邊境竄至林家寨。過河西。擾該匪行蹤飄忽。非回竄蒙亳。即圖擾宛汝。張之萬已派副將孫之友率領馬步馳往光息一帶。即著飭令確探賊蹤所向。與劉鴻增一軍會合堵剿。毋令竄擾完善地方。與苗黨勾合。是為至要。已革副將盧得勝本係奉旨查辦之員。經余際昌暫留帶隊。茲復因主將失利。匿跡遠颺。實屬目無法紀。該撫等請發往新疆。殊覺輕縱。著即飛咨湖北督撫一體嚴拏。務獲即行。

正法以肅軍律將此由六百里各諭令知之
○又諭沈葆楨奏官軍進剿包家墩竄逆獲
勝情形並鄱陽彭澤等縣境兵練協力防剿
各摺片逆匪圖擾江境進踞包家墩經王沐
督勇進剿獲勝賊敗竄嶺外洵足以大挫兇
鋒惟該逆紛至沓來刻思上竄該撫奏稱劉
典拔隊來援不日可入饒境著卽檄飭各營
將弁悉聽劉典調度剋期廓清鄱境次第由
都昌湖口節節掃蕩期與曾國藩派出之李
榕一軍前後夾攻俾該逆竄遁無路自不難
一鼓殲除江忠義計期應抵江境著沈葆楨
飛催前進會同席寶田援師齊抵饒防以厚
兵力毋任遷延貽誤沈葆楨另片奏永甯永
新龍泉等縣地方會匪勾結約期舉事經地
方文武員弁先後拏獲匪首王敬谷等正法
惟據稱四月初三日有匪徒二百餘人突至
永甯縣城下雖經孫文銘等督勇追拏而獲
犯無幾難保不潛匿山谷乘間再逞著沈葆

楨嚴飭該地方官迅速按捕務淨根株毋稍
姑息至貽後患又另片奏法國教士羅安當
由皖來江經南昌府知府許本壩於城內置
備公館以便教士進城謁見而居民總不聽
從止得派役先於船上豫備卽有無數百姓
將該役頭面擲傷該役向教士投訴教士遂
將船下駛等語教士遵照和約來江若藉傳
教為名陰有不法及挾制官長欺壓百姓該
居民抱憤不平亦應稟明地方官辦理此次
羅安當船隻甫經抵省尚未進城與該省居
民並無嫌隙何以不遵地方官約束竟將辦
差丁役擲石打傷似此無端尋釁該教士豈
能相安無事勢必來京曉瀆該撫現在訪拏
滋事為首之人著卽嚴飭該府縣認真查拏
從重懲治毋稍輕縱該教士如再來省務須
曉諭居民並豫加防範不可再有此事至該
教士回潯後作何計議並著據實奏聞將此
由六百里諭令知之○又諭明誼奏接據廣

鳳咨稱科布多地方另有俄人四十餘名騎馬持械來至昌吉斯台卡倫經該卡官兵攔阻俄人逞強毆打搶去馬匹什物並將台吉兵等拘去隨即放回俄人現亦不知去向等語俄人詭詐性成因上年會勘界址未遂所欲輒為此鬼蜮伎倆以冀別啟釁端可肆要挾明誼擬令蒙古等部落同心禦侮稍遏其貪狡之心固屬釜底抽薪之法惟俄人來去無常來既難於豫制去又無處窮追各游牧蒙古等畏其強橫未必即能與之相抗即如此次俄人來者人數並不甚衆而蒙古卡兵竟被拘去十三人之多是其明證可見同心禦侮之策亦不過徒託空言萬不足恃明誼惟當督飭在事員弁實力防範仍一面行文知照該國西悉畢爾衙門以理詰問務令約束該國人等確遵條約靜候會議界址毋再如此無理滋鬧方是正辦至俄國在京公使已諭令總理衙門與之理論第相隔萬里該

公使每以另有所派分界之人主持一切顯係藉詞推諉除仍諭令總理各國事務衙門與之剖辯惟明誼身膺邊疆重寄總當力為其難妥籌辦理方為不負委任明誼另片奏遵查沙賓達巴哈地方木房二間實係蒙古所蓋惟科布多之吹河北岸有木房六間係道光十一年間俄人建立又在南岸蓋有木房三十一間為該國商人居住等語沙賓達巴哈地方木房既據總管興達遜等稱非俄人建造並具結存案即著責成該總管等妥為防範毋稍疏虞至吹河地方已越布魯特之界俄人既在此處搭造房屋難保不生吞并該蒙古之心不可不豫為地步以杜詭謀該處房間既係道光十一年所造當時因何准其至此貿易有無奏過成案並著明誼查明詳晰具奏毋得含混了事將此諭令知之○庚申諭內閣鑲黃旗滿洲奏已革副都統銜侍衛祥恩之母呈訴孤苦無依籲懇恩施

以資養贍請旨辦理一摺據稱祥恩前經革職查抄發往軍臺效力惟伊母已故理藩院尚書吉倫泰之妻年逾七十雙目失明止此一子子婦已故並無孫男孫女棲身無地度活綦難可否將抄產賞還少許藉資周濟等語已革侍衛祥恩世受國恩不知謹慎當差力圖報效乃在勝保軍營任性妄為肆行無忌甚至於查起勝保寄頓之委員亦膽敢恃強毆打倚勢作威目無法紀實屬孽由自作罪無可逭惟伊母以殘瞽餘生衣食無資覽其哀訴各情實堪矜憫所有祥恩抄產應如何量為賞還伊母之處著總管內務府大臣酌擬具奏尋奏查抄祥恩衣物業交崇文門變價擬將原抄房屋七十九間地畝三頃請賞還祥恩之母以資養贍從之○又諭唐訓方奏安徽署東流縣知縣候補知縣唐訓高係伊堂弟例應迴避因該員隨同辦理營務已歷五年情形熟習人地相宜現當臨淮軍

務喫緊據實請旨等語唐訓高著准其仍留安徽以知縣補用毋庸迴避○諭議政王軍機大臣等唐訓方奏捻苗各匪勾結蔓延蒙軍四面受敵情形危殆一摺都興阿等奏江防堵剿疊勝嚴防情形並賊匪偽扮難民渡江及停止北鹽南運各摺片渦河南北徧地賊氛糧艘被劫蒙亳聲息不通城中現糧僅數五日萬難久持僧格林沁前派佐領訥木津守備桂錫楨等馬隊追剿山東竄捻已到宿州現經唐訓方飭令會同英翰梭巡龍山雉河一帶而蒙亳宿永處處伏莽兵力較單實有兼顧不遑之勢現在蒙城情形危迫萬分設被苗逆占踞則兗饒愈張非獨皖北地方為賊吞噬即豫東兩省亦將被賊肆擾大局何堪設想以目下南北情形而論皖北軍務較之東省緊急百倍僧格林沁一軍為淄川一隅牽掣未能親督兵勇即時南下亦須分撥一旅迅速赴援以期顧全大局並著於

恆齡蘇克金二人中酌派一人統兵前往以資得力。昨因張之萬請撥馬隊赴豫勦擒。當經諭令僧格林沁酌派數百名前往。此時如援皖兵力不敷調遣。卽著將派往豫省馬隊先行移撥皖省。並由該大臣添撥若干派令前往援救蒙城。毋稍遲延。如前撥之馬隊數百名先已到豫。張之萬不得藉詞截留。以期移緩就急。丁寶楨一軍如尚未入東境。卽著唐訓方張之萬等仍遵前旨沿途截留移援蒙城。如業已行抵山東。則東省得此一軍。僧格林沁之兵更可派撥援皖。並著張之萬毛昶熙於歸郡汝甯一帶先期布置。嚴密設防。以備匪黨紛竄。陳州一帶卽責成袁甲三督飭袁保恆聯絡紳團豫籌防剿。張之萬撥解臨淮之餉銀一萬兩。務當嚴飭委員迅速解到。不許稍延時日。蒙城及臨淮軍營糧食垂盡。唐訓方與勇丁已同食豆粥。情形危迫如此。豈容束手坐視。現惟豫省相距較近。臨淮

蒙城水路亦惟陳郡可通。袁甲三素顧大局。著卽在陳郡設法勸捐。無論穀米雜糧。總以迅集成數。卽由水路運赴臨淮蒙城兩處。以救倒懸。該前督無論如何為難。均著設法迅速籌辦。斷不可以不在其位不謀其政為詞。置之膜外。宿州與臨淮消息尚有一綫可通。總兵姚廣武現住該處。著吳棠卽嚴飭該總兵迅速進援蒙城。不准擁兵觀望。並分兵兼顧靈璧。毋令苗捻各匪阻絕臨淮運道。如兵力不敷。卽著吳棠添兵速行往援。並設法解運糧餉濟急。力顧大局。成大吉一軍現駐麻城。距蒙城較近。此時大股逆匪東竄天六鄂省邊防已鬆。卽著曾國藩官文嚴樹森飭令成大吉星夜兼程移軍馳援蒙城。官文等不許執意奏留懷遠踞賊。卽著唐訓方激勵諸軍迅速攻克壽州圍城賊匪。著曾國藩唐訓方飭令蔣凝學毛有銘兩軍力加勦洗。所調清江戈船著吳棠趕緊督飭前往廬郡一帶。

現無賊蹤。曾國藩營兵力有餘。若能抽撥一軍馳抵潁上。直搗苗逆老巢。則蒙城之賊勢必回顧。或可解城圍之急。此時皖南賊勢已鬆。卽著曾國藩妥籌迅速辦理。李續宜假期將滿。皖北時勢萬緊。著卽迅速起程馳往該處督辦軍務。毋再稽遲。唐訓方摺著鈔給僧格林沁閱看。金家集一帶陸路之賊已有回竄浦口九洑洲之意。著都興阿等督飭水陸諸軍嚴密防範。毋令東竄揚城。其盱眙一帶築壘之賊及攻撲天長各賊。均經黃開榜等水陸會剿。疊次獲勝。並解天長西北兩門重圍。仍著都興阿等會同吳棠督軍力埽賊氛。毋任紛竄。至江陰賊匪屢有扮作難民渡江北擾之說。都興阿等現飭水陸防兵一體嚴查。並密查賊首黃姓務獲。所辦甚是。逆匪窺伺裏下河。已非一日。現當江防喫緊。豈得任令南岸奸民紛紛北渡。且賊踞江南已久。該難民前既相安。何以此時忽欲北渡。江陰令

沈方煦遽請吳棠准令渡江。該漕督不加查察。且咨行都興阿等。令水師不得攔阻。市小惠而忘大害。何竟憤憤至此。著卽嚴飭北岸地方官認真盤察。並將續來難民一體禁渡。儻漫不經心。致令奸宄溷跡。貽誤事機。恐吳棠不能當此重咎也。辦理荒謬之江陰令沈方煦著都興阿富明阿吳棠會同查明嚴參。以儆玩泄。淮北鹽八萬引。前據吳棠奏改南運。現據都興阿等奏稱有引界混淆透私漏課。及與捻匪湖船溷跡之弊。著吳棠卽按照都興阿等咨明情節另籌妥辦。毋得固執前見。至吳棠與都興阿共辦一事。惟當以大局為重。和衷共濟。共圖保衛江北地方。不可稍存意見。致公務或有貽誤。懍之。將此由六百里加緊各諭令知之。○予安徽蒙城陣亡守備馬國清。把總楊家愷。祭葬世職加等。○辛酉諭內閣。前因吏部奏湖北補用道唐際盛防隄出力。止屬尋常勞績。官文所保二品頂

帶之處未免過優改為從優議敘茲據官文奏稱該員於松滋澧州逆匪起事之先訪擒首逆地方賴以安堵與尋常勞績不同且官聲卓著能濟時艱請仍照前旨給獎等語唐際盛著准其仍照前旨賞給二品頂帶以昭激勸○諭議政王軍機大臣等阿克敦布等奏官兵俸餉糧米積欠日久亟應籌撥並懇陳兵丁困苦情形各摺片察哈爾官兵廉俸餉糈向由直隸藩庫籌撥交口北道飭張家口同知散放現在該處兵丁統計欠領俸餉四十一箇月共銀二十餘萬兩有奇粟米十七箇月共一萬六千餘石疊經前任都統慶昫咨催該承辦衙門僅止零星撥給無濟於事該駐防兵丁迫於飢寒鵠面鳩形屢向阿克敦布等哀求調濟情形實堪憫惻著劉長佑督飭直隸藩司無論何款速行酌量籌撥若干以資接濟不得以無款可籌藉詞推諉阿克敦布等原摺片二件均著鈔給閱看將

此諭令知之○以翰林院侍講學士繼格侍講銘安充日講起居注官○命翰林院編修孫念祖提督湖北學政○壬戌以甘澍優露上詣大高殿行禮報謝○遣惠親王綿愉詣時應宮鍾郡王奕詒詣昭顯廟孚郡王奕誥詣宣仁廟順承郡王慶恩詣凝和廟豫親王義道詣覺生寺定郡王溥煦詣黑龍潭拈香○諭內閣吳棠奏請將貪劣委員暫行革職等語辦理申夏等港釐捐委員知縣吳維禧自設局以來任意開銷且需索票費擡折銀價種種擾累經紳民呈控有案現又與委員知縣張金釗互相稟訐似此昏庸貪劣之員亟應從嚴懲辦以儆其餘吳維禧著暫行革職並著吳棠飭令該司道等提同張金釗質訊根究分別勒賠追繳以肅釐

務而做官邪尋奏。遵查吳維禧辦理釐捐。尚無侵吞情事。惟多設船隻。任意開銷。擬請卽予革職。勒追賠款。俟繳清省釋。從之。○諭議政王軍機大臣等。吳崇奏。勦辦髮逆。獲勝。天長解圍。並誘擒教匪。生擒巨逆一摺。現在天長之圍雖解。而賊蹤尚未遠遁。吳崇現飭黃開榜嚴扼天長湖河各要隘。探明賊在何處。卽督同龔云福等軍實力勦除。毋留餘孽。黃國瑞一軍。勦辦滕縣教匪。生擒劉雙印。解赴

僧格林沁軍營。懲辦實屬奮勇可嘉。已諭令僧格林沁督飭該總兵探明路徑。與舒通額等聯絡聲勢。進攻務將白蓮池鳳凰山賊巢攻破。惟鳳凰山道路深險。匪徒兇狡。恐黃國瑞恃勇輕進。或致失利。著吳崇飭令該總兵謀定後動。當於勇往之中。寓持重之意。不可孤軍深入。是為至要。苗逆句捻至雒河等集一帶。聲稱卽日北擾宿徐。吳崇已派副將艾憲銀馬步隊五百名赴宿州助勦。並催令遊

擊龔文林礮船出湖赴皖。勦苗。卽著遵照昨奉諭旨。令姚廣武由宿州進援蒙城。力圖解圍。如兵力不敷。仍著該漕督速行添撥赴援。以期力保危城。不得稍分畛域。投誠之王得章等。仍飭姚廣武妥為駕馭。毋稍疏虞。將此由六百里諭令知之。○又諭廣鳳等奏俄人越入開齊。拘去卡兵。旋卽釋回。並遵查綽勒齊河等處地界。及派員會哨卡倫。阻止俄人越境。各一摺。所奏情形。與明誼前奏大略相

同。俄人因上年會勘界址未遂。所欲輒為此鬼蜮伎倆。逞其詭謀。實屬恃強狡詐。俄人來者不過四十餘名。防卡官兵何至被拘至十三人之多。且哈薩克部落亦有受其威嚇。入卡滋擾者。是齊心禦侮之說。不過託諸空言。不足深恃。廣鳳等惟有督飭在事員弁。兵丁實力防範。儻有俄人再來擾越。總當據理駁斥。認真阻止。毋得稍有疏虞。致干重咎。至俄國在京公使已疊諭令總理各國事務衙門

向其理論該公使每以另有所派分界之人主持一切藉詞推諉除仍諭令該衙門與之剖辨外仍著廣鳳等隨時咨商明誼妥為籌畫相機辦理方不至鞭長莫及阿勒坦淖爾烏梁海遊牧既無不礙蒙古生計可以議分之地即著咨商明誼於議界時覈實籌辦吹河地方俄人建蓋房間一節既始於道光十一年間當時因何准其貿易有無奏過成案並著查明詳晰具奏會哨一事業經廣鳳循例委員前往卡倫巡查惟現當議界喫緊之時該委員官職較輕恐不足以資拊循而示威重仍著廣鳳等酌量情形如有必須親自前往之處務當恪遵前旨辦理將此諭令知之尋奏科城亦無奏過成案並無准其貿易明文惟相沿日久且值分界未定之際自應相機辦理現已嚴飭守卡弁兵實力防範不許再來擾越報聞○廣州將軍穆克德訥因病解職以熱河都統瑞麟為廣州將軍未到

任前仍以左翼副都統庫克吉泰署理以倉場侍郎麒麟慶為熱河都統○予江蘇韓村陣亡千總夏殿章祭葬世職加等○癸亥諭內閣禮部奏敬擬

文宗顯皇帝聖誕禮節服色請旨遵行各等語本年六月初九日

文宗顯皇帝聖誕朕御龍袍龍褂挂朝珠虔詣奉先殿

壽皇殿行禮隨從人員均著穿蟒袍補服挂朝

珠是日隆福寺

饗殿殿門外著派世鐸敬謹行禮○又諭沈葆楨奏持叅玩視地方之知縣請革職永不敘用一摺江西龍泉縣知縣狄已初於該縣所轄之大小五井山等處土匪約期滋事該員並不親往查拏設法解散已屬玩視地方並於國制期內在署演劇輒以胥役酬神未便禁止為詞迨經該府知府揭叅委員前往摘印該員竟敢帶印晉省置地方公事於不顧

尤屬肆意妄為。狄已初卽著革職永不敘用。
○又諭前因沈葆楨奏稱紳士指留捐照希圖串詐。當經降旨將紳士雙元音等革職。交該撫審辦。茲據該撫訊明確情定擬具奏。此案已革候選員外郎舉人雙元音已革四品銜候選郎中戴暄在撫州府地方勸捐軍餉。因各捐生向該革員等索取給獎執照。雙元音赴省探聽。輒將發驛投遞之執照公文等件向號吏取出。意欲帶回自行分給。雙元音

因病未能起程。適戴暄抵省。遂將文照轉交帶投。戴暄回籍沿途亦因患病耽延。迨事發查辦。始將文照等件赴府投送。雖迅無指留串詐情事。惟於奉發驛遞公文執照私向號吏接取。復又展轉耽延。究屬任意妄為。雙元音戴暄業經革職著永不敘用。以示懲儆。○又諭駱秉章奏請將任意逗遛之總兵等分別革職。永不敘用等語。革職留營前甘肅巴里坤鎮總兵熊煥章經駱秉章調派赴甘。由

白馬關前進。該總兵將隊伍暫紮漢州藉詞請領軍火。擅行進省。並以甯羌州一帶有賊逗遛月餘。延不起程。都司滕家斌劉伯林不能約束。勇丁致令滋擾。辦理文案之候選府經歷李聲繹從中唆使生事。均堪痛恨。熊煥章本係革職留營之員。著永不敘用。都司滕家斌劉伯林候選府經歷李聲繹著一併革職。該督卽派員押令回籍。毋許在川逗遛。○諭議政王軍機大臣等。劉長佑奏降賊日益

兇悖。亟須兩省會剿。一摺。據稱降賊宋景詩築寨屯糧。廣樹黨與。革堂館冠各處賊巢。均與呼吸相通。其所踞之劉貫寨甘官屯。又復逼近臨清。實為畿疆巨患。允宜及時進剿。大舉合圍。惟直省兵勇防剿兼籌。不敷分布。如得僧格林沁大軍暫時移營東昌。進扼東南兩路。直隸各軍由西北各路渡河夾擊。冀可迅速奏功。儻僧格林沁萬難分身。請飭丁寶楨速赴東昌一帶會辦等語。宋景詩狼子野

心負隅自固萬無姑容之理現在該逆兇狡情形日甚一日自應趕緊剿滅以除巨憝劉長佑所陳大舉合圍之策老成持重深中肯綮惟丁寶楨所部兵勇不過千餘人即使進紮東昌臨清一帶恐亦不足以遏狂寇僧格林沁聲威素著若能移營東昌進扼東南兩路不但可以遏賊東竄且於恆齡蘇克金各馬隊發縱指示呼應較靈劉長佑卽剋期親督諸軍由正北西北及西南各路渡河夾擊

四面圍剿庶怙惡降賊可望一鼓殲除不至分路旁竄畿疆重地關係緊要劉長佑惟當與僧格林沁等熟籌妥辦謀定後動斷不可草率從事致貽後患至淄川連營窵濠各事宜業經僧格林沁辦理完竣叢爾彈丸縱未能卽日攻克亦可無虞紛竄丁寶楨到東後卽著閻敬銘檄令統率所部前赴淄川助剿以期迅速奏功本日據丁寶楨奏馳抵泰安遵卽前赴淄川大營籌辦等語著閻敬銘督

飭該臬司將淄川地勢賊情會籌攻剿迅圖克復丁寶楨旣到淄川僧格林沁似可卽赴東昌與劉長佑會同剿辦另片奏密探鄒縣白蓮池股匪情形必須絕其出入之路方能得手所籌不為無見卽著丁寶楨隨時稟商撫臣妥辦以期無誤事機將此由六百里密諭僧格林沁劉長佑閻敬銘並傳諭丁寶楨知之○又諭左宗棠奏官軍截剿富陽新城援賊大勝小挫並遵籌裁汰閩軍及臺灣等處軍情各摺片此次賊匪徑犯新城思襲富陽後路雖經官軍擊退而劉典王文瑞兩軍尚須駐紮蔣益澧全軍力攻富陽其餘各營分撥上下各游防剿兵力實不為厚是克復杭州尚難剋期而待左宗棠現擬將新隸閩軍力圖整飭相機進剿亦是因時制宜之法卽著將閩省營兵分別去留認真訓練俾成勁旅仍一面於閩粵營官中慎選統領之員派令分營管帶庶將識士心士識將意可收

餉節兵精之效。至浦城地勢既無須重兵屯駐。卽由左宗棠酌派一軍駐之。以護轉輸運道。臺灣小醜。勦辦幾及一年。總無起色。吳鴻源曾玉明。既均不能得力。卽著與徐宗幹。妥慎籌辦。申明軍令。激勵兵心。以期早日蕆事。沙縣等處土匪。彼猖在事。員弁辦理情形。極為怠玩。若不從嚴叅辦。必致軍心益懈。賊勢益張。於閩省地方大有關係。卽著左宗棠迅速查明。嚴叅懲處。毋稍徇縱。至閩省吏治軍務。積習已深。惟在該督實力整頓。力挽頹風。以副委任。將此由六百里諭令知之。○又諭李續宜奏病勢增劇。請賞假回籍調理一摺。李續宜著照所請。賞假四箇月。回籍安心調理。惟刻下楚北皖南軍務。雖可少鬆。江北下游甚為喫緊。苗逆圍攻蒙城。情形岌岌。唐訓方漸有不支之勢。亟盼該前撫赴皖督辦。儻回里之後。病勢漸輕。仍當趕緊就道。以慰皖北倒懸之望。不必拘泥假期。是為至要。將此

由四百里諭令知之。○又諭穆騰阿瑛榮等奏東路敗匪西竄。分撲城營。官軍逐日接仗。情形並曹克忠移紮三橋。兵力單薄。請飭多隆阿迅撥勁旅會勦。及請調東三省官兵兼程來陝。各摺片。陝省東路回匪疊經多隆阿攻破巢穴。該匪向西奔竄。此等窮蹙。敗匪氣燄必衰。穆騰阿瑛榮等若能激勵軍士迎頭截擊。何難將此股竄匪悉數殲除。乃株守省垣。一則請飭多隆阿迅撥勁旅。再則請調東三省官兵。不知該將軍等所部兵勇。何不能得力。一至於此。擁兵不戰。雖多奚為。多隆阿現由倉頭移營前進。著卽督飭諸軍節節掃蕩。迅由渭南臨潼等縣直達西安。期與省城聲息相通。俾無貽誤。東三省官兵徵調太多。該處邊防緊要。豈能再行添調。馬德昭一軍前已有旨飭赴鳳翔援救。所有西安省城防勦事宜。仍著穆騰阿瑛榮就現有兵力認真督辦。毋得稍有疏虞。致干重咎。瑛榮另摺奏

漢中情形危急。石逆中旗現已由川入陝。另片奏請飭官文等速飭李雲麟梁作楫馳援漢中。各等語。前因李雲麟回旗穿孝不克赴陝。諭令駱秉章迅飭張由庚馳赴陝南援剿。據瑛奏稱張由庚現在駐軍廣元。去陝不遠。著駱秉章飛飭該道員等星速赴援。石逆中旗現在竄至平武之喬莊。勢將取道甘肅文縣繞出漢南。並著駱秉章飭令張由庚相機迎擊。毋令石逆餘黨與漢南髮逆勾結。為患。梁作楫計已督勇行抵興安。著官文等嚴飭該員認真扼守。並酌度情形。移師漢郡。與川省官兵會同剿辦。更為得力。李桓患病。曾否就痊。如一時不克西行。卽著官文嚴樹森選派得力員弁。將李桓所募勇丁帶赴陝南。勦賊俾免坐耗餉項。嚴樹森前有赴下游察看營壘。以次由襄樊西上之奏。現在駐紮何處。著與官文妥速籌商。如能由襄樊徑赴鄖西。俾梁作楫得以移師進剿漢中逆匪。庶於

秦楚兩省邊防均有裨益。仍著官文嚴樹森斟酌辦理。正在寄諭間。據熙麟奏援平官兵中途失利。請飭多隆阿撥兵迅抵平涼援剿。一摺。平涼被圍日久。經熙麟調派和英協同任治國等先後督兵往援。行至距平三十里之古城堡。賊以大股圍撲。雖經力戰解散。而范銘一營被賊蹋破。任治國中槍陣亡。傷亡兵弁甚多。是此股援兵已成畫餅。平涼待援孔亟。匪勢甚屬猖獗。稍有疏失。關係非輕。著熙麟嚴催所調未到之兵。剋日到齊。迅赴平涼以拯危急。並著多隆阿抽撥勁旅數千。交雷正綰帶赴甘省應援。其三原等縣各營著酌派得力大員接統。其衆俾雷正綰得以剋日成行。多隆阿素顧大局。務當權衡緩急。隨時策應。毋誤事機。駱秉章奏參逗遛不進。縱勇滋事之總兵熊煥章等。已明降諭旨分別懲辦矣。惟甘省兵力本屬不厚。熙麟所調援兵又復中途潰敗。必須設法添兵助剿。仍著

駱秉章酌調勁旅二三千人籌給川貲取道白馬關馳赴甘省以補多隆阿兵力所不逮庶甘省軍務可期漸有起色也將此由六百里各諭令知之○又諭崇實駱秉章奏密陳西藏實在情形一摺據稱汪曲結布即係前充噶布倫之壁喜歷來把持藏務現復由配所潛回勾結李玉圖簧惑滿慶劄調藉得明目張膽必欲屠滅呼徵呼圖克圖復藉勦辦瞻對為名徵調各處土兵其意蓋恐福濟等進藏認真查辦故大張聲勢以為要挾抗拒地步請令撤回土兵並先將李玉圖調離西藏等語汪曲結布與李玉圖狼狽為奸滿慶等事事受其挾制代為蒙混奏請實堪痛恨本日已諭令將土兵撤回保守藏地如瞻對夷酋入境即為勦辦不得滋擾內地惟該土兵能否不恃眾滋擾殊未可知著駱秉章飭各該地方妥為防範如有滋擾情事即行嚴拏懲辦瞻對野番近日情形如何並著該督

飭令史致康等妥為辦理毋任延蔓藏中政務毫無端緒亟須待人經理福濟景紋仍當遵照前奉諭旨繞道赴藏將交查各案件密速妥辦毋得遲延觀望將此由六百里各諭令知之○又諭呼徵呼圖克圖攜印潛逃來京控訴多係一面之詞未可憑信惟必得李玉圖來京質證方足以折服其心著滿慶恩慶即行傳知該糧員務即迅速來京質對毋任遲延前諭滿慶等將李玉圖及赴川漢番各兵撤回著即懷遵前旨將各土兵一律撤回防守藏地毋得滋擾川省邊界川省餉項缺乏恐亦未能協濟此項土兵宜量加撤遣毋任恃眾擾害將此由六百里各諭令知之○以都察院左副都御史鍾岱署倉場侍郎○以浙江溫州勦捕盜船出力復護總兵官已革遊擊黃載清職○以陝西漢中勦匪獲勝賞護總兵官陳天柱副將徐邦道巴圖魯名號○以陝西省城防勦出力賞委參領保

常等花翎前鋒英俊等藍翎餘加銜升敘開復有差○以約束兵勇不嚴革陝西都司李春海職仍留營○以甘肅援剿平涼失利總督熙麟下部議處革署都司范銘職並逮問予陣亡知府和英遊擊任治國參將阿章阿前欽天監博士宗庠祭葬世職加等和英任治國建立專祠阿章阿宗庠附祀○予浙江富陽陣亡總兵官熊建益祭葬世職加等諡勇烈建專祠守備劉立號祭葬世職加等○

予陝西西安等處陣亡千總李鳴山外委孫獻魁等祭葬世職加等○予江蘇陽湖殉難五品軍功管世鏞等暨眷屬三十名口分別旌卹如例○予江蘇武進殉難河南知縣李璋叔母惲氏旌表如例○予河南各屬陣亡殉難紳民婦女一千九十七名口分別旌卹如例○甲子諭內閣前據都察院左都御史載齡奏參庸劣不職之科道鳳寶等員當照所請分別勒休降革茲據內閣侍讀學士鍾

佩賢奏部院堂官甄別所屬官員應公商會銜具奏以符體制載齡奏劾科道四員係本衙門隨時考察與風聞言事者不同都察院各堂官均應公同考覈今載齡單銜具奏是否商及同官而各該堂官意存曲袒不與會銜抑載齡並未會商有意專擅其風均不可開等語著都察院堂官將此次載齡糾劾科道因何不公同列銜及載齡所奏是否悉屬允當之處據實明白回奏○河南巡撫張之萬奏遵查趙書升在南汝光道任內布置防勦尚知以地方公事為重疊經訪察實無別項劣蹟請仍以道員留於河南補用允之○成都將軍崇實等議覆湖北巡撫嚴樹森奏請停補制兵缺額查川省八十一營額兵三萬三千八十一名皆按地勢之險夷定駐兵之多寡星羅碁布並無虛糜現在本省軍務尚未一律肅清加以鄰氛不靖設備籌防不敷分布其由黔楚等省調來勇丁將來軍務

告竣。皆願回籍。礙難強令入伍。請遇有制兵缺出。仍照舊募補。以重營制。下部知之。○以詹事府詹事桂清署都察院左副都御史。○以太常寺卿賀壽慈為大理寺卿。候補三品京堂朱蘭為太僕寺卿。○以江西贛州南安節年勦匪出力。予知府楊豫成等升敘有差。○乙丑。遣恭親王奕訢詣天神壇。惇親王奕誼詣地祇壇。肅親王華豐詣

太歲壇。謝雨行禮。○遣科爾沁貝勒伯彥訥謨祜詣密雲縣

白龍潭。拈香報謝。○諭內閣。前因給事中博桂奏。刑部反獄重案。蒙混定案。並承審司員聲名狼藉。當交寶鑒沈桂芬會同都察院東公查辦。茲據寶鑒等公同查覈具奏。請旨此案盜犯周六結夥反獄。刑部將同謀被獲之犯。照刦囚科罪。獄卒照反獄減等。均係按照律例辦理。其司獄革職。係查照定例奏參。提

牢處分。由吏部覈定。至禁卒田文玉聲請留養一節。亦經查明。刑部係援照道光二十九年殷洪得成案辦理。又原參提牢司獄直宿之所。及臨時督率禁卒追捕情形。亦查有提牢穆克登布等親供可憑。聲敘本屬明晰。尚無蒙混具稟。及背例聲請各情。均著毋庸置議。惟逸犯周六之戚田五。冒名進監。是否卽係通信。丁拴兒曾與面晤。且早知周六起意逃逸。並不稟官究辦。原訊供詞情節支離殊

難憑信。著俟逸犯周六緝獲到日。由刑部提同田五。丁拴兒。一併嚴訊究辦。至刑部司務雖經吏部查明。越獄案件向無議處專條。刑部尚非漏未查參。惟司務有稽查閒雜人出入大門之責。乃於田五冒名進監。未能覺察。實屬疏忽。著查取職名。交部議處。其原收獄卒據刑部查明。並不在監專司看守。向來成案並不科罪。惟係初次帶犯收禁之人。遇有犯屬進監。難保無通同情弊。著刑部悉心妥

議將嗣後應如何嚴定章程以專責成之處奏明辦理至刑部承審司員余光倬被叅各款雖據刑部覆稱該員平日辦事未聞有何聲名並查明無帶同書吏在私宅辦案及馬錫碌一案求堂派審等情惟該員以承審司員屢登白簡其動招物議必非無因所有刑部郎中余光倬原保京察一等暨以御史記名之案均著卽行撤銷以示薄懲至失察反獄越獄各案原定獄卒罪名較輕應如何從

嚴更正之處並著刑部妥擬具奏○又諭前因曾國藩奏雲南迤東道黃冕管理局務甚屬得力請暫緩赴任令赴揚州會籌餉務當經降旨允准茲據吏部奏稱雲南軍務喫緊該督奏留差委與例不符請飭該道卽赴新任等語曾國藩軍營餉需緊要所稱黃冕管理局務甚屬得力係因一時實無接手之人起見黃冕著仍准其暫留揚州辦理餉務藉資得力一俟辦有就緒卽仍飭令迅赴迤東

道新任○又諭前因毛鴻賓奏臬司丁寶楨由湖南前赴山東請飭調雲南候補知府龔易圖隨營差委當經降旨允准茲據吏部奏稱該撫所請數與奏定章程不符請飭該員仍赴雲南等語山東軍務現亦緊要丁寶楨甫抵該省差委需員龔易圖著仍准其調赴山東軍營並著閻敬銘丁寶楨隨時察看能否得力毋得以保奏在先稍事姑容○又諭勞崇光奏查明正安州官貪役肆及弁勇妄殺各情形分別奏叅懲辦一摺錢糧正供浮收加派定例綦嚴乃該署知州陳鑄加至數十倍之多實屬大干功令接署知州李咸中輕聽差役捏陷之詞妄行具稟荒謬糊塗莫此為甚若不從嚴懲辦何以肅吏治而儆貪殘陳鑄李咸中二員前經張亮基奏叅業已革職著交勞崇光張亮基提省徹底訊明從嚴懲辦副將龍再福約束不嚴致令弁勇藉端生事妄行殺害實屬罪有應得惟據勞崇

光奏稱該員打仗尚屬奮勉龍再福著革職留營以觀後效弁目劉沅標滕家書任意焚殺兇惡衆著既經勞崇光拏獲立在軍前正法實足以快人心而洩衆憤其差役李菁蘇榮余高李忠子順曹貴無惡不作罪不容誅並著勞崇光等迅即查明按名拏獲就地正法以昭炯戒○諭議政王軍機大臣等都察院奏山西平定州柏井驛驛丞胡廷華遣抱告以經管驛馬缺額等詞赴該衙門呈訴據稱該驛丞所管柏井甘桃兩驛現存馬匹較之原額缺少至一百餘匹之多經該驛丞疊次稟請本管知州買補缺額均聽信門丁推諉不買及該驛丞通稟各上司該州牧又賄屬委員誣捏驛丞痰迷將伊撤任各等語現在陝省軍務未平正當整飭郵傳若如該驛丞所揭該州牧散法營私通同作弊該上司等既已調停了事即不免有抑勒徇庇各情實屬不成事體著愛仁王茂蔭按照所揭各

情徹底嚴究毋稍寬縱都察院原摺著鈔給閱看該驛丞所呈原揭等件一併由軍機處發交將此諭令知之○又諭劉長佑奏辦理營制情形開單呈覽並馬隊未能調赴河南暨請飭河南撥餉各摺片直隸營務廢弛所收練勇又多臨時召募旗幟隊伍不分號令難齊各營兵勇數目多寡懸殊以致臨敵各不相顧難收實效劉長佑現將所部兵勇按照楚營成式參酌北地地形勢另立規制以五百人為一營設立營官親兵哨隊官長分別旗幟隊伍講明號令督令兵勇逐日操演漸有改觀單內所開營制尚屬詳明整肅著俟新製旗幟鍋帳等件齊備後即審擇地勢將安營結陣諸法加意講求俾各營將士一律純熟以期悉成勁旅所有未盡事宜仍著該督隨時酌定俾營制益加周密應需軍餉卽著與崇厚籌商酌撥隨時奏聞前因張之萬奏請撥馬隊四五百名赴豫助剿當經諭令

劉長佑將成保等所部馬隊酌撥數百名馳赴山東以便僧格林沁於得力馬隊內抽調數百名派員帶往豫省嗣因唐訓方奏稱臨淮蒙城危急苗捻鴟張復諭令僧格林沁將前調赴豫馬隊改撥赴皖並令添撥數百名於蘇克舍恆齡二人中酌派一人帶往援皖尚未據該大臣具奏唐訓方兵單餉絕危迫萬狀勢難置之不顧劉長佑所請所馬隊暫緩抽調並商令僧格林沁將淄川營中得力馬隊與成保等所統馬隊互相撥換之處著俟僧格林沁奏到時再降諭旨將此由六百里諭令知之○又諭劉長佑奏鄭魁士到營日期等語前任浙江提督鄭魁士在皖北軍營時打仗尚稱勇敢惟係宣化府回人平素性情桀驁多與統兵將帥不和遇事率多齟齬前經疊諭文煜崇厚飭令該員赴營勦賊均因病辭現復赴劉長佑軍營著劉長佑密行察看該員現在性情是否較前和平行止

是否安靜若令帶兵勦賊能否得力卽行據實密陳該督惟當不動聲色密加體察不可稍行洩露將此密諭知之○又諭劉長佑奏請飭河南籌濟軍餉等語劉長佑現在督辦直東豫三省交界勦匪事宜所部兵勇較多需餉甚繁直隸現有各款不敷籌撥著張之萬於河北彰衛懷三府內每月籌提銀八千兩派員解赴劉長佑軍營以資接濟毋令缺乏將此由五百里諭令知之○又諭曾國藩等奏永陸各營會克巢縣含山和州三城官兵攻破雨花臺偽城及聚寶門外諸石壘並陳近日各路軍情等摺片巢縣克復之後連復含山和州疊下三城從此卽可進取江浦九洑洲以翦賊之枝葉圖拔金陵雨花臺及金陵南門外各石壘之賊踞險負隅以為堅城屏蔽復經曾國荃力戰下之不特可分蘇杭賊勢卽金陵賊巢勢亦日蹙氣機甚好卽著曾國藩與曾國荃督飭鮑超蕭慶衍等軍

於南北兩岸相機進取和含之賊殲渠釋從
是否尚有餘匪潛往他處亦卽向江浦九洑
洲等處竄逃江北裏下河一帶久為賊所垂
涎此時南北兩軍勦賊均在得手之際尤恐
敗殘餘黨欲向裏下河等處就食致滋竄擾
著都興阿富明阿隨時督率各軍嚴密巡防
雨花臺地段遼闊曾國荃增築新壘布置均
妥其忠逆李秀城現在何處是否卽在金陵
城內其回援蘇州及直犯裏下河均不可不
嚴為之備如果江浦九洑洲卽能攻克則賊
衆渡江之路可期斷絕而金陵益成檻阱之
勢勦除自更易得手苗逆兇燄甚張壽州蒙
城被困危在旦夕曾國藩檄調成大吉周寬
世等軍分路援應並派黃翼升水師由洪澤
湖入淮著卽飛催前進水陸併力合攻以解
壽州之圍唐訓方所部各軍堵持非易曾國
藩兼轄皖省責無旁貸此時髮逆均已竄回
江南惟有分得力之軍勦辦苗練與唐訓方

所部聯絡策應以保全局是為至要其蒙城
危急情形能否稍紓及懷遠進攻如何均著
唐訓方隨時奏聞以紓廑繫將此由六百里
各諭令知之○又諭奕梁等奏甯夏滿營窮
困難請飭撥協餉並現在軍務情形阿拉
善官兵路被回匪截殺各摺片甯夏滿營官
兵餬口無資官員之家日僅一餐者殊屬不
少兵丁號飢號寒不堪其苦甚至甘心自盡
覽其陳奏各情實堪矜憫亟應速籌接濟救
飢軍而拯危急著英桂迅速籌撥銀五六萬
兩由平遙小路取道解赴甯夏俾資周濟此
項餉銀需用甚迫該撫務當趕緊籌解毋得
遲延推諉甯夏回匪於投誠後復與漢民構
釁屢攻洪廣平羅兩城而仍以漢民不遵安
撫恣殺回衆等詞具稟詭謀百出反側無常
現在漢回互鬪情勢又復熾應如何妥速
查辦力弭釁端之處著熙麟妥為兼顧慶昫
未到任以前奕梁責無旁貸務當與熙麟會

同籌商力支危局。毋得稍有疏虞。又據奕梁片奏。阿拉善官兵行抵平羅邊口。突有回匪數十。暗藏埋伏。開放大礮。戕害官兵四員。兵丁跟役一百六十三名。受傷八十一名。遺失駝馬軍械甚多。該回匪攔截要道。所餘官兵現駐草地等語。阿拉善王官兵甫抵平羅邊口。何以卽有回匪數千埋伏。且該官兵於回匪設伏至數千之多。何至毫無覺察。致遭挫失。恐有不實不盡。駐紮草地之兵。現在是否業

已前進。並此項阿拉善官兵是否尚屬可用。均著慶昫詳細查明。據實具奏。將此由五百里各諭令知之。○又諭勞崇光奏繞道由川入黔。中途擊敗髮逆。並查明正安州官貪役肆辦理情形。各一摺。勞崇光甫抵綏陽。卽為石逆餘黨阻遏。該督倉卒號召。分投部勒。遂能以少擊衆。痛挫兇鋒。實堪嘉許。此股竄匪現經田興恕沈宏富等擊敗。屯聚南坪一帶。復欲由黔竄蜀。正宜乘勝跟追。亟圖殲滅。勞

崇光以田興恕係奉旨赴川差遣之員。飭令帶兵二千跟蹤追擊。順道入川。惟田興恕殺害教民一案。前已寄諭勞崇光張亮基迅速在黔辦結。毋庸飭赴川省。如該革員業已入川。仍由崇實等押令赴黔。該督此次調派自係尚未接奉前次寄諭。仍著該督等迅將田興恕調回。聽候查辦。勞崇光並卽趕緊馳赴省垣。會同張亮基將教民等案迅速辦結。毋稍遲延。其南坪髮逆仍著調派得力官兵實力追剿。就地殲除。至正安官役橫徵暴斂及弁勇妄殺。幾激民變。各情貪暴兇橫。實駭物聽。該督甫入黔境。尚未接補授雲貴總督之命。卽能不嫌越俎。遇事留心。並將妄行慘殺之弁目劉沅標等立卽正法。輿情翕然。辦理甚為妥協。現在該督身任兼圻。地方吏治尤屬責無旁貸。所有加徵苛斂及輕聽釀變之署州牧陳鑄李咸中二員。卽著會同張亮基提省嚴訊。切實懲辦。毋稍姑容。其差役李菁

等並卽飭令樊希棣按名拏獲就地正法以快人心而肅吏治將此由五百里各諭令知之○直隸總督劉長佑等奏遵查直省軍餉絀乏請留蘆鹽復價一款並酌撥天津洋藥釐捐以濟急需如所請行○以江南京口協副將成發翔為甘肅巴里坤鎮總兵官○以江南官軍攻拔雨花臺偽城及聚寶門外賊壘予總兵官李臣典等加銜升敘有差○以克復安徽巢和含山州縣等城賞道員彭毓橘總兵官張錦芳副將李宏試巴圖魯名號餘加銜升敘有差予陣亡參將陳邦榮遊擊鄭楨祥都司丁文彬守備張彪等祭葬世職加等○予貴州綏陽陣亡千總彭玉勝祭葬世職加等

大清穆宗繼天開運受中居正保大定功聖智誠孝信敏恭寬毅皇帝實錄卷之六十七

大清穆宗繼天開運受中居正保大定功聖智
誠孝信敏恭寬毅皇帝實錄卷之六十八

教修

同治二年癸亥五月丙寅諭內閣閣敬銘奏

請將已革道員暫行留營等語前署山東濟
東泰武臨道吳台朗係奉旨革職之員縱有
經手事件該署撫應卽迅簡賢員前往接替
何得率以難於更易無人可派等詞代為陳
奏豫為該員將來保舉地步而開紛紛瀆請
之門若謂山東全省官員竟無一人如吳台
朗者殊難憑信所請吳台朗暫行留營之處
著不准行○諭議政王軍機大臣等給事中
郭祥瑞奏近日捐班流品太雜竟有市井駟

僧及劣幕蠹書土痞無賴與臺僕隸之徒亦
皆張羅雜湊溷入仕途請飭各直省督撫遇
有捐納到省人員認真考察嚴加甄覈以清
吏治等語軍興以來需費浩繁國帑支絀捐
銅事例之設實朝廷出於不得已現既難於
停止卽不得不思所以補救之方若如所奏
此輩人等濫竽官途貽害百姓迨至激成事
端仍復耗費軍需則是捐銅之設非徒無益
而反有害近來外省大吏如左宗棠沈葆楨
屢經甄覈州縣捐納出身者居多均經降旨
分別准行可見各該省疆吏果能留意人才
於此輩人等到省接見時早有一番考察如
果才具品概不能稱職非惟不可令其到任
且必當從嚴甄覈為朝廷惜名器為仕途清
流品為地方弭禍亂各直省大吏實操其權
嗣後著各直省督撫府尹遇有捐納人員到
省務必認真察看或考其行誼或訪其聲名
或令作牧令之論或令讀吏治之書隨時分

別舉劾。如有惡劣不堪造就者。卽行嚴參。毋稍姑息。庶吏治可望肅清。流品不至混淆。而於軍需亦仍無妨礙。原摺著鈔給閱看。將此諭令各直省督撫府尹知之。○又諭有人奏通州張家灣一帶。時有騎馬賊匪。白晝攔劫。經該事主等喊報。地方官置之不理等語。張家灣距京甚近。豈容騎馬賊匪肆劫無忌。地方官有緝捕之責。何以於此等搶劫案件。漫不經心。著萬青藜林壽圖嚴飭所屬認真查

拏。毋稍疏縱。其窩匪處所。卽行訪明。密速擒捕。以期盡絕根株。並著查明該地方官。如有諱盜不報情事。卽行據實奏參。將此諭令知之。○又諭本日已明降諭旨。授毛鴻賓為兩廣總督。該督接奉此旨。計不日卽可馳赴新任。粵東係財賦之區。餉源所出。洋務釐務軍務。頭緒紛繁。關繫緊要。該督任大責重。不可無相助為理之人。黃贊湯自簡任巡撫以來。尚未見有所設施。其人近於巧滑一流。而毀

譽參半。著該督於到任後。留心察看。黃贊湯是否能實心任事。若令久於其任。能否得力。據實密奏。將此密諭知之。○又諭有人奏粵省軍務釐務關繫緊要。自勞崇光去任後。所辦釐務。名為悉易新章。實則舉仍其舊。而徵收之數。較前減少。並有各行釐金。每年可得鉅萬者。輒以多金賄通求免。甚至釐局委員。或為眾所毆傷。或為民間枷號。毀局罷市。諸駭聽聞。如果辦理得人。歲入可逾百萬。高州

軍務聞卓興方耀積不相能。致賊益肆。提督崑壽人甚正派。辦事和平。現在前往督辦。統一事權。若再得膽識俱優之道員。唐啟蔭會同辦理。於高州軍務當有裨益。各等語。皖浙各營需餉甚鉅。原賴粵東釐金源源接濟。前因曾國藩奏軍餉支絀。諭令黃贊湯等將所收釐稅。儘數解赴皖浙。不准截留。若如所奏。是該省釐務未得其人。不獨釐稅毫無起色。而劣員朘削。抑且斂怨於民。亟應力求整頓。

以裕餉源而收實效。毛鴻賓辦理湖南釐務章程諸臻妥協。本日已擢升兩廣總督。著卽馳赴新任。會同黃贊湯將粵東洋務釐務軍務諸事宜。逐加整頓。煥然一新。方為不負委任。釐局積弊已深。尤須設法撙剔。慎選賢能之員。妥為經理。或查照湖南舊章。酌量變通。期於餉不虧而民不擾。惟在該督因地制宜。設法妥辦。該督身任兼圻。責無旁貸。若日久無功。必惟該督是問。高州卓興方耀兩軍。勦

賊未見功效。方耀所部盡屬潮勇。聞其肆意殺掠。無所不為。方耀之弟方勳。勢更兇惡。崑壽計已抵營。著卽申明紀律。嚴飭方耀等奮勉殺賊立功。如有不遵約束。騷擾居民者。該提督卽治以軍法。毋稍寬縱。唐啟蔭籍隸廣西。據奏前隨蔣益澧收復柳慶。卓著戰功。復為劉長佑帶赴廣東。奏留該省。該道員向來涉歷行閒。頗著勞績。若令賦閒。未免可惜。著毛鴻賓黃贊湯迅派該員前赴高州。會同崑

壽籌辦勦匪事宜。以資得力。原摺著鈔給閱看。將此由六百里各諭令知之。○又諭慶昫奏探訪甯夏一帶軍務。暨甯夏旗營困苦各摺片。並奕梁等奏請飭催甯夏府解交生息等銀兩一片。慶昫沿途探訪各情。與奕梁等疊次奏報大略相同。惟阿拉善與平羅縣連界之磴口地方。回民既經阿拉善王逐入內地。難保不沿途焚掠。併入回黨。更恐其潛行勾結。希圖報復。該將軍務當加意嚴防。並飭阿拉善旗一體防範。毋稍疏懈。平羅士民先後在該將軍行次聯名遞呈。有甯夏道差委彭令來平招安。該令名為招安。其實抑漢。批回。並平羅團練拏獲奸細。訊有甯夏令彭慶章私給回信。屬令先據府城之供等語。是否該士民等迫於急憤。架詞聳聽。抑係該令甘心叛逆。著熙麟、恩麟等確切查明。如果通賊屬實。卽行從嚴懲辦。毋稍輕縱。昨據奕梁等奏阿拉善兵行抵平羅邊口。卽遇回匪埋伏。

致官弁兵丁傷亡多名當經諭令慶昫等查奏本日據奏阿拉善兵傷亡各數與奕梁所奏大致相同可見事非無因現在是否尚在達武口屯紮仍著慶昫確查如果可用卽著進紮平羅以資得力現在甯郡巡東節節回匪滋擾文移摺奏繞道未免稽遲必須由草地達京方能妥速著兵部理藩院飛劄阿拉善鄂爾多斯等旗並殺虎口管站部員凡遇有馳奏事件卽行換遞以免遲誤另片奏甯

夏旗營每日止領錢數十文難供一飽等語昨據奕梁等奏已飭山西撫臣於應解協甘餉項內迅籌五六萬兩遞解矣此項餉銀到時卽可妥為散放以期士飽馬騰有裨戰守奕梁等片奏甯夏旗營去年夏季兵餉五十餘兩該省由甯夏府庫收粥廠生息地丁各項撥充迄今尚未解交及甯夏營各項生息銀兩向由甯夏府按月按季發交現欠四千七百餘兩等語該營待餉孔殷此等有著之

款豈容地方官任意延宕著熙麟恩麟嚴飭該府迅速籌給毋稍遲延干咎將此由六百里諭知慶昫常陞熙麟並傳諭恩麟知之○又諭徐之銘等奏迤西髮逆勾結東南各路賊匪襲踞富民等州縣並竄踞祿豐等屬及楚雄普洱兩府城現派兵練克復地方肅清又勦辦巧家廳大股髮逆克復廳城摺二件覽其所奏無非任意鋪張專為保員起見勞崇光前已簡授雲貴總督賈洪詔前已簡授

雲南巡撫均屬責無旁貸著將楚雄等府州縣失陷情形及已否克復各該員等是否在一事出力據實查明具奏死事各官紳人等一併查明奏請分別旌卹徐之銘另奏請將署普洱府知府夏家疇等獎勵各片並著勞崇光等查明該員等是否實有勞績應否予獎之處據實具奏又密保馬如龍岑毓英片二件並著詳察密奏該二員與徐之銘狼狽為奸聲勢相倚此時雖不能遽准其請必須妥

為羈絆使之不疑。以免勾結肆擾。其應如何暗為羈縻之處。著勞崇光賈洪詔妥籌辦理。摺片七件。均著發交勞崇光賈洪詔閱看。另片奏請飭張亮基將收過銅鉛變價及捐輸銀兩解滇等語。著該署撫仍遵前旨。將收存各款解赴雲南。交賈洪詔備用。以資接濟。又片奏請將提督印信送滇交馬如龍署理等語。雲南提督已簡放福陞。該員現在昭通。著即將雲南提督印信派員齎送昭通交福陞祇領。以重職守。又片奏據張亮基來咨鈔錄具奏貴州興義府屬回夷肆擾抵黔後相機籌辦等情。此係參徐之銘之件。該署撫尚未查辦。何以先行鈔咨。殊不可解。是否徐之銘由探訪而得。抑係該署撫鈔咨。著張亮基據實具奏。現在興義府屬是否有回夷滋擾。並著勞崇光張亮基確查情形奏聞。原片三件著發給張亮基閱看。賈洪詔放雲南巡撫已逾兩月。何以尚無奏報到京。該撫現在何處。

著勞崇光催令迅赴昭通東川一帶妥籌辦法。其昭通東川一帶應如何添兵布置。為先事綢繆之計。並著勞崇光賈洪詔會同籌辦。仍將滇省情形隨時具奏。毋稍懈玩。將此由六百里各諭令知之。尋張亮基奏徐之銘派令回目前往興義辦撫。當遵旨設法截回。嗣回匪襲踞府城。據實覆奏。並將奏稟密咨潘鐸。不意潘鐸被害。遂為徐之銘所得。並非另有鈔咨。至回匪勾結夷匪滋擾興義。疊陷各州縣城。現已督率兵勇迅圖收復。報聞。○已革雲南巡撫徐之銘奏。憑陳地方情形得旨。徐之銘當懷遵前旨。迅即來京聽候部議。本日所奏各摺片已發交勞崇光賈洪詔分別覈辦。至密保馬如龍岑毓英二員。如果辦事出力。始終勤奮。勞崇光等秉公覆覈。亦必不沒其勞。奏請擢用也。○命署兩廣總督都察院左副都御史晏端書來京供職。以湖南巡撫毛鴻賓為兩廣總督。湖南布政使譚世臨

為巡撫。○調直隸布政使石贊清為湖南布政使。以直隸按察使王榕吉為布政使。○調河南按察使李鶴年為直隸按察使。以記名道王正誼署河南按察使。○丁卯諭內閣恩麟奏請將因病擅自晉省之知縣議處一摺。署甘肅甯朔縣事候補知縣齊廷瑞於所屬村莊被擾。經該管道委令安撫難民。輒敢延不查辦。並以曾經報明患病。及稟請委員接署為詞。擅自晉省就醫。實屬有乖職守。恩麟僅請將該員交部議處。不足蔽辜。齊廷瑞著改為交部嚴加議處。以示懲儆。○諭議政王軍機大臣等。僧格林沁等奏南北軍務輕重機宜。請肯定奪一摺。前因張之萬奏河南急需馬隊。諭令僧格林沁酌撥數百名赴豫。並因唐訓方奏蒙城四面受敵。情形危殆。當以僧格林沁一軍攻勦淄川踞匪。未能剋日南下。諭令分撥一旅迅速赴援。茲據奏稱直東賊氛未靖。各處伏莽甚多。若不先清畿輔。恐

大軍赴皖。北路之明賊暗匪。乘隙勾結。彼時再分隊回援。則兩處兵力。均形單薄。勢難兼顧。所部馬隊。得力者僅二千餘名。前派追勦竄捻之馬勇四百餘名。業經留於宿州防勦。此外實未便抽撥各等語。所奏自係實在情形。淄川踞匪。勢已窮蹙。雖屢次出城突撲。均經官軍擊敗。功在垂成。勢難中止。而此外尚有不法降賊。亦需僧格林沁會同劉長佑等協力兜勦。且督勦白蓮池教匪。正當喫緊。該大臣自應將積年巨憝。逐一殲除。俾北路可保無虞。方可督兵南下。至馬隊數止二千有餘。若再分撥皖豫。恐彼此均不得力。著卽照該大臣所請。暫緩調撥。該大臣惟當專力勦辦東省各匪。俟淄川及降賊等股匪均就削平。然後再行返旆南征。庶免後顧之慮。壽州被圍甚急。昨據曾國藩奏。蔣凝學毛有銘援師進紮九里溝。連破牛尾岡三壘。軍士傷亡甚多。該大臣現已飛催成大吉。迅赴三河尖

援應。檄飭周寬世馳赴六安。分紮州城等處。並調派駐滬之黃翼升。督帶淮揚舟師。駛至五河以上。埽清滄渦。淮肥等處匪船。布置甚屬周妥。此時僧格林沁之兵。既一時未能南下。卽著責成曾國藩。嚴飭水陸諸軍。星速前進。會同蔣凝學等。併力衝入壽城。以拯倒懸之急。蒙邑城外賊壘甚多。馬新貽等雖能竭力守禦。而兵單餉絀。危迫萬分。著唐訓方設法兼顧。其撥兵濟餉各事。並著隨時會商曾

國藩。吳棠。毋稍貽誤。皖豫脅齒相依。臨淮與蒙城情形。如此窘迫。張之萬等豈容坐視。著恪遵前旨。將應解臨淮餉銀。迅速撥解。並著與袁甲三籌商。由陳郡勸捐糧石。運赴蒙城。藉資接濟。仍隨時整頓營壘。激勵團練。嚴防苗逆乘間西竄。毋稍疏虞。淄川踞匪。勢窮思竄。疊經僧格林沁督率官軍。截殺殆盡。仍著嚴飭各路兵勇。晝夜環攻。迅圖克復。逆首劉得培。既有結黨。猥撲竄赴青州府之謀。並著

閻敬銘密飭青州文武員弁。將曾經解散之快役團。嚴密查拏。毋令內應為患。雷鳳鳴以失律伏誅。其降眾亦分別遣散。辦理甚為妥善。其餘尚有在僧格林沁及劉長佑兩處軍營者。均應似此不動聲色。乘機翦除。仍著僧格林沁。劉長佑。會籌妥辦。謀定後動。毋得漏洩風聲。致有貽誤。將此由六百里各諭令知之。○命直隸通永道魁齡開缺。以四品京堂候補。交總司稽查。

定陵工程處恭親王。戶部尚書寶璽差委。○補鑄福建順昌甯化浦城等縣知縣印信。浦城縣縣丞條記。從巡撫徐宗幹請也。○以山東鄒縣勦辦教匪獲勝。賞總兵官黃國瑞黃馬褂。餘升敘有差。予陣亡守備白萬貴。千總李正標。祭葬世職加等。○予明臣方孝孺。從祀文廟。從戶科給事中王憲成請也。○戊辰金星晝見。○

孝恭仁皇后忌辰。遣官祭。

景陵○諭內閣前因內閣侍讀學士鍾佩賢奏左都御史載齡參劾科道單銜具奏是否並未商及同官所參能否允當當經諭令都察院堂官明白回奏茲據單懋謙等奏稱載齡此次參劾科道並未與該堂官等會商無從列銜至所劾鳳寶各員均非無因卽著無庸置議惟各部院堂官甄別屬員向皆公商會銜具奏原以杜專擅而重考察矧都察院為風憲之官科道各有言事之責黜陟考覈尤宜審慎載齡此次甄別各員並不商及同官輒竟單銜具奏雖非專恣亦屬輕率殊於體制未協載齡著交部議處嗣後各部院堂官於本署應行條奏事務以及舉劾所屬官員務當公同認真覈議如事理確鑿而各堂官意見不合者准其單銜具奏仍於摺內聲明以符定例至都察院科道各員尤宜委用得人方能無忝厥職嗣後仍著該堂官分別考覈如有聲名平常庸劣不職之員仍當隨時

甄別其平日品行端方辦公勤奮者亦卽酌量保薦不得以載齡業經議處遂於該衙門科道中賢否一併緘默不言也尋吏部議載齡照不應重公罪例降二級留任准其抵銷從之○諭議政王軍機大臣等總理各國事務衙門奏中國自置火輪兵船將抵海口所有添買軍裝器械豫籌月支經費在各海關分撥並酌定節制章程一摺據稱此項輪船除前撥過銀八十萬兩外並在英國借銀十五萬兩在上海借銀十二萬兩共計需銀一百零七萬兩又應支糧餉軍火等項一切用款每月統給銀七萬五千兩均經該衙門向李泰國再四駁詰酌定章程及由中國選派武職大員作為該師船之漢總統所延外國人阿思本作為幫同總統以四年為定用兵地方聽督撫節制調遣阿思本由總理衙門發給劄諭俾有管帶之權隨時挑選中國人上船學習各等語著卽照議辦理此項輪船

駛抵海口後。卽著曾國藩李鴻章節制調遣。並著派令武職大員作為漢總統會同辦理。其前所擬之蔡國祥如能勝任。著卽責令統帶。以資得力。其如何駕駛之法。總須一切調度機宜事權。悉由中國主持。方為妥善。至中國人上船學習駕駛職位等事。總期迅速諳練。該督等前奏配用楚勇。當已豫為派定。卽著飭令蔡國祥隨時督率學習。此項輪船現在自以先勦金陵等處髮逆為要。賊平之後。

卽可以為巡緝私販之用。無論如何用法。總須俾中國人熟習駕駛。收其利益。斷不可日久仍為外國人所主持。其月餉等項銀兩。官丈曾國藩李鴻章務須按期支給。不可絲毫短少拖欠。致令有所藉口。總理衙門原摺及照錄現議章程五條。均著鈔給閱看。將此由六百里各諭令知之。○己巳諭內閣。節據曾國藩李鴻章等奏報克復松江府及太倉州地方。陳及該處百姓被賊殘虐。為數百年來

所未有。各廳州縣田畝拋荒。著名市鎮悉成焦土。雖窮鄉僻壤亦復人煙寥落。連阡累陌一片荆榛。居民間有孑遺。顛連窮困之狀。有不能殫述者。覽奏情形。曷勝憫惻。因思蘇松太三屬地方。為東南財賦之區。繁庶甲於天下。而賦額亦為天下最重。比諸他省。有多至一二十倍者。良由沿襲前代官田租額。且自宋明兩代。籍沒諸田。皆據租籍收糧所致。嘉靖中又令各州縣盡括境內官田民田分攤定額。蘇松等屬田賦。至比官田通額亦皆大有增加。我朝順治年間。卽經明奉

聖諭。以故明仇怨地方。加糧甚重。我朝何可踵行。飭由地方詳察具奏。嗣於雍正乾隆年間。疊奉

恩旨。以蘇松浮糧。施恩議減。將蘇州府額徵銀蠲免三十萬兩。松江府十五萬兩。又江省糧額浮多之處。加恩免徵銀二十萬兩。仰見我祖宗軫念民艱。至深且厚。國家承平百餘年來。

海內殷富。江蘇自乾隆年間。辦理全漕者數十年。固由民力之充。亦屬民心之厚。及道光年間。兩次大水以後。各州縣每歲荒歉。加恩蠲減。遂成年例。嗣是每年徵收之數。內除官墊民欠。率得正額之七八成。或四五六成不等。民力殆已難堪。及至粵逆竄陷該省。焚燒殺掠。民盡倒懸。幸自上年官軍克復松江。本年克復太倉。現方飭令統兵大臣等。進取蘇州。救吾民於水火。而各地方經賊荼毒。彫瘵至極。若不將各該府州屬數百年來浮糧積弊。仰體

列聖深仁厚澤。大為覈減。無論民力斷有不堪。即使勉強減成輸納。何以慰如傷之隱。而施浩蕩之仁。且令官紳胥吏。徒營中飽。尤為弊之甚者。亟宜因此時會。痛加埽除。所有蘇州松江太倉三府州屬糧額。著兩江總督曾國藩。江蘇巡撫李鴻章。督飭司道。設局分別查明各州縣情形。折衷議減。總期與舊額本輕

毋庸議減之常州鎮江二府。通融覈計。著為定額。先自松太創行。即以此後開徵之年為始。永遠遵行。不准再有墊完民欠名目。蘇州所屬。俟肅清後一體辦理。嗣後非大水旱成災。實在荒歉者。並不准捏災請緩。請蠲。至蘇松漕弊。尤莫如大小戶等名目。紳戶把持。州縣浮收。種種弊竇。皆出其中。著即永遠禁革。所有一切辦理章程。及應行裁革之浮收陋規。包戶等積弊。均著該督撫悉心妥籌。詳細

具奏。務期上紓國用。下恤民生。變通盡利。經久可行。用副朝廷惻隱在抱。嘉惠斯民至意。○又諭曾國藩奏為伊弟國荃懇辭巡撫恩命。並曾國荃奏懇收回成命。以開缺藩司專辦軍務。各一摺。曾國荃自統師南下以來。疊復沿江名城要隘。駐軍雨花臺。連破逆壘。與彭玉麟鮑超等。水陸諸軍。為規取金陵之計。朝廷以曾國荃勳績卓著。擢授浙江巡撫。並令仍統前敵之軍。駐紮雨花臺。一意進取。論

功行賞。國家自有權衡。茲覽該大臣及該撫所奏。深以金陵未復。兵頓堅城。而該大臣兄弟異數。頻邀既榮。授以封圻。復令駐軍江南。遙領疆寄。深虞隕越。弗克負荷。在該大臣等受寵若驚。固辭恩命。洵屬至誠。而朝廷懋賞。懋官。權衡悉當。現在軍事方亟。時局孔艱。凡在臣工。正宜踴勉效忠。共期宏濟。該大臣惟當督率曾國荃。忠誠報國。以副委任。正不必瀆辭朝命也。○又諭曾國藩奏。藩司自陳。辦公竭蹶。據情代奏。請開缺留皖等語。江蘇布政使萬啟琛。節經曾國藩奏保。辦事得力。是以疊加升擢。畀以監司之任。正當竭力報稱。何得自陳竭蹶。以博退讓之名。該督所請。萬啟琛開缺之處。著毋庸議。○又諭官文奏。請飭催李雲麟迅速赴陝等語。候補四品京堂李雲麟。前經降旨。自聞計之日起。賞假兩箇月。回旗治喪。現在陝南軍務緊要。該員自鄂啟行。計已到旗。違道奔喪。孝思已展。宜感朝

廷不次擢用之恩。迅速赴營。以重軍務。著總管內務府大臣。卽行飭催該員。於到旗後。趕緊將喪務料理。不必拘泥假限。迅速馳赴陝南。督辦軍務。○又諭景廉奏。查明喀什噶爾辦事幫辦大臣意見不合。請交部議處一摺。前任喀什噶爾辦事大臣奎英。於回子伯克帕爾吐誣控一案。因委員等請將帕爾吐另調一缺。輒卽應允。不復窮究。嗣因英蘊咨調此案。復趕辦咨文。並單銜入奏。實屬意存掩飾。幫辦領隊大臣福珠凌阿。於委員求調帕爾吐之時。據理直斥。尚無不合。惟於奎英單銜奏事。卽以辦事掣肘等詞。冒昧具稟。實屬藉詞聳聽。奎英、福珠凌阿。均著交部議處。○諭議政王軍機大臣等。有人奏。江蘇駐紮萬福橋之記名總兵王萬清。縱容勇目張慶沅等。四出行劫。拒捕傷人。上年防勦淮屬。見賊先退。兵勇占踞民房。搶掠財物。軍政廢弛。請飭查辦等語。江北裏下河一帶。久為賊所垂

誕該處軍務宜如何力求整頓嚴密籌防若如所奏該總兵毫無紀律縱勇殃民殊干法紀此等庸劣不職之員豈可稍事姑容著吳棠迅卽查明從嚴叅辦勇目張慶沅並著嚴密查拏盡法懲治毋任漏網原摺著鈔給閱看將此諭令知之○又諭曾國藩奏為伊弟國荃懇辭巡撫恩命及代陳萬啟琛懇辭藩司曾國荃奏懇情請收成命專辦軍務各摺片又李鴻章奏調派各軍分路堵剿現籌進

規蘇郡情形一摺覽曾國藩兄弟所奏感激恩數互相誠勉實屬發於至誠惟朝廷懋官懋賞當此艱難宏濟之時尤貴因材器使曾國藩等總當一意進取以奏膚公其毋固辭萬啟琛現有經手事件曾國藩可令其仍留皖營其蘇藩一缺卽暫時揀員署理亦無不可李鴻章所奏克復新崑乘勝進規蘇城所籌三可慮二可幸等情及調派程學啟李鶴章李朝斌等各軍分路以勦為堵並防內竄

均極妥協卽著督飭程學啟李鶴章等穩紮穩進以圖萬全戈登常勝等軍遊擊之師尤宜妥為調度策應江南浙滬等軍日圖進取曾國藩前奏克復巢縣後現擬進攻江浦及九洲之賊諒南岸竄匪不得復行偷渡其由巢含等處另股竄至天長揚州之賊多半飢疲著都興阿富明阿吳棠等督率諸軍竭力堵守毋使竄入裏下河一帶肆擾曾國藩督令鮑超等軍速克二浦絕賊過江之路則

南北岸之賊勢成中斷各軍分投勦辦當必所向較易為力也將此由六百里各諭令知之○又諭官文奏李桓病難速痊現今所部西行歸梁作楫調遣並請飭催李雲麟赴陝及嚴樹森奏親赴安麻黃德等處察看布置暫回省垣各摺片李桓病難速痊而陝省軍務甚為喫緊官文等將李桓所部勇丁一千餘名籌備軍儲已令原派營哨各官拔隊遄行馳赴興安暫歸道員梁作楫統率著卽飭

令梁作楫相機調遣。併力進勦。李雲麟經此次飭催。亦必當奮發忠義。墨經赴軍。惟計行抵陝南。尚需時日。李桓如能速痊。卽著官文等飭催赴陝。毋稍稽遲。嚴樹森所奏布置各情。尚屬周妥。此時豫東防務較鬆。而正息一帶。豫捻復熾。著卽嚴飭總兵穆正春等。於黃安羅山交界等處。力籌防勦。並與豫軍隨時聯絡。以資策應。毋任竄突。將此由六百里諭令知之。○又諭閻敬銘奏滙陳溜克喫重情形。一摺。溜營兵勇散漫無紀。惟仗僧格林沁聲威懾伏。匪勢不敢鴟張。刻下連營合圍。已有端倪。若移師他往。不免功敗垂成。且僧格林沁前赴東昌。必須將現駐曲鄒之舒通額一軍調往。該隊專防白蓮池北路。一經抽撤。必致空虛。該撫所籌係屬實在情形。自應將僧格林沁仍留溜川督勦。以期迅速藏功。其丁寶楨一軍。並卽飭令馳赴東昌。會同恆齡等軍。併力勦辦。務期聚而殲旃。毋令竄逸。為

患。溜營前敵兵力尚單。仍著閻敬銘與僧格林沁悉心籌商。添撥勁旅。以利攻勦。將此由六百里諭令知之。○又諭毛鴻賓奏勦辦土匪。防勦黔匪一摺。現在辰沅界內。漸臻安謐。匪首張芝蘭。是否業經殲斃。或先已逃遁。著毛鴻賓。憚世臨。確切查明。毋任該逆漏網。辰溪等處餘匪。並著督飭辰州府知府鄂堃等認真擒捕。務絕根株。黔省匪勢鴟張。張家寨教匪分三股出巢。圖竄銅郡。荆竹園教匪仍踞黃坪莊。趨向未定。黎平積匪羅洗明。勾結播揚所。洪州所各匪。聲言借路前往湖南。鎮遠府屬匪首包茅仙。聚眾擾至泰坪營。距松桃城僅十餘里。黔省下游各府。幾於無處非賊。湖南邊界。防不勝防。若非會合湘黔兩省兵勇。併力夾擊。實屬不敷勦辦。著張亮基督飭黔省官軍。會同毛鴻賓派出各軍。次第勦辦。迅掃逆氛。張亮基辦理貴州本省軍務。尤屬責無旁貸。毋得專待湘省援軍。坐失機宜。

據毛鴻賓奏從前黔省軍務流弊在於緊急之日則迫切呼援迄楚師出境勦辦得手又急於招撫苟圖近功旋撫旋叛仍旋叛旋撫如上年招降張家寨匪首據該省地方官稟稱似屬可靠而接聞各營來稟則皆斷其必不可恃止以隔省用兵不能堅持主勦之議今果與荆竹園合股大肆披猖張亮基在滇黔年久洞悉情形請飭實力籌勦等語著張亮基揀派勁旅迅赴貴東痛加掃蕩務為一勞永逸之計毋蹈從前覆轍毛鴻賓交卸後憚世臨於一切防勦機宜務當慎之又慎毋得稍有疏虞致負委任該撫經朝廷不次超擢想自能力圖報效也毛鴻賓另片奏金國琛積勞成疾稟請寬給假期等語金國琛打仗素稱勇往現在河南帶兵乏人亟盼該員前往著毛鴻賓憚世臨催令金國琛趕緊療治俟病體稍愈卽飭迅速赴豫李續宜病勢增重朝廷甚深廕繫如能速就痊可並著趕

緊起程馳赴皖營浙江鹽運使朱孫詒現在是否尚在湖南著該撫查明具奏將此由六百里各諭令知之○又諭玉通奏花寺回教勾結撒匪逼近郡城請派員勦辦一摺西甯花寺回教與臨洮舊教積不相能該回民總約馬歸源暗聚花寺回子數千於三月初九日將東關北古城北關一帶洮教回子殺傷過半大肆焚搶其丹噶爾南川營等處花寺回子復勾結撒拉並米拉溝奸回各數千之眾燒殺洮教及漢民各村莊並攻撲丹噶爾廳城擊傷官兵逆燄極為兇狡玉通現調青海部落蒙古番子將撒匪擊退丹圍已解而鎮海堡多吧等處經撤回經過擄掠一空現在兩教互相仇殺擾害漢民盤踞近郊城池戒嚴而撒匪未受懲創勢必勾合復來以圖報復且甘省逆回現尚滋擾若西甯回眾撒匪再復鳴張勢將不可收拾著恩麟迅卽調派勁兵交現駐蘭州幫辦防勦之前任提督

經文岱統帶前赴西甯。迅籌勦辦。如經文岱未克分身前往。卽著熙麟恩麟安迅籌商。另派大員帶兵馳往會勦。以顧邊陲。玉通現任西甯辦事大臣。責無旁貸。務卽飭調該處防兵及所調蒙古青海等兵。分別籌勦。解脅職渠毋得專待援師。致滋貽誤。本日復據奎英等奏喀什噶爾兵餉不敷甚鉅。而甘省久未撥解。現經伯克回子抒忱捐輸等情。該城伯克回子雖屬踊躍急公。惟官兵月餉僅恃勸捐接濟。豈能經久。且恐民力已竭。官吏仍行勒派。流弊滋多。著熙麟恩麟迅將該省應解該城兵餉卽籌撥解。免滋擾累。又據興泰等奏巴里坤餉缺已遵旨於哈密經費銀內提撥銀三千兩。請飭陝甘督臣籌解歸款等語。著熙麟恩麟先行籌撥銀數千兩。解交哈密歸款。以資協濟。將此由五百里諭知熙麟。玉通並傳諭恩麟知之。又諭平瑞奏哈密大臣與營員互相參訐。請令新任辦事大臣查

辦各摺片。前因興泰奏參署哈密協副將恩賢等於錢糧重款。任令營書侵蝕。並被參後仍抗不交印。疊經降旨將恩賢等分別革職。撤任交平瑞等查辦。茲據平瑞奏稱據恩賢稟稱哈密稅務係辦事大臣經營。現在隱匿徵稅朋比分肥。稟請辦事大臣查辦。未蒙批示。又另文稟稱據哈密合營兵丁查明該處錢糧並無虧缺。侵那公遞悔呈請免查辦。並准巴里坤領隊大臣文永咨稱哈密合營兵丁公稟以查明該營錢糧並無虧那該營員弁無故被參。請留該副將無庸交卸等語。與興泰等前奏各情大相歧異。哈密為新疆門戶。錢糧稅務軍食攸關。豈容稍有侵蝕。恩賢等於被參後。經辦事大臣委員接署。輒敢據印不交。且所稟各詞牽涉辦事大臣。似此上下互相參訐。殊屬不成事體。是否恩賢等因被參畏罪。架詞捏稟。抑係興泰等前奏不實不盡。該營兵丁錢糧究竟有無虧那及原參

字識李兆幅等侵扣各情。均應徹底根究。以成信讞。文祥前已簡放哈密辦事大臣。著卽迅赴新任。將案內人證卷宗。提集研訊。詳細清算。並恩賢等與興泰互相參訐各情。逐一秉公查辦。毋許稍有含混。另片奏哈密地方閒荒地畝甚多。該處距巴里坤最近。如能開出地畝。糧有贏餘。卽將巴里坤兵丁酌量遷駐防守。請飭文祥與扎薩克郡王伯錫爾會同查辦等語。文祥深悉時務。明幹有為。著俟

到任後查明該處可耕地土共有若干。就地審度。悉心籌辦。並咨會扎薩克郡王按照平瑞在烏嚕木齊所立開墾章程。妥為經理。事屬創始。萬不可畏難自阻。務當盡心相度。期於軍食有裨。是為至要。至古城領隊大臣一缺。業經簡放聯捷。未到任以前。卽照平瑞所請。著保恆前往署理。以便文祥交卸起程。將此各諭令知之。○又諭常清奏回人滋事。現將首從逆犯拏獲。及續辦情形。並請將文祥

調補巴燕岱領隊大臣各一摺。伊犁惠遠城之三道河地方。回民懷疑起事。句結塔爾奇營回人。扭鎖開城。搶劫庫存軍械。殺斃兵丁。經常清派員緝捕。先後生擒首從各犯百餘名。並將逆首楊三腥及飛刀馬二等凌遲處死。該將軍現調錫伯索倫等營官兵會同惠遠城官兵分紮東西北三門。巡查守禦。惠城現已安堵。其巴燕岱地方亦派圖庫爾帶兵防守。並飭錫拉那等前往安撫商民。查收器

械。辦理甚為妥協。惟回性多疑。近因陝甘逆回被勦。心懷疑懼。並有關內奸回潛赴伊犁煽惑之事。該處回民聚處甚多。設被勾連。紛紛起事。邊疆重地。關繫非輕。著常清督飭該員弁等隨時嚴密巡查。以杜煽惑。並一面剴切出示諭以陝甘逆回實因叛跡昭著。應行勦辦。朝廷止分良莠。不分漢回。斷無玉石俱焚之理。務使該處漢回兩不猜疑。各安生業。以靖邊徼。至巴燕岱滿營事務殷繁。漢回雜

處該將軍請以文祥調補該處。惟文祥前已補授哈密辦事大臣。且近有查辦緊要事件。已令迅赴新任。所有巴燕岱領隊大臣一缺。仍著常清另揀賢員。先行署理。將此諭令知之。○又諭文興等奏稱烏什乏餉。僅恃阿克蘇於稅課贏餘項下。每月協濟普爾錢五百串。前經奎棟備撥錢三千串。自本年二月起。每月協濟錢五百串。僅資半載之需。山西協甘餉銀繞道解往蘭州。尚需時日。儻內地經費未到。而阿克蘇接濟領完。誠恐緩不濟急。請飭阿克蘇續為撥給等語。著奎棟崇恩按照文興等所請。於另庫所存餘錢三千七百餘串內。續行分撥。如甘省所解經費。未能即到。仍按舊章。每月協濟烏什錢五百串。以資軍食。將此各諭令知之。○又諭景廉奏查明喀什噶爾辦事幫辦大臣意見不合情形一摺。喀什噶爾地處邊要。防範最宜嚴密。該處辦事幫辦大臣。必須和衷商榷。方於整頓地

方。保衛疆圉。均有裨益。奎英業經另案降調。喀什噶爾辦事大臣。已簡放常明。俟其到任後。一切地方應辦事宜。仍著該大臣等隨時妥商。實力整頓。以安邊圉。本日據奎英等奏稱喀什噶爾所需鹽菜經費。因甘省未經撥解。每月除徵收稅課等項外。不敷支放。現經阿奇木伯克等勸諭捐輸。以補每月經費之不足。內地暫可無庸撥解等語。捐輸彌補。固是權宜辦法。第念該回眾等生計維艱。何堪再煩供億。此次奎英等所奏捐輸經費。是否實係該伯克等情殷報效。抑係奎英等抑勒著景廉詳細查明。據實具奏。如有窒礙之處。迅即奏明停止。將此諭令知之。○引見四品卿銜前任閩浙總督劉韻珂。得旨著以三品京堂候補。○賞降調河南巡撫鄭元善知府。發往山東軍營。交署巡撫閻敬銘差委。○賞內閣侍讀學士博麟頭等侍衛。為哈密辦事大臣。○以捐輸葉爾羌兵餉。免回子郡王愛

瑪特罪。○庚午。以違例徵賦。浙江知縣易心奎革職逮問。○予浙江杭州陣亡殉難副將吳蓋臣等八十七員祭葬世職加等。縣丞龍章等祭葬世職。○辛未。調禮部左侍郎毛昶熙為吏部右侍郎。轉禮部右侍郎。龐鍾璐為左侍郎。毛昶熙未到任前。以龐鍾璐兼署。調工部右侍郎吳存義為禮部右侍郎。以署禮部左侍郎薛煥為工部右侍郎。管錢法堂事。○補鑄安徽含山縣運漕鎮巡檢印信。從巡

撫唐訓方請也。○壬申。諭議政王軍機大臣等。都興阿。富明阿。奏楚軍攻克二浦及七里九洑等洲。富明阿親赴靖江。察看難民各摺片。都興阿自奏舊疾舉發。請開缺。離營調理一摺。曾國藩前奏鮑超等軍追賊已至江浦。飭令攻克二浦後。即進攻九洑洲。茲據都興阿等所奏江浦浦口已於本月初九日攻破。七里洲於十二日攻破。九洑洲於十五日攻破。九洑洲為江中要地。賊踞堅壘。數年之久。

官軍此次攻克。竟能敏速如此。者與阿等所奏。諒係實情。曾國藩奏報。是否業已在途。著即將詳細情形。迅即馳奏。都興阿等摺內所稱。忠逆帶隊渡江。援浦為梁。正源截擊於寶塔根。賊遂敗竄。現在竄往何處。下關七里洲之賊。向中關回遁。其九洑洲踞賊。斃溺而外。是否尚有餘匪紛竄。均須確切查明。妥籌堵剿。金陵勢成。檻穽其機。大為可乘。應即如何相機進擣。及會商左宗棠。李鴻章進攻蘇杭。

使賊應接不暇。以圖進取之處。曾國藩等諒必成竹在胸。惟窮寇必思鋌走。江路水陸寬廣。備禦宜嚴。裏下河一帶。尤應嚴密設防。吳全美所領師船。擊賊於江陰之黃田港。能否即與由滬派出進攻江陰各軍。會合攻擣。著曾國藩。都興阿等於南北兩岸。分飭各軍。乘機妥辦。通州所辦投賊齋匪。如果僅係食齋茹素。自不得濫行屠戮。據都興阿等奏該地方官已率行正法。富明阿現往下游靖江一

帶察看情形。自應訪查確實。並著吳崇飭令喬松年及各地。確切查明。詳慎辦理。毋許輕重失宜。致有激變情事。渡江遷徙難民。尤當妥為安撫。毋令失所。而游匪溷跡。亦不得不嚴加防範。都興阿所患舊疾。前經具奏。諒係實情。此時富明阿既赴下游。揚營堵剿。正當喫緊。何可遽爾卸肩。都興阿著俟富明阿回營後。賞假一月。在營調理。候旨遵行。刻下軍務正在得手。該將軍雖在營養病。仍當督率所部各軍。嚴密防勒。毋稍鬆勁。淮甸苗逆。鴟張。唐訓方前奏。軍持五日之糧。而蒙邑被賊圍攻。尤為危緊。旬日以來。未據該撫續報情形。殊深廬繫。本日吳崇片奏。姚廣武等軍。偏攻韓村。及援應英翰。遏賊戴溝。童亭等處。情形著即嚴飭該總兵及副將。艾憲銀等。聯合皖軍。扼守要隘。實力進剿。並著探明臨淮近日軍情。及蒙城戰守之狀。與唐訓方聯絡策應。唐訓方是否驛路阻隔。致稽奏報。一切

情形。著吳崇隨時詳悉馳奏。將此由六百里各諭令知之。○又諭吳崇奏。請飭山東撫臣。仍行接撥黃國瑞勇隊月餉等語。黃國瑞一軍。赴東省剿匪。前經譚廷襄奏明。按月撥銀一萬兩。為添募勇隊之用。原議以三月為度。現在該總兵由沂郡覓境。陸續添募勇丁。又有黃開榜由宿營撥往勇丁一千一百名。需用益繁。若東省於三月以後。即將此項撥餉停止。則軍務即形棘手。清淮軍餉。正當短絀之時。勢難籌撥協濟。該總兵所部各軍。現駐東省。助剿白蓮池教匪。所需餉銀。自應由東省籌給。不得仍行仰給清淮。著閻敬銘。即將月撥黃國瑞添募勇隊餉銀一萬兩。仍行按月接解。毋令缺乏。致有貽誤。將此由五百里各諭令知之。○癸酉。諭內閣。前前任御史許其光。奏廣東信宜縣城失守兩年。未將該管道府參辦。已故道員劉式恕。前在陽春縣任內。失守城池。蒙混未辦。並督辦西江軍務

及土客事宜毫無成效。勞崇光率以積勞病故。奏請優卹等情。當經諭令晏端書查奏。茲據查明。奏請分別辦理。前任護理高廉道廣州府知府文玉。於該管縣城失守。咎有應得。該員業經另案降補。仍著交部照例議處。前任高州府知府現調廣西南甯府知府蔣立昂。於信宜失守時到任甫及三日。所有應得處分。著該部查明成案。酌量情節辦理。已故道員劉式恕。從前失守陽春縣城。雖據該署

督奏稱案卷無存。無從稽考。其督辦西江軍務。屢膺保薦。亦非無因。惟於查辦土客之案。不能設法解散。至今尚煩兵力。實屬辦理不善。劉式恕所得卹典。即著該部撤銷。○又諭張之萬。奏訪查庸劣不職各員。請分別休致。革職降補一摺。河南候補知府陸費灝。才識昏庸。難資表率。著以原品休致。候補知府現署陝州直隸州知州陸迺普。品行貪污。官聲平常。署汲縣知縣孫士傑。任性妄為。聲名狼

藉。署涪川縣知縣承綬。怠惰性成。難期振作。唐縣知縣高天寵。居心巧詐。不洽輿情。均著卽行革職。候補知縣汪爾船。年少輕浮。不知政體。著以府經歷縣丞降補。以肅官方。○諭議政王軍機大臣等。有人奏湖北臬司武蔚文。年力恐難勝任。並請飭回籍道員唐啟盛。赴湖北差委各摺。片。地方大吏辦理公事。全視其精神能否周到。原不必拘定年歲。如其年老而精力不衰。仍可肆應。卽令其理繁治

劇。亦不至以廢弛貽誤。若如摺內所奏。武蔚文步履漸衰。於所屬各員罕與接見。情形恐難得力。著官文嚴樹森查明該臬司年力果否衰頹。是否可勝臬司之任。於該省吏治防務。是否尚能得力。均著據實覆奏。毋稍徇隱。補用道員唐啟盛。前在署荊州守任內。政聲何如。於行軍戰守機宜。是否洞曉。現在告假回籍後。曾否銷假回鄂。均著官文嚴樹森詳細查明。如果該員政聲素著。才品兼優。現尚

未經銷假。卽著飭令仍赴湖北差委。俾得及時自效。母任投閒置散。原摺片各一件。均著鈔給閱看。將此各諭令知之。尋奏遵查武蔚文現在精力尚堪勝臬司之任。於吏治防務不至貽誤。唐際盛政聲素著。才華肆應有餘。惟於行軍戰守機宜尚不能洞徹。現飭假滿回鄂。聽候差委。報聞。○又諭張之萬等奏永毫擒匪餘燼復熾。東防喫重。移兵扼紮。並南路攻勦情形一摺。永毫賊匪蜂起。擒首蘇老

穆宗實錄

卷六八

夢等糾眾攻撲盧廟等集。楚擒回踞雒河。李大箇子等攻擾永城之丹城集等處。苗逆遣黨到處煽惑。渦河南北徧地匪蹤。該省東防喫重。亟應添集兵力以資堵勦。著張之萬毛昶熙卽飭駐防北路之李世玉帶領所部各軍並將添募壯勇迅速成軍。卽日拔隊東行。馳赴永城扼要駐紮。相機前進。務當以勦為防。毋得株守一隅。徒事遷延。張岡現已四面合圍。斷賊汲道。攻勦正在喫緊。且南路之賊

穆宗實錄

卷六八

渡淮竄入息境。有圖援張岡之信。此時豫軍以全力圍攻該處。自未能兼顧東路。致令功廢半途。惟歸陳一帶防務緊要。張之萬等惟當督飭各軍速將張岡攻克。以便移軍東路。迅掃逆氛。毋得曠日持久。因張岡一處牽掣大軍致誤全局。顧嘉衡前據該撫奏稱代理南陽府知府近日是否業已交卸。該員官聲政績如何。及一切公事是否均能實心辦理。並著張之萬詳查具奏。將此由六百里諭令知之。尋奏遵查顧嘉衡歷在南陽任內著有循聲。此次辦理團練亦屬認真。報聞。○又諭多隆阿奏官軍分路進逼賊巢獲勝。並趕造浮橋以利師行等摺片。多隆阿分布各軍由渭河南北進發。渭南各軍節次擊賊。痛加勦洗。已將零口等處之賊驅過戲河。官軍移營前進。現距臨潼僅十餘里。渭北各營亦已進紮交口。所辦甚屬妥協。所有臨潼西北尚有

三府里等處回巢。著卽督飭諸軍節節進勦。

並飭交口各營穩紮固守。俟南岸肅清。卽行合軍北岸。以勒青河。迤西賊營。並將曹克忠之軍移紮咸陽。以防賊之西竄。一俟礮船悉數造成。上下梭巡。賊匪不得偷渡往來。勦辦更必得手。臨潼一帶疏通。多隆阿之軍與省城聯合。並可兼顧西路。雷正綰卽可迅速馳救鳳岐。務令陝省逆回不得肆意西趨。為害甘省。甘省平涼等處危急。熙麟所部兵單將寡。馬德昭一軍。仍當懷遵疊次前諭。飭令赴

甘肅

三

甘。以資得力。多隆阿與西安聲息既通。馬德昭之軍。卽不至為省城牽留。其地方官吏。於轉運等項。有敢不竭力辦理。意存玩視。卽著多隆阿據實嚴叅。咨行地方大吏。立即撤辦。毋稍瞻顧。多隆阿自陳病未輕減。務須加意調理。並將各營患疫士卒。妥為拊循。將此由六百里諭令知之。○又諭多隆阿奏漢中情形緊要。非謀勇兼備之將。未能有裨。李雲麟前在安徽軍營。曾隸該大臣部下。心浮膽怯。

言大而夸。其性情才具。實非將將之才。以之遽膺統帥。深恐因而僨事等語。與駱秉章官文嚴樹森前後所奏。大相歧異。李雲麟疊經官文嚴樹森歷次保奏。堪膺統帥。駱秉章亦謂李雲麟可以獨當一面。自應確有見聞。惟茲據多隆阿奏稱。李雲麟曾隸該將軍麾下。所奏必非無因。誠恐其才或僅任偏裨。未必能勝督辦之任。現在漢中一帶。粵逆川匪。勾結蔓延。多隆阿由渭河南北兩岸進勦。勢難

甘肅

四

兼顧。若統兵調度。不得將才。糜餉老師。必至復蹈毛震壽故轍。關係甚非淺鮮。著官文駱秉章嚴樹森。迅將李雲麟性情才具。若何究竟。是否堪膺統帥。迅卽切實馳奏。毋得以保奏在先。稍涉含混。儻該員將來辦理漢南軍務。或至貽誤事機。必惟該督等是問。如李雲麟曾經親歷行間。著有成效。仍應據實奏聞。亦不必因多隆阿此奏。稍涉遷就也。原片著鈔給閱看。將此由六百里各密諭知之。○又

諭晏端書黃贊湯奏高州及肇羅等處軍務並勦辦廣海客匪情形一摺廣東巨逆陳金缸久踞信宜分布黨與東西奔突加以各處客匪煽動以致高州及肇慶羅定所屬均遭蹂躪茲據所奏卓興方耀兩軍分勦南山石骨及大井青垌等處賊巢而分竄陽春電白羅定陽江等境之賊均有另股及客匪相為勾結逆氛日肆蔓延勦辦殊未得手崑壽前往高州督辦此時應已抵高著卽審度機宜

督率諸軍實力勦辦前諭毛鴻賓等以道員唐啟蔭曾歷戎行可卽派往高州會同崑壽籌辦勦匪事宜仍著該督撫等迅卽飭令唐啟蔭速赴高州軍營幫同崑壽辦理並著崑壽於該員到營後與之悉心妥籌一切進勦機宜以資得力吳昌壽勦辦新甯廣海客匪尚未能破入寨城仍著飭令該司督率副將衛佐邦等軍速攻城賊痛殄逆氛毋任久踞毛鴻賓何日度嶺可抵新任迅速奏聞未到

以前晏端書於地方軍務不得以交卸在卽稍存膜視高州等屬之賊方熾崑壽以本省提督統兵勦辦尤屬責無旁貸黃贊湯履任後於粵省情形自己洞悉該督撫等均有地方之責務須一切實力講求冀安疆圉以副委任將此由六百里各諭令知之○予河南新蔡陣亡守備徐英杰等十二員祭葬世職加等○甲戌諭內閣倉場侍郎奏上年漕糧抵通較遲懇請展限辦理題銷冊籍等語上

年各處漕糧抵通因運河凍阻改辦陸運諸費周章以致題銷冊籍造送遲延著照所請所有該倉場本年應行題報上年到通漕糧銷算奏銷各冊准其展限三箇月統於八月底具題毋再延緩○又諭倉場侍郎奏倉廩失去米石請將監督議處並據查倉給事中奏請將監督等察議各等語本月十八日夜間本裕倉西南牆隅有數人越出查驗失去私米數石至二十日始據該汛兵役盤獲私

米二石有餘。賊犯尚在逃。未獲。倉儲重地。膽敢越牆偷竊米石。實屬肆行無忌。該倉監督等。既未能防範於前。兵丁盤獲米石。又未將人犯並獲。均屬疏失。裕善司智及該倉營員弁等。均著交部分別議處。仍著步軍統領衙門嚴緝賊賊。務獲嚴辦。不准一名漏網。○乙亥。以廣西克復潯州府城出力。賞郎中蔣益清遊擊胡益智等花翎。知縣李國賢等藍翎。餘加銜升敘有差。○予直隸冀州等處陣亡

實錄卷六十八

四

殉難舉人劉清祺等紳民婦女五千一百一十八名口分別旌卹如例。○是月補行同治元年直隸省軍政卓異官三員。議敘如例。

大清穆宗繼天開運受中居正保大定功聖智誠孝信敏恭寬毅皇帝實錄卷之六十八

實錄卷六十八

四

總兵田宗揚等由馬陵一帶步步進逼以期規復丹陽。所籌尚中竅要。惟鎮城防兵數止萬人。攻守兼籌。頗形單薄。刻下南北兩岸官軍連營進逼。難保該逆不乘閒銑走。窺伺鎮防。馮子材務當妥籌戰守。飭令內外各城暨雲臺寶蓋諸山營壘。加意防範。毋稍大意。其田宗揚等軍進規丹陽。尤當謀出萬全。相機進取。不可輕率貪功。致有挫失。北岸自二浦九洲洲收復後。逆賊渡江之路已斷。揚城防務漸可稍鬆。著都興阿。富明阿。卽調派勁軍渡江而南。交馮子材等妥為調遣。力圖進取。以厚兵力而牽賊勢。至二浦九洲等洲克復情形。迄今尚未據曾國藩奏報。前據都興阿等奏到。當經寄諭該大臣。迅將詳細情形。及水陸進取機宜。迅速馳奏。此時諒已奏報在途。其馮子材等規復丹陽進兵機宜。並著該大臣妥籌指示。策應調度。以期互相掎角。無誤戎機。唐訓方前奏為苗練所困。情形甚為

危急。連日總未得其奏報。塵繫殊深。疊經諭令曾國藩設法撥兵馳援。現在臨淮壽州蒙城等處。該大臣曾否派兵前往救應。如何布置。及各處處現在情形如何。著曾國藩迅速馳奏。將此由六百里各諭令知之。○又諭張亮基奏。攻勦思南府苗教各匪。立解城圍。印江縣境肅清。並克復普安安南縣城各摺片。思南府屬東西兩河白號教匪。句結石阡府屬黃號。並各寨苗匪。竄擾思南府城。分股攻撲印江縣地方。經總兵劉義方等分投進勦。疊將印江縣屬齊梁山等各賊營埽蕩。進破饒家壩大小巖關。遂解思郡城圍。復將小寨坨老巢攻克。斬獲甚多。並將偽逆首李侍賢等三百八十餘名正法。勦辦尚屬得手。黔省下游股匪。屢勦屢撫。屢降屢叛。蔓延數載。迄今未絕根株。現在印江縣境。雖已肅清。而思南府屬大小坨大壩場等處。餘孽未淨。從前韓超。田興怒。辦理貴州軍務。未能悉協機宜。

故軍務至今未見起色。勞崇光、張亮基初抵該省，務須力圖振作。於該省將士趙德昌、楊巖寶、劉義方等，加意駕馭籠絡，俾其知感。知畏奮力殺賊，以後各處接仗情形，尤當飭令從實稟報，不准欺飾。普安、安南均經攻克，惟該二縣踞匪現在逃往何處，未據張亮基聲敘明晰。著勞崇光、張亮基確切查明具奏，並飭令在事文武探賊所向，盡力窮追，悉數殄滅。毋令復行嘯聚。總兵楊巖寶等現由壩灘進取貞豐。著勞崇光等即飭令該總兵速行攻克。俟該州城收復後，即迅飭三路兵練合力進圖興義府城，以期肅清上游，力固邊防。毋稍延誤。將此由五百里各諭令知之。○又諭張亮基奏黔省餉需支絀，委員赴川催餉辦鹽，請飭川省迅速籌撥一摺。據稱黔省瘠苦，向賴各省協餉。軍興以來，協濟寥寥。藩糧兩庫撥括一空。各屬地下類多蠲免，倉穀動用殆盡。現在通省兵練不下五六萬人所用

餉糈，皆張亮基在川時所集捐款，藉以敷衍而無源之水。易虞其竭，自應及早籌畫，以期源源接濟。川省歷年部撥貴州協餉等銀七十餘萬兩，屢催未解，不得已咨明該督請速撥鹽斤合銀二十萬兩之數，以濟急需。各等語。張亮基恐川省協濟餉需，一時無此鉅款，擬以鹽斤通融抵撥。其需餉情形實為緊迫。著駱秉章轉飭司道速撥約值價銀二十萬兩之鹽。陸續兌交該省委員周守正承領，不拘川黔地面，聽其變價解繳。經過地方免其納稅所需腳價，或以鹽運鹽，或以長價作為運費。均著隨時會同酌辦，以期川黔兩省均有裨益。將此由五百里諭令知之。○以克復貴州普安縣城，復已革署知縣陳澍南職。○旌表守正捐軀湖北應山縣民傅從重妻周氏。○丁丑諭內閣上年因

文宗顯皇帝

孝德顯皇后梓宮奉移

山陵曾經降旨將沿途經過之大興通州三河
薊州遵化等州縣本年地丁錢糧加恩分別
蠲免並將由京至遵化州一帶經過地方凡
有平毀麥苗者加恩每畝賞給銀一錢以資
補助茲據劉長佑奏上年
梓宮奉移

山陵計自京起又自宛平縣境內之田村起至
隆福寺止尚有經由宛平縣地界應與大興
等州縣共沐恩施至遵化州地面並未經由
不否無庸蠲免等語著照所請所有宛平縣
地方同治元年地丁錢糧著蠲免十分之五
應賞農民籽種銀兩並著與大興等州縣一
律辦理其遵化州地面既未經由與民田無
礙卽著無庸蠲免以示區別○又諭劉長佑
奏公府官事官員私發諭帖誣提監犯請旨
提訊一摺懷來縣監犯李進珍係聚眾抗差
滋事罪應擬遣尚未起解之囚乃該犯李和
等輒敢商同鎮國公桂池府中管事官員張

應參卽張小曾許給銀兩私發諭帖捏稱提
取莊頭李進珍赴京辦事差令護軍校兆惠
前往因兆惠一時不克分身復覓得申文達
頂充持諭至懷來縣守提當經該縣知縣郭
會昌查驗諭帖並無印信且提訊李進珍亦
無充當莊頭之事情節可疑將申文達及跟
隨同往之王士衡王茂吉徐太董大海佟隆
順並李和李繼藍等先後拏獲訊辦此案李
和等設法誣提監犯實屬膽大妄為目無法

紀而張應參以公府管事官員輒敢通同舞
弊聽屬傳提尤宜嚴行訊辦徹底根究著宗
人府飭令貴池迅將張應參卽張小曾及護
軍校兆惠一併交出由順天府派員押赴直
隸交劉長佑歸案嚴行審辦定擬具奏○又
諭前因御史王道墉奏參已革直隸臬司孫
治各款蹟當交直隸總督查明據實具奏茲
據劉長佑奏稱按款確查孫治係進士出身
改就知縣屢以勞績保升知府既非捐納自

無應交捐項。其餘臬司任內奉旨革職。卽日却事。亦無哀求留臺情事。糧臺支發各款業經報部覈銷。其知縣楊國杞因捐輸烏槍等件。經通商大臣等奏留。並非該革員詳保。且與該革員亦非親戚。陳金式以試用知縣在直五載有餘。所得三次保舉。旣非盡由該革員所保。亦非統因幫辦糧臺而得。至州縣拏賊各案所辦。均經前督批示。該革員並未另有劄諭不妥。以致州縣諱盜之件各等語。已

革臬司孫治被叅各款。旣經劉長佑遵旨詳查。並無實據。該御史所奏著無庸議。○諭議政王軍機大臣等。劉長佑奏全軍出境進圖元惡。仍須兩省夾擊。並江長貴到省各摺片。東省降賊宋景詩負隅自固。萬無姑容之理。劉長佑現與臬司王榕吉策勵諸軍。督同前進。於臨清之尖莊。館陶之馬頭。及南館陶一帶河口。擇地安營。並劄飭祝壇。伊綿阿。及冠縣令孫善述各帶兵勇鄉團。聯絡進剿。復令

山東署臬司呼震總兵保德親督兵勇。會合夾擊。一面咨令蘇克金由阜城移營前進。恒齡等馬隊由臨清東西兩路渡河包剿。布置尚為周妥。惟東南兩路尚慮空虛。劉長佑進剿之軍自易得手。其乘虛遠竄。轉為流寇。不可不慮。丁寶楨一軍前已諭令閻敬銘飭赴東昌會同恒齡等軍併力剿辦。著該撫迅卽飭令速往。以厚兵力。其恒齡蘇克金等軍並著僧格林沁迅飭前進。會同夾擊。劉長佑務當布置嚴密。悉數殲除。不可輕率從事。致令乘隙竄逸。又復回擾直境。江長貴前在徽浙等處剿賊尚屬勇往。著劉長佑飭令該署提督隨營剿賊。並著隨時察看。如能帶兵得力。卽行奏聞。本日據唐訓方奏臨軍戰守情形。並訥木津桂錫楨兩軍現已赴東等語。皖北軍情緊要異常。蒙城糧道不通。孤危尤甚。唐訓方前派訥木津桂錫楨會同潁州守英翰在高鑪集一帶梭巡擊賊。現復撤回山東。此

時北路軍營既不能添兵援皖。豈得復將該處留防兵勇撤回。著僧格林沁卽行查明。訥木津等兵勇。因何撤回東省。並著飭令仍赴蒙城。聽候唐訓方調遣。毋稍延誤。將此由六百里各諭令知之。○又諭劉長佑。崇厚奏請將江海關欠解免稅單銀撥還濟餉一摺。劉長佑現辦三省交界勦匪事宜。需餉甚殷。本省既無鉅款可籌。協餉又難如期解至。若不亟為籌畫。飢軍譁潰堪虞。著李鴻章自五月起。由上海稅釐項下。每月撥還欠解海關免稅單銀二萬兩。按月解赴直隸軍營。毋稍延緩。本日又據嚴樹森奏。奉撥協浙軍餉。請飭江海關撥兌解濟一摺。捻逆闖入鄂疆。甫經追勦出境。蘇常逆匪北渡。擾皖窺鄂。防兵四布。軍食已虞缺乏。而京協各餉尤屬需用浩繁。此時若再另撥協浙鉅款。實屬無項可籌。嚴樹森所奏亦係實情。著李鴻章飭令江海關於代徵湖北洋稅項下。應撥之款迅速動

撥銀十萬兩。解赴浙江軍營。作為鄂省協浙之餉。其餘欠款並著加數解還鄂省。刻下直隸浙江軍務均形喫緊。務當力籌接濟。毋令停兵待餉。致誤戎機。李鴻章素顧大局。諒不至意存推諉也。將此由五百里諭令知之。○又諭半月以來。未接皖省奏報軍情。正深廑繫。茲據唐訓方奏。臨軍疊戰。南岸獲勝。並專州蒙城現仍危緊。力籌戰守一摺。皖省捻苗勾結。陰狡異常。其勢甚熾。唐訓方兵單餉絀。督率諸軍竭力戰守。其淮河南岸賊黨威脅各圩。抽丁勒糧。尤為可惡。現經張得勝劉明典等以少擊眾。遁回李家疇賊壘死守。並經唐訓方派令克蒙額等軍將竄擾定遠及王莊之捻股擊回。撥兵屯守。又將渦河兩岸之上洪捻逆後隊及懷遠賊划擊走。張得勝等軍遂偪黑窯賊壘而營。普承堯等滾營進偪。分紮李家疇及下洪迤東。俾淮南苗黨百數十圩不為逆苗牽動。所辦尚屬穩妥。現當淮

水大漲水軍非得戈船不能制勝著曾國藩迅卽飭催黃翼升師船星駛赴淮與唐訓方所派普承堯等軍速將懷遠一城力圖克復逆勢自必就衰並著該督撫等分飭將擬學等軍乘勝再將壽南逆壘進攻英翰兵練將高鑑龍山之賊埽蕩以通壽蒙兩處糧道臨軍糧餉告竭曾國藩協餉萬金已到其閩海關協餉唐訓方迅卽催提以資散放成大吉一軍前據曾國藩奏聞業經催飭赴援壽州

仍著飛催前進以解壽圍蒙城擊退大股髮捻豫省續撥餉銀應亦提到佐領訥木津守備桂錫楨馬隊何以據回東省該撫摺內聲敘未詳著詳悉奏聞丁寶楨之軍現已到東東省軍務正資分投勦辦援皖之師恐僧格林沁未必能再有派撥至皖省髮逆已鬆而苗逆之患方熾唐訓方兵力不厚且餉需絀乏臨淮壽州蒙城等處一有疏虞大局卽難收拾曾國藩責無旁貸一切調度機宜著隨

時與唐訓方妥籌辦理唐訓方以臨淮之軍不敷分布擬調總兵何紹彩四營以為遊擊之師此軍曾國藩前奏為鮑超派守西河此時鮑超之軍已由二浦轉戰而前甯防現尚無事卽著曾國藩速飭該總兵迅率所部四營馳赴皖北歸唐訓方調遣如何紹彩之軍已回楚省卽著曾國藩飛咨官文等迅速飭令赴皖將此由六百里各諭令知之○以翰林院編修彭瑞毓充日講起居注官侍讀學士孫鏘鳴署日講起居注官○以虧那公項湖北知縣喬雲苓遊擊王心安革職訊辦○以安徽賈家圩等處督隊出力免已革總兵官普承堯遣戍仍留營○予江蘇無錫殉難文生華黼臣等男婦二十一名口分別旌卹如例○戊寅諭議政王軍機大臣等前因潘祖蔭丁壽昌先後奏請酌減江浙等處漕額當交戶部議奏嗣據曾國藩等奏請減蘇松太三屬漕額因特降諭旨宣示令曾國藩李

鴻章分別查明折衷議減茲據戶部奏稱江蘇之蘇松常鎮太四府一州浙江之杭嘉湖三府盡遭蹂躪民不聊生現在蘇松太三屬已奉特恩准予量減常鎮漕額雖較輕於蘇松等屬而比之各省額數究形其重似應一律量加體恤其浙江杭嘉湖三府並請飭左宗棠確查稅則重輕分成酌減各等語漕糧為天庾正供京師仰食東南相沿已久必須通籌熟計中外兼權若竟將蘇松太三屬額賦驟減十分之六而他屬不得均霑於倉儲既有關係於辦法亦欠均平著曾國藩李鴻章按照戶部酌減分數將蘇松常鎮太等屬漕糧各按上中下賦則一體分別議減以昭平允並將各該州縣等田額若干酌減若干分析開列奏聞請旨務令下恤民生而不至上虧國用方為妥善至浙省疊遭兵燹小民流離失所殊堪軫念自應將該省漕糧量予減免以示公溥之仁著左宗棠通飭杭嘉湖

三屬將實在應徵漕糧稅則詳細確查各按重輕分成量減奏明辦理原摺片均著鈔給閱看將此由五百里各諭令知之○庚辰諭議政王軍機大臣等曾國藩奏官軍連克二浦草嶺峽燕子磯等數隘並力破九洲洲江面肅清暨陳近日各路軍情等摺片沈葆楨奏谷源江村等處獲勝饒郡練勇雕勦青田鋪之賊韓進春一軍苦戰雞公山之賊又會合劉于浚水軍於小港擊賊疊勝湖口援軍已到劉典等已進紮規田街各摺片覽奏慰悅鮑超彭玉麟等水陸各軍由江浦浦口席卷而前羣賊望風奔靡其勢頗壯曾國藩現派蕭慶衍留駐二浦以固北岸之防鮑超渡江南岸進紮孝陵衛以合金陵之圍洪逆留偽忠逆共圖死守勢成阱檻惟青陽之軍攻石埭縣城尚未即下著曾國藩迅即催提江忠義一軍速由湖口與饒軍並進將江境各賊悉力驅除即各率所部由石太進取東壩

合圖金陵必更易於得手。金陵賊勢日蹙。宜防困獸之鬬。恐有拚死併力。竄往江西之舉。曾國藩左宗棠沈葆楨務當設法協力。嚴密扼堵。不可任令竄往江境。壽州一城。經曾國藩檄周寬世成大吉兩軍。併力赴援。當可無虞。而蒙城被圍尤緊。臨淮官軍。兵力甚單。唐訓方竭力撐拄。前曾奏明調何紹彩所部四營赴臨為助。現在蕪湖金柱關一帶。百里已無賊蹤。何紹彩之軍。在襄家渡等處。連破賊壘。諒可抽調。著卽迅遵前諭。撥往淮南。歸唐訓方調遣。蘇郡之賊。空虛。滬軍應可乘間進圖。江忠義李榕等軍。將由石太以進東壩。浙軍能否分兵會攻廣德。以期聯絡。著左宗棠李鴻章等相機進取。輪船濟賊。情殊可惡。已飭總理衙門。照會英法各國公使。於金陵未克以前。不得在該處城外停泊輪船。齎糧於賊。其長江上下師船。如有暗中以糧售賊者。尤應嚴行查禁。務令斷絕。二浦克復。李世忠

作何動靜。曾國藩隨時奏聞。北岸之防。並著曾國藩隨時知會都興阿。富明阿。與蕭慶行之軍。妥籌堵禦。日前馮子材等奏鎮防禦賊情形。曾諭都興阿等酌由北岸濟師。鎮城京口要地。此時應與圍攻金陵之師。及滬軍之進圖蘇郡者。如何聯絡。互相接應之處。並著曾國藩等因時策畫指示。其欲竄江西之偽襄王劉逆。乘虛圖越。昌江上游。以犯婺樂。經祥果等營分路截剿。上游穩固。鄱都湖彭郡匪雖尚鴟張。而此時信防安靜。則東路無虞。專事西路。據沈葆楨奏稱。劉典智勇足備。此軍由左宗棠派往。一俟江忠義軍抵湖口。卽著飭令會合掃蕩。刻下陶家渡賊壘。劉典擬從茅屋嶺繞擊之。是否卽克。著卽飭令與韓進春。劉于濤等軍。隨時策應。饒郡練勇。將青田鋪之賊。以數百人乘夜雕剿。出奇制勝。甚屬可嘉。其紳士練卒出力之應行獎勵者。著沈葆楨查明保奏。所斬逆酋。諒係賊中頭目。

是否確係李遠繼。仍卽查明奏聞。將此由六百里各諭令知之。○又諭穆騰阿等奏擊退撲城回逆。並訓練官兵請獎。暨滿營月餉。仍請按四成籌放各摺片。瑛榮奏漢中戰守情形一片。回逆疊次撲犯省城。勢甚兇惡。經穆騰阿。瑛榮。伊昌阿等督兵守城。開礮轟擊。復經馬德昭等各營力戰。城內亦出兵夾擊。賊向東南敗遁。該匪雖暫時退卻。難保不去而復來。穆騰阿等務當加意嚴防。不可稍形疏懈。此股賊匪。究由何處而來。卽由倉頭等處敗向西趨。亦必有附近省城地方巢穴。以為嘯聚之所。現在敗竄何處。是否仍歸原處巢穴。該將軍等。但稱來自西北。遁向東南。於賊中情形。聲敘殊未詳晰。著卽聲明該匪屯聚處所。派兵往攻。覆其巢穴。自可埽蕩逆氛。現在省城兵力已厚。瑛榮當分兵四出。按剿。不得株守城廂。任賊來去自如。致令兇燄日熾。滿營兵丁月餉。前經諭令瑛榮仍按四成妥

籌接濟。現據穆騰阿等奏稱。該營餉銀。自二月至今。仍按二成支領。兵丁困苦異常。瑛榮近在同城。目睹情形。豈容膜視。著卽設法接濟。仍按四成搭放月餉。俾該營兵丁稍資餬口。不准再事稽延。復行推諉。穆騰阿等另摺奏營兵技藝訓練嫺熟。請獎出力員弁一摺。著暫行存記。俟續有勞績。再行彙保。李恒在鄂患病。驟難痊癒。李雲麟丁憂回旗。漢中軍務前已諭令張由庚暫行督辦。並諭令李雲麟於回旗後。仍赴漢中。李桓及李雲麟所部兵勇。已由官文嚴樹森派令梁作楫帶赴興安。著瑛榮迅速迎提。催令前援漢中。並飭張由庚。毛震壽撫輯兵勇。力解城圍。毋稍延誤。瑛榮另片奏辦理勦撫回眾。密陳情形等語。現在回逆屢撲省城。並敢聲言報復兇悖之性。並未稍戢。且該逆詭詐百出。尤須時刻嚴防。該撫惟當一意主勦。不可游移無定。惑於撫議。致墮奸謀。將此由六百里各諭令知之。

○又諭瑛榮奏漢南軍食無從採辦請於川楚兩省籌運米石一摺。漢南兵勇日增。川楚援師次第將至。若兵糈無出。不但停兵待餉。貽誤戎機。且飢軍一經譁潰。大局何堪設想。亟應豫籌接濟。以免臨時匱乏。著官文嚴樹森。駱秉章督飭安襄鄖荆道。川北道。綏定府。知府。按照瑛榮所奏各情。迅速籌辦。源源解濟。其米價運費等項。均由各該省陝商捐輸項下。提還歸款。將此由五百里各諭令知之。

○以故衍聖公孔繁灝子祥珂襲爵。○以江西辦理釐務。分別勸懲。予知縣吳澐等升敘有差。革縣丞黃銳昌等職。○以克復江蘇江浦浦口。二城。暨九洑洲等處要隘。賞總兵官李朝斌。成發。翔黃馬褂。總兵官李助發。顏海仙。羅宏裕。傅敏才。副將唐敏義。參將許雲發。陶樹恩。巴圖魯名號。餘加銜升敘有差。予陣亡副將烏桂芳。胡俊友。祭葬世職加等。○以安徽克復甯國府城。暨西河等處。疊復要隘。

出力。賞總兵官宋國永。婁雲慶。黃馬褂。總兵官周有勝。王清泉。副將鄧雲貴。蕭連貴。王三星。曹成武。周鵬舉。章茂。參將周德馨。吳雲集。遊擊謝榮勝。裴人傑。巴圖魯名號。知府張秉鈞。參將何田玉等。花翎。知縣李公選等。藍翎。餘加銜升敘有差。○以安徽潁西。疊破捻圩。暨攻克運漕鎮。出力。賞副將歐陽爵。和李榮華。李致和。巴圖魯名號。都司金茂榮等。花翎。把總劉連餘等。藍翎。餘加銜升敘有差。○以

陝西上元關等處防勦出力。賞知州周藩壽。守備胡尚瀛等。花翎。雲騎尉靳炳等。藍翎。餘加銜升敘有差。○以接仗不力。摘湖北副將蕭勝南。劉得騰。都司周華山。頂翎。並奪蕭勝南勇號。均留營。○予江雞公山陣亡千總韓鳳飛。祭葬世職加等。○停止陝西省本年例進貢物。○辛巳。予安徽甯國殉難衛千總錢賡慶。祭葬世職。妻張氏。弟崇慶。分別旌卹如例。○壬午。以擅離職守。暨操防不力。山西

參將靈嵩都司景泰守備王光壽分別革職降補○癸未以神靈顯應加湖南會同縣三王神封號○曰護國○諭內閣前因升任順天府府尹給事中林壽圖奏慶端顛預廢弛倚知府劉翊宸等為心腹納賄營私專務挾括各情當經諭令耆齡徐宗幹逐款訪查秉公叅辦茲據耆齡徐宗幹奏遵查被叅各員情節分別擬議等語此案除前任閩浙總督慶端荒樂廢弛前任福建巡撫瑞璜老病昏憤

業經分別革職休致已革候補道劉翊宸知府胡斌被叅各節提訊供情尚無捏飾覈案相符幕友陳耀庭引綫餽獻細訪亦無確據歸另案擬結外已革建甯府知府張文斌抽收釐金並未侵那入己停撤以後尚無私抽情弊城工係紳董經手亦無浮冒開銷各處關塞均經嚴密防守督勸捐輸隨收隨報因各捐生未開履歷送府致未請獎其填給府印實收據稱因司收未到暫刊行用尚係實

情已革候補知府張其曜前署崇安縣事經省局及知府劄飭捐銀一萬一千八百餘兩已分別解府並無填少收多抑勒數萬情事其咸豐九年錢糧所徵不及六分在未奉騰黃之先亦非違例急徵團練經費歸紳士經理並未假手官吏辦團事竣即行回省實未席卷先遁捐升知府係咸豐九年在任時奉派官捐得邀獎敘查覈案卷均屬相符張文斌張其曜前因漏洩軍情業經革職歸案審

辦據張文斌供前為翼長適染寒證其時廖士彥函催撥餉當由幕友函復敘及慶端有酌裁廖勇之語張其曜供彼時辦大營糧臺因總督諭裁廖勇而該革道疊函催餉因以此言答復別無交結欺蒙情事所供尚無捏飾張文斌張其曜均著開復革職處分惟於軍務重情函札未能審慎亦有不合仍著交部議處前代理崇安縣知縣劉振榮在任勸捐所捐銀兩有另加三成歸補聯局經費名

目。當時並未明白曉示。以致各捐生紛紛上控。難保無浮銷情弊。耆齡等已飭省局覈實查明給獎。如查有隱混情事。即將劉振榮從重叅辦。崇安縣知縣戴昌文。於馮席珍帶勇到境。並不妥為安置。以致勒索擾。淫掠傷人。雖查無導引勒索確據。而因循不職。坐視丁勇擾害閭閻。實屬咎無可諉。著卽革職。永不敘用。已革道員馮席珍。縱勇騷擾。實堪痛恨。前經李鴻章奏。參已有旨。發往軍臺效力。

覈其情節。不足蔽辜。馮席珍著永不敘用。仍從重改發新疆充當苦差。候補縣丞秦倬勒捐生事。著李鴻章嚴行查拏。解往福建審辦。○又諭。前因耆齡徐宗幹奏。遵查章琮等被叅貪劣各款。案據分明。猶復恃符狡展。當經降旨。將道員劉翊宸等先行革職。歸案訊辦。並令將該員等侵吞捐項銀兩。著落追賠。茲據徐宗幹奏。審明捐務舞弊各員按律擬結。並將各員應繳銀兩。已完未完數目。開單呈

覽一摺。此案已革道員章琮及革員朱仁來。墳等擅動公項。顯係朋分私用。業經革職。並著永不敘用。其應繳銀兩。除完繳外。餘欠仍著監追。已革庫大使屠瑩。著俟提解到閩。訊供究辦。革書林玉堂等欠數尚多。仍著嚴行追比。四川成綿龍茂道鍾峻。於福州府任內。失察官錢局舞弊處分。業經部議完結。著免其重科。知縣曹學偉。情託局員李鼎蒙抵報銷。李鼎復浮銷經費。著一併革職。永不敘用。李鼎業將賠款繳完。著先行提禁。曹學偉仍著監追。已革同知胡斌。夥同濫支稅銀。業經革職。並著永不敘用。仍押令賠交銀兩。已革道員劉翊宸。秦金鑑。應繳賠款。已據依限清完。均著開復革職處分。仍交部議處。已革知府陳謙恩。雖無侵那情事。而收支款項。並不隨時清釐。以致重利借貸。經費亦形支絀。業經革職。並著永不敘用。其應繳欠款。仍著監追。以上革職永不敘用各員。其應行賠繳之

項一俟清完。卽行具奏。其僅有賠項。並無參款牽涉者。著卽於賠款清完後。遞解回籍。不准在省逗遛。至各局濫支稅釐正項。及無著商欠。前經分別著賠。除裕鐸等均經全完外。其餘均未清繳。著將在省各員吏。嚴行勒追。離省之員。分咨旗籍催繳。其部飯火耗等款。未完各官吏。著交部分別覈議治罪。○又諭前因解任福建布政使裕鐸。被參狎妓荒蕪各款。供證確鑿。猶敢飾詞強辯。曾經降旨。將

裕鐸等先行革職。交耆齡、徐宗幹提集全案人證。嚴審定擬。茲據徐宗幹奏。訊明裕鐸被參各款。並知縣私提人犯教供。分別定擬各等語。裕鐸以監司大員。飲譙劣紳姚鏡圖之家。倡優雜處。實屬不自檢束。有玷官箴。僅予革職。不足蔽辜。著革職永不敘用。以儆官邪。知縣王炳。訊無確證。著准其開復原官。該員現在指捐山東知縣。卽著勒令出省。不准逗遛。前署汀漳龍道汪茹鑑。於姚鏡圖邀飲時。

並未前往。著免其置議。已革知州姚鏡圖。驕盈傲慢。不協鄉評。雖訊無結納官長招搖射利實據。究屬荒謬。業經革職。仍著永不敘用。前代理浦城縣知縣柯祿。並非承審之員。輒將案內要證妓女提問。雖無幕友教供情事。亦屬不合。著交部議處。○諭議政王軍機大臣等。慶昫等奏。詳查甯夏一帶軍務情形。請添兵籌餉。擇任賢能以除積習。而振軍威。一摺。據稱甘省回匪之反覆無常。由地方官首

重求和。抑漢扶回。更張逆燄。各處義民集團自衛。足見其復仇志切。且甯郡一城。眾逾十萬。其間豈無殷富。良由地方官每事誅求。假公濟私。商民目官場為騙局。故不肯協力接濟等語。所奏自係實在情形。該將軍請飭戶部行行籌撥實銀二十萬兩。解赴甯夏郡城備用。並請飭僧格林沁撥兵一二千名。前來會剿。未免於京外情形未盡諳悉。前因部庫支絀。經該部奏請嚴催各省設法籌解。數月

以來所需京餉僅可勉強支持一時安能有此鉅款撥濟甯郡惟需餉情形甚緊業經諭令戶部迅速設法籌解僧格林沁回勒山東股匪馬步各隊除調出外存營無多攻勦正當喫緊又豈能抽調勁旅遠赴甯城第甯夏甯朔平羅等縣疊被回匪擾害士民紛紛求救而熙麟駐紮慶陽相距較遠恩麟護理督篆省垣事務綦繁均難兼顧慶昫現駐甯夏於一切尚能諳練著熙麟恩麟迅卽飭知附近甯夏一帶之道府州縣及武職各員就近將辦理回匪情形稟商慶昫卽由慶昫剴飭遵行免致熙麟等鞭長莫及慶昫惟當督飭該鎮道等激勵旗綠各營聯絡各處鄉團分投勦洗俾漢民得所憑藉不至慘遭焚劫而回匪亦不敢輕視官軍方為妥善甯夏縣知縣彭慶章聲名狼藉劣蹟昭著且有收受回匪錢米情事卽著慶昫咨會熙麟等從嚴叅辦以順輿情察吏乃安民之本該督等所屬

文武員弁務當隨時甄劾力求整頓毋得稍事姑容慶昫業經咨行恩麟遴選老誠諳練之員赴甯夏差委卽著恩麟認真揀派前往將從前辦理不善之地方官一併撤回卽以此次派往之員酌量委署期於破除積習慶昫卽可督率新任各員勸導商民量力捐輸藉資接濟至請令部臣特派司員數人攜帶例案馳赴甯郡等語部員出京恐滋擾累各路軍營從無似此辦法該將軍如慮例案不全難除積弊可咨明戶部發給則例等書俾得查照辦理將此由六百里諭知慶昫熙麟並傳諭恩麟知之○以鑲黃旗蒙古副都統寶善署右翼前鋒統領正紅旗漢軍副都統裕瑞署正藍旗護軍統領○以福建邵武防勦竄匪出力賞遊擊吳連陞花翎署知縣張夢元藍翎餘加銜升敘有差○蠲免江西南城義甯奉新靖安武甯高安新昌安義鉛山上高永豐吉水金谿東鄉南豐新城瀘谿玉

山。弋陽。清。活。新。淦。峽。江。臨。川。建。昌。德。化。德。安。瑞。昌。湖。口。二。十。八。州。縣。暨。九。江。府。同。知。所。屬。被。擾。被。水。地。方。舊。欠。額。賦。雜。課。有。差。○。甲。申。上。詣。

奉先殿

壽皇殿行禮○遣官祭

文宗顯皇帝暫安寢殿○諭議政王軍機大臣等。有人奏。酷吏苛斂。勒派。縱盜虐民。請飭查辦。一摺。據稱。署安州知州吳寶琛。縱容伊妹。

夫李五等招搖公事。加增糧租。勒派民間差費等項。任聽外委常國順開設賭局。買本州民婦民女為妾。復轉賣與練總李公異等。該州生員南士奎。監生馬存真。家被劫。該員受意。訟棍徐啟運。恐嚇南士奎。將被劫原呈。改重就輕。又恐嚇馬存真。改寫原呈。馬存真不允。遂屬常國順不必遽行緝拏。請飭查辦等語。州縣為親民之官。關繫最為緊要。似此倚勢虐民。卑鄙無恥。無惡不作。實為地方之害。

此等貪劣不職之員。未可稍事姑容。著劉長佑將吳寶琛被叅各款。並外委常國順等狼狽為奸各情。嚴密訪查。如果屬實。卽著嚴行叅奏。按律懲辦。毋得稍涉徇隱。又據奏廣平府知府余承恩將才素裕。吏治未諳。請以武職改補等語。余承恩是否難勝文員之任。並著劉長佑一併查明具奏。原摺片均著鈔給閱看。將此諭令知之。尋奏。遵查吳寶琛常國順。被叅各款。均無實據。惟吳寶琛派雇兵差車輛。未將數目詳報。應請交部議處。常國順年老不能得力。應咨部斥革。余承恩請俟軍務稍定。再改武職從之。○又諭袁甲三奏。籌解蒙城米糧。並籌東路防務。請調東省馬隊。招募馬勇各摺片。因前蒙城現糧僅數五日。臨淮糧食垂盡。諭令袁甲三在陳郡設法勸捐。運赴臨淮。蒙城兩處。茲據袁甲三奏。稱陳郡麥收歉薄。糧價騰踊。現勸積糧禦賊。已覺萬分為難。同時並辦勸捐。尤覺無從措手。且

水道既梗。由旱路繞運蒙城。亦須曠日持久。現於亳州太和阜陽之高家等寨。勸諭該練總高錫齡等。籌送蒙城糧食千數百石。許以如期運到。從優請獎。其力能捐輸者。作為捐辦。或作為墊辦。再行籌款歸還等語。所籌尚屬周妥。卽著照所擬迅速辦理。並著檄令該地方官。迅飭該練總等。速行運往。期於必到。以濟危急。蒙城北路糧道。尚有宿州一綫可通。並著吳棠督飭徐州鎮道多籌糧米。迅由徐宿接濟。無論如何為難。總當設法速行運到。至臨淮距陳郡千里。惟有下游清淮水路就近可通。並著吳棠速運糧米解往。毋稍遲誤。前因臨淮蒙城米糧垂盡。諭令吳棠設法解運糧餉濟急。迄今將及一月。未據該道督覆奏。皖北情形危迫如此。該道督視同膜外。毫不關心。實屬玩泄。著卽懷遵諭旨。趕緊籌辦。不准稍事推延。致誤大局。歸陳等處團勇。雖不能越境勦賊。然在本境防堵。總可聯絡

聲勢。藉資禦侮。袁甲三務當與毛昶熙設法。鼓勵各團勇。齊心禦賊。毋令闖入本境。並曉諭各圩寨。力圖自拔。倒戈向賊。以孤苗逆之勢。張岡一帶。擒匪卽著張之萬毛昶熙迅速攻克。以便移軍進逼永亳。以勦為防。將此由六百里各諭令知之。○又諭前因袁甲三奏調東三省馬隊赴豫防勦。當以該處官兵疊經各路軍營調撥。存營無多。諭令官文於荊州旗營內挑選赴豫。本日又據袁甲三奏苗逆勾結捻匪。日肆鴟張。潁亳一帶。唐訓方鞭長莫及。豫省歸陳防勦喫重。僧格林沁以勦辦東省股匪。未克南征。而豫軍兵力不敷。萬難分撥。非於皖豫之間另籌一軍。不可。現在鄂省能否調撥。尚未可知。且亦為數無多。不能自成一隊。該前督素知東三省不獨正額官兵健勇無前。卽吉林黑龍江餘丁亦皆騎射雄健。遠過他處。吉林人又多以打生為業。槍箭命中尤屬異常。請飭挑餘丁二千名。交

記名副都統善慶協領穆克德布統帶來豫並於吉林招募打牲人二千作為馬勇。由該二員併帶赴豫等語。豫省歸陳偁接皖疆現在苗捻紛乘該處地當其衝防勦均關緊要。吉林黑龍江餘丁為數無多。因恐該省空虛久停徵調。惟現在豫省情形實屬非常緊要。該將軍等務當設法通融以濟其急。著景綸特普欽迅即各挑餘丁一千名。交善慶穆克德布統帶。剋日起程赴豫以資得力。至該前督所稱吉林打牲之人私入圍場例有明禁。此時若指明招募圍場必至弛禁。請令該將軍等以招募馬勇為名。選其騎射嫺習者收錄一有成數。剋日起程。其整裝等項均照正兵發給。如一時無此鉅款或先給一半。俟到豫再行補足。沿途盤費亦照正兵由經過地方應付等語。所奏是否可行。並著景綸斟酌相機辦理。將此由六百里各諭令知之。○以鑲黃旗漢軍都統春佑署正黃旗蒙古都統

○撥綏遠城察哈爾牧羣馬各一千匹候調赴河南軍營備用。○乙酉諭議政王軍機大臣等多隆阿奏軍情喫緊各路之兵勢難抽撥赴甘一摺。據奏所統各軍僅萬餘人。分為兩路進兵。且顧後路兵力已形單薄。兼以屢次傷亡病傷甚多。現在各營疫氣更甚。逆回時來搦戰。每次迎勦派三成出隊。竟不能齊。幸各將士久經戰陣不至失機。雷正綰防勦三原一帶。恐回逆被勦西竄。此時斷不可動等語。諒係實在情形。惟甘省軍情亦甚喫緊。熙麟駐紮慶陽。兵力過為單薄。所謂各兵惟延綏鎮兵甫到。即經失利。其蒙古阿拉善旗官兵未曾入口。被回匪設仗邀截。致有挫衄。甘省援兵他無可望。多隆阿仍應於萬難之中妥籌兼顧。所奏雷正綰曾飭前駐三原之馮元佐練勇三千人赴甘助勦。即著嚴催星速前行。並著熙麟迅即催提。到甘後妥為調遣。以資得力。渭河南岸穆圖善等馬步各軍

已抵臨潼。進勦沙窩等處回巢。疊有新擒。著多隆阿即飭相機進勦。並飭北岸之趙旣發等營。嚴密固守。謹防賊匪乘間撲擾。毋稍疏虞。一俟各營疫氣漸消。沙窩等賊巢攻破。南岸之兵。合軍北岸。進攻高陵。即可與雷正綰東西兩路合力。為聚殲羣醜之計。多隆阿督辦陝省軍務。責任綦重。諒於進取機宜。不至稍有遷延。致辜委任。該將軍病尚未愈。各營將士酷暑辛勞。患疫尤多。著即加意拊循。並妥為調攝。以紓廛念。南岸之兵。一經攻克沙窩回巢。省城即可無慮。前經疊次諭令馬德照一軍。省防稍紓。即飭赴援甘省。並著多隆阿等飭遵。瑛榮尤不得擁兵自衛。藉詞牽掣。前諭多隆阿嚴叅抗玩差務州縣。此次復據奏。河水衝動浮橋。糧船亦因水漲不能上下。改由陸運於沙淤中牽挽。更為艱難等情。總由各地方於軍前運濟。過為疲玩。以致營中幾至絕糧。殊屬可惡。著瑛榮嚴督各該地方。

痛加整飭。妥籌運濟。如再仍前疲玩。該撫身任地方。自問更當何罪。逆回狡詐百出。瑛榮前奏派令省城之阿渾。出城議撫。而城外則依然燒殺。當即諭令該撫不准輕率擅行議撫。徒為逆回所愚。此次多隆阿奏復有接撫臣。亟稱建議招撫等語。逆回等非痛深創鉅。豈能帖耳歸誠。瑛榮著仍謹遵前旨。實力防範。斷不准希圖苟且。甚至夾及奸回。前往議撫。墮賊詭計。懷之慎之。平涼固原賊勢如何。熙麟務就現有兵力。妥為防勦。一面催提陝省援兵。豫籌調度。將此由六百里各諭令知之。○福建巡撫徐宗幹奏。布政使張銓慶到任未及三月。請將同治元年計典展緩舉行。從之。○以陝西臨潼守城出力。予署知縣謝恩浩以知州用。並賞花翎。

大清穆宗繼天開運受中居正保大定功聖智
誠孝信敏恭寬毅皇帝實錄卷之六十九

大清穆宗繼天開運受中居正保大定功聖智
誠孝信敏恭寬毅皇帝實錄卷之七十

教修

同治二年癸亥六月丙戌諭內閣戶部奏酌

提奉天省旗倉粟米運京一摺奉天遼陽等
十三城旗倉粟米存儲尚多著玉明等酌提
十萬石運京備用所需船隻著直隸總督飭
令天津甯河二縣迅速雇備前赴奉省裝載
運津其水腳等項及運通事宜均仍責成天
津道仿照上年撥提奉省粟米章程妥為經
理限八月內全數抵通以供支放○又諭內
務府奏職官捏造文憑撞騙黑地租項並究
出武弁收受銀兩各情請旨革職嚴審一摺

內務府候補筆帖式錫山。因鑲黃旗護軍校吉存等呈報黑地一案。輒赴寶坻等處。捏稱堂派查辦黑地租項。希圖撞騙。並有偽造執照。發給民人李占鼇等收執情事。經內務府派役將該員及夥犯丁詳汰等訪獲。護軍校吉存代報無糧黑地。已屬事不干己。又展轉請託。收受託辦地畝賄銀二百餘兩。現在傳案質訊。堅不吐實。案關職官受賄。招搖撞騙。亟應徹底根究。以期水落石出。錫山吉存著

欽此

二

一併先行革職。交總管內務府大臣提同各犯。嚴行審訊。按律定擬。以儆官邪。未獲之李佩張幅山蘇學瀛李坤李延齋侯華泳仍著飭令薊州等州縣一體嚴拏。按名弋獲。歸案究辦。黑地升科。早經戶部奏明統歸地方官辦理。以杜弊端。此次錫山等招搖射利。該地方官何以毫無聞見。現雖將該犯等訪獲懲辦。恐此外藉端撞騙者尚不止此數人。仍著責成州縣等官。隨時訪查。嚴拏懲辦。毋稍疏

縱。○丁亥。諭內閣給事中恩霽奏銀庫放餉短平。並攬有低潮假銀。請飭查辦等語。戶部銀庫。開放各項餉銀。向例該庫官等。眼同領銀章京平兌。始將銀袋封口。鈐用印花。原以杜短平抵換之弊。近來各旗營赴庫領銀。該庫官並不眼同承領官平兌。亦無封口印花。以致領出銀兩。率多虧短。並有攬雜低潮假銀情事。是否該庫吏胥等舞弊。抑係承領官從中抵換。均須徹底根究。著管理三庫事務

欽此

三

大臣會同八旗都統一體查明。據實參辦。嗣後支放餉銀。應如何責成。放銀領銀各員。公同彈兌。以杜弊端之處。著一併嚴定章程。妥議具奏。尋奏。遵查放餉銀袋。例無印花封口明文。各旗領過銀兩。亦無低潮假銀及短少實據。現在公擬章程。於承領官赴庫領餉時。令其當堂兌平驗色。並由承領官自行黏貼印花。封口運回。以昭慎重。從之。○又諭多隆阿奏請將營員分別叅處等語。黑龍江呼倫

貝爾鑲紅旗佐領卽補協領記名副都統西蒙克西克辦事不公以致兵心怨望著暫行革職留營以觀後效副將銜參將李得謙遇事顛預不知振作經委赴湖北募勇又復從中取巧未能功歸實用實屬庸劣不職著卽行革職都司周仁山守備丁連志千總陳廷貴楊春發陳學連柯明太陳正興守備孫謀貴千總柳名成遊擊唐洪發守備申文洪千總黃連科守備方加祥千總梅長勝守備胡

安甫千總王秉公譚長宋守備向加葵謝金元打仗均不得力著一併卽行革職以示懲儆○又諭駱秉章奏生擒逆首石達開等並勦滅髮逆巨股一摺逆首偽翼王石達開糾眾十萬餘人由湖北貴州等境屢犯四川邊界均經官兵堵截迄不得還復分股旁竄牽綴大兵而自率大隊由雲南之米糧壩踵渡金江經駱秉章豫派總兵唐友耕知府蔡步鐘等調集漢土各兵分紮沿河要隘四面兜

截三月二十七至四月初四等日賊眾屢次搶渡均被我軍槍礮轟擊無一生還賊遂圖撲松林小河以冀直趨天全疊經土千戶王應元扼河力戰斃賊數千人二十三日都司慶吉土司嶺承恩等率兵夜劫賊營斃匪無數遂將馬鞍山占據絕賊糧道石達自知陷入絕地傾巢而出圖撲大小兩河唐友耕等督兵迎擊沈登筏賊匪多名二十三日石逆親擁大眾水陸分撲官軍沿河用火

彈火箭拋射適都司謝國泰參將楊應剛等由松林小河馬鞍山兩路齊進直撲紫打地將賊巢一律焚毀其逃竄之賊復經漢土兵練兩面夾擊賊眾墜巖落水浮屍蔽流而下者以萬餘計石逆率餘黨七八千人奔至老鴉漩復為土兵截殺石達開等進退無路倉黃失據經楊應剛等將其擒獲解省訊明極刑處死並於起解該逆之夜將其餘黨二千餘人以火箭為號同時圍殺淨盡石達開由

廣西倡亂。竄擾湖南湖北江西安徽。占踞金陵。復擁眾出犯浙江福建廣東等省邊境。紛擾滇黔。注意川疆。志在必逞。其攻城戕官。荼毒生靈。罪大惡極。久為覆載所不容。此次川省將士。人人用命。將積年巨憝。一鼓生擒。並將全股髮逆殄滅。實足以申天討而快人心。太子少保四川總督駱秉章。運籌決策。調度有方。深堪嘉尚。著賞加太子太保銜。尤為出力之總兵唐友耕。著記名遇有提督缺出。請

旨簡放。○諭議政王軍機大臣等。石達開在粵逆起事首惡中。最為狡悍善戰。此次銳意窺川。其勢甚張。其計甚狡。駱秉章知該逆善於乘虛伺隙。豫派兵勇沿河截剿。用使積年巨憝。一鼓殲除。調度合宜。實不愧為封疆重臣。石逆全股雖滅。而李幅猷一股尚在夔川。難保不再作窺川之計。且據石逆供稱。李逆深知調度。恐時日遲久。則裹脅愈多。又將不可收拾。駱秉章惟當乘此聲威。嚴飭劉嶽昭

等速將此股殄滅。至黔省苗教各匪。處處與川界毗連。滇省回眾情亦叵測。仍須隨時設備。駱秉章擬令胡中和仍駐敘南。唐友耕一軍馳赴江津綦江。以固邊隅。布置尚屬周密。即著照所議辦理。至張由庚等所部。據瑛榮奏業經馳抵漢中。惟漢郡羣盜如毛。軍情萬緊。張由庚等兵數尚單。不足以制賊死命。且山路崎嶇。糧運不繼。尤非行軍所宜。此時川省殄除大股逆匪。軍務已漸就緒。兵力當可分撥。即著駱秉章迅速添撥勁旅。馳赴漢中。以厚兵力。並將張由庚軍餉設法源源接濟。毋令缺乏。該督素顧大局。想必能遵旨妥速辦理也。將此由六百里諭令知之。○又諭李鴻章奏官軍會剿江陰無錫大股援賊大獲勝仗一摺。現在江陰之顧山以西。縱橫七八十里。已無賊蹤。當可乘此聲威。先將江陰縣城克復。並乘勝規取蘇常等城。以期節節肅清。偽忠逆已入蘇州。偏貼偽示。聲稱分四路

內竄。其言雖肆。其氣實餒。著李鴻章激勵各軍。分道進逼。毋任再行出擾。摺內所稱生擒偽王宗偽朝將主將及義安幅蕪豫各逆首百餘名。是否訊明正法。其偽漳王等五逆。是否仍在內。恐各營稟報。或有未盡確實之處。該撫仍當確切查明。據實具奏。連日進攻情形。並蘇常等處賊情。並著隨時馳奏。以慰廑繫。將此由六百里諭令知之。○又諭。沈葆楨奏。彙報近日軍情。並籲提洋稅。以濟援師。仍飭

善後局籌補。以分督臣之急。而衛皖餉之源。各摺片。逆匪竄踞鄱陽境內之石門陶家渡。增壘濬濠。為死守計。經劉典等進勦崇光渡。以牽制石門陶家渡之賊。席寶田督同饒防各營。及江軍水師。會攻陶家渡賊壘。三面猛攻。雖斃賊千計。而堅壘急切難下。傷亡勇丁頗多。逆首黃老虎親赴都昌。紮筏渡湖。並據賊供。有打造戰船圖攻潯郡之說。經蔡康業督帶江軍水師擊退。仍未大加懲創。而湖口

彭澤乞援之書。絡繹不絕。是饒九各屬。羣盜如毛。江忠義一軍。現已拔營赴潯。著曾國藩速飭該提督。由湖口都昌一帶。轉戰而北。會同劉典。席寶田等軍。廓清江境。然後併力埭蕩皖南餘孽。規取金陵。方無後顧之患。江忠義所部。養精蓄銳。不為不久。此次援勦上竄逆匪。當倍加奮勉。迅埭逆氛。以副委任。並著曾國藩傳諭該提督。懍遵毋忽。劉典。王德榜。業將崇光渡逆壘逆館埭盡著左宗棠仍飭

該臬司等。乘勝進取石門陶家渡等處賊壘。毋任久踞。沈葆楨仍當嚴飭平江韓宇等營。奮勇進攻。毋稍鬆懈。江南各軍。分道進攻賊匪。漸覺得手。賊勢漸見窮蹙。恐其蓄意竄往江西。以圖牽掣。左宗棠。沈葆楨。務須督飭將士。協力勦洗。盡殲醜類。俾賊匪無隙可乘。於規復金陵。方有把握。江忠義。席寶田。兩軍月需餉銀六萬兩。經曾國藩飭兩江總糧臺。提款支發。惟該糧臺所入。儘數解皖。猶苦不足。

勢難分潤客兵。沈葆楨現飭善後局。勉措江忠義軍營行費。飭九江關道動撥洋稅三萬兩。就近解營。並請嗣後九江關所收洋稅。先儘江席兩軍。按月解濟。卽著照該撫所請辦理。惟皖營軍餉。近頗短絀。沈葆楨仍應妥籌兼顧。均勻分撥。所有曾國藩前此奏撥九江關稅銀兩。該撫務當嚴飭該道按月如數撥解。毋誤要需。將此由六百里各諭令知之。○以江蘇江陰無錫擊退大股援賊。賞副將鄧

長里參將張學仕。都司李長樂。巴圖魯名號知府張樹聲。花翎。餘加銜升敘有差。予陣亡參將張林錦。都司汪龍淦。守備施銀貴。祭葬。世職加等。○以陝西攻克倉頭鎮等處匪巢。暨採辦軍糧出力。賞協領吉勒忠。阿常順。烏勒濟倭。協佈。佐領常林。參將周加明。顏得勝。聶光明。遊擊何仁高。王西太。杜連陞。都司孟正漢。委防禦岳清阿。巴圖魯名號。守備顧文進等。花翎。知縣韓經畬等。藍翎。餘加銜升敘。

有差。○以四川殄平髮匪。生擒逆首石達開。賞知府蔡步鐘等。花翎。典史姜由範等。藍翎。餘加銜升敘有差。賞土千戶嶺承恩。王應元。宣撫司職銜。頒敕印。並賞嶺承恩。巴圖魯名號。○予江西鄱陽陣亡都司蕭萬皋。府經歷朱詠香。千總袁發魁。外委劉名高。祭葬。世職加等。○己丑。諭議政王軍機大臣等。瑞麟奏開墾圍場閒地。酌擬升課押荒章程一摺。熱河圍場邊荒地。八千餘頃。經瑞麟招佃開墾。收納押荒。及升課銀兩。以濟兵食。現已有人具呈認墾。復經瑞麟分別地畝肥瘠。定為上中下三等。並酌定押荒升課銀兩。及擬辦章程十六條。著卽照所擬辦理。瑞麟現已簡放廣州將軍。俟新任熱河都統麒慶到任後。應卽交卸來京。陛見。惟開墾地畝。本由瑞麟經理。現在尚未完結。著俟此事辦有頭緒後。將開墾事宜。移交麒慶詳細告知。再行起程來京。將此諭令知之。○庚寅。諭議政王軍機大

臣等御史尋鑒煒奏太谷縣員杜氏毒命誣節一案。司員桂廷衡竟謂員楊氏既非毒死。卽是產死無疑。憑空懸斷。該員與沈長材同鄉同年。並不早請迴避。是其有意瞻徇。已可概見。聞蒸檢時。仵作云額後有傷。骨節短少。至今並未具結。而該大臣等欲以非產非毒作為持平之論。並聞究出贓銀一百十三萬餘兩。乃僅以一萬兩入奏。仍復含糊其詞。恐愛仁等難免受人愚弄。請嚴旨訓飭等語。本

日據愛仁奏結員杜氏一案。果與該御史所奏情節略同。是愛仁等審辦此案。必尚有不實不盡之處。是以物議沸騰。難期翕服。尋鑒煒籍隸山西。自必確有聞見。已降旨令該御史馳赴山西。隨同愛仁秉公訊辦矣。此案關繫謀產誣節。並地方官婪贓枉法重情。既經該尚書等訪聞。自應力為平反。乃仍含糊了結。尚復成何事體。著該尚書於尋鑒煒到晉後。再將此案徹底根究。務期水落石出。以成

信讞。毋得受人欺蒙。致負委任。另片奏陝西路阻。未能前往等語。現在太谷一案。既須另行審擬。俟此案並胡廷華揭告董彙芳案辦結後。再行請旨。尋鑒煒原片。著鈔給閱看。將此由四百里諭令知之。○又諭英桂奏逃將宋景詩叛跡昭著。恐其西竄。撥兵嚴扼要隘。一摺。宋景詩築圩增糧。招集亡命。叛跡昭著。疊經諭令劉長佑督率大軍。會合東省官兵。相機剿辦。英桂恐該逆徒黨眾多。且晉省路

徑為該逆所熟悉。一經被剿。窮蹙勢將鉅而走險。豫派兵勇。在潞安遼州一帶。擇要防守。並派副將王巨孝等帶兵駐守平定州之固關。先事豫防。所籌均尚周妥。卽著飭令在事員弁。實力扼守。隨時偵探。毋得稍有疏虞。另片奏蒲州府一帶。黃河陡漲。致濱河營盤。半被衝失等語。卽著飭令署總兵和昌等將營盤速為修整。軍械由局補發。並確查兵勇漂沒若干。照例辦理。其沿河各州縣。有無浸淹

廬舍田禾。並著飭屬查明。分別妥辦。其文報軍火。經過永濟。滎河二縣。著飭令該縣等設法接遞。毋致阻滯。將此由四百里諭令知之。○命雲南道御史尋鑒煒。馳赴山西。隨同欽差兵部尚書愛仁查辦事件。○辛卯。諭議政王軍機大臣等。劉長佑奏進軍防剿。疊挫賊鋒。現飭嚴遏竄越一摺。降賊宋景詩叛跡昭著。經劉長佑咨會提督恆齡定期進剿。並分派各營齊赴清水鎮。探明恆齡進紮處所。再行會合前進。布置甚為妥協。乃各軍轉戰而前。直逼甘管屯賊巢。鄭魁士等令諸軍四面環攻。該逆冒死抵拒。官軍迄未得手。撤隊時。該匪分股繞出陣後。兵勇猝為所乘。致有傷折。賴姜國仲等由間道助戰。賊始敗竄。而恆齡所部。並未前來會剿。據該提督聲稱。是日卯刻出隊。因沿途撿捕。是以未能會合等語。行軍之要。信賞必罰。而尤貴持平。不聽將令。而輕進者。雖有功亦必罰。如劉長佑之參張

植初等。良足示懲。惟恆齡馬隊。雖據稱因沿途撿捕。未能會合。而既經劉長佑咨會合剿。即應先期告知。以便各營會合前進。何以先期並無一語告知。事後始行函致該督。是恆齡期會不至。不無貽誤。劉長佑未將恆齡參劾。辦理殊失其平。該督有督辦三省剿匪事宜之責。嗣後惟當督飭諸軍。破除情面。賞功罰罪。一秉至公。俾軍務日有起色。方為不負委任。恆齡如有不遵調遣之處。即著劉長佑嚴行參辦。劉長佑如稍有瞻徇。於各營員意存觀望者。不能參處。以致軍律不嚴。惟劉長佑是問。並著僧格林沁嚴飭恆齡。恪遵劉長佑調遣。鼓勇前進。毋得稍形玩愒。致干重咎。宋景詩馬隊甚多。宜防竄突。劉長佑丁寶楨所部。步隊居多。此次分路會剿。務在一鼓殲除。蘇克金馬隊。現駐阜城。如馬隊尚不敷防剿。即著劉長佑飛咨僧格林沁調回。會同攻剿。以厚兵力。丁寶楨現在堂邑。與保德等各

帶兵勇嚴防東南一面。並著閻敬銘飭令該臬司等。一切進止機宜。悉聽劉長佑檄調。以期併力進攻。埽穴擒渠。肅清疆圉。至該匪被勦窮蹙。勢必乘閒他竄。仍著劉長佑飛飭祝壇春霖等督率沿河各員弁。認真防範。毋令竄越。將此由六百里諭知僧格林沁。劉長佑。閻敬銘。並傳諭丁寶楨知之。○又諭馮子材等奏南路丹句等處。屯賊日眾。相機戰守一摺。丹陽屯賊愈聚愈多。近又由常州金壇等

處逆巢。先後併注。分屯丹句一帶。數約八九萬。並紮丹陽七里廟左右。添營紮卡。拒守甚嚴。揆度情形。雖係為援應金陵起見。而賊情詭狡。或窺伺鎮城。或潛圖北犯。均難豫料。馮子材等現已飭揚防調往之副將刁經明兵勇二千九百餘名。先行駐紮丹徒鎮。聽候調遣。相機進取。並聽候曾國藩玉覆辦理。所辦甚妥。當此兩岸軍威大振之時。一切進勦機宜。務須謀出萬全。不可稍有疏虞。其雲臺寶

蓋等處營壘。尤應加意嚴守。不可稍涉大意。鎮防兵勇。經此次揚防添派。尚不滿萬。是兵力仍形單薄。前次奏派總兵田宗揚等由馬陵進逼丹陽。仍著該提督等謀定後動。戰守兼權。斷不可為賊匪所乘。致有挫失。將此由六百里各諭令知之。○又諭恩麟奏平羅漢回。近復挾嫌互鬪。暨平涼被圍日久。請飭催馬德昭迅速赴援。及蒙兵遇賊接仗。南路各屬勦匪。並隆德縣及秦州一帶勦賊各情形。

隆德縣接壤平涼。實為東路要隘。此次圍城之賊。雖經李超羣擊退。而賊眾兵單。難保不再來窺伺。南路秦州一帶。雖經林之望訓練兵團。連獲勝仗。而伏羌縣漢回互鬪。報復尋仇。肆行焚殺。必須趕緊撲滅。俾免燎原。即著恩麟督飭靜甯隆德各屬員弁實力防範。並飭林之望督率兵勇。迅將伏羌初起回匪剋期勦辦。毋令延蔓。平涼被圍。時逾兩月。勢甚危急。恩麟現派參將成桂統兵前往隆靜一

帶設法解圍。惟東路兵力單薄。萬難奏效。馬德昭一軍。前已有旨。令其迅速赴甘。卽著多隆阿飭令該署提督。懍遵前旨。剋日赴甘。迅解平涼之圍。不得稍有耽延。致干咎戾。雷正綰所派之馮元佐練勇三千人。並著多隆阿飭令剋期起程。前赴甘省。毋許逗遛。援兵未到以前。熙麟惟當就現有兵力。認真防守。並添派官兵。馳赴涇州。分道進攻。牽制賊勢。毋令賊蹤廣聚平郡。致有疏虞。阿拉善兵行至平羅地方。遇伏失利。疊據奕梁等奏報情形大略相同。此次恩麟僅據稟報粉飾之詞。稱其先挫後勝。與熙麟等前奏兩歧。實難憑信。阿拉善兵既不得力。其鄂爾多斯兵丁。是否可用。並著恩麟查明具奏。平羅回眾。復有互相仇殺之事。可見從前辦理招撫。敷衍了事。終貽後患。一切情形。已據慶昫等陳明。卽著恩麟恪遵前旨。飭令甯夏鎮道稟商慶昫。妥籌辦理。該將軍惟當督率侯雲登等。聯絡兵

勇。相機策應。一面剴切曉諭。解散夥黨。儻有匪類狡執阻撓。立卽督兵勦辦。毋得再蹈從前覆轍。馬化澂雖未滋事。而軍械並未繳納。其心實屬叵測。恩麟因兵力不暇兼顧。暫予羈縻。是亦權宜之計。卽著恩麟督飭所屬。不動聲色。嚴密防範。毋得稍涉大意。將此由六百里諭知多隆阿。慶昫。熙麟。並傳諭恩麟知之。○又諭前因總兵熊煥章帶兵援甘。逗遛不進。當經降旨革職。並諭令賂秉章酌調勁旅二三千人。籌給川資。取道白馬關。馳赴甘省。以厚兵力。本日據恩麟馳奏。甘省軍務東路則平涼被圍兩月。迄無援兵。平羅漢回。又相仇殺。南路則伏羌縣屬。漢回互鬪。縣城戒嚴。其秦階各屬。徽縣則有陝西游匪之滋擾。文縣則有川省髮逆之竄擾。加以鳳翔大股回匪。直撲兩當。雖經兵民擊退。而防範不能稍鬆。岷岷情形。直有不可終日之勢。若非鄰省大支勁旅。前往援應。不足以振軍威而殄

狂寇駱秉章公忠體國。素顧大局。目睹邊疆重地。糜爛至於此極。想必能妥籌兼顧。力拯陷危。著卽懷遵前旨。迅速調派勁旅二三千人。派委得力大員。統帶赴甘。由秦州一帶徑赴東路。進剿伏羌。漸次進至固原。相機攻取。庶兵力日增。軍務可有起色。張由庚等抵漢中後。兵數尚單。曾經諭令駱秉章增兵籌餉。川省自石逆大股殄滅後。大局已臻穩固。是該省兵勇尚可分撥。仍著該督懷遵前旨。添

調兵勇。前赴漢南。勦辦髮捻各逆。彼處軍務得手。則陝省大兵。卽可抽調赴甘。於邊陲全局。實有裨益。一切進止機宜。並著該督妥為調遣。毋稍遲誤。再李幅猷一股。本日據毛鴻賓奏。現在肆擾黔疆。劉嶽昭等軍兵力。是否足敷勦辦。可以無須添兵協助。並著該督酌量情形辦理。將此由六百里諭令知之。○又諭毛鴻賓奏辰沅逸匪糾眾起事。現調兵勇進剿。並防勦黔匪各情形一摺。匪首唐老九

等由帽子坡潰敗後。商同糾眾復仇。屯紮於風車巷等處。先後竄擾澈浦新化等縣境。經知府邵綬名署副將玉寶等。趕募勇丁。督同各該縣分防要隘。毛鴻賓飭令記名臬司趙煥聯總兵趙福元。前往會剿。並團總蕭兆芬等督勇迎擊。頗有斬獲。而邵陽司署被焚。土匪日集。日多。官軍半山營盤。復被賊占踞。距新化縣城僅二十餘里。匪勢甚屬猖獗。亟宜剋期殄滅。以清疆圉。毛鴻賓前已擢升兩廣

總督。計尚未交卸。啟行。著與惲世臨將進剿機宜。會商妥辦。一面飛飭趙福元彭炳武等督率各營。齊赴寶慶郡城。直趨隆回。跟蹤追剿。惲世臨身膺疆寄。受恩深重。尤當激勵諸軍。迅將此股匪徒。一鼓殲除。以副委任。至帽子坡餘匪。與田興恕軍營革退及潰逃之勇。倡立哥老會。與黔匪互通消息。而黔省荊竹園張家寨教匪。勾結逆苗。分攻邛瓦等處。聲言下竄晃邊。其黎平逆匪。擾及龍安高寨。偏

近通道復有另股。圖竄靖通邊境。包茅仙股匪。圍攻松桃廳城。雖經周洪印派撥田宗營馳往援剿。立解城圍。第該逆竄入鎮遠府屬之四十八溪。與鳳永各廳相距不遠。是湖南邊防。在在喫緊。現在皖北軍威大振。髮逆全數渡江。所有曾國藩劄委黃元齡募勇千人。自可暫緩赴皖。卽著毛鴻賓。憚世臨。飭赴辰州駐紮。會同周洪印等。揔捕辰沅餘匪。務絕根株。並嚴防黔匪分竄。毋稍鬆懈。黔省羣盜

如毛若不次第殄除。則蔓延胡底。所有黎平府屬逆匪。及由松桃竄入鎮遠府屬等處之匪。著勞崇光。張亮基。嚴飭各路帶兵員弁。盡力兜剿。毋得專恃鄰援。石逆悍黨李幅猷。現在率眾數萬。出沒於黔西仁懷一帶。分竄桐梓。綏陽。正安等處。並著勞崇光等。檄飭沈宏富等相機進剿。就地殲除。毋令竄擾楚邊。貽患鄰境。將此由六百里各諭令知之。○又諭。張凱嵩奏貴縣逆匪勾結分擾。官軍堵剿獲

勝一摺。貴縣黃逆糾合援賊。四出竄擾。經官軍分路擊敗。復併為大股。圍攻馬村。其橋墟蒲塘兩處。各有賊匪屯聚。勢成犄角。現在登龍橋老巢之賊。因外援隔絕。其勢頗孤。亟應乘勢進攻。以除積年巨寇。此時江忠義因江西待援甚急。已諭令統率所部各營。星馳往援。不能赴粵。劉坤一。勦辦貴縣等處各匪。責無旁貸。卽著督飭該藩司。激勵派出之鄭金華。戴盛寬等軍。實力遏剿。並令李士恩。易元

泰等移營進逼。迅解馬村之圍。一面規取橋墟。務擒首逆。至蒲塘賊匪。旣係容縣逆黨分股出擾。尤宜趕緊撲滅。以孤范逆之勢。蔣澤春業已抵潯。卽著飭令取道下灣。節節進剿。並飭利輝等。攻拔登龍橋老巢。將首要各匪次第翦滅。速收擣穴擒渠之效。蔣澤春一軍。俟攻破蒲塘後。仍著取道鬱林。進規容縣。專圖范逆。與廣東高州官軍聲勢聯絡。以期盡殲醜類。將此由五百里諭令知之。○又諭。張

凱嵩奏軍需緊要。請飭催協餉等語。廣西本屬瘠區。兼之軍興日久。尤形彫敝。全賴各省協餉源源接濟。藉資敷衍。前任廣西巡撫劉長佑奏請於廣東溢坦變價項下。月撥銀三萬兩。曾經部議准撥一萬兩。廣東亦以自本年為始。按月解濟一萬兩等語。咨覆該省。乃時逾半年。而廣東正月協餉尚未解到。現在廣西賊勢尚張。軍資漸竭。賦稅釐金所入無幾。每月放餉僅敷二成。非賴鄰封協濟。飢軍

譁潰堪虞。著毛鴻賓黃贊湯。即將應解各款迅速籌解。毋得意存膜視。致誤餉需。毛鴻賓未到以前。晏端書責無旁貸。即著會同黃贊湯妥速籌辦。將此由五百里各諭令知之。○以甘肅隆德縣城解圍。賞升用同知知縣李超羣花翎。○以甘肅鹽關鎮剿匪獲勝。予道員林之望等加銜升敘有差。疏防知縣王廷梓革職留任。○以剿賊輕進。摘直隸知縣張植初參將吳永教頂翎。○予湖南新化陣亡

從九品鄒孔紳暨援救貴州松桃陣亡把總張我臣均祭葬世職加等。○予甘肅西和陣亡典史黃元慶祭葬世職加等。○予廣西貴縣陣亡都司鄭宗崑守備李玉春府經歷譚受益從九品張世鴻外委薛仕蘭祭葬世職加等。○壬辰諭議政王軍機大臣等前因特普欽奏喀爾喀巴爾虎人等互爭界址。該王旗不候三省咨文。意存要挾。景綸奏喀爾喀爭控地界。巴爾虎翻認靡常。各一摺。當交議

政王軍機大臣會同理藩院議奏。茲據議政王等奏稱。特普欽與景綸所奏各摺情詞互有不符。又景綸前次勘斷界址摺件。與此次摺內所稱各情節。及兩次照繪雍正十二年地界陳圖方向。亦多有自不相符之處。並將應查各條陳明。請飭景綸等會同查明。速行勘辦覆奏等語。喀爾喀與巴爾虎互爭莫端。哈沙圖等兩卡倫地界。事閱多年。並未勘斷完結。景綸與特普欽既各執一詞。即景綸前

後所奏兩摺。與所繪陳圖方向。亦復自相矛盾。案關外藩交涉事件。宜容如此草率稽延。著景綸特普欽特克慎迅速派委妥員。馳赴西巴爾臺地方。將莫端哈沙圖。阿魯布拉克。兩卡倫方向。會同詳細履勘。有無侵占那移。確切查明。限於數月內。卽行斷結。不准再事遲延。該將軍等。務當秉公辦理。毋許授意委員。豫存成見。景綸係原行勦辦之員。尤不得迴護前奏。自干咎戾。並著特普欽景綸特克

慎將議政王等所指各條查明。據實覆奏。不准稍涉含混。其黑龍江呼倫貝爾庫倫所存雍正十二年圖冊。及景綸所稱莫端哈沙圖等二卡倫那移方向。並擬改設標記處所。均著特普欽特克慎速行照繪。先行分送軍機處理藩院。以備查覈。至托克托呼圖魯。遣人赴特普欽處。遞文聲訴。意欲聚集台吉等多人。前往黑龍江。實屬刁惡。特克慎何以並不具奏。著卽迅速派員。馳赴該旗。曉諭彈壓。毋

令藉端生事。儻漫不經心。任令托克托呼圖魯聚眾前赴齊齊哈爾。向特普欽曉瀆。惟特克慎是問。原摺著鈔給閱看。將此各諭令知之。○又諭前據劉長佑奏鎮國公桂池府中管事官員張應參卽張小曾並護軍校兆惠私發諭帖。誑提監犯各情。當諭宗人府飭令桂池迅將張應參及兆惠交出。歸案嚴審。茲據宗人府奏據桂池呈稱張應參係已革刑部浙江司主事。並非該府管事官員。該公從前認識。後聞其不安本分。早經杜絕。現在遣人查問。不知去向。其兆惠一名。徧查檔冊。並無其人。該府內並無懷來縣地畝。亦無莊頭李進珍之名等語。著劉長佑卽將現獲各犯提集。嚴切根究。訊明張應參等確實住址。或飭屬密拏。或密速知照各該衙門。以憑嚴緝。其兆惠一犯。究係何項人役。並著提集現獲各犯。一併訊明確實。卽行具奏。將此諭令知之。○又諭譚廷襄奏上南各廳險工疊出。嚴

飭搶辦平穩。並蘭陽以下。直東境內被水處。所請飭妥為捍禦。各摺片。黃水由蘭陽下注。直東境內。值此盛漲。地方被淹。河南考城縣。數年涸出之村莊。復行被水。山東荷澤縣。黃水已至護城隄下。至直隸之開東長等邑。山東之濮范壽等邑。每遇黃水出槽。必多漫溢。而東明濮州范縣齊河利津等處。水皆靠城行走。尤為可慮。據譚廷襄奏稱。此時河已北行。不能再籌別策。攔水惟恃民埝。從未議及。

疏導。恐數年後。漸次淤墊。或海口稍有阻滯。事更為難。濮范一帶。舊有金隄。前在山東巡撫任內。曾設法修築。工竣復被衝缺。四月間。曾屬藩司貢璜籌款。未知曾否動工。至利津為入海之處。水偏城根。恐被墊陷。前在山東曾派員勘議。督率紳士勸捐築壩。尚未報竣等語。伏前河流盛漲。隄壩一切。亟應設法修築。著閻敬銘將如何設法集貲。相機修葺之處。督飭該地方官妥籌辦理。濮范上游。與直

隸開州毗連之處。亦有衝缺。開州不修。濮范築亦無益。著劉長佑飭屬一律修築。以資捍禦。此外近河之處。一遇盛漲。出槽漫溢。其應疏應堵處所。既未專設河員。惟在沿河地方官。督率紳民。妥為籌辦。民力不逮。即當官為勸捐辦理。劉長佑閻敬銘。務當飭令各屬。實心經理。毋令河水漫溢。貽患地方。豫省河流漫及之處。著張之萬設法捍禦。一體嚴防。至上南各廳險工。仍著譚廷襄實力修守。毋得

稍有疏虞。將此各諭令知之。○以內閣侍讀學士恆恩為太常寺卿。○癸巳。諭議政王軍機大臣等。吳崇奏籌辦徐宿防剿。及撥隊援皖。運中兩河等工。搶護情形。各等語。前以淮甸軍情緊急。疊經諭令吳崇嚴飭總兵姚廣武等軍。與皖軍聯絡扼剿。茲據奏稱。姚廣武與英翰合軍圍剿韓村。賊勢已蹙。因苗逆襲破蒙城。東南李白二寨。欲斷官軍糧道。英翰帶隊回顧。與姚廣武商同將韓村之賊暫准

乞降。雉髮留營。效力贖罪。卽派副將艾憲銀等帶隊鎮撫。並以臨淮軍情。必先攻拔懷遠。懷遠一下。則圍蒙之賊。糧運不通。是攻懷卽所以救蒙。而苗逆在懷遠夾河築壘。勢非水陸並進。不能制勝。該漕督因前撥龔文林等礮船。為數尚單。擬於高寶湖防水師內。簡派礮船百餘隻。飭令黃開榜趕緊修脩脩備用。並請飭黃開榜統帶援皖等語。所籌均尚合宜。著卽飭令黃開榜將此項礮船。迅速修脩整齊。卽行統帶駛赴臨淮。會同皖省官軍水陸並進。力攻懷遠。以斷苗逆糧道。而解蒙城之圍。所有入皖水師口糧。仍著吳崇照舊支發。周化傳等投降。恐不可靠。仍著督飭艾憲銀等嚴加防範。英翰回紮小澗集。以援蒙城。並與姚廣武商留兵勇。分紮後路各寨。以通蒙營餉道。卽著唐訓方飭令迅速辦理。並將蒙邑情形。隨時馳奏。黃開榜水師入皖後。唐訓方卽妥為調度。以資得力。前竄蕭碭擒匪李

大箇子等股。又有裝旗北竄之信。吳崇現飭姚廣武添募勁勇。以備堵擊。務須隨時偵緝。實力嚴防。其白蓮池竄出擒匪李帛等千餘人。雖據黃國瑞報稱。派隊追至微山湖。將未渡匪黨痛殲。並為沛碭等各練圩節節剿殺。而竄至龍山餘匪。仍與渡過微山湖前股串合。卽著吳崇飭令姚廣武由韓村移師。聯絡徐宿各圩。認真剿辦。並飭銅邳一帶圩練嚴防。毋令乘閒肆竄。本年河湖底水均大。運中兩河隄埝。及裏揚運河牯壩。均有刷潰。清河以下兩岸隄工。亦多墊卸。著吳崇將現在尤為緊要各工。嚴督各廳妥實興辦。動支款項。節慎經理。不得稍有浮糜。並將淮揚長隄土工未辦段落。查明應辦處所。趕緊諭董集夫通力合作。以資保衛。毋稍疏虞。將此由六百里各諭令知之。○又諭吳崇奏請飭催晉省欠餉一摺。揚營軍餉。積欠纍纍。且江北下忙錢糧。尚未開徵。釐捐短絀。值此青黃不接之

時亟應速籌接濟。著英桂將元年分欠解協餉銀四萬兩。並河東鹽課項下劃提甘餉銀五萬兩。除已解在途一萬兩外。尚未解銀四萬兩。飭令該司道趕緊籌措。如數解交吳崇收納。以濟軍食。現在揚防各軍。會攻金陵。防剿正當喫緊。儻因停兵待餉。貽誤戎機。惟該撫是問。將此由五百里諭令知之。○又諭沈葆楨奏。饒防各軍。埽清陶家渡賊壘一摺。逆匪盤踞陶家渡。增壘濬濠。意圖死守。經官軍

會合兵團。猛力急攻。殲斃多名。賊不能支。大股乘夜逃竄。楚軍追剿。截殺無算。壘內餘賊。亦經韓進春等督率練勇。殲戮甚多。將逆壘三十餘座。悉行焚毀。剿辦尚屬得手。惟逆首黃老虎。尚擁悍賊數萬。由都昌折回石門。勢燄尚熾。沈葆楨務當督飭諸軍。乘此聲威。將石門股匪。悉數殲除。毋令與彭澤湖口諸賊合併。致剿捕又形費手。並著左宗棠飭令劉典迅速進剿。將黃逆就地殲擒。毋任再竄他

處。一面督飭徽防各軍。嚴扼要隘。毋令此股折竄徽郡。是為至要。劉于浚現在丁憂。亦經明降諭旨。賞假百日。准其回籍治喪。俟假滿後。卽行赴營。劉于浚回籍後。萬立松暫行代理。能否勝任。仍著沈葆楨隨時察看。將此由六百里各諭令知之。○又諭穆騰阿。伊昌阿。奏革兵通匪。請飭覆訊。並將該管官議處。及自請議處一摺。此案多奎所供情節。固屬支離。惟多福等均係在逃。多福並在回營帶領

馬隊。其為投賊。已無疑義。且難保非該犯於上年四月間。已經暗通回匪。迨後充補馬甲。而該將軍等漫無覺察。直至多奎供出。始行知覺。其劉沅兒。及豬娃。是否卽係德哩布。訥爾金。既經瑛榮提訊。自無難盡吐實情。案關叛逆重情。虛實均應徹底根究。著瑛榮督同署臬司劉鴻恩。並穆騰阿等所派協領依克精阿等。提集人證。逐層嚴訊。務得確情。定案後。卽由瑛榮奏明。覈實辦理。至該已革馬甲

閒散等於逃走時。該管官等輒敢隱匿不報。迨至通賊情事敗露。始行查出具稟。實非尋常疏忽可比。所有鑲紅旗協領訥爾吉春防禦伍忠阿正白旗協領德瑩佐領多鑾布均著先行交部議處。仍著瑛榮於定案時聲明請旨辦理。穆騰阿伊昌阿失於覺察。亦難辭咎。均著一併交部議處。嗣後該將軍等於旗營弁兵。務當隨時督飭該管協佐等嚴密稽查。毋得仍前玩忽。將此各諭令知之。尋兵部議穆騰阿伊昌阿均罰俸一年。准其抵銷。從之。○改丁憂甘肅按察使劉子潯為署任。賞假百日回籍治喪。仍馳赴江西防所勦賊。○以疊著勞績。復江蘇己革知州崔繩祖職。○以江西攻克陶家渡賊壘。賞道員席寶田巴圖魯名號。餘加銜升敘有差。予陣亡副將喻可宗都司父子德千總周景柏外委林貴德祭葬世職加等。○甲午。諭議政王軍機大臣等。前因伊犁將軍常清奏部撥川甘兩省有

著款項。未據報解。請飭嚴催等語。當交戶部速議具奏。茲據奏稱該部於上年十月間。遵旨籌撥伊犁軍餉。當將川省徵存正餘鹽釐項下銀及濟楚鹽釐項下銀各五萬兩。行令該督照數提撥。嗣後該督以指撥之餉無從籌解。奏請改撥。復經該部駁令照前撥解。且所撥之項。准其於欠解咸豐十一年京餉銀內扣除。更無所用其推諉。何以半載有餘。絲毫未解。請飭四川總督查照前案。勒限籌撥等語。伊犁為邊疆重地。最關緊要。一切餉需。全恃內地協撥。藉資接濟。該督撫等何得不權衡緩急。任意遲延。著駱秉章嚴飭藩司。如數籌撥。趕緊委員探明道路。解由甘省轉解。甘省固不准擅行截留。川省亦不得再事延緩。致誤急需。其甘省欠解伊犁俸餉。共一百數十萬兩。經戶部奏准提撥銀僅六萬九千兩。何以亦未解往。尤屬玩延。著熙麟恩麟。無論何款設法補解。毋再延宕。至山東省歷年

欠解甘餉銀三百餘萬兩。河南省欠解甘餉銀三百五十餘萬兩。上年亦經戶部奏令該撫各先提撥銀十萬兩。分起解甘。是否籌解。未據該撫奏報。著閻敬銘張之萬迅飭藩司。查照戶部節次奏准撥解之項。趕緊籌解。毋再任聽耽延。致誤邊防大局。將此由五百里諭知駱秉章。麟閣。敬銘。張之萬。並傳諭恩麟知之。○又諭唐訓方奏臨軍南北兩岸破賊六壘。並水師奪獲賊划。獲勝情形一摺。另

片奏壽州糧絕。知州毛維翼死守待援。成大吉一軍。尚未到壽。蔣凝學。毛有銘等軍。疊次猛攻。損傷精銳。圍仍未解。本月初四日。苗逆親督礮划戈船。四面架梯爬城。以致失陷等語。旋據曾國藩奏。毛維翼督勇固守。蔣凝學等運米接濟。而外委邱維城開城納賊。毛維翼戰死一摺。壽州被困日久。竟致失陷。刻下苗逆之勢日熾。計必留兵嚴守壽城。而增黨懷遠。繞出淮河北。兩軍之後。以阻臨淮聲

氣。添兵急攻蒙城。期於必得。固下蔡老巢之藩籬。招宿亳等處之醜類。占地愈廣。收拾愈難。曾國藩現檄蔣凝學暫駐三河尖。辦足米糧。移紮潁州。以衛豫境。成大吉。仍紮三河尖。以蔽鄂疆。檄周寬世退紮六安州。以固皖省。毛有銘暫駐六安。為諸路遊擊之師。並飛調何紹彩四營。由甯國北渡。馳赴臨淮。歸唐訓方調遣。又飛咨彭玉麟。楊岳斌。選派三板八十號。星赴臨淮援剿。均著照所擬辦理。惟蒙

城被圍甚急。臨淮尤關緊要。仍須援兵早到。方可保全。仍著該大臣妥籌兼顧。俟各路布置稍定。伺隙進剿。苗逆毋稍疏忽。昨諭吳棠飭黃開榜督帶礮船。駛至臨淮。會攻懷遠。唐訓方妥為調度。令英翰姚廣武兵勇分紮後路。通蒙營餉道。著仍遵前旨。趕緊妥辦。蒙城危急萬分。欲援蒙城。宜先攻懷遠。以絕賊之餉道。而林家圩雄踞渦淮之衝。又必須先行攻克。方可進圖懷遠。現在臨軍疊次獲捷。聲

勢尚壯。著唐訓方卽飭張得勝。普承堯等。相機進取。期於步步為營。共支危局。臨淮軍餉匱竭。著吳崇迅籌接濟。不准遲延推諉。致滋貽誤。訥木津。桂錫楨等馬勇。前已到皖。忽又折回。疊經諭令僧格林沁。催令仍赴宿營聽調。著卽飛飭前進。不准其藉口耽延。淄川一城。計不日卽可得手。苗逆勢蹙。日張亟望此股削平。該大臣卽可移兵南下。現在圍攻情形如何。並著僧格林沁具奏。以慰馳繫。臨淮軍情岌岌。楚北邊防較鬆。除酌留兵勇防捻外。其前此防勦髮逆各軍。著官文嚴樹森迅速調赴臨淮。攻勦苗逆。保衛長淮。毋稍遲誤。前諭曾國藩另籌一軍。赴潁上。擣苗逆老巢。攻其所必救。能否照辦。未據覆奏。長江現已肅清。能否於江北陸路防軍內。抽調勁旅。或徑援蒙城。或由定遠馳抵懷遠。奮勇力攻。以斷圍蒙之賊糧道。卽著曾國藩趕緊籌畫。一面調派。一面奏聞。壽州三面臨水。一面依山。

非水陸大軍合勦。難期攻克。應如何籌策萬全之處。著曾國藩與唐訓方會籌。指示諸將機宜。力圖攻拔。壽州城內官員。除毛維翼業經給卹外。其餘文武下落。著卽查明具奏。唐訓方片內所稱白李兩圩。被困日久。因飢降苗等語。李圩是否卽係李南華在內。李南華素能打仗。現在何處。其人是否可用。手下有無練眾。曾否降苗。並著唐訓方查明具奏。前據張之萬等奏。張岡業已合圍。不難攻克。俟攻克後。再分兵歸陳等情。張岡頓兵日久。何以尚未攻拔。張之萬毛昶熙專辦張岡一案。師老兵疲。久無功效。自問當得何罪。現在苗逆親入壽州。如張岡早日得手。可以分兵攻擣老寨。則皖省軍務。自可稍紓。著卽嚴飭張曜等。剋日攻拔。如再玩延。定將該撫等從重治罪。懍之。臨淮蒙城軍餉。仍著設法繞道解濟。顧全大局。是為至要。陳防緊要。著袁甲三督率袁保恆。將兵團勤加操練。以固豫境之

防。毋稍鬆懈。將此由六百里加緊各諭令知之。○以安徽叛練苗沛霖攻陷壽州。總督曾國藩巡撫唐訓方下部議處。革道員蔣凝學布政使銜。奪提督成大吉勇號。以參將降補。均留營。贈殉難知州毛維翼道銜。予祭葬。世職加等。於死事地方暨原籍。建立專祠。○以浙江克復處州等城出力。賞參將林文明等花翎。縣丞高廷熾等藍翎。餘加銜升敘有差。○以浙江克復湯溪縣城暨肅清浙東出力。賞都司詹惠等花翎。通判冒沅等藍翎。餘加銜升敘有差。○以浙江銀嶺防守出力。復已革遊擊蕭耀煌守備劉得職。○予山東臨清殉難武生郝鴻瑞等賞卹如例。○乙未諭議政王軍機大臣等瑛榮奏。紳眾聯名呈請暫留馬德昭駐省。並撫回之議。勢將不成。及甯羌州城克復。進圖沔縣。暨漢中糧餉匱竭。賊勢日增。各摺片。東路回匪西竄。直撲省垣。雖經四關各營奮力迎擊。而賊眾未退。多隆阿

前敵各軍。雖至臨潼之新豐鎮。而道路梗塞。仍與省城聲息不通。現在西安城內。糧運匱乏。飢殍載塗。情形萬分危急。該紳士等呈請攀留馬德昭一軍。暫緩赴甘。自係出於迫切真情。著准其暫留陝西省城。力籌防勦。保衛根本。重地以順輿情。瑛榮身任封疆。貽誤全陝大局。實非嚴議所能蔽辜。該撫惟當激發天良。勉圖補救。稍贖前愆。此次所請嚴議之處。著暫時無庸置議。多隆阿軍營疫氣曾否輕減。該大臣病勢已否痊愈。均深廬繫。此時回氛逼近省城。勢頗猖獗。該大臣惟當激勵諸軍。迅將高陵渭南一帶回巢掃蕩。期與省垣聲勢聯絡。俾馬德昭一軍得以迅速赴甘。方不至顧此失彼。蒲城被圍甚急。該大臣何以尚未奏報。著卽調派勁旅。迅解城圍。毋稍遲誤。回匪乞撫。本屬緩兵詭計。瑛榮前遣阿渾等勸導。已屬辦理乖謬。此次又稱撫局難成。省城情形。一時不能輕鬆等語。是該撫意

中。專以主撫為事。必係奸回馬百齡等從中
怙憑。若不力思振作。嚴密防範。必至墮其奸
計。貽誤事機。著穆騰阿。瑛榮等督率兵勇。將
附近賊壘。悉數掃蕩。與多隆阿兩路夾攻。庶
軍務可期。日有起色。漢中賊勢日增。官軍米
糧缺乏。瑛榮當嚴飭所屬。設法催徵。採辦米
石。以資接濟。甯羌州城。業經收復。著飭令知
縣丁毓藻等。督帶團勇。乘此軍聲。迅圖克復
沔縣。毋任久踞。將此由六百里各諭令知之。

○又諭駱秉章奏遵旨覆陳雲南情形。並請
留劉蓉在川各摺片。滇省地方糜爛。道途寫
遠。非川黔等處廓清。未易勦辦。前經簡授賈
洪詔為雲南巡撫。令先赴昭通東川駐紮。相
機辦理。茲據該督奏稱。賈洪詔已於二月自
川起程回楚。此時定已接奉前旨。著駱秉章
再行函催。令其由川赴滇。妥籌辦法。至所奏
劉蓉曉暢戎機。不得不留其在省。李雲麟已
督兵赴陝。李桓不日亦可馳抵漢南。督率既

已有人。似無庸劉蓉前往等語。現在李桓行
抵湖北患病。已賞假回籍調理。李雲麟丁憂
回旗。穿孝。前已諭令不拘假期。趕緊赴陝。恐
一兩月內。尚未必即能抵營。駱秉章前派張
由庚等赴漢南援剿。該道員等資望尚淺。恐
不足以資統率。劉蓉諳悉軍務。如能暫赴漢
南調度。較可得力。刻下川省軍務已平。李幅
猷一股。聞已入黔境。著仍遵前旨。即飭劉蓉
督帶嚮導桂字等營。並李雲麟所部。親赴漢
南督剿。俟李雲麟假滿到陝。再行交替回川。
該督即酌量調派。不得稍分畛域。如劉蓉一
時實未能前往。即著駱秉章酌量保奏一員
赴陝。庶李雲麟未到以前。一切得資統率。正
在寄諭間。據瑛榮奏漢中賊勢日增。糧餉匱
乏。情形危急。而張由庚尚無出境之期。漢中
南北兩岸及褒沔等處。偏地皆賊。現在欲解
郡城之圍。必須從東北之十里鋪。分路進剿。
川中援秦之桂字嚮導兩軍。共有五千之眾。

定當先埽南路。以固川省藩籬。然後北趨郡城等語。張由庚派赴漢南。為日已久。何以此時尚未出境。著駱秉章嚴飭該員速赴漢南。如任意逗遛。卽行嚴叅懲辦。又據瑛榮奏。藍逆由洋縣竄擾石泉等處。距興安府城甚近。興安石泉漢陰一帶。山徑叢雜。又無重兵防守。其勢斷不能支。恐該逆一踞興安。則陝南大局。川楚邊防。皆無日得以休息。必須趁此三邊會剿。方易剪除等語。興安地方險要。若被逆匪占踞。於楚省邊防。大有關礙。辦理必至棘手。疊經諭令官文等。派令梁作楫一軍。由興安併力進剿。並將李桓所部勇丁。暫歸該道員統帶。兵力不為不厚。梁作楫現在曾否行抵興安。著官文嚴樹森檄催迅進。以保巖疆。如興安有失。定惟梁作楫是問。浙江鹽運使朱孫詒。日久尚未到任。著官文。駱秉章。查明該員是否在川楚一帶。卽行具奏。將此由六百里各諭令知之。○四川總督駱秉章

奏請將前任廣東按察使趙長齡調赴四川差委。允之。○命太僕寺卿朱蘭提督安徽學政。○以玩誤軍糈。革陝西知縣方傳理職。仍留任採辦。○以陝西省城勦辦回匪獲勝。賞都司孫廷英等花翎。從九品馬秉堯等藍翎。總兵官慶瑞等加銜升敘有差。○予陝西甯羌殉難知州金玉麟吏目馬鎮祭葬世職加等。入祀昭忠祠。○予陝西軍營病故道員張守岱祭葬卹廕加等。○蠲免福建順昌邵武沙。建陽長汀。歸化。將樂。永安。清流。浦城。連城。甯化。武平。福鼎。崇安。莆田。甌甯。光澤。泰甯。壽甯。大田。二十一縣。暨邵軍。汀軍。二廳。仁壽。泉上。嵐下。麻沙。峽陽。五縣丞所屬被擾地方上年額賦有差。

大清穆宗繼天開運受中居正保大定功聖智
誠孝信敏恭寬毅皇帝實錄卷之七十

大清穆宗繼天開運受中居正保大定功聖智
誠孝信敏恭寬毅皇帝實錄卷之七十一

秋修

同治二年癸亥六月丙申諭議政王軍機大

臣等晏端書等奏遵籌修築礮臺及高州肇
羅等處軍情各摺片廣東省垣礮臺自咸豐
六七年間被毀無存現在該省髮逆客匪蔓
延肆擾省城亟應豫籌守備晏端書等以重
新創建經費浩繁擬激勸紳民捐貲辦理其
踴躍輸將認真出力者從優請給獎敘著即
照所請辦理該督撫等惟當督同司道各員
覈實勘估妥議章程擇其緊要處所及早興
工以資守備釐金一款本為協濟江皖浙軍

餉而設。惟以本省之釐。盡撥外省。於捐務亦屬有礙。自係實情。該署督既稱接據曾國藩來函。如廣東亦甚支絀。可量為酌留。即著與曾國藩酌量妥議。將分成數目及早覈定。奏明辦理。至羅定陽江陽春電白等處。雖疊破賊巢。而逆蹤竄突靡常。屯聚如故。勦辦仍未得手。崑壽現在馳抵高州。親督卓興方耀兩軍。並調侯勉忠一軍。會攻陳逆信宜老巢。為拔本塞源之計。務即督飭諸軍實力攻勦。以期搗穴擒渠。則陽江電白等處之賊。自可勢如破竹。一鼓蕩平。前經疊諭毛鴻賓等。以道員唐啟蔭久歷戎行。飭令前赴高州。會同崑壽籌辦勦匪事宜。此時諒已接奉前諭。馳赴軍營。即著崑壽於該道員到營後。和衷商辦。相機進取。吳昌壽勦辦廣海寨。已將西村賊巢悉數平毀。現在滾營前進。四面合圍。諒不難剋日攻拔。著飭該臬司迅籌戡事。務期就地聚殲。毋任紛竄。彭楚漢簡放瓊州鎮。該員

現在曾國藩軍營勦賊。一時未能赴任。瓊州鎮篆務。著即飭令委署之副將許穎陞妥為辦理。毋稍貽誤。將此由五百里各諭令知之。○兵部等部議准。漕運總督吳棠奏。遵議准揚鎮河標改為鎮標。酌擬營制事宜。一。改淮揚河營遊擊為蔣壩遊擊。隸以外南海防海阜三營。以外北營改隸清江城守營。其原設之中河運河堰圩等營。仍酌留修防弁兵。歸新設之徐州淮安兩同知管轄。一。高郵營無庸另設。仍於裁撤之高寶江防二營內酌留修防弁兵。歸揚州府同知管轄。一。改淮徐河營遊擊為宿遷營遊擊。以河右營守備為該營中軍守備。改河右營遊擊為鎮標右營遊擊。以桃源營守備為該營中軍守備。一。改河標中軍都司為清江城守營都司。以新設之安東營守備為該營中軍守備。一。改河標中營副將為鎮標中營遊擊。以裏河營守備為該營中軍守備。一。裏河營弁兵除改併裁撤

外。仍酌留修防弁兵。歸淮安府通判管轄。○將議裁之江南河營參將復設。改為鎮標左營參將。改豐沛營為西路汛。撥歸徐州鎮標中營兼轄。依議行。○山西巡撫英桂等奏。遵覆參領雙興所供已革兵部侍郎勝保叅款。前後不符。得旨著原派王大臣會同刑部。按照所參各情。將雙興再行傳訊。○烏什辦事大臣奕慶因病解職。以鑲藍旗漢軍副都統慶明為烏什辦事大臣。○以黑龍江副管高福為伯都訥副都統。○廣東瓊州鎮總兵官王鵬年因病休致。以儘先副將彭楚漢為廣東瓊州鎮總兵官。○以庸劣不職。革廣東遊擊慶賓守備馮義清謝清榮。○總賴作新職。遊擊王熙以守備降補。○丁酉。諭議政王軍機大臣等。恭親王等奏請嚴催各省欠解工程餉銀一摺。

定陵工程需用餉銀。關繫緊要。上年十二月間。因各省欠解銀至一百七十五萬兩之多。曾

經諭令各該省督撫監督等星速籌解。迄今六月有餘。計各該省所欠餉銀。尚有一百四十一萬兩之多。現在各省解到餉銀。業經將次用竣。專俟欠解之款源源解交。以資接濟。似此任催罔應。勢將停工待餉。關繫非輕。該督撫監督等均身受

文宗顯皇帝厚恩。工程一日不竣。則

梓宮一日不能永遠奉安。該督撫監督等於心何忍。駱秉章等務當激發天良。星速籌解。不得再事遷延。除山西省欠解銀數無多。著英桂於年內全行解撥。其餘各省關所欠之款。著駱秉章等分按四成銀數。先行起撥。統限於年內埽數解齊。其六成未解欠款。均限於明年四五月間全數完交。經此次分立限期之後。若再仍前延宕。不能按限解清。致誤要工。必將該督撫監督等從重懲處。決不寬貸。將此由四百里諭知駱秉章。英桂。張之萬。瑛。榮。閻敬銘。並傳諭毓清知之。○又諭前據御

史尋鑾煒奏山東新任撫臣恐染瞻徇積習一摺據稱東省積習州縣貪縱道府袒庇撫藩臬瞻徇風氣相沿日久閣敬銘甫到山東卽保留吳台朗深恐漸染積習等語閣敬銘經朝廷特簡署理山東巡撫於該省官場積弊自當力求整頓以期仰副委任乃甫經到任卽有保留吳台朗之舉難免不受人慫恿嗣後務宜破除情面加意振作毋蹈瞻徇舊習本日又有人奏東昌守秦際隆貪鄙無能

於莘縣土匪鬧漕滋事委員說和致該匪無忌聚眾連陷冠縣館陶秦際隆帶勇往捕行至沙鎮訛傳警信該府棄冠脫鞵潛匿田閒草深處所勇丁星散該府遁回郡城任賊擾陷堂邑莘縣焚掠東昌不敢出府城一步經譚廷襄撤任調營復資緣回任其於宋景詩槍糧割麥又代為消弭通詳並有宋景詩餽送該府銀兩之事等語地方官貪鄙畏懦縱賊殃民果如所奏實屬大干法紀著閣敬銘

務當切實查明嚴叅懲辦毋得稍有徇庇致令劣員貽害地方仍蹈從前舊習原摺片各一件均著鈔給閱看將此諭令知之○又諭順天府府丞卞寶第奏近畿騎馬賊滋擾請嚴定緝捕章程一摺據稱馬賊肆行通州固安等處路劫之案層見疊出甚至有一日連劫數案者聞京中棍徒勾結外匪每至京營交界地方攔搶車輛回京窩藏所在皆有如通州大興拏獲攔搶大柳樹莊等案各犯供

出趙順兒趙黃毛等在京城公勇庫李大家等處窩藏是其明證至外來馬賊大半由山海居庸古北口各關隘竄入恐守口弁兵有賣放情弊請嚴定章程等語畿輔地關緊要現在馬賊蜂起膽敢於輦轂重地結黨窩藏肆行搶劫各該地方官一味粉飾並不認真緝捕以致盜風日熾亟應嚴定章程以靖地方著步軍統領衙門查旗御史五城御史並由步軍統領衙門知照八旗都統各按地面

嚴行搜緝。嗣後遇有騎馬賊攔搶之案。卽照京城盜劫章程。不但將失事之地方官嚴加懲處。並將獲犯供出窩頓地方之該管官一體嚴懲。其外來賊匪。旣由山海等關口竄入。各該守口兵弁。何以毫無覺察。縱令匪徒任意出入。結夥攔搶。實堪痛恨。著慶春恆齡連成。並劉長佑知照馬蘭泰甯等鎮總兵。嚴飭各該守口兵弁認真盤查。有犯必獲。如經地方官獲犯。究出從何處進口。卽由該管上司

將該處兵弁撤叅懲辦。並著萬青藜林壽圖。劉長佑督飭文武營縣於所屬要隘。遴派兵役防守。分隊梭巡。州縣營員隨時知會鄰封。於交界處所會同巡哨。遇有馬賊蹤跡。本境與鄰封一體會緝。如互相推諉。致令盜賊遠竄。由該管上司嚴叅。儻能緝獲多名。亦准由該管上司隨時奏獎。該步軍統領等各當督飭屬員認真搜捕。悉數弋獲。盡法懲治。毋得視為具文。僅以覆奏了事。原摺著鈔給閱看。

將此各諭令知之。○又諭順天府府丞卞寶第奏熱河土匪窩盜殃民。請飭密拏嚴究等語。據稱熱河積年巨匪。平泉州回民劉寬赤峰縣哈達地方民人沙亮該二匪專以剽掠為生。與文武衙門兵役消息相通。該州縣文武並得受季規。是以從未破獲。遷安縣近日拏獲騎馬賊供稱窩主劉寬平日養養兇徒。製備快馬利器。四出攔搶。沙亮行徑與劉寬相同。黨與極多。京東及順天府屬天津河間保定等處攔劫各案。多係該匪等所為等語。畿輔重地。豈容有此等巨匪肆行搶掠。若不速行搜捕。貽患何可勝言。著瑞麟。麒慶卽行密揀精明妥實之員。不動聲色。前往查拏。務獲究辦。以靖地方。毋得仍前玩泄。致貽後患。將此諭令知之。○以內閣學士額勒和布為理藩院右侍郎。○以內閣學士毓祿署鑲藍旗漢軍副都統。○戊戌遣官祭火神廟。○諭議政王軍機大臣等劉長佑奏。

賊情狡悍。官軍限於時地。驟難得手。一摺。前次官軍進剿宋逆。因恆齡期會不至。致有挫失。此次黎兒莊接仗。雖因積潦在途。高粱蔽野。以致未能得手。而先期知會之丁寶楨。保德等。均未趕到。顯係號令不一。呼應不靈。似此一誤再誤。豈不益張賊勢。畿輔重地。小醜跳梁。官軍竟不能制。尚復成何事體。直東營務廢弛。前降旨令劉長佑督辦三省剿匪事宜。原期畛域不分。藉資整頓。該督膺茲重寄。

務當破除積習。整飭戎行。嗣後該兩省在事文武員弁。其有認真殺賊。不避艱險者。該督自應隨時奏請獎敘。如有觀望不前。藉詞推諉者。卽著從嚴叅辦。毋得意存謙讓。專事寬和。致辜委任。蘇克金一軍。前經諭令僧格林沁。劉長佑。如恆齡兵力尚單。卽飛速調往助剿。今恆齡等兵既有挫失。著僧格林沁。檄飭蘇克金督帶所部馬隊。迅赴臨清。與恆齡合隊。並飭令恪遵劉長佑調度。此次副都統成

保。海軍如果策應不力。卽著據實嚴叅。並嚴飭成保等奮勉立功。力圖報效。丁寶楨。保德等。業經劉長佑知會。何以屆期不到。著閻敬銘速飭丁寶楨各營進紮柳林園附近地方。不准再有遲誤。劉長佑俟各軍調齊。布置完備。卽著激勵諸軍滾營前進。直逼賊巢。盡殲醜類。鄭魁士久歷戎行。打仗勇敢。近日體氣漸壯。著准其留營帶兵剿賊。將此由六百里各諭令知之。○又諭前因直隸餉需支絀。諭

令廣東江西兩省每月各撥銀一萬兩。湖南湖北兩省每月各撥銀七千兩。福建山西每月各撥銀六千兩。均著自四月起。無論何款迅速如數籌撥。委員解交。茲據劉長佑奏各省撥定之餉。僅據福建匯解到四五兩月餉銀共一萬二千兩。其餘均未解到。現在軍餉益形缺乏。實有飢潰之虞等語。畿輔重地。勦賊要需。豈容如此膜視。著官文嚴樹森毛鴻賓晏端書黃贊湯英桂沈葆楨惲世臨等迅

將各該省所欠月餉。無論何款。趕緊籌撥。如數。星速委員解赴直隸。俾資接濟。不得再有玩延。致干咎戾。劉長佑奏調之李明惠等軍。前已諭令毛鴻賓飭該總兵取道楚豫。徑赴直省。以期迅速。並經劉長佑派弁前往迎提。現值直省勦匪喫緊。亟須添集得力之軍。以期迅殲醜類。李明惠等此時計已帶勇在途。著官文嚴樹森惲世臨一體飭催迅速北上。馳赴劉長佑軍營。毋稍延誤。將此由五百里各諭令知之。○又諭張之萬毛昶熙奏豫軍在息縣獲勝。並飭張曜各軍剋期攻拔張岡。毫擒竄撲柘城。復擾及會亭各摺片。皖捻由光固竄入息境。圖援張岡。張之萬等派軍進擊。該匪敗竄回皖。張岡外援已絕。智窮力竭。詭降思竄。張曜嚴陣以待。擒獲張鳳舞等正法。又用間使其內訌。仇殺著名捻首多名。所辦均合機宜。著卽督飭該總兵等乘此聲威。一鼓攻拔。盡殲醜類。毋任竄逸。毫擒出竄。擾

及陳州屬之柘城。意圖西竄。張之萬派令孫之友由商水太康向柘城迎頭截勦。復抽調張士元一軍令由商水取道。分進夾擊。著卽飭令該參將等會督地方兵團實力擊勦。不得再令紛竄。其袁安愚瓦店等寨。仍飭總兵保英等緊攻。毋輕許其乞撫。致貽後患。參將李世玉一軍在會亭地方遇賊另股。督軍擊退。生擒悍賊李壑林等。餘賊敗向西南。與柘城合股。復有賊騎奔竄太康邊境。著卽咨會袁甲三派令兵團探蹤迎擊。並令孫之友趕緊進兵。李世玉等由後路偪勦。以期節節掃蕩。此股擒匪。必係苗沛霖唆使。擾豫將以牽掣我師。豫軍無可分撥。必至處處掣肘。總須將張岡克復。方能操縱自如。該撫等其振刷精神。力圖此寨。然後進兵歸陳。埽除餘燼。以副委任。劉長佑所調之李明惠等軍。如行至豫境。著張之萬催令趕赴館陶軍營。聽候該督調遣。毋任延誤。將此由六百里各諭令知

之。○以江西廣豐縣捐輸軍餉。永廣學額一名。○以河南攻克方黃等賊寨出力。賞守備袁丕基等花翎。餘升敘有差。○以攜餉潛逃。河南都司周殿元革職逮問。○予直隸固城營等處陣亡千總陸恩成。外委李玉發祭葬。世職加等。○撥外火器營火箭二千枝。解赴直隸軍營備用。○己亥。諭內閣。前因兵部奏請整頓馬政。並酌擬章程。當經諭令各處牧養馬匹。責成各牧廠大臣。年終具奏。如調用時。億瘼不堪。即將原奏大臣嚴加議處。監牧等官。從重治罪。茲據恩合奏稱。整頓大凌河牧羣馬政。請將衰病之牧長勒令休退。並明定章程。牧羣翼領。毋庸與副都統並銜畫案。各等語。向來牧廠考比馬政。止論孳生之多寡。不論馬匹之肥瘠。以致疲殘羸瘠。充數塞責。且孳生倒斃數目。均有向章例限。牧馬等官。無從甄別。甚至衰老之員。懸棧充數。若不嚴行懲辦。不足以資整頓。著照該副都統所

擬。其年已七十以上之牧長。嘎爾炳阿。常福。興德。西倫達成阿。副牧長福隆額。佛英額。即著勒令休致。嗣後牧羣升途。以該羣孳生之馬數較多。兼能臚壯者。以次揀補。如有馬匹疲瘠等弊。即將該翼領等嚴行叅處。牧長以下等官。即於查驗馬匹之時。分別責懲。叅革。其錦州牧羣衙門六品翼領。向與副都統聯銜畫案。非惟與體制不合。更易啟把持擅權之弊。嗣後錦州牧羣衙門。著比照錦州管莊衙門。遇有辦理文彙事件。文內僅敘該翼領案呈。不准聯銜畫案。以示區別。而杜僭妄。○諭議政王軍機大臣等。毛鴻賓奏。浙江運司朱孫詒患病。懇請開缺調理等語。朱孫詒前在湖南。歷任府縣。頗著循聲。且能留心人才。講求團練鄉兵之法。疊經內外臣工暨該督保奏。當此時艱孔亟。在在需材。若竟令引疾而歸。未免可惜。現在多隆阿督辦陝西軍務。軍營文案等件。亟須得人襄理。期於悉協機

宜。本日已降旨將朱孫詒開缺。令其力疾迅赴陝西多隆阿軍營。襄辦一切事務。卽著毛鴻賓。憚世臨。傳諭該員。如舊疾稍痊。卽恪遵諭旨。星馳赴陝。僕抱微疴。仍當力疾前往。以副委任。將此由五百里諭令知之。○又諭。總理各國事務衙門奏。俄人在西界各處卡倫住牧搶掠。遵旨籌辦一摺。另片奏紬繹條約。與俄國住京公使剖辯窮詰。請飭伊犁將軍等相機妥辦等語。上年俄國會議西界強執中國常住卡倫為界一語。極力狡賴。使中國不能定議。而彼得乘閒籠絡哈薩克布魯特。供其指臂。一面帶兵沿卡騷擾。冀遂其蠶食之謀。其情實屬可惡。現經總理各國事務衙門王大臣照會該國住京公使格凌喀。將伊國誤解條約內往西直至及常住卡倫兩層。往復駁詰。字字講解明白。使之無可置喙。又於把留捷克回國時。給與該國大學士照會一件。將亟須勘定疆界及亟須講明條約兩

層。切實剖辯。現在格凌喀接到末次照會後。雖尚未照覆。而外國最重條約。理屈者詞必窮。諒亦難一味狡獪。竟置和約於不顧。第該國勘界大臣。今年果否來塔會議。尚無消息。明諠此時計已起程。馳赴塔城。著卽會同明緒。先事豫籌。相機妥辦。明諠前奏有折中定議。繪具地圖。請照紫色限界之語。曾經諭令該將軍等妥為辦理。現在總理各國事務衙門因俄使堅執明諠照會內卽不能往西邊。亦應往西南一語。稱為業經承認。是以給與照會。代為辯論。層層摺別。仍就明諠等照會所云。附以條約本意。委曲剖晰。既將明諠等前言辨明。且執定往西直至之語。該國雖不能照辦。而降格以求。將來或可與紫色限界之議符合。該將軍等惟當堅持定見。豫將應分之處。一一勘定。儻此後俄使前來勘界。不至如上年之肆行要挾。則折中定議之說。卽可酌度機宜。妥為籌辦。庶邊界得以早定。不

至日久另生枝節。方於大局有益。其常住卡倫一節。明誼等惟當遵照總理各國事務衙門照會。力與剖辯。不可稍有歧異。至科布多吹河。有道光年間俄人建蓋之木房。塔爾巴哈台。有咸豐初年駐紮之俄兵。伊犁勒布什迤南。並有俄人所設之卡倫木城。從前疆吏果能慎固封圻。無懈可擊。何至任俄人侵占。若罔聞知。現據明緒奏。俄人又移進卡倫一層。並常清奏。俄人動問伊犁。回眾滋事。曾否

完結。其為幸我邊隅多事。乘閒相陵。詭謀畢露。嗣後常清等務當力求自強之道。加意整頓。實力巡查。毋得再蹈從前覆轍。致啟外國覬覦之念。現在博羅胡吉爾卡外。俄兵是否撤退。常清所稱務弭釁而不先開釁。為應兵而不先逞兵等語。尚屬審處得宜。明緒所稱巡查卡倫。令領隊大臣繞道前往。相機酌定行止。辦理亦尚周妥。即著該將軍等認真防範。據理曉諭。務令赴卡俄兵概行撤回。不

至日久生事。方為妥善。至哈薩克布魯特稟求內附。誓志不肯背順。何以常清奏稱西南路俄人。係由布魯特帶領前來。且有歸順該國四十餘年之語。而哈薩克從前聞亦暗附俄人。可見首鼠兩端。未可深恃。惟既有內附之請。若咎其既往。概行拒絕。不特絕其向善之念。且恐其餘部落聞而解體。仍著該將軍等善為撫綏。加意激勵。俾為我用。仍一面隨時密加偵察。覘其去就。豫籌辦法。現在勘界

一事。俄人雖極狡詐。第尚知以條約為口實。即此是可轉之機。該將軍等身膺邊疆重寄。惟當殫慮竭心。力顧大局。以期邊圉早靖。國體無傷。方為不負委任。所有總理各國事務衙門摺片各一件。俄國照會及給俄國照會共七件。均著鈔給明誼。明緒閱看。將此由六百里各諭令知之。○又諭瑞麟奏。派員查辦蒙古差項地畝。酌議章程。開單呈覽一摺。喇嘛林沁京控一案。經瑞麟派委員唐津等馳

赴貝勒旗傳集眾阿勒巴圖等將私開之地畝開單指明所有拉卽元旦營子地畝覈與該旗檔冊原數相符其鷄鷹河等處私開荒地甚屬繁雜現值禾苗在地未能徧行履勘先將差項酌定每年每丁暫交東錢八吊仍俟地畝查清差項或增或減再為酌定該委員等酌擬章程十五條傳集該旗官員並阿勒巴圖等詳切開導該原被人等均各悅服願息訟端各安生業革除老頭會名目並投具甘結辦理尚屬認真所擬各條亦俱允當著瑞麟俟麒麟慶到後會商妥為出示開明各條一體曉諭務期旗民永息爭端上下不至交困以順羣情而肅旗務如有未盡事宜並著麒麟體察情形再行妥議具奏將此諭令知之○以內閣學士毓祿暫署倉場侍郎○准浙江鹽運使朱孫詒開缺命赴欽差大臣多隆阿軍營辦理文案○庚子諭內閣倉場侍郎宋晉奏西倉米石虧短太甚請將監督

等撤任議處給事中郭祥瑞奏西倉米石虧短過多請飭查究辦各一摺西倉應存白米經該侍郎宋晉等逐廠盤查共虧短白米一萬三千八百餘石之多其為該花甲等肆行舞弊該監督等漫不經心情節顯然更恐有扶同徇隱等弊亟應嚴切究辦以除積蠹而重倉儲所有該倉花甲頭役李英范繼先張平汰王錦汶等均著交刑部嚴行審訊按律懲辦毋得稍有寬縱該倉漢監督魁明平時竟漫無覺察現因新任滿洲監督松秀到任始行會稟查辦實屬顛預著先行撤任交部議處前任滿洲監督瑚雅里兼署漢監督春德雖在任不久均屬查察未周著一併交部議處魁明瑚雅里春德與咸豐四年以後歷任滿漢監督有應行質問之員均著聽候刑部傳質升任熱河都統前任倉場侍郎麒麟倉場侍郎宋晉未能先行覺察亦屬疏忽著一併交部議處至該倉虧短米石應作何分

成賠補。並歷任倉場侍郎查倉御史監督等應得處分。著刑部於定案時聲明請旨。尋吏部議。麟慶、宋晉均罰俸一年。准其抵銷。從之。○諭議政王軍機大臣等。有人奏。知州貪鄙不職。並土棍結盟搶掠。請飭查拏各摺片。據奏順天署通州知州原振鈞辦事荒謬。性情謔詐。該州有河閃地十餘頃。經該處民人張雍延出貲開荒。報明稅契後。因與土棍張昆等涉訟。該署州輒將所稅之契概行追奪。侵吞麥石樹株。容留官親劉三攬權納賄。縱容門丁李二詐索張雍延銀兩。並將積年棍匪包辦官事之該州快役黃六等開具名目。請飭查拏。又昌平州馬房村地方。有土匪張六即張連陞冒充順天府承差。與土棍楊家悅等結盟二十餘人。搶掠詐訛。種種不法。並請掩捕各等語。州縣為親民之官。所叅各情。如果屬實。亟應嚴行查辦。著萬青藜、林壽圖、按照摺內所指各情。切實根究。毋稍徇庇。盡棍

黃六等如實係積年棍匪。即當按名查拏。以靖地方。至昌平州土匪結夥行搶。並有軍師大都督等名目。若不及早翦除。誠恐養癰貽患。並著查明密派幹役迅速掩捕。毋任漏網。其任聽捕役包庇畏難苟安之昌平牧。並即據實叅辦。以懲玩泄。原摺片均著鈔給閱看。將此諭令知之。○又諭前據唐訓方、曾國藩先後馳奏壽州失陷。並曾國藩調度布置情形各摺片。當經諭令曾國藩等催軍赴援。張之萬、毛昶熙速拔張岡。分兵赴皖。並令袁甲三操練兵團。以固豫防。嗣據張之萬等奏。豫軍在息縣獲勝。並擒竄柘城等處堵禦各摺片。復諭令張之萬等力圖張岡。進兵歸陳。茲據袁甲三奏。皖豫震動。竭力籌辦一摺。與曾國藩、唐訓方及張之萬等所奏情形大略相同。僧格林沁圍攻淄川。尚未即克。勢難分兵南下。節經諭令攻克後再行移兵赴皖。亳州鹿邑股匪四出紛擾。專恃陳郡團練堵禦。袁

甲三惟當督率練眾實力嚴防。以杜竄擾。張之萬毛昶熙。現督豫軍。規取張岡。務宜懍遵。疊次諭旨。速行攻拔賊圩。庶可移兵歸陳。與袁甲三聲勢聯絡。合力堵禦。並著飭令孫之友李世玉兩軍迎頭探勦。務將奔竄太康邊境。擒匪痛加勦除。力固邊境。蒙城糧米久缺。仍著袁甲三飭令高錫齡等將現辦糧米千石。並遊擊呂浩然管解之餉銀一千兩。星夜設法運往。以後並著源源接濟。毋稍遲緩。練

總王金奎此次絕苗。不肯與通。尚屬能知順逆。著卽照袁甲三所請開復遊擊原官。並花翎勇號。仍著袁甲三飭令王金奎迅速運糧赴蒙接濟。潁州人心震動。亟須添兵駐紮。以固人心。曾國藩前檄蔣凝學暫駐三河尖辦足米糧。移紮潁州。著卽嚴飭迅速辦理。並飛飭成大吉仍紮三河尖。周寬世等仍駐紮六安州等處。務期力保完區。前調之何紹彩四營及彭玉麟等所部三板八十號。均著嚴飭

星赴臨淮援勦。以資得力。並著隨時與豫軍聯絡聲勢。互相援應。毋得稍分畛域。將此由六百里各諭令知之。○辛丑。予廣西桂林等府殉難紳民婦女一千九百八十八名口分別旌卹如例。○壬寅。以神靈助順。頒直隸束鹿縣

河神廟扁額曰靈昭安定。○諭議政王軍機大臣等。僧格林沁等奏克復淄川。生擒匪首劉得培等正法。並攻克白蓮池等處賊寨。情形一摺。另摺奏。擬卽移營白蓮池附近駐紮。督飭各路馬步兵勇進攻教匪山寨。先清此股。再行撥兵援蒙。並帶馬步馳赴河北會勦宋景詩。及恆齡攻勦挫失。現調蘇克金由景州移紮臨清。合力防勦。並佐領訥木津折往宿州各等語。淄川旣克。匪首伏誅。其逸出各匪。諒已搜捕淨盡。地方善後一切事宜。及應行勦辦餘匪。著閻敬銘暫駐淄城。妥為經理。各營勇隊分別遣留。以節糜費。該大臣於淄

川克復後。卽行拔營赴白蓮池駐紮。先將教匪一股辦清。再圖南下。實屬奮勇可嘉。所籌辦理次第。均合機宜。著卽督飭黃國瑞等分道進攻。該處山徑險僻。尤須屬令諸將慎之又慎。不可貪功輕進。以期漸次得手。一律蕩平。宋景詩率黨背叛。無難一鼓殲除。惟因期會未至。號令未齊。以致恆齡等深入中伏。幸未多有損失。現在劉長佑用滾營進紮之法。芟刈高粱。節節進逼。並調集鄉團四面合圍。

僧格林沁復調派蘇克金駐紮臨清。與恆齡馬隊會剿。所有恆齡蘇克金兩軍。著僧格林沁仍遵前旨。飭令暫歸劉長佑節制調遣。以歸畫一。而免貽誤。劉長佑當激勵諸軍。剋期進剿。擒渠掃穴。肅除直東股匪。以便僧格林沁攻克鳳凰山等處教匪。後卽可督兵南下。不至再有牽掣。至蒙城情形危急萬分。白蓮池兵力足敷分布。該大臣務須酌派得力大員分帶勁旅。迅速往援。傅振邦在徐宿一帶

有年。於該處情形定必熟悉。或卽先行酌量調派。以慰該地方官民倒懸之望。李大箇子投誠情形及溜川逃出零匪共有若干。著僧格林沁。閻敬銘。隨時分別具奏。將此由六百里各諭令知之。○署山東巡撫閻敬銘奏報黃水陡漲。漫溢出口。得旨前據譚廷襄奏黃水由蘭陽下注。險工疊出。當經寄諭該署河督實力修守。並諭令閻敬銘等將隄壩要工督飭沿河州縣設法修築。以資捍衛。著懷遵

前次寄諭妥速籌辦。並將被災黎民妥籌安撫。毋令失所。○四川總督駱秉章奏軍務未平。請將補行咸豐辛酉科鄉試再行展緩辦理。從之。又奏軍務未平。請將鹽茶報銷展限辦理。並鹽引積滯過多。擬分別新舊。健富兩廠自同治元年始。榮廠自同治二年始。劃為新引。以前所積為舊引。新引仍行本岸。舊引則健富兩廠予限八年。榮廠予限六年。責成健富榮各商與楚商合力行銷。以顧課羨。至

湖北長樂等縣續增捷廠引張。請仍招商領配。以專責成。下部議行。○以軍機處校對清字檔冊出力。予章京員外郎嵩壽等升敘有差。○以克復山東淄川縣城。生擒首逆劉得培。欽差大臣僧格林沁得旨嘉獎。賞總兵官曾逢年花翎。提督傅振邦等加銜升敘開復有差。○予山東蘭山郟城二縣陣亡殉難增生傅屹瞻等紳民婦女四百七十三名口分別旌卹如例。○予四川各屬陣亡殉難紳民陶光興等暨婦女二千五百九十六名口分別旌卹如例。○

上以孟秋時享

太廟。自是日始齋戒三日。○癸卯。諭內閣。徐宗幹奏。請將庸劣不職各員革職一摺。福建捐納縣丞保升同知程錫疇。鑽營奔競。代理詔安龍溪等縣任內。聲名狼藉。通判王金鑪。小有才能。同官不齒。委辦官運局用浮靡。布政司經歷保升。通判王景成。品行卑鄙。前代理

霞浦縣任內。聲名平常。縣丞趙成居心不正。行同市儈。按察司照磨趙森炎浮躁多事。任性妄為。均屬不堪造就。程錫疇。王金鑪。王景成。趙成。趙森炎。著一併革職。以肅官方。○署兩廣總督晏端書等奏。布政使文格到任未及三月。請將展辦咸豐六年九年暨同治元年三屆計典。再展限舉行。從之。○補鑄浙江學政。鹽運使。督糧道。台州金華嚴州等府知府。嚴州府同知。上虞建德昌化慈谿奉化太平甯海淳安壽昌金華湯溪等縣知縣。玉環象山江山遂安等廳縣儒學。瑞安縣巡檢。台州衛守備。長林場鹽課司大使。各關防印信條記。從巡撫左宗棠請也。○予故貴州黎平府知府升任湖北巡撫胡林翼入祀名宦祠。從巡撫韓超請也。○甲辰。

上以孟秋時享

太廟。前期親詣行禮。○諭內閣。僧格林沁督軍豫皖以來。疊掃捻逆巨股。殲除逆首張落刑

等屢奏戰功。嗣復回師北路。圍攻淄川。踞匪克拔堅城。擒誅首惡。洵屬勳勞懋著。因念近日天氣炎蒸。該大臣冒暑督師。運籌決勝。允宜優加賞賚。以獎勤勞。著發去黃綢珊瑚豆大荷包一對。黃綢珊瑚豆小荷包兩箇。翠玉翎管一支。白玉搬指一箇。白玉煙壺一箇。玉柄小刀一把。火鐮一把。侯伯彥訥謨祜由隆福寺差竣回京。卽令親齋前往軍營。交僧格林沁祇領。並傳諭該大臣為國賢勞。尤宜善自保愛。以隆委寄。○又諭左宗棠徐宗幹奏營員互相稟訴。不服質訊。請旨革職歸案審辦一摺。參將陳英於上年八月間。接管總兵周萬遠所部勇丁。旋據稟稱周萬遠所部有短缺勇額。剋扣餉銀情事。並稱周萬遠挾嫌暗中遣人謀害。又據周萬遠稟控陳英蒙混漁利等情。經前任總督耆齡派令知府雷瑞光等查出周萬遠所部各營。均有缺額。經雷瑞光等飭令陳英周萬遠面質。周萬遠輒敢

率領勇丁直入府署。不服質訊。實屬膽大妄為。參將陳英接帶周萬遠所部勇丁。知有缺額。並不卽時具稟。其所控周萬遠剋扣餉銀。難保非意存挾制。至所稱周萬遠遣人謀害一節。尤屬任意牽砌。毫無確據。案關帶勇大員短缺勇額。剋扣餉銀等情。虛實均應徹底根究。周萬遠陳英均著卽行革職。交左宗棠徐宗幹提集人證卷宗。研訊確情。按律定擬具奏。毋稍徇隱。○又諭毛鴻賓奏。珍滅寶慶大股土匪。擒獲逆首一摺。湖南寶慶土匪。自進踞半山後。竄至洋溪。窺伺新化縣城。適記名臬司趙煥聯由益陽派赴寶慶之軍。馳抵該縣。總兵王永章趙福元先後趕至郡城。該逆仍退回半山。旋繞竄橫陽山。王永章等分路截擊。疊有斬獲。圍燒大股賊匪於鄒家村。焚斃殆盡。逆首偽一王唐洪山率黨紛竄黃皮嶺雙江口一帶。經參將王政坤等跟蹤追剿至星子坪。立將唐洪山擒獲。餘賊竄逸。大

股殄滅殆盡。仍著嚴飭在事將弁分道擒捕。務期盡絕根株。毋留餘孽。所有在事出力文武各官紳。准其由憚世臨彙案擇尤保奏。以示鼓勵。毋許冒濫。○諭議政王軍機大臣等。理藩院奏。請飭熱河盛京會拏要犯一摺。卓索圖盟土默特旗匪犯綽金汰。那木薩賚等。聚眾多人。向該地方訛索錢文。將馬甲巴育泰房屋燒毀。並將派拏該匪之章京哲克通額等驢馬多匹搶去。實屬目無法紀。且被害之巴育泰家屬於該旗章京查驗詢問時。至不敢供出匪眾姓名。足見該匪等恃眾橫行。兇殘日熾。若不趕緊擒拏。勢將釀成巨患。據該旗貝勒散巴勒諾爾贊等向理藩院呈稱。本旗人因旗下官差過重。懇求輕差控案。經盟長派出扎蘭丹巴等傳訊時。綽金汰聚眾拒捕。劫去人口驢馬。燒毀巴育泰房屋等語。著麟慶確切查明。如果該匪眾實因官差過重。邀集多人懇求輕減。尚無毆官搶人重情。

即著傳訊該犯等分別辦理。儻實係聚眾滋事抗官拒捕擾害地方。即由該都統迅派兵丁。並傳知卓索圖盟長派委妥員一併查拏。一面知照盛京地方文武趕緊會緝。並著王明和潤德椿。一併派員探訪。如須用兵會拏。即迅派得力文武多帶兵役前往協緝。務將著名各犯悉數擒拏。毋任一名漏網。致留餘孽。原摺著鈔給閱看。將此各諭令知之。○又諭左宗棠奏浙師援江獲勝。並陳軍營疫氣盛行。暨勒令楊坊捐輸浙米各摺片。浙省援江之師。會合江軍將陶家渡等處賊壘悉行掃蕩。其竄往洋塘石門之賊。復經劉典會同席寶田等軍馳勦。賊眾悉向彭澤境內竄去。浮梁鄱陽境內一律肅清。都昌之賊亦聞風下竄。事機甚為順手。刻下李榕一軍駐紮湖口。江忠義諒已自潯拔隊由都昌直趨湖口。即可與江省追躡之師前後夾擊。以圖聚殲。著曾國藩左宗棠沈葆楨分飭各軍合力掃

蕩母任旁竄。李榕此次督軍入江。前於彭澤境內得獲勝仗。現已將該員補授浙江鹽運使。並著曾國藩傳知該員。令其努力功名。以圖報稱。現在闖入江西之賊。本由建德祁門一帶竄出。此時被勒窮蹙。恐復由原路鋌走。左宗棠擬令劉典一軍防堵宣歙一路。藉資休息。俟確探賊蹤趨向。再定進止。甚合機宜。即著左宗棠妥籌調度。相機辦理。至軍營疫氣盛行。蔣益澧、劉典、魏喻義、暨水師各營染患甚多。每營勉能出隊者。不過三四成。覽奏殊深廑繫。現在已交秋令。時疫諒可稍減。左宗棠惟當加意拊循。以消沴戾。一俟疫氣稍除。即行相機進取。已革道員楊坊以市儈依附洋商。擁貲百萬。此時浙省奇荒。經左宗棠派令捐賑米五萬石。竟敢抗違不遵。僅認捐銀一萬兩。並請將籌備京米銀一萬兩歸併浙捐。實屬嗜利昧良。居心狡詐。著李鴻章將該革員派捐京米十萬石。勒限如數追繳。一

俟繳清。即行押解赴浙交左宗棠。即照所請勒令捐輸賑米。毋任狡展。再本日已降旨郭嵩燾以三品頂帶署理廣東巡撫。該省軍務吏治。亟須整飭。毛鴻賓本日奏到。尚無起程日期。晏端書黃贊湯均係五日京兆之員。辦理深恐貽誤。著郭嵩燾迅速前赴署任。將該省軍務釐務及地方吏治妥為整頓。以副委任。如郭嵩燾已赴江北。並著曾國藩李瀚章飛速行知。令其迅速由江赴粵。毋稍延緩。將此由六百里各諭令知之。○又諭左宗棠奏請將貪橫不法之護提督革拏查抄一摺。浙江象山協副將石棟夤緣前督臣慶瑞幕友莊煥文得護提督。本日據左宗棠摺內所叅種種貪橫不法。出於情理之外。石棟著即革職拏問。交左宗棠、徐宗幹嚴行審訊。按律定擬。毋稍疏縱。所有該革員貲產。著徐宗幹嚴密查抄。以儆官邪。該革員之子石渠並把總俞清音均著一併革職歸案審辦。左宗棠原

摺著鈔給徐宗幹閱看。將此由六百里各諭令知之。○又諭前據多隆阿奏李雲麟心浮膽怯言大而夸實非將將之才。諭令官文嚴樹森駱秉章查明覆奏。茲據官文嚴樹森奏稱覆加考察。李雲麟廉隅耐苦。頗能得士卒心。惟其年輕氣盛。議論煩多。才具雖稱。儻性情不免麤疏。若置之偏裨。得知兵將帥薰陶磨鍊。以老其才。未必非他日干城之選。此時閱歷尚淺。猝投艱鉅。恐致貽誤事機。惟劉蓉則謀勇兼優。戰功卓著。其威望足資各軍統率。且由川抵漢。道路較近等語。前經諭令駱秉章調派劉蓉前赴漢南督勦。俟察看李雲麟可以交付。再回川省。現在陝南羣盜如毛。軍事日棘。毛震壽一籌莫展。因循貽誤。而李雲麟既不能獨當一面。亟須知兵大員前往接替。軍事方能日有起色。著駱秉章仍遵前旨。卽飭該藩司督帶嚮導桂字等營趕緊起程。前往督辦陝南軍務。該處統率無人。賊

勢日肆披猖。駱秉章素顧大局。務令該藩司星速馳赴。毋稍稽延。劉蓉並著專摺奏事。一俟行抵漢南。卽行迅速馳奏。將此由六百里諭知駱秉章。並傳諭劉蓉知之。○又諭毛鴻賓奏訪聞粵東情形。暨籌辦赴粵事宜。並據實舉劾各員等摺片。覽毛鴻賓所奏粵東軍務吏治及捐釐籌餉各種弊端。及現在前往應行次第整頓各情。均能切實洞悉源委。足見該督平時於鄰省利弊。尚知詳細訪求。故能言之親切。粵省現在情形。亟須得人而理。毛鴻賓身任兼圻。委寄滋重。所陳粵事入手以大振軍威為第一要著。必得由湘募練勁勇攜帶同行。方能確有把握。著卽照所擬迅速辦理。務須剋日成行。到粵後一克踐所言。使地方軍務速為振起。吏治肅清。捐務釐務均能整理。於籌餉大有裨益。方為不負委任。其張運蘭一員。著卽准其帶往。其所部老湘營能否調令由江入粵。卽著毛鴻賓函咨

曾國藩酌量辦理。金國琛一員。現當豫省軍務喫緊。將才缺乏之際。著仍遵前旨。飭令迅速前往河南。歸張之萬調遣。以資得力。黃冕亦著准其留於廣東差遣委用。所請以三品京堂候補之處。著毋庸議。胡大任一員。即著毛鴻賓咨行官文等。飭令赴粵幫辦釐務。中書郭崑燾前經劉長佑奏調赴直。即著毛鴻賓飭令迅即前赴劉長佑軍營。俾資臂指。郭嵩燾簡署廣東巡撫。毛鴻賓抵粵後。諒能與該署撫一切和衷商同辦理。以收成效。惟其到任究尚需時。毛鴻賓務即迅將赴粵應辦各事宜趕緊料理。何日起程。迅速馳奏。毋庸拘定一月之期。庶早一日抵粵。於粵事得早一日整理也。將此由六百里各諭令知之。○命廣東巡撫黃贊湯布政使文格來京。以兩淮鹽運使郭嵩燾署廣東巡撫。廣東按察使吳昌壽為布政使。督糧道李瀚章為按察使。○以湖南軍營襄辦得力。賞在籍四品卿銜

內閣中書郭崑燾花翎。○以湖南省城辦理軍需團防出力。予按察使倉景恬等加銜升敘有差。○予江西陶家渡陣亡都司張亮華祭葬世職。

大清穆宗繼天開運受中居正保大定功聖智誠孝信敏恭寬毅皇帝實錄卷之七十一

大清穆宗繼天開運受中居正保大定功聖智
誠孝信敏恭寬毅皇帝實錄卷之七十二

較修

同治二年癸亥秋七月乙巳朔享

太廟遣恭親王奕訢恭代行禮○

上詣綏履殿問

慈安皇太后安平室問

慈禧皇太后安至甲戌皆如之○諭內閣戶部

奏請飭催山東額運新漕等語山東省額運

新漕例應於每年三月抵通本年該省應運

同治元年分漕糧據報首幫於四月內開行。

迄今兩月之久尚未行抵直境其以後各幫

曾否交兌齊全亦無消息漕糧為天庾正供。

豈容任意遲誤著閭敬銘嚴飭該糧道將該省應運新漕業經交兌者迅速開行尚未交兌者勒催完繳統限於七月底全數飛挽抵通以供支放如再遲延卽著該部將該糧道嚴叅請旨卽行革職仍勒令將應運漕米交清以重倉儲而儆玩泄○又諭前據僧格林沁等奏遵查道員黃元吉將參將曹福雲擅行正法等情當經降旨將黃元吉暫行革職交唐訓方徹底根究茲據奏稱訊明黃元吉

因曹福雲冒領口糧不遵開導肆行兇橫卽欲軍法從事經楊繼煥范文英等代求從輕棍責曹福雲被責不服有起隊報仇之語黃元吉恐致釀成事端卽將曹福雲正法楊繼煥等並無架禍唆使情事請旨分別辦理等語此案參將曹福雲意圖虛領口糧不遂所欲肆行無忌實屬大干法紀業經正法應無庸議黃元吉於此等重案並未具稟率行擅殺武職大員亦屬冒昧糊塗著卽行革職副

將范文英李安邦雖無唆使情事而帶隊不能得力著一併撤銷勇號以示薄懲楊繼煥本係革職永不敘用之員仍復潤跡軍營不知檢束卽著驅逐回籍交地方官嚴加管束毋任出外滋事范文英在籍患病既據各供並無架唆之事卽著免其提質○諭議政王軍機大臣等唐訓方奏陳淮河兩岸力籌堵剿蒙城困迫日甚各摺片並吳崇奏苗逆勾捻其勢日熾宿捻及土匪均欲裝旗北竄各

等語苗逆雖係自守之賊而專於偏脅各圩且兇謀陰狡每以包截官軍後路為長技此次乘壽州淪陷水陸東下猛撲臨軍唐訓方所部各軍飢困之餘前後受敵勉強支持深恐屢戰力疲一有挫折則全淮不堪設想現在蚌埠賊划雖經擊沈多隻而陸賊仍負隅死守著唐訓方仍督各軍竭力妥籌戰守一俟彭玉麟楊岳斌黃開榜等水師趕到卽飭前敵諸軍水陸會合攻剿蒙城被圍日久宿

州一綫糧道亦為阻絕蒙城內外僅馬新貽英翰兩軍勉力戰守而兵力無多糧運屢斷情形萬分危迫殊恐難復久支吳崇所派援蒙之姚廣武一軍因徐境各匪有裝旗北竄之信調回防剿現據該漕督所奏又有豫東兩省回宿敗捻誘脅各圩眾至數萬其李大簡子等在宿州煽脅各圩已有二萬餘人聲言裝旗北竄等情壽州陷後苗逆勢已復張若不及早掃除將來北路大軍南下亦恐為

捻逆中阻勢將不可收拾吳崇與唐訓方所奏各情大略相符均請飭令僧格林沁移師赴皖情詞甚為迫切前據僧格林沁奏俟攻克白蓮池後令黃國瑞帶兵往攻苗逆當經諭令該大臣以傳振邦熟悉徐宿一帶情形可卽令帶兵前往現在蒙城如此危急苗黨捻匪如此之多該大臣卽不能親往必須調派得力兵將前去方能有濟傳振邦黃國瑞二員中何員最為得力著該大臣酌量迅速

調派一面奏聞。唐訓方仍卽就所有兵力。竭力堵柱。以待援師。毋稍疏失。吳崇嚴飭姚廣武。速將宿西各匪。勦除。卽折回宿境。與馬新貽英翰等軍聲勢聯絡。以通蒙城糧運。並著該漕督。懍遵疊次諭旨。源源接濟。毋令乏絕。訥木津桂錫楨之軍。已有招降李大箇子股匪之稟。何以該匪又復糾黨。裝旗聲言北竄。是否訥木津等稟報虛捏。抑或李大箇子肆行反覆。著僧格林沁嚴密確查。仍飭訥木津

等速行折回宿境。合力勦賊。毋許觀望。唐訓方所奏。有已革知府金汝霖為苗逆內應。現已計擒就戮。此等衣冠悖逆。殊堪髮指。其籍貫何處。眷口何存。例應連坐。著唐訓方密行查拏。辦理將此。由六百里各諭令知之。○閩浙總督左宗棠奏。請設閩浙總糧臺。派遣道員蘇式敬。王加敏管理。報聞。○丙午。諭議政王軍機大臣等。李鴻章奏。官軍進攻蘇州花涇。港。同里賊壘。克復。吳江震澤縣城。並擊退楊

庫長涇一帶竄賊。各摺片。江震一城。當水陸之衝。我軍既已攻克。必須固守。方足以搃賊吭。而制其命。著李鴻章飭令程學啟等。仍以穩紮穩進為主。然後由花涇港直下太湖。規取蘇城。不可稍存大意。楊庫長涇之賊。既經擊退。卽應飛飭各營。進規江陰。惟該營將士冒暑征戰。疫病甚多。殊深廑念。該撫當令黃翼升等。妥為拊循。入秋以後。疫氣定可漸平。卽督令該員弁等。妥籌進取。毋誤事機。另片

密陳。許開按獲偽文。內稱金陵城內米價昂貴。火藥亦缺。並調各偽王赴援等情。著卽飛咨曾國荃等。上緊偪攻。並須嚴斷輪船接濟。以期早克堅城。前已諭令總理各國事務衙門。與在京各國公使。妥為商辦。並照會令其飭知各口領事官。嚴密查察。禁止濟賊糧藥。如不服查問。仍前接濟。卽令師船開礮。實力轟擊。毋稍姑容。白齊文已逐出中國版圖。既有投賊情事。自應密拏嚴辦。諒外國人於理

屈之事亦不能再行曉辯也。現在江南各軍以次得手該撫惟當謀定後動然後攻瑕乘隙自不難節節蕩平。同膺懋賞勉之望之。將此由六百里諭令知之。○又諭張之萬等奏攻克張岡擒斬巨捻並會商布置截擊皖捻情形各摺片張岡既下汝南一帶肅清自應移兵歸陳以為防苗勦捻之計張之萬等所陳兵力疲乏請俟整頓稍有端緒即行卷甲東征等語固屬實在情形惟苗逆自陷壽州

勢愈臨張而蒙城被圍日久危如累卵歸陳一帶若不豫設重兵嚴密扼守萬一該逆乘虛西竄張之萬等又何以禦之。況皖捻餘燼復然柘城太康等處肆擾殆無虛日尤應迅速勦滅以免燎原即著督飭款天印尹嘉賓孫之友等各就派防處所實力扼勦毋稍疏虞張之萬等一面將募練各營趕緊整頓剋期東發以勦為防不得稍有玩誤歸德一帶本係毛昶熙舊日駐紮之所即著統領所部

先赴該處鎮撫調度聯絡兵團以壯聲勢至張岡新復人心未定一切善後事宜著張之萬等妥為籌辦毋稍大意張曜銜鋒陷陣所向有功前由藩司改用總兵實為用其所長朝廷文武並重毫無歧視該總兵自改官後臨敵慮勝奮勉更倍於前即是該員秉性忠勇可以永受殊恩之處張之萬等可傳諭張曜令其愈加策勵始終不渝果能殲除苗逆盡掃捻氛則懋賞酬庸正不止一藩司已也

將此由六百里諭令知之。○又諭多隆阿奏覆陳省垣附近回匪情形一摺另片奏遵飭馬德昭赴援甘省等語西安省城附近一二十里外不過時有回匪游騎往復而瑛榮輒張惶入告聲稱東路回匪直撲省城至回匪數百人突竄蒲城縣屬之興市鎮一帶瑛榮輒稱蒲城被圍甚急陳奏各情已多不實且株守省垣一籌莫展已明降諭旨將瑛榮革職以劉蓉補授陝西巡撫未到任以前著張

集馨暫行署理矣。惟逆回探知官軍多病。日夜撲營。雖經多隆阿督率各軍奮勇擊退。難保不再來侵犯。多隆阿務當振刷精神。趕緊經理。一俟布置妥協。卽行進搗沙河等處賊巢。節節掃蕩。直達高陵。毋落後著。鳳翔被困日久。不可不星速往援。平涼之圍未解。豈容膜視。著多隆阿迅卽檄飭馬德昭督率所部。取道鳳翔。實力攻擊。迅解城圍。卽由鳳翔援救平涼。庶不至顧此失彼。馬德昭旣去。省城

戰守事宜。多隆阿責無旁貸。且據奏稱。穆圖善等紮營臨潼。與省城近在咫尺。聲氣相通。多隆阿自應力籌兼顧。毋得稍有貽誤。致滋咎戾。前因漢南兵勇統領乏人。節經諭令駱秉章調派劉蓉赴陝。當此陝南軍情萬分喫緊。恐事權不屬。呼應不靈。是以特授劉蓉為陝撫。該撫身荷厚恩。膺茲鉅任。自應感激圖報。迅速馳赴漢南。整頓諸軍。將興漢一帶賊巢。剋期攻毀。淨掃妖氛。至漢回仇。釁已深。劉

蓉到後。總當握其要領。持平辦理。不可稍涉偏激。以副委任。劉蓉係駱秉章襄理得力之員。茲旣簡放陝撫。則身膺疆寄。責有攸歸。駱秉章惟當促其迅速赴任。所有四川藩司員缺。著駱秉章卽簡賢員。一面具奏。一面派署。以資臂助。張集馨以屢次獲咎之員。朝廷棄瑕錄用。茲復令暫署撫篆。所有省城一切防勦事宜。務與多隆阿、穆騰阿和衷商酌。期於有濟。毋得存五日京兆之見。任令吏治廢弛。

軍心疲玩。致蹈瑛榮覆轍也。將此由六百里諭知多隆阿、駱秉章、劉蓉。並傳諭張集馨知之。陝西巡撫瑛榮革任。以四川布政使劉蓉為陝西巡撫。未到任前。以陝西按察使張集馨暫署。○以記名提督陶茂林為陝西漢中鎮總兵官。○以勤勞懋著于河南知府尹耕雲徐恆曾。以道員用。並賞花翎。○以克復江蘇吳江、震澤兩縣城。巡撫李鴻章得旨嘉獎。賞副將張元龍。何安泰、王永勝。巴圖魯名

號守備鄭國榜花翎。餘加銜升敘有差。予陣亡把總劉士珂。外委周長榮。張萬盛。祭葬世職加等。○以河南攻克張岡賊巢。汝南肅清。賞還總兵官張曜提督銜。都司王占鼈。巴圖魯名號羅中魁等花翎。千總傅守巽等藍翎。餘加銜升敘開復有差。予陣亡千總陳定國。祭葬世職。○予陝西渭河陣亡總兵官趙旣發。朱希庸。祭葬世職加等。建專祠。副將關行莊。劉連陞。祭葬世職加等。一併附祀。○予江

蘇長涇陣亡千總唐先蔭。祭葬世職加等。○撫恤朝鮮國遭風難夷如例。○丁未諭議政王軍機大臣等。馮子材等奏鎮營連日攻守情形一摺。另片奏江北撥到兵勇請歸併鎮營防剿等語。南路援賊蜂屯蟻聚。圖救金陵。鎮營官軍雖於博洛村水湖等處屢獲勝仗。而賊勢正銳。總當加意慎重。曾國藩所稱金陵長圍未合。鎮防緊要。不宜分兵遠出。應隨時相機進剿。丹陽各賊以牽制之。仍可進退。

裕如等語。洞中機宜。與歷次諭旨。即著馮子材等妥籌防守。仍一面更番出擊。使賊無暇分援他處。庶金陵之師可期合圍。江北存營兵勇。既據馮子材等奏接據都興阿咨稱足敷堵剿。所有前撥兵勇二千九百六十名著准其歸併鎮江軍營。由馮子材等簡閱調度。俾壯聲威。各該營向由北臺領餉者。仍著悉循其舊。其本在南臺領餉各營。並著查照上年併軍節餉章程。分別釐剔。用節冗糜。

至副將刁經明。向辦都興阿營務。仍著飭令回營。由都興阿等差遣。以資得力。將此由五百里各諭令知之。○戊申諭內閣。理藩院奏查明遠支王公之女格格額駙等所食俸銀等件。照例應請裁撤開單呈覽。並請將辦理錯誤。歷任堂司各官分別議處。一摺。另片奏莊襄親王之女現領俸銀俸緞。應否一併裁撤。請旨等語。各王公之女格格額駙等應領俸項。乾隆三十六年欽奉。

諭旨以宗室日繁世亦日遠。若不論近遠視爵授封轉無區別等因。交宗人府議奏。嗣經議准以

世祖章皇帝位下子孫所生女。照例視該王公之職封授。格格額駙。給予俸祿等項。其餘王公之女。僅給格格額駙虛銜。理藩院從前辦理各王公之女。格格額駙未經查明支派。均經辦給俸銀俸緞。原屬錯誤。惟係因支派日繁。失於查察。尚非有心弊混。所有歷任堂司

各官均著從寬免其議處。其單開照例應行裁撤之格格額駙等。暨莊親王綿課之女。現領俸銀等項。均著加恩免其裁撤。因念近來宗支蕃衍。譜牒愈繁。世次愈遠。亦應恪遵成憲。以次量為變通。遞加裁制。嗣後各王公之女。授封格格額駙。著自

高宗純皇帝之子孫以下。各王公所生女。均作為近支。照例視爵封授。格格額駙。給予俸祿等項。其餘均作為遠派。僅依王公之職封授。

格格額駙虛銜。其下嫁外藩蒙古格格額駙。並著一律辦理。○諭議政王軍機大臣等。御史呂序程奏。山東漕弊過重。請飭密查嚴辦。一摺。據稱山東省各州縣兌漕時。與旗丁私相授受。多係本色折色兼交。所交本色俱係上等粟米。其折色銀外。又有津貼規費等項。該旗丁等收米後。即全行變賣。將所收折色銀在濟甯東昌安山張秋等處買麥運至天津一帶。售賣於附近之蘆臺。以賤價買定劣

米。俟賣麥後。裝運赴通。交納展轉之間。獲利數倍。又聞各幫均有積慣辦事之人。名曰走差。凡赴蘆臺買米及抵通時。一切使費開銷。皆係其人包辦。並賄串倉場經紀人等。抽換米樣。以免查驗。不符向有米袋黏貼印花。近來不過虛應故事。並不緘封。以致百弊叢生。等語。漕糧為天庾正供。該旗丁等何得肆行抵換。以為興販漁利之資。實屬目無法紀。各運弁職司管押。何以於緘封米袋並不遵照。

舊章辦理致令偷換變易。於漕務大有關繫。本年新運遲延。未必不由此弊。著毓祿、宋晉、劉長佑、閻敬銘按照摺內所陳嚴密訪查。如有此等情弊。卽行從嚴懲辦。以肅漕政。而重倉儲。原摺著鈔給閱看。將此各諭令知之。○又諭張凱嵩奏官軍攻破登龍橋老巢一摺。貴縣黃逆股匪經兵練擊敗後。併股圍攻馬林。仍分踞橋墟等處。官軍分路進攻。先將頂寨洗嶺橋墟及登龍橋各賊巢次第攻拔。勦辦尚屬得手。該逆現退踞覃塘。經各軍移營追剿。著張凱嵩督飭在事文武乘此聲威。實力勦辦。務將此股賊匪悉數殲除。並將首逆斬擒。以淨根株。容縣范逆自分股占踞蒲塘。後又分一股竄入北流縣境。雖經知縣王思培督團擊退。難保不去而復來。蔣澤春一軍現擬取道下灣。先將從逆之羅排等村勦平。再行會同鬱林紳團進攻蒲塘。著張凱嵩卽飭該道員速行攻拔。仍一面進規容縣。毋稍

疏忽。將此由五百里諭令知之。○留辦江甯軍務浙江巡撫曾國荃奏浙軍現攻富陽。滬軍現攻蘇州金陵亦宜合圍三處同時並緊。可期一處得手。得旨所籌均合。機宜該撫惟當與曾國藩權度地勢。調察賊情。隨時相機應變。於勇往中寓慎重之意。庶百密不至一疏。城賊既缺米糧。合圍以後。當飭劉連捷會合水師稽查江濱。嚴斷接濟。俾賊糧盡自亂。擒渠搗穴。迅奏膚公有厚望焉。勉之。○荊州

將軍巴揚阿奏遵撥駐防馬隊官兵二百名赴河南陳州。前任漕運總督袁甲三軍營聽候調遣。報聞。○以廣西克復太平府城並攻破隴羅賊巢出力賞同知吳潤銓等花翎知縣王榮冠等藍翎餘升敘開復有差。○以廣西勦平蓮塘賊匪出力賞知府方炳奎遊擊劉益元等花翎把總廖承恩等藍翎餘加銜升敘有差。○已酉諭內閣前據兵部遵查特普欽請由在京應升人員簡放。呼倫貝爾總

管員缺該部無案可循曾經降旨著該部轉行直年旗揀選應升人員帶領引見乃本日據直年旗將應放總管人員開單呈請簡放殊堪詫異呼倫貝爾總管員缺業經降旨帶領引見該旗豈未之知乃摺內於兵部咨覆該旗查覈各員文內將所奉諭旨含混節錄冒昧開單請簡實非尋常錯誤可比且以去年十二月間奉旨帶領引見之缺縱往返查覈何至遲延半年之久始行奏辦亦屬疲玩

所有直年旗承辦章京著查取職名交部嚴加議處直年旗堂官瑞常福興察杭阿明善文盛寶善奕貴福鈴均著交部議處其呼倫貝爾總管一缺應升人員著直年旗仍遵前旨卽行帶領引見尋兵部等部議上瑞常等均應罰俸一年得旨准其抵銷○諭議政王軍機大臣等劉長佑奏親督馬步各軍滾營進紮及按拏直東交界逸匪各摺劉長佑現抵大營河口以天時晴雨無定兼之徧地高

禾茂密各軍約期會剿易致彼此互相疑誤現由該督親率步隊與恆齡蘇克金馬隊會合用滾營法步步進紮隨將高禾節節芟刈俟近賊巢再行大舉合圍並已飛飭丁寶楨保德各帶兵勇進紮柳林團附近地方以便屆期督團齊進所籌均尚妥協著卽照所擬趕緊辦理仍須計出萬全不可輕於嘗試致有疏虞沿河口岸之灘上村樓子坡等處匪黨時來窺渡肆擾雖經各將領等疊有新擒仍須飭令各率兵勇嚴密巡防尖莊大營河口尤須督飭春霖等嚴遏北竄毋令該匪乘間竄突是為至要直東交界逸匪尚多所獲陳占奎駱洛順孫全荏等處以極刑辦理甚好直東毗連各屬似此伏匿匪黨恐尚不少仍著飭令各該文武官紳嚴行搜捕一律辦理所叅營總郭勒明阿派隊遲誤且因委參領吉秀屢傳不到情急出寓未回請旨革拏並將吉秀暫革留營等語郭勒明阿因吉秀

屢傳不到何至即自行潛逃。且聞郭勒明阿已經投河自盡。未知是否確實。其屢傳吉秀不到究竟有無別項情節。均應確切查明辦理。所叅吉秀暫革留營。未免輕縱。委營總吉秀著即革職拏問。交劉長佑按律究辦。務得確情。其不服約束之前鋒校木克登布。雙安慶安。正奎。咸連。即照所請。一併革職。以肅戎行。郭勒明阿如果在逃。著即嚴拏務獲。將此由六百里諭令知之。○又諭沈葆楨奏攻克

石門逆壘。並彭澤等處近日軍情各摺片。臬司劉典督軍分路進攻石門。將賊壘悉數平毀。劉典以士卒連日血戰。量予休息。再圖會勦。著沈葆楨飭令劉典將各軍妥為拊循。暫息勞乏。仍即乘此聲威。復圖攻取。該逆自陶家渡石門敗後。知饒防未易窺伺。乃以偽愛王踞都境。偽感王踞湖境。偽跟王踞彭境。堵逆往來。都湖之間。擄奪民船。編竹作筏。希圖偷渡。黃汰炳又噬譚星。劉官方分途窺伺。祁

西我軍駐彭澤之外江戰船調防他處。該縣趙宗耀僅以練勇數百。嬰城固守。江忠義李榕會勦湖口之賊。未能得手。都昌水陸各營雖時獲勝仗。而賊兵日益。自湖以東。延袤數百里。焚殺搶掠。慘不忍聞。據沈葆楨奏賊兵日益。自係由太平石埭祁門建德一帶竄入。若令蔓延江省全局。必至掣動。沈葆楨所稱該逆以必死之心。有聞即逞。可見情形甚屬緊迫。而分防兵力亦恐不支。即著曾國藩左

宗棠迅檄徽甯等處得力防軍分路追躡。痛加勦洗。並會同江省官兵兩面夾擊。務將圖竄江西之賊殲除淨盡。俾江南浙江諸路官軍後路均臻穩固。方為妥善。沈葆楨奏教堂一案。經署九江道蔡錦青商辦完結等語。著即照所議辦理。嗣後務當妥為撫馭。持平辦理。固不可抑勒居民。致失眾志。亦不可於教民有意偏枯。致令該教士因相待之薄。又生枝節。將此由六百里各諭令知之。○以輕進

失利暫革江西參將韓進春職仍留營○庚戌諭內閣理藩院奏旗務伯克補缺漏未辦理請將司員書吏分別懲辦另片奏請將漏鈔

諭旨之司員分別議處各等語此案理藩院徠遠司郎中舒琅阿於咸豐九年哈密扎薩克所屬旗內呈請補放幫辦旗務伯克員缺時逾四載經該處咨催三次尚未辦理案關回子伯克辦理旗務之缺該司員等竟敢延閣

不辦實出情理之外且難保承辦書吏無勒索不遂情事亟應嚴切懲辦以儆官邪徠遠司書吏張義堂著交刑部嚴行審訊舒琅阿著暫行撤任聽候傳質至景廉等先後奏請簡伯克員缺所奉咸豐十一年

諭旨及同治元年諭旨共四件該院司員均未鈔咨該處實非尋常疏忽可比除崇桂業經病故無庸議外郎中伊凌阿員外郎榮惠均著交部分別議處舒琅阿於伯克補缺漏未

辦理業經暫行撤任茲復於緊要

諭旨漏不鈔出尤屬荒謬著先行交部嚴加議處近來各部院司員於緊要案件往往漫不經心任聽書吏積壓稽延藉端需索且恐有扶同徇情弊疊經降旨訓飭不啻三令五申嗣後該堂官等遇有交辦事件務當督飭司員按照例限迅速辦理各該司員等亦應嚴定章程稽察書吏弊混儻再不知愧奮一概委之書吏任意延宕一經查出或被糾叅

必將該司員等嚴行懲處並將書吏等從重治罪毋謂寬典之可屢邀也懍之將此通諭知之○辛亥湖廣總督官文等奏漢南軍米礙難由鄂省籌濟懇請免其採辦得旨據奏採辦漢南軍米諸多窒礙自應俯如所請惟該督等既云糧從餉出但能多解餉銀卽與採辦米糧無異所有援陝之李雲麟梁作楫兩軍餉需官文等當設法寬為籌備源源解濟毋令缺乏○以正白旗蒙古副都統增慶

暫署正白旗護軍統領鑲白旗滿洲副都統
德懋暫署左翼前鋒統領○予湖北安陸陣
亡都司蕭寶隆祭葬世職加等守備曹德華
等祭葬世職○豁免河南歸德府灘地節年
民欠租銀○壬子諭議政王軍機大臣等曾
國藩奏彙報各路軍情一摺黃李等逆麇聚
於湖口都都一帶江西官軍與左宗棠派援
之師苦戰苦守屢獲勝仗景鎮鄱陽之賊次
第退竄因韓進春在洋塘挫潰賊勢復趨重

湖口一路由湖口下至彭澤馬當東流上至
屏峰南康都昌濱江濱湖一片逆氛曾國藩
咨商彭玉麟多帶礮船親赴湖口援剿現在
江忠義所部老勇較少李榕新立之軍未經
大敵而該逆愈聚愈眾勢甚兇悍自應添撥
勁旅以資攻剿著曾國藩咨會彭玉麟督帶
礮船迅速前赴湖口會同江省官軍實力進
攻並著沈葆楨督同江忠義李榕等軍穩紮
穩進節節掃蕩務將該匪聚殲廓清江境庶

可移師併力皖南為規取金陵之計苗逆陷
壽州後勢甚猖獗前諭彭玉麟楊岳斌趕赴
臨淮會同進剿現在彭玉麟赴援江西楊岳
斌未識何時可以抵淮著曾國藩迅催楊岳
斌水師星速駛赴臨淮藉資援救唐訓方仍
當就現有兵力妥籌守禦以待援師毋稍鬆
勁致誤戎機鮑超自染暑瘧並軍中疾疫大
作死亡相屬朝廷甚深厯繫曾國藩以江西
未靖皖南方棘恐鮑超須調剿上游不令遽

圍金陵所籌甚是該提督一軍應調赴何處
策應之處即著曾國藩相機辦理前諭吳棠
令黃開榜水師赴淮援剿並飭姚廣武速將
徐西各匪剿除即回宿境著吳棠仍遵前旨
催令黃開榜帶領水師趕緊駛赴臨淮並催
姚廣武將徐西之匪迅速掃蕩即行回宿以
通蒙城糧道毋令頓兵徐西日久無功是為
至要將此由六百里各諭令知之○又諭閻
敬銘奏擒捕淄川餘匪截殺殆盡現擬移軍

清博一帶以遏北竄一摺。淄川縣城克復。先由淄城竄出之賊。經官兵追殺多名。竄至白蓮池東門外之賊。復經接捕無遺。其竄至新泰境土門一帶賊匪。均經接殺淨盡。地方一律肅清。辦理尚屬認真。該署撫所籌善後各事。均著照所議辦理。宋景詩一股。前據劉長佑奏到。已移營進逼。該匪等被勦窮蹙。難保不乘隙奔竄。東昌濱臨運河。清平博平等境之梁家淺。魏家灣等處。均係河口要隘。儻該

逆乘虛北竄。擾及直境。尤為可慮。該署撫現擬回省。稍理地方要務。即親自督軍至清博一帶駐防。著即趕緊料理。諸務前往駐紮。遏賊北竄之路。總兵保德。臬司丁寶楨二員。現紮堂邑之六官莊。逼近賊巢。兵力甚單。該署撫已派都司楊通廉等勇隊一千五百名。交其統帶。著飭令保德等。懍遵疊次所奉諭旨。聽候劉長佑調遣。以一事權。將此由五百里諭令知之。又諭穆騰阿。瑛。榮。奏疏。通道路

情形。請飭德興阿赴省。並醴泉被圍。漢郡接仗失利。石泉兩次擊賊。及漢陰獲勝各摺片。逆回攻撲南關。馬德昭督隊追勦。因馬驚被跌受傷甚重。著賞假二十日。趕緊調理。現在省外匪蹤出沒無常。防勦均關緊要。曹克忠一人勢難兼顧。著多隆阿即飭德興阿輕騎馳赴省城。接統馬德昭之軍。實力勦辦。其馳援鳳翔一節。或另派得力大員。或俟馬德昭傷愈後。再行統兵前往。著多隆阿斟酌情形

辦理。同州大營後路。並著多隆阿另派妥員接統。德興阿所帶之兵。以便德興阿馳赴省垣。毋稍遲誤。醴泉被匪圍攻。勢甚危急。著穆騰阿張集馨嚴飭馬陞一軍。就近由咸陽星夜馳往。速解城圍。並將興平等處賊匪一律掃蕩。瑛。榮。扭於撫議。幾誤大局。張集馨接署撫篆。務宜力矯前失。鼓勵將士。嚴密堵勦。不可為奸回馬百齡所惑。並須與多隆阿和衷共濟。聯絡聲勢。以期肅清東路。王夢齡現已

馳抵武功所部兵勇止三百餘名其勢過單著張集馨卽飭留駐鄠縣之川勇五百名歸併王夢齡統帶並嚴飭該副將進抵岐山速解城圍如查有逗遛觀望情形卽著以軍法從事毋稍姑息寶斗二山賊匪經官軍擊敗後竄赴西鄉復經該縣令陳爾第等調集兵圍擊退該逆全股趨赴石泉漢陰攻撲縣廳各城均經該地方官先後督團擊敗現在該逆糧米甚缺力圖占踞汪家寨該處地廣糧

多路通川陝楚三省設被匪眾盤踞為患甚巨著張集馨督飭該地方官鼓勵鄉團實力勦洗並力籌堅壁清野之法使該逆無糧可據自可易於解散至漢陰一帶逼近興安官文嚴樹森務當督飭梁作楫一軍速赴漢陰迎頭截勦毋令下竄郡城是為至要漢中被圍日久情形危迫異常著駱秉章速催劉蓉馳往漢南統率諸軍力解城圍毋再遲延張由庚疊奉諭旨令其帶兵馳援漢中現已駐

軍川陝邊境經署漢中守楊光澍兩次親詣該營求援輒敢擁兵不救是否各軍部署未齊抑係藉詞推諉著劉蓉確切查明從嚴叅辦楊光澍因張由庚延不赴援憤激出城帶兵勦賊孤軍被圍失利與輕進致敗者有間並著免其議處將此由六百里諭知官文嚴樹森多隆阿穆騰阿駱秉章劉蓉並傳諭張集馨知之○又諭瑛榮奏請飭催各省協餉一摺多隆阿大軍現分擣高陵臨潼兩岸回

巢漸與省城聲息相通事機頗形得手該營月餉約需銀十萬餘兩即使湖北山西按月如數撥解尚且不敷若再耽延不解致令停兵待餉貽誤何可勝言著官文嚴樹森英桂迅將應解多隆阿餉銀按月如數籌解毋得稍分畛域致誤戎機至陝省地方半遭蹂躪地丁無可徵收司庫支絀自係實情駱秉章惴世臨務卽將月協陝餉速行籌撥按月解赴陝省以濟飢軍而維大局將此由六百里

各諭令知之○以戶部左侍郎阜保署京營右翼總兵○以陝西攻克寶山斗山賊壘西鄉肅清賞都司楊玉和等花翎餘加銜升敘有差○蠲免貴州貴陽都勻鎮遠思南黎平石阡興義七府平越麻哈定番黃平貞豐開貴筑都勻清平荔波施秉安化印江永從開泰餘慶甕安湄潭龍泉普安修文安南綏陽婺川貴定龍里遵義興義長寨二十九廳州縣暨清江下江錦屏通判縣丞所屬被擾地方新舊額賦有差○癸丑

孝靜成皇后忌辰遣官祭

慕東陵○以神靈顯應加福建永安縣唐田王封號曰昭顯○諭內閣恩麟奏請將擅自回旗之道員議處等語署甘肅甘涼道恭釗因被鎮標兵丁索餉毆辱受傷病發稟請開缺經恩麟派委道員琿武前往接署並飭將為首滋事兵丁嚴密查拏辦理該署道恭釗並不聽候委員查驗亦未領有咨文輒擅自起

程回京實屬違例恭釗著先行交部議處其索餉毆官之兵丁並著嚴密訪拏盡法懲治恭釗仍飭回省聽候查辦○諭議政王軍機大臣等京師為輦轂重地附近畿甸地方豈容盜匪溷跡即近畿一帶各州縣亦應認真緝捕以靖奸宄乃近聞大興宛平通州固安等處境內騎馬賊匪縱橫出沒肆行無忌以致路刦之案層見疊出至距京城四十里之黃村地方竟有一日連刦十四起之案甚或攔截春屬車輛似此盜刦橫行目無法紀若不速行嚴緝勢將釀成巨患又聞馬駒橋一帶帶有騎馬賊八人在店失歇經團眾拏獲二名送官餘賊六名至今在逃未獲良鄉縣屬有騎馬賊匪十餘人攔截客商為團眾圍捕該匪縱馬逃逸復於夜間聚匪數十人將該處團眾戕害數人該縣令隱匿不報地方官緝捕廢弛已有應得之咎若更諱盜殃民情節尤屬可惡著萬青葵林壽圖嚴密查訪如

果確實卽著從嚴叅辦。其大宛等縣各境內騎馬賊匪。並著萬青葵、林壽圖、劉長佑迅飭該地方文武嚴密查拏。如該地方官不能得卹立即撤調。另選勤能者充補。並選派明幹委員多帶兵役。四面兜捕。務期悉數弋獲。不准一名漏網。順天府屬各州縣緝捕事宜。本係萬青葵、林壽圖專責。儻再仍前因循。犯無弋獲。必將該兼尹、府尹從重懲處。決不寬貸。至黃村一帶地方。盜匪肆劫日久。必有窩頓。

處所。南苑內地曠人稀。大紅門外一帶地方。素多不法匪徒。習於偷盜。難保無容留窩藏馬賊情事。著存誠等揀派番役嚴密訪查。認真梭緝。並將素不安分積慣行竊各回匪。悉數拏獲。從嚴懲辦。以靖地方。又直隸所屬地方亦多有匪徒劫掠。蔓及奉天、熱河等處。若不徹底搜捕。終難淨絕根株。著劉長佑揀派幹員分投各處認真梭緝。並嚴督該地方文武設法捕拏。盡數肅除。以清盜源。毋得畏難。

苟安養癰貽患。將此各諭令知之。○又諭傳諭護理陝甘總督恩麟、恩麟奏兵丁索餉毆辱道員現飭密拏首要各犯一摺。涼州鎮標兵丁於奉調出征時。竟敢挾索欠餉。糾眾滋鬧。毆傷署甘涼道恭釗。及委員王秉鏞等。將道署及書院打毀。迨經涼州副都統瑞雲傳問該兵丁等。並不指出首從姓名。實屬狡詐。兇橫不法。已極。該道員辦理此事。或不免有處置失當之處。自應查詢明確。持平辦理。不

可操之過。感致釀事端。惟近來軍餉支絀。兵丁每因索餉動輒聚眾毆官。此等刁風斷不可長。若竟以首從各犯無從追究。姓名希圖了事。何以懲驕悍而肅法紀。著恩麟卽飭現署甘涼道琇武署遊擊葉榮迅將為首滋事及下手毆官各要犯設法查拏。務獲嚴行究辦。不准稍有含混。另片奏請將奏派勸捐首先抗違之富紳懲辦等語。捐納縣丞曹曉霞候選道曹炯坐擁厚貲。於本省捐輸多方阻

撓本日已於片內批示。將該二員一併革職。勒限一月。捐繳銀三萬兩。以充軍餉。卽著恩麟妥為辦理。此外應行書捐各戶。該護督仍當妥為勸導。務令踴躍輸將。亦不可專事抑勒。致失民心而傷政體也。○以鑲藍旗蒙古副都統恩齡暫署鑲黃旗護軍統領。○准候選主事穆大鵬投效江南軍營。聽候欽差大臣曾國藩差委。○甲寅。孝懿仁皇后忌辰。遣官祭。

景陵。○諭議政王軍機大臣等。唐訓方奏。臨軍勦賊獲勝。蒙城糧路仍阻。設法疏通一摺。蒙城被圍日久。糧運斷絕。現在就近可以往援者。惟姚廣武一軍。何得因趙克沅等百餘擒匪。輒將兵力牽制一隅。遂置大局於不顧。馬新貽現今王才秀穩駐蒙城。而自率所部移屯小澗。密商姚廣武自侯圩前後夾攻。事機已迫。萬不可再有遲誤。卽著唐訓方檄調姚廣武等迅速進兵。疏通蒙城餉道。吳棠仍一

面嚴飭該員鼓勇前進。毋得託詞陰撓。跋前疐後。致誤戎機。自干重咎。黃開榜水師疊經諭令駛赴臨淮。至今尚未奏報起程。並著吳棠迅催前往。毋得稍有稽遲。昨因彭玉麟赴援江西。諭令曾國藩迅催楊岳斌督率水師駛赴臨淮。藉資援救。此時苗逆勢極猖獗。援兵早到一日。庶得早救一日之倒懸。仍著曾國藩遵旨嚴催。毋稍遲玩。唐訓方仍就現有兵力。妥籌守禦。以待援師。並飛催蔣凝學。周

寬世。毛有銘等軍。迅速進紮溜子口等處。約期會勦。不可稍有鬆勁。另片奏遵查李南華現在蒙城助勦。疊有檢斬等語。李南華打仗尚為勇敢。且與苗逆為仇。唐訓方務當隨時駕馭籠絡。俾為我用。將此由六百里各諭令知之。○兩江總督曾國藩奏遵查南洋通商大臣一缺籌度現在情形。仍請無庸改設。下所司議。尋議奏通商大臣一缺實係有名無實。應請旨暫行責成李鴻章經理。仍加欽差

大臣字樣其經費請照江蘇巡撫養廉數目發給一半以資辦公從之

大清穆宗繼天開運受中居正保大定功聖智誠孝信敏恭寬毅皇帝實錄卷之七十二

大清穆宗繼天開運受中居正保大定功聖智誠孝信敏恭寬毅皇帝實錄卷之七十三

同治二年癸亥七月乙卯以內閣侍讀學士

王拯為太常寺卿○丙辰

慈安皇太后聖壽節遣官祭

太廟後殿

奉先殿遣官祭

文宗顯皇帝

孝德顯皇后暫安寢殿○

上於養心殿

慈安皇太后前行禮王大臣於

慈寧門外眾官於午門外行禮○諭內閣駱秉

章奏請將生擒逆首石達開案內尤為出力之土千戶懇恩改獎等語。緩帶密土千戶嶺承恩松林地土千戶王應元前經駱秉章奏請鼓勵均經降旨加恩賞給宣撫司職銜並分別給予勇號副將銜。茲據奏稱該土千戶皆隸邛部宣撫司統轄加以宣撫司職銜於體制究有未協等語。嶺承恩著改給土遊職世職頒換緩帶密土遊擊印信仍賞給桓勇巴圖魯名號。王應元著改給土都司世職頒

換松林地土都司印信仍賞加副將銜均著由部給發號紙准其子孫承襲仍歸邛部宣撫司統轄以示區別而資感奮。○諭議政王軍機大臣等徐宗幹奏臺灣軍務情形一摺。副將曾元福自進紮白沙阮後設計攻破大岸頭各莊竹圍並將大埔八卦山等處賊巢盡行焚毀正可乘勝進取惟吳鴻源以冒暑督戰染疫暫回嘉城徐宗幹因統率乏人檄令曾元福由開道直趨嘉義接署水師提督

著卽飭令曾元福與委署北路協副將湯得陞合力攻剿先通南北兩路仍令曾玉明激勵官兵聯絡義勇迅克彰城毋稍遲延。臺灣道洪毓琛所出之缺徐宗幹現委知府陳懋烈暫署惟提督道員均係署任現當防剿喫緊之時驟易統率之人一切攻取機宜尤應加意慎重徐宗幹務當實力嚴催責令認真勦洗迅掃賊氛毋稍鬆勁並著左宗棠隨時督催一切軍情咨會徐宗幹妥籌辦理將此

由六百里各諭令知之。○又諭駱秉章奏添派楚軍馳赴陝南會剿一摺。據奏鄂省梁作楫一軍雖赴興安止能扼要駐守蜀省所派桂字嚮導兩軍進規漢南兵力尚單現復擬派總兵何勝必蕭慶高帥湘果中右兩軍取道南江一路繼進兵力既厚可力解漢南之圍等語籌辦甚屬合宜卽著劉蓉迅速馳往漢南統率諸軍進剿毋稍遲延何勝必蕭慶高所部及援剿陝南各軍均歸調遣毛震壽

在陝南久不得力且有被叅之案茲據駱東章奏稱該藩司雖不能迅殄逆氛而力守城固尚能與賊久持是尚非一無足取者著劉蓉於到陝後察看其人是否可用並其兵勇應否簡汰之處迅速具奏寶斗二山竄匪全行趨赴石泉漢陰攻撲縣廳各城梁作揖一軍應令迎赴漢陰攔頭截擊劉蓉督率各軍力解漢中之圍仍須兼籌截剿漢陰之賊毋令得與郡城賊匪竄合川軍口糧既由川省籌發以後餉需諒駱東章必能源源接濟毋令缺乏也將此由六百里各諭令知之○予福建軍營病故道員洪毓琛祭葬卹廕加等○撫恤朝鮮國遭風難夷如例○丁巳諭內閣前因御史許其光奏叅廣東委辦餉局之知州華廷傑等各款當交晏端書嚴查覆奏茲據奏稱華廷傑歷任東莞南海兩縣及派在省局籌餉催捐尚無猥瑣之行許文深派辦西關捐輸均由捐戶自行赴局繳銀尚無

藉捐肥己情弊惟華廷傑省局當差雖著微勞究與效力行閒者有閒前任兩廣總督勞崇光奏請以知府補用保舉未免過優許文深由佐雜出身習氣較重難勝表率之任等語知府銜准補南雄直隸州知州華廷傑前保以知府補用之案著即撤銷捐升知府許文深著降為通判歸部銓選以昭覈實○又諭前因給事中文吉奏叅廣東道員史杰營謀罔利各款當交劉長佑晏端書將該員家產查封並將各叅款從嚴究辦茲據晏端書奏稱遵將史杰寓所貲財先行查封並飭司督率委員將史杰叅款逐一查辦如原叅史杰營謀美缺攬私納賄暨使其弟史績懋鑽謀圖利句串包私各情均查無實據惟史杰於捐升道員後復因伊戚沈子方謀充樂桂埠水客代為說合實屬不知檢束請將史杰革職勒令回籍等語此案廣東試用道史杰雖查無營謀把持收規販私等實蹟惟捐升

道員後輒復干預鹽務為沈子方說合多次以致物議沸騰實屬不知檢束有玷官箴史杰著即行革職並其弟已革鹽經歷史績懋一併勒令回籍不准在廣東逗留致滋事端所有業經查封該革員寓所貲財並著估變充餉○諭議政王軍機大臣等李鴻章奏荷蘭國遣使立約擬令遵旨即在上海商辦並近日軍情各摺片荷蘭國派使臣龔姓立約乘駕輪船赴京現先至上海欲請該撫轉奏

情詞尚為恭順惟僅遞照會未來晤商難保不以主命為詞乘輪船赴津薦直到京則更無從攔阻現在該撫照覆該使先令其前來面商一切該使如肯先來面議著李鴻章剴切開導申明比國成案豫將住京一節力為杜絕並將換約事宜即由該撫在上海妥為辦理如該使執意赴津或直抵京師已諭知總理各國事務衙門豫為籌辦矣嘉興逆首偽榮王糾眾來撲吳江程學啟分派各軍迎

勦該逆反戈狂奔我軍追殺二十餘里至平望收隊蘇嘉各處大股四出狂竄連撲夾浦營盤均經我軍擊退惟該逆內有洋人施放開花礮疊次向營轟打白齊文又先帶流氓洋匪二百餘人投入蘇賊雖我軍尚能抵禦總須設法斷其接濟方可制賊死命即著李鴻章商令英法美各領事出示嚴禁不准各國流民偷入濟匪並准前路各營卡查拏捆辦至各國輪船本准其入江往來該洋人惟

利是視難保其不暗中濟匪所有水路各要隘遇有輪船出入應如何設法禁止斷賊接濟之處著李鴻章咨照左宗棠會同妥商辦理崑蘇吳江之交師船甚單並著催令李朝斌統帶水師迅速下駛以利攻勦將此由六百里諭令知之○又諭張之萬毛昶熙奏整頓兵勇分防各路一摺豫省官軍攻克張岡後毛昶熙馳回汝甯與張之萬整頓兵勇裁汰疲乏另行挑選並派陳祿興等四營與毛

昶熙所部馬隊陸續馳赴歸德堵剿毫捻毛昶熙現因毫捻被陳郡各營扼擊回竄宋屬喫重復督總兵趙鴻舉等四營馳赴歸德並將李世玉等軍歸併調遣諸軍更有所統率著卽申明號令嚴密布置並著越境進攻以剿為防不可畫疆自守其豫勝各營及參將尹嘉賓等馬步各隊均歸張曜統帶著張之萬等卽飭張曜速行進紮陳郡並與袁甲三會籌妥商聯絡鄉團節節進攻以期會合楚

軍兼施防剿張之萬現紮許州居中策應當此防豫喫緊之際斷不可遽回汴省息縣一帶尚有伏莽汝甯各屬土匪恐亦未能遽盡張之萬等現留副將李殿元駐軍摺捕並令劉鴻增等軍分駐固始正息尚恐兵力單薄著張之萬卽飭令蒯賀孫督率團勇協力勦辦與官軍聯絡聲勢以期掃蕩餘氛毋稍玩誤將此由六百里各諭令知之○又諭晏端書黃贊湯奏提臣督師高郡進剿機宜並陳

各路軍情一摺廣東高州軍務日久未能得手亟應力加整頓嚴督各軍及各該地方文武實力堵剿崑壽在粵年久於地方情形自應熟悉此次督辦高州賊匪尤屬責無旁貸務須凜雪精神力圖振作於各帶兵文武嚴加督率將信宜等處股匪迅速攻擣痛除逆跡以靖地方晏端書既權督篆亦不得存五日京兆之見致地方軍務諸多廢弛毛鴻賓郭嵩燾行抵新任卽將地方應辦事宜逐一

整理軍營文武及各該地方員弁兵團均著嚴加整飭以資防剿並督飭吳昌壽將廣海寨城迅圖攻克毋任客匪久踞信宜之賊本與廣西容岑賊窟相連晏端書奏據劉坤一稟報貴縣克復道員蔣澤春一軍可由鬱林進取容岑與東省官軍會合夾擊與前張凱嵩所奏潯州等處情形大略相同如果西省官軍能卽進取容岑自當速與崑壽所督高州各軍東西合力以收夾擊之效著張凱嵩

督飭劉坤一蔣澤春實力辦理將東西兩省毗連各屬股匪次第肅清不得苟且粉飾從事致令有名無實自干罪戾前諭派令道員唐啟蔭前赴高州幫同崑壽籌辦勦賊該員藉隸廣西於兩省軍情賊勢自應確有所見並著崑壽與之妥籌進勦一切機宜以資得力將此由六百里各諭令知之○又諭晏端書奏查明史杰被叅各款並查抄陶昌培章昇耀財產各一摺據奏史杰叅款逐一訪查

均無確據亦無被人控案惟其弟績懋在粵報捐鹽經歷委往虎門緝私因埠商司事販私釀命捏報拏獲私鹽具稟冒功希圖請獎業經革職另案審結史杰各款既無實據惟有承辦招募水客引鹽及捐道員後又為其親戚沈子方說合承辦水客引鹽數次亦無匿名分利情弊請將史杰及史績懋一併勒令回籍至史杰財產多已消耗查封財物約值銀數千兩應否發還請旨遵行等語又所

查陶昌培章昇耀財產等項據稱委已儘數查封並無隱漏所有陶昌培衣物變價銀三百餘兩章昇耀產業借款變繳銀四萬一百餘兩共銀四萬五百餘兩請撥充高州軍餉等語自劉長佑調任直督所有查辦史杰叅款查抄史杰陶昌培章昇耀財產均由晏端書辦理其所封抄財物與原叅數目大相懸殊尤恐中多不實不盡不免為人蒙蔽著毛鴻賓郭嵩燾於到粵後將史杰被叅各款再

行按照原叅逐一切實詳查務得確情嚴行究辦其史杰陶昌培及章昇耀財產難免別有隱頓並著該督撫再行訪查嚴密辦理具奏聞該省在籍候選道馬逢亨即有為陶昌培等寄頓情事未知是否確實並即詳細訪查毋任藏匿毛鴻賓郭嵩燾均受國厚恩優加委任諒不肯稍涉瞻徇代人受過亦無所用其迴護現在粵東督撫均係五日京兆軍務釐務地方一切應辦事宜殊恐多所遷延

貽誤著毛鴻賓懍遵前次寄諭務即由湘趕
緊馳赴新任以資整飭毋稍延宕郭嵩燾接
奉署理粵撫之命此時如未起程著即徑取
海道由滬赴粵以期迅速毛鴻賓郭嵩燾何
日起程均著迅速先行馳奏以慰廑念晏端
書原摺二件均著鈔給閱看將此由六百里
各密諭知之○又諭崇實駱秉章奏遵飭田
興恕回黔並陳在川查辦窒礙情形一摺據
奏接據勞崇光張亮基函稱以田興恕若回

黔省恐變故叵測屬催其仍赴成都惟該革
員在黔雖久握兵柄嗣以驕情不復出省督
兵民間固已缺望而所部久經缺餉士卒亦
未必樂為效命張心培謝葆齡等均已另案
拏問羽翼已無若令來川則川省楚軍將領
多係田興恕舊日共事之人恐武人不知大
體懷疑申救而該革員所帶兵勇名為一千
餘人實有二千餘眾誠恐急則生變負固不
服且川省習教之人較黔省尤多傳教之人

較黔省尤狡在川查辦種種窒礙等語與疊
次諭旨用意頗為脗合張亮基抵黔後將田
興恕舊部欠餉酌量散給軍心自己樂為之
用且自三月抵黔接署巡撫提督兩篆斧柯
在手拊循駕馭已近半年豈尚慮該革員借
兵挾制致啟變端其所部兵勇二千本由黔
省帶往自不難由黔省收其兵柄使就範圍
至該革員應查各案本係在黔之事一切卷
宗左證自應就近查提若令赴川該革員必

恃事無左據堅不承認川省豈能以一面之
詞遽為定讞往返咨查更屬耽延時日於外
國交涉事件豈宜日久稽延著勞崇光張亮
基迅即懍遵前旨將田興恕撤回黔省收其
所部所有應訊各案速為辦結毋得意存諉
卸致負委任崇實等另片奏擬請勒令該革
員自行回籍暫安其心所部勇丁無餉自必
解散俟案結時即就原省逮問等語所籌亦
不為無見惟拏問田興恕業經明降諭旨此

時又令該革員回籍則辦理兩歧田興恕固難保不乘間違颺而外國人聞知必以為中國庇護瞻徇又生事端殊多窒礙所奏應毋庸議將此由六百里各諭令知之○以辦理釐捐蒙混廢弛革江蘇知府楊靖知縣汪彥倫吳瑾職○以河南擒獲巨擒並攻克尚店等處賊巢出力賞都司陳文來等花翎主事張曾凱等藍翎餘加銜升敘開復有差○戊午諭內閣勞崇光張亮基奏請將劣員革職審辦等語湖南補用知縣張茂萱即張心培貴州補用同知直隸州知州捐升道員謝葆齡以幕友濫膺保舉攬權怙勢劣蹟昭著田興恕被叅各款皆由該員等唆使蒙蔽居多前經畏罪潛逃現據該督等訪獲審訊張茂萱即張心培謝葆齡均著先行革職交勞崇光張亮基嚴行審訊按律懲辦○諭議政王軍機大臣等唐訓方奏懷遠賊壘日增包抄臨淮後路官軍奮擊獲勝一摺此次苗逆增

調悍黨由黑窯上洪兩處包抄臨淮後路均經官軍擊退該逆又親率大股二萬餘人陣於黑窯築壘搶渡復經普承堯等督兵奮擊賊始敗竄並將七里河岸賊壘一律蹋平自可稍寒賊膽第逆匪愈聚愈眾民圩日遭裹脅而各營兵勇止有此數日久相持終恐情見勢絀著曾國藩吳棠嚴催丁泗濱及前調黃開榜師船迅速駛赴臨淮會合夾擊毋得稍有遷延致干重咎楊岳斌黃翼升所部水師並著曾國藩嚴催赴臨會剿毋稍延誤至蒙城一帶賊眾既抽赴懷遠則彼處情形或可稍鬆著吳棠唐訓方嚴飭姚廣武馬新貽英翰諸軍內外夾擊立解城圍儻姚廣武仍敢託詞防檢畏葸不前致失此可乘之機必將該員從重治罪唐訓方另片奏李世忠遣副將朱元興等帶兵千餘來臨屯紮並添礮船數十隻停泊五河聲稱係稟請曾國藩會勦苗逆等語李世忠所部久未聞有與賊接

仗之事。此次忽遣兵弁赴臨。聲言助勦。其意究欲何為。現雖據唐訓方奏。曲意周旋。悉心防範。而屯兵肘腋。究恐滋生事端。著曾國藩設法將伊派出之兵調往他處。或令赴江浦一帶防堵。俾免臨淮各營疑慮。方為妥善。將此由六百里各諭令知之。○又諭昨據崇實駱秉章奏。遵飭田興恕回黔聽候查辦。業經諭令該將軍督撫等懷遵前旨迅速辦結。茲據勞崇光等奏。田興恕舊部尚在黔省。若令

該員回黔。難保不造作言語。唆誘愚民。別生事端。主教胡縛理必大驚疑等語。田興恕被叅各款。其劣蹟均係黔省百姓共見。共聞。自應仍在黔省審辦。且疊經飭令駱秉章等將田興恕押回。計不日亦將抵黔。即著勞崇光、張亮基仍遵昨日寄諭。迅將田興恕撤回黔省。趕緊訊明。定擬奏結。毋得總總過慮。藉詞推諉。田興恕本一武夫。張茂萱謝葆齡充當幕友。欺其不諳文理。多方蒙蔽。以致田興恕

任性妄為。肆無忌憚。且謝葆齡前赴遵義辦理釐捐。無惡不作。張心培招權納賄。與錢登選、冷超儒等朋比為奸。均為黔民所切齒。是田興恕之獲咎。皆由該幕友及屬員等愚弄所致。謝葆齡等實為黔省罪魁。若不從重究治。何以肅官常而振綱紀。所有就獲之張茂萱、謝葆齡等。及案內最著之各劣員。著勞崇光、張亮基嚴切根究。按律定擬具奏。庶士民之積恨獲申。中外亦均無異議。至教民一案。

亦應持平辦理。權衡悉當。方為妥善。韓超叅款既據奏稱。事屬因公。著准其回籍就醫。聽候部議。惟被叅各款。必須認真查辦。不可遷就了事。黔省抽收釐穀。該撫既以為苛擾累民。著即出示偏行曉諭。永遠停止。此外應抽釐金。仍著慎選賢員。善為經理。毋許藉端勒索。致滋弊端。夔川、正安等處竄匪。疊經官軍勦擊。頗有斬擒。該督撫仍當嚴飭田慶治等激勵兵練。悉數殲除。毋留遺孽。岑起和係馬

如龍等劄為冊亨軍民分府悖謬可惡雖被
總兵羅孝連進勦窮感乞降該匪犬羊成性
誠偽難知著勞崇光等密飭羅孝連隨時偵
察儻心懷叵測即決意設法殲除毋貽後患
將此由六百里各諭令知之 以貴州古州
下江兩廳城被匪竄陷旋即收復革護總兵
官成應洪署同知由宗超署通判張永煦職
仍留任免查辦予陣亡道員趙國澍參將蒲
友登等祭葬世職加等 己未中元節

上詣

奉先殿

壽皇殿行禮 遣官祭

永陵

福陵

昭陵

昭西陵

孝陵

孝東陵

景陵
泰陵
泰東陵
裕陵
昌陵
昌西陵
慕陵
慕東陵 遣官祭
文宗顯皇帝

孝德顯皇后暫安寢殿 遣官祭

端慧皇太子園寢 諭議政王軍機大臣等
沈葆楨奏官軍肅清黔城竄賊並湖口連獲
勝仗各摺片石太古江二逆糾老賊二萬餘
人竄入黔縣圖竄江境經王文瑞派隊襲擊
克復城池餘賊仍向石太遁去仍著督飭該
道員奮力追擊毋令回竄江境黃李等逆膺
集於湖口都鄱一帶自江忠義進紮堅山扼
要設伏李榕亦分軍援勦雖陳由立遇伏官

軍小有損折而黃逆中槍倒地已受重創羣賊亦必膽落著督飭劉典會督饒防諸軍步步進逼合力兜剿湖口雖疊獲勝仗黃李各逆仍堅踞文橋都昌之賊雖敗遁較遠而蔡家嶺等處尚有悍賊堅守老巢以固文橋後路現在黔境既清劉典可無東顧之慮即著會同席寶田等軍進紮石門梅源橋等處乘勢繞出賊後分路包抄迅掃逆氛以顧江省全局花旗股匪竄擾彭澤該縣令等極力固

守兵勇太單日久究恐不支即著沈葆楨飭令在防諸軍分兵救援仍督令該縣令等策勵團勇實力堅守以保危城將此由六百里諭令知之○又諭常清奏俄夷闖卡撲壓防堵營盤現派領隊大臣帶兵堵禦一摺俄羅斯心懷叵測屢逼邊卡茲復闖赴博羅胡吉爾卡倫經索倫總管等將其攔回該夷竟敢施放大礮我軍伏於兩旁山梁暗用擡礮轟擊該夷大隊退至科斯莫鑾地方集有五六

百人是其有意尋釁已可概見若不力籌防剿遏截兇鋒將來得步進步尚復成何事體常清現派領隊大臣托克托奈管帶官兵五百名前往堵禦如該國兵隊退回後不再來犯常清即飭令托克托奈等整頓隊伍嚴守卡倫勿可生事儻該國復以大隊來撲托克托奈即當激勵官兵奮勇迎擊不可為其所乘古稱師直為壯曲為老該夷任性逞強其曲在彼我軍自無不志切同仇一以當百或

出奇制勝或設伏以待是在常清等斟酌機宜妥為調遣以綏疆圉至該夷有差派匡蘇勒官帶兵一千往塔爾巴哈台入塔勒奇溝之語亦不可不豫為防範著錫霖等督飭官兵隨時嚴密偵探認真防禦毋得稍有疏虞該夷前越科布多開齊捉人搶物雖經巡查官兵逐出卡外現在該夷尋釁滋事科布多邊卡有無蠢動並著廣鳳奎昌豫作準備用戒不虞又據俄國阿克圖魯官揚言用礮攻

取索倫營沙岡以外地方後再取喀什噶爾地方著常清即行知喀什噶爾領隊大臣防患未然妥籌守禦此外各城並著常清一體知照嚴密豫備靜以待動據常清奏雜哈勞詭計百出此次無故稱兵是否係該國大臣本意竟欲決裂抑係雜哈勞隱瞞伊國私自主使以為討好地步著明誼明緒將該國兵丁闖卡滋事不顧和好各情詳悉備文行知該西悉畢爾衙門令其切實回覆至會議分

界一事業經明誼等行文約會該國日久總未定期前來若再向催促該夷必以我意存懼怯愈加倔强明誼等此次行文止宜責其不俟議定界址稱兵肇釁殊失兩國和好之誼較為妥當至該夷現駐科斯莫鑾地方是否在伊犁卡外去伊犁路程幾何官兵迎敵傷亡幾名夷兵有無傷損均著常清查明覆奏常清摺著鈔給明誼明緒錫霖廣鳳奎昌閱看將此由六百里各諭令知之○又諭上

年明誼等與俄人會議西界因伊國臣蘇勒官雜哈勞狡詐逞強迄未定議本年伊犁塔爾巴哈台等處屢有俄人闖卡滋事均經該處兵弁攔阻未成釁端此次該國馬步二百餘人執持槍礮器械又在博羅胡吉爾卡倫尋釁滋事撲壓防堵營盤雖經索倫官兵用弓箭擡礮將其擊退而該國人退至科斯莫鑾地方距卡倫仍屬甚近且集有五六百人難保不再來滋擾本日已諭令常清等妥為

防禦因念俄國之兵既與西路構釁則凡接壤該國地方皆應豫為防範以杜詭謀矧軍興日久吉林黑龍江馬隊大半徵調遠出尤慮其乘虛來犯蹈我之瑕景綸特普欽身膺邊疆重寄務當不動聲色未雨綢繆將各旗營兵丁應增補者增補應整頓者整頓並隨時操演訓練使之技藝嫻熟士馬精強庶可收有備無患之效所有一切籌辦防堵情形並著隨時具奏常清原摺並著鈔給閱看將

此由六百里各諭令知之○予江西陶家渡陣亡把總李紹青祭葬世職加等○予安徽歙縣殉難原任閩浙總督程祖洛妻吳氏子太常寺博士枚功暨眷屬等分別旌卹並立祠建坊如例○予安徽六安殉難文生謝調梅等紳民婦女一千八百八十七名口分別旌卹並立祠建坊如例○予河南西華殉難典史錢淦妻馮氏旌表如例○予河南各屬陣亡殉難紳民婦女一千五百五十三名口

分別旌卹如例○庚申諭內閣前因都察院奏候選主事穆大鵬呈懇投效江南軍營當經降旨允准茲據順天府奏穆大鵬於本年二月間呈訴經紀楊興澄勾串帖主周永福謀奪典帖等情經該衙門呈訊典字內並無與給穆姓之語傳訊中人薛思曾亦堅稱並無其事現在該員尚未呈遞親供請旨暫行扣留等語穆大鵬既係捐納主事乃與小民爭執于帖私典私押已屬違例又復砌詞控

告特符狡執並敢於案懸未結之時呈請投效軍營希圖巧避似此卑鄙無恥肆行狡詐實屬有玷官箴穆大鵬著不准其投效軍營先行革職交順天府歸案嚴行審辦按律定擬具奏○諭議政王軍機大臣等僧格林沁奏改勦教匪及追擊溜川竄匪等情形並蒙城糧路已通各摺片白蓮池教匪經黃國瑞舒通額等由東西兩路攻進賊巢會合撽勒擒斬多名餘匪竄上紅山僧格林沁馳抵白

蓮池後復督令恩錫等將遠處營壘移紮西南紅山腳下並督隊四面環攻該逆拌死抗拒官軍仍未得手現於紅山對面平嶺之上添紮營壘兩座安設礮位晝夜轟擊該逆被礮轟打難保不窮而思竄山徑叢雜防範最宜周密該大臣務應嚴為布置毋令乘間出竄惟山勢險峻散漫既難仰攻又恐非重圍所能困總宜尋覓機會使逆巢有內應之賊庶幾一鼓可下溜川逸匪被官兵追勦窮蹙

赴黃國瑞軍營投誠。此輩狼子野心，反覆無常，難保不與教匪暗通消息。著僧格林沁督飭黃國瑞隨時防範。如查有反覆情形，卽速殲除，毋稍姑息。捻首李大箇子等投誠，是否真心悔罪，亦須令馬新貽、英翰等詳加體察。斟酌辦理。蒙城所屬狼山逆壘十餘座，既經撤退，趙王兩圩均經乞降。總兵姚廣武復將附近投誠各圩收撫。蒙城糧路現已疏通。著僧格林沁卽嚴劄該總兵奮力進抵蒙城會

合馬新貽、英翰等軍內外進攻，迅解城圍。毋許藉詞逗遛，致干重咎。昨據唐訓方奏稱：苗逆親率黨與二萬餘人，於臨淮南北兩岸添紮營壘。官軍日有傷亡，而逆黨日加增益。情勢甚為危迫。僧格林沁務當迅將紅山股匪剷除淨盡，以便移師皖省，埽蕩苗氛。毋稍延緩。將此由六百里諭令知之。○又諭閻敬銘奏由淄回省督軍，馳赴清博一帶，因阻水未能速進，並楚勇到東一摺。據稱由山東省城

前赴清平博平兩路，水勢寬深，橋梁沈沒，閻敬銘前派赴堂邑之三營均在齊河一帶阻水。亟應設法催趲，以期無誤。軍行著該署撫酌度情形，飭令該營迅速由大清河水路挽行。毋再遷延。並著嚴飭各該州縣逐段疏通。或於水淺處插標引路，或覓船紮筏，分起渡送，以便各該營將士得以暢行無滯。東昌勦匪正值喫緊，亟需該撫前往統率著閻敬銘俟水勢稍減，卽行馳赴清博一帶妥為調度。

遊擊王心安等所募楚勇三千已陸續到齊。既據該撫奏稱總兵保德等在堂邑勦辦宋逆，並運河東岸防軍兵力尚嫌單薄，應如何將新到楚勇酌量派往以利攻勦之處，卽著閻敬銘悉心籌畫相機布置。另片奏前因遊擊王心安那借餉銀經嚴樹森咨調赴鄂歸案訊辦，現在該遊擊管帶新募楚勇未便遽易生手，請暫留山東等語。王心安著准其暫留東省帶勇隨同勦辦東昌叛匪一俟軍務

稍鬆卽行派員押解赴鄂歸案訊辦將此由
六百里諭令知之○予山東嶧縣陣亡知縣
張振榮祭葬世職加等○贈浙江歸安殉難
文生張福禧訓導銜賞卹加等○贈浙江餘
姚殉難文生呂受豫訓導銜義民吳方林把
總銜暨貢生勞廷梯等紳民婦女一百四名
口分別旌卹如例○予浙江湖州殉難訓導
沈金詔等紳民婦女一百二十五員名口分
別旌卹如例○辛酉

文宗顯皇帝二周年忌辰命惇親王奕誼詣
暫安寢殿恭代行大祭禮○

上詣

奉先殿行禮○詣觀德殿

聖容前供奠○諭內閣前任漕運總督袁甲三○

老成正直強毅有為由部曹著聲臺諫出歷

戎行蒙

皇考文宗顯皇帝特達之知疊擢京卿簡任漕
運總督畀以欽差大臣重任自逆捻縱橫皖

豫數年統軍淮甸擒滅張濬等巨股疊次克
復鳳陽府縣各城勤勞懋著備歷艱難前在
臨淮軍營積勞致病屢經奏請開缺准其回
籍適值苗練復叛以該漕督矢志滅賊本籍
陳州毗連淮潁復經諭令在籍督率兵團兼
施堵剿猶能籌餉籌兵悉心捍禦前據奏稱
沈疴未愈又復疽發於背方冀調理就痊堪
資倚任茲據張之萬奏該漕督於防所遽爾
溘逝念其力疾籌防歿於王事披覽遺摺悼

惜殊深袁甲三著照漕運總督軍營病故例
從優賜卹歷任一切處分悉予開復應得卹
典該衙門察例具奏伊長子前詹事府右庶
子袁保恆著俟服闋後以翰林院侍講學士
卽補次子舉人袁保齡著賞給內閣中書用
示篤念蓋臣至意尋予祭葬謚端敏○壬戌
諭內閣前因中外諸臣交章奏參勝保貪污
欺罔各款當經降旨將勝保革職拏問交刑
部治罪嗣經刑部奏稱勝保押解到部復派

議政王軍機大臣大學士會同刑部審訊節經王大臣等將勝保親供呈覽於被叅各款恃無質證一味狡展而於攜帶姬妾赴營一節則業已承認不諱本日復據王大臣等陳奏勝保所遞親供及訴呈各一紙更堪詫異勝保於督兵入陝之初人言藉藉朝廷不惜諄切訓誡至再至三原期其力洗前愆立功贖罪乃入陝以後仍復肆無忌憚怙惡不悛卽其所自認攜帶姬妾赴營一節已屬大干

例禁諭旨諄諄訓誡之謂何竟敢視若弁髦欺藐朝廷至於此極苗沛霖性情陰鷲曾諭勝保察其就撫是否可靠勝保極口保其無他並乞恩施且擅調其練眾入陝迨諭旨不准猶敢屢次抗辯今苗沛霖已戕官踞城肆行背叛宋景詩以反覆降匪經勝保代為捏報戰功保至參將後又在陝擁眾東歸亦已背叛是今日苗宋二逆之糜餉勞師皆勝保之養癰貽患所致而勝保之黨護苗宋二逆

不得謂無挾制朝廷之心至勝保被叅各款前經價格林沁覆奏有派員查訪並諮詢地方所稱情形大略相同勝保任性妄為卽此已可概見等語是勝保之貪污欺罔實天下所共知豈能憑其自行迴護之詞信為竟無其事據勝保本日所遞訴呈內博引律例妄欲將原叅各員治以誣告之罪尤屬飾非亂是膽大妄為覈其種種情罪卽立正刑誅亦屬咎所應得姑念其從前勦辦髮捻有年尚

有戰功足錄勝保著從寬賜令自盡卽派周祖培綿森前往監視所有案內牽涉人犯卽著刑部分別提審訊明奏結以清積贖○又諭本日候補宗人府府丞溫葆深奏謹陳管見摺內推廣捐例一條有請世給生員舉人俾守其業等語軍興以來捐例之設實出萬不得已各該州縣捐有成數曾准加廣文武學額中數於獎勵捐生之中寓嘉惠士林之意此外或乃祖乃父為國宣勤朝廷篤念蓋

臣於其子孫特加賞賜以旌勞勩此尤異數之恩豈得援以為例若因一時急公捐助米粟而使其後人得以生員舉人長荷國恩竟同世襲將富民皆得濫廁科目而寒士何由奮志功名且從來亦無此政體該員所奏識見迂謬斷不可行○又諭步軍統領衙門奏請嚴禁私販馬匹一摺民間私販馬匹本干例禁各直省軍營驛站赴口採買馬匹兵部原有定例惟恐日久視為具文亟宜嚴申禁

令即著兵部查照定例行知各直省及各路統兵大臣一體懍遵辦理摺內所稱到京採買馬匹一摺京城地面馬匹應否准令外閒採買應如何詳定章程之處並著兵部妥議具奏○又諭前因御史梅啟照奏訪聞江西總管硝局候補知府姚鑲釐金局委員萬永熙升用知府程元瑞貪劣不職各款請飭查辦當經諭令沈葆楨確切查明據實奏奏茲據沈葆楨奏稱江西南鎮火藥庫失火查詢

附近居民僉稱初聞雷聲自下而上旋即煙燄飛騰非由姚鑲侵漁剋扣積怨所致佑清寺硝局火失傷斃確夫二百五十餘名由牙釐局籌給卹養錢文並未經姚鑲之手其局中一切工價銀兩均係照章給發尚無浮冒剋扣情事萬永熙前委赴玉山縣設局抽釐被商民扭捆高臺毆打辱罵實因刁徒王米細等謠言蠱眾希圖搶奪銀錢業經訊明就地正法萬永熙辦理尚無不合所參挾帶礮

船護送女眷訪查實無其事萬永熙於推升廣東連平州知州後告病開缺病痊起用經耆齡奏留江省差遣復經曾國藩等留局當差尚非該員貪戀不肯離省程元瑞委署九江府篆時辦理潯郡租地一案係與該司道定議所參故抑商民價值激變潛逃各情訪查尚無確據程元瑞之姪程之琦在九江府城外租賃房屋開設茶棧程元瑞之子程培瑩即程幼農因患目疾赴潯就醫寄居棧內

並非程幼農強租該員等均無在江西省城置買產業之事各等語此案姚鑲萬永熙程元瑞等被叅各款雖經沈葆楨分別確查或事屬有因或查無實據惟姚鑲係督辦硝局之員平日並不認真率屬小心防範以致轟斃轟傷確夫二百五十餘名之多實非尋常疏忽可比萬永熙既經在江服官差遣乃於伊弟萬永輝等在省典置房屋不行阻止復向借居殊屬不知檢束程元瑞曾署九江府

知府率聽伊姪程之琦赴潯開設茶棧並任其子程幼農赴棧寄居致滋物議雖在該員卸事之後究難辭咎候補知府姚鑲廣東補用直隸州知州萬永熙升用知府候補同知直隸州知州程元瑞均著一併交部議處以示懲儆○又諭前因山西驛丞胡廷華以柏井甘桃兩驛馬匹缺額並本管直隸州知州董彙芳飭法營私各情赴都察院呈揭復據英桂將該驛丞叅劾當經諭令愛仁等會同

審辦茲據愛仁英桂奏訊明定擬一摺此案已革山西柏井驛驛丞胡廷華因聞大計入劾疑被董彙芳揭叅隨以夫馬缺額扣發工食各款並因前被劉際昌稟伊疾迷指為得受董彙芳賄私具詞通稟乃不靜候查辦復擅用驛遞直揭部科旋因董彙芳追回原揭又遣抱赴都察院呈控並敢抗不交卸種種任性妄為意圖挾制胡廷華著即發往新疆效力贖罪山西平定直隸州知州董彙芳因

胡廷華擅用驛馬馳遞揭文恐干例議遣役追回稟送巡撫查辦尚無不合被控各節審悉虛誣惟所管三驛馬匹陸續倒斃至四十餘匹之多未能即時買補雖於交卸時買補足額究難辭咎著交部照例議處候補知府劉際昌奉委查驗馬匹因胡廷華語言失次妄責驛書因以該革員似有疾迷情形稟報雖非無因究屬失實劉際昌著交部察議候補道前任太原府知府保齡候補知府萬濟

訊無調停抑勒情事均著免其置議迴避陝西候補知縣吳延慶既據胡廷華供明委非代董彙芳說合著免其提質馬夫所攤規費等項雖為數無幾究屬私款著山西巡撫嚴飭該管知州諭令永遠革除○又諭沈葆楨奏道員稟許知縣袒匪殺良請簡派大臣審辦一摺此案於同治元年三月閒南康縣監生張起鳳呈控職員許高鴻誣逆抄搶內有牽涉升任江西督糧道前署南康縣知縣周

汝筠袒縱等情當經沈葆楨飭屬訊辦茲據南康縣知縣石昌猷詳稱許高鴻倚勢害命藉局吞財復來省面稱其圖財害命確有案據並所稟多有牽涉周汝筠之處當即飭令分別辦理閏八月閒又據石昌猷稟稱許高鴻之父許觀國呈送忤逆結求逮予正法當即就地處決迨石昌猷稟稱周汝筠幕友索詐擾民周汝筠亦稟揭石昌猷殺良袒逆互相稟許正在飭屬提訊本年二月閒許觀國

同其四子許高深以貪贓害命擅殺無辜具控並供稱當初結求正法係熬刑不過所致且伊子許高深來省呈控行至中途被縣役拏獲又經該縣家丁放走是以事逾半年始行出控周汝筠則欲將石昌猷立置重典並疑該撫袒護各等語案關誣贓枉殺虛實亟應徹底根究著曾國藩親提前後人證卷宗秉公嚴訊確情據實具奏沈葆楨自請議處及請將李桓一併議處之處著俟定案時聲

明請旨○諭議政王軍機大臣等劉長佑奏督軍勦匪兵力尚單請飭東撫駐紮東南以資夾擊各摺片現在直軍勦賊正當喫緊且東南一帶地面遼闊防兵單薄紛竄堪虞著閻敬銘迅遵前旨先將前派赴堂邑三營並王心安所募楚勇三千名催令設法渡河無分水陸趨行前進交丁寶楨保德妥為調遣新到兵勇恐難聯絡仍著閻敬銘探明道路即行起程馳赴清博一帶以資控馭山東兵

勇未到以前著劉長佑飭令丁寶楨等就現有兵力實力防勦柳林等團向稱得力務當激勵聯絡俾為我用不得藉口兵單稍涉疏懈將此由六百里各諭令知之○又諭吳棠奏皖軍危迫請飭僧格林沁赴援並將宿蒙餉道繪圖呈覽各摺片唐訓方奏蒙城諸軍合擊狼山賊棄壘遁趨重懷遠請飭黃國瑞星馳援蒙一摺蒙城圍雖未解糧道已通該逆不得逞志於蒙於是益抽精銳前赴懷遠

因我前敵連營河岸聯絡礮划連日文報軍糧盡為阻絕楊岳斌等所派丁泗濱等統帶礮船百號現已駛至經唐訓方令其會合總兵何紹彩往援當能力挫兇鋒俾前敵復臻穩固惟陸師以分防苦戰近復染疫能否得力尚不可知唐訓方請飭僧格林沁令黃國瑞一軍星馳援蒙該撫卽抽換蒙城數營回援臨淮稍紓兵力刻下山東匪勢已熾卽宋景詩一股有直東兵勇合勦似尚不難了結

著該大臣自行察度如東匪卽日可以蕝事該大臣卽可親統大軍南下以得勝之師削平苗捻或一時不能親往卽令黃國瑞一軍先赴蒙城聽唐訓方調遣該大臣務當酌量情形星速援皖毋令稍有疏失吳棠當嚴飭姚廣武竭力會勦並將徐宿各捻股設法勦除唐訓方就現有兵力固守臨淮並催令丁泗濱等水師速赴懷遠力顧前敵痛挫兇鋒不得專待援師致滋貽誤染疫士卒善為拊

循以期得力吳棠所奏翁廷奎勇丁滋鬧淮安關署情形所擬辦法甚為草率顯有不實不盡著該漕督再行確查按律懲治毋稍姑容淮關應解清淮軍餉二萬三千兩著就近催令該監督按月撥解李鴻章吳棠另摺奏江北各屬漕米仍請准收折色以濟揚營餉糈等語本年江北各漕著仍照向章折徵留充揚營軍餉以資兵食將此由六百里各諭令知之○又諭都興阿等奏覆陳江北撥赴

鎮江助勦兵勇礙難全行歸併鎮營一摺前因馮子材等奏請將江北撥赴鎮江兵勇二千九百六十名歸併鎮營防勦並稱與都興阿咨商已妥是以降旨允准茲據都興阿等奏稱前此分撥兵勇赴鎮助勦原以南岸擬擊丹陽牽制賊勢雖北岸兵力素單亦不得不於無可抽撥之中一時權宜通融以厚南岸軍勢若竟將此軍歸併鎮營揚防兵力本單且刻下苗捻未靖防堵全局攸關所有前

次調赴鎮江兵勇礙難全行歸併鎮營等語所奏亦係實在情形著馮子材等即將江南領餉之廣西提標兵一營忠成提壯勇二營共一千一百五十餘名歸併鎮營簡閱其餘江北領餉之湖南各起官兵捷壯凱勝勇營仍交副將刁經明統帶暫留南岸協勦毋庸歸併鎮營以示限制並著馮子材等激勵將士相機進取揚防西路雖靖而北岸沿江一帶未可稍涉鬆勁並著都興阿等督飭兵勇

與南岸將弁聯絡一氣嚴密防範儻南岸有警都興阿仍當不分畛域撥兵救援記名總兵王萬清已明降諭旨勒令休致所部川勇著都興阿等遴派得力將弁妥為統帶以資整頓將此由六百里各諭令知之○又諭瑛榮奏漢中危急萬分請飭催川楚援師迅速進剿一摺漢中被圍已久疊經諭令官文駱秉章等迅調兵勇赴援數月以來張由庚朱桂秋兩軍總無出境消息梁作楫一軍雖已

行抵興安據稱接准該省督撫飭諭令其卽在興安駐紮不可冒昧前進是朝廷移緩就急徵調援師該文武員弁等竟敢任意遷延全不以國事為重道員張由庚總兵朱桂秋均著先行交部嚴加議處道員梁作楫著先行交部議處劉蓉業已擢升陝撫責無旁貸著駱秉章會同該撫嚴飭張由庚等星夜前赴漢南援剿劉蓉亦卽督率後起之何勝必等軍趕緊前進力解漢中之圍並著官文迅

飭梁作揖由興安拔隊進援母得以楚省邊防緊要藉詞觀望李雲麟前已出京計不日即可抵陝著官文等傳諭鄂省援陝各營俟李雲麟到陝統歸調遣以期得力股首陳玉和就擒正法亦足以稍寒賊膽劉蓉未到任以前著張集馨轉飭毛震壽激勵諸軍勉力支持毋稍貽誤漢南各營軍餉仍著張集馨妥籌運解藉資接濟署花馬池營參將王錫爵久未回營該參將本係雲南回教難保不

投入賊營並著劉蓉張集馨查明下落據實奏聞將此由六百里諭知官文駱秉章嚴樹森劉蓉並傳諭張集馨知之○以久病未痊江蘇記名總兵官王萬清勒令休致○以山東臨清助勦不力摘副將王佐臣頂翎奪勇號予陣亡侍衛益謙署都司長泰祭葬世職加等○予江蘇江浦陣亡知縣符宋英祭葬世職加等○蠲緩江西南昌新建豐城進賢清江新淦新喻永豐萬安臨川南豐新城建

昌德化德安湖口安福餘干蓮花十九廳縣暨九江府同知所轄被水被旱地方新舊額賦有差○癸亥諭議政王軍機大臣等慶昫等奏遵查阿拉善蒙兵情形一摺阿拉善蒙兵前於平羅邊口遇伏失利朝廷卽慮其畏葸難用茲據慶昫等歷陳該旗遷延不進情形是此項兵丁萬不足恃現雖經慶昫等疊次咨催始有繞道過渡進定邊口馳赴慶陽之說而遠來疲乏斷不可用為前敵致債事

機至鄂爾多斯蒙兵已在口外阿拉廟等處且據慶昫奏稱較阿拉善兵差勝卽著熙麟飛檄嚴催齊抵慶陽以厚兵力其阿拉善旗官兵抵慶陽後應令屯紮何處藉壯聲援並著熙麟酌量調遣平涼已否解圍甘省軍情近日如何熙麟務當隨時奏報以慰廑繫將此由六百里各諭令知之○又諭麟興奏籌辦邊防情形一摺據稱烏里雅蘇台北起至科布多卡多兵少相去甚遠聲勢難以聯

絡設欲添兵又恐俄人藉口擬嚴劄各卡倫互相出探遇俄人來就近呈報各該處大臣相機辦理並行文庫倫科布多大臣密為曉諭防範等語所籌均尚妥協現在俄人在各邊界闖卡滋事前據常清奏該夷闖赴博羅胡吉爾卡倫竟敢施放大礮我軍用擡礮轟擊該夷大隊退至科斯莫鑒地方集有五六百人是其用意尋釁已可概見當經諭令常清整隊嚴防如敢再來撲犯卽激勵官軍奮勇迎擊並令知照各城一體嚴密備豫烏里雅蘇台地方卡多兵少防範難周若議增兵又多窒礙麟興所稱如遇俄人前來詳細問明用善言開導不准滋生事端設執意不退其在烏里雅蘇台邊境者迅速呈報該署將軍其在科布多邊境者就近呈報該處大臣酌量重輕或親身前往或派員前往卽著照所議實力辦理其唐努烏梁海地廣人雜尤當妥為防範哈薩克前有暗附俄人之事尤

未可恃麟興現署將軍篆務責任綦重務當嚴飭各卡倫實力奉行並隨時偵探情形不可稍有疏忽以副委任將此諭令知之○以陝西同州等處守城出力賞道員劉鴻恩等花翎委參領音登額等藍翎餘加銜升敘開復有差以四川龍穴場勦滅全股逆匪出力賞總兵官唐桂林一品封典彭順五王大文胡尊賢副將魏松亭楊得元彭文興蕭慶泗楊得勝謝正球張陞揚蕭萬忠參將陳友

勝朱成俊巴圖魯名號守備黃興壽等花翎千總張官南等藍翎餘加銜升敘開復有差甲子諭議政王軍機大臣等曾國藩奏彙報近日各路軍情並調淮揚水師駛往臨淮各摺片金陵逆匪聚集悍黨堅守老巢時復伺隙出戰並有白齊文投入賊中廣置炸礮分解金陵曾國藩務當飭令各營豫為布置以防該逆用礮轟撲毋稍大意並著李鴻章於滬上及沿江隘口嚴密稽查毋令洋人賣

給粵匪槍礮以斷該逆接濟偽護王等逆首畢萃金陵蘇常等處賊勢必單李鴻章正可飭令所部各軍乘機克復為步步進逼之計張運蘭已在楚南另募三千人赴粵其原部湘勇現駐甯國等處防剿自應仍留皖南以資得力石太股匪竄入黟縣經王文瑞督兵克復將賊眾驅出羊棧嶺外仍著曾國藩飭令徽防將士會合浙軍嚴密堵遏毋令再竄入境江忠義李榕兩軍在堅山等處獲勝逆

匪分竄都昌彭澤境內湖口已無賊蹤著曾國藩即飭江忠義等軍速由湖口與饒郡各營合力並進由石太一路東下掃盡逆氛乘勢進攻東壩以期與滬浙各軍聲勢聯絡前據唐訓方奏李世忠一軍突如其來疑係矯託兼恐坐觀成敗是以有旨令曾國藩設法調回既據曾國藩察其防守五河之意尚屬至誠著即將詳細情形知會唐訓方辦理並著唐訓方妥為駕馭毋令別生枝節賊眾廣

聚臨淮與唐訓方併力相持情形甚緊彭玉麟等所撥三板船八十號計日可到臨淮著唐訓方即督飭水陸各軍奮力攻擊迅掃逆氛毋稍遲緩李朝斌所部太湖水師既已陸續入滬上海戰船足敷分布黃翼升所部淮陽水師著李鴻章將一半留滬助剿其餘一半即飭令黃翼升親行統帶速赴臨淮惟淮滬兩處相距甚遠黃翼升往來布置能否兼顧仍著曾國藩李鴻章酌量辦理所請俟克

復蘇州後將滬淮各營分紮洪澤湖等處及蘇皖兩省供支黃翼升軍糧餉火藥章程均著照所議辦理將此由六百里各諭令知之又諭多隆阿奏南北兩岸疊獲大勝攻毀賊巢多處及遵飭德興阿赴省各摺片多隆阿現在駐軍三府里該處距西安省城密邇日內該將軍當已親抵省垣布置一切防守無虞陝省軍情當可日有起色殊慰塵繫多隆阿自上年督軍入陝所向克捷復以偶嬰

瘡疾各營將士亦久勞多疫以致省城及西路軍情多有未能兼顧茲據所奏渭河北岸連克蒲桃窪拜家村賊巢南岸連克三府里白鴨嘴及馬烏什十餘村堡大誓三軍即日攻下沙窩賊之老巢霆擊風馳軍聲丕振所辦極為得手多隆阿抵省後瑛榮業經革職即著與張集馨穆騰阿等將城守內外妥為籌布即嚴督諸軍乘此聲威將東西兩路回逆迅速全行掃除馬德昭所部是否可交德

興阿統帶鳳翔被圍幾及一載或即派馬德昭前往抑另派大員赴援之處著多隆阿迅速妥籌辦理不得再有遷延以致救援莫及該將軍督辦全陝軍務東西兩路均屬責無旁貸高陵縣城是否尚為賊踞此處攻克東路各軍便可與雷正綰三原之兵會合將西路逆氛痛加掃蕩以次廓清甘省軍情照麟駐守慶陽兵力過為單薄多隆阿亦應遵奉疊次諭旨隨時兼顧乘勝迅將全陝肅清自

可速籌分兵援應毋得稍存膜視溫德勒克西常星阿二員據稱連日接仗戰功卓著本日已降旨交部議敘指日全陝肅清必當疊膺懋賞該大臣仍飭令奮勉圖功可也將此由六百里諭令知之○以故青海扎薩克頭等台吉布彥達賴子達什多布濟襲職○以陝西攻克渭河兩岸賊巢賞副都統金順參將孟宗福曹國安巴圖魯名號予副都統溫德勒克西等升敘有差○予安徽歙縣合門

殉難訓導汪士熙暨眷屬人等分別旌卹並立祠建坊如例○予安徽績溪殉難八品銜胡韜等紳民婦女五百六十三員名口分別旌卹如例

大清穆宗繼天開運受中居正保大定功聖智
誠孝信敏恭寬毅皇帝實錄卷之七十三

大清穆宗繼天開運受中居正保大定功聖智
誠孝信敏恭寬毅皇帝實錄卷之七十四

敬修

同治二年癸亥七月乙丑諭內閣前據河南

學政景其濬奏請將品學兼優之副貢生蘇
源生等量予錄用當經降旨交部議奏茲據
吏部奏稱景其濬所保各生擬請比照考試
優貢新章附入下科優貢之末由該部驗到
考試分別等第請旨錄用嗣後各省學政於
生員中果有品學兼優之士均歸入優貢一
途不得於優貢外別開保舉之門等語所奏
自係為慎重選舉起見惟此次景其濬所保
各該生等既經該學政詳加察覈自應名實

相孚。且恐有敦品勵行之儒。年近遲暮。未能
應試者。若必概令考試。繩以舉業。殊非朝廷
崇尚實學。鼓舞羣材之意。所有河南副貢生
蘇源生。歲貢生李濬。曹肅孫。附生許靜。于錦
堂。均著以本省訓導用。嗣後各省學政。於該
省生員中。務當綜覈名實。認真考察。如有經
明行修之士。該學政真知灼見。許其酌保數
人。以為鄉里矜式。不准視為常例。濫行保奏。
以杜幸進。而重選舉。儻有夤緣干進。舉非其

人。必將該學政照例議處。以為濫保者戒。○
諭議政王軍機大臣等。景綸等奏赴豫官兵。
被雨水阻滯。及三姓地方被水情形。各摺片。
吉林所派赴豫官兵。因該處雨水連綿。松花
牡丹等江。河水洶湧。未能依限到省。現在苗
逆鴟張。豫省需兵甚急。著該將軍等。迅即飛
飭管帶三姓官兵之委參領胡爾棟阿等。趕
緊設法濟渡。一俟到省。即令星夜趕赴前隊。
毋許逗遛。其業經起程之頭二起官兵。並著

催令趲行。毋稍稽滯。至三姓地方。江流陡漲。
西北各壩。多被衝開。河水泛溢入城。江岸附
近居住旗民房屋田廬。均被漫淹。著該將軍
等。派委妥員。前往該處。將被水居民。善為撫
恤。毋令失所。如有成災地方。即著奏明分別
辦理。將此由五百里諭令知之。○又諭毛震
壽奏漢南攻勦情形。及滬陳義寔請於川楚
借地抽釐。以裕秦餉各摺。所奏漢江南北兩
岸賊蹤蔓延。進兵之路。須從北岸之十八里

鋪。東西文川。及南岸之油房街。西路之長寨。
三面夾擊。方能應手。而現在兵力尚單。疾疫
又重。惟有先疏糧道。以救漢中。毛震壽現已
進次青石關。飭催易佩紳進紮南岸之法慈
院。與郡城文武相約。併力南關。力據漢水之
險。聲息聯絡。以為一路生機。等語。所籌尚合。
機宜著即妥為辦理。力保郡城。以待援師。仍
著劉蓉。懍遵疊次諭旨。星速馳赴漢南。統率
諸軍力解郡圍。官文嚴樹森。駱秉章。嚴催川

楚派援各軍前往如再遷延卽著指名嚴叅懲辦鄂省援師須俟李雲麟到後交其統帶未知該員何日方可抵陝劉蓉抵漢南後著卽併歸節制以一事權將陝南之原有各軍加以激勵與川楚援師合併調遣俾資得力漢江南北岸三路進兵是否切中機宜並著妥籌進取劉蓉未到以前毛震壽仍當竭力戰守毋得稍涉鬆勁致滋罪戾陝南藍張郭曹與鄧逆股匪竄併又有興安捻股連成一

片漢中城固兵力本單而餉尤缺乏毛震壽所陳艱窘各狀尚屬實在情形不得已而籌及川鄂兩省借地抽收鹽貨兩釐以為接濟之策或當有濟卽著官文嚴樹森駱秉章接照所奏竭力籌辦毛震壽摺一件著鈔給官文嚴樹森駱秉章閱看多隆阿勒辦渭河兩岸回匪甚為得手昨經諭令乘勝連將陝省東西兩路逆回次第剿除劉蓉抵陝南後當能與該將軍隨時關照以籌全局克副委任

也將此由六百里諭知官文嚴樹森駱秉章劉蓉並傳諭毛震壽知之○引見前任工科給事中蘇廷魁前任戶部郎中楊寶臣得旨蘇廷魁著以道員發往河南交巡撫張之萬差委楊寶臣著以道府用○旌表守節盡孝直隸靜海縣民張桂蔭妻周氏○丙寅諭內閣朕奉

慈安皇太后

慈禧皇太后懿旨

文宗顯皇帝龍馭上賓脩經三載本年十月卽屆釋服之期春露秋霜曷勝悽愴我朝定制皇帝於釋服後一切慶典均應次第舉行惟念

梓宮尚未永遠奉安遙望

殯宮彌深哀慕若將應行慶典一切照常舉行於心實有不忍除朝賀大典均仍照常舉行外其各項慶典及內外王公大臣筵宴應如何分別舉行停止之處著議政王軍機大臣

御前大臣會同禮部等衙門妥議奏聞。至萬壽禮節向有賞王大臣聽戲筵宴著一併停止。俟永遠奉安後與一切慶典再行照例舉行。以符舊制。所有昇平署歲時照例供奉並著俟

山陵奉安後候旨遵行。其咸豐十年所傳之民籍人等即著永遠裁革。○諭議政王軍機大臣等黃贊湯奏高州各路軍情及辦理釐金亟宜酌量變通。東北兩江盜匪蠢動各摺片

逆匪陳金缸占踞信宜縣城已將三載。勞師糜餉日久無功。現在卓興方耀兩軍雖經崑壽派員勸解釋怨和衷而積疲之餘未必即能振作。毛鴻賓前奏擬募楚勇數千派張運蘭帶赴粵東剿賊此時想已募練成軍即著迅速起程先將高州軍務認真整頓務令壁壘一新迅殲大憝此股巨匪一滅則辦理餘匪自可迎刃而解。郭嵩燾前經諭令由海道赴粵此時想已起程即著趕緊前進。廣海寨

城雖經吳昌壽督兵圍逼而賊援未斷仍屬可虞。毛鴻賓等到省後務飭該藩司慎密防範毋稍疏虞。至土客互鬪猜貳已深兵連禍結曾無已時該督撫等務當持平妥辦懲其首逆散其脅從以期逐漸相安永消爭釁。粵省釐金止有廣肇惠韶四府一律辦理而潮廉瓊三府即有毆官罷市之舉近來南海等縣緇行人等又復聚眾歇工藉端懇免抽釐助餉原係一時權宜萬不得已之舉固不可

任意苛斂致怨讎之繁興然刁商聚眾阻撓藉端要挾此風亦斷不可長軍興以來辦理釐金惟兩湖辦有成效毛鴻賓曾任湖南巡撫有年郭嵩燾籍隸湖南在籍日久於此中利弊知之甚悉即著於抵任後體察情形妥為籌辦務令商賈不苦擾累軍餉可以源源接濟方為妥善。東北兩江盜匪蠢動亟應乘其初起趕緊撲滅俾免燎原黃贊湯摺片三件均著鈔給閱看將此由六百里各諭令知

之。欽差大臣官文等奏鄂省邊防緊要。未能派兵前赴臨淮。得旨。臨淮軍營已由曾國藩等調派水陸各軍赴援。楚省既無兵可派。著無庸議。皖豫邊防加意整頓。成大吉。駐三河尖。如該逆上犯。恐其兵力尙單。應如何添調防剿之處。著與曾國藩函商辦理。○湖北巡撫嚴樹森奏。拏獲習教謀逆匪犯宋么等。正法報聞。○予湖北蕪水陣亡在籍主事蔡恭詮祭葬。世職加等。入祀昭忠祠。○予湖北應山等處陣亡殉難從九品李育玉等紳民婦女四百五十三員名口分別旌卹如例。○丁卯諭內閣。閣敬銘奏尼山

聖廟被匪損壞。請將奉祀之行聖公議處。並自請議處一摺。山東鄒縣尼山一帶。逼近教匪巢穴。本年五月間。疊被肆擾。毀壞廟宇。砍伐樹株。准襲衍聖公孔祥珂職司奉祀。疏於防護。著交部議處。閣敬銘未能先事豫防。咎亦難辭。著一併交部議處。該管地方文武員

弁均著查取職名。交部議處。並著閣敬銘派員前往敬謹查勘。趕緊籌議設法修補。以副尊崇聖道至意。尋吏部議孔祥珂。閣敬銘均照防範不嚴。降一級留任。例上加等。降三級留任。得旨。准其抵銷。○漕運總督吳棠奏。狼山賊營撤退。蒙城糧道漸通。請飭欽差大臣僧格林沁赴援皖省。得旨。僧格林沁南下一節。已諭令該大臣自行察度。恐一時未能督師入皖。吳棠惟當會同唐訓方。妥為籌辦。嚴飭在事將弁認真防剿。乞降各圩鎮撫。須得法毋墮奸計。已革遊擊尹作賓突陣受傷。著准其開復原官。○賞江西省壬戌恩科鄉試年老諸生鄒遇銓等三十二人舉人副榜有差。予山東萊州陣亡殉難紳團婦女三千二百八十四名口分別旌卹如例。並入祀昭忠節孝祠。○予山東曹縣殉難典史方傳懋妻董氏旌表如例。○戊辰諭內閣。前任兵部左侍郎黃琮持躬端謹。自告養回籍。適值滇

省軍興數載以來於省城防守及勸捐銀米各事宜尚能竭盡心力辦理茲於本年正月雲南省城之變遽以憂憤投繯自盡遺章披覽憫惜殊深黃琮著照侍郎例賜卹。歷任處分悉予開復應得卹典。該衙門察例具奏。○又諭近來各直省大吏保舉賢員一經奏到無不量材器使並經疊諭中外臣工於所舉各員務須循名覈實不得濫保非人本日據曾國荃奏敬陳管見臚舉賢才各摺片其所保各員既經該撫切實保奏自必能灼見真知足資任使除郭崑燾前已有旨飭赴直隸軍營差委李瀚章已簡授廣東按察使外所有記名按察使劉連捷記名道彭毓橘候選道陳湜江蘇候補道易良虎羅麓森江蘇候補知府彭椿年候補縣丞趙烈文浙江溫州府知府周開錫卽用知縣常甯縣教諭成果道均著交軍機處存記俟旨擢用湖南拔貢生易孔昭江蘇生員管樂並著准其調赴軍

營差遣委用黃冕一員前經毛鴻賓奏調已准其留於廣東差委金安清聲名狼藉疊次被人糾叅由曾國藩審訊覆奏該革員經手錢糧濫支濫應意存含混降旨革職並勒令賠繳欠款為數甚鉅該撫所請調赴軍營之處著不准行。○諭議政王軍機大臣等李鴻章奏吳江水陸各營擊退大股援賊現派太湖水師進剿曾國荃奏金陵旬日戰守攻克印子山賊壘並臚舉賢才各摺片金陵賊勢

窮蹙官軍攻剿喫緊之際該逆困獸猶鬪勢必拚死抵拒曾國荃所奏旬日間戰守各情並將城東南之印子山賊壘攻破諸軍將士皆能奮勇倍加喋血苦戰曾國荃現在檄調江浦浦口之蕭慶衍七營過江以紮七寶橋河邊扼守秣陵關小河進城之路並以金陵城大尚須增募萬眾以冀合圍剋期埽蕩惟江浦浦口等處防兵亦不可過於單弱著曾國藩與曾國荃妥籌相機辦理仍須謀出萬

全以期必勝。蘇常之賊回救金陵。其間宜有可乘之機。吳江水陸各營。既將蘇嘉兩路大股援賊擊退。總兵李朝斌督帶太湖水師到滬。陸續進發。李鴻章會同該鎮。卽日前往蘇崑吳震各路。周歷布置。並督同劉銘傳等進攻江陰之兵。劉秉璋等進攻嘉善之兵。聯絡進紮。著卽乘機進取。將攻擣各情形迅速馳奏。戈登以白齊文投賊。恐常勝軍皆其舊部。為所勾結。乞加口糧。該撫不得已而勉徇其

請。仍著李鴻章妥為駕馭。龍絡用之。以資其力。曾國荃所保各員。自係為時勢艱危。籌兵籌餉。急切需材。起見。第恐其中或有為人聳動之處。如黃冕已經有旨准毛鴻賓所請。調赴廣東。金安清聲名甚劣。疊次被人糾參。由曾國藩審訊革職。並有應行賠繳欠項甚鉅。是以明降諭旨。不准調往軍營。曾國荃經朝廷簡任封圻。受恩至渥。倚畀方殷。當此軍事萬分喫緊。宜時以儆懼存心。其於左右任使

之人。必須慎之又慎。方不至以引用非人。致為該撫身名之累。軍中機務殷繁。艱鉅所集。仍宜遇事加意檢點。並須與曾國藩隨時商榷。以求萬全。是為至要。將此由六百里各諭令知之。○又諭曾國荃奏請飭部監頒發執照。交湖南勸捐濟餉等語。金陵大營餉需缺乏。關繫甚重。既據曾國荃聲稱江浙各省商民在湖南各口岸貿易者。尚可勸令捐助餉需。著照所請。由戶部頒發從九品職銜照一

千張。並配發各項職銜及封典照共一千張。五品至八品及從未各項實官職照共六百張。部監照一千套。由驛遞交湖南省。並著譚世臨酌定減成章程。遴委妥員勸諭湘中江浙殷實客商。量力捐輸。陸續解濟。原片著鈔給閱看。將此由五百里諭令知之。○又諭唐訓方奏逆匪阻截淮河運道。力圖疏通。並李世忠之兵進紮劉府各摺片。丁泗濱等水師進援臨淮。駛至小蚌埠。奪獲並燒毀賊划四

十餘隻賊更於沙洲地面來夜增築四壘。並於兩岸添築礮臺。水師阻於巨礮。傷亡甚多。黃開榜續到之礮船。運載米麵。雖經拔鎖斷椿。奮力衝突。勉將糧石送赴前敵各營。而受傷者亦復不少。現探該逆於沿河多備竹石。意欲橫截河流。此後糧運斷難為繼。臨軍後路亦形單薄。情形危迫萬分。非有陸路援軍速行馳救。大局將不堪設想。曾國藩所部各營雖不敷分布。亦當於無可籌撥之中。勉力

抽派一軍。星馳援應。會同臨淮水陸各營。將沙洲賊壘攻破。毋得游移。致誤戎機。蒙城賊勢稍鬆。唐訓方現調馬新貽一軍馳赴臨淮。力顧後路。並催僧格林沁所派援兵進解城圍。直擣該逆老巢。俟賊匪回顧時。即令臨淮各軍乘勢力圖懷遠。著僧格林沁即飭令訥木津等軍迅速照辦。不准觀望遷延。並著僧格林沁速將紅山教匪攻克。星夜督軍馳援皖北。以救然眉。李世忠派總兵朱元興進援

臨淮。尚無騷擾地方之事。近復增兵五百人。均由朱元興帶領。進紮劉府一帶。如果實力攻剿。即著唐訓方妥為聯絡。會合進取。以厚兵力。並著唐訓方設法疏通糧路。接應前敵各營。毋令缺乏。將此由六百里各諭令知之。○又諭張之萬。毛昶熙奏攻克衝要賊圩。現籌進剿情形一摺。亳州廬廟地方。勢居衝要。捻匪盤踞其中。復將出竄。經遊擊呂振河等將匪圩攻克平毀。現在官軍進剿毫東之路。

已通。毛昶熙擬即進紮鹿邑。規取毫東各捻圩。著即調派兵勇乘機進剿。節節掃蕩。毋稍鬆勁。潁州練總赴陳郡者頗多。經毛昶熙於道經陳州時。親加撫慰。令其回潁傳諭各寨同心守禦。以輔官兵。著張之萬即飭張曜由陳郡進兵潁郡。聯絡該處紳團。協同攻剿。並隨時與毛昶熙所部各營互相援應。前據劉長佑奏祝塏軍營襄理需員。請飭調候補知府李徵松來直等語。著張之萬即飭該員迅

赴直隸軍營。毋稍遲緩。將此由六百里各諭令知之。○又諭徐之銘奏逆首馬榮。勾結前副將馬聯升。攻陷平彝。圍攻宣威。曲靖。經岑毓英督兵克復平彝。並解府州城圍。暨查辦謀殺邱北縣辦撫委員戕害署廣南守吳維鼎全家多命之要犯李侍培一案。請將兩案出力殉難各員。分別獎卹。參將施嘉賓並懇以總兵記名。又署東川府知府黎新德在任被戕。開復知州熊夢昌等。仍請革職各摺片。

徐之銘前已有旨。令其來京聽候議罪。該革員在滇與回教官紳同惡相濟。所奏收復平彝。殲戮李侍培等案。鋪敘勞績。列保多員。殊難憑信。勞崇光近在黔省。賈洪詔已由楚赴川。前往東川籌辦進剿事宜。卽著按照徐之銘所奏各情。妥為查辦。是否實有其事。其殉難出力各員。是否確實。一併查明具奏。再降諭旨。滇省現在全境糜爛。僅東川昭通二府。尚可為將來勦辦滇省進兵之路。而署東川

守黎新德忽被練戕。官節可疑。著該督撫等嚴密詳查。一面將戕官練眾設法擒獲。毋任漏網。至知州熊夢昌。知縣高青雲二員。前經張亮基奏保開復原官。此次徐之銘復劾其營求徇情。仍請革職。該二員在滇究竟有無劣蹟。張亮基所請開復之處。是否允當。並著勞崇光等一併查明請旨。徐之銘摺片均著發交勞崇光賈洪詔閱看。再徐之銘於本年三月二十七日降旨革職。來京議罪。距今已有四月之久。何以若罔聞知。依舊列銜奏事。或係部文尚未接到。著錄寄明發諭旨一道。交勞崇光賈洪詔恭錄設法行知。俾令知悉。將此由六百里各諭令知之。○命三口通商大臣兵部左侍郎崇厚辦理荷蘭國通商條約事務。○以河南官軍攻克安徽廬廟賊寨。復已革遊擊李大成職。賞還花翎。餘升敘有差。予江蘇同里鎮陣亡都司王新華祭葬。世職加等。○予江西南豐等處陣亡殉難監

生曾輝等紳民婦女九十四名口分別旌卹如例並予建祠○豁免湖南鳳凰乾州永綏保靖瀘溪麻陽古丈坪七廳縣佃戶積欠租穀○己巳

仁宗睿皇帝忌辰遣官祭

昌陵○

上詣

壽皇殿行禮○諭內閣都察院奏已革戶部郎中奕遷等遣抱以派管寶鈔局被叅冤抑等

詞赴該衙門呈訴一摺此案已革郎中奕遷員外郎景雯崇貴王事豐瑞常祿所訴冤抑各情雖據呈稱係肅順授意問官科派定罪惟該革員等定案係在肅順伏法之後且均係永不敘用之員究竟有無冤抑之處著該部將該革員等被叅原案詳細查覈具奏嗣後凡遇從前鈔票局等案內株連被陷之員其有呈訴冤抑者即著徑由都察院咨行該部查覈辦理以免曉瀆而重政體○又諭前

因盛京驛丞陳五福遣抱赴京呈控驛丞于國寶剋扣銀兩等款當交玉明等訊明具奏嗣究出盛京兵部侍郎訥爾濟等有收受餽送陋規等情復經分別解任革職歸案審辦旋據訥爾濟以案結無期等詞遣人赴都察院呈訴降旨交玉明和潤研訊定擬迅速具奏茲據奏稱遂款審明分別定擬一摺此案前任科布多幫辦大臣富呢雅杭阿於盛京兵部侍郎任內因咨部覆准發放馬乾免扣

六分減平事後收受于國寶等謝儀銀三百兩實屬不知檢束前任盛京兵部侍郎訥爾濟雖訊無收受陋規情事惟於于國寶等公送匱儀並不拒絕輒留為修理廟宇之用並於門丁私向所部借貸及收受門包未能查禁又復虛詞赴京瀆控實屬昏憤副監督員外郎志慶於于國寶等送給陋規程儀雖未收受借用立成錢鋪銀兩亦即歸楚惟因咨准免扣馬乾輒受謝儀銀五十兩實屬貪鄙

富呢雅杭阿訥爾濟志慶均著卽行革職高橋驛丞陳五福所控各款雖多得實惟豫用印呈遣人揭告究屬不合著交部議處驛丞王德陞里鎧劉琳劉玘張維翰劉源潔林慶福徐環聽從先期連用印呈揭告亦難辭咎均著交部察議常廣安董連舉祁永泰聽從公送訥爾濟匱儀浪子山驛丞范鵬翔於進京時支用各驛公帳銀六十兩輒令各驛分年攤還均屬不合著一併交部議處候補

知縣陳晉吉於已故驛丞范慶雲所遞供詞因未明晰率行改正數字擲還亦屬不合著交部察議已革驛丞于國寶已革兵部主事全德及門丁蔡賢等應得各罪名均著分別照辦各驛攤派陋規著兵部嚴行禁革○以湖北捐輸軍餉永廣蘄州學額九名黃梅縣七名○庚午諭議政王軍機大臣等玉明奏接據

永陵總管海亮等稟稱自七月初一日起陰雨

連綿十有餘日地氣滋潤深透十三日風雨復作以致神樹倒竭垂壓

殿檐詢諸致祭旋省之署副都統景霖語亦相同現擬起程前往敬謹查驗再行詳奏辦理等語

陵寢重地關繫至為緊要現在神樹倒竭究係如何情形至

殿檐與神樹相近有無壓損應如何堵拄修葺以昭慎重著玉明於馳抵

陵山後敬謹查驗將實在詳細情形據實陳奏請旨辦理將此諭令知之○又諭僧格林沁奏酌籌南北緩急情形請飭迅殲宋景詩股匪冀可調集全軍督帶南征一摺苗逆圍撲蒙城未能得手近復添調悍黨橫截淮河阻遏前敵各營運道昨據唐訓方馳奏情形萬分危迫曾國藩所部多在西南兩路防剿勢難抽撥來援必須僧格林沁督率馬步全軍前往勦辦庶可埽除苗捻迅速奏功惟教匪

盤踞紅山。仰攻頗難得力。黃國瑞之軍堵禦東面。正當喫緊。未能抽調赴皖。該大臣所統馬隊大半皆在河北。為宋景詩一股牽掣。是直東股匪未清。該大臣全軍斷難南下。劉長佑身膺督辦之責。馬步各軍悉歸節制。為數已屬不少。何以區區小醜。竟不能剋日殄除。現在塗潦諒已消涸。高粱茂密處所。應已一律芟除。即著劉長佑督同恆齡、蘇克金、丁寶楨等軍合力進剿。擣穴擒渠。盡殲醜類。毋得

任意遲延。致干重咎。宋景詩本反覆無常之小人。雖據保德。丁寶楨稟報該逆有悔罪投誠之說。殊難深信。劉長佑惟當乘此大軍雲集之際。一鼓殲除。俾直東交界處所永無後患。其恆齡、蘇克金等軍既暫歸劉長佑節制。即應會合馬步兵勇齊心協力。相機進剿。將此股迅速完結。得以及早隨同僧格林沁南征苗練。方為無分畛域出力報效。丁寶楨部勇無多。前經諭令閻敬銘添兵助剿。即著該

撫迅催前進。毋得以阻水為詞。任意延緩。程順書一犯前據劉長佑奏明正法。此次保德等稟內有令宋逆剿捕竄匪。陳順書等之語。陳順書是否即程順書。並著劉長佑查明具奏。教匪恃其險阻。拌死抗拒。僧格林沁現督令各軍環山築壘。該匪糧食將盡。勢必乘隙圖竄。該大臣尤應密飭各營將領嚴防竄逸。仍一面激勵諸軍。用間用奇。設法力拔賊巢。以收聚殲之效。將此由六百里諭知僧格林

沁、劉長佑、閻敬銘。並傳諭恆齡、蘇克金知之。○又諭都興阿、富明阿奏師船移赴下游防堵。並撥礮解赴臨淮一摺。據奏金陵上游楚師聲威已壯。現在滬軍水陸攻剿江陰下游一帶。亟宜水師聯絡。並探知丹陽等處逆眾紮成木陣甚多。有圖犯太平洲之勢。各處港口甚為喫重。飭梁正源將所部船隻分撥下游各港口駐泊。吳全美親督礮划。周歷各口上下嚴防。又派李起高等各船聯絡上海。相

機助勦所籌均妥。著卽督飭該鎮將等認真梭巡。遇賊卽擊。不得任令北度。現在南岸江陰一帶。屢添悍賊。該處江防不甚嚴密。恐其乘隙竄突。擾及裏下河完善之區。吳全美總統水師。聞其並不十分得力。該將軍等務當隨時查察。軍令是否嚴明。所部水勇人等。是否足資倚靠。儻虛應故事。不能得力。或仍有縱勇滋擾情事。卽應隨時奏請更換。毋稍姑容。江防各口。與裏下河處處可通。尤應嚴加

防範。前有渡江遷徙難民。不免游匪涸跡。屢經諭令嚴加查察。未知前此已渡難民。作何安置。近聞髮逆句合江北教匪為內應。乘隙思逞。其髮逆雜髮易服。潛伏江北者甚多。都興阿、富明阿與吳棠。惟當各以地方大局為重。嚴飭所屬營員及地方官。不動聲色。實心實力。查拏奸宄。不可稍萌退諉之志。如內奸不清。釀成變亂。惟都興阿、富明阿、吳棠是問。臨淮軍情緊要。都興阿所擬礮船。卽令管帶

之員迅速駛往。是為至要。將此由六百里各諭令知之。○撥察哈爾備調馬一千匹。解往欽差大臣僧格林沁軍營備用。○辛未。諭議政王軍機大臣等。沈葆楨奏都湖踞逆。經官軍痛勦。遁出江境一摺。逆匪麇聚都鄱等處。窺伺江右腹地。經沈葆楨督飭江忠義等軍奮力勦擊。匪勢敗潰。偽祐王奔竄建德各隘口。逆酋紛紛竄遁。江境一律肅清。辦理甚為得手。現在賊眾被勦窮蹙。謀遁回石太。再從

徽屯以窺婺樂。江忠義擬紮東流。劉典已派隊入徽。惟祐逆尚擁眾數萬。盤踞建德。必須悉數殲除。方無後患。著曾國藩、沈葆楨飭令江忠義等跟蹤擊勦。以勦為防。務將此股匪徒殄除淨盡。並將石太等處股匪一律掃蕩。乘勝東下。以免後顧之憂。池州防務緊要。曾國藩嚴飭該處守將協力防勦。毋任再行狂竄。左宗棠卽飭劉典一軍出羊棧嶺會擊。毋令闖入徽境。彭澤等處餘匪。沈葆楨派隊挖

勦皖境擊勦得力。難保各匪不鋌而走險。仍圖回竄。該撫須嚴扼江防。督飭地方文武員弁。竭力固守。毋稍懈弛。俟此股匪取全行殲滅。劉典一軍。仍當駐徽防勦。以顧浙境。曾國藩卽將江忠義李榕諸軍酌量派赴金陵。交曾國荃調遣。以厚兵力。將此由六百里各諭令知之。○以江西湖口都昌勦匪獲勝。全境肅清。賞按察使劉典總兵官黃仁遺白玉搬指煙壺各一箇。大小荷包各一對。總兵官權

光燦副將林志金。一品封典。提督江忠義黃馬褂道員段起副將丁義方蔡康業顧雲彩參將劉光裕巴圖魯名號餘加銜升敘開復有差。予陣亡知縣張寶鑑都司李棉非張時雨千總何潤桂等祭葬世職加等。千總艾平輝等祭葬世職。李棉非張時雨並建專祠。陣亡弁勇一併附祀。○予江西堅山陣亡守備張儀卿等祭葬世職加等。○予河南洛陽等處殉難千總王世貞等紳民婦女五百五十

三員名口分別旌卹如例。並予建祠。○壬申頒賞王大臣暨內廷翰林各省督撫。

文宗顯皇帝御製詩文集各一部。○諭議政王軍機大臣等。吳棠奏蒙城皖軍撤動。現籌防勦情形一摺。據稱唐訓方以臨淮被圍緊急。飛調馬新貽全軍赴臨助勦。擬飭姚廣武英翰駐防蒙城。惟姚廣武一軍尚應兼顧徐宿。該漕督現飭艾憲銀一軍專顧徐宿一帶。勦辦捻匪。而以姚廣武一軍為遊擊之師。回駐候圩。視蒙城徐宿何路有急。卽援何路。其蒙城城守事宜。請飭英翰入城駐紮等語。所籌不為無見。現在蒙北餉道雖通。而城圍未解。姚廣武一軍雖不能入駐蒙城。該漕督仍當飭令妥為策應。一有緊急。卽當飛速馳援。毋得顧此失彼。至馬新貽現已調赴臨淮。其英翰一軍。應否令入駐蒙城之處。並著唐訓方妥籌調遣。以資守備。昨據僧格林沁奏教匪盤踞紅山黃國瑞一軍堵勦東面。擬難抽調。

擬俟教匪殲滅卽飭該總兵統軍赴皖等語黃國瑞之軍旣難剋期赴皖其蒙臨戰守事宜卽著唐訓方仍就現有兵力竭力堵持毋稍疏失以待援師將此由六百里各諭令知之○癸酉諭議政王軍機大臣等張之萬毛昶熙奏肅清亳北匪寨追擊竄捻進剿老巢一摺官兵自埽平盧廟捻圩後副將黃貴誠復會同亳州知州李文森收復吳廟口寨並將吳各拉寨克復王廟及王大莊兩寨陸續投誠都司王鳳山復攻破劉大莊寨權家寨附近楊廟寨等處因捻首遠遁俱各投誠辦理尚屬得手惟亳北捻圩眾多肅清非易該匪黨等兵去則聚眾滋事兵來則相率投誠習為故常難保不於撤兵後又形反覆毛昶熙務當辦理妥實隨時防範並飭飭令地方官及帶兵將弁實力稽查責令投誠寨首將捻眾黨與及素不安分匪徒按名舉出悉數正法以杜後患巨捻張總愚程二老坎等糾

集白龍王廟等處數十集捻眾由亳南竄入太和縣境有西趨陳州之勢黑旗股匪復欲隨後出竄豫省東南邊防尤形喫重著張之萬毛昶熙卽行嚴飭陳州在防文武會合兵團齊心堵禦並飭總兵張曜等會同孫之友等馬隊兩面夾擊痛加剿除毋任匪蹤闖入豫疆致腹地又被蹂躪亳州東南一帶賊寨甚多卽著毛昶熙督飭總兵趙鴻舉統帶各營扼要進剿毋令復行出竄致與前股會合並將該處捻巢次第埽蕩以期進擣雉河集等處老巢毋稍鬆勁將此由六百里各諭令知之○又諭總理各國事務衙門奏勘分西界事宜無可再議現在籌辦情形一摺前據常清奏俄國因分界未定闖卡尋釁撲壓營盤業經開礮等情並有揚言攻取索倫沙岡再取喀什噶爾及繞入伊犁城情事該國似此強橫自應早為完結以免釀成事端且俄國帶兵前來經總理衙門面加詰責再三辯

駁該公使以實因邊界未能早定恐該地民人滋事是以派兵彈壓委無自恃之意等詞照覆其言尚為遜順著明誼明緒酌量各該情情形會同該國分界使臣准照該使臣議單妥為辦理一面即照會該國西悉畢爾約定勘界日期以安邊境如該夷仍在各邊卡尋釁滋事即著常清錫霖廣鳳奎昌等告以現已由總理衙門知照明誼等准照該國使臣議單辦理以免再生釁端並著常清行知

喀什噶爾及各城大臣一體妥為照辦俾釋猜嫌此等辦法本屬事不得已惟已分入該國之哈薩克布魯特人等該國如何安輯其仍隸我界之哈薩克人眾及烏梁海蒙古等如何安插羈縻勿失其心並應於分界時妥立一切章程以期久遠相安之處即著明誼明緒等詳籌妥辦毋稍疏漏總理各國事務衙門原摺並照會三件均著鈔給閱看將此由六百里各諭令知之○盛京將軍玉明等

奏查明錦州黑地五十五項有奇請照例升科從之○以翰林院侍讀梁肇煌署日講起居注官○以勞績卓著予河南知州張桐以知府用並賞花翎○甲戌諭內閣僧格林沁奏教匪滋擾地方荒廢地畝請移民認墾等語所奏甚是山東白蓮池教匪滋擾有年經僧格林沁等督軍勦辦將該匪盤踞各山寨一律鏟除所有附近之鄒滕等縣各處居民人等或被匪勾結入夥或避難他處田疇多

致荒蕪亟宜變通籌畫以冀民間各安生業其有原業主者著各地方官查明給領毋得任聽胥吏藉端勒指其實係逆產及無業主之田著閻敬銘飭屬確切履勘一律入官至曹州府連年黃水漫溢處所沿河兩岸各州縣被災窮民無業可歸者人數不少殊堪憫惻著閻敬銘即飭該地方官出示曉諭如願遷移認墾即赴各該州縣報明由曹州府移送兗州等府發交縣縣安置照戶丁多寡撥

給田畝開墾認種務派廉明守令經理不准假手吏胥致生抑勒諸弊並加恩免租二年俾蘇民困以副朝廷軫念窮黎惻隱在抱之至意○諭議政王軍機大臣等僧格林沁等奏攻克教匪山寨生擒首惡及撥兵馳援蒙城一摺覽奏欣慰僧格林沁自攻克淄川移營勦辦教匪甫經弔月即能埽穴擒渠肅公迅奏現復移師東昌督勦宋逆實屬不辭勞瘁忠勇可嘉著卽會同劉長佑督飭恆齡蘇

克金保德丁寶楨等將宋景詩股匪一鼓殄除以便統師南下教匪頭目宋繼朋李九等已就駢誅此外或不免有餘匪潛匿著咨令閻敬銘督飭地方文武各員認真搜捕國瑞帶兵暫駐鄒縣搜捕餘匪該大臣當令實力辦理毋令餘燼復然致貽異日之患本日據唐訓方奏苗逆於淮河兩岸增壘塞河前敵運道竟無一綫可通該撫不得已將水陸各軍撤退兵勇傷亡甚多困敝之餘非大為休

息不能再戰現恃舟師為犄角僅能力保老營而南之鳳陽北之蒙城賊勢仍復滋蔓臨淮危急更甚於前請飭僧格林沁派令陳國瑞援蒙都興阿派兵赴援臨淮張曜進兵潁上各等語本日雖已諭令都興阿撥兵赴援而江防甚緊能撥與否尚未可知又適據張之萬奏張總愚糾集程大老坎李庫等捻股竄徧汴城張曜回軍援應亦難前往現在僧格林沁已令陳國瑞帶兵三千餘名赴皖著卽督飭該總兵星夜前進以壯臨淮聲勢所有該總兵一軍應行駐紮何處攻打何路已諭令唐訓方妥籌調度仍著僧格林沁飭令該總兵聽候唐訓方指示奮勉圖功惟此時皖北情形萬緊非陳國瑞一人所能奏功該大臣於北路肅清後卽應迅速南征用申天討唐訓方摺著鈔給閱看將此由六百里諭令知之○又諭僧格林沁奏被匪滋擾荒廢地畝請分別招致災黎認墾並籌辦善後各

等語。山東白蓮池教匪。連年肆擾。蔓延兗沂兩屬之鄒滕費等縣。現經官軍削平。而附近居民或被匪勾結。或遷徙他處。田疇荒蕪。地勢甚廣。該大臣請將曹州府一帶被水災黎。出示招徠認墾。使災民既得有生業。而於地畝亦不至曠廢。所籌甚為妥善。著閻敬銘迅即遴派公正妥員。詳細履勘。具有原業主者。由該地方官即行出示給領。令安生業。儻不肖胥吏藉端抑勒需索。或無業莠民蒙混冒

領。必須查明嚴禁。以免擾累。如該地方官不能認真辦理。致有前項情弊。即著指名嚴叅懲辦。其實係逆彥及無業主之田。即著按照該大臣所擬。由曹州府知府出示招徠。該處被水災黎遷徙認墾。並著該署撫嚴飭各屬實力奉行。次第辦理。務使實惠均霑。有利無弊。方為妥善。至白蓮池四面皆山。為各縣犬牙相錯之地。雖經僧格林沁殲除首惡。掃蕩羣醜。尚恐有餘匪逃匿他處。沂屬民風向多

獷悍。亦恐零星幅匪暗中勾結。現在僧格林沁督師勦辦宋逆。深慮大軍撤動不逞之徒。仍復生心。儻辦理不善。死灰再令復燃。關繫誠非淺鮮。著閻敬銘酌派武員弁認真搜捕。以清餘孽。白蓮池勢極險要。或酌撥官職較大武員分營駐守。以資彈壓。並著妥議具奏。僧格林沁勦平宋逆。即統師南下。一切戢暴安良。辦理善後各事宜。即係該署撫專責。務須悉心經理。以副委任。各該地方官能否

得力。亦須留心察看。如或不克稱職。即著奏請更換。毋稍瞻徇。僧格林沁片著鈔給閱看。將此由六百里諭令知之。○又諭僧格林沁奏請飭催各省協餉等語。現在僧格林沁勦辦東匪已竣。擬即統兵南下。勦辦苗逆。該處人眾地寬。必須招募勇丁。及添製軍火。以利攻勦。所有餉需。亟應寬為籌備。該大臣奏請河南每月仍解銀三萬兩。山西每月仍解銀二萬兩。著張之萬、英桂按月如數撥解。毋得

稍有遲延致滋貽誤其山東省月餉欠解無多刻下各匪均已翦除地方漸就肅清著閻敬銘自八月分起於協餉三萬兩外添撥銀二萬兩迅速解赴該大臣軍營以資接濟將此由五百里各諭令知之○又諭唐訓方奏送眾阻塞河道前敵糧盡突圍而出現飭水陸各軍力保臨淮情形萬分危急一摺臨淮為皖北屏蔽關繫甚重苗逆注意於此計甚狡毒必須竭力固守方可沿長淮南北次第進兵翦除苗逆本日據僧格林沁奏業經調派陳國瑞一軍前赴蒙城援救著唐訓方派員迎催赴皖並著該撫酌度緩急何路喫緊即派該總兵前往攻剿至僧格林沁移紮東昌勦辦宋景詩股匪一俟削平後即親督馬步全軍南下頃據張之萬奏捻首張總愚等由鹿邑竄至太康扶溝縣屬通許尉氏縣境亦有賊蹤且苗沛霖有密約該捻潛襲汴城之說是張曜一軍為所牽掣勢不能徑趨潁

上雖經諭令都興阿酌撥數營赴臨亦慮緩不濟急必得就近一支勁旅會同臨營夾擊方可迅速奏功前據曾國藩奏李世忠愧悟漸生頗知斂抑該提督以五河為臨淮後路儻苗逆下竄誓必決一勝負等語李世忠失陷二浦朝廷不加嚴譴原冀其感激奮勵賊自效該提督前派總兵朱元興帶兵千五百餘人來臨助剿是其志切同仇力顧大局尚屬奮勉可嘉著唐訓方即檄飭朱元興督勇由劉府一帶進剿附近苗圩以牽賊勢李世忠既欲出力報效與其駐勇五河專俟賊至何如督飭所部由五河星馳前進以拯臨淮之急並著曾國藩即行剴調該提督迅速進兵毋稍遲誤記名運使李元華前據吳棠奏請調營差遣該員曾否赴吳棠軍營如在六安本籍或飭令招集舊日團勇進紮潁上或陽攻下蔡亦足以牽制苗逆使其回顧並著曾國藩等酌量辦理曾國藩接奉此旨

後察看李世忠近日情形。如果私仇公憤發於至誠。即將此旨摘錄傳諭。並須坦白相待。使之不疑。令其知感。知愧。樂為我用。李世忠是否可資其力。此旨可否摘錄傳諭。並著曾國藩酌量辦理。隨時覆奏。將此由六百里加緊各諭令知之。○又諭唐訓方奏臨淮危急。請速派兵援救。張之萬奏捻竄太康扶溝等縣。擾及通許。逼近省垣。調兵兜剿。各一摺。苗沛霖於淮河兩岸增壘塞河。前敵運道竟無一綫可通。據唐訓方奏不得已將進攻懷遠水陸各軍撤退。兵勇傷亡甚多。困敵之餘。非大為休息。不能使之再戰。請飭僧格林沁派令陳國瑞馳援蒙城。張之萬飭張曜速進。潁上都興阿分撥數營救援臨淮。本日據僧格林沁奏攻克教匪山寨。生擒首逆。已令該總兵帶兵三千餘名馳援蒙城。當諭該大臣催令星速前進。惟臨淮軍情如此緊急。迫僧格林沁之軍因回勒宋景詩一股未能全隊啟行。

兵力尚覺單薄。此時江北防務雖屬緊要。而臨淮亦為皖北關鍵。都興阿等能否於揚防抽撥數營前赴臨淮助剿。著即妥籌一面派撥一面具奏。裏下河之防。必須處處嚴密。並著會同吳棠飭所屬文武各員認真防範。吳棠仍當嚴飭姚廣武等實力會剿。不得稍有退縮。如有就近可撥兵勇。並即趕緊派撥臨淮軍餉。當源源接濟。毋令譁潰。諒吳棠必能力顧大局。記名運使李元華曾否到營。若令招集舊日團勇。由六安進紮潁上。亦可以牽制逆練之黨。使之反顧。則蒙懷可以稍鬆。本日已諭曾國藩酌辦。並著吳棠酌量辦理。毫捻由鹿邑邊境西竄太康扶溝等縣。擾及通許。逼近省垣。張之萬已派都司連美等進紮通許。並知會毛昶熙派兵抄擊。力扼西北兩路。飛檄張曜督所部由陳州探蹤進剿。所籌均妥。即著毛昶熙迅派得力將弁挑選馬步精銳。星夜取道鹿柘。抄出賊前。迎頭截剿。並

會合張曜等兵實力夾擊就地殲除毋任北
犯汴垣空虛張之萬當督飭司道等辦理防
守事宜惟守郭不如守險該撫現帶兵旋省
恐各軍因而懈怠仍當駐軍扼要之地以鞫
為防毋令直徧省垣方不至有疏失唐訓方
所請令張曜進紮潁上之處俟此股擒匪勦
辦完竣即令相機進紮以牽苗逆之勢將此
由六百里加緊各諭令知之○欽差大臣僧
格林沁奏請飭已革直隸總督文煜已革直
隸按察使孫治調赴軍營差委允之又奏總
兵官黃國瑞呈請歸宗復姓為陳國瑞如所
請行○以山東攻克白蓮池匪寨殲斃首逆
宋繼朋欽差大臣僧格林沁得旨嘉獎賞已
革侍郎國瑞御前侍衛並白玉搬指一箇翎
管一支大小荷包各一對總兵官陳國瑞頭
品頂帶都司李福巴圖魯名號守備趙世良
花翎縣丞趙鍾驥等藍翎餘升敘有差○以
山東白蓮池勦賊奮勇復已革副都統德楞

額已革協領富和職德楞額仍下部優敘

大清穆宗繼天開運受中居正保大定功聖智
誠孝信敏恭寬毅皇帝實錄卷之七十四

大清穆宗繼天開運受中居正保大定功聖智
誠孝信敏恭寬毅皇帝實錄卷之七十五

臣等謹將本年內各款恭摺具奏

臣等謹將本年內各款恭摺具奏

臣等謹將本年內各款恭摺具奏

臣等謹將本年內各款恭摺具奏

臣等謹將本年內各款恭摺具奏

款修

同治二年癸亥八月乙亥朔

上詣綏履殿問

慈安皇太后安平安室問

慈禧皇太后安至甲辰皆如之○諭內閣劉長

佑奏分別舉劾守令各員以示勸懲一摺除

單開保薦各員另行存記外直隸灤州知州

祁之鐸閹茸無能鹽山縣知縣李景沆聲名

狼籍撤任武強縣知縣葛鳳竹任性妄為候

補直隸州知州多壽性情暴戾候補知縣谷

洪德性情乖張均著革職清豐縣知縣存誠○

才短性偏著改為教職歸部選用撤任任邱

縣知縣沈廷柱遇事顛預著以縣丞降補候

補知府景桂聲名平常著以同知降補○黑

龍江將軍特普欽奏遵派官兵五百三十四

員名交副都統善慶統帶赴豫防剿已於七

月二十五日全數出境報聞○改直隸丁憂

廣平府知府余承恩為署任仍留營勦賊○

旌表守正捐軀河南榮澤縣民女胡巧姐○

上以祭

社稷壇自是日始齋戒三日○丙子諭內閣兵

部奏遵議京城地面馬匹不准外間採買一

摺各直省軍營需用馬匹例應赴口採買至

京城地面馬匹無多且非產馬之區向無准

令外間採買之例第恐日久禁令稍疏各路

軍營委員或有於近畿地面採買者甚至有

私販影射等弊亟應嚴行禁止嗣後京城地

面馬匹概不准外間採買以符舊制該部即

嚴行申令行知各該地方官一體遵照辦理

其各路軍營採買馬匹委員著令赴部領票於出口時由該部行知步軍統領衙門順天府查照如採買經過地方查無兵部文票卽照私販馬匹例辦理以杜弊混○諭議政王軍機大臣等王明奏敬查

永陵神樹端斜情形請派大員敬謹勘辦一摺本日已降旨派基溥阜保馳驛前往會同王明敬謹勘辦矣

永陵神樹斜壓

殿宇樹根露出土外帶動

寶頂南面脫落情形重大風水攸關該將軍現飭關防等官暫以龍席將

寶頂南面敬謹遮護嚴緊並將神樹柱木迎護惟現在節候未屆秋分天時尚暖難保無復經風雨之時該將軍務宜督飭關防等官隨時留心加意防護毋稍疏忽現在該將軍業已起程折回盛京著俟基溥阜保馳抵奉天後卽行會同恭詣

永陵敬謹查勘設法辦理務臻妥善將此諭令知之○又諭左宗棠奏石太股匪竄入黔縣官軍迎剿獲勝並奇田土匪滋擾勦辦事竣李鴻章奏永陸官軍攻毀太湖賊營進偏蘇城並進攻江陰各軍連獲勝仗踴躍平附城賊壘其松江嘉興交界之楓涇鎮賊壘亦為官軍攻破各摺片沈葆楨前奏江境一律肅清曾經明降諭旨宣布寄諭曾國藩左宗棠沈葆楨以由江境遁去之賊謀欲遁回石太再

從徽屯以窺婺樂祐逆盤踞建德衆尚數萬飭令速派江忠義等卽由江境跟蹤追擊以剿為防並將石太等賊一律掃蕩乘勝東下左宗棠卽飭令劉典一軍出羊棧嶺會同勦擊毋令闖入徽境此時江忠義當已進紮東流將彭澤餘匪埽除進剿遁回石太之賊劉典之軍入徽後亦可出嶺會同勦擊以清皖境仍駐徽防以與浙軍相為援應池防穩固此股由江回竄之匪不得肆其竄突東征各

路之軍方無後顧之虞。李榕江忠義兩軍將此股敗匪殄除之後，並即可乘勝東下歸曾國荃調遣，以厚兵力。著曾國荃、左宗棠仍遵前旨安速辦理，一面咨照沈葆楨仍嚴督江省各軍及地方文武嚴密守備，毋稍懈弛。李鴻章偕同李朝斌自滬至蘇，巡歷布置太湖大缺口各賊營，已破程學啟各營進逼蘇城之婁門葑門。江陰進剿之劉秉璋等各軍亦將城東北門外之賊壘攻奪，所辦甚為得手。

蘇城雖大，而賊勢既感。程學啟一軍偏其東南，李鶴章、劉銘傳等軍規其西北。李朝斌水師往來遊擊，足資得力。現在官軍已分路進至江蘇腹地。曾國藩當檄飭進攻金陵之軍迅速合圍。左宗棠即可檄飭由富陽進剿諸軍銳意進取，牽制賊勢，俾蘇州、江陰等城或有一處得手，則江浙全局必能日有起色。奇田土匪辦理尚為妥速，浙東新復各屬地方奸宄藏匿恐尚不少，著左宗棠隨時嚴查，飭

令各屬於撫輯之中，妥為擒捕，毋使伏戎潛行滋蔓。將此由六百里各諭令知之。○又諭閻敬銘奏馳抵博平並催軍赴堂邑剿匪情形一摺。閻敬銘由省城馳抵博平，派令副將范正坦等各營分紮沿河上下。李海務等處總兵保德、臬司丁寶楨等軍在楊家莊並堂邑之定遠寨溫儀集梁家淺地方將打糧焚掠之賊擊退，並擊敗盤踞馬橋等處匪徒，其撲犯柳林圍營之匪亦經各團勇夾攻殲斃。

多名官軍復將王家海子賊圩攻破。著閻敬銘即督飭所部各營擇要布置，與保德等軍互相策應，並與劉長佑各軍約期大舉節節進剿。迅將宋景詩股匪掃除，毋稍延緩。現在秋禾業已收割，僧格林沁已掃平紅山股匪，移軍東昌。保德于寶楨各營屢獲勝仗，劉長佑正宜乘此機會，迅督所部滾營前進，聯絡僧格林沁，閻敬銘諸軍，速將宋逆殲除，毋得游移遷延，致誤事機。將此由六百里各諭令

知之○又諭閣敬銘奏請飭催山西河南欠餉等語○東省捻逆教匪漸次肅清僧格林沁卽擬移師南征若不速為籌備不但行糧無著不能剋期成行且瞬息深秋禦寒無具尤慮軍心渙散貽誤戎機著張之萬英桂迅將同治二年六月以前欠解協餉先行各撥銀十萬兩解赴濟甯糧臺豫備南征之用將此由五百里各諭令知之○又諭郭嵩燾奏續陳廣東大概情形一摺據稱廣東目前切要

之功以整飭軍務為急該省高州信宜之匪肇慶土客之變兇鋒日張兵勇積習勇於犯上而怯於臨敵勢難久持必須軍威稍振民氣稍固而後可次第清釐吏治興裕餉源該省富民太著外強中乾民氣日囂盜風滋熾擬先收回利權止儘京餉及江南大營軍餉盡力籌解其餘一切在廣東籌餉者悉與罷除藉以收拾人心消除亂本等語所籌於該省現在情形尚能洞悉原委言之確鑿毛鴻

賓前奏亦稱入粵以大振軍威為第一要著與該署撫此奏意見亦屬相符該署撫已擬於七月內交卸往滬航海赴粵此時諒已啟行卽著趕緊前進一俟抵粵後將軍務餉務吏治緩急輕重機宜與毛鴻賓悉心商酌和衷共濟次第整理以副委任毛鴻賓簡授兩廣總督已兩月有餘尚無奏報起程日期並著該督迅速趲程前進一面馳奏以慰廑繫將此由五百里各諭令知之○派吏部左侍

郎基溥戶部左侍郎阜保前往盛京會同將軍玉明恭驗

永陵工程○庫倫辦事大臣特克慎因病解職以正白旗滿洲副都統文盛為庫倫辦事大臣○以浙江克復金華府城暨肅清浙東出力賞副將王聯方參將劉明珍巴圖魯名號遊擊馬駿發等花翎千總朱光斗等藍翎餘加銜升敘開復有差予陣亡守備盧明亮等十六員祭葬世職加等外委王清雲等八十

六員祭葬世職○以浙江奇田土匪滋事革署知府韓承恩知縣劉蘭馨職予勒辦出力遊擊謝復雲等升敘陣亡同知希慶守備張招銀祭葬世職○予江蘇蘇州陣亡總兵官賴榮光祭葬世職加等建專祠遊擊龍玉鏐祭葬世職加等○予山東王家海子陣亡遊擊李芝芸祭葬世職童生周鴻儀賞卹加等○旌表守正捐軀山西崞縣民婦甯李氏○
丁丑祭

先師孔子遣大學士賈楨行禮○諭議政王軍機大臣等穆騰阿張集馨奏攻破附省要隘及水腰村等賊巢覆陳省城現在回情各摺片光泰廟賊巢業經攻破水腰上下等村亦一律平毀逆回餘黨竄在沙河玉河一帶曹克忠所向克捷現令副將陳開泰等軍屯紮光泰廟與多隆阿前敵營盤相對止隔一河即可進逼沙河與多隆阿前奏情形尚合光泰廟回巢既克據張集馨等奏省城危局

漸鬆其半閭村曾否攻入高陵進剿是否得手沙河玉河之賊曹克忠一軍能否次第殄除均著多隆阿乘此聲威嚴督各軍迅圖攻剿鳳岐被圍已久聲息隔絕未知刻下是何情形馬德昭受傷是否痊愈曾否帶兵起程甚深塵繫雷正綰馬德昭究竟何員可以統兵赴援鳳岐著多隆阿懷遵前旨速飭分投前往毋再遷延甘省平涼固原兵力單微勦辦極難為力並著多隆阿豫為籌畫迅速分

布穆騰阿於省城防務責任綦嚴張集馨暫署撫篆亦屬責無旁貸不得一切粉飾將就致蹈瑛榮故轍馬德昭一載以來於戰守事宜尚稱得力此時曹克忠之軍可以專力城內外防剿馬德昭自可前往西路與雷正綰之軍分投布置此等機宜仍著多隆阿酌量定奪回員馬百齡仍著張集馨設法鈐制隨時防範毋稍疏忽省城回民仍安為安輯儻令搖惑致生事端或稽察鬆懈有與逆回勾

結等情。必惟張集馨是問。將此由六百里諭知多隆阿、雷正綰、穆騰阿、馬德昭並傳諭張集馨知之。○兵部尚書愛仁奏覆審員杜氏案尋鑒煒未便聯銜。得旨尋鑒煒隨同愛仁審辦此案。著照藩臬隨同督撫審案辦理。毋庸列銜。如有意見不符之處。仍著該御史單銜專摺具奏。○以陝西攻克附省賊巢。賞副將張在山、胡大貴、巴圖魯名號。參將雙德花、翎把總董達春等藍翎。總兵官曹克忠等加銜。升敘有差。革玩視軍務遊擊趙萬金職。○戊寅祭

大社

大稷遣睿親王仁壽恭代行禮。○諭內閣沈葆楨奏請將辦理它隄案犯姑息貽患之守令議處一摺。江西撤任臨江府知府單興詩於棍徒它毀晏公隄一案。前經沈葆楨飭令查拏重懲該員一味因循。致本年三月間匪徒復敢聚眾它隄。不能禁止。釀成巨案。撤任代

理清江縣知縣張興言聽信已獲要犯傅景藻等詭託之詞。放令前往阻止。它隄致該匪等乘間脫逃。均屬姑息貽患。僅予議處不足蔽辜。單興詩張興言均著交部嚴加議處。並著沈葆楨通飭所屬將傅景藻等各犯一體緝拏。務獲嚴行究辦。毋任漏網。○諭議政王軍機大臣等。劉長佑奏督軍滾營進逼壘獲勝仗一摺。直隸官軍在臨清南岸之舊縣于家樓地方趕築營壘。逆匪馬步更番撓撲。疊被擊卻。又分股竄至尖莊對岸。調馬橋一帶。意圖搶渡。經防河弁兵擊回。是防勦情形漸次得手。惟該逆股數眾多。詭詐百出。飄忽靡定。該處地勢平行曠闊。尤易旁竄。非四路邀擊不能制賊。死命劉長佑現與江長貴等軍築定新壘。移營進逼。恆齡蘇克金亦各督所部馬隊分路追擊。王榕吉等嚴防河岸。遏其紛竄。所籌尚妥。著即會同各軍實力進勦。並著扼要設伏。防其奔突。閻敬銘已抵博平。所

派各軍調赴堂邑與保德丁寶楨等所統兵勇合隊擊賊直東各軍已暫聯絡僧格林沁勒平教匪後親督舒通額等馬隊馳抵東昌諸軍更有統屬著即督同直東各將弁遇賊即擊先將四面股匪次第殲除然後大舉合圍迅攻老巢將首要逆匪悉數掃除以清畿輔劉長佑閻敬銘亦當激勵將士恪遵調度以期同心勦力迅奏膚公諒此區區小醜不難剋日蕩平也將此由五百里各諭令知之

○又諭馮子材等奏南路大股援賊糾合丹陽各匪撲犯鎮防官軍分投迎擊獲勝相機堵剿一摺現在圍攻金陵水陸官軍正期得手該逆糾黨撲犯鎮防自係為援應金陵牽掣我師起見馮子材等現已飭總兵田宗揚等督率馬步各軍分投迎擊著即督飭該總兵等奮力堵剿務將此股內犯各匪亟圖肅除毋令紛竄以致我師為所牽制北岸沿江一帶嚴防竄越固不可稍涉鬆勁惟南岸賊

匪屢圖撲犯鎮防莫思一逞刻下揚防稍鬆都興阿務須與南岸各軍聯絡一氣如鎮防有警即抽撥水陸官軍渡江助剿以壯聲威將此由五百里各諭令知之○又諭恩麟奏西甯花寺臨洮回民糾眾相持派馬奎源等前往解散並擬用蒙番幫同漢民籌辦暨軍務喫緊請飭催何勝必督兵援甘馬德昭迅解平涼之圍及成瑞勸諭出力懇請量予減等各摺片西甯花寺臨洮兩教回民聚眾爭

鬪旋復糾約戎屬撒拉幫助肆行攻擊湟屬地方騷然而丹噶爾境內被擾情形尤重亟應乘其釁端初起趕緊解散以免燎原原任參將馬永泰之妻也氏及其子馬奎源既據恩麟奏稱素為回教信服飭赴西甯解釋紛爭即著玉通督同道員雅爾佳納責成該頭人認真妥辦儘能奮勉出力安靖地方准由熙麟等據實請獎至護西甯道郭襄之從前籌辦善後事宜已據稟報歲事何以此次回

民又因爭教仇殺。可見該員所辦均係紙上空談。一味粉飾。著照麟恩麟查明參奏。青海蒙番向與丹噶爾漢民往來。而貴德巴燕戎格兩廳番族素與撒拉有隙。恩麟現在咨商玉通。檄為我用。固可藉壯聲威。惟番族素性獷悍。蒙兵亦未見得力。儻非萬不得已。自未便借資他族。致滋流弊。玉通務與恩麟隨時妥商設法籌辦。毋稍輕率。狄河之案甫經寢息。而安定皋蘭金縣三處交界。又有刦殺。附近回莊之事匪類心志最齊。難免不圖報復。恩麟現派成瑞等相機彈壓。一面增軍募勇。於近省各要隘安營駐紮。以定人心。卽著恩麟認真妥辦。毋稍疏虞。其派出彈壓委員。務令實心勸導漢民。事事持平。不可輕舉妄動。致釁隙一開。不可收拾。成瑞獲咎甚重。現雖勸諭回眾。尚知出力。而甘省軍務未竣。豈能遽為乞恩。懇免死罪。著俟甘省軍務大定。再行請旨定奪。儻該員或敢因此始勤終怠。自

外生成。卽著照麟恩麟等據實奏聞。或在軍前正法。或解送刑部從嚴懲辦。不得稍有瞻徇。恩麟奏狄河漢回械鬪。委員查辦。兩造具結解散。地方安定。惟三十六會人數眾多。良莠不齊。而漢民中無賴之徒。禦侮不足。挑釁有餘。恩麟仍當嚴飭在事員弁。嚴密稽查。秉公安辦。不得稍涉大意。將此由六百里諭知。恩麟玉通並傳諭恩麟知之。○又諭恩麟奏甘省庫款匱竭。請飭催前撥餉銀。以拯危急。一摺。甘肅地處邊瘠。全賴各省協撥餉項。以充軍食。現值逆氛四起。添兵募勇。需費尤多。若各該督撫將部撥解甘之款。藉詞延宕。設或兵丁困苦。不堪譁譟滋事。於邊陲重地。甚有關繫。該督撫等自應通籌熟計。顧全大局。著駁秉章督飭藩司。無論何款。迅將原撥銀五萬兩。剋期解往。並著英桂酌提山西暨河東道銀四十五萬兩。陸續派員會同該省委員星速起解。毋再遲延。致誤要需。至山東河

南二省欠解協甘餉銀為數甚鉅甘省庫款萬分拮据該撫等豈容坐視不顧仍著閻敬銘張之萬遵照前旨迅速各撥銀數萬兩派委妥員趕緊繞道解赴甘省其山西山東河南積欠甘餉並四川省應解伊犁兵餉仍著源源籌解以拯危急毋許延誤將此由五百里各諭令知之○又諭憚世臨奏黔匪髮逆同時竄逼楚邊現在分籌防剿一摺李幅猷以石逆死黨擁眾萬餘欲勾結包逆合謀竄

楚不可不嚴為之防著憚世臨即飭派出將弁會同地方文武各員認真堵剿不得任令狂竄賂秉章前派劉嶽昭追剿李幅猷股匪此軍現抵何處著即飭令跟蹤追躡會同楚省兵勇兩面夾擊務令就地殲除以期一勞永逸該逆既有窺楚之意官文嚴樹森即派得力兵弁探明賊蹤所向迎頭擊剿毋令深入腹地黎平股匪雖經戈鑑出勦屢挫賊鋒漸次踰伏巢穴戈鑑即須移紮晃州難保該

逆不再出肆擾著勞崇光張亮基督令在防將弁認真堵剿楚軍出境勦辦黔匪現為李逆等牽掣勢不得不先顧本境張家寨匪股及孟溪上寨包逆老巢若有得力之軍直撲巢穴亦攻其必救之策勞崇光等務須抽調勁旅迅圖殄滅不得專恃客兵致多貽誤憚世臨甫任封圻值此邊境地方同時告警自當督同在事文武悉心經畫固不可稍涉大意亦不必徒事張惶總當仿照從前賂秉章

毛鴻賓辦法以圖久安疆圉本日據恩麟奏甘肅軍情萬緊請飭賂秉章令何勝必帶勇赴甘何勝必現已派赴漢南自不能再行赴甘而甘省鹽固逆匪久圍平涼南路清水泰安賊匪肆擾而西和伏羌等處回匪又復相繼竊發兵勇無多勢難兼顧亦屬實在情形著賂秉章酌量調派得力大員帶兵前往以極西陲毋稍膜視將此由六百里各諭令知之○又諭明誼奏行抵古城設法前進一摺

另片奏。哈薩克勾結俄兵來伊犁邊卡滋擾。並前赴塔垣。籌議分界各等語。前據總理各國事務衙門奏。勘分西界事宜。當經諭令明。誼。明緒。准照該使臣議單。照會該國。西。悉。畢。爾。定期會勘。現在明誼已抵古城。著即趲程前進。馳赴塔爾巴哈台。會同明緒。遵照前旨。迅即照會該國。西。悉。畢。爾。衙門。准照該使臣議單。分界。令其星速派員前來會勘。迅即辦結。毋致另生枝節。其分入該國之哈薩克布

魯特人等。及仍隸我界之哈薩克人。眾烏梁海。蒙古等。分別安插。羈縻之處。明誼。明緒等。務於分界時。與該使臣妥議章程。以弭邊釁。哈薩克台吉鐵色克。帶領俄兵。滋擾邊卡。實屬可惡。並著明誼等。斟酌妥協。設法將該台吉擒獲。究辦。以示懲儆。俾定界以後。該哈薩克人等各安邊境。不敢再行藉端搆釁。方為妥善。將此由五百里各諭令知之。○江西布政使李桓。因病解職。以鹽法道孫長紱為布

政使。○湖南按察使倉景恬。因病解職。以銜永柳桂。道兆琛。為按察使。○以安徽克復黟縣出力。賞守備唐榮貴等花翎千總潘玉貴等藍翎餘加銜升敘有差。○以江西彭澤力保危城。擢知縣趙宗耀。知府守備張宏亮。遊擊把總夏得元。守備夏得元。並賞藍翎。○以甘肅狄道河州解散械鬪。賞指揮使趙壇等花翎千總陸陞等藍翎餘加銜升敘。開復有差。○予江蘇鎮江陣亡千總張德明。祭葬。世

職加等。○己卯。以神靈顯應。頒陝西石泉縣關帝廟扁額曰威昭天柱。頒戶部扁額曰九式經邦。庚辰。遣官祭黑龍潭。

昭靈沛澤龍王之神玉泉山

惠濟慈佑靈渡龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神。○遣官祭圓明園

惠濟祠

河神廟○諭內閣曾國藩奏參貪劣不職之知縣請旨懲辦一摺同知銜署安徽廬江縣事候補知縣吳燮和於上年賊匪竄撲該縣辦理防守那用存倉米五百餘石經該督批准免其買補還倉報敢以重價捏稱採買含混報銷且敢藉端科派民間並私收畝捐錢米至二三千串之多實屬狡詐貪鄙甚為可惡吳燮和著卽行革職永不敘用仍勒追所收捐項令其按數清繳毋任延宕以為罔上

營私者戒○諭議政王軍機大臣等曾國藩奏近日軍情及吳棠奏皖疆危急請飭催北路援師攻懷南路六潁之師攻壽各等語據曾國藩奏曾國荃調蕭慶衍之軍已由江浦南渡分守要地惟湖口肅清之後江西羣賊東趨繞過池州進撲青陽縣城朱品隆所部未知能否堅守待援著曾國藩卽督催李榕江忠義席寶田各軍陸續前進趕緊赴援仍飭朱品隆竭力固守以待援師毋令稍有疏

虞致皖南全局復為震撼至所奏苗黨之踞壽州者踰伏未動其聚於懷遠者將普承堯等軍後路截斷糧運梗塞該督所派赴援水師各軍攻奪宋家灘賊划數十隻而河洲一壘未破前敵糧運仍為賊阻臨淮兵力過單殊少自全之策等語與唐訓方疊次奏報及本日吳棠所奏淮甸危急情形均屬相符唐訓方前奏前敵水師困於賊中龔文林等恐以資賊已將所領礮船全數焚毀病傷士卒

無一得歸情形萬緊茲據吳棠奏黃開榜現帶師船精銳已多損失不得已而退守恐賊水陸下竄臨軍勢且不支以為欲拯臨淮之急亟須生力一軍先由宿蒙直擣懷遠北路以攻賊所必救並須數道進兵使賊面面受敵方可以期得手等語所籌不為無見僧格林沁之軍勒平白蓮池教匪後該親王移師東昌合勒宋景詩一股已遣新請歸宗之總兵陳國瑞帶兵三千名赴援皖北卽著唐訓

方迎催令其速由蒙城痛埽逆氛進攻懷遠北路其六潁各楚師如蔣凝學毛有銘周寬世成大吉所部據曾國藩奏稱各駐要區防守尚穩惟遠防不如近剿著曾國藩速飭進攻壽州使賊不得專力撲攻臨淮臨軍復振自可與南北援軍三路齊力進擊俾賊疲於奔命以蹙其勢曾國藩身膺重寄責無旁貸此等機宜亟應隨時調度與唐訓方聯絡策應以求萬全總當於萬難籌措之中力籌援

應之策正在寄諭聞唐訓方奏報攻復長淮衛進營固守現在賊復趨重蒙城一摺唐訓方派令姚榮麒等乘賊不備進克長淮衛水陸進紮有此一戰賊鋒少挫惟苗逆詭譎異常知臨淮猝難動搖又以其移蒙圍懷之賊轉而圖蒙蒙城雖糧路已暢而賊勢又復趨重唐訓方兵力本單分防臨淮蒙城兩處中隔苗圩二百餘里馬新貽現已率王才秀之軍將胡家等圩攻破統由宿州以回臨淮蒙

邑僅有英翰等軍尤虞單薄陳國瑞由北路赴援正可迎頭將趨重蒙城之賊痛加勦洗著僧格林沁唐訓方即行嚴催陳國瑞之軍迅速進取毋失事機並著吳棠飭令姚廣武一軍與英翰等聯絡策應臨淮軍事稍鬆仍著唐訓方妥籌固守激勵諸軍與南北援師併力戰守以策萬全將此由六百里加緊各諭令知之○又諭唐訓方奏請飭湖南北騰那協餉等語臨淮軍情萬分危急若兵勇長

此飢疲不但譁潰堪虞且枵腹從戎何以禦苗練方張之寇亟應速籌接濟以拯飢軍而維大局著官文嚴樹森於各營協餉內量為抽撥成數每月協解臨淮餉銀二萬兩均按月臨亦設法籌措每月協解銀二萬兩均按月如數解赴唐訓方軍營以濟眉急將此由六百里各諭令知之○以故蘇尼特都楞郡王布達莽噶拉子那木濟勒旺楚克襲爵以安徽力保蕪湖金柱兩城隘暨克復灣沚黃

池出力賞總兵官萬化林從一品封典提督彭楚漢黃馬褂副將高得效參將傅家桂巴圖魯名號知府高兆麟參將胡逢春等花翎外委張榮得等藍翎餘加銜升敘有差○以不遵調遣降安徽軍營副將鄧萬林為都司並奪勇號○予江西湖口陣亡守備張儀卿千總汪春旺把總夏楚寅等祭葬世職加等

辛巳遣官祭

文昌帝君廟○諭內閣前因陝西漢南軍務緊要四川所派之道員張由庚總兵朱桂秋兩軍數月以來尚未出境湖北所派之道員梁作楫一軍亦復遲延未進降旨交部分別嚴議議處茲據該部奏請將張由庚朱桂秋降二級調用梁作楫降一級調用無庸查級議抵該文武員弁等於緊要軍情竟敢任意耽延不以國事為重卽照部議降調亦屬咎有應得惟現當援師雲集之際若將該員弁等各予降調轉得置身事外張由庚朱桂秋

著改為革職留任梁作楫著改為降三級留任卽著官文嚴樹森劉蓉等飭令迅圖剿賊立功自贖償再不知愧奮卽行從嚴懲辦○又諭前因陝西鳳翔岐山喫緊疊次諭令提督馬德昭帶兵馳救鳳翔並飭副將王夢麟進援岐山立解城圍嚴旨諄促不啻三令五

申乃本日據多隆阿等馳奏該提督接奉諭旨屢次枝梧或縱勇四鄉強拉牲畜名為運載軍裝實則勒贖售賣並欲特設行營糧臺添辦軍火車輦等項百般刁難藉詞推諉又稱賊撲城營或它地道指日進攻致令百姓疑懼其實並無其事六月十五日曹克忠攻克光泰廟逆巢疊催該提督派隊接應乃相隔八里堅執不前後因出營陞馬復又捏稱賊偏南關開槍馬蹶種種遲延捏飾殊出情理之外王夢麟現仍駐武功藉病請假耽延不前請分別懲辦等語馬德昭以一品大員受朝廷厚恩乃統兵一萬有餘駐省年餘之

久老師糜餉不殺一賊迨派援鳳郡又復畏
蕙遷延多方捏飾實屬自外生成大乖職守
甘肅提督馬德昭著撤去勇號拔去花翎卽
行革職交新任陝西巡撫劉蓉軍營差遣委
用儻再不知愧奮卽著從嚴懲辦候補副將
王夢麟進援岐山逗遛不進實屬庸懦無能
著卽行革職發往新疆效力贖罪不准留營
以示懲儆另片奏馬德昭隨營委員保舉知
州普林輕儇佻達慣造謠言候補州同張桐
鳴請補赤金營都司梁元倉隨聲附和阿訖
順從請一併懲辦等語普林著卽行革職永
不敘用張桐鳴梁元倉均著一併革職以上
三員並著逐回旗籍不准在陝逗遛滋事現
在多隆阿已進抵陝西省城卽著將馬德昭
所統各營嚴加整飭將除舊習迅掃逆氣以
副委任○諭議政王軍機大臣等有人奏州
縣重徵苛斂請飭查嚴辦各摺片據稱通州
知州葉增慶於奉旨蠲免之地丁銀兩並不

分晰張貼告示任令書吏一律滿收絲毫不
減並加票費常平倉每年例存黑豆一概不
收加價勒折制錢生員王衡九等赴州完糧
被役毆辱該州置若罔聞又大城縣因近來
兵差過境於例外增設一總保長名目藉辦
差為名苛斂民財凡官用物件皆取之於民
概以錢折昂於市價數倍並有土棍王金澄
等互相舞弊規費重重民生日感各等語州
縣為親民之官似此縱容書役剝削窮黎尚
復成何事體亟應查明嚴辦以靖地方著萬
青藜林壽圖按照所參徹底根究並立摺書
役土棍人等按律懲辦毋稍姑容原摺片均
著鈔給閱看將此諭令知之○又諭多隆阿
奏帶兵馳抵西安籌辦大概情形一摺多隆
阿已於七月二十二日帶兵馳抵西安省城
與穆騰阿張集馨等籌議省城內外防守情
形並將防兵老弱裁汰以節糜費所辦諒必
妥協現在渭河以南及附省一帶已無賊蹤

惟咸陽藍鄠等縣交界尚有零星賊匪出沒著卽趕緊派兵前往次第掃除並將省城布置周密卽行親赴渭北進攻高陵一經得手便可乘勢西指與雷正綰所部會合進取以期廓清全陝迅奏膚公甘省逆回四起固原未復平涼亦尚被賊圍熙麟坐守慶陽兵單餉絀不能有所展布恩麟近奏秦州所屬回漢尋釁西甯回教蠻觸相爭卽蘭州省城附近之安定等縣亦有械鬪之事總須陝省軍

威日振節節疏通方不至回氛勾聯一片現在鳳翔被圍日久官民力守望救尤殷近更聲息不通多隆阿所派之漢中鎮總兵陶茂林帶兵三千往解城圍卽由鳳翔西援平涼著卽飭令星速馳往不得再事遲延陝南軍務總未得手毛震壽甚不得力所奏艱難措拄等情似亦尚有可原劉蓉由川入陝尚未奏報起程川鄂兩省援師疊經嚴諭催促此時自可陸續前進多隆阿仍應遵奉前諭隨

時兼籌與劉蓉聲息相通以顧全局另摺片奏參馬德昭挾詐恣橫遷延畏葸各款本日業經明降諭旨照所請褫奪辦理瑛榮前為馬德昭愚弄固無疑義惟陝西紳士李宗沆等從前乞留馬德昭至再至三或盛稱其保障西安之功是以朝廷加之委任今據多隆阿奏參各情殊屬可惡馬德昭是何居心有無通回情事著多隆阿悉心察看酌量處置如解其兵柄後發往劉蓉軍營可資鈐束卽

著押令迅速前往毋許逗遛馬百齡一員亦卽遵前旨嚴加防範省城回眾相安務須妥為撫輯以定人心穆騰阿張集馨於省城防守事宜均各有責成務與多隆阿協力辦理多隆阿出省以後何員足資倚靠可以帶兵駐守省城並著多隆阿酌量一面調派一面奏聞將此由六百里諭知多隆阿雷正綰穆騰阿並傳諭張集馨知之○又諭麟興等奏請將調操蒙兵撤回各旗一摺據稱喀爾喀

西兩部落出派備操蒙古兵丁二千名自備口糧馬匹火藥鉛丸前往烏里雅蘇台附近伊奇濟斯並拜達里克兩處常川操練此項兵丁口糧等項係經屬下阿勒巴圖分攤資助四年以來積欠甚重兵丁窮苦異常請旨撤回本旗等語該兵丁調赴烏里雅蘇台藉資操防因欠餉過多苦累難堪自應量為遣撤以示體恤所有此項備操兵丁著准其裁撤歸旗並著明誼麟興車林敦多布飭令各扎薩克於兵丁歸旗後各就本旗勤加操演聽候調遣務飭訓練嫻熟技藝優長悉成勁旅以備隨時徵調將此諭令知之○又諭常清奏俄人刳營防勒獲勝請革退鐵色克項翎台吉並照料貿易園情形行文俄國各摺片文興奏烏什現籌防範等語前因總理各國事務衙門奏分界無可再議業於七月二十九日諭令明誼明緒約會分界使臣准照該使臣議單妥為辦理即照會西悉畢爾約

定勘界日期以安邊境並諭常清一體知照各城如俄人前來尋釁即以此事告知計常清此時尚未奉到諭旨茲據奏稱俄人與哈薩克向串在博羅胡吉爾地方排隊向我兵開放大礮火箭經我兵用擡礮擊退後復糾集黨與續來撲營我兵用槍礮拒敵殺賊將及百名賊雖受創敗去難保不增添醜類去而復來常清務當添派兵勇前往接應嚴加防範不可稍涉大意該將軍現飭帶兵各員號令兵丁來則禦敵去勿窮追辦法尚妥著常清即行遵照七月二十九日寄信諭旨辦理此次俄人稱兵實由哈薩克台吉鐵色克勾結前來滋擾實堪痛恨著即革去台吉並二品頂翎如再勾引俄兵刳營偷畜即著設法將其擒斬以快人心而除後患並激勵伊犁境內軍民同心禦侮以防俄人越卡闖入邊境毋稍鬆懈至俄國貿易園商人因心懷畏懼私走出卡僅留一人看守常清現經出

示禁止軍民騷擾並將該國尋釁及伊犁現辦情形咨行西悉畢爾措辭甚為妥協即著知照明諱錫霖明緒令該將軍等備悉情由轉告該國大臣破其詭譎釋其疑慮以期早息爭端至烏什地方與伊犁喀什噶爾邊卡均屬相連巴爾昌卡倫一帶俱係布魯特游牧之地與外夷接壤西山外布魯特等亦難保不心生覬覦與俄人勾結文興等現已選派弁兵豫為備禦著即謹守隘口嚴密防堵

並飭令回莊伯克及附卡布魯特等各守疆界毋任俄人侵越其喀什噶爾邊卡亦著景廉行知奎英隨時防範毋稍疏忽將此由六百里各諭令知之○山東巡撫閻敬銘奏軍務未竣請將同治元年軍政展緩辦理從之以大理寺少卿中常為內閣學士兼禮部侍郎銜○旌表守正捐軀四川鄰水縣民婦嚴汪氏○蠲緩山東堂邑著冠泗水朝城沂水蘭山聊城恩館陶臨清長清德平原泰安

新泰萊蕪滋陽甯陽滕嶧郟城費蒙陰莒日照博山邱武城茌平禹城鄆城臨邑陽信壽光夏津鉅野嘉祥濟甯三十九州縣被旱被風被雹被擾地方暨衛所屯田屯地新舊額賦雜課有差○壬午遣官祭昭忠祠○諭內閣英桂奏特參庸劣之道府知縣等官請分別休致降革一摺山西試用道陳景謨躁進輕浮不識大體難勝監司之任著以同知降補歸部銓選候補知府萬濟久病未愈年力

亦衰著以原品休致長子縣知縣劉世安辦事竭蹶難膺民社著以府經歷縣丞降補歸部銓選候補知縣王嶺剛愎自用行止不端著即行革職○以正藍旗漢軍副都統穆隆阿署正白旗滿洲副都統鎮藍旗滿洲副都統靈桂署正白旗蒙古副都統正紅旗漢軍副都統裕瑞暫署鎮白旗漢軍副都統正紅旗蒙古副都統奕貴暫署正黃旗護軍統領以陝西漢中鎮總兵官陶茂林署甘肅提

督○以捐輸馬匹賞扎魯特四品台吉蘇固都爾扎布花翎○追予山西垣曲陣亡道員張錫蕃入祀運城昭忠祠○癸未

太宗文皇帝忌辰遣官祭

昭陵○諭內閣前因耆齡奏廣東順德縣沙棍馬逢亨包充胥吏通同舞弊多置礙船霸占沙田等款當交羅惇衍等查辦旋據奏稱所參各款屬實復交兩廣總督徹底訊辦盡法懲處茲據晏端書奏稱查明馬逢亨沙坦均

係繳息承升控爭各案由佃丁互爭界址業經訊結尚無侵霸情事所設巡艇防護禾稻由縣結照循照定章辦理收買廢照包充胥吏各節亦均查無確據惟勞崇光保舉未免過優請旨撤銷各等語此案馬逢亨被參各款既據晏端書查明或事出有因或訊無實據卽著無庸置議惟馬逢亨前因捐貲募勇自派親丁隨勘廣西梧州股匪勞崇光保奏以道員記名簡放未免過優且與吏部奏定

章程不符所有馬逢亨前以道員記名簡放之案著卽撤銷並著該部另行覈給議敘另片奏馬逢亨在屯田局董事多年除陸續變價外尚餘未變田坦瘠薄低窪無人認價承售以致逾限未能賣竣馬逢亨取贖棄瘠顯違部議業據認繳屯坦價銀催令完繳充餉等語所有馬逢亨認繳之屯坦價銀十二萬兩著卽勒限嚴催完繳其承變坦畝仍照章程妥速辦理不准延宕○諭議政王軍機大

臣等都興阿等奏江陰難民擺渡派兵布置一摺前因江陰賊匪有扮作難民渡江之謠吳棠率准江陰令沈方煦之請任令北渡疊經嚴旨申飭禁止續渡認真稽查誠以江北裏下河一帶完善之區若令外匪勾結為患非輕況江南常昭太倉等處均已次第肅清南岸難民儘可就近遷避何必定欲涉險過江上海師船進攻江陰何以將難民率行擺渡至數千名之多難保無奸人涸迹著李鴻

章嚴飭統帶水師員弁嗣後不准再有續渡如查明實係難民有家屬住居江北亦須先行咨會江北大員以便派員稽查以重防務其已渡難民人數甚多都興阿富明阿卽飭孫文友等會同地方官嚴密盤查不得視為具文吳棠當督同喬松年飭令各屬文武認真查察善為撫綏妥籌安插如有形迹可疑之人一經盤獲必須隨時懲究不得稍有疏虞致干重咎都興阿等另奏請將王萬

清留營帶勇一片王萬清著准其暫留都興阿軍營帶勇效力儻仍不知愧奮卽行從嚴叅辦該員縱勇滋事朝廷早有所聞既據該將軍等稱其年力尚強廢棄可惜姑准所請惟當調赴都興阿軍營隨時察看毋庸令其專防汎地以免滋擾將此由六百里各諭令知之○又諭晏端書等奏續陳粵東各路軍務情形一摺高州肇羅一帶逆氛日久負固加以客匪勾結遂致東奔西突益肆猖獗現

在崑壽等雖增兵募勇相機進取惟積玩之餘難期驟振且以粵東之勇辦粵東之賊恐有呼吸相通情弊臨陣不肯出力毛鴻賓新募楚勇計已成軍卽著恪遵疊次諭旨率此生力新軍迅速赴粵將高州等處賊匪次第掃蕩務令壁壘一新令行威振迅奏膚公不得徒託空言致負委任毛鴻賓郭嵩燾未到以前晏端書崑壽務當督飭各軍認真防剿不得稍有鬆勁吳昌壽一軍已偪廣海寨城

並著飭令熟籌良策迅圖攻拔另片奏釐金濟餉訪諸輿論主客之見莫由解釋應早定分成之議改歸地方官紳辦理以期事權歸一呼應較靈等語著毛鴻賓郭嵩燾於到省後體察情形妥籌辦理將此由六百里各諭令知之○河南巡撫張之萬奏遵查署新野縣知縣丁嘉言被叅一案訊因訪聞圍首劉川幅私設釐卡卽前往查禁被劉川幅留住寨內邀求准予自新告示執行緝給實屬辦

理失宜業已另叅革職應請免議下部議從之○以廣西軍務喫緊暫留丁憂副將蕭榮芳代辦提督予廣東平岡墟陣亡守備李天祥外委張見恩等祭葬世職加等○甲申上詣

奉先殿

壽皇殿行禮○諭議政王軍機大臣等都興阿富明阿奏覆陳江防及連日下游防勦情形探聞江陰克復飭令王萬清等帶勇援皖各

摺片吳棠奏請令總兵幫辦軍務山東等省撥餉及鹽城等縣續獲會首等各摺片據都興阿等奏北渡難民均飭水陸防兵會同地方逐細查察安置現在南岸官軍得手難民漸已紛紛南渡至所有句通髮逆之教匪盛廣大等經通州知州黃金韶疊次拏獲訊辦與吳棠所奏相符即著吳棠速飭將所獲各匪於訊明後即行駢戮毋久稽誅其餘匪尚恐不免散處各屬仍著吳棠飭令各該地方

官實力查拏以消內患都興阿富明阿亦飭令各防文武員弁嚴密巡查毋稍大意其撲犯倉利橋巫山夏港等處之賊經吳全美所部水師擊退既據都興阿等查明該總兵督同各港師船聯絡調度尚有得力著即飭令嚴率所部聯絡滬軍互相策應並令往來梭巡於江陰各港何處有賊即駛赴何處應援現當南岸官軍得手之際江防尤應嚴密以杜逆匪乘虛北渡江陰縣城業經克復其棄城竄出會合各路援賊分投打館之匪究係竄走何處著李鴻章詳悉速奏並督各軍乘勢追擊與都興阿等南北併力堵剿以杜紛竄江陰克復即應進規常郡期與京口官軍及進逼蘇郡之兵聯絡策應以圖攻取皖北軍情昨據唐訓方奏報馬新貽帶兵回至臨淮臨軍之勢稍紓而賊復趨重蒙城總兵陳國瑞由白蓮池移得勝之師赴援正資倚任該員疊經僧格林沁等奏報亦頗稱其得力

吳棠所請令陳國瑞幫辦該漕督軍務之處。本日已明降諭旨宣布著卽傳知該總兵當懷承恩命愈加忠勇奮發努力自愛毋稍滿假以期克保令名。長承優眷並著飭令星速赴援卽將趨蒙逆黨迎頭痛擊會合英翰等蒙城戰守之軍力解城圍與唐訓方等遇事和衷聯絡策應以堵皖局俟僧格林沁大軍南下大集諸軍蕩平苗逆同膺懋賞王萬清一員昨已有旨准都興阿等所請留於軍營

帶勇效力卽著都興阿等飭令與參將戴錦芳迅速統帶川勇等二千名星夜赴皖援救以厚兵力徐屬竄擾蕭縣等境捻股吳棠派兵迎擊北遁現往何處仍飭姚廣武等官軍追擊並令該總兵仍須兼顧蒙城一路隨時應援並籌接濟毋令蒙軍飢困將此由六百里各諭令知之。又諭吳棠奏請撥各省協餉一摺皖省苗逆兇熾日熾經僧格林沁派令陳國瑞移軍前往助剿必能大振軍威亟

須豫籌接濟方不至停兵待餉貽誤戎機著閻敬銘英桂張之萬由藩庫不拘何款各先行撥解銀三萬兩限一月內起解專供陳國瑞一軍勒匪之用並著各該撫由本年九月起仍按月各協解陳國瑞軍餉銀一萬兩務當源源報解以裕軍食毋令缺乏將此由五百里各諭令知之。○以戶部右侍郎崇綸兼署吏部左侍郎刑部左侍郎靈桂兼署戶部左侍郎管三庫事理藩院右侍郎額勒和布

兼署工部右侍郎管錢法堂事以正黃旗蒙古副都統富明署鑲白旗護軍統領鑲黃旗蒙古副都統寶善鑲藍旗蒙古副都統恩齡署正紅旗滿洲副都統。○命儘先總兵官陳國瑞幫辦漕運總督吳棠軍務以越職收捐革江蘇軍營守備傅璋職。○旌表守正捐軀四川鄰水縣民婦夏甘氏

大清穆宗繼天開運受中居正保大定功聖智
誠孝信敏恭寬毅皇帝實錄卷之七十五

十一

十一

大清穆宗繼天開運受中居正保大定功聖智
誠孝信敏恭寬毅皇帝實錄卷之七十六

十一

同治二年癸亥八月乙酉秋分夕

月於西郊遣順承郡王慶恩行禮○
太祖高皇帝忌辰遣官祭

福陵 諭內閣前因英桂奏參委營總常興擅
借庫銀希圖漁利各款當經降旨令將常興
革職嚴追嗣經英桂訊明追繳擬結由刑部
奏准將該革員發往軍臺效力贖罪茲據都
察院奏稱該革員常興遣抱呈控英桂德興
阿原叅各節均係扶嫌捏造實屬屈仰等語
已革委營總常興以帶隊武職擅借庫銀希

圖從中漁利並沿途需索額外口糧等項雖經英桂據德興阿咨文奏奏而原咨所稱借領庫銀為眾兵置辦衣物不堪適用致令合營爭鬭常與既自認銀兩尚有贏餘質之黑龍江委防禦佛爾國春則稱沿途各站支給兵丁口糧亦有未經散放之贏餘銀兩是其貪鄙不職確有可據經刑部照擬發遣實屬罪有應得該革員於業經定案之後輒敢撫拾虛詞肆行瀆控並妄指德興阿挾嫌捏叅

等情此風斷不可長著照例立案不行並著該部查明該革員如尚在京仍遵前旨即行發遣毋任逗遛○諭議政王軍機大臣等德勒克多爾濟等奏八旗官兵捐補馬匹擡槍一摺據稱綏遠城前撥解豫省馬一千一百匹現據八旗官員兵丁議以此項馬匹急切不能撤回且綏遠城距豫數千里設軍營不堪騎用解回亦必疲乏不堪餵養現在該城邊防河防情形喫重擬如數捐買足額解豫

馬匹毋庸解回並捐造擡槍六十桿以備差操等語該員弁情殷報效固屬急公惟八旗官員兵丁生計亦非饒裕雖此次捐輸馬匹出自至誠而朝廷體恤兵艱亦未便令該官兵等捐此鉅款此次所捐之馬是否即係各該官兵差操之馬著德勒克多爾濟塔清阿查明該城如有捐輸項下餘賸馬匹即照數撥還該官兵等應用如無此項馬匹即著於錫林郭勒牧羣內捐輸備調馬匹挑補足額

給還該官兵等收領毋庸令其捐辦以示體恤而重操防所捐擡槍業經鑄造即著由德勒克多爾濟等自行酌給獎勵將此諭令知之予河南各屬陣亡殉難紳民婦女一千七百四十三名口分別旌卹如例○旌表守正捐軀廣東新會縣民婦林梁氏○丙戌諭議政王軍機大臣等李鴻章奏官軍克復江陰縣城並楓涇石壘詳細情形及攻克嘉善縣之西塘鎮等處擊敗蕩口援賊各摺片江

陰一城介居江海之衝。最關緊要。現經官軍克復。該逆渡江北竄之路。業已斷絕。從此乘勝進兵。則常州無錫之賊。亦必聞風膽落。惟匪黨甚多。失此要區。難保不糾合醜類。再來撲犯。李鴻章現由常熟前赴江陰。察看軍情。所籌分路犄角。取遠勢以制敵。使賊大局不振。筋脈不舒。則蘇城遲早可克。各等語。甚合攻取機宜。著卽照所擬妥為布置。李鴻章另片奏籌攻蘇郡。常勝軍弁勇戰守實未可靠。

而戈登尚欲添雇英兵。經該撫准添洋兵百名。戈登復有須與英國提督伯郎妥商之語。伯郎因該撫未回崑山會晤。遂聲稱赴京一行。卽帶英兵攻勦蘇城等語。該撫慮及伯郎抵京後飾詞嚇詐。請飭總理各國事務衙門相機覈辦。已諭知該王大臣等查照辦理。將來伯郎到京時。如向總理衙門要求助順一切。均照該撫所議。以正言折之。俾免妄生覬覦。李鴻章計將回滬。仍當隨時密飭程學啟

等與戈登聯絡聲勢。以期迅拔蘇城。將此由六百里諭令知之。○又諭官文奏籌解京餉。請飭直隸河南沿途撥護張之萬奏酌籌直隸協餉各等片。前因直隸道路梗阻。臨沿關一帶無可繞之路。湖北解京餉銀多由票局匯兌。茲據官文奏稱。現在直隸河南道路肅清。仍照舊章辦理。已委候補知縣王庭楨等領解鹽課銀二萬兩。關稅銀五萬兩赴部交納。請飭直隸河南各屬地方文武照例撥護。仍多派幹練員弁率同丁役沿途小心護送等語。著劉長佑張之萬嚴飭各州縣於此項銀兩過境時。加派兵役沿途撥護。不得虛應故事。致有疏失。河南賊氛滋擾。應如何繞道行走之處。張之萬豫為籌計。飛咨湖北照辦。毋稍大意。直隸協餉前飭河南每月解銀八千兩。茲據張之萬奏豫省連歲歉收。入不敷出。四郊多壘。羅掘俱窮。誠有不遑自顧之勢。惟因劉長佑督辦三省交界勦匪事宜。正在

喫緊請將此項協餉改為每月四千兩俟直省軍務稍鬆卽行停止著照所請按月源源報解不得遲延短少以資接濟將此由五百里各諭令知之○又諭張之萬奏毫捻擾及許境經兵練擊敗悉數西趨並另有股匪由淮甯縣境直撲西華縣城各摺片據稱毫捻由臨潁一帶竄徧許州占踞城外之大莊保全兩寨經官軍收復後該匪悉眾西遁訊據賊供捻首張總愚程大老坎李庫等均為苗逆所使糾合悍黨圖竄陝西勾結回逆如潼關有備卽折竄楚北老河口一帶勾約髮逆入寇等語前因豫省官兵克復張岡當諭令張之萬駐紮許州遏捻匪西竄之路乃該撫不知酌量緩急徑回省垣致該匪得以乘虛奔竄深入腹地張之萬調度失宜實難辭咎著先行交部議處毛昶熙張曜駐軍陳宋各郡何以於毫捻西趨毫無知覺致各軍皆出賊後可見駐兵防堵全屬有名無實毛昶熙

張曜均著傳旨申飭現在長葛禹州邊境均有賊蹤張曜現擬派馬隊跟追並親率步隊由北面取道山徑繞越賊前會合馬隊夾擊著卽奮力截剿痛殲醜類張之萬出省後並當相機堵剿毛昶熙亦卽派撥兵勇隨時策應儻任賊蔓延豫省或擾及山陝惟張之萬毛昶熙是問此時前股賊騎已過許境或由郟汝徑趨盧氏西犯潼關亦意中事且回匪被勦窮蹙難保不暗中勾串苗逆約會西來是潼關一隅最關緊要多隆阿留守潼關之兵是否尚在該處著該大臣酌度情形如潼關守將不足深恃兵力不敷堵剿卽當添派得力將領酌帶兵隊前往助守毋令一人一騎得以入關方為妥善張曜業已督軍西進該匪或聞風南竄則宛鄧之閒處處可慮歐陽正塘一軍駐紮襄陽去南陽不遠著官文等酌量情形或飭令該道派兵馳赴宛鄧等處會同豫軍截擊或另派得力兵勇出境會

勦均著迅速酌辦毋稍遲延其商雒一帶亦係該匪熟徑並著多隆阿張集馨會商布置以備不虞密縣禹州均有賊匪而密縣毗鄰汜水晉省河防不可鬆懈著英桂嚴飭在防文武員弁認真防守如匪黨竄近晉邊或附近潼關一帶屆時儘晉防兵勇足數堵禦尚有可撥之師渡河迎擊會合豫省之軍夾勦以期悉數殲除該撫務當先期斟酌調派毋得稍有疏虞僧格林沁現在勦捕宋逆正當

喫緊之際張之萬請飭該大臣星速南來會合豫軍遏此狂寇之處自應俟僧格林沁將宋逆殄滅後再行率師南下張之萬當就現有兵力將闌入境內之匪痛加勦洗不得專盼僧格林沁之兵致滋貽誤將此由六百里加緊諭知僧格林沁官文多隆阿嚴樹森英桂張之萬毛昶熙並傳諭張集馨知之○又諭前因常清奏伊犁需費浩繁四川撥解鹽釐銀兩起解無期請飭陝甘總督籌撥銀數

萬兩以顧然眉等語當交戶部速議具奏茲據戶部奏稱該部前次籌撥伊犁軍餉四川應撥鹽釐項下銀十萬兩尚未起解甘省前次劃扣河東道撥解伊犁餉銀六萬九千兩亦未據報解請飭四川陝甘各總督迅速籌撥等語伊犁為邊疆重地餉需最關緊要前經諭令該督等趕緊設法籌解現在邊防更急派兵前往博羅胡吉爾卡倫防堵需餉尤為萬緊該督等總當以大局為重豈得藉口軍需緊要無款籌撥任意推諉以致眾軍譁潰有誤邊防大局著熙麟恩麟懍遵前旨無論何款趕緊籌措迅將前次劃扣河東道撥解伊犁餉銀六萬九千兩星速解往毋再延宕其四川前經部撥該省正餘濟楚鹽釐項下銀十萬兩著駱秉章迅即籌款解由甘省轉解以措邊防危局道經甘省時熙麟等不得擅行截留致誤要需並著該督等將起解日期咨報戶部以憑查覈將此由五百里諭

知駱秉章熙麟並傳諭恩麟知之○以克復江蘇江陰縣城賞總兵官黃翼升黃馬褂副將駱國忠參將周盛傳巴圖魯名號擢知州李鶴章以知府用餘加銜升敘有差○以江蘇官軍攻克楓涇西塘兩鎮予翰林院編修劉秉璋以侍講遇缺提奏賞總兵官張遇春一品封典副將楊鼎勳唐宏成參將江福山巴圖魯名號餘加銜升敘有差予陣亡把總潘國宏外委胡標等祭葬世職加等○以河

南許州擒獲捻首王殿治予千總朱都喜以守備用○丁亥諭議政王軍機大臣等明緒奏接准俄國西悉畢爾回文聲稱卡倫以外駐紮兵隊不能撤回一摺俄國兵隊駐紮哈薩克邊界名為防守中國官兵出卡其實欲將分界事宜早為議定以遂其詭謀自應速籌了結之方俾免藉端尋釁七月二十九日本月初四日疊經諭令明諒明緒等准照該使臣議單定議分界由明誼等行文該國西

悉畢爾定期會勘此時明誼計已行抵塔垣即著與明緒籌商恪遵前兩次諭旨照會該國西悉畢爾衙門迅即派員前來會議一俟訂定日期即行按照議定會勘處所妥為辦理其安插哈薩克人眾及烏梁海蒙古等善後事宜一併遵照前旨妥辦永弭邊釁方為不負委任所有卡外俄兵亦應隨時派員偵探毋得稍涉大意將此由五百里各諭令知之○戊子諭內閣前因瑛榮巡撫陝西株守

省垣膜視地方生靈荼毒一籌莫展馬德昭派援鳳翔復種種捏飾刁難逗遛不進先後降旨革職本日據多隆阿等馳奏該大臣於抵省後查點馬德昭所統四關各營勇丁三千八百餘名而實數僅一千八百餘名殘弱又且過半瑛榮之存城營勇一千餘名僅四百餘名可用其每月糧餉各營均按虛數支領覽奏殊堪痛恨瑛榮以巡撫大員貽誤地方至於如此所部勇丁徒糜餉需毫無實用

且藉保護省城為名屢次飾詞奏留馬德昭鳳翔等城久被賊困置之不顧但為馬德昭捏報戰功且縱令馬德昭虛報勇數至二千名之多並不認真查點通同蒙蔽朝廷實屬溺職辜恩大負委任前旨僅予革職尚覺情浮於罪瑛榮著卽行發往新疆充當苦差以示懲儆馬德昭於軍務喫緊之際以提督統兵當派援鳳翔託病遷延其居心已不可問又復虛報勇數冒領口糧竟視軍務為利藪

置國事於不顧貪詐尤為可惡馬德昭業經革職卽著交多隆阿劉蓉張集馨嚴行查訊奏明辦理西安將軍穆騰阿係專閫大員又同在一城於馬德昭冒領餉銀捏報戰功各節豈能毫無聞見該將軍何以以前此並無隻字提及且屢次會同瑛榮奏保馬德昭戰守得力此次又復會同多隆阿張集馨奏參其因何前後自相矛盾之處著穆騰阿明白回奏又諭前因瑛榮奏守備張夢銀於陝西

興安府城失陷時勦賊陣亡當經降旨優卹建祠茲據張集馨奏該守備稟稱城陷後受傷往老坡山調理旋即會團克復興安新舊兩城營縣誤報陣亡請將該守備撤銷卹典查辦等語署陝西鎮坪營都司守備張夢銀卹典著卽撤銷該守備所稱在城勦賊受傷及會團克復兩城等情語多矛盾顯有不實不盡著劉蓉張集馨查明如有聞警潛逃事後捏飾情弊卽行從嚴叅辦又諭毛鴻賓

奏請將釐捐積弊委管各員審辦等語湖南靖州所屬之洪江地方設有釐局係由地方官經理據毛鴻賓奏派員密查該局員於官設釐局之外復設上下二卡並未報明省局所收商釐並不填給照票且收數暢旺報解寥寥顯有侵蝕情弊前任巡撫翟誥在辰沅永靖道任內委員辦理卽多不實不盡接署道陸傳應兆琛積習相沿弊端叢出難保無扶同徇隱情事請分別革職撤任查辦所有

釐局委員委用知縣林慶光。候補府經歷瞿詒候補從九品董立誠均著先行革職。瞿詒業經休致其前署辰沅永靖道之現在代理貴州按察使陸傳應現升湖南按察使兆琛均著暫行撤任與瞿詒一併交憚世臨提集應訊人證卷宗嚴審確情據實叅辦。○諭議政王軍機大臣等前因戶部議奏侍郎薛煥請於直隸添設四鎮一摺當經諭令各直省督撫速行籌畫覆奏茲據毛鴻賓覆陳直隸

添設四鎮增兵四萬其中管帶招募約束之難及各直省偏地瘡痍籌餉之不易而流弊所及窒礙尤多如以直隸屏蔽京畿亟應設備或於劉長佑新募之勇略增其數再將旗綠營兵選將訓練嚴加汰革卽足以資捍禦等語所籌不為無見薛煥前請練兵籌餉之處原以畿輔重地營務廢弛亟應振作兵威妥籌捍衛惟此次勇丁既經添設卽將來承平無事亦斷不能遽裁此時建議之初必須

妥籌善策經久可行不至流弊滋生方為妥善毛鴻賓所陳窒礙各情亦覺深切著明洞悉利弊劉長佑身任直隸總督於現在地方營伍情形自己知之最悉卽著將薛煥及毛鴻賓前後所奏各情通盤籌畫謀出萬全務使行之久遠永無流弊以副委任其應如何定議之處卽著速行馳奏原摺著鈔給閱看將此諭令知之。○又諭都興阿等奏撥援臨淮各營起程日期並水師分防情形一摺臨

淮餉絀兵單唐訓方孤軍擋住日久苗沛霖復糾集黨與併力圍攻蒙城逆餒鴟張日甚非厚集兵力不足以制其死命都興阿所撥勇丁二千名已於本月初七日由總兵王萬清等統帶起程往援臨淮尚恐不敷勦辦該處為淮揚一帶屏蔽設有疏虞卽揚州軍營後路亦必因之震動現在江陰縣城業經克復江北情形稍鬆著都興阿富明阿多添精銳兵勇由富明阿督帶馳往臨淮迅速助剿

並著唐訓方於富明阿馳抵臨淮後將防勦事宜會商籌辦臨淮餉需支絀異常王萬清等所部各營及富明阿續帶援皖之軍應需軍餉火藥各項仍著吳棠督飭喬松年由該處糧臺源源撥解毋稍缺乏至江北防堵事務都興阿仍當督飭水陸各營妥籌布置不得因南岸軍情稍鬆致形疏懈前諭曾國藩飭令蔣凝學毛有銘周寬世成大吉所部各軍進攻壽州以分賊勢著仍遵前旨相機調

度與唐訓方聯絡策應毋令六額各軍株守一隅是為至要將此由六百里各諭令知之
又諭多隆阿等奏現辦省城防勦事宜分兵四路援應各摺片據多隆阿穆騰阿張集馨等會奏點驗四關勇丁數目虛冒甚多而每月糧餉則照虛數支領實堪痛恨各營營官現據多隆阿等奏明分別拏問自能將所有侵蝕蒙混等情訊查得實嚴加懲辦至所稱馬德昭營中既未打仗所保人員應由張

集馨查明概請撤銷自為力祛冒濫起見惟一載以來該營官兵於省城戰守究竟有無出力抑果全係冒濫著多隆阿等詳悉查明確實具奏辦理西安省城現有旗綠各營官兵共七千九百餘名於省垣防守自己足數分布穆騰阿張集馨既將挑出精壯旗兵二千營兵一千實力勤加訓練以備緩急並飭令與城外之曹克忠七營及德興阿所帶馬隊聯絡戰守毋稍疏虞鎮安被逆匪竄陷著

即嚴飭總兵福兆迅速進兵克復其撲犯醴泉之匪及牛東一帶馬步回匪著多隆阿張集馨迅飭曹克忠馬陞等軍分投勦捕毋留餘孽多隆阿俟省防布置妥協即赴北岸進勦高陵等處之賊以次掃蕩肅清全陝陶茂林一軍既經張集馨給發餉銀軍火並令藍鄧等縣接濟軍食自可不誤師行圍攻鳳翔之賊一聞省城派兵往援更必很力來撲該郡城以有數之兵練誓守經年屢經危險此

時望救更必殷切。卽著多隆阿等嚴飭陶茂林星速赴救。不許片刻耽延。曹克忠移營省城西南一帶。足為此軍先路之導。卽著會合轉戰而前。總期剋日早達鳳郡。立解城圍。以紓廩繫。劉蓉自簡放陝撫以來。尚未據奏報。由川入陝。當此各路之軍已集。著卽星速前進。統率諸軍。先將漢中城圍力解。督同李雲麟等將陝南羣醜奮力蕩平。並卽檄飭各廳州縣集團守險。以助軍威。嚴防豕突。仍與多

隆阿隨時聯絡聲氣。以籌全局。將此由六百里諭知多隆阿穆騰阿劉蓉雷正綰並傳諭張集馨知之。引見湖北等省補行考取拔貢生得旨鄭子兆等二十八名。以七品小京官分部學習。李元善等二十一名。以知縣試用邱廣生等二名。交吏部詢問。以教職佐貳等官分用。兩廣總督毛鴻賓奏遵旨迅籌赴粵督帶親兵六百人。定於八月初四日由湘起程。並飭副將楊虎臣等募勇三千人。與

張運蘭所部三千人陸續進發。以厚兵力。報聞。○以庸劣不職革署陝西按察使道員劉鴻恩。副將明泰。職。○以陝西鳳翔守城出力賞六品軍功張肇堂等藍翎餘加銜升敘有差。予陣亡六品軍功周桂芳祭葬。世職如千總例。以陝西鎮安縣城被賊竄陷。革署知縣張勤職。○予陝西涇陽陣亡委防禦精通阿等祭葬。世職加等。○予故漕運總督袁甲三於河南陳州府原籍建立專祠。○句到貴

州等省情實罪犯停決。貴州斬犯一人。廣東斬犯一人。奉天斬犯三人。餘二十九人。予句。已丑諭內閣。張凱嵩奏請將丁憂州判暫行代理知州等語。前代理廣西象州知州升用知縣直隸州州判王錦。現在丁憂。例應回籍守制。惟該州團練現因挾嫌互鬪。既據該撫奏稱該員前代理象州時。紳民畏服。請將王錦暫行代理象州。前往查辦。著照所請。王錦准其暫行代理象州知州。俟查辦事竣。卽

令回籍守制。○諭議政王軍機大臣等。左宗棠奏。浙師援江獲勝。江西肅清。籌辦石太股匪。並臺灣粵勇潰散。請飭林文察辦理該處軍務。及現辦延平順昌土匪。各摺片。臺灣匪徒滋事日久。吳鴻源所統兵勇。數已不少。不能於嘉義解圍以後。迅圖攻剿。輒於南靖莊等處。頓兵數月。致該匪得豫為準備。迨賊守禦既堅。又不知分兵別覓閒道。相機雕剿。以至師老財匱。勇丁譁潰。賊氛益肆猖獗。實屬調度乖方。業經明降諭旨。將該員革職等因。仍著左宗棠徐宗幹。確切查明。如有別項貽誤情形。仍據實奏明。叅辦。毋稍徇隱。林文察既藉隸臺灣。熟悉情形。即著該署提督揀調得力將士。渡臺聯絡紳團。速將該處匪徒殄滅。應需餉項。即飭福建藩司。於援浙餉內。酌量撥給。延平順昌土匪。僅數百人。勦捕兵勇。不下數千。該統兵官任其回窺星橋老巢。蔓延永安連城邵武歸化等處。一味遷延。不遵

調遣。業經左宗棠將吳連陞等分別咨叅。懲辦。守備張連飛。著於提省後。嚴行訊辦。按律定擬。並責成曾憲德。督率各軍。將延汀等處土匪。剋期殲除。不准再事稽延。致干重咎。江西全境肅清。已據沈葆楨曾國藩先後奏報。此股賊匪。非復窺江西。即回趨廣德。此時江忠義等諸軍。定可追賊入皖。著左宗棠仍遵前旨。辦理。務令徽郡各營。與江忠義諸軍。聯絡聲勢。前截後追。將池太股匪。就地殲除。毋任蔓延旁竄。滬軍現已攻克江陰。蘇州嘉興等城。攻剿正在喫緊。賊勢漸蹙。左宗棠當檄令蔣益澧等軍。攻賊要害。使賊兼顧不遑。當更有一二處。可以得手。將此由六百里各諭令知之。○又諭。駱秉章奏。設立糧臺。專辦援陝軍米。賈洪詔奏。滇省棘手情形。設法安夷。勦回並甄別文武。以期得人。各摺片。駱秉章現調楚軍。湘果嚮導各營。赴陝援剿。兵勇及長夫合計不下二萬餘人。日需米糧甚鉅。自

應設立糧臺。委員會同各地方官。在川陝附近米穀較多之處。專司採買。以資接濟。既據該督奏稱。知縣梅錦棠等。均能熟悉情形。卽著駱秉章飭令該員等。妥為辦理。以裕軍食。滇省啟釁情形。始於楚雄府屬之石羊銀廠。有臨安人與回眾互爭。地方官不能妥辦。成於省城。漢人不分良莠。見回卽殺。由此激生事端。回眾恐夷民助官。勒回設法結夷。並搶去勒辦回匪劉文。將回字究改夷字。給與夷

目閱看。多方煽惑。夷遂蠢動。據賈洪詔奏稱。必須設法用閒。先安夷民。以孤回勢。方可痛勦。逆回等語。所籌不為無見。著賈洪詔會同駱秉章。勞崇光。悉心籌商。相機妥辦。滇省現在武官。自提鎮以下。兵符均為回匪把持。兼以徐之銘等甘心為回匪所用。若日復一日。恐其盤踞漸固。不可動搖。且漸萌窺伺川黔之意。為患滋大。所以此時縱未必有勒辦之力。不可不豫備勒辦之方。一俟川陝黔省軍

務稍定。兵力漸可分撥。駱秉章勞崇光。賈洪詔。卽當會商進兵之策。不可遲延。滇省文武各員。依勢營私。亡廉喪恥。多與回匪勾通。亟應嚴加甄別。並著勞崇光。賈洪詔。將該省文武。逐加遴選。覈其邪正賢否。分別去留。庶可漸挽積習。以收得人之效。各鄰省如有得力之員。堪供驅策者。並准由該督撫奏明調往。滇省以資差委。將此由六百里各諭令知之。

○又諭。張凱嵩奏貴縣官軍攻克龍巖並各村寨及勒辦由黔竄粵之青江苗匪。昭平宣化等屬土匪。道員蔣澤春一軍由潯鬱進規。容縣各摺片。粵西潯州逆匪黃三。久踞覃塘。在貴縣之西。而東路龍巖賊寨險固異常。賊渠林漢潮與黃逆固結。抗拒官兵。附近之閭村等寨。賊亦互相勾串。藩司劉坤一。自督軍攻破登龍橋賊巢後。添派各軍。分投攻搗。閭村及龍巖均已破入。將林漢潮父子擒戮。劉坤一之軍進逼覃塘。貴縣與遷江來賓等團

練踊躍協助黃逆敗回老巢現在外援已絕團志益齊各軍全集覃塘乘其敝而擊之可期一鼓殄滅其由貴州竄粵之青江苗匪及粵西宣化昭平本地土匪均經張凱嵩飭令各地方文武將馬津村火溜嶺湓田各賊巢攻破青江苗匪竄踞懷遠縣屬之歐寨者亦經兵練擊走殲殪過半餘匪遁越黔境之大年河道員蔣澤春一軍由潯州取道鬱林沿途攻勦蒲塘等處克捷現亦進規容縣所辦

尚屬得手潯州等處股匪與廣東之信宜巨匪陳金缸等本通同一氣黃陳兩逆首數載負嵎容縣范亞音亦久踞縣城與高州賊勢尤狼狽相倚現當廣西潯容兩處得手之際東省高州諸軍崑壽前往督率立圖振作著卽與劉坤一蔣澤春等會合兩省官軍同時進取以赴事機張凱嵩當仍督劉坤一與蔣澤春等速將覃塘老巢攻破克拔容城盡殲醜類東省陳逆股匪脅亡苗寒崑壽所督各

軍卽當鼓其新銳乘機進擊其昭平土匪之竄踞大洞新地等賊巢尚未全行掃滅宣化匪巢雖破而逆首未卽擒獲仍著張凱嵩嚴督知府盧定勲陳瀚等務將新地等賊迅速蕩平逆首黃敷信趕緊緝獲淨絕根株各地方善後事宜卽飭該守令等妥實辦理毋令奸宄復行煽亂覃塘克復其南甯所屬之橫永一帶須防餘匪竄越左江等處伏莽尚多並著張凱嵩分飭所屬文武及各兵練次第

翦除各嚴守備以靖疆圉苗匪竄回黔境現由大年河道往何處著勞崇光張亮基速飭黎平一帶兵練迎擊與粵省之軍前後夾攻毋任滋蔓毛鴻賓郭嵩燾均各奏報起程赴粵計當不日履任粵東時務以大振軍威為第一要著高州軍務久未得手而東西兩粵賊勢既相勾結勦辦必須合力以圖卽著毛鴻賓郭嵩燾崑壽與張凱嵩隨時聯絡相機策應晏端書於新任督撫未到之日仍不得

稍存膜視致誤事機將此由六百里各諭令知之○又諭前據勞崇光等奏查辦黔省教民一案請將田興恕扣留川省候旨當經諭令該督等仍應遵奉前旨將田興恕撤回黔省訊明定擬奏結此時自己奉到前旨田興恕亦已押解到黔乃自一月以來尚未據勞崇光等將此案定擬具奏想該督等以教民一案事關人心向背必須辦理持平所以遲遲至今未即奏結之處諒亦其間周詳顧慮

勢處兩難不得不再三審慎以求萬全之故惟此案懸宕已久若再耽延時日恐外國人又來曉瀆辦理更為牽掣即著勞崇光張亮基遵照七月十四日寄信諭旨催提田興恕回黔將此案持平辦理迅速訊明定擬奏結毋再遷延田興恕本一武夫其所任用之劣員張茂萱謝葆齡等前已革職交勞崇光等嚴行訊辦該員等在田興恕幕中欺其不諳文理多方蒙蔽以致田興恕任性妄為種種

肆行無忌即教民一案亦難保非該員等設謀慝憑所致且張心培錢登選冷超儒等被叅各款果皆屬實是其朋比為奸倚勢作惡必久為黔民之所切齒此等劣員眾所共棄無足顧惜尤非田興恕曾任大員前在湘黔等省曾經勦賊立功之可同日而語前論勞崇光等將謝葆齡等及被叅各劣員從重究治亦因此數人為黔省罪魁即治以重典初無傷於國體人心諒該督等必能權衡辦理

勞崇光等接奉此旨後務即剋日妥為訊擬如田興恕之任性妄為實由該劣員等愚弄所致究竟何員尤為可惡係屬罪魁該督等即將其愚弄田興恕及或有挑唆慝憑等情切實查明盡法懲辦並將該員等罪狀詳悉奏聞以示天下亦足以大服中外之人心總之田興恕殺害教民一案辦理必須迅速了結而又必權衡歸於至當不可使事後復生枝節及眾情有所不平乃為萬善勞崇光等

接奉此旨定能仰體朝廷不得已之至意。吳籌速辦以慰遠慮也。將此由六百里各密諭知之。○以調度乖方。福建護水師提督吳鴻源革職逮問。○以援剿遲延。革福建護參將吳連陞職。仍留營。○緩徵直隸東安縣被水地方新舊額賦旗租並減差徭。○庚寅諭議政王軍機大臣等。戶部奏專提年內應用京餉。請飭各督撫等迅籌報解一摺。據稱就部庫年內用項通盤覈計。非解到實銀二百五

十萬兩。難敷開放。查山西地下尚欠九十萬兩。湖南尚欠十萬兩。湖北尚欠七萬五千兩。廣東鹽課尚欠二十二萬兩。粵海關稅尚欠十五萬兩。山海關常稅贏餘尚欠六萬兩。天津關常稅洋稅尚欠四萬兩。鎮江關尚欠五千兩。贛關尚欠二萬兩。以上各款均請儘數提解山東地丁除解到外。請提十一萬兩。河南地丁除解到外。請提十一萬兩。江西地丁除抵撥外。內提三萬兩。河東加課並正額羨

餘除解到停減外。內提七萬兩。山東鹽課除解到外。內提四萬兩。湖北鹽釐除起程外。內提七萬兩。閩海關洋稅除起程外。內提十萬兩。太平關稅除解到起程外。內提二萬兩。廣東司庫撥抵運庫雜款除解到外。內提二萬兩。又四川等省鹽釐各項均未據報起解。請提四川鹽釐鹽稅銀五萬兩。廣東運庫息銀四萬兩。福建鹽課銀三萬兩。茶稅銀八萬兩。河南驛站銀六萬兩。湖南無論何款銀二萬兩。江海關代徵九江洋稅銀八萬兩。以上總共提銀二百五十萬兩。均限於年內一律到齊等語。著耆齡、劉長佑、官文、駱秉章、毛鴻賓、李鴻章、嚴樹森、惲世臨、英桂、沈葆楨、張之萬、徐宗幹、閻敬銘、郭嵩燾、崇厚、毓清、英元等各按應解數目督飭藩司運司趕緊籌解。此次戶部所提銀兩均係就各省關力能籌解情形酌量勻提。並非強以所不能。且係部庫年內萬不可少之需。該將軍督撫通商大臣暨

監督等務於奉到諭旨後迅即起解均限年內一律到齊。僅再有延誤即由戶部按照上年新定處分從嚴奏參決不寬貸。另片奏前次奏提同治二年分洋藥稅釐直隸山東河南四川湖南福建各五萬兩山西湖北廣東各十萬兩除山東河南奏明儘徵儘解並據山東解到銀二千兩外僅據湖北解到銀三萬兩其餘各省均未奏報起程實屬玩誤著劉長佑等遵照前奉諭旨派委妥員趕即解

京並將起程日期先行報部查覈以濟要需毋再遲延干咎。將此由五百里諭知福州將軍直隸湖北四川廣東江蘇湖南山西江西河南福建山東各督撫通商大臣並傳諭各海關監督知之。○又諭劉長佑奏宋逆被勦南竄現籌防截情形一摺僧格林沁督師進駐清平縣之魏家灣劉長佑親赴該大臣軍營會商機宜後即督同前敵各軍滾營前進由新集一帶逼近賊巢僧格林沁馬隊由柳

林村進逼沿途疊獲勝仗賊勢不支自必乘隙旁竄據劉長佑奏稱初十日夜馬步賊匪在灘上村乘船搶渡經遊擊湯繼揚等擊退該匪被勦窮蹙乘夜南竄革冠之交僧格林沁現派馬隊跟追劉長佑飛調徐廷楷赴小灘鎮扼守力遏西竄各等語宋景詩馬賊頗多行蹤詭詐飄忽現雖南竄仍恐折而西趨乘虛竄犯直境不獨大名各屬防守喫緊即西北正北亦應存在嚴防畿輔重地豈可復

被蹂躪僧格林沁督辦四省軍務諒必統籌全局面面兼顧所有調赴東路之直隸提鎮各營及海口熱河洋槍隊等軍著即飭回劉長佑軍營交該督調遣分投截勦僧格林沁既抵清平所有勦辦宋景詩事宜著即責成僧格林沁調度一切如慮步隊無多查丁寶楨保德等所帶步隊為數不少可即檄飭與恆齡蘇克金馬隊相輔而行該匪既已出竄小醜跳梁諒僧格林沁必能痛加截勦將首

從各逆駢首殲擒決不令其西擾直境也劉長佑身任封圻保全直隸境地是其專責該匪現已南竄該督即可無庸深入東境劉長佑擬親督兵勇馳赴冠館一帶追截任事甚屬奮勉惟東省追偏愈緊則直省更覺喫重該督總當酌量情形馳回直境擇要駐紮督同王榕吉徐廷楷美國仲等分帶提標鎮標海口熱河洋槍隊等軍會合各路兵勇民團分投扼住運河斷賊西趨之路以衛畿疆而

重職守閭敬銘前在博平近日曾否移營他處並著隨同僧格林沁相機策應毋稍疏虞預省滑濬內黃等縣接壤大名現經劉長佑飛調河北鎮道扼要堵禦仍著張之萬嚴飭該鎮道等迅統所部馳赴直豫交界處所嚴密防範如防守不能得力致該匪闖入豫境必將該鎮道等從重治罪決不寬貸宋逆是否全股南竄其甘管屯李廣莊等處有無餘匪盤踞著僧格林沁等查明具奏恆齡現署

直隸提督因勦辦宋景詩股匪前赴山東事竣後該大臣尚須督師南下如必須恆齡前往卽著據實奏聞以便另派妥員接署直隸提督篆務俾免曠誤劉長佑所調之李明惠一軍早經憚世臨馳報起程何以尚未到營著劉長佑星速催提並檄飭取道河北卽會合河北鎮道派出之軍將宋景詩迎頭截勦不准逗遛貽誤前據御史劉慶奏東省招墾荒廢地畝所有首逆從逆之家及逃歸復業

之戶請查明分別辦理等語該御史所奏各情有無可採之處著閻敬銘詳加酌覈妥議章程具奏原片著鈔給該撫閱看將此由六百里各諭令知之○督辦鎮江軍務馮子材等奏金陵官軍長圍漸合鎮城力圖戰守用固要防得旨鎮城戰守倍加緊要宜嚴密相機籌辦毋得稍涉大意嗣後軍情仍著隨時探明具奏○辛卯諭議政王軍機大臣等前據李鴻章奏克復江陰縣城附城一帶賊屍

枕藉卽距城數十里地方亦積骸盈野穢惡難聞因思滬軍與賊接仗均在近城一帶所斃賊匪諒亦離城不遠何以數十里外竟有如許積屍必係該匪被勦窮蹙遷怒於民肆行殺戮該百姓逃生無路止得俯首延頸供其荼毒實堪憫惻都興阿等前因江陰難民擺渡過江派兵禁阻該將軍等慎重江防保全完善辦理甚屬認真但不分良莠概禁北渡小民無辜被戮固屬可慘或因無處謀生

飢餓倒斃亦殊可憫甚至強壯者被賊裹脅反為該匪添助黨與於軍務甚有關繫現在江陰已復而常州無錫正值用兵之際其子遺之民亦必有徙避過江者自應量為變通妥籌濟渡俾江南被脅難民獲有自逃之路相率求脫水火我多一民則賊少一兵被陷各城攻取更易得手著都興阿富明阿吳棠受速籌商於沿江要隘酌設渡口一二處分飭防江員弁及地方文武各官就兩岸渡口

嚴密稽查如實係避難良民言貌形跡並無可疑或攜有家眷或經南岸帶兵大員及地方官先期照會者均應准其陸續渡江妥為撫綏安插用副朝廷軫念災黎至意如查有形跡可疑之人該將軍等仍當遵照前旨隨時認真查明懲辦務令奸匪無涸跡之所而良民有避地之方庶戢匪安良兩盡其道不至因噎廢食也將此由六百里各諭令知之又諭李鴻章奏行抵江陰籌布大略情形

一摺江陰克復賊鋒大挫自應乘此聲威力圖掃蕩該撫與黃翼升等商酌擬令劉銘傳帶所部九營進紮江常錫三處交界之青陽鎮地方兼防護逆繞襲周盛波紮無錫之芙蓉山郭松林紮無錫之蠡山道員張樹聲等紮張涇橋為郭松林等後路援應又令總兵黃中元進紮蕩口前之大橋角以堵蘇賊竄常熟之路黃翼升分派師船相為依護李鴻章自督小隊往來調度所籌均屬周密著卽

照所議妥速進兵並嚴檄諸將不可屢勝而驕稍有輕敵之意總期進可制賊退可自保方能節節進取克奏全功江陰一城關繫緊要副將駱國忠前曾力保常熟心志甚堅該撫派令扼守江陰可期得力所有京口協副將一缺卽著駱國忠署理李鴻章仍當隨時策勵俾該員益知感奮用收臂指之助上海釐捐各局著於回滬後妥為整頓至南岸克復地方已屬不少並當督飭地方官各就所轄境內招集流亡分別安撫是為至要將此

由五百里諭令知之○以鑲黃旗漢軍都統春佑署鑲藍旗漢軍都統鑲黃旗蒙古都統明慶暫署鑲白旗漢軍都統○以江蘇克復江陰縣城出力賞參將鄭龍彪遊擊衛汝忠吳家榜巴圖魯名號餘升敘有差予陣亡都司李才喜守備夏文泰千總馬得勝把總余思駱等祭葬世職加等○壬辰諭議政王軍機大臣等唐訓方奏蒙城情形較前倍形危

急請飭催陳國瑞援軍速至以解重圍一摺據稱苗逆悉調悍黨包抄蒙城官軍後路又糾約捻首相盤及紅藍旗賊匪萬人分踞蒙城西南正東各面渦河北岸添賊營至五十餘座之多官軍已為包抄該逆復於南岸增壘十二座若再增壘十餘將南岸諸營包圍在內糧路遂無一綫可通等語蒙城四面皆賊唐訓方軍營兵餉兩絀萬難抵禦若不趕緊援救恐蹈壽州覆轍著僧格林沁懷遵前

旨催令陳國瑞一軍迅速馳赴蒙城力解重圍陳國瑞餉需既已有著務當星速遄行以保危城而維大局唐訓方於該總兵未到以前仍當就現有兵力竭力支持毋得稍有疏失薩薩布熟悉皖省情形本日已諭令劉長佑飭令該員馳赴臨淮交唐訓方差遣如該員現在該親王軍營卽著僧格林沁飭令薩薩布迅速前往臨淮以資得力協領穆克德布現尚未回吉林該協領係在何處是否尚

在臨淮軍營。著唐訓方查明。如該協領打仗尚能得力。卽由該撫酌量差委。將此由六百里加緊各諭令知之。○又諭唐訓方奏請抽調官兵馬匹赴臨等語。前因豫省軍務喫緊。經袁甲三奏調吉林黑龍江餘丁及綏遠城察哈爾馬匹赴豫助剿。茲據唐訓方奏稱。苗逆馬隊頗多。臨營僅有克蒙額所部馬隊百餘。眾寡懸殊。打仗難期得力。近因冒暑馳擊。疊有例斃。愈形單弱。請將調赴豫省之吉林

黑龍江餘丁及綏遠城察哈爾馬匹。抽撥五百名。令記名副都統善慶管帶來臨等語。臨淮攻勦苗逆。正形喫緊。亟須馬隊襲抄。以資得力。本日據慶春奏。調赴豫省之吉林黑龍江官兵。已由善慶等統帶。陸續入關。著劉長佑張之萬。探明此項兵丁。現在行抵何處。迅卽提催前進。並卽行知善慶星速抽撥。吉林黑龍江餘丁五百名。綏遠城察哈爾馬五百匹。交其統帶。尅期赴臨。以資攻勦。蒙城軍

情萬分緊急。刻需馬隊赴援。張之萬不得藉詞扣留。致大局或有貽誤。薩薩布熟悉皖省情形。著劉長佑卽飭令該員迅赴臨淮軍營。交唐訓方差遣。以資得力。將此由六百里各諭令知之。○又諭。熙麟奏各路兵勇到營。並現在辦理情形一摺。所稱半載以來。調到延綏鎮等各處兵勇。經該督簡閱裁汰。外僅得兵勇四千五百餘名。其駐紮草地之伊克昭兵一千名。並現紮草地之阿拉善官兵八百

餘。眾均由該督遣撤回旗。所辦尚為覈實。余萬明募到楚勇。尚能得力。軍械亦尚整齊。卽著先行派赴平涼。力解城圍。將馮元佐所帶練勇。隨後繼進。以為應援。並卽催提副將王泰來。續行招募之楚勇三千餘名。迅速赴甘。由該督察看。如能得力。卽一併交余萬明。王泰來統帶。以厚兵力。所有調度。涇甯二州兵勇各情。均著照所擬分別調度。遣撤及飭各該地方官激勵民團。妥為招募。以備防剿。馬

德昭一員現據多隆阿親抵西安將其遷延浮冒等情據實奏參已有旨將該員革職交劉蓉軍營差遣並將所奏該革員肆兇恣詐各情交多隆阿劉蓉等嚴行查辦自難再令赴甘熙麟現在慶陽統領乏人著照所請所有驍捷營各軍卽派已革潼關協副將張維義暫行統領進征該員雖經前在商州防堵未能遏賊西竄為瑛奏參革職如果其材尚屬可用正可力圖報效以贖前愆熙麟所

擬將各勇分飭余萬明及馬天祥等各為統帶暨飭令李玉安統帶營兵伊昌阿福祿二員統帶蒙兵及甯夏滿兵之處均著照所擬辦理一併歸張維義統帶由熙麟調遣已革遊擊余萬明並著賞還遊擊原官頂帶熙麟卽行傳旨飭令各該員等奮勉圖功以期廓清甘省河南布政使王憲潼關副將阿揚阿於余萬明所募楚勇過境之時捐備軍械借給餉銀均屬踴躍急公能顧大局著由熙麟

傳旨嘉獎韓城縣知縣袁一陽動用地丁銀七百餘兩接濟勇糧能知緩急准其於應解藩庫正款項下開銷並著將該員摘去頂帶處分卽行開復以勵將來熙麟此時惟當勉為其難激勵各軍速解平涼之圍進克固原以期肅清甘境以副委任前據多隆阿奏派署提督陶茂林帶兵三千馳赴鳳翔援剿解圍後卽可移軍平涼與該督所派之張維義等軍會同攻剿熙麟可隨時知照多隆阿會

商妥籌辦理將此由六百里諭令知之○又諭前因皖省苗逆日熾僧格林沁派陳國瑞移軍助剿當經諭令閻敬銘英桂張之萬迅籌餉需解供陳國瑞一軍進剿之用本日據唐訓方奏苗逆悉調悍黨包抄蒙城官軍後路並句捻四面築壘危急萬分專恃陳國瑞一軍馳救乃接該總兵函稱伊軍向由東省月給餉銀萬兩到東後八閱月僅領銀四萬兩現當千里赴援需費尤鉅深恐兵入皖境

卽有乏餉之虞。現在臨淮餉需亦屬艱窘。請飭山東將應解皖營月餉。連陳國瑞一營應解之餉一併解交該總兵行營。以資兵食等語。蒙城為皖豫關鍵。苗逆悉力圍攻。情形萬緊。陳國瑞一軍早經僧格林沁飭令赴援。現以餉需無出。致礙師行。若使蒙城或有疏虞。關繫甚非淺鮮。著閻敬銘、英桂、張之萬迅卽遵照前旨。由藩庫不拘何款趕緊各先撥銀三萬兩解交該總兵軍營。以應急需。並由本

年九月起仍按月各解陳國瑞軍餉銀一萬兩。務當源源接濟。不准稍存膜視。致誤戎機。其山東省應解皖營月餉。並著閻敬銘一併由徐宿解送陳國瑞行營。毋得以該總兵移師赴皖稍分畛域。本日復據熙麟奏慶陽軍火匱乏。煤鐵俱無。且工匠均為逆回雇去。更屬無從製造。已飛咨英桂於泰乙鎮採辦礮二千斤。硝八千斤。並撥該省局存火藥一萬斤。現據英桂咨覆業已備齊等語。著英桂速

行派員解赴慶陽軍營。以利攻勦。晉省防務漸鬆。前由京營派往之祥安等現在該省監製火器火藥等項。需用自必裕如。而甘省情形據熙麟所奏實係無從採辦。著英桂卽將祥安等所造之火箭炸礮子等項迅速酌量分撥解甘。是為至要。將此由六百里各諭令知之。又諭特普欽奏籌備邊防並俄人越界占壘辦理情形及請免調餘丁各摺片。俄人在伊犁之博羅胡吉爾卡倫與防堵官兵

接仗雖經我軍獲勝。而該國尋釁之心未已。既在西路構釁。難保不於東省交界地方別肆詭謀。特普欽現飭各城副都統總管將存營兵額補足。並將輟弱者更換整頓軍械。認真訓練。密令邊卡委員偵探豫防。籌畫尚屬周妥。該將軍惟當隨時督率認真辦理。不得徒以空言塞責。致形疏懈。俄人在阿奇夏霍托瑪爾舊葛爾奇等處越界耕種禾稼。經副都統關保率兵平毀。呼倫貝爾所屬之蒙克

西里地方復有俄人越界割草經總管三都克多爾濟與該瑪爾理論俄人旋即收回惟夾心灘一處該首布色依執以和約內並未載明強稱爲兩國之地主使俄兵看守不聽平毀又有轉行該國住京使臣懇求暫借之語實屬狡詐異常該處地處本屬右岸豈得任令該國侵占現已諭令總理各國事務衙門向該國住京公使據理剖辯令其知會該西悉畢爾將夾心灘占壑地方退出特普

欽仍當向俄首布色依嚴詞駁斥不得聽其久行侵占以清界限其喀拉爾河口有俄人越界安設水磨板房一所及順喀拉爾河所蓋之柳條窩鋪三處均着飭令委員向該瑪爾據理曉諭令其將房閒窩鋪全行拆毀不得稍事遷就現值邊防喫緊之時該處自宜留備餘丁以防不虞近來各路軍營往往請調該處餘丁前往助剿朝廷知東省邊防緊要亦未嘗遽行允准此次調赴豫省餘丁

實因歸陳一帶防剿喫重不得已而爲此嗣後遇有各路軍營請調該處兵丁時自當斟酌辦理也將此諭令知之○予安徽六安殉難布政司經歷鄭倬祭葬世職加等貢生王本宗暨鄭倬家屬人等分別旌卹如例○癸巳遣官祭

關帝廟○予廣東平遠殉難知縣王炳祭葬世職加等○甲午諭內閣閻敬銘奏知府服毒自盡現飭查究等語山東候補知府蔣斯

嶠前經譚廷襄派令該員辦理東昌各營支應本月初二日該員在局服毒身死遺有稟單二件詞意似均以支放勇糧難於報銷而稟單內牽涉譚廷襄飭令如數放給回省後未經飭令停止知府秦際隆之稟如何批示未經移知局中各等語均多含意未申之處恐其中另有別情亟應徹底根究著閻敬銘提集該局委員丁書人等將該故員原稟單內各情嚴切訊究務令水落石出不令死者

含冤斷不准以虛詞粉飾。並查明該故員經手一切錢糧軍械有無虧短。一併據實具奏。尋奏遵查。蔣斯嶸實因宋景詩復叛。恐前發宋景詩勇糧難以報銷。一時愁急。輕生並無別故。其經手錢糧軍械亦無虧短。報聞。○又諭閻敬銘奏請將庸劣不職之州縣各員分別革職降補一摺。山東署莒州知州鈕德寬。浮動性成。不知檢束。蒲臺縣知縣斌照昏庸怠惰。難期振作。商河縣知縣李均浮偽貪污。

不洽輿情。題補泗水縣知縣吳鍾麒淺薄輕狂。不堪造就。候補知縣王奐疇性情躁妄。聲名平常。以上五員均著即行革職。候補知縣吳澍春庸愚無識。難膺民社。著以府經歷縣丞降補。以勦辦熱河竄匪出力。予吉林協領永祥等升敘有差。予山東陵縣等處陣亡殉難男婦一千八百四十三名口分別旌卹如例。

大清穆宗繼天開運受中居正保大定功聖智誠孝信敏恭寬毅皇帝實錄卷之七十六

大清穆宗繼天開運受中居正保大定功聖智
誠孝信敏恭寬毅皇帝實錄卷之七十七

臨修德教堂經道自導起居進官人子史漢文淵閣領閣事翰林院掌學士稽察欽奉工部書件處方略館御武英殿大學士軍機大臣總纂輯滿洲御書

理吏部尚書存心勤王康事務昭大猷車功和五叔隨帶祀父親配祿五十次官常懷家言繼武官通選撰官太子少保父河間侯開事懷仁閣大學吏部尚書

正紅旗滿洲副都統管理工部光祿寺事務內大臣輔國公兼均加一級隨帶加六級紀錄十七次奉宗室載勳奏請於光緒廿日奉旨居法官太子太保翰林院堂院

學士稽察蘇臺上諭事件及國史館紀載方略作廢載於清史大學士各部尚有軍機大臣教習庶吉士管理戶部三庫事務國子監事務凡執掌功加五級國子

加六版紀錄十九次及往來本利銀數登錄實項之項存儲部內有管理之部主庫事務等如五版紀錄十六次及往來等本

教修

同治二年癸亥八月乙未遣官祭賢良祠○

論內閣僧格林沁奏請將帶兵大員議處等語直隸總督劉長佑督辦三省勦匪事宜自應迅速進兵將宋景詩股匪殄滅乃時經數月尚未成功殊屬遲延劉長佑著交部議處山東曹州鎮總兵保德按察使丁寶楨管帶馬步兵勇駐紮堂邑不思勵兵滅賊輒至辛集地方令宋景詩謁見未經稟商劉長佑擅議收撫尤屬非是保德丁寶楨著一併交部議處尋議劉長佑照任意耽延例降一級調

用保德丁寶楨均照不應重私罪例降三級調用得旨劉長佑著加恩改為降三級留任保德丁寶楨均著加恩改為革職留任○又諭前因內外臣工奏叅勝保摺內有勝保倚通匪回弁馬兆麒金回回為心腹用債事勒休之提督孔廣順為翼長收受通賊回弁馬振麟金盆美女劄給差使並將地方官拏獲從逆之回教廕生馬承恩索銀釋罪各等情當經諭令多隆阿嚴訊具奏茲據奏稱孔廣

順於同治元年八月。經勝保委充翼長。旋以舊傷復發辭退。九月初一日。准陝西巡撫行知奉旨休致。回弁馬承恩由世職充補駐京提塘。住居省城北關。被回裹去。乘間逃回。勝保勸其捐銀助餉。因無力應允。發交長安縣監禁。並未從賊。亦無索銀釋罪情事。回民馬振麟由武舉投充勝保軍營。屢次打仗。保至都司花翎。上年六月。經陝西巡撫派赴回營。勸諭解散。實未通匪。八月。勝保到省。面委催

捐回民富戶。送過黃精五加皮等藥。並未送黃金美女回弁馬兆麒由守備保升儘先都司。前在孔廣順軍營帶隊。後歸王夢麟統帶。並無潛通消息情事。亦未在勝保軍營聽差。請分別定擬等語。前任固原提督孔廣順。經勝保派充翼長。在未經休致之前。且為日無多。尚無弊竇。該員業以老病休致。著勒令回籍。閉門思過。不准在陝西逗遛。馬承恩雖訊無甘心從逆。及交銀免罪之事。惟身為職官。

被賊擄去日久。忍恥偷生。實屬不知大義。著卽行革職。交地方官嚴加管束。以示炯戒。馬振麟既無私通回匪。及餽送黃金美女等事。著與並未隨勝保當差之馬兆麒。一併交多隆阿軍營差委。以觀後效。儻再不知愧奮。卽著從嚴懲辦。○諭議政王軍機大臣等。前據劉長佑奏。宋逆被勦南竄。當經諭令僧格林沁督兵追勦。並飭劉長佑馳回直境。嚴防該匪西竄。茲據僧格林沁奏。行抵魏灣安營後。

卽督飭馬步各軍。分路前進。先後將趙家塔頭等處村莊克復。直逼甘官屯。劉貫莊賊巢。連日斃賊數千。尚有步賊二百餘名。向東鉅走。其餘馬賊六七百名。向西南狂竄。官軍緊躡其後。該逆遂竄過開州。現在派兵追勦。各等語。宋景詩股匪。經僧格林沁督師進勦。擊殺殆盡。所有逃竄馬步各賊。為數無多。亟應悉數殲除。肅清畿輔。其東竄步賊。業經成保等帶隊追勦。諒易殄滅。惟馬賊狂竄開州。該

大臣務當嚴飭蘇克金。恆齡。盡力追躡。乘其喘息未定。將此股竄匪。就地殄除。毋令闖入豫境。並著劉長佑督率兵勇。由開州一帶迎頭截擊。以勦為防。會同蘇克金等軍。兩路夾攻。仍嚴催李明惠。由河北進勦。以收聚殲之效。張之萬當恪遵前旨。檄飭河北鎮道。扼紮直豫交界處所。豫防餘匪竄越。毋得稍有疏虞。致干重咎。僧格林沁因革堂觀朝等縣。素有匪黨窩藏。現擬駐紮劉貫莊。調派地方官

督飭各團次第清理。卽著嚴飭各該員弁實力按拏。務絕根株。毋貽後患。此時宋逆一股離巢遠竄。鎮壓按捕。無須多兵。該大臣請將直東調募兵勇。趕緊遣撤。自係為樽節餉項起見。惟直東交界地方。人情浮動。剽悍匪黨尚多。僧格林沁指日督師南下。劉長佑。閻敬銘。各有地方之責。自應乘此軍威大振之時。將各處伏莽陸續按捕淨盡。屆時察看情形。兵力如果有餘。自當分別遣撤。以節糜費。本

日僧格林沁所陳。應將兵勇分別酌留。撤遣歸伍歸農之處。著劉長佑。閻敬銘斟酌辦理。恆齡於綠營事宜。既據僧格林沁奏稱未能諳練。所有直隸提督一缺。卽著改派江長貴暫行署理。該員能否勝任。仍著劉長佑隨時察看據實具奏。將此由六百里各諭令知之。○又諭曾國藩奏皖南緊要未能撥兵赴援。臨淮一摺。據稱濱淮之要區有五。距淮稍遠之要區有四。皆為苗逆必爭之地。現在周寬

世所部分守六安迎河集二處。尚嫌單薄。又調桐城一營併紮迎河。蔣凝學又疊平賊圩。襲破尚逆老巢。嚴防河路。為將來進兵溜子口之計。毛有銘所部駐守老廟集。壽六良圩。賴以自保。成大吉駐固始三河尖。潘壇等圩。賴以維繫。均屬難以調動。大江南岸諸軍。自江西肅清後。黃汶金等股圍撲青陽。守將朱品隆病篤不能登陴。兵單糧絕。岌岌可危。李榕由水路赴援。甫抵離城十八里之銅埠。江忠義等由陸路赴援者。尚未至池州。賊意將徧擾皖南最要之區。以掣金陵官軍之勢。至李世忠可保無他。其部眾未必用命。萬一軍心不固。前敵挫失。恐五河後路又蹈二浦覆轍。欲拯臨淮之急。轉貽全局之憂。該大臣已解餉銀軍火赴臨。請俟皖南略鬆。另籌一旅會剿等語。所慮甚屬周密。陳國瑞一軍已疊經催令僧格林沁飭卽速赴臨淮。並令山東等省迅解協餉。當已拔營前進。計日可到蒙

城前以江北軍務稍鬆。又令富明阿酌帶精銳兵勇赴援臨淮。唐訓方可派弁分頭迎探。俟各路兵勇到齊。斟酌機宜。妥速進剿。臨淮兵力漸厚。暫可無須曾國藩撥兵援應。青陽危急。必須援兵早到。方可保全。江忠義席寶田二軍。現在行抵何處。著曾國藩沈葆楨。迅卽催提此項兵勇。令與李榕水路之師會合力解青陽之圍。保全皖南要地。曾國藩已檄令鮑超引軍西上。以剿由江回皖之賊。其甯

國蕪湖南陵涇縣等處。著飭各守將嚴為戒備。以鮑超為遊擊之師。毋令逆氛肆擾。此股竄賊由江西敗遁。其膽已寒。得江忠義等軍並鮑超一軍合剿。當可聚而殲旃。滬上各軍正在得手。必須加功於金陵。方可收效於蘇郡。俟青陽賊股剿辦完竣。仍令鮑超等軍前赴金陵。以圖合圍而顧全局。至李世忠之軍如其踴躍用命。自不必拒絕以寒其心。設仍觀望不前。亦無庸催調以資其力。此中標縱

機宜。諒唐訓方必能領會也。蔣凝學等軍如可進擣逆巢。安撫圩眾。著曾國藩飭令酌量戰守。其倘貫金一匪。是否殲斃。並著查明具奏。將此由六百里各諭令知之。○又諭多隆阿等奏回逆大股渡河撲營。擊剿獲勝。及陰雨未霽。陶茂林一軍不能拔隊。進行各等語。此次回匪渡河撲營。雖經雷正綰督兵擊退。而悍賊均赴高陵。併力抗拒。餘孽又在咸陽蘇家溝等處調來偽元帥孫義寶率黨數千

渡河。意圖攻撲三原各營。亟宜嚴加防範。杜其西竄。仍一面進剿高陵。迅殲醜類。並分兵攻擣永樂店等處老巢。以牽賊勢。不得稍有遲延。致誤戎事。至鳳翔被圍一年。危在旦夕。陶茂林一軍自應恪遵前旨。星夜進兵。卽使泥濘載途。亦應念鳳郡數十萬生靈望援之急。迅速拔隊。豈得畏難苟安。藉口不進。著多隆阿等迅飭該署提督剋日赴鳳。立解城圍。儻敢任意遲延。致鳳翔或有疏失。必當重治。

其罪決不寬貸。雷正綰自入陝後，所向克捷，且能以少擊眾，洵屬智勇兼優。本日已明降諭旨，交部優敘。該署提督務當益思感奮，廓清全陝，與多隆阿同膺懋賞，實有厚望焉。吉順已准其開缺回旗，其所遺河州鎮總兵一缺，多隆阿輒請以曹克忠補授，殊屬不諳體制。惟念曹克忠戰功疊著，且知潔己愛民，以之補授河州鎮總兵，可期勝任。是以降旨允准。嗣後遇有提鎮等缺，該將軍惟當請旨遵行，不得再行擬員請簡，以符定制。多隆阿日內計已出省勦賊，所有省城防守及籌運餉需各事宜，即著張集馨會同穆騰阿妥籌辦理，毋稍疏懈。將此由六百里諭知多隆阿、雷正綰，並傳諭張集馨知之。○以都察院左都御史戴齡署管戶部三庫事。○甘肅河州鎮總兵官吉順因病解職，以記名總兵官曹克忠為甘肅河州鎮總兵官。○以戰功卓著，署陝西提督雷正綰總兵官成祿下部優敘。○

以勇數缺額。革陝西參將劉熾遊擊何九皋等職，仍留營守備。謝聯陞革職，遣戍新疆。予整頓營務，遊擊趙萬金以參將補用。○丙申，諭議政王軍機大臣等：穆騰阿奏藩司糧道抗不發餉，請飭查辦。及派署左翼副都統各摺片，西安駐防官兵口糧缺乏，疊經諭令該省巡撫督率司道設法籌款。按四成搭放俾資餬口。茲據穆騰阿奏稱：自革撫瑛藻因循玩愒，日甚一日，以迄於今，所領之餉，即按二成覈算，亦復不足。現在兵丁男婦大小，又餓斃二千六百餘名。幸多隆阿撥麥三百石，又得苟延數日。懇飭署撫臣張集馨速籌接濟，並請將屢次玩延之藩司糧道查辦等語。所奏諒係實情。除瑛藻業經革職，發往新疆外，所有署藩司劉齊銜署糧道德純，於軍餉要需疊奉諭旨之件，並不遵旨支發，任意遷延，坐視旗兵紛紛飢斃，至於此極。此中有無別情，亟應徹底稽查，以懲玩泄。即著多隆阿、劉

恭將該署藩司糧道等。究竟因何任意玩視之處。詳細查辦。據實具奏。其滿營兵丁月餉。缺乏日甚。仍著張集馨。遵疊次諭旨。迅速設法籌款接濟。卽按四成實銀。米糧折半六斗。不數米豆。折價支放。以資餬口。僅再仍前膜視一味稽延。卽惟張集馨是問。西安左翼副都統一缺。著德興阿照例兼署。伊昌阿卽著前赴烏什本任。以重職守。將此由五百里諭知多隆阿。穆騰阿。德興阿。劉蓉。並傳諭張

集馨知之。○又諭。王通奏。花寺奸回。勾結撒匪。攻陷城堡。已偏郡城。現籌辦理。及兵勇接仗情形一摺。西甯花寺奸回肆擾。已將喇課鎮海堡二處營堡攻陷。其南川營塔爾寺及威遠白塔寺。各報回匪聚眾焚殺。經各營官兵及各該寺呼圖克圖等。會同攻剿。各有殺傷。現在該匪並從西川蜂擁進撲郡城。盤踞城東關廂。勢甚兇狠。經王通督飭兵勇登城守禦。並分路出剿。卽著王通激勵該處員弁

兵勇嚴密守禦。相機出剿。飛催所調青海蒙古番子官兵。並阿家呼圖克圖等練勇。星速到齊。合力剿辦。並著恩麟仍遵前旨。迅卽派撥勁兵。交前任提督經文岱統帶。前往西甯進剿。該處情形愈緊。經文岱何時進發。如果該員不克分身。此外何員可以另派帶兵往剿之處。著熙麟恩麟迅速辦理具奏。西甯鎮營官兵餉銀。欠發已一年之久。此時郡城被回匪圍困。該官兵晝夜防守。僅由王通於捐

款內酌給口食。飢危可想。著熙麟恩麟督令甘省署藩司。無論何款。務卽趕緊籌撥解濟。以資散放。而振兵心。毋稍玩延。青海蒙番業經王通檄調。其貴德巴燕戎格兩廳番族。是否可為我用。著王通恩麟仍遵前旨。妥商籌辦。七氏馬奎源母子。此時曾否行抵西甯。該頭人如果能為回教信服。解釋紛爭。王通卽遵前旨。飭令道員雅爾佳納。督率該頭人妥為辦理。此時該匪已偏城關。兇戾正惡。自應

實力勦擊以挫其鋒。如能疊加懲創。退出城關。該回眾實有兩教相持。求為剖辯等情。卽著玉通相機妥為辦理。以平仇怨。將此由六百里諭知熙麟。玉通並傳諭恩麟知之。○旬到四川。情實罪犯。停決斬犯四人。絞犯一人。餘五十六人予宥。○丁酉。

世宗憲皇帝忌辰。遣官祭

泰陵。

上詣

壽皇殿行禮。○諭內閣。前因山西貢生朱德秀條陳時務。當經降旨。交英桂派令隨同趙德轍等辦理團練。茲據英桂奏稱。該貢生由京回籍。沿途騷擾。於派赴運城辦團後。具稟運城團練廢弛。由於官紳各存意見。並自請飭撥薪水各情。經英桂派令籌防局員查明所稟多屬虛誣。並疊據趙德轍。徐繼畬。玉稱。該貢生攜帶多人。由籍來運。沿途俱用驛站差車。帖束率用欽差字樣。與地方監司大員平

行。並稱其人本非端士。素為鄉里所不齒。懇請奏明撤回等語。此等誕妄夸詐之徒。亟應從嚴辦理。以示懲儆。惟念朱德秀係應詔陳言之人。若予以重懲。恐中外之人疑係因言獲咎。殊非朝廷廣開言路之意。朱德秀著從寬革去貢生。遞回原籍。交地方官嚴加管束。毋許干預外事。○又諭勞崇光等奏請將庸劣不職各員革職一摺。貴州按察使銜貴東道多文。昏庸乖謬。能諂能驕。前署貴陽府任內。聲名狼藉。道銜補用知府繆煥章。辦理軍營文案。捏敘戰功。屢次濫膺保舉。輕浮妄作。補用知府黃紹賢。心術不正。專意鑽營。前署貴筑縣任內。軍民嘖有煩言。補用同知直隸州知州袁鴻基。嗜好太重。不能振作。保升同知直隸州知州彭澗。巧詐性成。慣走聲氣。濫膺優獎。眾心不服。捐升通判陳光鈺。抽釐苛擾。不愜輿情。補用知縣王楨。操守不謹。聲名平常。補用知縣朱德昌。貪鄙見小。被控有案。

以上各員均著卽行革職。其多文一員尚有應行查辦案件。仍著勞崇光、張亮基飭令歸案聽候查辦。○諭議政王軍機大臣等。劉長佑奏宋逆被勦西竄。親督步隊分道堵截。及賊由濬縣渡過衛河。竄入臨成一帶。各摺片所奏宋景詩被勦狂奔。竄過開州等情。與僧格林沁前奏大略相同。該督以擒獲賊供。有宋逆在井店被馬隊擊敗。已由濬縣西渡衛河之信。當派余承恩等各隊馳赴臨漳。江長

貴、徐廷楷各率所部馳赴臨洺關及順德府一帶。以備邊防。而資後勁。詎賊已於十七八日為馬隊追及。由濬縣晁過衛河。竄入臨漳成安一帶。是賊蹤已復自西而北。余承恩等各隊曾否與賊相遇。該督現駐大名。正可督令與江長貴等各軍由順德臨洺會合堵勦。王榕吉之兵馳赴鉅鹿。參將劉祺馳赴正定。亦皆可以聯絡接應。著劉長佑迅卽嚴督諸軍迎頭截擊。以防北竄。恆齡、蘇克金馬隊由

內黃取道追勦。是已在賊之南。追勦愈緊。必至賊蹤逼近畿疆。此賊馬隊尚多。直省官軍均係步隊。不足制賊死命。著僧格林沁飭令恆齡、蘇克金速卽開道繞出賊前。自北而南奮力迎勦。其河北一路著張之萬、懷遵前旨飭令該鎮道等實力防勦。賊由開州竄越濬縣渡河。業經擾及衛輝屬境。該鎮道等曾否帶領兵練截擊。並著張之萬嚴行督率認真防勦。毋任賊匪乘間往來。致干咎戾。晉直交

界相距漳洺道里非遙。現在宋逆有圖竄山西之勢。並著英桂、豫飭所屬嚴加備禦。毋令賊於直境被擊得以西越晉疆。擾及完善。僧格林沁現在是否尚駐劉貫莊。所有革堂觀朝等縣窩藏匪黨。擒捕如何。如已有端緒。卽可徑交閭敬銘督率地方辦理。該署撫務當嚴督所屬聯合紳團實力擒捕。淨絕根株。宋景詩一股殘敗之餘。率其死黨冒死紛竄。諒人數已不甚多。卽著僧格林沁督令各軍乘

勢埽除盡殲醜類。劉長佑督師日久。未能將此賊迅圖殄滅。現在賊蹤復擾直境。尤應激勵各營兵勇。與恆齡等馬隊會同夾擊。以速收效。其大名鎮道姜國仲祝塏二員所部兵勇。現尚駐開州等處。仍飭嚴防回竄。隨時探明賊蹤。與迎頭攔截之軍。合力兜圍。毋再貽誤。將此由六百里各諭令知之。○又諭吳崇秦。蒙城危急。遵飭陳國瑞赴援一片。據稱渦河南北兩岸之王圩宋圩。皆為賊踞。自蒙城東南。現繞至北面西面。悉皆苗壘。皖軍在城外所紮各營。盡包賊中。其英翰小淵集官軍。隔於城西。該城糧道四絕。萬分危急。苗逆以馬步七八千出外分抄。英翰一軍被賊衝退。經姚廣武從旁夾擊。該逆復以步賊數千由南路衝上。兩面包裹。尤悍異常。官軍奮勇苦戰。逆眾始行潰遁等語。蒙城自馬新貽移軍赴臨後。賊勢趨重。築圩環逼。實屬情形萬緊。該城所恃以為援應者。惟陳國瑞一軍。該總

兵已於八月十四日抵徐。即著吳崇傳知該員迅速進兵。先通蒙城餉道。力解城圍。毋得稍事遷延。致令孤城坐困。北竄捻股。既由豐縣南遁回巢。宿西一帶。有父憲銀一軍。諒資堵剿。其姚廣武一軍。即著吳崇飭令與陳國瑞之兵。聯絡策應。合力進取。毋誤事機。前因江北軍情稍鬆。而臨淮甚緊。有旨令富明阿酌帶官兵。赴臨援應。此時蒙城危急。萬分富明阿之軍。如能早到臨淮。相機進取。亦可掣動蒙城賊勢。即著該都統懍遵前旨。迅即拔隊兼程前進。與唐訓方合力戰守。江北防兵久經休息。臨淮得此生力之軍。亦可大振聲威。兼籌進取。則蒙城軍事。或可稍鬆。解圍必當更易。諒富明阿必能領會機宜。迅速前進也。江北防務。即著都興阿督令在防各軍。嚴扼要隘。毋稍疏忽。以副委任。將此由六百里各諭令知之。○又諭李雲麟。秦。馳援陝南。通籌進剿。請由楚陝兩省各設糧臺一摺。陝南

軍務亟須整飭。毛震壽雖尚能措拄。而勦辦總難期得力。卽著李雲麟迅由鄖陽帶領所部星馳赴陝。速解漢中城圍。分救鎮安。其漢陰及山陽所屬之漫川關等處分布各軍。卽照所擬辦理。仍著劉蓉迅速由川赴陝。以資統率。劉蓉到陝南後。一切地方軍務及毛震壽李雲麟新舊各軍均歸該撫節制。以一事權。李雲麟卽可會同劉蓉陳奏事件。無庸自行單銜具奏。至楚陝兩省應行各設支應糧

臺著官文嚴樹森劉蓉張集馨等查照辦理。並將陝南軍餉由兩省源源解濟。毋令缺乏。李雲麟現在帶兵由鄂赴陝。如需襄辦營務文案等件之員。秦楚兩省自不乏人。可以隨時擇調。所請國子監司業紹祺兵部郎中國英二員均著毋庸令其前往。將此由六百里諭知官文嚴樹森劉蓉李雲麟並傳諭張集馨知之。○又諭勞崇光奏查明前署督臣殉難及滇省大概情形一摺。所奏前署雲貴總

督潘鐸死事緣由與前日駱秉章所奏大略相同。現在杜汶秀仍盤踞大理。叛逆已成。馬榮踞尋甸。馬聯陞踞霑益。皆受杜汶秀偽職。時至附近各處滋擾。徐之銘一言一動皆聽回教諸人指揮。近則不獨回民挾制。卽岑毓英亦遇事把持。滇省大小政務皆由岑毓英馬如龍主持。徐之銘諂附回民。以為護符。是非倒置。任意欺罔。實堪痛恨。馬如龍心術隱微。固不可知。既據該督奏稱。外貌頗襲取忠

義之名。不肯自居叛黨。且具稟該督詞尚恭順。卽著勞崇光賈洪詔乘機誘掖。或尚有可用之處。卽照該督所擬設法暫與羈縻。但須隨時防範。不可墜其詭謀。省城兵權利權均歸回民。雖當此兵餉兩絀。未能遽挽積弊。然將來應如何辦理。亦當豫先籌畫。庶可漸圖規取。勞崇光賈洪詔務當隨時確查該省情形。與駱秉章悉心籌商。妥為辦理。至本地團練如臨安之梁士美東川之楊盛宗。既稱得

力應如何加意拊循。俾為我用之處。並著會同妥籌。設法駕馭。將此由六百里各諭令知之。○又諭勞崇光等奏。通籌黔中下游大局。並攻克桐梓縣屬鼎山城賊巢。黔西州水城廳肅清各摺。貴州黎平之六崗鎮遠之張家寨石阡之荊竹園等處賊匪。負嵎老巢。句結蔓延。雖張家寨荊竹園竄匪。疊經官軍堵剿。獲勝。將火燒橋等處各賊巢。先後攻克。惟黎平等府賊匪。仍尚不少。亟須痛加勦洗。著勞

崇光。張亮基。督飭將弁。激勵兵勇。實力進攻。務當掃除羣醜。迅殄逆氛。所稱貴州驍將健卒。尚不乏人。但由湖南撥餉。按月解黔。不難陸續蕩平。無須以楚援黔等語。該督撫辦理貴州軍務。是其專責。今但借資湖南之餉。而不復資其兵力。諒勞崇光等確有把握。定能剋期掃蕩。以慰朝廷廑繫。桐梓縣屬之鼎山城賊巢。現已攻克。黔西水城。一律肅清。惟賊蹤飄忽。時散時聚。從前田興恕辦理軍務。於

各該地方屢復屢陷。甚不足恃。該督撫務將已復各州縣。督飭該地方官。嚴密守備。認真防禦。毋令賊匪再行闖入。以期次第廓清。僅業經肅清之地方。復被賊匪竄陷。惟勞崇光。張亮基。是閱貴州教民一案。昨因時閱月餘。未據該督撫將辦理情形覆奏。復諭令勞崇光等查明。如田興恕之任性妄為。實由劣員謝葆齡等愚弄所致。究竟何員尤為可惡。係屬罪魁。該督等即將其愚弄田興恕及或有

挑唆慫恿等情。切實查明。盡法懲辦。並將該劣員謝葆齡等罪狀奏聞。著勞崇光。張亮基。懍遵八月十五日寄諭。妥為辦理。設法趕緊了結。該督撫老成練達。素顧大體。諒能不負委任也。將此由六百里各諭令知之。○又諭。常清奏。遵籌伊犁分界。辦理防禦情形。添兵守卡。堵禦獲勝。調武隆額等來營。續獲勝仗。各摺片。明緒等奏。先事豫防。麟興等奏。查邊情形。各摺。俄人在伊犁卡外逞兵。疊次撲我。

營盤並聽哈薩克回匪勾結越嶺內犯均被我兵先後擊敗奔竄防堵甚屬嚴密惟俄人添糾黨與復來滋擾亦恐不免常清現調武隆額穆克登額前赴伊犁差委著卽迅催該員等馳往以便帶兵防勦如俄人仍添黨內犯伊犁官兵不敷應用卽著常清飛咨平瑞奎棟迅將備調官兵飭令馳赴伊犁助勦常清布置各節不得不如此辦理惟此事須以速於了結為是仍著遵奉前次諭旨辦理以

為後日轉圜地步至伊犁地方回眾該將軍業將頒到分別良莠諭旨廣為曉諭自可稍安反側仍當督飭各城文武嚴密稽查以清內奸毋令與外夷勾結所稱俄人如果前來伊犁商議分界擬先與議明不帶器械止准十人入卡籌畫亦尚周密惟前已疊次諭令明緒明誼令其照會該國西悉畢爾約定勘界日期會同該國使臣准照該使臣議單妥為辦理並諭知常清令其行知各城大臣一

體妥為照辦著常清仍遵前旨辦理其伊犁分界事宜亦著該將軍知會明緒等統由塔爾巴哈台議定以歸畫一此時伊犁疊獲勝仗轉圜較易並著明緒明誼乘此機會速將分界事宜辦結以免別啟釁端其哈薩克布魯特人眾分入俄國及仍隸我界之哈薩克等部落應如何分別安插並著常清知會明緒等於分界時妥議章程俾無後患至良善內附之哈薩克布魯特等自不能任聽俄人

強行索去致令回部人眾解體其出力報效並打仗出力之官弁兵勇並著常清彙案奏獎以資鼓舞塔爾巴哈台所屬之胡素圖卡內有俄人兵隊擅來駐紮雖經撤退難保不去而復來並有續添俄兵與巴克圖卡外原駐俄兵合隊情形叵測明緒等所籌布置尚為妥協明緒明誼仍當遵奉前次諭旨向俄營告知以現已由總理各國事務衙門知照准照該國使臣議單辦理令其靜候使臣來

塔定議。仍一面嚴加防範。毋稍疏懈。至科布多所屬之哈屯河地方一帶。經麟興等派員前往查勘。行至庫克烏蘇地方。因路險林雜。不能前進。據嚮導兵稱。自道光十九年以來。並未到過哈屯河地方。巡邊事務廢弛已久。惟現當分界之時。不得不認真查辦。仍著麟興揀派妥員。探明路徑。並查明該處有無俄羅斯兵隊。如無兵隊阻截去路。卽飭前往查明。以清疆界。至烏梁海每年交送俄羅斯鹿

皮。日久相沿。且當分界未定。人情惶惑之時。茲事止可無庸深究。本日復據景廉密奏。伊犁奏查哈薩克承襲汗爵公舉之人。與前奉諭旨兩歧一摺。綽坦冒襲汗爵。前據景廉於結案時奏明。情尚可原。曾經降旨加恩寬免其罪。嗣因常清奏查阿勒坦沙拉父子下落。並未將前奉諭旨聲明。復經諭令常清。景廉飭令哈薩克各台吉公舉一應襲汗爵之人。並未將綽坦汗爵革除。現據景廉奏稱該遊

牧人等久經遵奉綽坦為汗。且該綽坦又有不肯歸順俄國之語。塔爾巴哈台邊境哈薩克人眾。皆係綽坦所屬。值此邊疆有事之秋。自應設法羈縻。本日據明緒等奏。恐內附之哈薩克。被俄人煽惑。已調綽坦等輕騎來城。曉以利害。可見綽坦尚能為我盡力。豈可令其妄生疑懼。綽坦著仍准其承襲汗爵。其常清現在行查塔城公舉應襲汗爵咨文。卽著明誼密行撤銷。以安其心。切勿輕行宣露。致

生枝節。明緒奏接俄國西悉畢爾總督覆文。因外封條咨覆明誼。未便拆閱。仍轉遞伊犁。拆閱等語。明緒既與明誼常清等同辦一事。於接到覆文時。儘可先行拆閱。如有應行覈辦之處。庶無貽誤。閱後加封轉遞。止須知照拆閱一節。以免展轉耽延。嗣後常清明誼。明緒遇有公文。均當如此辦理。不必過於拘泥。現在所遞公文。著常清於拆閱後。卽知照明誼。明緒。妥籌辦理。將此由六百里各諭令知

之。○又諭景廉奏遵旨偵探俄羅斯布魯特情形。倭里罕後裔下落。並密陳綽坦仍宜承襲汗爵各摺。倭里罕是否陷入霍罕城。或由城內逃出被害。斜黑阿渾子孫。是否在倭什地方。或附從希皮察克布魯特。均無確實消息。著景廉仍行設法切實探明。隨時具奏。至俄羅斯占踞安集延城池三處。或引誘沙雅克等愛曼布魯特隨從。或與布魯特鄂斯滿等構釁。雖係卡外蠻觸相爭。惟俄夷貪心無厭。卡外各部。勢將盡為吞并。與西路邊界日形逼近。不可不豫籌防範。況阿哈瑪塔爾愛曼俄羅斯頭目巴什吐克等。既有教布魯特帶俄人七百名。前往喀什噶爾之信。若係為通商而來。何至聚集如此多人。該國既白結哈薩克人眾。在伊犁卡倫滋事。難保不於喀城邊卡。窺伺滋擾。著景廉嚴密行知奎芳。福珠凌阿。加意防範。毋稍疏忽。鄂斯滿等。既聚眾一萬二千名之多。在松庫勒地方。將俄

人擊敗。儘可設法籠絡。俾為我卡外屏藩。著景廉卽據派妥員。帶令曉事回子前往偵探。或可藉資臂助。至綽坦冒襲汗爵一案。現據景廉奏稱哈薩克奉綽坦為汗。業已相安日久。且所屬部眾。多在塔城附近地方。又不願附俄人。本日據明緒等奏。尚調綽坦等輕騎前赴塔城。曉諭。自應設法羈縻。俾為我用。綽坦本未降旨革除汗爵。著卽仍循其舊。本日已諭令明誼等。將常清咨文撤銷。並諭令常

清知悉矣。將此由六百里諭令知之。○山西巡撫英桂。議覆湖北巡撫嚴樹森條陳停補制兵糧額。查晉省幅員遼闊。額兵三萬一千九百餘名。現因徵調設防。不敷分撥。遇有缺出。勢難停額待補。至外來勇丁。口食厚於制兵。強令入伍。恐非所願。應無庸議。下部知之。○四川總督駱秉章奏。軍務未竣。請將本年軍政展緩辦理。從之。○以貴州永安協副將全祖凱為雲南騰越鎮總兵官。○以勦賊進

延。直隸總兵官姜國仲道員祝壇。下部議處。
○以抗調索擾。革雲南總兵官劉義方遊擊
周宗清職。○以貴州黔西勦辦號匪。州境肅
清。賞參將何顯仕二品封典。道員盛鑣都司
彭萬盛等花翎。知縣劉聯星等藍翎。餘加銜
升敘有差。○以貴州桐梓攻克賊巢。予總兵
官沈宏富以提督用。餘加銜升敘有差。陣亡
副將李明萬遊擊王永堂都司張繼春守備
唐正位等祭葬世職加等。○以貴州水城勦
辦苗匪。廳屬肅清。賞都司胡雲龍等藍翎。餘
升敘有差。予陣亡守備劉雲山祭葬世職。如
遊擊例。○予雲南東川陣亡通判吳榮禧祭
葬世職加等。○予貴州普安陣亡署知縣陳
樹南祭葬世職加等。○調烏嚕木齊綠營兵
一千五百名。阿克蘇換防兵五百名。赴伊犁
協同防剿。○豁免山西豐鎮。綏遠。歸化。太谷。
興。奇嵐。洪洞。翼城。汾西。臨汾。黎城。甯鄉。應山。
陰。靈。邱。朔。虞。鄉。臨。晉。榆。社。和。順。沁。沁。源。忻。定。

襄代。垣曲。霍。隰。二十八廳州縣。並清水。河。甯。
遠。和林。格爾。托克托。薩拉齊。通判所屬地方。
積欠錢糧地租。○戊戌。陝甘總督熙麟奏。平
涼被圍。檄飭余萬明等飛速往援。得旨。平涼
被圍已久。急盼援兵。該督當嚴飭余萬明。激
勵將士。一鼓作氣。迅解城圍。俟所募楚勇到
齊。再圖分攻。合勦。廓清大路。接仗情形。仍著
續行奏聞。○以巧滑規避。革甘肅知縣鄒文
蔚職。遣戍軍臺。○予江蘇海州殉難候選縣
丞朱鎮平等紳民婦女九十一員名口分別
旌卹如例。並予建祠。○句到陝西等省情實
罪犯。停決甘肅斬犯一人。餘三十九人。予句。
○己亥。諭內閣。和潤。德椿。奏清查倉庫虧短
各員。請分別辦理一摺。奉天各廳州縣倉庫。
自道光二十八年清查後起。截至咸豐十一
年止。統計各屬倉庫。共虧銀十四萬七千二
百餘兩。票銀三萬三百餘兩。制錢十一萬四
千一百餘串。小數錢九千二百餘串。粟米二

十萬八百餘石。展轉虧那。愈積愈重。亟應覈實查辦。以重庫儲。著照所請。所有奉天歷任欠員。無論在省離省。在任離任。均著先行革職。勒限追繳。俟限滿有無完交。再行分別辦理。其業因虧空叅追及另案革職病故各員。俱著歸入此次清查一律辦理。至接收前任虧空。而本任實無虧短者。著加恩暫行免議。如有前任叅追無著之款。仍著落最後出結之員賠繳。若延不完繳。卽著從嚴叅辦。歷任失察之治中知府及兼尹府尹等均著查取職名。照例叅處。和潤查辦遲延者。一併交部議處。餘著照所議辦理。另片奏請飭告病回旗之知縣。來省覈算交代等語。前任承德縣知縣肇麟交代款項。與前後任諸多齟齬不清。著該旗催令該員前赴奉天。會同前後各任詳細覈算。並著和潤等查明有無虧短確數。再行分別辦理。尋吏部議。和潤照查辦事件遲延一年以上。例降一級留任。得旨准其

抵銷。諭議政王軍機大臣等前據左宗棠奏臺灣粵勇潰散情形。當經降旨。將署提督吳鴻源革職拏問。所有福建水師提督卽命林文察署理。責令迅速起程。渡臺勦匪。本日接據原任臺灣道洪毓琛六月初三日摺報。所陳軍務遷延兵餉匱絀情形。並請特派大員來臺督師。勒限滅賊各等語。雖未將吳鴻源等貽誤實情據實叅劾。而軍事之掣肘。呼應之不靈實已意在言外。該故員於病勢危殆之際。猶能念及時艱。殫心籌畫。實屬可憫。現在林文察一軍。是否渡臺。卽著左宗棠徐宗幹飭令該署提督懍遵前旨。趕緊前赴臺郡。督率諸軍。力圖埽蕩。並著左宗棠等酌度賊勢軍情。勒限歲事。儻再逾限無功。吳鴻源覆轍具在。斷不能為林文察寬宥也。丁曰健受朝廷厚恩。膺斯重任。當與林文察等妥籌防勦。毋得稍有疏懈。致干咎戾。將此由五百里諭知左宗棠徐宗幹並傳諭丁曰健知之。

○又諭英桂奏皖捻闖入豫西調派各路兵勇嚴防一摺據稱探報捻匪大股已由許州竄至洛陽相距河岸及潼關不遠晉省在防兵勇數止萬餘如該匪銳意西趨一至新澠陝州則垣曲縣之東灘渡平陸縣之茅津渡芮城縣之大禹等渡皆係一河之隔在在須防該撫已飛飭袁復清統帶楚勇先往東灘渡駐紮並抽撥勁旅分赴茅津渡等處與原派防兵嚴加守禦如匪黨竄近晉邊或附近潼關一帶豫省有兵追勦晉師尚可酌派渡河會擊儻豫省無兵賊勢浩大沿河口岸同時喫緊卽有自顧不遑之勢等語前因張之萬奏毫捻擾及許境經兵練擊敗悉數西趨諭令英桂認真防守昨據劉長佑奏宋逆被勦由濬縣渡過衛河竄入臨漳成安一帶當以晉直交界相距漳洺道里非遙恐該逆圖竄山西復諭英桂豫飭所屬嚴加備禦茲據奏報防河情形尚屬認真者卽飭令和昌劉

子城等於防務較鬆處所撥派兵勇扼賊來路無論捻匪宋逆竄及河干均卽實力勦擊毋使一人一騎得以偷渡如豫省直隸有追勦之師卽派兵渡河會擊以期一鼓殄除其潼關一帶卽召會多隆阿張集馨迅派兵勇迎頭截擊並飭令潼關廳將沿河各項渡船全提北岸以免搶渡該撫務當嚴飭所屬實力辦理不得徒託空言致干重咎張之萬於八月初七日奏報捻匪擾及許境被擊西趨至今將及二旬未得該撫續報現據英桂奏捻匪大股已由許至洛似已蓄意西趨張之萬當一面飛咨英桂派兵堵勦一面仍飭張曜等兵繞出賊前痛加截擊不可徒成尾追之勢致令竄入晉疆昨據劉長佑奏宋景詩由開州竄越濬縣渡河業經擾及衛輝屬境亦經諭令張之萬督率防勦毋任乘間往來該撫身膺疆寄於捻逆宋逆分道肆擾蔓延豫境惟當會同毛昶熙商調兵勇分投堵截

保衛地方豈可遷延貽誤莫展一籌再蹈鄭元善覆轍著卽嚴飭帶兵各員弁實力勦辦並將近日軍情迅速馳奏將此由六百里各諭令知之○閩浙總督左宗棠等奏廣東紅單師船勦匪得力請留閩省水師調遣並將管帶船勇各將弁歸閩補用允之○補鑄杭州織造北新關南新關各關防從巡撫左宗棠請也○以福建嘉義縣城解圍賞在籍同知王朝輔等花翎都司銜蔡騰飛等藍翎餘加銜升敘有差○庚子諭內閣前據理藩院奏熱河三座塔司員祥明因台吉寶倫涉訟咆哮公堂擅將該台吉摘頂看管恐其中另有別情請將祥明暫行解任交熱河都統親提研訊當經降旨允准茲據麒慶奏訊明台吉寶倫與民人吳定功因錢債涉訟經司員祥明訊出寶倫歷次借欠吳定功錢文屬實因寶倫不服審斷立而不跪出言頂撞祥明當將該台吉摘頂責押詳請咨明斥革並無

另有別情請分別辦理等語台吉寶倫因錢債涉訟並不長跪聽審輒敢當堂頂撞實屬膽玩著卽革去台吉職銜司員祥明辦理此案並不詳請部示遽將台吉寶倫先為責革始行詳咨亦屬不合著交部議處○諭議政王軍機大臣等本日據議政王軍機大臣呈覽僧格林沁信函一件內稱蘇克金恆齡於十七日追賊至開州西北花谷集尚有馬賊千餘步賊六七百名列仗抗拒官軍進勦斃賊八百餘名步賊均已殲盡馬賊至北高店搶渡衛河淹斃之外尚有馬賊五百餘名向西北奔竄等情又據曲周縣稟報馬賊一股約四五百名自廣平府城東竄至雞澤小寨一帶後有官兵尾追等語前據劉長佑奏報賊由濬縣內黃竄至臨漳成安一帶當經寄諭該大臣督撫等督飭諸軍會合堵勦並飭令蘇克金恆齡等馬隊繞出賊前自北而南迎頭截擊現在賊復自廣平而竄雞澤是又

已由臨漳成安駸駸北竄。劉長佑前所派赴順德臨洺鉅鹿正定諸軍。及馳往臨漳之余承恩等各隊。究竟曾否到防。何以未見迎擊。著卽嚴督各軍。迅卽探明賊蹤。聯絡堵剿。直軍多屬步隊。不足制賊死命。恆齡蘇克金等馬軍。僧格林沁務卽遵奉前旨。飭令閒道繞出賊前。迎頭截擊。與直省各軍會合。勦辦速將此股敗殘匪黨悉數殲除。毋任節節尾追。使賊日趨於北。逼近畿疆。甚至沿途復肆。裹脅賊氛轉熾。致干咎戾。此時賊如尚在難澤一帶。江長貴徐廷楷及王榕吉之軍。正可由臨洺關順德鉅鹿東西兩面迎頭攔截。若令賊再北竄。各軍又必悉成尾追之勢。步步落後。不能及賊。劉長佑甫經被議。此時賊復竄入直境。務當激勵諸軍。迅圖滅賊。毋再遷延。此股敗賊。前據僧格林沁奏報。自東境被勦之後。所餘馬隊不過六七百名。何以此次蘇克金等又復報稱馬步賊匪尚千餘名。是否

沿途尚有夥黨接應。已由僧格林沁飭各地方查明稟覆。並著劉長佑一體飭屬確查具奏。宋景詩首匪是否尚在竄賊之內。僧格林沁信函亦未敘明。並著偵查確實具奏。當宋逆南竄時。卽據劉長佑奏報。飛調豫省河北鎮道迅率所部兵勇會集滑濬等縣團勇。在於直豫交界擇要堵禦。何以賊蹤往來直豫沿邊未見豫軍截擊。著張之萬嚴飭該鎮道等認真防剿。與直省各軍前後聯絡。以收夾擊之效。賊蹤日近。邢汾晉省邊防尤應早為設備。著英桂速遵前旨。嚴飭所屬於潞平一帶調集兵團。豫籌堵剿。毋令乘閒乘隙。前曾寄諭英桂以甘省軍火缺乏。飭令將祥安在晉所造火箭炸礮子等項酌量分撥解赴熙麟慶陽軍營應用。本日復據熙麟奏報。平涼失陷。該省軍情愈緊。所請由京營撥運軍火。雖經諭令管理該營王大臣酌辦。殊恐緩不濟急。著英桂仍遵前旨。將祥安所造火箭礮

子各項速卽酌撥派員解往慶陽應用。將此由六百里各諭令知之。○又諭多隆阿奏馳回北岸進剿一摺。熙麟奏平涼失守並調外火器營官員工匠火器等各摺片。多隆阿已由省起程馳赴渭北。並檄令穆圖善將南岸各營移過北岸。合力痛剿。現在陝西回匪屢經敗創。賊膽已寒。多隆阿正宜乘官軍屢勝之威。一鼓作氣。將十三村餘匪埽除。進拔高陵。並令雷正綰一軍由西路進攻涇原等處。

賊巢以期肅清渭北潼關地方防務緊要。皖捻竄入豫省後。日向西趨。該大臣務當隨時偵探。加意嚴防。商雒等處亦宜嚴密布置。扼要堵禦。不可稍涉大意。致有疏虞。甘省平涼府城現已失守。回匪兇熾。日張勢必併趨涇州。冀與固原賊匪聯成一片。該省賊眾兵單。軍情緊急。較甚於陝。多隆阿如攻克十三村。兵力自可有餘。卽著速撥一軍馳援甘省。以顧大局。儘不能另撥兵勇。亦宜速飭陶茂林

一軍迅解鳳翔之圍。以便前赴平涼。毋稍遷延。致誤事機。熙麟所派余萬明等軍往援平涼。尚未起程。該處城垣已先為賊攻陷。尚非赴援不力。所有自請嚴議之處。著加恩改為交部議處。仍著飭令余萬明等嚴扼涇州。相機堵剿。毋任與固原賊眾勾結。仍飛催王泰來續募楚勇。星夜馳赴慶陽。以便規復平涼。其平郡西南各路扼要處所。卽著恩麟迅速調派兵勇嚴密堵扼。毋令蔓延他處。致成燎

原。前據熙麟奏請撥火器營所造火箭等項。曾經諭令英桂將火器營官祥安在晉省製造之火箭炸礮子等項。勻撥赴甘。本日復諭令英桂迅遵前旨。就近撥往。此次熙麟續請撥解炸子火箭等項。並調吉慶等七員雇募工匠解運鋼銅赴甘。該營精於製造之人。本屬無多。銅鐵等項。本係由部支領。運往亦覺不易。本日已交管理該營王大臣酌覈辦理。矣。將此由六百里諭知多隆阿熙麟。並傳諭

恩麟知之○又諭熙麟秦平涼府城被匪用地雷轟陷該匪有會同固原大股攻撲涇州之勢請飭總兵唐友耕帶兵飛速援甘等語平涼現已失陷該逆擬句合固原大股直撲涇州甘省兵力甚單情形萬分喫重多隆阿所派之陶茂林一軍前據奏稱先須馳援鳳翔俟郡城圍解餘匪盡殲始能漸達平涼相機勦辦現在亟需鄰省大支勁旅星速馳援始足以壯軍聲而遏狂寇駱秉章素顧大局諒必能統籌兼顧著仍懍遵疊次諭旨迅速抽撥得力兵勇二三千名剋期赴甘卽交唐友耕統帶前往如該總兵現因在川帶兵一時未能出省卽著駱秉章遴選知兵鎮將大員迅行帶往以利攻勦甘省情形糜爛已極該督惟當不分畛域速籌救援萬不得以兵力無可分撥為詞稍存膜視將此由六百里諭令知之○河南巡撫張之萬奏遵查襄城縣知縣錢增鴻被叅各款均無實據惟於拏

獲匪犯周華等訊明正法時並未具稟雖因防勦喫緊未遑兼顧究屬不合應請交部議處從之○添設順天府四路捕盜營經制外委額外外委各四員馬兵四百名從兼管府尹萬青黎府尹林壽圖請也○舉行同治元年軍政廣東卓異官四員議敘如例○予安徽績溪殉難民婦程胡氏等三口旌卹如例○句到湖廣山東情實罪犯停決湖廣斬犯七人山東斬犯二人餘三十六人予句○平

丑諭議政王軍機大臣等閻敬銘奏移軍東昌按勦餘匪並擬剗調陳貫甲來營各摺片閻敬銘移軍東昌後以革堂冠館餘匪廣聚飭保德呼震等分赴朝城莘冠館堂各路帶隊捕勦各營陸續按殺並將朝城之付驛集攻毀擒獲餘賊辛魁沅等及宋逆家屬二口正法辦理尚屬認真該處為直東交界降匪教匪嘯聚之區從前帶兵及地方大吏姑息養奸未能大加勦洗兵至為民兵去為寇養

癰貽患。流毒至今。兼以東省團練。從前辦理不善。以致惡團林立。抗官逼民。恃強玩法。幾於良莠不分。正宜乘僧格林沁大軍攻勦。宋逆得手之時。痛加蕩滌。掃除羣醜。庶幾境內敕安。不至大兵一撤。萌孽復生。此等皆地方大吏應為之事。該署撫惟當飭令保德等。分道實力搜捕。並將各處黑團。嚴行懲辦。毋得草率從事。儻將來官兵撤後。再起變端。惟閻敬銘是問。宋逆現餘馬賊五六百名。由廣平

竄至雞澤。恐直隸官軍堵禦嚴密。該逆復回竄東境。臨清館陶一帶。防務甚關緊要。務當督飭丁寶楨等軍。嚴守要隘。與直隸各軍聲息聯絡。會合兜勦。毋稍疏虞。東省強團。臨邑陳貫甲為尤著。該團首私養護身壯勇至數百名。日常製造槍礮軍械。勒捐居民。盈千累萬。旁及濟陽等處紳富。均各派捐。愚民附和。修築圩寨。周圍一二十里。私設公局。收理呈詞。似此壞法亂紀。已成尾大不掉之勢。該署

撫以該國防堵擒匪。亦屬有功。尚無變亂實蹟。擬劄調來營。歸標候補。並設法散其團眾。自為消患。未萌變化。民風起見。即著照所擬妥速辦理。儻該團不服調遣。須煩兵力。即當速為勦辦。乘僧格林沁大軍尚在直東境內。聲威所懾。自易勦除。斷不可姑容釀亂。亦不可輕發損威。署邱縣知縣吳瑞珊。虛報勇糧。前經該署撫奏參。已於摺內批示革職查辦。此次該署撫訪查該革員並未雇募勇丁。且

調取帳冊。亦未能交出。實屬膽大妄為。著即將該革員拏問。提省審辦。以懲貪冒。將此由五百里諭令知之。○浙江巡撫曾國荃奏報攻克江東橋石壘。得旨據稱陳湜等攻克江東橋石壘。尚為出力。著將詳細戰狀及應行獎卹人員。咨明曾國藩彙案陳奏。現在曾國荃尚未履浙撫之任。嗣後金陵攻勦情形。著與楊岳斌。彭玉麟。一律隨時稟知曾國藩。統由曾國藩奏報。曾國荃無庸單銜出奏。以一

事權○准揀選知縣王宜聰投效欽差大臣曾國藩江南軍營○壬寅諭議政王軍機大臣等前因李雲麟擬由鄖陽赴陝請由楚陝兩省各設糧臺當經諭令官文等查照辦理並將陝南軍餉由兩省源源解濟茲據李雲麟奏稱趕赴鄖陽督兵前進計日可抵陝境惟去楚日遠楚軍行餉未知何時解到其支應糧臺能設與否尚無成議川省與陝北接濟尤屬迫不可待請於夔關現存關稅項下

暫行動用等語李雲麟進兵攻勦正在喫緊不日馳抵漢中所部數萬兵勇必須糧餉充足方免譁潰之虞著駱秉章詳加酌覈查明夔關現存關稅項下提款暫為接濟庶不至停兵待餉貽誤事機至楚陝兩省應設糧臺著官文嚴樹森劉蓉等仍遵前旨迅速妥籌辦理陝南軍餉仍著該督等趕緊籌款毋令缺乏李雲麟馳抵陝南即著迅速部署各軍查明何路賊勢緊要即向何處攻勦毋得專

待劉蓉稽延時日將此由五百里各諭令知之○旬到直隸山西熱河情實罪犯停決直隸斬犯一人絞犯一人山西斬犯三人絞犯二人餘四十九人予宥○癸卯諭議政王軍機大臣等劉長佑奏賊竄直境東北經各路步軍追截折奔東南現籌合力防勦一摺宋逆以敗殘餘匪避兵而行一晝夜輒狂奔三百里是其力將竭其技已窮派出馬隊果能認真追勦何難聚而殲旃乃恆齡蘇克金等

自開州花谷集接仗後及賊竄至阜城東光徐廷楷等率步隊跟追距賊不遠而恆齡蘇克金馬隊尚未見到本日伯彥訥謨祜到京召見面詢賊情與劉長佑所奏均相符合並據奏稱道經阜城宋逆亦跟蹤而至詢以恆齡蘇克金馬隊則尚落賊後未之得見直隸各軍步隊居多全賴恆齡蘇克金馬隊追勦可以制其死命乃賊匪馬隊如此狂奔而恆齡蘇克金馬隊獨遲遲不進是其貽誤戎機

實難辭咎。恆齡、蘇克金均著先行交部議處。現在該員等所部馬隊行抵何處。卽著僧格林沁嚴飭迅速前進。與直隸官軍會合夾擊。盡殲醜類。儻敢仍前玩泄。意存觀望。必將該員等從重治罪。現在宋逆竄至東光一帶。該處東距天津南距武德。在在須防。且該逆於武邑境內。劫去餉銀二萬兩。藉資盜糧。若不趕緊撲滅。其勢必將復熾。劉長佑現已馳赴景州。卽著督飭徐廷楷、余承恩等跟追痛勦。

不得再落賊後。一面嚴催江長貴、王榕吉等分紮滄州等處。力扼西北兩路。以固畿輔門戶。並著僧格林沁、閻敬銘速撥馬步兵勇。由德州、臨清等處迎頭截勦。總期四面夾擊。共除窮寇。儻派出各軍堵勦不力。致賊匪再行紛竄。何路有失。卽惟何路之帶兵員弁是問。決不寬貸。天津兵勇大半徵調四出。洋槍隊是否已由僧格林沁飭回。現在何處。著劉長佑查明。如此項槍兵業已飭回。卽飭仍在天

津歸崇厚調遣。此時賊蹤逼近一切防勦事宜。卽著崇厚妥籌辦理。毋稍疏忽。將此由六百里各諭令知之。○又諭唐訓方奏各路援軍漸集。統籌進勦機宜。請分別責成一摺。臨淮一軍自攻復長淮衛之後。唐訓方飭各營分屯要害。南至定遠九十里。北至固鎮一百二十里。聲勢聯絡。橫截該逆抄擾之路。惟蒙城情形倍形危急。渦河南北兩岸現已合圍。知府英翰將河北各營抽調至小澗集迎頭

抵拒。河南官練併入城中。嬰城固守。姚廣武因捻匪竄豐碭地方。須分兵堵勦。陳國瑞已抵徐州。俟軍營火藥到齊。卽可赴蒙援勦。前諭富明阿帶精兵赴臨。指日各軍會集。足可分道進攻。唐訓方慮事權不一。或有誤卸。請以蒙城一路專委陳國瑞勦辦。淮河北岸專委富明阿。俾與蒙軍聯合。穎壽一路專委蔣凝學等軍。而淮河南岸該撫自任之。何路稍有疏虞。卽惟責成之人是問。所籌不為無見。

惟各率一軍分路並進。責成雖專而事權未一。設遇有互相援應之處。仍恐觀望不前。尚宜斟酌變通。於各專責成之中。仍能聯絡一氣。方為妥善。陳國瑞現抵徐州。其軍火當已到齊。著吳常唐訓方就近催令進兵。迅解蒙城之圍。蒙城一路著卽專歸陳國瑞勦辦。所有徐宿之姚廣武等軍。均聽陳國瑞調遣。卽著迅速由徐前進。毋得遷延觀望。致干重咎。富明阿統帶揚營兵勇赴援臨淮。何日啟行。尚未據該都統奏報。著卽添調各軍並前派之王萬清等駐紮淮河北岸。力顧淮北一路。並督同陳國瑞之軍互相聯絡策應。力解蒙圍。解圍後卽會攻苗逆老巢。頴壽各路曾國藩當飭蔣凝學等軍悉歸唐訓方調遣。並隨時偵探賊情。認真防勦。聽候唐訓方指授機宜。以期事權歸一。呼應較靈。其淮河南岸唐訓方固當獨任其責。相機戰守。惟該撫身膺疆寄。責無旁貸。富明阿等到皖。俱係客兵。恐

於地勢賊情未能諳習。唐訓方應派得力兵弁助攻。以壯聲勢。不得專恃援軍。致有貽誤。軍營積習。勝不相讓。敗不相救。最足債事。現在淮河北一片賊氛。富明阿到後當與唐訓方會商督飭諸軍力圖埽蕩。如何路有失。朝廷卽惟何路是問。惟有執法從事。毋謂言之不早也。將此由六百里各諭令知之。○又諭前據熙麟奏調外火器營營官吉慶等七員名赴甘差遣。並請由該營代雇工匠酌撥庫鋼洋銅及火箭炸礮子等項。交吉慶等運赴甘省備用。當交管理該營王大臣酌量辦理。茲據奏稱該營所造軍器等項。節經各路軍營請調。必須隨造隨撥。方足以敷接濟。吉慶係製造軍器甚為熟悉之員。未便遽令前往。現改派候補護軍校志亮率同熙麟奏調之護軍等將炸子火箭一百枝。小號炸礮子一百箇。星速解往等語。此項利器軍營中不可多得。將來志亮等運送抵甘。熙麟當飭令

各營將弁必須於攻城接仗時對準賊營賊隊施放期於箭不虛發而礮子不至虛糜庶足以振軍威而收實效至該營打造一切軍器俱係本營弁兵指示匠役如法製造並無專習打造軍器之工匠此項人夫及隨帶什物未便由京雇募帶往該王大臣所奏均係實情查火器營管官祥安等現在晉省督飭匠役製造火器卽著英桂酌派數員名並飭隨帶應用什物前往甘肅慶陽軍營聽候麒麟差遣並著迅速籌辦毋稍稽延庫鋼洋銅二項火器營本無收存本日已交戶部酌量撥解並由該部知照兵部順天府照例運送矣將此由五百里各諭令知之○以安徽蒙城懷遠勦匪獲勝復已革總兵官普承堯副將唐敏興職革倉卒撤隊總兵官譚善貴向聰得副將唐萬清職降副將趙昌富為遊擊均留營○以直隸新河武邑兩縣城被賊竄陷旋卽收復知縣鄧銘善革職留任要道南

革職留營予陣亡把總姜鴻德鹽大使祿祥等祭葬世職○予安徽宋家灘等處陣亡參將彭朝惟等十四員祭葬世職○甲辰綏遠城將軍德勒克多爾濟等奏官兵捐補馬匹實係豫備差操懇請無庸給還得旨旣據該將軍等奏稱若令其領回不能兼顧餵養必須折價變賣轉費周折自係實情著卽無庸撥還以遂其報效之忱嗣後此項馬匹如有倒斃著該將軍等咨報兵部及察哈爾都統

卽在錫林郭勒牧羣內陸續撥補

大清穆宗繼天開運受中居正保大定功聖智
誠孝信敏恭寬毅皇帝實錄卷之七十七

大清穆宗繼天開運受中居正保大定功聖智
誠孝信敏恭寬毅皇帝實錄卷之七十八

臣等謹將本年以來各處奏報各款恭摺具奏
一、據山東巡撫臣張曜奏、本年山東各屬秋收尚稱豐稔、惟因雨水過多、田禾被淹、收成較前稍遜、請旨蠲免本年山東各屬錢糧、以資接濟、臣等查山東本年秋收、雖較前稍遜、然較之往年、尚屬豐稔、且該省錢糧、向由該省自行籌措、並無請旨蠲免之例、應請旨不准、以昭慎重、

教諭

同治二年癸亥九月乙巳朔

上詣綏履殿問

慈安皇太后安平安室問

慈禧皇太后安至癸酉皆如之○諭內閣玉明等奏請將緝捕疏懈之佐領摘去頂帶等語佐領雙明經玉明等委帶馬隊赴北路擒拏盜匪時逾一月之久僅獲盜犯一名且不候撤調擅自旋省銷差非尋常緝捕疏懈者可比僅予摘去頂帶不足示懲雙明著改為以防禦降補○又諭前因穆騰阿歷次與瑛榮

聯銜奏保馬德昭戰守得力。嗣因多隆阿、張集馨奏參馬德昭虛浮兵數。穆騰阿又復會銜入奏。前後自相矛盾。當經降旨令穆騰阿明白回奏。茲據奏稱該將軍馳抵西安後。與瑛榮會商防剿。擊退撲城賊匪。未敢隨同粉飾。馬德昭奉旨派援鳳翔。藉詞遷延。該將軍因其本有勞績。且時值逆回西竄。城防喫重。未經奏參。嗣與多隆阿等查出馬德昭虛冒兵數等情。隨卽會銜具奏等語。穆騰阿以專

閫大員。與瑛榮、馬德昭同在一城。於瑛榮之貽誤地方。馬德昭之浮冒兵數。既未能據實陳奏於先。迨奉旨飭令明白回奏。猶敢摭拾浮詞。枝梧掩飾。於馬德昭奏參奏保。先後自相矛盾之處。仍復含糊未能明晰。實屬昏愊。西安將軍穆騰阿著交部議處。○諭議政王軍機大臣等。王明等奏遵查土默特旗匪犯綽金汰等聚眾情形。並派官兵往西路捕盜一摺。綽金汰等聚眾焚掠。肆行不法。既據王

明等查明屬實。亟應嚴行擒捕。其應如何派員前往嚴密按緝。及應否由熱河派兵會拏之處。著王明、景霖和潤、德椿會同麒麟慶悉心籌商。妥為辦理。一面知會土默特旗協力按剿。新台邊門。突有盜匪到門。砍傷兵丁。燒毀官房。搶擄當商。並搶去團練軍械。卽日出邊。往西北大路逃逸。該匪潛逃邊外。難保不與綽金汰等暗圖勾結。肆行滋擾。現經王明等派委官兵前往緝捕。卽著飭令悉數弋獲。盡

法懲治。並著麒麟慶飭令朝陽、赤峰等縣地方官一體嚴拏。毋任一名漏網。王明等務當會同麒麟慶認真辦理。毋得粉飾養癰。致貽後患。將此各諭令知之。○又諭憚世臨奏越境擊退黔匪。並髮逆闖入楚境。迎勦獲勝。請留郭崑燾及朱孫詒擬卽赴陝各摺片。此股髮逆係屬百戰之餘。現在蓄意回竄楚南。且恐與沅寶一帶餘匪勾結。憚世臨現令總兵趙福元暫駐洪江。並令田宗營等協防沅州府城。

分飭王永章所部及戈鑑一軍會合防勦著
卽督飭在營將士嚴密布置務將此股匪徒
就近殲除毋得縱令他竄以致滋蔓難圖黔
中苗匪攻陷瓦寨後屢次撲近涼傘均經楚
軍擊卻著憚世臨督飭在防文武扼要堵截
俟髮逆撲滅後卽調周洪印等軍越境赴黔
會合該省兵勇埽淨逆氛以清積年邊患現
在楚省軍務未平郭崑燾著准其暫留湖南
幫同該撫辦事俟全省肅清後仍遵前旨飭

令該員前赴直隸交劉長佑差遣陝省軍情
緊要朱孫詒旣已病痊著卽飭令迅赴多隆
阿軍營毋稍遲誤將此由六百里諭令知之
引見俸滿刑部郎中胡家玉得旨著開缺
以四五品京堂候補○錦州副都統恩合奏
遵查已革翼領烏雲泰被叅擅權侵蝕各款
委係確實得旨著銷除旗檔發往新疆充當
苦差○山西巡撫英桂奏宋逆逼近山西現
飭文武兵團防堵得旨宋景詩股匪現由成

安竄走邯鄲新河武邑一路至東光渡河距
晉稍遠皖捻尚在汝洛一帶仍著飭令和昌
劉子城等加意嚴防毋得專恃河水盛漲不
能過渡稍涉疏忽路遠一帶仍飭各屬隨時
偵察以防直境賊蹤回竄○命已革署甘肅
提督馬德昭赴甘肅慶陽軍營交陝甘總督
熙麟差委○丙午遣官祭

歷代帝王廟○諭議政王軍機大臣等閻敬
銘奏宋逆餘匪由直隸回竄東境現已派隊
迎勦崇厚奏遵旨籌辦津郡防守事宜各一
摺據閻敬銘奏該逆於二十六日由東光竄
入陵縣關廂卽於是日竄入平原縣境二十
七日竄至高唐州境二十八日竄至清平縣
境又分零股由戴家灣偷過河西該撫已派
都司楊通廉等往清平迎勦飭總兵保德由
朝觀一路回擊所籌尚妥著卽督飭在事各
員及文武地方官嚴密堵勦務期就地殲除
毋任再行竄越其由戴家灣過河之匪距臨

清堂邑均屬相近。僧格林沁此次未曾拔營。當可調派一軍。將此畸零匪股悉數斬擒。並探該逆大股已至何處。卽派兵迎頭擊剿。與閻敬銘所派之兵會合夾擊。此股匪眾數日之間。奔突千有餘里。已屬強弩之末。官軍以逸待勞。自不難收效旦夕。恆齡、蘇克金現在何處。賊匪奔馳不息。當是恆齡等在後追剿之故。著僧格林沁仍飭跟蹤緊躡。並設法分隊繞截其前。會合東省之兵。聚而殲旃。劉長

佑現在景州一帶。不必深入東境。仍須嚴防該匪回竄。如該逆被擊竄回。卽與東軍合力夾擊。該匪蹤跡飄忽不常。且聞其裝束與官兵無異。鄉團見而不敢卽擊。前次狂竄直境。揚言北犯。原欲引官軍盡入直境。彼得乘隙回竄東省。遂其勾結裏脅之謀。現在東省追剿甚緊。恐其另有詭謀。或仍聲言北犯。而乘間突竄河南山西。著僧格林沁、閻敬銘設法杜其旁竄。於各要隘設伏以待。使其無隙可

乘。並著張之萬、英桂督飭在防將弁實力堵禦。毋令入境。天津各屬防守事宜。崇厚仍遵前旨。嚴飭地方文武認真辦理。毋稍疏懈。將此由六百里各諭令知之。○又諭賈臻奏滬陳豫省軍事情形。暨改勇為兵。分隸營伍各摺片。近來毫捻擾及許境。被擊西趨。西華一帶。亦有捻蹤。疊經諭令張之萬實力勦辦。並令將近日軍情迅速馳奏。迄今將及一月。尚未據續有奏報。殊深廑繫。茲據賈臻陳奏各

情。如練兵裕餉。察吏安民。均為豫省至要之需。著張之萬按照所陳各節。悉心酌覈。擇其言近切要者。力加整頓。以期軍律嚴明。而吏治民風日見起色。至近來各路軍營。調兵不及募勇之多。臨時既難於約束。事後又不易遣散。種種積弊。指不勝屈。莫若改勇為兵。各就近便之地。分隸營伍。仍領勇糧。庶可有徵調之易。而無遣散之難。著劉長佑、閻敬銘、英桂、張之萬按照賈臻所奏。各就該省情形。斟

酌妥籌辦理。不可畏難苟安。亦不可虛應故事。賈臻摺一件。片一件。均著鈔給閱看。另片奏鞏縣境內老捷坡之上。建一關隘。名曰鞏關。以防東捻西竄之路。請再由新密之閒。至禹邨裕泌等處。於險要處所設卡結寨一節。並著張之萬查明。如果有險可守。卽飭各屬次第舉行。總宜力求實際。不得徒託空言。原片著鈔給張之萬閱看。將此各諭令知之。○丁未。諭內閣。沈葆楨奏。假期已滿。病勢增劇。

懇恩開缺回籍調理一摺。沈葆楨自簡任江西巡撫一來。察吏安民。事事均臻妥協。本年髮逆大股竄入江境。復能督飭在事員弁。兵力挫兇鋒。現雖賊氛遠遁。而一切防守布置。均須該撫力為經畫。朝廷正資倚畀。豈可遽請退休。沈葆楨著無庸開缺。賞假四箇月。在任安心調理。江西巡撫。卽著孫長紱護理。○諭議政王軍機大臣等。張之萬奏。皖捻分股竄豫。官軍疊次獲勝。現籌布置。並遵旨防

勦宋逆及毛昶熙一軍。勦撫各圩等摺。片。皖捻接踵竄豫。現分三股。一由禹州竄登封。依山踞險。經張曜等揮軍奪隘。匪勢不支。向龍門東南回竄登境。張之萬等已添派永奎等會合進勦。著卽督飭張曜等滾營進紮。偏賊出險。再行抄勦。毋令與大金店匪股勾合。致辦理又形棘手。其南走襄城之股。經沿途兵練截殺。現竄唐縣。知府傅壽彤。調賒旗鎮練勇往勦。並商令總兵圖塔納派兵援應。著卽飭令調齊兵練。探蹤進勦。毋任擾及宛洛一帶。其由沈邱續竄之股。經李世玉等勦勝。馬賊又竄近邨境。張之萬已飛飭孫之友。李世玉等馳赴襄邨一路。嚴扼竄路。著卽催令認真進勦。毋令與前竄各股會合。致滋延蔓。西路登封股匪。為張總愚大隊。該處山徑紛歧。設由此西犯。疾趨潼關。秦晉二省。皆將震動。著多隆阿。英桂。張集馨。嚴飭在防文武。加意防範。如探聞逆匪有竄近消息。卽派兵出境。

會合豫省之軍。合力夾擊。毋任匪蹤擾及境內。是為至要。唐縣股匪。距隨棗不遠。恐該匪被勒狂竄。闖入楚疆。為患滋大。著官文嚴樹森派隊嚴防。責令地方文武各員。悉心守禦。毋任竄犯。如竄近楚邊。卽飭在防將士出境迎剿。毋存畛域之見。張之萬駐軍許州。必須多發偵探。悉心籌畫。以期漸次掃蕩。宋景詩一股。又由直境竄回東省。去豫稍遠。惟匪蹤飄忽不定。仍當飭令河北鎮道晝夜嚴防。其

竄擾登封捻股。恐其渡黃北犯。尤須飭該鎮道一律嚴防。劉長佑前調之李明惠一軍。如已抵豫。卽著該撫截留。派令帶隊剿賊。以厚兵力。在籍總兵黃得魁。向在軍營。尚稱勇往。如能責令帶勇。專剿襄郟一路。當可得力。著張之萬妥籌調度。毛昶熙督辦通省團練。現在匪蹤紛竄。毫無阻扼。著通飭各屬加意整頓。務使與官兵相輔而行。以收保衛之效。並嚴飭永奎等分投截擊。不可稍有鬆勁。袁保

慶卽著令其辦理。穎陳團練。俾豫皖各團有所聯屬。不至為苗逆誘煽。俟各賊股剿辦完竣。再圖進取。以牽賊勢。將此由六百里諭知官文。多隆阿。嚴樹森。英桂。張之萬。毛昶熙。並傳諭張集馨知之。○予江西軍營病故道員屈蟠祭葬卹廕。如布政使例。並存恤其家。○予河南登封陣亡遊擊宋徵文祭葬世職。如副將例。千總何紹林。把總王訪等祭葬世職。加等。○勾到新疆。貴州。廣東。廣西。四川。上年

情實罪犯。停決四川斬犯二人。絞犯一人。餘三十人。予勾。○旌表守正捐軀河南延津縣民婦張張氏。○戊申。遣官祭

都城隍之神。○諭內閣。李鴻章奏江蘇省驛站錢糧奏銷。請分別辦理等語。據稱江蘇省江甯等八府各屬。應造咸豐二年起驛站錢糧奏銷冊籍。或因地方失陷。案卷無存。或因驛站繞道。夫馬並無定章。無從覈辦。自係實在情形。著照所請。所有江蘇省咸豐十年以

前驛站錢糧一律免其造冊報銷。其自咸豐十一年起淮安揚州徐州等屬驛站奏銷各冊。卽著勒限先行造報。以免輾轉。○諭議政王軍機大臣等。李鴻章奏。水陸官軍會攻蘇州省城。疊獲勝仗。攻克寶帶橋要隘。並躡平無錫東南兩門。賊壘賊卡各摺片。寶帶橋為水陸要區。現經我軍攻克。則攻取蘇城已成破竹之勢。著李鴻章激勵將弁。節節進攻。以期迅克堅城。仍須穩紮穩進。計出萬全。不可

稍涉大意。至無錫一路。攻勦正極得手。著李鴻章迅飭劉銘傳等軍。趕緊進紮。與郭松林等軍聯絡聲勢。為規取無錫之計。偽忠王李秀城已於八月十一日由金陵回蘇。所帶賊黨甚眾。意欲立解蘇城之圍。現在忠逆既回蘇郡。金陵老巢勢必空虚。我軍正可乘此機會。迅圖攻取。著曾國藩督飭曾國荃等軍。將如何乘虛進搗。圖拔堅城。俾金陵蘇州之賊首尾不能兼顧。庶我軍於該二城或有一處

可以得手之處。酌度機宜。妥為辦理。將此由六百里各諭令知之。○又諭李鴻章奏上海學習洋人火器。現製開花礮。自來火等件。猶具規模。必須好學深思之文員。會同講求。始可推行盡利。查有江西候補知縣丁日昌。在廣東高州軍營督辦火器。業已告竣。請飭催赴滬等語。上海官軍刻下盡攻蘇州。偏城而壘。正形得手。所需軍火。尤屬刻不容緩。著毛鴻賓晏端書郭嵩燾速卽飭令丁日昌趕緊起程赴滬。督匠趕造。以資攻勦。毋稍遲延。將此由六百里各諭令知之。○又諭張集馨奏楚軍回防鄖西。現飭石泉等縣聯團防河。並籌防省城潼關。暨漢中近日軍情各摺片。川匪藍二一股。竄擾鎮安。經多隆阿等派兵進勦。圖竄山陽。復為該縣團勇截擊。未能逞志。著多隆阿張集馨卽飭該地方文武速行進勦。並督令商州知州會合夾擊。務令就地殲除。毋任蔓延他處。李桓所募義勝三營楚勇。

經官文等留紮鄖西。未能進援興安。川省進援漢南之兵。現已雲集。該處逆匪被勦窮蹙。勢必東趨興安。漢江以北。防兵甚少。石泉令陸莖現約漢陰甯陝西鄉各廳縣。每處挑選壯丁一萬名。以一半留守本邑。以一半出境防勦漢江。畫河為界。憑險扼守。並令楚師礮船梭巡上下。辦理甚合機宜。張集馨現令該員總司其事。著卽飭令西鄉等廳縣一體照辦。毋許從中牽掣。如有出力官紳。卽著從優

保獎。鄖陽一帶扼要處所。並著官文嚴樹森飭令梁作楫設法嚴防。毋令匪蹤東竄鄂疆。整鄂道路既通。陶茂林一軍。卽著多隆阿飭令整隊前進。速援鳳翔。平涼府城業經失陷。並著多隆阿迅飭陶茂林一軍。於鳳翔解圍。後飛速馳往。或另籌勁旅。會同甘肅各軍。實力攻勦。迅圖克復。蘇家溝距省較近。為羣逆屯聚之所。難免不出撲省垣。一切稽查奸細。防守城垣。均不可稍形疏懈。並著多隆阿速

將十三村賊寨攻克。拔取高陵。以次進攻。將省城西北一帶賊巢埽除。毋稍遲誤。至令輸糧之從逆村莊。是否甘心。抑係被徇。曾否隨賊攻城。戕害兵勇。焚擄村莊。亦應分別良莠。辦理不得概令輸糧。一律聽其贖罪。以致兇徒漏網。復留餘孽。潼關南岸渡船。現已提歸北岸。惟豫省前股捻匪。屯聚登封。蓄意西竄。後股捻匪。復竄宛葉。並恐折竄商雒。多隆阿。張集馨仍當督飭潼關及商雒一帶文武。加

意嚴防。毋稍疏忽。劉蓉由通江前赴漢郡。既據甯陝西鄉等廳縣稟報。何以至今多日。尚無入陝消息。該員擢授陝撫。業已兩月。至今杳無摺報。亦無起程日期。實屬玩誤。現在川陝諸軍。俱集漢南。亟需大員統率。著劉蓉懷遵前旨。迅赴漢南。督率諸軍。力解城圍。並著駱秉章速催劉蓉赴陝。毋再遲延。將此由六百里諭知官文。嚴樹森。多隆阿。駱秉章。劉蓉。並傳諭張集馨知之。○以勦賊不力。革山東

軍營副都統成保職。○予江蘇蘇州陣亡都司范玉舟守備王兆林等祭葬世職加等。○己酉諭議政王軍機大臣等僧格林沁奏添派隊伍追剿宋逆股匪請飭嚴防北竄一摺。宋景詩以敗殘餘黨晝夜狂奔乃前竄開州。卽有匪首朱登峰一股接應合夥所至遇河躡渡到處勾結土匪。豕突狼奔實欲誘我官軍疲於追剿。此次回竄東境徑回堂邑地方。因僧格林沁大營未動不得遂其回踞老巢詭謀復因官軍跟追向開州一帶竄走。似此亡魂窮寇一經舒通額等各軍馬隊追及不難卽日埽除。惟是賊眾狂奔之際必須前有攔截則後追馬隊方能及賊痛加勦洗。僧格林沁以各隊步軍追剿馬賊徒勞無益不若扼要分布隘口以杜北竄所籌甚合機宜。著劉長佑卽行督飭各軍在正定東北至河間一帶淳沱子牙等河岸憑河據守嚴防北竄。該處河溜甚急有險可扼僧格林沁前調直

省各軍步隊除酌留海口營弁兵四百餘名守護礮位之外餘皆飭令回直聽劉長佑調遣務卽沿河妥為分布一俟賊蹤竄至卽與追賊之馬隊各軍前後夾擊共殲醜類。宋逆現竄開州恐其此次詭謀欲乘我不備而蓄意北犯劉長佑以逸待勞務當加意截剿不可稍有鬆懈。河南山西兩省係該逆往來熟徑又恐該逆故作北犯之勢而意在窺伺該二省乘隙旁趨均不可不豫為之防並著英桂仍遵前旨督飭鍾秀於平遼一帶督率各該文武兵勇實力籌防毋稍疏忽。張之萬前奏賊竄衛境曾經河北鎮楊長春帶隊擊剿此時更當早為備豫仍卽懷遵前諭飭令該鎮道等隨時偵緝設防與僧格林沁派出追賊之馬隊各軍聯絡聲息豫籌堵剿毋許徒託空言致賊乘間竄越。自干罪戾。李明惠一軍曾否至豫前諭張之萬於該員過豫卽行截留以資分布其該撫前調之道員金國琛

本日復准曾國藩所奏。調赴皖北。統帶蔣凝學等各軍。保皖卽以保豫。如果穎六賊不得逞。豫省光商卽可無虞。如金國琛行入河南境內。並著張之萬飭令速卽遵曾國藩所調。迅赴皖北。毋稍遷延。舒通額與蘇克金等各軍。何日追賊及於何處。著僧格林沁迅速馳奏。以慰廑念。莘堂等境。散匪各村敗竄。步賊仍著閻敬銘督飭保德。丁寶楨等。分投搜捕。淨絕根株。毋留餘孽。直東豫省各屬地方。當

此賊蹤飄忽靡定。均應一律聯合兵團。早為備豫。何得任令賊氛所到。一無阻攔。並有匪徒聚眾。豫為接應。著劉長佑。閻敬銘等。各飭所屬。一體設防。互相警備。是為至要。將此由六百里各諭令知之。○又諭曾國藩奏。金陵陸師。攻破上方橋等處賊壘。青陽危急。各摺片。都興阿奏。添撥馬隊援皖。酌議北渡難民章程。水師堵剿情形一摺。富明阿奏。帶兵赴皖日期。因傷不能乘騎。提撥釐稅。鑄礮購米。

各摺片。金陵官軍。攻克上方橋。江東橋諸賊壘。剿辦甚屬得手。著曾國藩卽行知曾國荃。督飭將士。乘機攻取。將城外各賊營次第掃蕩。俟各路官軍會齊後。再圖合圍。以期攻拔堅城。青陽被圍一月有餘。危急萬分。李榕部將鄭陽和在袁橋紮營。被逆匪攻陷。雖經喻吉三攻破袁橋賊壘。而賊勢並未大創。江忠義席寶田兩軍。現已繼進。著曾國藩嚴飭該提督等。合謀力戰。迅解城圍。以拯倒懸。並著

曾國藩左宗棠。分飭劉典。王文瑞。王沐等軍。速由徽郡分道出嶺。規復石埭太平。與江忠義等軍會合夾擊。將此股賊匪就地殲除。毋任旁竄蔓延他處。現在皖南羣盜如毛。非西趨江右。卽東併金陵。曾國藩現調鮑超一軍。回援上游。先赴蕪湖甯國。著卽飭令會同該處駐守各軍。併力合剿。先將涇縣甯國各匪掃除淨盡。再行約會池太各軍。將該處賊氛悉行掃蕩。以期肅清金陵後路。皖北軍情緊

急富明阿現帶馬步勁旅二千名。力勇三百名。由揚州馳赴臨淮。著與唐訓方籌商。合力攻勦。前經諭令富明阿督同王萬青所部。駐紮淮河北岸。力顧淮北一路。並督同陳國瑞之軍。互相聯絡策應。先解蒙城之圍。卽會攻苗逆老巢。著仍遵前旨辦理。陳國瑞所部兵勇。餉需火藥。著吳棠懷遵前奉諭旨。迅速籌給。以便該總兵卽行起程赴蒙。並飭姚廣武一軍歸陳國瑞調遣。現在宋景詩股匪數日之間。往返馳騁千數百里。該匪均係馬隊。飄忽異常。且係官軍裝束。誠恐假冒官兵。偽稱救援蒙城。與苗逆合夥。著富明阿、吳棠、唐訓方卽行知照各路軍營。與地方文武各官。先事豫防。毋為所誤。其淮河南岸潁壽各路。仍著曾國藩飭令蔣凝學等軍。悉歸唐訓方調度。認真進勦。不可株守一隅。李世忠現已親督五千人赴臨。夾淮分屯。著唐訓方加意籠絡。以收指臂之助。現在臨淮兵力已厚。應卽

力圖進攻淮南各要隘。以掣蒙城苗逆之勢。不可畫疆自守。坐失事機。富明阿腰疾未痊。不能乘騎。著准其乘坐肩輿。該都統現將所製開花礮六尊。並存米一千餘石。帶赴臨淮。並咨明糧臺。將姜堰等三處活釐提取。為添造礮位。購買米石之用。著卽照所擬辦理。所有富明阿軍營餉需。仍著吳棠源源接濟。不得稍有缺乏。都興阿所奏南岸包港超縣港陸洲等處。共有逆匪三大股。約二萬餘人。並有賊船停泊孟河等語。難保該匪非因江陰潰退。無處奔逃。意欲四散分竄。江陰等處被難百姓。固不宜禁其北渡。然匪徒之溷跡。冒充亦不可不嚴行稽察。沿江一帶。渡口甚多。豈容概行弛禁。漫無防限。著於衝要地方。酌定何處渡口。濟渡難民。總以愈少愈妙。以便易於盤詰。將其餘渡口。概行封禁。以防逆匪溷跡。並著都興阿、吳棠、李鴻章。妥議章程。務於體恤難民之中。仍寓防範奸宄之意。毋致

兩相妨礙。仍著都興阿督飭水師嚴密梭巡。毋令賊匪占踞沿江洲地。致防勦又形費手。將此由六百里各諭令知之。○又諭。前因豫省將領乏人。節次諭令官文嚴樹森。催令金國琛赴豫差委。茲據曾國藩奏稱。苗逆兇饒。益熾。臨淮一路。有都興阿派二千人赴援。富明阿帶兵繼進。李世忠親督五千人夾淮分屯。尚足自固。苗逆若不得逞於臨淮。則上游六安潁州固始三河尖處處喫緊。周寬世成

大吉蔣凝學。毛有銘各守一方。勢均力敵。不相統屬。深恐心志不齊。調度舛錯。查前任湖北安襄鄖荆道降補同知金國琛。與成大吉等同出自李續宜部下。若令調護湘營。籌勦苗逆。必能勝任。請飭該員改赴皖北等語。皖豫邊境。同以苗逆為巨患。楚軍各守一方。亟需得力將領。前往統率調度。埽除皖匪。正以保衛豫疆。著憚世臨飭令金國琛改赴皖北。責令總理周寬世等四軍營務。仍往來固始

三河尖等處。會辦皖豫交界勦苗事宜。即著該撫飭令金國琛趕緊起程。毋許稍涉遲延。致誤戎機。將此由六百里諭令知之。○調鑲黃旗蒙古副都統寶善為盛京副都統。以記名副都統長善為鑲黃旗蒙古副都統。以擅違軍律。革江南軍營記名提督董占品職。不准留營。○追予山東陣亡副都統伊興額於奉天吉林旗籍建立專祠。殉難將弁一併附祀。○予山東軍營病故副都統常山保祭

葬卹廕加等。○庚戌諭內閣。駱秉章奏請將獲盜人員。仍復送部引見舊例等語。向例獲盜人員。俱係交部分別議敘。即所獲盜犯較多。亦止於送部引見。自咸豐五年部議章程。凡獲盜人員。有拏獲斬梟斬決一案六名以上。或兩案三案。每案均在三名以上者。毋庸分案議敘。俱准督撫覈實保奏。給予應升官階。免其送部引見。原以四方多故。盜賊橫行。故獎勵不妨稍優。庶緝捕可收實效。乃自此

例一開獲盜請獎之案。層見疊出。其認真緝捕者固不乏人。而詐偽日滋。竟或徇親友之請託。以盜犯相贈賄。在予之者以首先獲盜。讓人邀功。而自居協獲。仍免處分。在受之者毫無勞績。優獎幸邀。似此夤緣為奸。巧於干進。殊於吏治有礙。嗣後獲盜人員。仍著照舊例。送部引見。其由督撫指定官階。專摺保奏。章程著即停止。以杜幸進而重名器。○又諭前因江蘇通州會首盛廣大等通賊一案。該

犯等未即拏獲。署通州直隸州知州黃金韶。輒將已獲夥犯蔡之梁等就地正法。經吳崇奏參。將該員交部議處。茲據吳崇奏稱。盛廣大等犯現已拏獲。訊明該員前次正法各犯。並無冤枉。且查拏尚能迅速。功過相抵。黃金韶前次應得處分。著免其置議。所有續獲通賊謀逆之盛廣大。即盛裕科。又名盛玉珂。茅廣幅。即茅維中。王錦漳。吳正隴。即吳城名。董芑香。即董惻渴。均著即行處斬。以申國法。○

諭議政王軍機大臣等。吳崇奏援蒙官軍到防。妥籌進取。並臨淮兵力厚集。請特派督辦。以一事權。各等語。苗逆擁眾數萬。全力圍攻。蒙城情形萬分危急。陳國瑞現已督隊抵宿。自應趕緊進兵。吳崇。令先通蒙城餉道。穩紮穩進。尚屬持重之見。第蒙城為皖北形勝之地。望援孔亟。到防援兵。固不可冒昧輕進。致挫銳氣。然亦當於慎重之中。力圖進取之計。陳國瑞勇敢素著。所部亦稱善戰。現在吳

崇抽調守徐之官軍四百餘名。駐浦之馬步隊五百名。齊赴該總兵軍營。又為之接濟軍食。是該營聲勢漸壯。可戰可守。即著飭令陳國瑞迅速拔隊。滾營前進。疏通糧道。立解城圍。不得以待兵待餉為詞。致有貽誤。至宿西餘捻。有姚廣武一軍。隨時防勦。當不至貽陳國瑞後顧之憂。前因臨淮援軍漸集。而責成未專。恐致互相觀望。曾諭令富明阿。唐訓方等。聯絡策應。並令富明阿。督同陳國瑞等軍。

相機攻勦。吳崇本日所稱帶兵之員。素不相習。擬請特派督辦大員。節制調度等語。與前旨之意尚合。此時富明阿督帶馬步二千餘名。馳赴臨淮。即著懍遵前旨。與唐訓方和衷共濟。妥籌防勦。並督飭陳國瑞迅解蒙圍。如臨軍兵力。足可自守。而援蒙之軍。勢尚單薄。亦著富明阿。唐訓方酌量添撥勁旅。迅往助勦。毋稍遲誤。其陳國瑞一軍糧餉軍火。仍著吳崇源接濟。毋令缺乏。將此由六百里各

諭令知之。○又諭左宗棠奏官軍克復富陽縣城。現籌勦辦情形一摺。富陽一城。為杭城上游鎖鑰。逆賊負隅踞守。經左宗棠督飭水陸各軍。竭數月之力。將縣城攻克。並將新橋賊壘一併攻破。該逆望風逃竄。自應乘此聲勢。規復杭城。現在蔣益澧統率各營。沿江而下。偪杭城十五里而營。左宗棠亦移紮富陽。相機調度。著即激勵諸軍。鼓勇前進。迅拔堅城。毋失機會。水師戰船。業已進薄杭城。著該

督嚴飭該將弁等認真攻擊。與陸軍相輔而行。毋稍鬆懈。康國器已由富陽直趨餘杭。魏喻義由新城出師夾擊。著該督即飭令該員等迅圖攻克。以孤杭城之勢。一俟餘杭攻拔。即迅速攻取海甯州城。則浙東之防可固。且與蘇省規取嘉善之軍。聲勢可期聯絡。偽聽王現由嘉興星夜回杭。嘉郡自必空虛。如機有可乘。李鴻章即可檄飭將士相機乘虛進擣。以牽賊勢。著李鴻章酌量調遣。浙省餉源

以鹽務為大宗。紹所早經克復。新嵯亟須整頓。運司李榕現在帶兵。一時未能赴任。著該督遴選賢能署理。俾免曠誤。將此由六百里各諭令知之。○以正黃旗蒙古副都統富明署正紅旗滿洲副都統。○以浙江援軍克復安徽績溪祁門兩縣城出力。賞參將陳隆興等花翎千總楊鴻福等藍翎。餘加銜升敘有差。○句到奉天上年情實罪犯三十四人均予勾。○辛亥諭內閣。前因英桂奏遊擊陳永

祥與所屬把總許華等互相稟許。守備增順託病推延。當經降旨將陳永祥等解任。交英桂提省審辦。茲據英桂奏審明定擬一摺。此案許華稟許陳永祥演戲慶壽。收受兵弁公送壽幛各情。均屬得實。其餘虛糜兵餉等款。訊係事出有因。尚非有心誣捏。惟於賊氣偏近防所。不遵調度。已屬延誤。且於陳永祥慶壽時進署宴飲。尤干禁令。迨經該管上司稟揭。不候查辦。私列銜名許告。實屬有意挾制。

許華著革去把總。發往軍臺效力贖罪。不准援免。陳永祥虛糜兵餉等款。雖無其事。惟生辰收受所部壽幛。並於應避忌辰與屬弁宴會。均干功令。守備增順於屬弁許告上司。不察虛實。率行轉稟。及經傳詢。又復託病推延。並有向屬員借貸錢物等事。均屬有玷官方。陳永祥增順均著卽行革職。外委張丙午奉委查夜。輒敢回寓歇宿。實屬怠惰。著降為額外外委。留於鎮標候補。外委關金湯額外王

金鑾被許華私列銜名具稟。隨後查知。卽據實呈明。均著免其置議。○諭議政王軍機大臣等劉蓉奏籌辦陝西軍務次第。先將大概情形馳奏一摺。據稱四川派援之嚮導等營已計日均抵漢境。毛震壽所統之果健營易佩紳一軍亦移紮兩河口。請飭李雲麟馳抵軍營。卽由西鄉會剿。其竄赴鎮安之張逆一股。界連孝義商州及鄖西一帶。該撫已咨張集馨等防剿。俟漢郡圍解。卽調川防之武宇

定武兩軍會剿。通褒沔驛路。然後馳赴藍屋。勦辦曹逆。再赴省城。商辦回匪。於西省軍情。勦辦次第實能瞭如指掌。著卽照所議辦理。至於賊情詭譎。旦夕變更。該撫當隨時斟酌機宜。妥籌進止。不為遙制。李雲麟一軍前據奏稱已由襄陽起程。當經諭令迅由鄖陽赴陝。解漢中之圍。分兵救鎮安。漢陰等處。並令歸劉蓉節制。毋庸單銜奏事。其應由何路進剿。著該撫酌度機宜。就近知照辦理。藍二一

股竄擾鎮安。業經諭令多隆阿等。飭該處地方文武速行進剿。鄖陽一帶扼要處所。亦諭官文等。飭梁作楫一軍設法嚴防。毋令匪蹤東竄鄂疆。褒沔一帶餘匪。亦經諭令駱秉章派兵迅速剿辦。與該撫所陳均相脗合。如賊股紛竄。著飛咨川楚等省督撫。迎頭合擊。均須就地殲除。毋任再擾完善。劉蓉受朝廷特達之知。不數年間。擢膺疆寄。應如何感激圖報。著卽迅督所部先靖漢南。以次廓清全陝。

用副委任。漢南一切軍情。仍著隨時奏報。以慰馳廑。將此由六百里諭令知之。○又諭晏端書黃贊湯奏。高州剿賊屢勝。連破逆巢。暨陽江陽春軍情。並克復廣海寨城各一摺。逆匪陳金缸竄踞信宜。以南山為屏蔽。該處崇岡疊嶂。密箐深林。從前屢次進兵。多未得手。崑壽督飭卓興等。激勵將士。鼓勇猛攻。連破南山白花塘等處賊巢。實為數年罕有之捷。可見兵勢強弱。全在統領得人。現在驍賊劉

超等屢次敗潰。其鋒已挫。從此轉戰而前。可冀擒渠擣穴。毛鴻賓郭嵩燾均已起程赴粵。著於到省後督飭各軍乘勝進剿。迅奏膚公。未到以前。仍著晏端書會同崑壽妥籌進剿。不得因已獲勝仗。稍涉大意。陽江陽春二縣為省城至高州水陸必經之地。一日不靖。則高州之軍火餉銀終形梗阻。晏端書等擬將該處各匪先行剿除。自是正辦。卽著嚴飭各路官軍妥速進剿。以通餉道。粵東庫款支絀。

兵餉不敷。轉瞬毛鴻賓所募楚勇陸續到粵。餉項又復增多。晏端書等現已設法籌辦。並著毛鴻賓郭嵩燾於抵任後實力籌畫。務令餉源充裕。以收士飽馬騰之效。廣海寨城業經克復。在逃餘匪尚多。自應嚴為搜緝。惟土客互鬪。本屬蠻觸相爭。若辦理不得其平。仍不能弭爭端而釋仇讐。著毛鴻賓等督率地方官吏持平妥辦。殄除首惡。寬免脅從。俾土客各民知畏知感。庶可永消後患。吳昌壽似

應暫緩赴任。或調往高州助勦。抑令先清陽江陽春等處各匪。並著該督撫等斟酌妥辦。將此由六百里各諭令知之。○山東巡撫閻敬銘奏。拏獲逆舉人董全儒父子正法。得旨所辦甚是。逸犯董士銓。仍著嚴拏懲辦。○以籌備京倉米價。賞已革直隸總督文煜四品頂帶。○以克復廣東廣海寨城。賞參將朱國雄巴圖魯名號。遊擊梁瓊等花翎。布政使吳昌壽等升敘有差。予被戕把總符永安等祭葬世職加等。革失守寨城署遊擊黃連安。千總李雄彪。盧國亮。署主簿董懷忠職。○追贈廣東歸善陣亡知州許錞身。知府銜。於死事地方暨原籍建立專祠。幕友家丁書役暨紳勇人等一併附祀。○追予山東嶧縣陣亡署知縣張振榮於死事地方暨原籍建立專祠。予山東日照陣亡殉難增生尹兆祿等紳民婦女三百五十六名口分別旌卹如例。壬子諭內閣理藩院代奏土觀呼圖克圖

呈請住京當差一摺。土觀呼圖克圖之前三代皆曾住京。並賞給靜修禪師名號。現在該呼圖克圖呈請瞻覲後住京當差。自屬出於至誠。著照所請。准其住京。並加恩賞給靜修禪師名號。副扎薩克達喇嘛職銜印敕。○諭議政王軍機大臣等。劉長佑奏宋逆折回東境。分股狂奔。現在分籌防勦一摺。宋逆由吳橋溝店堡等處。折向德州邊臨鎮一帶。經余承恩等跟追。該匪竄至夏津。分為兩股。一條宋逆自率千人。由戴家灣潛渡牯河。回竄老巢。一條賊目楊澍一領馬賊五六百名。向高唐東北竄去。經余承恩等由恩縣迎勦。賊向東北逃走。狂奔恩縣一帶。又由德州東南竄向平原陵縣交界地方。與僧格林沁前奏大略相同。劉長佑現派遊擊蔣希夷一營。駐紮河間。參將劉祺所部。援勦德州吳橋一帶。余承恩等分紮邯鄲成安永年曲周威縣一帶。王榕吉調湯繼揚等營。在館陶尖莊嚴防。祝

塏守禦龍王廟上下游各口岸。著劉長佑卽行督飭各軍嚴密守禦。力扼該匪回竄之路。遇有賊蹤竄及卽可會同跟追各軍。兩面夾擊。以圖聚殲。豫省滑濟等縣。並著劉長佑嚴飭河北鎮道扼要防守。毋再被匪闖入。昨據僧格林沁奏該逆竄入開州。卽有匪首朱登峰率黨接應。此股開州之匪。是否現已回竄東境。著僧格林沁劉長佑查明。實力追剿。迅速埽除。余承恩等軍。正由恩縣迎剿。何以該

逆仍得由恩縣狂奔而去。著劉長佑嚴飭該員等認真勦辦。不可稍有粉飾。有名無實。並著僧格林沁仍遵前旨。督飭各軍將此股逆匪趕緊殄滅。以期肅清畿輔。僧格林沁劉長佑務當戰守兼籌。兩面夾攻。毋得專事尾追。徒勞無益。宋景詩究竟現在何處。恐該逆自知窮蹙。力難抵禦。故設疑兵。分路竄突。自行遁歸南捻。冀逃法網。亦不可不豫為之防。該親王等務當確實查明。毋令逆首遠颺。致墮

詭謀。將此由六百里各諭令知之。○又諭官文嚴樹森奏。毫捻大股由豫竄鄂。現籌勦辦。並請調回梁作楫一軍駐紮鄖陽各摺。片。毫捻程二老坎等大股。由豫省葉裕一路南竄唐縣。闖入棗陽。經該處文武出城雕剿。賊以馬步二萬餘眾直撲縣城。計不得逞。復由隨州地方擾及鍾祥縣境。官文等派令副將黃勝日一營移紮鍾祥城內。以資守禦。並飭總兵趙克彰等水陸各軍截擊迎剿。布置尚屬

妥協。著卽嚴督各軍迅速會合勦辦。並飭黃勝日與參將蔣榮華等嚴守安陸府城。保全要郡。毋稍疏虞。其移紮九子墩及由應城前進之總兵梁洪勝副將王桐柏等軍。力保武漢一路相機策應。防勦兼施。痛殲醜類。此股捻匪南趨。為苗逆所嗾使。此時擾及鍾祥。尤恐其窺伺襄樊形勝。圖與漢南藍逆等股勾結。不可不為之備。著照官文等所請。卽將梁作楫一軍由興安調回駐紮鄖陽。以固鄂西

門戶飭令與現紮襄陽之歐陽正壩所部聯絡堵剿並著多隆阿劉蓉張集馨迅速飭知遵照辦理劉蓉昨已據報由川起程赴陝著卽星速前進懍遵疊次諭旨迅抵陝南督催川省援陝各軍與李雲麟所部力籌剿辦藍逆等股迅解漢中之圍毋再遷延多隆阿督辦全陝軍務仍應隨時兼顧與劉蓉聲息相通以籌全局豫省捻氛四竄潼商一帶緊接豫疆亦須早為豫防張之萬前奏豫捻三路

竄逸其由陳州以竄臨潁及自禹州擾及登封各股現在勦辦情形如何南竄葉裕一股前據奏稱飭令孫之友等軍及飭南陽鎮府調團集練探蹤勦擊此時匪蹤已越鄂疆孫之友等曾否躡追著卽飭令嚴防回竄與鄂軍聯絡實力堵剿毋得以鄰為壑一經驅賊出境遂為了事自蹈軍營向來惡習致干咎戾將此由六百里諭知官文嚴樹森多隆阿劉蓉李雲麟張之萬並傳諭張集馨知之○

又諭駱秉章奏派兵防堵川北籌濟漢南軍食一摺川省所派援陝之師共一萬三千餘名現已陸續出境劉蓉亦已於八月十二日自省起程取道南江進剿該逆一經官軍攻擊難保不紛竄蜀疆此時川北之防正當喫緊駱秉章現飭周達武曾紀鳳兩軍分布廣元昭化及陽平關一帶並撥振武軍二千名防堵太平城口等處布置尚屬周妥著卽飭令在事文武嚴密堵截並著周達武曾紀鳳

兩軍俟襄沔二處肅清後川北防務稍鬆仍著進紮漢郡聽候劉蓉調遣速解城圍所有川省撥援陝南各軍月餉並應需糧石均著駱秉章源源接濟毋令缺乏將此由六百里諭令知之○以署安徽布政使江忠濬為四川布政使安徽按察使馬新貽為布政使擢潁州府知府英翰為按察使○以四川涪州綦江解圍並克復長甯縣城出力賞副將孫均賀連璧參將王有德巴圖魯名號在籍郎

中王達琮遊擊李輔仁等花翎知州鄭長松等藍翎餘加銜升敘開復有差○以任性妄為浙江副將羅亮華革職訊辦○癸丑諭內閣朕奉兩宮

皇太后懿旨軍興以來需餉甚鉅各省地丁錢糧關稅等項因之多未能如額報解戶部於各路軍營撥餉竭力籌維一切度支均從節省八旗兵丁錢糧亦暫行減成開放每一念及該兵丁等仰事俯畜資用支絀深宮宵旰

軫恤時殷茲當清風戒寒轉瞬即交冬令該兵丁等亟應量加撫恤所有八旗兵丁著照現行放款事例加恩賞給一月錢糧即由戶部迅速籌給現在庫存尚非充裕或於各項費用酌加撙節將所餘之款儘數撥歸此項錢糧開放該部務當仰體朝廷德意迅飭各該旗即於十月內支領俾禁旅速需實惠○又諭前因山西員杜氏謀產誣節一案情罪重大疊諭愛仁等詳審定擬嗣據愛仁將原

審失實各情覆訊具奏並據御史尋鑾煒奏稱該尚書等覆審此案恐有不實不盡復經派令尋鑾煒馳赴山西隨同愛仁審辦茲據愛仁奏於尋鑾煒馳抵山西後遵將此案再行覆審定擬此案山西民人員胥之妻員杜氏以員楊氏無出欲以伊子丕鏤承祧兩房屬令員楊氏之僕婦曹武氏乘該氏病故將使女春桃所產嬰孩捏稱該氏私產身死於報官後復勸令員楊氏之幼弟楊學孟攔請

免驗該前任太谷縣知縣沈長材率行允准接署知縣孫培金遽將員楊氏待繼之案出示准銷並有縣署簽押韓虎臣門丁劉二即劉城快役李泳淊從中私受謝儀過付銀兩情事嗣員億與楊學正以該氏身死不明疑為毒斃赴省呈控經該撫英桂派令沈長材隨同前任太原府知府保齡等承審復以曹武氏供出楊學正約來田車氏為楊氏收生遂將楊學正熱審逼供誣姦定案快役趙權

書吏張冠先牛幅海均各得受銀兩現經受仁將全案卷宗人證覆加詳審供證確鑿並稱亦已詳詢尋鑒煒並無疑竇員楊氏實係病死而員杜氏謀產誣節洵屬無疑該原審承審各官於此等重案並不秉公研鞫而員杜氏復以銀錢賄賂上下交通書吏僱工通同一氣遂使該孀婦於身死後冤抑蒙垢該革員等得受贓銀復以事屬暗昧恃無左證堅不承認似此徇私昧良實屬目無法紀除

案內要犯員杜氏業經病故無庸議外其受屬誣節之曹武氏一犯著卽發交駐防為奴不准收贖懷疑妄控之員億著革去舉人說合過贓得受銀兩之杜惠高耀先均著革去監生王步段春善均著革去從九品職銜其應得罪名及其餘案內各犯罪名均著照擬辦理李泳渭劉致和均著不准援免並不准收贖留養趙權杜惠高耀先王步韓虎臣段春善許升楊添佑張冠先牛幅海田車氏員

沈苑員丕孚均著不准援免田車氏並不准其收贖在逃之劉二一犯仍著嚴緝務獲究辦其始終承審此案之已革知府前任太谷縣知縣沈長材著卽發往新疆效力贖罪不准援免前署太谷縣知縣孫培金著卽行革職交該撫嚴行看管俟要證劉二一犯緝獲到案質明是否得受贓銀再行照例辦理原審此案之候補道前任太原府知府保齡幫審之文水縣知縣黃宜之候補知縣龔衍淮

均著交部嚴加議處審轉此案之巡撫兩司等均著該部查取職名照例議處至刑部司員桂迂衡於此案開檢後尚未提訊遽稱員楊氏既非毒死卽係產死請照原案辦理憑空臆斷實屬謬妄已極該尚書僅請將該員議處殊屬輕縱桂迂衡著交部嚴加議處尋吏部議巡撫英桂照草率定案例降一級調用布政使常績降二級調用得旨英桂著加恩改為降四級留任常績著加恩改為革職

留任。諭議政王軍機大臣等。愛仁奏。陝省道路梗阻。自陳患病情形各摺片。前據多隆阿奏明。將勝保被參案內之革員閻丕敏。施鵬賓。型並委員汪曜奎。李連芳。陸續解赴山西。交愛仁審訊。現在審辦若何。是否即可奏結。著愛仁即將交審各案現辦情形具奏。再降諭旨。將此諭令知之。○又諭吳崇奏。官軍連克蒙北賊圩。進攻偏城賊壘。傷亡甚多。請飭撥勁旅南下。以援危城。各摺片。據稱陳國

瑞一軍。赴援蒙城。行抵蒙境。當將蒙北之王圩。毋家圩。收復。並先將東面之紅里圩。賊擊走。令姚廣武。以次進攻紅里圩。東之大宋小宋等圩。現在蒙城之北及西南面。均屬賊壘。聯絡外掘長濠。極其寬深。於官軍進攻。並不出關。惟於圩內密排槍礮。出擊。陳國瑞所部進攻圩壘。傷亡已多。蒙城四面賊圍。求通一綫糧道而不可得。尤慮日久變生。官軍勢單。不能自外包賊。進攻則徒傷士卒。不進攻則

無以解蒙圍。已處進退維谷之勢。吳崇以僧格林沁赴皖之期。當不甚遠。而蒙圍甚急。官軍太單。呼吸安危。朝不保夕。僧格林沁隊內有開花礮位。用以進攻賊壘。最為得力。請飭先將得力礮隊。星夜撥往救援。即著僧格林沁速將在營得力炸礮。派兵解赴陳國瑞等軍營。合力攻擊。富明阿帶領官兵馬步二千餘人。赴淮。前已有旨。令其先解蒙圍。務即迅速前進。與陳國瑞力籌進取。賊勢趨重蒙城。

臨淮情形稍鬆。著唐訓方酌量就近抽撥得力兵將。助解蒙圍。及力攻懷遠逆巢。並著曾國藩。仍遵前寄諭旨。飭令六潁等處官軍。進攻正陽壽州。以分賊勢。吳崇所派都司張保聖等馬隊。赴蒙隨剿。為數無多。陳國瑞進止機宜。務須飭令詳度地勢。相機而動。不可輕率深入。致墮詭謀。富明阿到後。兵力較充。即可妥籌進剿之方。尤須先將被脅附苗各圩。先行解散。以孤賊黨。吳崇仍將各省協餉催

提源源運濟。毋令缺乏。黃開榜所部破船遺失多隻。著吳崇飭令設法籌購。破位修補。船隻仍卽回防。以資得力。裴蔭標以在營將弁公然為盜。縱勇殃民。可惡已極。經總兵陳文勝查拏該漕督並派員前往會同將裴蔭標正法。並咨明李世忠辦理。甚為允協。李世忠親率所部五千人。馳赴臨淮助勦苗逆。如果實能效命。並著曾國藩、吳棠、唐訓方隨時策勵。與為聯絡。以盡其用。吳崇摺著鈔給僧格林沁閱看。將此由六百里各諭令知之。○裁河南開封府儀封司經歷。從巡撫張之萬請也。以漕運總督吳崇捐輸軍餉。永廣安徽盱眙縣學額一名。○予安徽蒙城陣亡都司張學勝把總魯元林祭葬。世職加等。○甲寅諭內閣。宋景詩以屢降屢叛之賊。竄擾直東一帶地方。經僧格林沁、劉長佑等督軍勦洗。疊有新獲。該逆以失巢窮寇。豈能久延殘喘。惟念宋景詩自外生成。罪固在所不赦。其他

脅從之眾。或因迫於飢寒。被其驅使。或因家產破亡。被其偏脅。其罪可從末減。其情尚屬可矜。自今以後。凡宋景詩之夥黨。內有能不甘從逆。自拔來歸者。朝廷悉准赦其既往之罪。仍著帶兵大員及地方大吏妥為安插。如有能將宋景詩捆縛擒斬以獻者。則非但無罪。而且有功。必當予以獎勵。總之朝廷所欲誅者。惟宋景詩一人。其餘被脅之眾。概可從寬。務須及早歸順。切勿甘心從賊。自取滅亡也。著僧格林沁、劉長佑、閻敬銘將此旨刊刻謄黃。廣為曉諭。以示朝廷法外施仁之至意。諭議政王軍機大臣等。有人奏京畿內地聯盟聚眾請飭拏辦一摺。立會聚眾。久干例禁。現在小秦先等膽敢在禁城地面立會糾黨至百餘人之多。更有勾串蠹役情事。不法已極。近日明火搶劫之案層見。疊出。未始不由於此。若不亟行查辦。深恐釀成事端。著步軍統領衙門順天府五城按照所指首夥

匪犯各姓名。嚴密查拏務獲。送部究辦。如果屬實。盡法懲治。不准一名漏網。原摺著鈔給閱看。將此各諭令知之。○又諭有人奏。良鄉縣屬琉璃河地方。近有天津縣棍徒潘得華。張有城等。在彼執廢照私立稅局。侵擾行旅。請飭查拏究辦等語。良鄉縣屬琉璃河地方。據稱於咸豐七八年間。已經該縣將稅局永遠禁革。棍匪潘得華等。膽敢私立稅局。肆意強橫。擾害商旅。如果屬實。大千法紀。著萬青

藜。林壽圖。密派公正員弁。前往確查。密拏匪犯。從嚴懲辦。所持廢照。係何年漏未呈繳之件。並著確切查明具奏。原片著鈔給閱看。將此諭令知之。○又諭本日議政王軍機大臣呈遞僧格林沁信函。據稱初二日寅刻。我軍由袁莊拔隊向西南行三十餘里。即見該逆在何莊宋寨一帶。攻撲民團。當即齊隊進剿。該逆列仗迎拒。約計馬賊千餘名。勢甚兇猛。官軍一擁衝壓。逆勢不支。紛紛向西南狂奔。

計追殺一百餘里。至開州地方。所賸敗匪尚有數百名。恆齡等仍在前追殺。舒通額等齊隊繼進等語。此股竄匪。勦辦已經得手。不難緊躡其後。一鼓勦平。著僧格林沁即行飛飭。恆齡等晝夜跟追。並設法分兵繞擊。毋任再行竄擾。蘇克金等亦當飭令整隊追賊。不得藉口沿途按勦。竄匪餘匪多所遲誤。致干重咎。宋逆以失巢狂寇。到處狼奔豕突。沿途裹脅之人。未必盡甘心從逆。然宋逆詭詐多端。

安知不誑騙其脅從之眾。以為歸順朝廷。萬無生理。使從逆者心愈堅而勢愈固。為今之計。若能解散脅從。使首惡之勢日孤。則勦辦更易為力。本日明降諭旨一道。著僧格林沁。劉長佑。閻敬銘。於奉到後。即行刊刻。謄黃。徧行張貼。或懸賞購緝。務將宋逆殄除。以靖地方。將此由六百里各諭令知之。○又諭張之萬奏。大金店股匪被勦南遁。現飭追躡迎勦。一摺。盤踞大金店之張總愚。大股恃眾阻險。

經張曜督飭馬步各隊奮力攻勦該匪棄險狂奔張曜拔隊由汝州一路追躡張之萬現調永奎馬隊由葉裕繞出賊前並飭王文行勇隊取道襄城過賊東竄著卽嚴飭諸軍前截後追乘該匪喘息未定盡力勦洗並檄飭南陽鎮總兵知府督率兵團過賊奔軼之路毋得稍有疏虞其李大箇子股匪由永夏之交突竄會亭一帶雖經毛昶熙督飭成景等擊退惟蘭考睢杞之間曠野平原無險可扼

難保不乘我不備率眾西趨仍著張之萬毛昶熙檄飭各營及地方文武嚴密防範不得稍有鬆懈貽誤事機尹嘉賓徐連陞克復高寨而捻首秦喧等竄入沈阜邊界之李王兩寨並襲破劉坤圩以為犄角之勢亟宜乘勝殄除肅清疆圉著張之萬等飭令尹嘉賓等會同地方團勇迅將王李等寨攻拔殲擒秦喧各逆期於淨絕根株張之萬另片奏李明惠一軍由皖赴汴已遵旨催令北渡馳赴直

省等語宋景詩匪黨復竄回開州一帶直豫交界處所正需得力兵勇迎頭截擊著劉長佑查明該總兵行抵何處飭令會同河北鎮道及直省派出之將領等四面兜勦務將此股賊匪盡行殄滅毋令乘閒他竄將此由六百里各諭令知之○又諭張集馨奏漢中城固相繼失陷一摺據稱川援八軍暨果健等營進攻油坊街將士深入致被包抄傷亡軍士遺失器械甚多退至青石關等處屯紮賊

匪遂於八月二十日攻陷漢中府城二十三日復陷城固現在分別咨行妥籌堵禦並自請議處等語漢中被圍日久堅守待援張由庚等軍前既遲遲不進迨進屯雲峰寺等要隘復不能慎重進剿致軍聲大挫郡城失陷實屬貽誤戎機劉蓉已由南江起程著卽星夜前進督率漢南諸軍相機勦辦該處將領現已失利戴罪圖功如再不知愧奮必當從重治罪決不寬貸一面嚴飭毛震壽等招集

潰敗兵勇。繞赴西鄉。防堵北面。李雲麟將抵山陽。卽著取道興安。迎頭截擊。俾免藍逆與漢郡匪徒。勾結為患。梁作揖一軍。業經楚省調回。興安一帶。空虛可慮。現在城固礮船。盡為賊據。若沿江而下。其勢更熾。知府周有全所帶礮船。自應留泊茶鎮。著官文嚴樹森妥籌辦理。其鄖陽所屬地方。並著該督撫嚴密防範。以備不虞。周達武。曾紀鳳等營。分布廣元等處。距漢中尚不甚遠。著駱秉章飭令該

總兵等。以勦為防。毋事株守。多隆阿已將臨潼十三村攻克。進師塔底。勦辦正當得手。能否分兵策應。並著該將軍妥籌兼顧。石泉首當賊衝。子午谷尤關緊要。多隆阿務當與張集馨選派勁旅。前往擇要扼勦。並飭令該處鄉團。協同堵禦。毋稍疏虞。張集馨所奏旗綠各營兵丁。飢疲已久。逃亡滋多。非朝夕所能整頓等語。與前奏裁汰訓練及聲勢甚壯之語。自相矛盾。該署撫前奏石泉等州縣。每邑

集團萬人。密布漢江北岸。興安一帶。可保無虞。此次又據陸莖等稟。輒稱西北勢甚空虛。可見該署撫從前奏報。徒事鋪張。著傳旨申飭。至此次漢中失守情形。摺內聲敘未詳。並著劉蓉。張集馨。查明據實。詳細具奏。將此由六百里加緊諭知。官文。多隆阿。駱秉章。嚴樹森。劉蓉。李雲麟。並傳諭張集馨知之。○又諭張集馨奏。憑陳陝省彫敝情形。暫請以糧濟餉。並楚軍抵漢後。無庸專設糧臺各摺片。陝

西自髮逆回匪相繼作亂。各屬停徵進款無著。而大兵雲集。出款浩繁。現在曹克忠勸令從逆村莊捐糧贖罪。業經捐麥至五萬餘石之數。卽著張集馨飭員迅速催交。收運入城。並照所請。先給滿餉。後給漢兵。務令國家有用將士。不至身罹凍餒。一俟餉項充裕。卽將滿洲兵餉米折。仍按四成支放。以恤兵艱。穆騰阿務當宣布朝廷德意。加意拊循。毋令失所。前因李雲麟奏請於至漢後。由陝省派員

籌備軍餉。當經諭令劉蓉張集馨妥辦。茲據張集馨奏。漢南軍餉兵糧。已由川省派員採買接濟。似可不必另設糧臺及製造等局。轉致推諉等語。時勢艱難。委一員必增一員之費。添一員必增一員之弊。張集馨所奏。係為覈實起見。尚屬可行。卽著劉蓉查照辦理。並知照李雲麟。以免歧誤。捻股張總愚等。由汝州一帶南趨。深恐乘隙西犯。著多隆阿張集馨等。督飭商維等處。在防文武豫籌防範。毋稍疏虞。將此由六百里諭知多隆阿穆騰阿。劉蓉並傳諭張集馨知之。○甯夏將軍慶昫等奏。甯夏回匪。現在具呈悔罪。得旨該將軍等論漢回互相報復情形。俱中竅要。回匪之藉端肆逞。固應示以兵威。且防墮其詭計。漢民之喜事生釁者。亦須隨事彈壓。悉歸駕馭。儻敢任性妄為。必當嚴查懲辦。以靖奸宄。而遏亂萌。○以河南登封團練助勦出力。賞教諭張拱辰等藍翎。餘升敘有差。○以陝西漢

中城固府縣兩城被賊竄陷。革道員張由唐。總兵官朱桂秋職。仍留營署巡撫張集馨布政使毛震壽等。分別議處嚴議。○以援勦不力。陝西總兵官福兆下部議處。○予陝西禮泉陣亡遊擊梁仕紳祭葬世職。○予陝西鎮安殉難訓導蔡兆蘭等祭葬世職加等。○追予湖北陣亡道員王壽同諡忠介。子恩晉暨家人義勇等一併附祀專祠。○

大清穆宗繼天開運受中居正保大定功聖智誠孝信敏恭寬毅皇帝實錄卷之七十八

大清穆宗繼天開運受中居正保大定功聖智
誠孝信敏恭寬毅皇帝實錄卷之七十九

臣等謹將本年內各款恭摺具奏

理更部事務事

正統間高麗使臣

學士

加六

敕修

同治二年癸亥九月乙卯諭內閣前因王明

等奏盛京禮部侍郎雙福家人郎順有勒索
商稅情事當經先後降旨勒令雙福迅將郎
順交出並照部議將雙福降調茲據王明等
奏審辦勒罰商稅家人郎順畏罪潛逃久未
緝獲現在鋪商各安生業先就在案人證按
律定擬一摺此案稅局貼書馮暢詳卑役王
義與郎順查驗牲畜扶同附合雖訊無夥同
得財等弊究屬未能力阻著照擬杖責革役
家人郭城於郎順藉端勒罰雖無知情分肥

情事惟未能先事查出亦有不合著照擬答
責署承德縣知縣文景於承審漏稅之案輒
將罰商王廣雲責後管押以致郎順得以藉
端嚇詐殊屬辦理失當著交部照例議處降
調侍郎雙福於家人郎順勒索商稅毫無覺
察及至事發又未能立時送案以至逃逸日
久無獲著再行交部照例議處即令回旗聽
候部議逃犯郎順勒罰眾商幾釀事端為此
案要犯著與在逃之革書田鍾璧一併嚴拏

務獲歸案審辦不得以案已訊結稍涉疏縱
○諭議政王軍機大臣等多隆阿奏收復高
陵縣城涇河迤北一律肅清及雷正綰攻拔
永樂店等處賊巢各摺片現在軍威大振該
逆自必聞風膽落亟宜乘勝進攻以收破竹
之效著多隆阿督飭諸軍移營前進節節掃
蕩迅將咸陽迤西乾邠等處賊巢削平並嚴
杜該匪往西北奔竄之路期於聚而殲旃廓
清全陝以副委任馬陞一軍曾否馳抵咸陽

如敢任意遷延。卽著從嚴叅辦。鳳翔被圍已久。望援急切。若赴救再遲。恐蹈漢中覆轍。該大臣當嚴飭陶茂林。速將曹逆殄除。尅日直達鳳翔。以拯倒懸之急。多隆阿亦當親督大軍。由高陵節節前進。為之聲援。漢中失守以後。賊勢若何潰敗。兵勇能否招集成軍。仍著該大臣速飭毛震壽。就現有兵力。扼要堵禦。毋令再行竄擾。完善該處兵將無所統屬。事權不一。多隆阿仍當妥籌兼顧。具子午谷一帶。為省垣門戶。關係甚重。著督同張集馨。豫為布置。毋稍疏虞。洛陽擒匪。雖由東南竄去。惟該逆匪奔突靡定。且張總愚一股。勢甚慄悍。潼高等處防務。未可稍鬆。如有西竄信息。卽速撥勁旅前來截剿。毋稍大意。將此由六百里諭令知之。○又諭。多隆阿奏陝省精華之地。已成焦土。餉銀無出。全賴各省協濟。以裕軍食。山西湖北。尚陸續解餉。惟直隸山東河南。應解該營協餉。從未批解。請飭迅解等

語。該將軍入關後。疊挫兇鋒。力圖埽蕩。現當攻勦喫緊之際。復屆冬令。餉項缺乏。兵勇深虞譁潰。著劉長佑。閻敬銘。張之萬。迅將應解該營餉需。速行撥解。以濟軍需。毋得遲延干咎。將此由五百里各諭令知之。○又諭。張凱嵩奏勦擊東西兩省股匪。籌辦容岑軍務情形。暨嚴防李逆竄越邊境各摺片。范逆盤踞容岑。負隅自固。疊經官軍移營進逼。勢漸窮蹙。遂以重賂招致信宜賊首鄭金等。由南渡趨援。益以附近土匪。眾逾二萬。經蔣澤春等疊擊獲勝。而兵力尚單。未能大挫賊鋒。著張凱嵩督飭該道員力督兵練。迅將信宜援賊擊退。埽平附近土匪。趕緊規取縣城。為擒穴擒渠之計。現在高州軍務大有起色。著張凱嵩咨會崑壽等。同時進取。以分賊勢。覃塘首逆黃三率黨踰伏平天寨地方。並分黨上竄橫州。業經劉坤一分投圍剿。卽著飭令該藩司分派將士。實力進攻。以期擒斬首惡。殲除

醜類石逆餘黨李幅猷竄入湖南麻陽縣境榆市地方恐其仍循熟徑回竄粵省自應分路嚴防以免竄越著張凱嵩咨會蕭榮芳偵探賊蹤扼要堵截並檄飭各該地方文武員弁厚集團練實力防堵毋稍疏虞將此由五百里諭令知之○命翰林院編修呂朝瑞提督湖南學政○以克復陝西高陵縣城涇河迤北肅清予總兵官余文科等加銜升敘有差○以陝西攻克永樂店塔底賊巢予總兵

官成祿等升敘有差○以福建省城解圍出力賞在籍知府王有樹花翎道員林士傳等加銜有差○以福建汀州解圍出力予在籍道員羅上楨等加銜升敘有差○予浙江永嘉等處陣亡武舉吳希璘等九百六名賞卹如例○予山東黃縣陣亡殉難貢生趙有恬等紳民婦女二千九百四十四名口分別旌卹如例並予建祠○句到湖廣上年情實罪犯停決斬犯三人餘二十人予卹○丙辰諭

內閣童華著授孚郡王讀○又諭前因穆騰阿奏奏保馬德昭先後不符迨奉旨明白回奏猶未明晰降旨交部擬處茲據兵部奏請將穆騰阿照溺職例革職實屬咎有應得姑念穆騰阿曾在軍營著有勞績著革去將軍加恩賞給副都統銜作為巴里坤領隊大臣即由西安馳驛前往文永著俟穆騰阿到任後照例馳驛來京當差○調荊州將軍多隆阿為西安將軍以正紅旗漢軍都統富明

阿為荊州將軍○旌表守正捐軀山西鳳臺縣民婦韓賀氏○丁巳諭內閣前據勝保奏訪查陝西州縣請將隴州知州邵輔署邵陽縣事候補同知方鼎錄富平縣知縣江閣署咸陽縣事升用同知直隸州知州邵玉琳等分別獎勵當經降旨允准嗣經吏部以所保各員並未聲明何案勞績奏請飭令該省督撫詳查覆奏再行分別辦理茲據張集馨奏稱該員等或臨敵折衝或先事防範均有微

勞足錄請仍照原保給獎等語除邵輔業經陣亡江開業經病故無庸議外方鼎錄邵玉琳二員於各該署任內防守既尚出力自未便沒其微勞惟原保獎敘究屬過優方鼎錄著改為以知府儘先升用邵玉琳著改為賞加知府銜○諭議政王軍機大臣等本日議政王軍機大臣呈覽僧格林沁信函內稱宋景詩敗竄至張秋鎮駛過黃河逃走官軍追勦另股馬賊於廣平屬境各情形與閻敬銘

所陳大略相同逆賊宋景詩分遣其黨竄踞於運河東西直東各境牽掣官軍而自率死黨由張秋搶船駛過黃河逃遁固在意中既據僧格林沁咨行山東河南各巡撫飭屬兜拏閻敬銘令總兵保德等帶隊跟追東阿知縣吳樹聲亦踰山追捕此賊亡魂漏刃所帶領不過數十人當亦無難擒拏就獲惟賊蹤詭異猶恐所至潛行煽結餘燼復燃即著閻敬銘嚴飭保德吳樹聲等緊蹙跟追使賊不

得喘息並飛飭東阿山南各地方四面兜捕毋任遠颺僧格林沁亦即飭國瑞就近自鄒縣酌派馬隊馳往肥城東平一帶探蹤拏勦如果宋逆確由此路遁走非欲於兗沂等處勾串教匪餘黨即圖竄越豫境與各捻股結連及投入苗沛霖夥內以為藏身之固宋逆現在棄舟翻山去當不遠務須跟蹤設法購綫拏獲以絕後患東阿陽穀與曹屬毗連為從前賊擾豫東熟徑著張之萬嚴飭所屬於

曹考等處交界沿河各地面嚴密截拏以防該逆乘間竄越現在運河東西兩岸賊首楊澱一朱登峰各帶股匪竄擾著劉長佑閻敬銘嚴督所部務將各該股匪就地殲除僧格林沁函內聲稱大兵所追係朱登峰一股如果蘇克金等馬隊緊蹙其後劉長佑現駐衡水督率諸軍迎頭攔拏並催令李明惠之軍由河北前進與蘇克金等馬軍聯絡兜勦諒能聚殲不至再虞紛竄其盤踞運河以北之

楊澱一夥黨僅數百名。務即趕緊殲除。毋使再行滋蔓。著閻敬銘催督各軍。劉長佑分飭所部。與東省之軍互相策應。迅速辦理。至宋景詩過河逃走。既未的實。尤恐賊計狡譎。聲言棄眾南竄。而仍潛伏近處。或仍在賊股內。另作詭圖。均屬不可不防。諒該大臣督撫等必能計及。閻敬銘另片奏。平毀莘縣所屬延家營教匪巢穴。首夥擒戮等語。直東各境。似此伏莽。恐復不少。著劉長佑。閻敬銘。隨時督

令帶兵文武及各地方。妥籌辦理。將此由六百里各諭令知之。○又諭唐訓方奏。陳國瑞攻克王圩等處。各情形一摺。該逆併力圍攻蒙城。志在必得。陳國瑞兵力較單。精銳被傷較多。恐未能制賊死命。富明阿已督率所部。由揚州起程。此時計已行抵臨淮。著迅速前。旨。帶兵馳赴蒙城。督同陳國瑞。並姚廣武。英翰各軍。疏通糧道。力解城圍。以固大局。仍須審察路徑形勢。謀定後動。不可稍有疏失。並

著吳棠飭令姚廣武與陳國瑞聯絡聲勢。合力攻剿。以厚兵力。毋得退守宿西。各不相顧。唐訓方現飭王萬清等進紮淮北洪家圩。並令王才秀。何紹彩等軍。分紮南北兩岸。規取小蚌埠等處。攻賊必救。圖牽逆勢。又令克蒙額等軍。於渦北一帶馳驟雕剿。以亂賊志。能否掣動蒙城逆眾。回顧懷遠。尚無把握。此時蒙邑危在呼吸。自當先聚全力。以解倒懸。臨淮現在兵力較厚。如富明阿兵力不敷。勦辦

即著唐訓方抽撥兵將。助解蒙圍。本日據閻敬銘奏。宋景詩股匪被勦窮蹙。翻山奔逸。此股逆匪。係官兵裝束。風聞有宋逆在內。或乘間南竄淮徐。或竄赴皖北。句結苗逆。均未可定。吳棠唐訓方。務當督飭地方文武嚴密稽查。實力巡緝。如遇該匪竄至。即行悉數殲擒。毋稍疏縱。將此由六百里各諭令知之。○又諭英桂奏。皖捻勢將西犯。晉省沿河州縣喫重。現在防守情形一摺。皖捻紛擾豫境。如搶

渡過河。自新澗至陝州靈寶等處。多與晉省連界。平陸縣茅津渡以上。官私渡口。不一而足。在在須防。現派副將羅承勳楚勇五百名。暫留平郡候調。選省標兵五百名。往平定州。交鍾秀擇要布置。並令移紮茅津渡之和昌。確探賊蹤進剿。著英桂督令派出各軍實力防禦。如捻逆逼近晉疆。卽飭各該將弁迅速渡河兩面夾擊。以圖聚殲。該撫惟當實事求是。認真辦理。毋得徒託空言。若專事粉飾。一

經賊到。又以兵單匪眾為詞。任令該省完善之區。被賊蹂躪。必惟英桂是問。本日據閭敬銘奏宋逆股匪在黃河上流搶船偷渡。雖據賊供向東西張秋鎮逃竄。惟山西為該逆熟徑。恐偽作南竄之勢。而暗中乘我不備。仍由晉省遁逸。尤不可不豫為之防。著英桂實力防守。如宋逆分股由直擾晉。卽嚴飭各軍迎頭截擊。悉數殄除。以保完區。至宋景詩曾否由晉省逃逸。並著嚴密訪拏。毋任首惡漏網。

前任翰林院編修劉熙載聞現在寓居山西。主講書院。著英桂查明。卽飭該員迅速來京。將此由六百里諭令知之。○派署兵部右侍郎桑春榮知武舉。吏部左侍郎孫葆元為武會試正考官。翰林院侍讀學士孫鏘鳴為副考官。○以都察院左都御史戴齡兼正紅旗漢軍都統。○以山東張秋鎮堵截竄匪不力。巡撫閻敬銘下部議處。摘通判錫齡頂帶革職。千總張祖榮職遣戍軍臺。○戊午。諭議政王

軍機大臣等。有人奏山東署黃縣知縣崔迺輦貪婪劣蹟。實有可據。該縣與山西人田姓結為兄弟。帶赴署任。田姓遂與該處吏胥朋比為奸。以致民怨沸騰等語。知縣為親民之官。若如所奏各情。實為地方之害。著閻敬銘按照所參各款。逐一查明。據實參奏。毋稍徇隱。所稱田姓有無其人。並如何串通飭法之處。一併查明具奏。原摺著鈔給閱看。將此諭令知之。○四川總督駱秉章奏援陝之嚮導

桂字湘果等軍均已行抵漢郡得旨現在劉
蓉已到漢南該督當飭派出各軍聽劉蓉調
遣仍隨時與之籌商迅圖克復所籌添調勇
丁力顧川北完善均著照辦如匪蹤由階文
窺伺川境卽飭周達武等出境迎剿毋稍疏
懈○豁免直隸滄南皮鹽山慶雲天津靜海
青衡水山東海豐九州縣暨嚴鎮海豐豐財
三場節年未完竈課○己未諭議政王軍機
大臣等基溥等奏遵旨勘辦要工據實陳奏

一摺據稱詳勘

永陵神樹傾斜與前奏相符並未續出情形此
樹係

寶頂南面自生樹株無關風水擬將樹身喫重
處所俱用徑尺柱木撐架穩固已斷斲朽之
枝略為清理

寶頂甄土現被樹根掀露之處敬謹設法培修
圓整擇於九月十六日興工豫於初八日取
土等語所籌均尚妥協著卽敬謹照辦務使

出土樹根不至有妨

寶頂南倒樹枝亦不至埽及

殿檐方為妥善至

啟運殿後坡瓦片有壓傷走錯情形既係本年
來年方向不宜著卽從緩興修連日修理情
形仍照例由驛續行具奏將此諭令知之○
又諭富明阿奏到臨日期並遵旨力顧淮北
一摺富明阿現已行抵臨淮與唐訓方會商
擬赴長淮衛一帶查勘地勢駐紮前敵先將

附近要隘賊營賊圩妥為勦撫再行相機進
取所籌尚屬周密著懷遵前旨督同王萬清
等軍迅將渦河懷遠一帶賊營剋期埽蕩與
陳國瑞聯為一氣俾聲勢可壯力保要區唐
訓方仍派得力兵弁隨同富明阿前往攻勦
庶客兵得有嚮導方不至貽誤戎機至淮南
北賊營賊圩被苗備脅者居多臨以大兵當
知畏懼如其歸誠效順卽須乘機招致以孤
苗逆之勢富明阿致議政王等信函業由軍

機處呈覽。所稱苗沛霖黨與衆多。必須設法解散。勦撫兼施。方可較有把握。及臨淮各營兵餉放款。須歸畫一等語。均係實在情形。卽著與唐訓方酌度情形。妥籌辦理。另片奏行抵盱眙。該邑士民環遞稟呈。請留知縣李金庚暫緩調任等語。盱眙屢遭兵燹。民不聊生。有此深得民心之地方官。自應仍留該處。以順輿情。著唐訓方酌覈辦理。將此由六百里各諭令知之。○庚申。諭議政王軍機大臣等

劉長佑奏。敗賊窮竄。分合靡常。經兵圍截擊。南奔兼籌防勦。及催提李明惠一軍前進。兜勦各摺片。所陳賊分兩股。東西竄擾於直東各境。並擾及河南滑濬等縣地方。東路股匪。據稱係楊澍一。而於西路股匪。未據聲稱賊首何人。是否卽朱登峰一股。所稱都司陳定邦等擒獲賊供。宋景詩已於開州太平莊率黨百餘人乘船遁逸。與前日僧格林沁信函。閻敬銘奏報內。所稱宋逆自張秋鎮下駛。棄

船翻山。帶領數十人逃走等語。又復小異。殊恐獲賊所供。均非確實。該逆狡計。故為聲揚。棄衆逃走。而實則仍在賊股內。或別圖竄擾。均屬不可不防。各股賊竄分合之處。摺中聲敘亦尚多未明晰。嗣後務須將何股賊首何人竄由何路。一一偵探確實。分別另單簡明開載。方能一目了然。僧格林沁前稱大軍所追係朱登峰一股。此次劉長佑亦稱西路股匪。屢經恆齡等馬隊追及鉅鹿等境。現在此

股北竄定州。復由新樂回竄。橐城著僧格林沁嚴飭恆齡蘇克金等馬隊。旣卽探蹤追勦。毋再遷延。劉長佑督令直省各軍。及各地方文武嚴扼北竄之路。並豫備迎頭截擊。與恆齡等馬隊會合夾攻。盡殲醜類。橐城地近晉邊。前經疊諭英桂於平遼一帶嚴防竄越。著卽飭令鍾秀嚴督所部兵勇。實力設防。以保完區。該省防兵頗單。直省諸軍。果能前截後追。賊不得越獲鹿井陘。自可無虞。犯及晉疆。

劉長佑現駐滿城卽分飭諸軍妥籌兼顧其分股零星餘匪向濮州竄去者僅有四五十人該地方文武實力捕拏卽可全數殲擒著劉長佑飭令所屬認真辦理楊澌一股由東強南竄現又已至何處並著劉長佑閻敬銘各督直東兩省各軍聯絡兜剿務將敗殘餘匪剋日殄除毋許遺孽復行滋蔓賊蹤竄至滑濬等境河北鎮道何以均未在防楊長春遇賊於張官屯何以未及接仗屢經諭令

張之萬督飭該鎮道等嚴密設防究係如何辦理著再行申諭該撫嚴飭該防文武痛加振刷毋再玩延致干咎戾李明惠一軍著劉長佑再行提催或卽飭令駐紮豫省要路與直省官軍會合夾擊毋致與賊相左宋景詩究係逃往何處有無另作詭圖著該大臣督撫等嚴切確查隨時具奏將此由六百里各諭令知之○又諭麟興奏偵探俄人並防範烏梁海等處辦理情形一摺俄人在伊犁卡

外屢次撲犯官兵營盤均經我兵擊退獲勝烏里雅蘇台地處北邊自應一律嚴防麟興現飭坐卡侍衛實力偵探務當督令該員等隨時留心訪察俄人動靜豫行呈報以期有備無患毋得視為具文所派偵探烏梁海之協理台吉貢濟勒多爾濟著麟興飭令慎密查訪有無與俄人勾結情事迅速呈報務須處以鎮靜妥為駕馭不可稍涉張惶所稱選擇營員懇給虛銜以備差委之處卽著照所

擬辦理其剋調調備操蒙古兵並各路官兵糧餉一節務須臨時酌量緩急情形辦理不可先事糜費亦不可臨時貽誤前因分界一事總以早行了結為宜疊經諭令明誼等令其行文知照西悉畢爾准照該使臣議單定議分界約期會勘該國接奉明誼等知照後諒可不至藉端尋釁著麟興隨時咨詢明誼明緒酌度情形相機辦理所有烏城防守及沿邊卡外偵探各事宜仍須嚴密籌備毋稍疏

解將此諭令知之。○兵部以武會試中額請得旨滿洲蒙古取中二名。漢軍取中二名。奉天取中一名。直隸取中十名。陝甘取中一名。廣東取中十一名。河南取中四名。山東取中七名。山西取中五名。湖北取中二名。湖南取中二名。四川取中一名。廣西取中一名。福建取中一名。江西取中二名。○辛酉。諭內閣。多隆阿奏請將發遣大員暫留軍營效力等語。已革都察院左副都御史王履謙雖係在籍幫辦團練紳士。惟前據瑞昌王有齡密摺稱其與地方官種種掣肘。以致貽誤全浙軍務。瑞昌等並有死不瞑目之語。其罪已無可逭。且於紹興失守後。蒼黃遠遁。又復飾詞諉罪。前經降旨將該革員發往新疆效力贖罪。已屬法外之仁。該革員現在行抵陝西。豈得藉口道途梗阻。希冀逗遛。多隆阿請將該革員暫留軍營之處。著不准行。○諭議政王軍機大臣等多隆阿奏。官軍疊破賊巢。大獲全勝。

現仍督軍西進。並陶茂林由郿縣進剿情形。各摺片逆回由渭河至涇河。綿亙十餘里。排隊抗拒。經多隆阿親督各營。分左右兩路進攻。將蘇家溝渭城賊巢先後攻破。渭城餘匪奪路奔逸者。馬賊不過五六百人。步賊不過一千餘人。此時賊勢窮蹙。難保不竄擾近省一帶。以圖牽掣大軍之勢。著張集馨會同德興阿嚴密防範。相機截剿。雷正綰統帶所部各營。仍由涇陽渡河。曹克忠現赴咸陽。即著該署提督等擇要駐紮。力扼該逆西竄之路。其咸陽之白起營。馬家埠賊巢。及醴泉郿乾等賊黨。著多隆阿節節進剿。以期迅就肅清。派援鳳翔之陶茂林一軍。由省取道藍郿郿縣一帶前進。沿途遇有賊匪。經該總兵整隊截殺。屢破賊壘。現在槐芽鎮至郿縣四十里。尚有餘逆肆擾。即著飭令陶茂林統率所部乘勝進攻。掃除零匪。疏通糧路。俾官軍暢行無滯。得以速抵鳳翔。庶可力解重圍。鳳翔望

援甚急。多隆阿嚴飭該總官趕緊前進。毋得稍涉遷延。正在寄諭間。據穆騰阿奏。訓練旗兵及防守出力並應行遣撤各員。請分別辦理各摺片。所稱挑選精壯旗民二千名。時加操演各事宜。係西安將軍應辦之事。著多隆阿卽飭管帶各員。勤加訓練。以備防剿。其所請各員獎勵等情。並著多隆阿覆加查覈。如果實有勞績。再行奏請獎敘。穆騰阿原摺片著鈔給多隆阿閱看。王履謙雖係在籍辦團

紳士。惟種種貽誤取巧。厥咎甚重。本日已明降諭旨。不准留營。該大臣嗣後遇有似此獲咎債事之員。斷不可輕率奏留。致啟微幸。趨避之漸。前據多隆阿節次奏請將勝保案內閣不敏施鵬寶型汪曜奎等解交愛仁等審訊。均經降旨允准。除閣不敏施鵬二員。愛仁欲俟赴陝查辦外。其實型一員。何以本日據愛仁奏稱並未奉旨交訊。豈該大臣未將奏准降旨之件。鈔錄行知。此後又何以不將該

革員解晉。汪曜奎一員。亦何以至今尚未解晉。卷宗亦未移交。此等奉旨交審要證。辦理何以如此參差遲誤。著多隆阿查明覆奏。將此由六百里諭知多隆阿。雷正綰並傳諭張集馨知之。○以陝西官軍攻克蘇家溝等處賊巢。賞委參領奇普松武常福佐領善山保巴圖魯名號。餘加銜升敘有差。○旬到山東。江西上年情實罪犯。停決山東斬犯二人。絞犯一人。江西斬犯二人。餘二十八人予勾。○

壬戌。以黃河上游各工修防平穩。頒東河河神廟扁額。曰茨防永祐。○諭議政王軍機大臣等。愛仁奏遵查特旨交辦事件一摺。據稱革員閣不敏施鵬案內人證均在陝省。紛紛調晉。轉滋拖累。寶型一員並未奉旨交辦。汪曜奎一員至今尚未解到。卷宗亦未移交。各等語。前據多隆阿奏先後請將閣不敏施鵬寶型汪曜奎等一併解至山西交愛仁等歸案審辦。均經降旨允准。寶型一員何以多

隆阿未將奉到批諭知照。汪曜奎一員。多隆阿何以至今未解晉省。並未移交卷宗。以致彼此歧誤。昨已寄諭多隆阿。令其查明覆奏矣。至閻丕敏施鵬二員。人證俱在陝省。為數較多。現在由潼關至西安道路已通。著愛仁酌度情形。如可在晉審結。即著酌提要證數名。並全案卷宗。認真研鞫。如必須親往查勘。即督同隨帶司員。馳驛前赴陝西。秉公查辦。其實型及汪曜奎等案。亦即可就近訊結。以

免延宕。將此諭令知之。○又諭有人奏請嚴緝匪徒。以靖地方一摺。據稱河間以北。屢有騎馬盜賊搶刦之案。不可枚舉。任邱大城河間三縣著名棍匪孫幅等。勾通各該縣班役。傷害良民。各踞巢穴。蔓延三縣。請飭嚴拏等語。畿南重地。該匪等膽敢糾眾釀亂。串通盡役。擾害地方。無怪近畿各處搶刦之案層見疊出。該地方官平日隱忍徇庇。漫不關心。蔓延日久。必至釀成巨患。著劉長佑迅派明幹

委員。按照摺內所指首夥匪犯姓名。會同各該地方官設法購綫。嚴密查拏。務期悉數弋獲。盡治懲治。毋任一名漏網。以清奸宄。而靖地方。原摺著鈔給閱看。將此諭令知之。○癸亥。諭議政王軍機大臣等。曾國藩奏援師大捷。青陽縣城解圍。並陳奏近日各路軍情各摺片。青陽雖已解圍。而太平石埭旌德甯國四縣尚為賊踞。徽郡防務仍未可稍鬆。左宗

棠現因富陽新復。剴調劉典回浙。想係因徽州防兵較前單弱。勢不能出嶺會剿。惟徽郡所屬地方。為江浙兩省屏蔽。設或復被竄擾。則剿辦又重煩兵力。左宗棠現在駐軍富陽。距徽防稍遠。但關繫浙師後路。亟須妥籌兼顧。仍著左宗棠隨時策應。與皖南諸軍聯絡聲勢。迅埽妖氛。毋稍大意。太平石埭旌德甯國四縣城於何時失陷。現在是否均淪於賊。著曾國藩查明具奏。江忠義席寶田各軍業經曾國藩分飭進攻石太等縣。現今秋氣已

深軍營疾疫當已盡痊。著該大臣嚴飭帶兵員弁激勵軍士鼓勇前進。會同鮑超一軍將皖南被陷各城次第攻克。期於達達東壩。會師金陵。或進取廣德。為蘇浙各軍後路援應。以收聚殲之效。朱品隆因病請假回籍。曾否定有日期。該總兵平日帶兵得力。一俟假期將滿。即當催其迅速來營。毋得似張運蘭之一經回楚。遂不同皖也。陳國瑞進援蒙城。疊破賊圩。近復諭令富明阿相機援勦。兵力漸

厚。蒙城當可解圍。苗黨倘貫金句結醜類。分竄余家集三覺寺等處。擄掠據會國藩奏稱。不至遽謀深入。但該逆詭詐多端。聲東擊西。是其慣技。仍著該大臣檄飭將疑學等以勦為防。俾何紹彩蚌埠之師得以乘勢進攻。該逆應援不暇。則勦辦自可得手。諒該大臣必能統籌全局。毋誤事機。將此由六百里各諭令知之。○又諭李雲麟奏兵抵鄖西與賊偪近。探聞漢中失守。現籌防勦各情形。一摺。藍

逆句結回逆分擾楚陝交界之湖北口。係在何縣地方。句結何路回匪。約計賊數多寡。李雲麟諒已督軍迎勦。軍情賊勢均著官文等隨時馳奏。李雲麟援勦遲延。以致漢中城固相繼失陷。咎無可辭。所請嚴議之處。著加恩改為交部議處。該京堂即當激勵部將將鎮安股匪痛加勦除。毋任闖入楚境。仍迅即取道興安節節進勦。隨時與劉蓉會商妥辦。毋稍大意。周有全礮船前經諭令留泊茶鎮。該

京堂復派張殿甲率該營水師由鄖陽上駛。即著飭令認真防勦。梁作楫一軍前經官文等調駐鄖陽固鄂西門戶。係在漢中等城未失之先。現在漢中城固不守。儻該逆乘勢下竄。興安空虛。甚屬可慮。李雲麟請令梁作楫分凱字三營駐興安。親統兩營紮茶鎮。並調度兩營水師嚴行防禦。著官文嚴樹森即飭該道員力顧興安。毋庸退紮鄖陽。以資控扼。如鎮安賊眾李雲麟兵力不敷。仍著官文等

妥籌調派以壯聲援。劉蓉諒已由川入陝。著
懍遵前旨。星速前進。嚴飭毛震壽等繞赴西
鄉防堵北面。並督飭張由庚等力圖規復郡
縣。以贖前愆。興安為楚陝門戶。其地險峻易
守。該撫當督飭地方文武及楚省援軍。極力
固守。以勦為防。毋使再有疏失。李雲麟一軍
勦辦鎮安股匪之後。應由何路會勦。著隨時
知照辦理。川中援陝之師。前因統率無人。號
令不一。致有挫敗。該撫到後。務當申明禁令。

一新壁壘。自能所向有功。不負朝廷破格擢
用之意。勉之。將此由六百里各諭令知之。尋
吏部議李雲麟照不應重公罪降二級留任。
事關軍務。無庸查級。紀議抵從之。○以侵漁
玩誤革江南記名總兵官周保清職。永不敘
用。○以安徽青陽縣城解圍。賞提督黃仁遵
徐生德。一品封典。副將林志金。喻榮陞。巴圖
魯名號。提督江忠義等加銜升敘。開復有差。
復陣亡已革參將李殿華原官。暨都司許和

山等十五員。均予祭葬。世職加等。○蠲緩河
南臨漳。桐柏。汝陽。正陽。新蔡。確山。信陽。羅山。
光光山。息十一州縣被擾地方。新舊額賦雜
課有差。○甲子。諭內閣。兵部。奏請廕遲延。可
否賞給。請旨遵行一摺。另片奏請嗣後明定
限期辦理等語。向來滿漢大員子孫。例准與
廕。乃朝廷錫類推恩之曠典。該大員等自應
及時呈請承廕。以昭慎重。豈容日久稽延。此
次原任一等公盛桂。前於道光三十年在吉

林副都統任內。恭逢

恩詔所得廕生。至今已隔十餘年。始據該旗咨
行兵部請給盛桂之子聯璧承廕。並聲明當
時未經呈報。殊屬不成事體。所有盛桂之子
聯璧請給廕生之處。著不准行。嗣後給廕之
典。如何明定期限。以昭畫一之處。並著吏兵
二部妥議章程。會同奏明辦理。具有逾限始
行呈請者。即著毋庸置議。尋議文武承廕。擬
自咸豐十一年十月頒詔之日起。准以三年

為限其限內已經呈請旋遇事故應行補廢者仍照定例辦理至統兵各員因辦理軍務未及依限呈請仍准展限一年從之○又諭前因吏部議奏原任漕運總督袁甲三奏保克復廬州出力各員應行駁正當經降旨允准茲據唐訓方奏稱此案所保各員內有免補免選者係在未定新章以前且袁甲三督兵臨淮當餉需支絀之時將士皆能用命克拔堅城不無微勞足錄請將部駁各員仍照

原案給獎等語所有單開之兩淮候補鹽知事樓葆泰等均著准其仍照袁甲三原請給予獎敘以昭激勸○又諭徐宗幹奏查明捐務積弊案內應追應賠銀兩已未完清各官吏開單呈覽一摺此案已革道員章琮已革庫大使朱仁雖於部飯火耗等項業已清繳惟章琮於庫大使任內膽敢將部飯火耗等項創議分用以致後任相率效尤著與朱仁一併交部分別議罪已革知縣曹學偉未完

丁耗銀三千一百六十兩零應照那移庫銀五千兩以下按律定擬罪名仍一面監追已革山東候補知府李鼎扶同蒙抵已革知府陳謙恩不候查辦輒遣抱告赴京瀆控均有應得之罪雖賠項業已繳完仍著該部將李鼎陳謙恩應得罪名覈擬具奏革員來壻與已革書吏林玉堂等應繳銀兩迄未清完殊屬膽玩應得罪名著該部按律定擬具奏尋議章琮應照例發往新疆充當苦差朱仁應

發往軍臺效力贖罪曹學偉擬總徒四年仍勒限監追李鼎應勒限監追著落代賠陳謙恩應照例治以誣告之罪至來壻與林玉堂等應照前奏所定罪名辦理從之○諭議政王軍機大臣等劉長佑自方順橋馳奏賊股竄至清風店為官軍攔截復由新樂薈城渡滹沱河南竄之後此兩日來未據續報軍情現在風聞有劉長佑帶兵前赴易州之信未知是否確實該督刻下帶兵究係駐紮何處

其前由臺城渡滹沱河南竄之賊復竄何所各路官軍前截後追勦辦如何著劉長佑即將詳細情形迅速馳奏易州地方與紫荆關倒馬關切近均可直達晉省該處毫無豫備尤應妥為防範卽著劉長佑嚴加堵禦毋稍疏忽晉省所屬與易州一帶亦多毗連並著英桂妥籌兼顧隨時偵探賊蹤毋任匪黨乘間竄擾劉長佑前奏此股賊匪敗殘餘黨不過數百人如果官軍前後夾擊無難聚殲恆

齡蘇克金等馬隊是否前後追勦著劉長佑飛檄嚴催並著僧格林沁飭令與直省各軍聯絡兜勦迅圖殲事毋得遷延觀望致該逆肆行鋌走到處誘煽又成燎原之勢王榕吉現在駐紮何處勦辦何路近聞其帶兵甚不得力劉長佑前次摺報稱其在館陶尖莊一帶防勦嗣後並未提及該員帶兵勦賊情形著該督卽行飭知該員令其督率官軍與恆齡等馬隊實力勦賊毋得遠駐無賊之地自

千罪戾如實意存觀望不聽調遣卽著劉長佑嚴行叅奏至直省帶兵各員有不能得力者著劉長佑一併嚴叅懲辦該督於治軍馭將一節亦不得一味寬厚致將玩兵疲賊勢永無了期也將此由六百里各諭令知之○又諭富明阿等奏會商長淮南北全局妥籌戰守並抽兵赴蒙援應一摺現在李世忠派兵助勦富明阿等正可迎機激勵妥為駕馭作其忠勇之氣俾得及時自效而官軍得此勁旅亦可聯絡聲勢藉資攻勦著卽飭令李世忠勦辦南岸之賊以專責成富明阿現由北岸進攻所派前敵各軍卽著統歸富明阿調遣唐訓方兼顧南北兩岸後路並著隨時偵探何路緊急卽由何路策應毋得稍有疏虞蒙城日形危急城圍迄今未解亟應設法拯救以支危局著卽嚴飭派出之總兵宋慶帶領所部迅速馳援富明阿卽督率各軍繼進會合陳國瑞等援蒙之軍力解重圍毋得

遷延觀望致誤戎機。正在寄諭間。據富明阿奏遵旨撥兵援蒙。親赴蚌埠察看地勢。即移營前進。並擬勦撫懷遠賊圩各摺片。現在該將軍親赴長淮衛。即著相機進取。與陳國瑞等軍聯絡一氣。以壯聲援。至應如何將懷遠一帶賊營賊圩分別勦撫。以牽圍蒙賊勢之處。並著富明阿妥籌布置。將此由六百里各諭令知之。○又諭富明阿奏臨淮攻勦喫緊。請飭催解各處應撥餉項軍火等語。現在富

明阿督帶援軍已抵臨淮。攻勦正形喫緊。一切餉需軍火均應寬為籌備。不至稍有缺乏。始可收士飽馬騰之效。著官文嚴樹森憚世臨懍遵前旨。各將每月應撥臨淮餉銀二萬兩。迅速按月如數解往。並著吳棠飭令喬松年。由該處糧臺。迅將應解臨營軍餉火藥等項。遵照前奉諭旨。即行趲解。以利攻勦。毋稍遲延。將此由五百里各諭令知之。○又諭憚世臨奏髮逆搶渡沅河。竄陷會同綏甯。追擊

防堵情形一摺。逆首李幅猷率黨由浦市竄向芷江黔陽一帶。奪簪爭渡。猝陷會同縣城。經官軍追至。將城池攻克。賊復竄陷綏甯。官兵跟蹤追至。該逆遂竄長安堡青林界。憚世臨現飭周洪印。戈鑑等扼駐靖綏。以防回竄。令陳士杰。熊宗洛。水陸各營防堵永州等處。趙福元等諸軍由武岡新甯至東安一帶。沿途探勦。並留張運蘭等入粵之師。先在郴宜樂昌暫駐。以防該逆東竄江省。惟此股賊數

尚不下三四萬人。每以尾股牽掣追兵。而前股則乘虛狂奔。勢甚剽疾。此次官軍雖於托口及會同縣城鳳陽坪等處。斃賊各千餘名。均已勢成尾追。於大股賊勢無損。憚世臨務當分飭各軍迎頭攔勦。截其去路。以便痛加掃蕩。毋得徒事跟追。致令賊蹤任意蔓延。擾及鄰省。江西為皖浙金陵諸軍後路。東南大局最關緊要。現在江忠義李榕諸軍已由九江進勦池州所屬之青陽等處。劉典一軍前

已由江西回駐徽郡。現復經左宗棠調回浙省。饒九兩郡防兵勢已較單。設李幅猷一股再由楚南竄入江境。恐東西兩面防勦。卽有兼顧不遑之勢。著惲世臨嚴督在事文武實力堵勦。就地殲除。毋得縱令東竄。並著沈葆楨選派得力將士。鼓勵鄉團。扼要堵截。毋令賊蹤擾及邊境。是為至要。綏甯地接融懷。兼可東趨永甯等處。著張凱嵩速撥兵勇。分扼龍勝永甯及興安全州灌陽等處。以防賊匪竄入。並與楚軍互相聯絡。務期迅埽逆氛。不可稍分畛域。將此由六百里各諭令知之。○又諭前據多隆阿奏報官軍疊破蘇家溝渭城等賊巢。當經寄諭該將軍等節節進攻。張集馨等嚴防渭城餘匪竄擾近省一帶。茲據穆騰阿等奏攻克馬家堡。白起營要隘等情。形諒多隆阿奏報當亦在途。咸陽境地廓清。醴邠一帶更可乘機進勦。雷正綰攻克塔底等賊之後。自可與多隆阿會合。務將陝省西

路迅速埽蕩。盡殄逆氛。曹克忠之軍著卽准其回駐近省。以顧根本。或分兵一二營會同福兆調集鄉團前往商南。將藍二逆股迅籌撲滅。兼顧潼關門戶。以防豫捻乘間窺竄。著多隆阿妥籌辦理。潼關商雒地方均極扼要。現在豫省捻股竄及河洛。藍逆尚踞鎮安。潼關東南兩面同為喫重。多隆阿務遵疊次諭旨。妥籌備禦。毋稍疏虞。曹克忠一軍既駐近省。其子午谷要口卽應責令隨時嚴備。漢中逆匪下竄。以固省防。其陶茂林之軍沿途轉戰。將郿縣柮林及槐芽鎮等賊壘一併攻克。著卽懷遵前旨。飛催前進。由扶風岐山直趨鳳翔。力解城圍。毋稍遲滯。漢中城固失守。情形據張集馨所奏。何以毛震壽與川將所稟互為歧異。竟該城是否為賊所踞。漢郡人民曾否潰圍而出。盧又熊何以開門出走。現往何處。沔縣文武收復城池。是否確實。劉蓉由川入陝。計已行抵漢南。著將漢中城固被

賊確實情形。迅速查奏。並據遵疊次諭旨。統率各軍。速籌進剿之方。將漢郡等城早圖攻克。洋縣等賊。痛加剿創。以殄逆氛。藍逆尚踞鎮安。李雲麟前奏。擬將此股先為掃除。以期次第進剿。著即迅速進兵。官文等飭令梁作楫所部固守楚邊。即與李雲麟進剿之軍。相為策應。石逆中旗一股。竄及略陽境地。經代理知縣劉希寬督團擊走。既從白水江一路將入甘省地界。該省兵力更單。豈容悍賊再行紛擾。並著劉蓉、李雲麟力籌兼顧。毋任賊氛延及甘省。張集馨另摺奏。整頓撫標三營。籌畫津貼銀兩。招募缺額。以實營伍各節。即著照所議辦理。至各省舉行團練及堅壁清野之法。歷經奉有諭旨。至再至三。諄諄訓誥。該署撫所請通飭陝省遵行之處。著毋庸再降諭旨。即由張集馨遵查歷屆所頒諭旨條款。認真舉辦。惟當慎選賢能官吏。督率紳民。悉心講求。自能收守望相助之益。無俟紛紜。

條教為也。雷正綰督兵赴甘。軍餉甚為緊要。仍著張集馨督飭藩司設法籌撥。源源接濟。毋令缺乏。將此由六百里諭知。官文嚴樹森、多隆阿、劉蓉、李雲麟並傳諭張集馨知之。○又諭多隆阿奏陝省軍務大有就緒。現飭雷正綰統帶十營赴甘。並嚴防潼商。及自陳病狀各摺片。陝省軍務漸就廓清。該大臣以陶茂林一軍馳解鳳翔圍後。掃除各屬零匪。尚需時日。誠恐緩不濟急。現在撥足十營發給餉銀軍火。令雷正綰統帶。由醴泉一路取道直赴固原。其陶茂林一軍。俟鳳郡解圍。即由汧陽隴州一帶節節進取。與雷正綰互為聲援。足見該大臣不分畛域。實能通盤籌畫。顧全大局。甘省平涼固原先後失陷。待援甚急。即著該大臣飭令雷正綰迅統十營。由醴泉直趨固原。與該省之兵會合夾擊。力圖克復。雷正綰並准其徑用木質關防。與熙麟聯銜奏事。如有緊要軍情。不及咨會之處。並著即

行軍銜馳奏以重軍務。陶茂林一軍著俟鳳
郡解圍各屬零匪肅清後。該大臣卽飭由沂
隴進取。與雷正綰聯絡策應。甘省得此重兵。
聲威既壯。固原平涼不難剋期恢復。熙麟惟
當飭令調到各軍。與陝省援師合力痛加勦
洗。雷正綰援甘之師。去陝日遠。所有一應糧
餉。卽著熙麟由甘省就近設立糧臺。一面迅
速知照恩麟。將該營糧餉源源接濟。毋得稍
有缺乏。惟甘省餉項已屬異常竭蹶。陝甘相
為唇齒。雷正綰軍餉如甘省或有緩不濟急
之處。仍著多隆阿行知張集馨兼籌接濟。毋
得稍分畛域。以期士飽馬騰。多隆阿數月以
來。力疾督軍。近復勢益增劇。覽該大臣所陳
病狀。塵繁殊深。自當安心調攝。以期速就痊
可。所稱賊氛未靖。國事方殷。不敢以病軀自
懈。具見忠忱懇款。現在乾邠長武醴泉扶風
等處之賊。該大臣業經分兵四路掃蕩。官軍
乘破竹之勢。勦敗殘之匪。自無難一鼓蕩平。

該大臣籌定機宜。飭令各軍分投勦辦。卽可
酌量回駐省垣。居中調度。以便安心調理。速
去沈疴。用副朝廷眷倚之意。將此由六百里
各諭令知之。○以湖南會同綏甯兩縣城被
賊竄陷。知縣邵承湜革職查辦。榮懷珍革職。
永不敘用。開復殉難知縣鄧爾昌革職留任。
處分。暨把總李曾榮。均予祭葬世職加等。○
予陝西漢中陣亡知縣劉希寬參將黃星堂
徐祥泰遊擊梁松鶴等祭葬世職加等。○賞

五城貧民棉衣銀

大清穆宗繼天開運受中居正保大定功聖智
誠孝信敏恭寬毅皇帝實錄卷之七十九

大清穆宗繼天開運受中居正保大定功聖智
誠孝信敏恭寬毅皇帝實錄卷之八十

同治二年癸亥九月乙丑諭議政王軍機大

臣等李鴻章奏進攻無錫勦敗水陸援賊連
獲大捷並蘇州吳江近日軍情各摺片李鴻
章督飭各營進規無錫聯絡進紮將斷蘇州
咽喉之路偽忠逆侍逆等各率大股自金陵
來援帶領白齊文黨取火輪炸礮等船計圖
攻破大橋角等營盤直入常熟太倉掣動各
軍後路勢極狡橫諸軍喋血苦戰擊走援賊
各營得以轉危為安偽忠逆等計索而去白
齊文亦窮蹙乞降雖為賊所囚殺尚未確實

亦復無能為役。我軍將士。此次實為異常出力。踴躍用命。深堪嘉尚。著李鴻章加意拊循。傳旨嘉獎。此時援賊屢敗。城賊亦經疊創。而因獸猶鬪。仍應飭令李鶴章。程學啟等。穩紮穩進。毋以垂成之功。稍涉驕懈。蘇州城大池深。賊以附河堅壘。面面死守。屢欲乘虛拔逞。著李鴻章飭令程學啟。李朝斌等。嚴扼要隘。制其奔突。仍當聯絡各路之軍。相機攻取。左宗棠所部蔣益澧等軍。自攻克富陽後。即當

進圖杭城。曾國藩昨奏青陽圍解。將督各軍驅除皖南各股。東接浙師之氣。非絕金陵之援。並著李鴻章隨時函會咨商。總期金陵杭蘇。同時並圖進取。以挽東南全局。將此由六百里諭令知之。○又諭張之萬奏。宋逆黨匪闖入河朔。兵練截擊敗竄等語。前據劉長佑奏報。賊自大寨向西竄走。適河北鎮道均未在防。總兵楊長春遇賊未及接仗等語。當經寄諭該督撫等。飭令實力嚴防。茲據張之萬

奏賊由開州進窺滑濬。楊長春探蹤迎勦。由彰郡帶兵。行抵郡南之張官屯。遇賊。揮軍進擊。立即壓退。並於初四等日。督隊至楊家新莊。及臨漳之南駱村一帶。疊加勦擊。追賊出境。直至直隸肥鄉縣之李林鋪。王安堡。而還等語。與劉長佑前奏情形迥不相符。是否楊長春等及各地文武。捏報勝仗。希圖道責。抑係劉長佑前奏探報失實。均屬不可不察。各省帶兵將領及地方官吏。往往於賊蹤所

過。不能豫備截擊。及賊去而捏飾稟報。輒稱某日某處擒斬賊匪若干名。大吏不察。據以入奏。而賊實往來境地。毫無阻截。以至逆氛所至延蔓。積習相沿。痛恨實深。從前河南軍務之無起色。未必不由於此。此次楊長春等於河朔地方擊賊。究竟有無其事。著劉長佑張之萬。均各確切查明。據實奏聞。毋許稍存文飾。如實係防勦不力。事後捏報勝仗。即應據實嚴參。軍營探報。亦往往有偵查不實之

弊。劉長佑亦不可不加查察。運河東西分竄股匪。節據僧格林沁。劉長佑等所報。均各餘匪數百名。日來勦辦究復如何。其自稟城越滹沱河南竄之賊。又經竄向何處。宋景詩是否果已棄眾潛逃。現在曾否捕拏就獲。直豫兩省防勦各軍。仍著劉長佑。張之萬嚴督前截後追。迅殲醜類。毫捻李大箇子。由昨杞折趨蘭考。避兵東歸。經毛昶熙派令遊擊呂振河等率領馬步。疊加勦創。追回毫巢。此股捻

匪。為苗逆指喉。出而滋擾。仍難保不復圖窺覷豫境。仍著張之萬飭令宋防兵勇扼要嚴防。張之萬前奏。大金店盤踞之張總愚股匪。被勦南竄。現在各軍勦辦若何。此股賊匪。復又竄往何處。著張之萬詳悉具奏。善慶所帶黑龍江餘丁。早已進口南行。何以尚未抵豫。著張之萬迅即迎提。並著劉長佑飭令所屬沿途查明。催趲前進。薩薩布一員。即准張之萬所請。飭令赴豫帶領馬隊。即由張之萬傳

旨截留。善慶帶兵到豫。仍即飭令遵奉前旨。抽撥吉林黑龍江餘丁五百名。緩遠城察哈爾馬五百匹。統帶赴皖。以資攻勦。毋稍遲延。李明惠一軍。現已行抵河北。毋庸再行折赴許州。轉費周折。仍著劉長佑遵旨飭令由河北探明賊蹤攔截。與直省官軍速收夾擊之效。俟賊股殲滅後。此軍仍回直隸。歸劉長佑調遣。將此由六百里各諭令知之。○又諭。張之萬奏。請飭晉省將欠解河南銀兩撥解甘肅。並催解本年應協豫餉等語。山西應協豫

省同治元年分軍餉銀二萬兩。前經諭令英桂飭令河東道劉子城就近附解甘省。抵作豫省應解甘餉。自應趕緊籌撥。以濟要需。乃該道輒以庫款支絀為辭。咨行河南藩司王憲擬將前項協餉。俟軍務肅清。再行籌解。甘省軍務方殷。待餉孔迫。昨據多隆阿奏稱。已派雷正綰帶領十營兵勇。前赴固原進勦。值此大兵雲集之時。糧臺餉需。尤屬刻不可緩。

豈容該道藉詞延誤。著英桂懍遵前奉諭旨。迅於運庫項內籌款。如數撥解甘省。不准再事延宕。至河南陸續裁免陝州魯山兩處抽收鹽釐。原為潞網暢銷起見。河東道庫每年撥銀二萬兩。解豫協餉。卽係為籌補所裁鹽釐而設。現在皖捻紛竄豫疆。需餉浩繁。晉省應協之款。豈可任意推諉。著英桂卽將本年分應協豫省銀二萬兩。趕緊籌提。委解赴豫。毋許藉端推卸。將此諭令知之。○以江蘇無

錫擊敗水陸援賊。賞總兵官王東華正一品封典。道員張樹聲。副將周壽昌。參將吳勝清。童邦喜。王平西。遊擊董鳳高。都司張士芳。守備楊正國。已圖魯名號。餘加銜升敘有差。革畏蒞無能。參將張學仕職。予陣亡守備施本仁祭葬世職加等。○以河南官軍攻克阜陽。沈邱。交界賊寨。予遊擊程尚文等升敘開復有差。○以河南沈邱。新蔡防勦捻匪土匪出力。予知縣顧恩培。唐咸仰。以知府用。○旌表

守正捐軀四川彭縣民婦鄭曾氏。○丙寅。諭內閣。前因劉長佑奏。宋逆猝竄直境。新河縣知縣帶勇迎敵。身受重傷。武邑縣兵勇單薄。以致匪蹤闖入縣城。旋即收復。請將新河縣知縣鄧銘善革職。仍暫留任。武邑縣知縣婁道南革職留營。曾經降旨允准。茲據御史丁壽昌奏。州縣失守城池。罪名甚重。請飭刑部將該知縣等議罪等語。所奏亦是。知縣為守土之官。自宜與城存亡。近來失守之員。往往

捏造出城禦敵。身受多傷等情。希圖免罪。甚且以民情愛戴等詞。奏請留任。辦理殊屬輕縱。況武邑縣武弁教職及解餉委員。均被戕害。而該知縣獨安然無恙。尤難保無棄城逃走情事。著刑部將該知縣鄧銘善。婁道南二人。照例分別議罪。以示懲儆。○諭議政王軍機大臣等。御史丁壽昌奏。宋景詩竄擾畿輔。兵去則賊來。兵來則賊去。官兵疲於尾追。無從迎擊。請責成各州縣辦理團練。修築城池。

多掘陷阮並設立賞格嚴定賞罰等語直隸地方本有團練鄉勇但各地方官不能督率遂至日久廢弛著劉長佑飭令各州縣妥為聯絡於各村鎮多挖濠溝於近城一帶及總路口設伏以待多掘陷阮以陷馬足並明立賞格如團勇殺賊一名賞銀若干與賊接仗保全地方者首事紳民優加鼓勵諒此賊敗殘之餘已屬無多似此各處兜擒不難剋日肅事嗣後如再由各州縣竄擾地方官不能

遏截卽行從嚴叅辦其團練出力著有成效者亦准酌保原摺著鈔給閱看直隸吏治頹廢已極劉長佑當振刷精神力圖整頓現在李鶴年聞已起程著迅催其到直接印並卽飭令赴省以便石贊清交卸起程省城一帶防堵及地方應辦事宜卽責令該臬司隨時稟商劉長佑妥為經理將此諭令知之○又諭有人奏護理陝甘總督甘肅布政使恩麟辦事顛頂不學無術當陝西回變初起該護

督並不於接壤要隘嚴密巡防以致該逆匪聲息相通潛往助逆焚掠之後滿載回甘如入無人之境河州狄道回變繼起百姓赴省請兵該護督閉署不問迨賊氛逼近省垣惟於衙署內添兵環守不許難民入城而於回民出入城門不敢過問該護督見逆倭鴟張遂藉招撫為補苴之計乃王阿渾甫昇頂帶而固原鹽茶相繼失守其為詐降內潰情弊顯然恩麟竟以另股賊匪含混入奏民人王

福等集眾聯團意圖報憤除害該護督輒坐以謀叛大逆斬首四人又偏令紳士散團練使招募之勇訓練之功廢於一旦革員成瑞趙秉鑑和祥係債事獲咎之員該護督欲見好數人遂令辦理招撫藉圖保舉該廢員等遂餽賊求和且偏令難民改裝隨教號曰新回以致回逆愈撫愈橫省南省北一帶蜂屯蟻聚滋蔓難圖皆由舍勦議撫貽誤大局請飭查辦各等語恩麟護理督篆已逾一年

而回氛日甚一日。甘肅全省幾有糜爛之勢。若非該護督恒怯無能。養癰成患。何至賊勢猖獗若此。著多隆阿、熙麟按照所參各款。嚴密訪查。據實覆奏。毋稍徇隱。原摺均著鈔給閱看。將此由五百里各諭令知之。○又諭都興阿奏酌設渡口。濟渡難民。並布置江防堵剿情形一摺。所稱六圩八圩兩港兵民雜渡。易涉混淆。以六圩港專渡難民。八圩港專渡南岸水陸兵勇。採買食物。於體恤難民之中。

嚴防奸宄。涸跡等語。籌辦尚屬妥協。卽著飭令派出之副將孫文友會同該地方文武詳察情形。妥籌辦理。至水師扼泊長江防範最關緊要。江陰克復後。南岸賊匪麇聚。時思乘隙竄渡。雖屢被官軍擊退。而利港劉巷等處之賊分股出撲。姚家橋踞賊且與包港以下之賊呼吸相通。太平洲縣長九十里。南岸賊蹤出沒靡常。亟宜扼要設防。相機堵剿。著卽督飭吳全美統率水師各營弁聯絡聲勢。遇

賊卽擊。以免滋蔓。另片奏遣撤吉林黑龍江傷廢官兵。抽換補額。並請調甲兵西丹閒散兵丁各等語。吉林等處官兵徵調頻仍。近因該處邊防緊要。經景綸等奏請嗣後免其調撥。此次都興阿所奏情形。係屬緊要。除換防官兵各三十名。已諭令抽換補額外。其甲兵一項。斷難再調。西丹閒散尚非正兵可比。為數亦屬無多。所有各挑選精壯一百名之處。能否如數調撥。亦已諭令該將軍等酌量辦

理矣。將此由五百里諭令知之。○又諭都興阿奏揚防馬隊官兵從征年久。傷殘廢病。現已擇其傷病尤甚者。撤歸吉林黑龍江各三十名。請飭另挑精壯。抽換赴防。以補營額。並請調西丹閒散各一百名。交協領莫爾賚額等備帶銀兩功牌。以資挑換。兵丁費用各等語。前據景綸等奏該處操防緊要。請嗣後各路軍營免其徵調。俾得訓練整頓。以備緩急。亦係實在情形。惟刻下皖南及江南軍情正

在得手。揚州一帶防勦喫緊。亟須得力馬隊官兵。以資分布。著景綸特普欽。俟揚防抽撤歸伍之官兵各三十名到後。迅卽按照數目。挑選精壯。抽換赴揚。以足營額。其西丹閒散。尚非正兵可比。且所調為數無多。其能否挑選精壯如數前赴揚營。以資助勦之處。著該將軍等酌度辦理。將此由五百里各諭令知之。○又諭昨據富明阿等奏。妥籌臨淮戰守。及分兵援救蒙城。業經諭令該將軍等相機

進取。與陳國瑞聯絡聲勢。迅解重圍。茲據吳棠奏。陳國瑞一軍。現已移紮王家窯圩。在蒙城地東七里。賊亦率黨而東。與官軍夾河相守。擬俟水漲稍涸。乘黑夜渡河襲賊。捻首李大箇子。魏羣等。由豫回踞石弓山一帶。偪擾臨渙等處。關繫蒙軍北路餉道。經陳國瑞添派佐領訥木津等帶領馬隊。協同艾憲銀。先將捻逆擊退。再赴蒙城等語。蒙城被圍日久。情形萬分危急。苗逆與李南華素有仇隙。此

次糾黨圍困蒙城。究掘長濠三道。誓欲得而甘心。覽吳棠所呈官軍紮營地圖。益形焦急。本月初旬。李南華因城內糧缺。密遣勇丁乘夜赴營求救。雖經陳國瑞慰勞。給銀五百兩。飭令分帶回城。該勇丁能否踰濠而進。尚難豫必。吳棠現調副將張從龍。知縣吳炳庭等帶勇馳援。而兵力仍未甚厚。且道遠非旦夕可致。著富明阿。唐訓方。恪遵昨日諭旨。速飭派出之總兵宋慶星速前進。會同陳國瑞各

營併力進攻。迅解城圍。富明阿。唐訓方並設法策應。毋許遷延貽誤。懷遠近日賊勢若何。若王才秀北岸之兵。一時不能掣動。圍蒙之賊。莫若添調勁旅。徑赴蒙城助勦。分扼全家集一帶。截賊糧運。則蒙城之圍可期速解。著富明阿。唐訓方酌度機宜。妥為調遣。張從龍所部並著吳棠催令趕緊邁行。不准逗遛干咎。將此由六百里各諭令知之。○旬到山西。熱河上年情實罪犯。停決山西新犯一人。絞

犯三人。餘二十二人予勾。○丁卯。諭內閣。閣敬銘奏請將勦賊失印之知縣交部議處一摺。據稱宋景詩另股賊眾。撲犯山東陵縣境內。該署知縣謝際亨。令伊弟謝遇亨看守印信。親督兵勇出城接仗。適有另股賊匪直撲縣城。該縣帶勇圍折回救護。謝遇亨亦攜印出隊抄截。遇賊陣亡。攜帶印信亦已遺失。請將該知縣謝際亨先行照例議處等語。謝際亨既帶隊勦賊。何以不將印信自行攜帶。所稱交與伊弟看守。致令攜帶出隊陣亡失落之處。顯有捏飾規避情事。且該縣城內尚有把總典史各員。何以當賊匪撲城之時。獨需該知縣之弟帶隊接仗。謝遇亨又何以不將印信派人看守。竟自攜帶出城。種種情節。殊屬支離。近來失守城池各員。往往捏造各情。希圖免罪。而該上司復瞻徇情面。飾詞開脫。積習相沿。深堪痛恨。閭敬銘僅請將謝際亨交部議處。未免輕縱。謝際亨著即行革職。仍

著該署撫親提嚴訊確情。並查明倉庫監獄有無疏失。再行按律定擬具奏。○諭議政王軍機大臣等。毓祿等奏訪獲山東幫丁在津買米。查訊大概情形。請將幫丁李遇春等交閭敬銘提訊等語。幫丁李遇春等在天津糧店買米一千七百餘石。供係補成豐九年欠漕之用。並非買補本年正漕。雖買補舊欠。例所不禁。但該幫丁等越境購買。難保非因正漕不足。藉詞掩飾。更難保非避重就輕。希圖含混。虛實均應切實根究。著閭敬銘提集全案人證。認真研訊。分別懲辦。所買米石。著毓祿等留補舊欠。毓祿等摺著鈔給閭敬銘閱看。另片奏天津採買白粳米到通數船。間有微潮。責令押運委員挑瞭收拾。驗收完竣等語。自係為慎重漕務起見。卽著毓祿。宋晉飭令坐糧廳監督等。於收受後。親督花甲隨時風瞭。毋令蒸熱。並飭看倉首領。督飭弁兵嚴密巡緝。以免偷漏。而重倉儲。將此各諭令知

之○又諭前因劉長佑奏衛河設局抽收蘆鹽釐金商人苦累懇請停止當經降旨允准茲據閻敬銘奏衛河鹽釐軍餉藉資補苴若將此項停抽則鉅款無從籌畫且抽收舊章每鹽三斤有餘僅抽制錢一文不至重累商本事屬可行請仍照舊抽釐等語自係實在情形即著照閻敬銘所請照舊抽收該署撫務當遴選廉潔自愛之員飭令常川駐局嚴禁書役人等私立名目浮取絲毫以免商民

擾累濟東泰武臨道係省會要缺政務殷繁本日該署撫奏請以明新署理恐難勝任著閻敬銘於所屬人員擇其為守兼優實心任事者迅即奏請補授以期要缺得人於吏治民生方有裨益將此諭令知之○以失察幫丁舞弊山東督糧道沈維燾等下部議處○緩徵山西太原縣被水地方本年額賦○戊辰諭議政王軍機大臣等劉長佑奏敗賊紛竄經兵團截剿殆盡兼獲巨懸現仍分路探

捕一摺宋景詩棄眾潛逃餘黨分股一為楊澱一一為朱登峰並有劉厚得程敬書岳金聲諸賊目分道狼奔據劉長佑奏楊澱一著名悍賊兇狡尤甚前由恩縣等處折竄至武城之夾馬營潛渡運河與程敬書合竄南宮邱縣館陶一帶於本月十三日在大名府之石槽坊地面經該地方文武兵勇截擊將楊澱一生擒正法其黨岳金聲率領敗殘餘匪百餘騎竄至任縣隆平交界復經余承恩等

兵練圍剿窮蹙乞降當將岳金聲正法餘眾遣散馬匹器械全數收繳其朱登峰一股由臺城渡漳沱河而南經恆齡等擊之於趙州復為柏鄉任縣沙河等地方官帶團截剿至邱縣館陶之楚家莊一帶由西南安淨村渡河東竄所餘馬賊諒亦無多即著僧格林沁飭令恆齡舒通額等馬隊乘勢追擊劉長佑督飭祝塏等兵勇隨同跟追務將此股餘匪及早殲除淨盡毋留餘孽宋景詩究係逃

往何處。劉厚得亦著名兇悍。是否果與宋逆潛逃。著劉長佑張之萬閱敬銘。一體飭令帶兵文武探捕。並令各地方探蹤購緝。務將渠魁就獲。毋任漏網。致令潛謀煽結。餘儘復然。如宋景詩劉厚得等復有在何處再行滋擾之事。必惟該督撫等是問。現在大名曲周廣平等縣。尚有馬賊各四五十名七八十名不等。往來奔逸。更難保劉厚得等不仍藏匿其中。且恐直屬地方。似此零股馬賊。所在滋擾。亦尚不止大名曲周等縣為然。此次宋逆分股竄擾。直東各屬。被其蹂躪。百姓荼毒。已屬難堪。現在餘賊敗殘。無難早日肅清。劉長佑現由方順橋回紮衡水。李明惠所帶勇隊。已抵廣平。足資助剿。著即嚴督各路兵勇。速將朱登峰殘股。並大名曲周等縣零匪。悉就殲除。不得以楊澱一一股就殲。稍涉鬆勁。尤不得任令各地方粉飾遷就。以為了事。自干咎戾也。將此由六百里各諭令知之。○督辦鎮

江軍務馮子材等奏。丹句逆巢。近日尚無蠢動。得旨現在南岸各路軍營。屢獲勝仗。賊勢漸蹙。馮子材等當乘此軍威。相機戰守。仍慎固鎮防。以杜賊匪窺伺。○追予江蘇蘇州陣亡參將廣霖祭葬世職。○己巳諭內閣。本日據吏兵二部奏。遵旨嚴議毛震壽等處分一摺。陝西布政使毛震壽。候補知府易佩紳。辦理漢南軍務。疲玩遷延。日久無功。甘肅肅州鎮總兵何勝必。記名提督蕭慶高。帶兵援陝。連失二城。該文武各員等。均有統帶專營之責。不能迅解城圍。以致漢中城固兩城相繼失陷。實堪痛恨。蕭慶高何勝必。易佩紳。均著照該部所議。即行革職。並著仍留軍營。以觀後效。至毛震壽督辦漢南軍務。各營將士。均歸統率。兵力不為不厚。且在營已及一年之久。乃一味遷延觀望。以致連失二城。厥咎甚重。經吏部先後兩次遵旨分別嚴議。毛震壽著即革職。交劉蓉差遣委用。責令戴罪殺賊。

自效。儻再不知愧奮。卽著劉蓉從嚴叅辦。重治其罪。以示懲儆。暫署陝西巡撫按察使張集馨於漢中城固兩城失守。未能先事豫防。著照部議降二級留任。不准抵銷。○諭議政王軍機大臣等。僧格林沁奏追勦宋逆股匪首逆逃竄。嚴飭揔捕。遵卽督兵南勦。捻苗並請飭直東督撫遣撤募勇。安置災民各摺片。宋景詩匪黨分竄。昨據劉長佑奏。楊澥一股業已殲除。茲據僧格林沁所奏略同。並稱

朱登峰一股。由臺城柏鄉一路被擊。竄至廣平府地方。分路復竄南館陶。搶渡衛河。經僧格林沁派令副都統定安等馬隊分投追勦。至莘縣元城冠縣等處。疊加掃蕩。餘匪由桑阿鎮一帶回竄館陶屬之羅家河口。渡過河西。散漫無蹤。此等零星殘匪。諒亦不難揔除淨盡。著僧格林沁仍飭定安等尋蹤揔捕。劉長佑與閻敬銘各飭所屬一體緝拏。務將餘匪淨絕根株。毋任一人漏網。楊澥一餘黨匪

首岳金聲雖已擒拏正法。其餘匪百餘名。據劉長佑前奏。擬卽遣散。但此股殘匪。被官軍疊次追勦。勢窮乞降。其非誠心歸正。已可概見。旣由僧格林沁咨行劉長佑斟酌辦理。卽著該督察看。如果投降實由窮蹙。並非誠心。卽當概予誅鋤。毋留餘孽。以免後患。宋景詩率其敗殘百餘人。逃至肥城之鵬鵠嶺。拋械四散。其賊目劉厚得同船七八十人。已被團練破擊沈溺。宋景詩止餘夏七一人跟隨。向

東北山中逃走。餘匪四散。此等均屬獲賊供詞。恐尚難據以為信。劉厚得著名兇狡。是否在船沈溺。著再行詳查確實具奏。宋景詩係屬渠魁。現在亡魂漏刃之餘。斷不准聽其免脫。卽著劉長佑。閻敬銘嚴飭所屬一體嚴拏務獲。儻竟令該匪首得以免脫。致留遺孽。必惟該督撫是問。僧格林沁仍飭國瑞酌派官兵探蹤購緝。協同躡緝。朱登峰程敬書張廣得等及在逃各匪犯。均須按名逐一擒拏。務

獲。毋使漏網。僧格林沁所派定安帶領黑龍江及京旗官兵駐紮直東交界。彈壓巡緝。直東境內如有匪徒滋擾。卽會同各該省官軍立即勦辦。張之萬現駐許昌。而豫省捻蹤肆擾。僧格林沁督兵赴豫偵察賊情。應將何股先行勦洗。諒該大臣必有權宜。豫省各軍應令如何相為策應。並著與張之萬商同飭令聽候調遣。另片奏北方勦賊。非馬隊不能制勝。請飭直東各督撫將所募之勇酌量妥為

遣撤等語。所見甚是。著劉長佑、閻敬銘酌量情形。或卽遣撤各歸本籍。或擇其精銳派赴豫皖。隨同勦賊。或卽以補各該省兵額之缺。僧格林沁原片著鈔給劉長佑、閻敬銘閱看。直東地方所有一切善後事宜。該督撫等卽當嚴督所屬妥籌辦理。畿輔地方緊要勇隊裁撤之後。其直東各營伍應卽如何整頓操練。並著劉長佑、閻敬銘趕緊籌辦。白蓮池荒廢地畝。令曹州所屬災民遷移認墾。前經寄

諭閻敬銘查明妥辦。茲據僧格林沁奏。宋逆削平。莘堂冠館朝觀等縣逆產甚多。運河左近黃水漫溢。被淹村莊哀鴻遍野。正可藉資安輯。著卽照所請。飭令已革直隸總督文煜已革按察使孫治。留於山東專司辦理兗州東昌等處清查逆產招撫災黎事宜。督同地方官逐處查勘。認真妥辦。不得有名無實。徒滋弊端。白蓮池地勢較廣。該大臣擬將黃河以南被淹災民安置白蓮池一帶。黃河以北

被淹災民安置劉貫莊甘官屯一帶。卽著飭令地方官詳查辦理。黃河改道以來。西自考城東至利津各州縣犬牙相錯。被水隔絕。土匪四起。州縣難以稽察。不能卽行捕緝。以致釀成巨患。現在黃水兩岸仍恐尚有奸民倚恃漫水藏身。復萌故智。據僧格林沁奏。卽如梁山地方係壽張縣屬。現隔黃水以南。河面漫溢數十里。該管地方官卽稽查難周。其請將新黃河以南地方歸以南各州縣管理。以

北地方歸以北各州縣管理之處。卽著閻敬銘查明辦理。總期於地方有益。而奸匪不得伏戎為患。方為妥善。白蓮池地方。亦屬犬牙交錯。向為藏奸之所。應卽改為一州縣管理。以便稽查而專責成。並著閻敬銘悉心妥議。如一州縣官職尚輕。不足以資統攝。應否升設直隸州廳。稍重事權。以資鎮壓。並著酌量情形。籌定具奏。僧格林沁所部馬力疲乏。著准其緩程前進。行抵豫省。卽將捻苗勦辦事。

宜相機進取。隨時馳奏。將此由六百里各諭令知之。○庚午。諭內閣。御史馬元瑞奏。條陳薄賦稅。慎訟獄。善拊循。勤曉諭四事。以清盜源等語。自軍興以來。需餉浩繁。勒捐抽釐。原不能不藉資民力。無如承辦各員。往往藉端需索。止知為己營私。不顧為國歛怨。任意侵漁。殊非國家保惠黎元之意。况派兵車則四鄉皆擾。立練局則私橐必盈。而且任瘡痍之滿前。賊未來而不為設法。懼餉需之莫措。賊

既至而不肯請兵。種種情形。尤堪痛恨。其安靜地方州縣各官。又或性耽安逸。於一切詞訟諸事。概委諸佐雜微員。以致賄賂公行。是非顛倒。而於朝廷蠲緩恩旨。則延閣不行。催科轉急。遂至上下乖睽。眾庶愁怨。聚眾抗官之案。層見疊出。而流離失所之眾。一經煽誘。裏脅卽成莠民。總由地方官視民如仇。以致驅民從賊。似此喪心昧良。豈朝廷設官牧民之意。著各直省督撫大吏。於所屬親民各官。

慎重選擇。嚴明訓飭。於正供而外。不得肆行朘削。於詞訟諸事。務各親身研鞫。無論完善之地。殘破之區。均須悉心撫字。俾小民各安生業。不至滋生事端。至一切諭旨之關繫民事者。尤必迅卽張貼。剴切曉諭。俾窮鄉僻壤咸知朝廷德意。賊匪不能肆其偏脅。以上各條。皆地方官分所當為。力所易為。前經疊降諭旨。諄切訓誡。乃各該省督撫大吏。以前項錮習。叅劾屬員者。十不獲一。總由平日不能

考察屬吏。又不肯實力整頓之故。經此次訓諭之後。各該省地方大吏。務各定立章程。於所屬各州縣。嚴行稽察。綜覈其能否稱職。及其居官之賢不肖。明定賞罰。隨時上聞。如再仍前因循瞻顧。一經發覺。必將各該省大吏。一併執法嚴懲。不貸。懷之。將此通諭知之。○又諭。平瑞奏。請飭催新疆各城大臣赴任。一摺。新疆地處西邊。各城大臣。皆有彈壓操防之責。自應迅赴本任。以重職守。乃各該大臣等。竟有簡放日久。或未經到任。或尚未起程。任意羈延。殊屬不成事體。所有吐魯番領隊大臣扎克當阿。古城領隊大臣聯捷。庫爾喀喇烏蘇領隊大臣惠慶。葉爾羌幫辦大臣常績。喀什噶爾辦事大臣常明。和闐辦事大臣奎章。烏什辦事大臣慶明。阿克蘇辦事大臣崇恩。哈密幫辦大臣博麟。均著兵部迅速嚴催。刻即赴任。毋許逗遛。儻再遲延。即著從嚴叅辦。○諭議政王軍機大臣等。照麟奏。援平

弁勇。連破銅城丈八寺等處賊巢。一摺。另片奏。陝回西竄。請簡派大員帶兵來甘助剿等語。平涼失守之後。賊氛益肆。此次余萬明帶勇僅二千餘名。竟能將備同心。三日之內。連破堅巢。從此軍威一振。即可節節勦洗。著照麟督飭余萬明等乘勝進取。規復平涼。毋稍延誤。陝省敗回。紛紛西竄。白集原神浴河等處。愈聚愈多。涇甯情形。倍形喫重。照麟雖派陝勇一營。赴涇扼守。而兵數甚單。且固原股匪。竄擾環縣屬境。尤為慶陽門戶之憂。必應厚集兵力。方能大挫兇鋒。前據多隆阿奏。已飭雷正綰帶領十營。前赴固原援剿。此時甘省軍情喫重。雷正綰務當趕緊起程。鼓行而西。相機進剿。陶茂林計已到鳳。即著多隆阿飭令迅解鳳翔之圍。前赴甘省。會同勦賊。成祿向隨雷正綰勦回。甚為出力。照麟請飭該總兵帶隊來甘之處。能否抽調。著多隆阿斟酌辦理。現在援甘兵勇。為數已不為少。而雷

正綰等又屬久歷行陣勇敢素著之員。指日大兵雲集。自可迅奏膚公。熙麟當督飭在營將士。踊躍赴功。慎重防勦。毋以驟勝而驕。為賊所乘。宜君縣為河東餉道所經。現在該縣村莊被賊竄擾。自應趕緊殲除。以通糧路。著熙麟嚴飭馮元佐等聯絡民團。實力勦辦。將此由六百里各諭令知之。○派惠親王綿愉恭親王奕訢醇郡王奕譞大學士銜禮部尚書祁寯藻禮部尚書倭什琿布兵部右侍郎伊精阿。每日在弘德殿敬謹詳閱。

文宗顯皇帝實錄黃綾本。○以順天府府尹林壽圖為陝西布政使。府丞卞寶第為府尹。○以甘肅攻破平涼賊巢。復已革遊擊余萬明職。並賞巴圖魯名號。○予安徽徽州陣亡殉難布政司經歷銜黃壽基等紳民婦女七八名口分別旌卹如例。○辛未。

孝慈高皇后忌辰。遣官祭。

福陵。○諭議政王軍機大臣等。間敬銘奏先後

拏獲宋逆家屬。訊明宋逆竄路情形。一摺。據稱派弁暗訪匪黨蹤跡。經東平平陰等州縣先後拏獲汪喜等十四名。又獲著名賊目于得城等七名。又孔三等二十四名。訊據賊供宋逆死黨三十餘人。由鵬鵠嶺地方往山深處東北逃走。賊目郭景會劉厚得張夢海等均被官兵礮船轟斃。落水身死。又供宋逆僅有夏七一人跟隨。又供宋逆與其弟宋景書叔姪三人赴東南山中逃走。該署撫已派各

州縣營汛分路躡緝。並將宋逆之母宋張氏等緝獲等語。與僧格林沁前奏大略相同。宋逆蹤跡詭秘。恐其由兗沂山徑南竄徐屬。著吳棠飭令各州縣懸賞購緝。嚴密偵探。務在必獲。毋令入境勾結苗黨。或至死灰復燃。間敬銘仍當督飭地方官防其回竄。嚴密兜捕。不可稍涉疏懈。其朱登峰程敬書張廣得等及零星竄散餘黨。尚屬不少。著懷遵前旨一體緝拏。務期淨盡。儻有漏網匪徒。再行勾結

為患。定惟該署撫是問。白蓮池一帶。聞尚有匪徒藏匿山谷。僧格林沁大軍南下。恐該匪餘燼復熾。乘機盤踞。不可不嚴行搜捕。以絕根株。著閭敬銘會同國瑞派兵搜緝。以收廓清之效。將此由六百里各諭令知之。○

上以孟冬時享

太廟。自是日始齋戒三日。○壬申。諭議政王軍機大臣等。有人奏。監司大員貪污巧滑。並州縣陵虐無辜。草芥人命。請飭查辦各摺片。據

稱現任四川川東道恆保貪婪性成。居心狡險。前在瀘州知州任內。奉委開局鑄錢。每鑪需索重費。至數千金之多。縱令鑪頭偷減銅料。以致新錢不堪行使。公私交病。又擅開私鑪百餘座。盜鑄官銅以充囊橐。並將永甯道捐入書院發商生息銀四千兩。及書院束脩膏火銀千餘兩。均提入己。復借兵差為名。虧那庫帑四萬餘金。迨經藩司劉蓉到任清釐。該員輒假造紳士借票。希圖抵賴。並賁緣入

夷教艾加略之門。指名要缺。艾加略令崇實為之求請。遂得再署川東道缺。赴任時。川東人閉關不令入城。該員鼠伏城外數日。始得私行入署。又川省不肖州縣。忌團練之不便。已私往往誣以聚眾謀反等重情。擅行殺戮。如署達縣令李應觀。斬決監生張聯陞。並用木籠將其子治死。已革安岳令李岳齡。將廩生張洪謨擬以斬候。署中江令張嗣成。杖責附生黃珍幾死。署眉州牧劉彝德。笞杖廩生王化珩等約七八千。幾至斃命。並斬決一廩生。署金堂令王樹桐。將一附生立斃杖下。皆因索賄不遂。肆行殘殺。署綿竹令王兆鵠。勒捐至十餘萬。大半侵吞入己。請飭一併查辦。各等語。監司大員。有表率屬吏。整飭地方之責。若如所奏。恆保貪污不職各款。已屬劣員之最。復敢借夷教以挾制上官。固其祿位。居心狡險。尤屬法紀所不容。著駱秉章即將該員嚴行查辦。將所叅各情一一徹底根究。務

須水落石出。據實具奏。毋任狡賴。至川省地方。甫經兵燹。各屬團練。地方官正當實力奉行。以資捍衛。而各該州縣等。竟敢因索詐不遂。將團首生監人等。任意斬決。視人命如草芥。視士子為仇讎。貪暴兇殘。實屬目無法紀。著駱秉章按照所參各員。一併嚴行查辦。切實根究。毋稍徇縱。以懲貪暴而重人命。原摺片均著鈔給閱看。將此諭令知之。○又諭駱秉章奏攻剿李幅猷股匪。疊獲大勝。賊勢窮

蹙。遠遁。漢南援軍。先勝後挫。現籌布置情形。各摺。髮逆李幅猷。率黨由正安婺川竄至彭水之周家寨。經官軍痛剿。由梅子壩竄酉陽之學堂坪兩河口。前隊已竄入黔江。復經官軍擊敗。該逆由綏壩遁入湖北之咸豐縣界。復折竄黔江。由龍潭奔竄秀山。旋敗竄平塊。至邑梅濫橋。遁入黔境。餘賊自花園入湖南。麻陽一帶。與悍世臨前奏髮逆闖入楚境。情形大略相同。該逆經楚軍截剿之後。復被痛

創。殘燄諒難再張。亟應協力進剿。以圖聚殲。著駱秉章。悍世臨。各飭在防官軍。會合進攻。兩面夾擊。迅殲醜類。務將此股賊匪。就地掃除。毋令再肆蔓延。李幅猷股。既遁入黔境。黔省銅仁土匪包逆。現尚遊駛黔蜀邊界。酉秀一帶。自應嚴密防禦。所有該督派出駐防秀山之果後軍三營。即著駱秉章飭令認真捍禦。嚴加守備。毋稍疏懈。致黔匪得以闖入川疆。並著勞崇光。張亮基。迅派得力兵將。將李

幅猷敗竄餘匪。及銅仁土匪。會合川軍。分投夾擊。實力殲除。毋任蔓延勾結。漢南援軍新挫。賊勢鴟張。陝南固形糜爛。而川北各隘之防。亦形喫重。且中旗逆匪。由略陽竄蔓甘肅徽縣一帶。已出川軍之左。駱秉章現派許蔭棠率所部赴蕎莊。黎鴻鈞率所部由松潘前往合黎。調果後九營。馳赴保甯一路。所籌均尚周妥。務須飭令派出各軍。實力防剿。以固川疆。劉蓉已抵保甯。著即迅速前進。相機

勦辦迅克漢中城固等城。惟該撫所恃以進
勦之軍。卽此湘果等營。現在銳氣已挫。一時
恐難進攻。應否將派赴保甯之果後九營。移
紮前敵。協同勦洗之處。著駱秉章。劉蓉。酌度
情形。妥籌辦理。將此由六百里各諭令知之。
○予四川酉陽陣亡外委馮勝都祭葬世職。
○癸酉。

孝敬憲皇后忌辰。遣官祭

泰陵。

上以孟冬時享

太廟。前期親詣行禮。○諭議政王軍機大臣等。
吳棠奏官軍攻勦圍蒙賊壘。及宿捻蝟集。情
形危急。請飭勁旅援皖。各摺片。陳國瑞一軍。
與姚廣武。英翰等軍約齊。分路進攻。圍蒙賊
壘。於賊營叢雜之中。冒雨越濠奪壘。將弁兵
勇受傷五百餘名。陣亡三百餘名之多。似此
情形。蒙城固已十分危殆。而陳國瑞之軍。損
折日多。殊堪痛惜。不惟無救於蒙圍。且恐苗

逆乘機出撲官軍營壘。兇燄更張。吳棠所撥
各軍。又不能不先顧臨渙糧道。如或蒙城不
保。該逆得以據為北路巢穴。卽使援師大集。
攻勦更難措手。僧格林沁現已由東督兵赴
豫。著卽於抵豫後。迅速布置。赴皖救援。先解
蒙城之圍。其豫境各捻。應卽如何分路堵勦。
籌度機宜。可卽交張之萬。毛昶熙等辦理。該
大臣卽督飭各軍。先行勦辦苗逆。設法保全
蒙城。俾有進兵之地。該大臣務當先其所急。
迅卽籌辦。不可為豫捻所牽。致令苗黨得以
愈益。鴟張負隅自固。陳國瑞兵力本不甚厚。
奮力血戰。徒多損失。該營所需炸礮等項。並
著僧格林沁飭催各營。迅卽分撥解往。以資
利用。李世忠所部。與富明阿統領各軍。分南
北岸進兵。該提督效用正殷。卽著曾國藩加
之激勵。飭令迅速進攻。並飭駐紮潁六各軍。
分路並進。以制賊勢。富明阿所督各軍。仍與
唐訓方會商。設法援應蒙城。內外諸軍。力圖

保全。並與陳國瑞熟籌進攻機宜。毋徒冒進。致挫軍威。僧格林沁所督各軍。馬多步少。淮河南北一帶。汭港紛歧。利於步戰。所有一切。馳逐攻堅之事。著曾國藩。富明阿。唐訓方。嚴飭楚軍。奮勇當先。不准因僧格林沁督軍前來。觀望推諉。致有貽誤。將此由六百里各諭令知之。○又諭。官文。嚴樹森。奏。毫捻分股。竄擾鄂疆。水陸疊勦。獲勝一摺。捻匪由豫省竄入。楚北鍾祥縣境。折回隨棗。歷隨州。德安。應山。以至孝感。雲夢。復分股由隨州之茅次。畝南。趨京山。天門。至應城之長江埠。均經官軍水陸截勦。疊獲勝仗。官文等現飭各軍分道窮追。著卽飭令在事文武。實力堵勦。務將各匪就地殲除。毋任旁竄。其王金奎一股。復有由豫省臨潁。舞陽一帶竄擾鄂疆之信。著官文。嚴樹森。分布兵勇。嚴密遏截。並著張之萬。迅速派兵截擊。杜其竄鄂之路。隨棗。應山。一帶接壤。南陽。信陽。該匪被鄂省追勦緊急。勢

必回擾豫疆。應城。孝感一帶。距皖省西界較近。亦應防其竄入。著曾國藩。張之萬。各於交界地方。派兵防堵。會同鄂軍。前後夾擊。毋任匪蹤奔突。毫無攔阻。此次捻股分擾鄂豫兩省。飄忽靡常。往來如織。曾國藩。張之萬。務當與官文等合力同心。將該逆痛加埽蕩。毋得各顧本境。強分畛域。致令匪蹤蔓延。是為至要。將此由六百里各諭令知之。○以湖北德安。應山等處。勦匪獲勝。賞副將唐瑞廷。巴圖

魯名號。副都統安圖等。加銜升敘有差。予陣亡副將李春華等十九員。祭葬世職加等。入祀死事地方。暨原籍昭忠祠。○以江蘇水師遺失礮船。革叅將陳浚家。遊擊黎占雄。職仍留營。○予安徽蒙城陣亡都司李福守。備馬敬千總曹學純。祭葬世職加等。

大清穆宗繼天開運受中居正保大定功聖智
誠孝信敏恭寬毅皇帝實錄卷之八十

大清穆宗繼天開運受中居正保大定功聖智
誠孝信敏恭寬毅皇帝實錄卷之八十一

同治二年癸亥冬十月甲戌朔享

太廟遣醇郡王奕譞恭代行禮 遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

文宗顯皇帝

孝德顯皇后暫安寢殿○遣官祭

端慧皇太子園寢○

上詣綏履殿問

慈安皇太后安平安室問

慈禧皇太后安至癸卯皆如之○以神靈顯應

加江蘇宿遷縣

金龍四大王封號曰數仁河南陳留縣

黃大王封號曰護國

朱大王封號曰顯應○頒同治三年時憲書

○試中式武舉黃大元等五十一人於太和

殿前○乙亥諭內閣閣敬銘奏東省漸次肅

清懇請回籍終制一摺閣敬銘以丁憂臬司

破格奪情擢膺疆寄原因山東省軍務吏治

皆須力加整頓而閣敬銘平日辦事樸誠是

以特資倚畀該署撫受此不次特恩宜如何

激發天良力圖報稱現在淄川鄒嶧各匪及

東昌府屬降匪雖經僧格林沁督兵勦洗次

第殲除而宋逆在逃餘匪未靖疊經諭令該

署撫督屬搜捕務絕根株況東省吏治頹靡

尤宜及時振作以挽積習一切應辦事宜均

關緊要遽請終喪迹則本於守經意實近於

諉卸且該署撫於到省後憑陳兵團積弊謂

宜認真整飭並有一事未善卽一日不敢偷

安之語該署撫任事半年捫心自問所整飭

者果何事耶乃因賊匪稍靖輒稱四境已清

軍旅已息故作粉飾之詞冀遂卸肩之計大

失朝廷倚任之意閣敬銘著傳旨申飭所請

開缺終制之處著不准行○又諭閣敬銘奏

請將庸劣不職之鹽場各員分別革職休致

一摺山東永利場大使范春城永阜場大使形墀於該場鹽垣濠塹並不隨時飭商修理致啟梟匪窺伺之心聲名亦甚平常均著卽行革職官臺場大使姚德用年近七旬辦事昏憤著以原品休致以上各員均有未完竈課著先行撤任予限三月協同接任之員趕緊徵激償逾限不完卽著嚴叅治罪○諭議政王軍機大臣等基溥等奏

永陵要工告竣繪圖呈覽一摺據稱神樹倒勢

喫重處所南北搭架三路保護穩固其撲壓啟運殿後坡及折倒斲朽均已清理而神樹微壓處所亦用大木搭柱並將

寶頂甄土敬謹歸安復用淨土培修圓整要工一律完竣等語辦理尚為妥協基溥等現有應行查辦事件著卽督飭隨帶司員將交查之件迅速辦結並著玉明飭令關防各官敬謹守護毋稍疏懈將此各諭令知之○又諭僧格林沁劉長佑奏追勒朱登峰股匪全數

擒獲正法一摺逆匪朱登峰等均係屢降屢叛之賊此次被勒窮蹙感詐降經官軍合圍勦捕全數擒獲正法其在逃之程敬書張廣得二犯著劉長佑嚴飭地方官實力按捕毋任幸逃法網現在直東境內雖無成股賊蹤惟逆首尚未全獲大名河間一帶伏莽尚多難保不因僧格林沁大軍赴豫餘燼復燃僧格林沁在大名與劉長佑會晤自必將一切未盡事宜告知該督著卽責成劉長佑督飭文

武員弁及地方官吏認真按剔務絕根株經此次諄諄訓誡之後儻在事各員並不實力奉行致餘匪復相煽惑滋事重煩兵力惟劉長佑是問懍之將此由五百里各諭令知之○又諭僧格林沁等奏追勒朱登峰股匪全數擒獲曾國藩奏蒙城糧盡援絕恐難持久各情形富明阿奏馳援蒙城並招撫各圩擬分路進取各摺片直東股匪節經僧格林沁督師按勒殲擒殆盡其在逃之宋逆及零星

餘匪。疊諭劉長佑等嚴密拏辦。諒不難悉數弋獲。僧格林沁現由延津渡河赴豫。勦擒此時豫捻竄擾何處。未據張之萬飛章入告。僧格林沁入豫境後。察看賊氛。如情形並不甚重。卽當由歸德一路進兵。先搗蒙城之急。昨據吳崇奏。接准侍郎國瑞函稱。以直東軍務肅清。鄒縣兵馬整齊。擬由韓莊取道徐州。南征苗逆等語。鳳凰山附近地方。有無餘匪潛匿。如無須國瑞駐師鎮壓。卽著飭令該侍郎

迅由徐宿一帶前進。俾附逆各圩咸知僧格林沁大兵將到。各思投誠效順。則苗逆之勢漸孤。勦辦自易得手。況被脅練圩。非盡甘心從逆。疊據富明阿唐訓方奏。遵旨出示招撫。現有練董田端書張大儒等。將苗逆糧臺焚毀。聚集二萬餘人。圖攻下蔡。若乘此機會。懸以重賞。予以優獎。而以勁旅繼其後。提挈而鼓舞之。則各圩之反正者必多。而蒙城之圍可期立解。並著僧格林沁迅速妥籌辦理。富

明阿現已馳赴蒙城。兵力漸厚。著再申明前諭。前飭陳國瑞等併力進攻。或分兵赴全家集。扼紮渦河上游。截賊糧運。以牽制賊勢。均著富明阿相機妥辦。惟富明阿拔營後。新撫各圩未免失望。必得大軍鎮撫。方足以維繫人心。王才秀蚌埠一軍。尚嫌單薄。著唐訓方添撥兵勇。前赴長淮衛等處駐紮。以壯聲勢。李世忠援臨之軍。已有萬人。該提督既係力圖報效。卽可借資其力。並著曾國藩乘機利

導。飭令分攻苗逆老巢。檄調蔣凝學規取壽州。唐訓方亦卽率師進圖懷遠。務期四面兜勦。使該逆首尾不能相顧。自不難擣穴擒渠。切不可彼此觀望。予賊以可乘之隙。致有貽誤。陳大禧股匪。由隨州竄近黃州。勢將闖入皖境。曾國藩仍當抽調得力將領。會同鄂軍前截後追。以收夾擊之效。毋稍大意。曾國藩另片奏請留道員黃冕經理江楚海運。及籌辦米鹽互市事宜等語。黃冕著暫緩赴粵。准

其留於蘇皖聽候曾國藩差委該道員曾任江蘇知縣聲名狼藉頗不理於眾口此次曾國藩飭令經理海運等事不過節取其長以供驅策曾國藩仍當隨時留心秉公察覈如黃冕故態復萌仍有貪橫恣肆情事即當據實嚴叅毋得以奏留在前稍涉瞻徇將此由六百里各諭令知之○又諭英桂奏探聞宋逆餘黨擾及易州一帶已飭沿邊文武防守以杜竄越並探得陝省鄜州所屬之洛川宜

君兩縣另有回匪滋事勢甚猖獗各摺片宋逆被官軍擊敗後隻身潛逃現在直東已無成股賊匪而零星敗匪不突狼奔直隸易州一帶地方與山西接壤自應嚴密防範即著英桂嚴飭慶德等督率在防兵勇認真堵剿毋令擾及完善陝省洛川宜君毗連韓城郃陽等縣該處回匪復熾亟應及早撲滅以免蔓延多隆阿現已督軍西趨此次洛宜兩屬回匪復張或恐欲牽掣我師即著多隆阿張

集馨派撥得力將弁馳赴該處一鼓翦除至晉省榮河河津等縣均與洛宜僅隔一河吉州等處亦相距該處不遠尤應處處嚴防以杜該回匪竄越之路總兵和昌所統官兵僅數百名恐其不敷堵剿英桂務當嚴飭該護鎮等會同沿河各地方官激勵民團嚴為守禦以杜竄擾將此由六百里諭知多隆阿英桂並傳諭張集馨知之○丙子諭內閣現值天氣漸寒

實錄館人員朝夕恭纂書籍著加恩於例支柴炭外十一月十二月正月每月賞銀五十兩在廣儲司支領○諭議政王軍機大臣等張之萬奏擒匪由魯山南召南趨勦擊獲勝並攻破王寨請留善慶暨黑龍江餘丁察哈爾馬匹各摺片張總愚股匪由登封汝州竄入魯山縣境經官軍追至該縣之大營集進勦獲勝賊復竄撲南召縣城為守城兵練擊退並經張曜督軍追及於城南十里鋪續獲勝

仗。該匪遁至口字河。迤南扼拒山口。未能搶入。此股擒匪人數眾多。現被偪勒南趨。勢必西竄商雒。南窺宛楚。該處係三省扼要之區。山嶺叢雜。且與鎮平內鄉接壤。逼近武關。為多隆阿大營轉運軍火之路。亟應加意嚴防。張之萬務當督飭張曜。派撥勁旅。嚴扼鎮平內鄉交界險要。毋令西窺陝境。仍督率永奎王文行等各隊。與張曜所部。就南召山內四面圍剿。毋令他竄。並知照楚軍迎頭會剿。以

期迅掃逆氛。陝南興安一帶。徧地賊蹤。儻被此股擒匪竄入。勾結蔓延。益難收拾。著劉蓉張集馨督飭商雒文武各員。鼓勵兵團。嚴密堵截。一面知照李雲麟就近防剿。並著多隆阿籌撥兵勇。扼守武關。毋令該匪闖入腹地。至襄樊隨棗一帶。為擒匪由豫竄楚熟徑。著官文嚴樹森迅飭在防將士。扼要固守。毋令擾近邊界。僧格林沁現已督兵由大名前赴豫省。儻此股擒匪因陝楚兩路防堵嚴密。折

回東竄。即著迎頭截擊。痛加殲戮。以殄狂氛。至豫省正息各境。伏莽未清。雖經總兵李殿元將該匪擊散。截殺百餘名。平毀寨牆。而逆首並未就獲。仍慮餘燼復燃。著張之萬督飭李殿元。並該地方文武。迅將張正渭等首夥各賊悉數殲除。毋留餘孽。薩薩布已由歸德馳赴臨淮。即著唐訓方飭令管帶馬隊聽候調撥。現在豫省賊勢鴟張。官軍馬隊統帶乏人。善慶適帶黑龍江餘丁行抵豫境。著照該

撫所請。准其留於豫省。並將撥往臨淮之黑龍江餘丁五百名。察哈爾馬一千匹。一併留豫。歸善慶統帶。以資防剿。再本日據李鴻章奏。劉長佑派赴上海招募楚勇之參將吳永敦。已由李鴻章撥給銀三千兩。由滬渡江。順途招集楚勇。馳回館陶。此項楚勇能否留於豫省。助剿之處。已諭令劉長佑酌量辦理矣。將此由六百里諭知僧格林沁。官文嚴樹森多隆阿劉蓉張之萬唐訓方。並傳諭張集馨

知之○又諭前因直東防勦喫緊經劉長佑派委參將吳永教馳赴上海招募楚軍一千名茲據李鴻章奏稱另在洋稅項下動撥銀三千兩交吳永教支領由滬渡江順途招集楚勇馳回館陶大營助勦等語現在楊澱一朱登峰等股匪節經官軍追勦殲除其未獲逆首程敬書等及零星餘匪昨經諭令劉長佑嚴飭地方官實力按拏諒不難剋期蕆事且李明惠等兵勇前已諭令仍回直隸歸劉長佑調遣似兵力亦已敷用豫省捻蹤肆擾兵力甚單防勦諸形喫緊此項新募楚勇如非直隸軍營所必需即可由該督咨行張之萬撥赴河南助勦捻匪著劉長佑酌度情形奏明辦理將此由六百里諭令知之○又諭李鴻章奏攻克五龍橋賊壘援勦吳江擊敗嘉湖大股並擊退無錫援賊各摺片五龍橋為蘇州下太湖之鎖鑰該逆憑河築壘以出入太湖而通浙賊之氣經程學啟等督軍分

路進攻立破五龍橋賊壘其嘉湖竄撲吳江同里之賊復於長板橋等處疊次被創百龍橋八圻一帶賊營密布直至平望復經程學啟督軍進擊生擒偽貴王陳得勝及悍賊千餘共破賊營三十餘座追至平望該逆望風奔潰立將平望西首大橋拆毀逆匪三萬餘人逃出不及一半實足申天討而快人心現在蘇州婁門葑門盤門各路俱斷嘉湖援賊復受大創事機甚為順手著李鴻章即飭五龍橋寶帶橋長生橋水陸各軍嚴密扼紮毋致為賊所乘惟忠逆糾合各偽王大股萃於西路力援無錫以護蘇城援賊一日不清則蘇錫勢難進取現在護逆受創於芙蓉圩侍逆亦為劉銘傳等逐退高橋其鋒已挫即著飭令各軍合力併圖忠逆先將該逆大股痛加勦戮再行設法攻城惟值此蘇賊窮蹙各軍屢勝之餘尤當穩紮穩進相機進取不可稍有挫失將此由六百里諭令知之○派肅

親王華豐都察院左都御史載齡鑲黃旗漢軍都統春佑校閱中式武舉馬步射技勇。○予江蘇無錫陣亡守備楊人傑把總但成喜祭葬世職加等。○予河南正陽陣亡守備劉泰成把總陳大德祭葬世職加等。○予江蘇合門殉難光祿寺署正金肇元訓導呂成恕祭葬世職眷屬旌卹如例。○丁丑上御養心殿引見中式武舉親定甲乙。○諭內閣劉長佑奏灤州知州祁之鐸捐升知府所

遺灤州一缺請以盧龍縣知縣倪人炯調署等語祁之鐸一員前據劉長佑於本年八月間甄劾守令各員案內以該員闡茸無能奏參革職此次片內仍以灤州知州捐升知府聲敘似於前奉諭旨竟未之聞即使部文行知或有遲滯而該督以自行奏參甫經兩月之件何至毫不記憶況此等庸劣之員既經查明即當於奏參時另揀賢員代署以肅吏治又何待該員捐升始行委署殊屬不合劉

長佑著交部議處其因何前後舛錯祁之鐸被參與報捐孰先孰後之處著劉長佑明白回奏至祁之鐸知州尚難勝任若任其捐升知府似此闡茸無能之輩安望其表率屬員整飭地方著該部即行查明所有該革員捐升知府之處著不准行如該革員業已報捐即著仍行革職以肅官常而重吏治尋劉長佑奏祁之鐸捐升在先被參在後報聞吏部議劉長佑照含糊題奏私罪例降一級留任

從之。○又諭前據劉長佑奏鎮國公桂池府中管事官員張應參即張小曾等私發諭帖至懷來縣誣提監犯當經降旨令宗人府飭令桂池交出張應參等交劉長佑歸案嚴審嗣據宗人府奏據桂池呈稱張應參係已革刑部主事並非該府管事官等情復經諭令劉長佑嚴切根究並經步軍統領衙門將張應參之妾張劉氏等解交直隸歸案茲據劉長佑奏稱審訊曲大即徐大等供稱張應參

與桂池平素交好充當府內管事官員又據張應參之妾張劉氏供亦稱張應參經管該府事件屬實並有桂池遣人至其家送信前事有伊一人承管屬請放心之語是張應參之聞拏逃避桂池難保無串同舞弊情事案關宗室世爵礙難由外提訊請飭交刑部會同宗人府審辦等語著劉長佑將全案人證卷宗解交刑部會同宗人府嚴行審辦勒令桂池將張應參兆惠等要犯交出一面著步

軍統領衙門順天府五城嚴拏務獲○又諭唐訓方奏委署府州縣等官與例未符懇恩俯准以重地方一摺據稱安徽用兵年久人民彫敝淮北又當多事之秋亟應慎簡賢能以資安撫現署鳳陽府事候補知府李銜華係軍功保留未經引見之員代理五河縣事縣丞汪厚圻係例應赴選之員署宿州事江西候補知縣張雲吉等五員均係隨營差遣之員委署各缺與例稍有未符惟人地實在

相需懇恩俯准署理並請將汪厚圻等留於安徽補用等語著照所請李銜華准其署理鳳陽府知府汪厚圻准其代理五河縣知縣江西候補知縣張雲吉准其署理宿州知縣江蘇候補知縣蔚元璵准其署理全椒縣知縣前任四川梁山縣知縣曾化南准其署理蕪湖縣知縣江西候補通判何誠准其署理宣城縣知縣江西試用知縣蔡家馨准其署理巢縣知縣汪厚圻等六員並著一併留於

安徽補用該省地方軍務緊要急需才是以破格允准嗣後不得援以為例○諭議政王軍機大臣等前據富明阿奏馳援蒙城招撫諸圩各摺片當經諭令僧格林沁鼓舞反正各圩富明阿截賊糧運唐訓方添兵分紮長淮衛等處茲據唐訓方奏援兵四集分投並進勦撫兼施並平毀賴西捻圩等情各摺片與富明阿前奏情形大略相同淮河南岸紳練田端書等引眾向官紛紛效順唐訓方

現已會同富明阿各給劄諭許以優獎並懸立重賞購獻首逆其劉府考城洛河上黨姚家灣一帶復令遊擊郭清標前往聯絡紳練著富明阿唐訓方乘此機會設法鼓舞以收人心並令該紳練等集團攻克下蔡以制蒙城賊勢現在各圩既望風效順陸續來歸則苗逆之黨與日孤官軍之聲威日壯惟甫經反正各圩人心未定亟須分撥勁旅與之聯絡著富明阿唐訓方迅速籌辦前經諭令僧

格林沁入豫境後察看賊氛如不甚重即當由歸德一路進兵先極蒙城之急現在蒙城米糧久斷浮萍樹葉亦將食盡勢將朝不保夕僧格林沁務當相度皖豫兩省情形先其所急相機援剿不可顧此失彼被脅各圩投誠助官聞該大臣行抵皖省歸者益眾即著遵奉前旨懸賞奏獎多方鼓勵以散苗黨而孤賊勢富明阿現赴蒙城務當分兵斷賊水陸糧運激勵諸軍進攻賊營速解城圍毋稍

延誤王才秀駐軍北岸之洪家灣兵力尚單即著唐訓方飭令何紹彩一軍移紮該處並令朱淮森抽調兵勇前紮馬村溝以資鎮扼其王莊曹老集一帶即著飭令普承堯收撫各圩李世忠已親督大隊由五河西上李顯發亦率所部由馬村溝拔營繼進即著唐訓方咨令該提督專攻南岸迅拔壽州並飭蔣凝學毛有銘等軍進取潁西各圩勦撫兼施以分賊勢唐訓方仍遵前旨撥兵攻復懷遠

令苗逆兼顧不暇庶勦辦可期得手至南北兩岸進剿各軍後路仍著該撫察度情形何路喫緊即分兵向何路策應毋稍大意將此由六百里各諭令知之○戊寅賜一甲黃大元岳金堂敦鳳舉三人武進士及第二甲張起鵬等九人武進士出身三甲徐竣等三十人同武進士出身○諭議政王軍機大臣等愛仁奏請將交查各員分別解晉留陝審辦一摺現在秦晉道路通塞不時愛仁病體

亦未全愈。著劉蓉按照該尚書所請。將閻不敏等七員。並全案卷宗。派員解赴山西。交愛仁審辦。至南鄭縣知縣周蕃壽。定遠廳同知王義樟。遊擊閻長申。商州知州曹熙。並前署藩司王承基。前署鹽道韓泰華。均係應行查辦之員。劉蓉於行抵漢中時。即將周蕃壽。王義樟。閻長申等三員。先行查辦。按律定擬。其曹熙一員。前經多隆阿以該員素得民心。奏留署任。著該撫悉心察訪具奏。王承基。韓泰華。雖經罷斥。該員等以監司大員。被人叅劾。王承基歷任貪鄙。吸食洋煙。徇庇韓泰華。於防堵局一切支發。表裏為奸。著劉蓉密派妥員。將局務帳目。徹底清釐。以期水落石出。陝省吏治。頹廢已久。該撫受朝廷特達之知。務當不避嫌怨。認真辦理。以副委任。將此各諭令知之。○命理藩院尚書存誠。都察院左都御史單懋謙。鑲黃旗漢軍都統春佑。兵部左侍郎曹毓瑛。在紫禁城騎馬。旌表守正捐

軀河南汝州民婦王張氏。○己卯諭內閣。御史張瀛奏。本年句到黃冊。刑部於情實出語。後另行黏籤。體制未協。請照舊辦理一摺。本年刑部呈進句到黃冊。曾諭令議政王軍機大臣大學士會同刑部。逐起詳覈黏籤進呈。請旨施行。原因朕在沖齡。兩宮

皇太后親裁大政。是以變通辦理。至情實各犯。應決應寬。均係該王大臣等會同詳覈。逐起黏籤。刑部何從擅為擬議。卽如奉天省之范

庭向一犯。情有可原。該王大臣等亦僅能聲明雙請。未敢遽懇寬宥。是生殺之權。操之自上。並非竟委之於部臣也。張瀛於此中原委。並未深悉。遽謂黃冊黏籤。恐啟刑部擅擬之漸。識見殊屬膠滯。所請照舊辦理之處。俟朕親政後。自應率由舊章。此時著無庸議。○又諭恭親王等奏。暫擬減領生息銀兩數目一摺。據稱宗人府銀庫。按年由戶部實領長蘆兩淮生息銀六萬一千一百兩。閏月加增銀

五千八百兩以備放給八旗宗室覺羅恩賞
獎賞各項之需自咸豐年間搭放銀票二成
每年實領銀四萬八千八百兩零嗣因部庫
支絀歷年停領欠撥銀兩至四十四萬有零
現在銀庫存項不敷支放而例賞各款節經
覈減未便再議更張擬請自明年起每年改
為暫領實銀三萬六千兩閏月加增銀三千
兩其年內例放各款必須支領實銀五六十
兩始數開放各等語所奏為樽節部款並豫

籌放項起見通盤籌畫事屬可行著戶部每
年撥放宗人府銀庫實銀三萬六千兩閏月
加增銀三千兩按照四季分撥一俟部庫充
裕仍按例定銀數支放至年內例放各款需
用孔殷並著戶部先將咸豐八年秋季欠撥
銀六千七百二十兩於年內埽數撥齊以備
開放年款另片奏長蘆欠撥該庫生息銀共
二萬三千餘兩請飭戶部轉催等語著戶部
行文長蘆鹽政迅催如數撥解毋許遲玩干

咎○又諭前因升任給事中卞寶第奏叅幫
辦軍務浙江黃巖鎮總兵黃彬不理營務侵
吞釐金縱容部將擄劫商船捏報勝仗曾經
被害家屬周姓等在巡撫衙門控告並所部
水勇向降賊索取米價暨民團拏獲接濟賊
米之船轉將民團懲辦各重情並經訪查該
總兵實屬恃恩驕恣民怨沸騰當經降旨將
該總兵撤去幫辦軍務總統水師即行革職
令都興阿解交曾國藩軍營聽候查辦茲據

曾國藩奏查明該革員三解鎮江城圍兩在
揚州府境會合陸軍勦匪並在小河等口岸
疊次獲勝尚無擄殺難民捏勝勝仗之事巡
撫衙門並無周姓控案沿江釐卡全歸臺局
各員經理亦無固利肥己實據所部水勇向
降賊索取米帳各節派員密訪均未查有確
證惟游匪冒充兵勇擾害商民商船牟利之
徒業米濟賊該革員巡視不周實屬失於覺
察請將該革員發往軍臺效力贖罪等語已

革總兵黃彬被叅各情雖經曾國藩查無實據惟以幫辦軍務總統水師大員既不能攻克城池肅清江面又不能禁遏奸匪接濟賊糧實非尋常失察可比黃彬著卽發往軍臺效力贖罪○諭議政王軍機大臣等曾國藩奏甯國涇縣疊獲勝仗左宗棠奏嚴州防務喫緊暫緩富陽之行各摺片逆酋古隆賢等糾合大股匪徒圖犯涇縣經甯國守將劉松山督隊往援會同總兵易開俊合力迎擊連

破茂林潘村等處賊壘嗣甯國北路之賊謀襲郡城劉松山聞信馳回開門出擊賊股相率敗遁該鎮將等往來策應屢卻大敵勦辦頗為出力惟石埭太平尚為賊踞皖南羣匪蟻聚必須由上游各城埽蕩而下著曾國藩嚴飭江忠義李榕等激勵諸軍鼓勇前進迅將石太一帶賊壘悉數削平與易開俊劉松山等廓清皖南全境俾金陵之師無後顧之患方為妥善徽浙軍務互相表裏徽郡餘孽

未清欽休黟祁路路可通難保不乘隙竄越浙境左宗棠自應仍駐嚴州相機布置著卽飭令劉典王開琳等嚴防徽郡各屬毋任該匪闖入其進逼杭城餘杭之師並著密飭蔣益澧分飭所部穩守營壘不可輕率前進致為該匪所乘節交霜降何以該省疫氣尚未消除據奏營中將士及地方印委各員物故者尚多軍士如此百姓可知覽奏曷勝憫惻該督務當宣布朝廷德意善為撫綏感召

天和潛消沴癘以期軍務日有起色將此由六百里各諭令知之○又諭多隆阿奏官軍馳抵鳳翔城圍已解及分兵各路援剿情形一摺鳳翔被圍至十四月之久經陶茂林等督軍援救轉戰而前城圍立解皆由多隆阿調度有方所向奏績深堪嘉尚現在甘省賊氛甚熾卽著飭令陶茂林將附城賊壘並所屬回巢趕緊埽蕩迅赴甘省會合雷正綰之師勦辦回逆毋稍遲誤雷正綰現已由邠州一

帶赴甘。力圖恢復平涼。曹克忠一軍。又進勦白吉原老巢。是甘省援兵雲集。熙麟務當督率各軍。隨時分兵策應。並就現有兵力。慎重防勦。毋稍疏虞。鳳翔各屬被擾。一切善後事宜。著劉蓉。張集馨督屬妥為辦理。多隆阿病體未痊。惟因軍勢正順。必須一鼓作氣。迅奏膚公。現仍進駐醴泉。分兵勦賊。具見忠勇。惻忱。該大臣務當隨時調攝。如各路布置已定。即可回駐省城。稍息勞勩。另摺奏遵覆。寶型

等未能解晉緣由。昨據愛仁奏請將閻丕敏施鵬。寶型。注曜奎。羅殿標。李祝齡。張維義。解晉審辦。當諭令劉蓉遵照解往。現在劉蓉到省。尚須時日。卽著多隆阿按照愛仁奏提各犯。一併派員解赴山西。歸案審辦。將此由六百里諭知多隆阿。熙麟。雷正綰。劉蓉。並傳諭張集馨知之。○又諭。衛榮光奏請嚴緝北路奸匪。暨責成河北鎮道防河各摺片。據稱宋逆。經僧格林沁擊散後。黨與尚多伏匿。直隸

山東河南交界處。所時有匪徒嘯聚。刦掠。與逆賊相通。僧格林沁大兵南下。伏莽四起。將有變而加厲之勢。請飭三省各督撫會商。於連界地方。擇一久歷戎行之員。作為統領。挑選馬步各隊。扼要駐紮。並責令各州縣官實行保甲。清查戶口。使奸宄無所容身。黃河為河北彰衛懷三府屏障。而三府又為畿輔藩籬。尤宜嚴加防衛。各等語。所奏不為無見。直東各屬。自逆匪倡亂以來。疊次厚集兵勇。分

路兜勦。復特令劉長佑督辦三省勦匪事宜。以期事權歸一。僧格林沁督師攻勦。已將各股匪次第翦除。在逃各匪。責令該管各地方官隨地接捕。並明降諭旨。解散脅從。捆獻首惡。僧格林沁南下。復留定安統帶黑龍江及京旗官兵駐紮直東交界地方。巡緝彈壓。現在兵勇為數已不為少。著劉長佑。閻敬銘。張之萬。按照衛榮光條陳各節。悉心酌數。分別試辦。並各遵疊次諭旨。督飭兵弁隨時訪拏。

一面力行保甲將宋逆黨與暨著名土棍責令戶首捆獻明正典刑以除稔惡而靖地方至黃河捍蔽河北三府防守最關緊要總因該鎮道等不能認真巡防致前此宋逆餘黨竄擾濬縣內黃時任令往返數次毫無阻遏殊為可恨著張之萬責成河北鎮道講求營制扼要設防並聯絡鄉團於沿河一帶實力守禦遇賊即擊庶各匪不得肆意竄越而畿疆悉臻鞏固原摺片著鈔給劉長佑閱敬銘

張之萬閱看將此各諭令知之又諭總理各國事務衙門奏博採眾論請撤退輪船以杜流弊又密陳撤退輪船詳細情形將李泰國革退等摺片並鈔錄曾國藩李鴻章信函呈遞採買輪船一事前經內外諸臣詳議不惜重價原期利器歸公操縱由我使外洋頓失所恃總理衙門因需款甚鉅且駕馭洋人不易遲久未即議行嗣因甯波失守海口設防九洲洲尚未克復髮逆亦有購船之說不

得已奏明委辦並將代買輪船之李泰國所定十三條駁正酌改五條奏明行知各省乃此次管帶輪船之阿思本到後李泰國忽將前次議定業經奏准之五條背而不遵仍將駁正不用之十三條從新提起定欲照辦此十三條與劉飭赫德李泰國原文設立合同之意不符總理衙門正在與之駁辯適據曾國藩函稱前此奏准配用楚勇並無專用洋人之議若蔡國祥另帶中國師船不得為輪船之主則是未收購船之益先短華兵之氣現在蔡國祥已另募水勇自為一營擬俟阿思本輪船到後察看如其意氣凌厲不如早為疏遠或竟將此船分賞外國不索原價折其驕氣曾國荃亦奏稱江邊僅金陵一城未復長江水師帆檣如林與陸軍通力合作定可剋期埽蕩實不藉輪船戰攻之力並因輪船所需經費甚鉅請裁沿海水師節省餉需以資酌劑李鴻章復函稱蔡國祥虛擁會帶

之名毫無下手之處。一家吳越。小大異形。強弱異勢。終不能相為附麗。議者或擬送還外國。以省糾纏。或擬調巡沿海。以資控馭。或借以載運鹽米。上下長江。出入津洋。收其餘利。藉得實際。似皆可說。而不可行各等語。均屬確有見地。現經總理各國事務衙門王大臣與卜魯士等反復會商。因阿思本有遣散弁兵之語。卽就其說。並將輪船撤退。買價仍由英國交還中國。卜魯士亦允照辦。惟弁兵薪

工及來往經費。議由中國備給。並另賞阿思本銀一萬兩。該使臣等驚愕之餘。繼以感激。此項薪工經費等項。雖糜費較多。然此後每歲省近百萬。且免日後另有要求無厭之請。辦理頗為決絕。亦欲以折服外國虛憍之氣。且輪船價值。該公使既允為扣還。亦未至全行棄擲。至李泰國之為人。本極刁詐。中外皆知。久欲去之而不能。今以辦船貽誤。遽行革退。藉此驅逐。其總稅務司一缺。派赫德辦理。

且看該稅務司能否稱職。再由總理各國事務衙門。及該督撫等察看具奏。隨時辦理。至輪船既已不用。中國必須力求自強之策。曾國藩前稱兵力不足在陸。而不在水。曾國荃李鴻章亦均有不願借資輪船之意。著曾國藩李鴻章激勵水陸各師。整飭船礮。務期精益求精。使江南地方。漸次全復。卽外國亦必羣相惛服。不至有所藉口。至輪船入江。拖帶鹽船。有害無利。並著嚴行禁止。曾國荃前奏

請裁沿海水師。節省經費一摺。卽著毋庸再議。總理各國事務衙門原摺片二件。著鈔給曾國藩等閱看。將此由六百里各密諭知之。○欽差大臣多隆阿奏請將接丁母憂之署總兵官成祿。仍留甘肅軍營。勦賊允之。○以正藍旗滿洲副都統國瑞為杭州將軍。未到任前。以乍浦副都統明興署理。○補鑄湖南提標中營中軍守備。會同縣儒學福建順昌縣縣丞。各關防條記。從總督官文巡撫毛鴻

賓徐宗幹請也。○以陝西鳳翔府城解圍。實授陶茂林甘肅提督。擢知府張兆棟以按察使用。知縣唐霽霖以道員用。餘升賞有差。○予故杭州將軍伊勒東阿祭葬。諡恪勤。○以政績卓著。予故福建道員前直隸知縣桂超萬。故浙江知縣徐台英。列入國史循吏傳。○予安徽甯國陣亡把總鄧光武。外委雷國英。祭葬。世職加等。○庚辰。諭議政王軍機大臣等。劉長佑奏直境已無賊蹤。現將兵勇分別

撤回。妥籌善後一摺。宋逆分股賊目邱得勝。李得城。程來書。夥賊葛登。幅梁兆玉等。二百八十餘名。均經劉長佑飭屬拏獲。正法。岳金聲。匪夥亦悉數擒斬。賊目程敬書已在山東館陶縣拏獲。直隸全境已無匪蹤。前調兵勇自應分別撤回。遊擊蔣希夷所部豫勇八百名。著劉長佑卽行撥赴河南。交張之萬調遣。俾資協剿。其餘兵勇。劉長佑現擬挑選精壯三千名。先後奏調來直之楚勇二千名。共兵

勇五千名。擇要分布。勤加操練。以備不虞。此外卽行遣撤。卽著照該督所擬辦理。據山東所獲賊目供稱。宋景詩冒充孔姓乘馬向山路逃逸等語。亟應嚴行按捕。以除巨慝。而申國憲。著閻敬銘督飭屬員實力查拏。儻按緝不力。再令首惡乘閒脫逃。致稽顯戮。惟閻敬銘是問。前據閻敬銘奏擬調團首陳貫甲歸標。察看情形。現在宋逆餘黨漸次按捕淨盡。直東兵力有餘。著閻敬銘卽將陳貫甲調令歸標。如該團首遵調前往。該署撫卽設法駕馭。妥為拊循。俾為我用。東省得此勁旅。亦可藉資協助。如敢任意抗違。不遵調遣。意萌反側。著閻敬銘知會劉長佑會合兩省官軍協力進剿。毋令養癰成患。該署撫務當謀定後動。不得稍涉輕率。轉致一發不可收拾。直東豫一帶土匪。恐因僧格林沁南征復圖勾結。昨已諭令各該督撫飭屬嚴行按捕。著劉長佑。張之萬。閻敬銘。懍遵前旨。隨時訪拏。務絕

根株。是為至要。將此由六百里各諭令知之。
○又諭恩麟奏平涼失陷。賊勢鴟張。請飭山西撥餉。玉通奏。賊撲郡城。勦辦情形。各摺。片平涼府城失陷。已據熙麟奏報。現在多隆阿已派雷正綰督帶十營兵勇起程赴甘。陶茂林亦統率所部。於鳳翔解圍後。進援甘省。擬與雷正綰會合。攻拔平涼。規復固原。計雷正綰與陶茂林兵勇已有二十營之多。不難迅掃賊氛。惟陝省敗匪陸續西竄。雷正綰等軍

僅止從後尾追。恐賊勢益形滋蔓。多隆阿務當飭令雷正綰等軍繞道迎截。俾該逆不能西竄。不可徒事尾追。並著熙麟派撥兵勇會合夾擊。以期四面兜勦。速奏膚公涇州一帶已經熙麟就近派兵扼紮。西路之隆靜一帶防兵甚單。著恩麟再行添募勇丁迅速前往。以固省垣門戶。南路之西和鹽關賊匪尚未勦滅。伏羌匪徒復逃至泰安。岷州回匪復行滋事。又臨洮花寺回匪撲近西甯郡城。河州

狄道回漢亦互相仇殺。情形喫緊。該省賊匪蜂起。竟有接應不暇之勢。多隆阿督辦軍務。兩省防勦事宜。均應統籌兼顧。著即飭令在事文武將該匪次第掃除。毋留餘孽。陶茂林雷正綰均統率所部赴甘。甘省東路兵力足敷勦辦。西路尚覺空虛。馬德昭到甘後。應否飭赴蘭州。抑或即留於慶陽軍營。派令帶兵之處。均著熙麟酌量辦理。至花寺回匪屢經兵勇攻擊。並設法解其脅從。惟賊眾兵單。賊

首馬歸源偽行乞撫。仍復環繞郡城焚殺。並分股盤踞東關南山抗拒官兵。一股在北川焚殺攻撲番寺。實屬兇頑異常。現經阿家呼圖克圖帶領僧勇等二千餘人助勦殺斃賊匪多名。著玉通即飭令兵勇會合攻擊。並激勵番僧等迅將該匪殲除。將此由六百里諭知多隆阿雷正綰熙麟玉通並傳諭恩麟知之。○又諭恩麟奏甘省餉項匱乏。請飭山西及河東道迅撥鉅款一摺。甘肅地方瘠苦。向

賴各省協濟。近來賊氛四起。固原復陷。多隆阿現派雷正綰等督率大軍馳援。餉需尤不容稍缺。著英桂督飭河東道於省庫運庫迅速籌撥。餉銀卽交甘省委員解往。以濟要需。又據玉通奏。西甯花寺回匪盤踞關廂。城中倉庫空虛。糧餉缺乏。請飭山西籌撥銀十萬兩等語。並著英桂妥為籌撥。與前項恩麟所撥之款一併酌量。先行籌措若干兩。星速解往。以濟軍需。而維大局。將此由五百里諭令

知之。○又諭勞崇光。張亮基奏克復普安廳城。現籌勦辦新城踞匪。進圖貞豐興義。髮逆竄擾松桃廳境。請將總兵李有恆革職。勒限勦賊各摺片。普安廳城為回匪襲踞。千總李馥署同知錢璵等督練攻克。擒斬多名。餘匪逃赴興義。現在普安安南二縣亦經收復。勞崇光等已飭將弁分軍進勦貞豐新城。著卽督令在事各員。迅將該二城攻拔。進軍興義。與廣西知州陳錫藩會合夾擊。以期掃蕩逆

氛。髮逆李宰輔等經婺川兵勇擊退。後逃往四川彭水縣境。復由酉秀等處竄入黔省。經松桃廳同知劉侶鶴等督率兵勇擊退。追至湖南邊境。弭落地方。此股逆匪往來川黔楚南邊境。奔突靡常。非三省合勦。不能杜其紛竄。著勞崇光。張亮基。駱秉章。惲世臨各派兵勇合力攻勦。務將該匪四面兜圍。迅速殄滅。不得稍分畛域。致令乘隙奔逃。復形滋蔓。著威甯鎮總兵李有恆玩視軍務。強截餉銀。著

先行革職。勒限兩箇月。攻克豬拱箐賊巢。以贖前愆。儻再任意遷延。卽將該員正法。以肅軍律。勞崇光等另摺奏克復舊縣。請將陸傳應賞加按察使銜。該員前因辦理釐金。經毛鴻賓奏參有扶同徇隱情弊。曾經降旨暫行撤任。交惲世臨查辦。著俟結案再行酌量辦理。又另摺奏楚省帽子山匪徒勾結苗教各匪竄擾松桃廳屬四十八溪一帶。著卽飭令金太文。由銅仁張家寨移師進勦。實力殲除。

下江廳有無賊蹤。速卽探明勦辦。壩芒賊匪距省甚近。尚大坪之賊。竄擾開州。均應亟為埽除。著卽分飭沈宏富趙德昌等迅速攻克。毋稍遷延。勞崇光張亮基摺稱抵黔後痛除陋弊。將士感奮立功。數月之中。疊克城寨甚多。較之從前韓超田興恕所辦軍務。自覺氣象一新。惟奏報軍情。務期嚴飭帶兵員弁。字字從實。不得稍有粉飾。尤須力戒滿盈。以身作則。俾吏治軍務。日有起色。方為不負委任。

懷之勉之。徐之銘現已革職。所有雲南近日情形。著勞崇光張亮基勤加偵探。隨時具奏。將此由六百里各諭令知之。○直隸總督劉長佑奏遵查前奏總兵官楊長春等遇賊未及接仗。實因窮寇狂竄。彼騎我步。每致追之不及。尚非防勦不力。報聞。○以內閣學士全慶為工部右侍郎管錢法堂事。○調正紅旗蒙古副都統綿宜為正藍旗滿洲副都統。以內閣學士寶珣兼正紅旗蒙古副都統。○以

雲南昭通鎮總兵官沈宏富署貴州提督。○賞隆福寺守衛

梓宮兵丁銀。○以戰功卓著。開復貴州總兵官趙德昌暫革處分。並賞提督銜。○以貴州克復安南縣城出力。賞知府江鏡清遊擊李宣忠等花翎。知州毛英倬等藍翎。餘升敘有差。○以貴州婺川等處勦匪獲勝。賞遊擊田應祥巴圖魯名號。同知申炳章等花翎。千總聶吉祥等藍翎。餘升敘有差。○以克復貴州舊

縣汛城。賞副將楊發貴花翎。餘加銜升敘有差。予陣亡千總李鴻林等祭葬。世職加等。○以貴州攻克張家寨賊巢。生擒首逆蕭汶魁。賞總兵官金太文一品封典。知府曾璧光。都司張正儒等花翎。餘加銜升敘有差。予陣亡府經歷鄧長清祭葬。世職加等。○辛巳諭議政王軍機大臣等。張之萬奏南召擊賊獲勝情形一摺。毫捻張總愚股匪。麇集南召城南之草店地方。圍攻山南太子望寨。經張曜派

兵與寨勇內外夾擊立破賊圍復督兵圍敗敗於七里灣並將撲營之賊奮力擊退連日擒斬甚多此股逆匪人數眾多最為兇悍尤須防其西竄秦疆張之萬已派兵分扼鎮平內鄉杜其窺伺仍著飭令在防將士實力堵遏並令張曜力顧西路以杜紛竄一面督率兵勇聯絡鄉團實力進攻毋任久踞南召一帶團練尚能齊心禦賊該撫當飭在事文武多方鼓勵力籌堅壁清野之策俾擒眾無糧

可據自不能久踞該處阻險為巢俟逼令出險後即可盡力痛剿毋令蔓延他處如該逆窮蹙遁回老巢即著毛昶熙整齊兵團扼截迎剿務期殄除淨盡不准縱令逃歸致貽後患將此由六百里各諭令知之○又諭張凱嵩奏髮逆闖入粵西分股狂奔現飭西北兩路兵勇堵剿一摺李幅猷股匪由楚省之青林界竄入粵西龍勝廳境後隊之賊退至斗江闖入懷遠縣境內城步之賊復由興安五

排僻徑突至界首圖擾粵西省城北路復經勇練截殺多名退出湖南道州地界斗江一股擾及融縣復被紳團剿練到處截擊折回懷遠此股逆匪由楚入粵復由粵入楚分合無常奔突靡定必須界連省分會合兜剿方可杜其紛竄現在分擾道州一股雖在楚南境內惟該處界連兩粵往返奔逃勢甚便捷著毛鴻賓晏端書郭嵩燾張凱嵩懍世臨分飭兵勇嚴扼分界要隘並令三省將弁聯絡

聲勢前截後追以期迅掃逆氛懍世臨亦宜振刷精神嚴督在事文武將道州股匪就地殲除不得以驅逐出境即為了事懷遠地方界連黔粵楚三省著勞崇光張亮基懍世臨派撥兵勇分扼險要毋令竄入並著張凱嵩督飭兵練將茶溪水圍一帶之賊實力勦洗毋任他竄將此由六百里各諭令知之○又諭張凱嵩容縣官軍收復各村現籌乘勝進攻一摺廣西容縣蔣澤春一軍攻破草鞋

坡賊壘乘勝追勦復將高嶺堡各村莊先後收復。蔣澤春以塘村立崗尚有賊踞終為我軍後顧之憂。復添派勇練悉力攻擊旋將塘村等二處攻拔賊勢現已窮蹙正當乘此聲威迅克堅城著張凱嵩督飭蔣澤春迅率所部將容縣城池趕緊收復俾地方漸就肅清不得以一村一寨小有斬擒任令該營頓兵延宕日久無功其信宜援賊雖經官軍擊敗難保范逆不再圖句結為併力抗拒之計著

毛鴻賓晏端書郭嵩燾會同崑壽督飭高州將士實力進勦俾信宜之賊自顧不暇則容縣賊勢益孤廣西官軍攻勦更易得手其梧州道勇並著張凱嵩催提飭令速由藤縣前進規取岑溪毋任遲延將此由六百里各諭令知之○以戶部左侍郎阜保署管工部錢法堂事未到任前仍以理藩院右侍郎額勒和布暫署○以鑲白旗滿洲副都統德懋暫署鑲紅旗護軍統領○以河南攻克張崗賊

寨出力賞都司長慶等花翎在籍主事李根固等藍翎副將孫之友等加銜升敘有差○以戰功卓著免河南已革副將楊飛熊遣戍仍留營○以廣西龍勝廳城被賊竄陷革通判曹德炳代理副將甘應職仍留營予陣亡在籍總兵官胡元昌祭葬世職加等○予河南南召陣亡都司王占鰲祭葬世職如參將例○壬午諭議政王軍機大臣等官文等奏

西擊賊獲勝及遵覆李雲麟一軍無庸另設糧臺各摺片此次東竄擒股圖擾漢口經總兵楊朝林等督軍擊退敗竄河南羅山縣屬之鐵鋪耿家樓一帶著官文等督飭在事員弁乘勝跟追毋令得以喘息張之萬迅速派得力將弁迎頭截擊儻再任其紛竄蔓延惟張之萬是問其南竄應城長江埠一股經副將王桐柏等軍分路追擊疊挫賊氛惟餘逆盤踞宋埠中館驛料棚一帶必須迅速殲除著

官文嚴飭舒保王桐柏等合力兜擊毋留餘孽該逆不得志於漢鎮或東犯蘄羅則皖北防堵尤關緊要著曾國藩督飭陸路兵勇於英霍一帶扼要嚴防實力堵剿毋稍疏懈陝南逆匪圖竄鄖西雖經官軍擊敗而賊蹤剽疾難保不去而復來仍著官文等飭令鄖陽鎮守嚴密扼堵不得稍有鬆勁李雲麟一軍僅三千三百人為數不多自無庸由湖北另設糧臺分局且據官文等奏該營餉項九月

以前早已發足其十月分之餉亦將起運所需軍火源源解濟等語是李雲麟一軍並無缺餉之虞現在漢中城固俱陷賊勢方張李雲麟當乘此士飽馬騰剋期會師進取不得藉籌餉為詞虛糜取巧貽誤戎機致干重咎劉蓉已抵保甯何以尚無續到奏報著卽星馳前進速抵漢中督率各軍掃蕩漢郡踞匪以副委任將此由六百里各諭令知之○又諭吳棠奏陳國瑞連日出隊進剿擬先過河

駐紮截賊糧道暨勦辦後路捻股並購拏宋逆各等語前經疊次諭令富明阿派軍駐紮渦河上游截賊糧運以牽制賊勢此次陳國瑞擬由王家窯設法渡河駐紮斷其陸運以搯其吭實為制勝要著卽著富明阿督飭該總兵率領得力兵弁設法渡河扼紮以圖進取南岸賊營密布恐該總兵一軍尚嫌單薄現在富明阿率所部馬步四千餘名並前派宋慶一軍一千三百名均已到蒙卽著嚴飭

諸軍奮力進剿迅解蒙城之圍並著唐訓方相機添撥勁旅分投策應毋專待僧格林沁一軍致有貽誤至臨渙一帶捻首李大箇子等尚在揚句背圩屯踞現經陳國瑞派撥馬隊令張保聖等會合副將艾憲銀儘力搜捕卽著吳棠嚴飭該將弁等認真勦辦以顧陳國瑞等軍後路糧道昨據劉長佑奏據山東所獲賊目供稱宋景詩向山路逃逸等語其曾否潛匿徐屬皆未可知著吳棠仍遵前旨

嚴飭各州縣懸賞購緝嚴密訪拏務獲以絕根株此次吳棠由六百里馳奏摺件正摺係捐輸請獎及加廣學額尋常事件反將蒙城等緊要軍務夾片陳奏實屬不知緩急吳棠著傳旨申飭將此由六百里各諭令知之○又諭徐宗幹奏臺灣官軍勒平南路逆壘現飭迅赴彰城並請將吳鴻源暫緩拏問一摺臺灣軍務正在喫緊既據徐宗幹奏稱吳鴻源尚知奮勉卽著暫緩拏問留營效力自贖

儻仍前貽誤卽著仍遵前旨拏問治罪丁曰健業經放洋對渡淡水卽著飭令該員登岸後調齊北路各軍號召舊部得力丁練會同曾玉明各軍收復彰城再將嘉義餘孽搜捕淨盡以絕根株林文察已抵蚶江口配船候渡彰化湖仔等莊經曾玉明等會同文武各員勦撫兼施悉臻安定彰城賊勢已孤著左宗棠徐宗幹嚴催林文察曾玉明等督飭南北各軍合隊進兵攻拔堅城擒斬首惡力圖

廓清不得以勒辦漸次得手稍形疏懈至汀延土匪經文武員弁節節追勦斬馘無算零匪百餘人翻山竄入粵省界內而首逆李阿四改裝商賈由僻路逃回廣東嘉應州原籍渠魁未獲終貽後患著毛鴻賓晏端書郭嵩燾嚴飭所屬一體會拏務將首犯李阿四擒獲逃入粵界之零匪捕拏淨盡毋任漏網並著左宗棠徐宗幹飭令汀延等屬文武各官設法購緝一面按拏延順等處逸匪務期悉

數弋獲以靖地方將此由五百里各諭令知之○以湖北鄖西擊退竄匪賞署知縣知州林瑞枝知府銜花翎○以湖北鎮口鎮勦匪獲勝復總兵官楊朝林提督銜賞副將李喜益巴圖魯名號遊擊黃祖淦等花翎予陣亡遊擊蕭祖繩等祭葬世職加等入祀死事地方暨各原籍昭忠祠○予福建汀州陣亡把總葉芳蘭祭葬世職監生余修勤等賞卹加等○癸未

慈禧皇太后聖壽節遣官祭

太廟後殿

奉先殿○遣官祭

文宗顯皇帝

孝德顯皇后暫安寢殿

上於養心殿

慈禧皇太后前行禮王大臣於

慈寧門外眾官於午門外行禮○蠲免廣西永

寧修仁荔浦容岑溪桂平貴武宣橫永淳新

甯崇善來賓遷江賓平南宣化上思左養利

永康甯明上林北流隆安蒼梧藤馬平柳城

象武緣西隆西林三十三廳州縣暨歸德果

化萬承太平安平龍英田七土州被擾地方

新舊額賦有差

大清穆宗繼天開運受中居正保大定功聖智
誠孝信敏恭寬毅皇帝實錄卷之八十一

大清穆宗繼天開運受中居正保大定功聖智
誠孝信敏恭寬毅皇帝實錄卷之八十二

欽修

同治二年癸亥十月甲申諭議政王軍機大

臣等前因滿慶等奏瞻對野酋糾眾圍困裏
塘正土司官寨等情當照所請諭令駱秉章
酌調土兵援剿並協撥兵餉旋據崇實駱秉
章奏西藏土兵沿途滋擾請令撤回並密陳
呼徵呼圖克圖與汪曲結布構釁情形及李
玉圖挾制主使請調開以離其黨均經照所
請飭辦又文祥等奏審辦呼徵呼圖克圖一
案當將滿慶等先後奏報自相矛盾之處復
諭令福濟景綏秉公逐款詳訊迄今數月之

久土兵曾否撤回瞻對情形若何道員史致
康等前往開導能否遵諭解散未據該將軍
等覆奏而福濟竟以路梗折回成都杳無赴
藏消息朝廷正深廛念茲據滿慶等歷陳呼
徵捏具冤詞聲明原案始末並委員李玉圖
起程馳赴乍察相機辦理瞻逆事務叅劾拉
里糧務嚴清榮任性乖張並為達賴喇嘛汪
曲結布代進奏書各摺片覽滿慶等所奏如
呼徵冤詞內有兩寺喇嘛與彼送銀五十兩

哈達一箇令其進京告狀一節滿慶等則稱
該喇嘛聞知呼徵有苛派銀兩之事故意送
銀形容以示羞辱殊出情理之外所稱總堪
布膽敢向山上放槍係奉呼徵之命而來等
語無論呼徵未必果有此事而總堪布一經
放槍即被執事人等捆縛所帶土兵何竟無
一人援救滿慶等既知汪曲結布與呼徵有
切齒之仇何以將伊調藏汪曲結布既係僧
眾及辦事大臣調來而滿慶摺內則稱呼徵

求調汪曲結布來藏。並非好意。有半途刼殺之心。亦未免有心文致。汪曲結布曾充噶布倫台吉。於咸豐八年辭退。曾經滿慶奏明。惟呼徵供稱。汪曲結布係有罪革退之人。史致康言伊即係解回配所之璧喜。究竟汪曲結布有無發遣案據。均應逐一查究。著福濟景紋。於抵藏後。迅將呼徵與汪曲結布呈訴各情。前後諭旨內駁詰各節。確切查明。如滿慶等有與汪曲結布朋比為奸。捏詞飾奏情弊。即著據實嚴叅。並將汪曲結布撤退。斷不可令其把持藏務。如滿慶等所奏並無虛捏。汪曲結布果為僧眾所信服。其辯冤奏書。所列濟隴呼圖克圖眾頭目出具圖記之處。均係情真事實。即可俯順輿情。令汪曲結布協理藏務。用示羈縻。是在福濟等斟酌妥為辦理。以安藏地。至汪曲結布於道員史致康等稟稱。瞻對臺藏東路滋擾。已非一年。蠻觸相爭。非同侵犯內地等語。噉噉置辯。謂天朝有外

之之意。史致康等此稟。不過因川省軍務未平。暫緩進兵起見。駱秉章何遽咨行駐藏大臣衙門。致僧俗得以互相傳播。藉為口實。未免疏忽。滿慶等接到此咨。未將漢文義理。向僧俗明白解說。致令驚疑。亦屬不合。本日已嚴諭滿慶等妥為宣布安撫。土兵既不得力。而瞻對又不可理諭。豈可任其恣意侵犯。致梗驛路。川中兵勇甚多。現在屬境亦頗安謐。著駱秉章迅即調派得力將領。酌帶勁旅。勒洗瞻對匪徒。務令藏路疏通。而明正土司等得以各安生業。以副朝廷懷柔遠方之意。至所稱東路法國羅勒拏蕭法日等。於今春派無賴劉姓。由鑪城運來茶包。在巴裏一帶散給漢兵。要結人心。並捏造謠言。誘惑巴塘正副土司投赴瞻逆。是否有此情事。著崇實。駱秉章查奏。又羅勒拏等聲言景紋奉有諭旨。將前藏所屬之擦瓦博木噶地方。賞交伊等永遠管理。凡有天主教之人進藏者。不准阻

止等語。如果屬實。是該教士假傳詔旨。殊屬可惡。除諭令總理衙門。向法國住京公使據理駁斥外。著崇實。駱秉章嚴飭沿邊各屬。認真查察。如有內地傳教之人。潛赴藏地者。概行截回。毋令乘閒偷越。披楞因法國有入藏傳教之信。亦欲來藏通商。其意實屬叵測。廓爾喀於去冬遣人來藏。復修舊好。其西北各小部落。亦願與藏永作藩籬。著福濟等乘勢利導。飭令廓爾喀等永敦舊好。嚴密防範。以

杜披楞窺伺之心。糧員嚴清榮有無與羅勒拏暗中勾結情事。是否將由藏截回川省之教民吳姓。留住江達署中。擅將由藏發出摺報。停壓六箇時辰。捏稱有蠻子二人來搶此摺。種種紕繆。不可不嚴切根究。著駱秉章卽將嚴清榮撤回。秉公查辦。另選賢能之員。前往接管糧務。據滿慶奏。委員李玉圖帶領把總馬騰蛟等。及漢番兵丁人等。馳赴乍察一帶。相機辦理。勤撫瞻進事務等語。所調土兵。

前已有旨撤回。李玉圖曾否遵旨來京。抑或尚在乍察。著駱秉章查明奏聞。李玉圖係呼微案內待質要證。本日已諭令滿慶等仍遵前旨。飭該糧員迅速來京矣。福濟等折回成都時。聲稱藏中事務。隨時與將軍等面商。今既數月。試問所商何事。作何辦法。又云一俟驛路疏通。卽速赴藏。以副委任。現據滿慶等奏。藏中僧俗大眾。盼望福濟景紋二人來藏。將各案辦結。以安人心。已飭商上特派曉事

番目。持達賴喇嘛夷劄赴鑪。面見明正土司。諭令按站迎送。是驛路不患梗阻。且滿慶等奏報。可以東來。福濟等行李。豈不可以西去。福濟前因規避雲南省分。延不赴任。獲咎甚重。經朝廷棄瑕起用。復敢安坐錦城。不思設法馳赴藏中。將交查案件迅速辦結。竟是故態復萌。大不曉事。著卽恪遵疊次諭旨。會同景紋星速前進。不准再事耽延。儻仍以路梗為辭。致藏眾日久生心。藉端滋事。而滿慶等

反得倚恃汪曲結布等為藏身之固。定將福濟景紋重治其罪。毋謂言之不豫也。滿慶等摺片五件。代進達賴喇嘛等奏書四件。均著鈔給崇實駱秉章。福濟景紋閱看。將此由六百里各諭令知之。○又諭滿慶恩慶奏。呼微捏詞誣控。聲明原案始末。並勦辦瞻對各摺片。又代進達賴喇嘛等奏書四件。前因呼微控訴各語。均繫一面之詞。萬難憑信。諭令滿慶恩慶傳知李玉圃。迅速赴京質對。此次滿慶等滙陳呼微捏詞妄控各情。是李玉圃被誣冤抑。事必有因。惟案關藏地。構釁非李玉親來質對。不足以折呼微案內一千人證之心。卽著恪遵前諭。飭令該糧員迅速來京。毋任違誤。至道員史致康稟內。有蠻觸相爭等語。此係指瞻對等而言。汪曲結布等何得卽以棄同化外。眾心疑懼等詞。遽行呈訴。滿慶等於此等咨文。何以不將漢文義理。向其解說。致令驚疑。殊屬不知大體。著卽宣布朝

廷德意。妥為拊循。告以我朝撫有中外。一視同仁。況爾等受累朝養之恩。豈可因委員稟詞。懷疑越訴。惟當靜候欽差赴藏。秉公查辦。一切冤抑。斷無不申之理。至藏中土兵。仍應遵旨。斟酌遣撤。如瞻對野酋。不遵理諭。卽由滿慶等酌留馴良兵練。扼守藏界。仍咨明川督勦辦。川省大軍。剪除羣逆。自當無堅不摧。兇悍如石達開一股。亦且殲滅無遺。矧茲瞻對。豈能螳臂當車。大兵一到。卽可解散。藏內人民。何必妄生驚畏。如此明白開導。必能照舊相安。此次汪曲結布等違例擅遞奏書。本應查究。姑念其向化情殷。是以諭令福濟等趕緊赴藏。持平妥辦。以示體恤。嗣後除應行呈遞奏書。照例呈遞外。餘俱不准呈遞。以符定制。至羅勒拏等意欲入藏傳教。西藏官民力阻其行。具見惻怛。本日已諭知崇實駱秉章等。遵照條約。設法攔阻矣。其披楞西入之語。尤宜先事豫防。現在廓爾喀雖已修好。

其西北各小部落亦甘與藏永作藩籬而邊備仍不可一日懈弛著滿慶等督飭汪曲結布等妥籌防範不得稍涉大意糧員嚴清營既據滿慶等因其不洽番情撤任候審已諭知駱秉章將該員撤回查辦色拉寺喇嘛刁玩恐生事端著滿慶等相機妥辦寬嚴合宜以杜後患滿慶等摺內有派人曉諭明正土司安站通道之語並著妥速辦理疏通道路庶福濟等可以早日抵藏將此案早日辦結

永息爭端以副維持黃教之意將此由六百里各諭令知之○又諭滿慶恩慶奏達賴喇嘛專差赴京請飭沿途照料等語本年輪應西藏達賴喇嘛專差年班堪布囊素等呈進貢物由西甯陝西一帶赴京現在甘肅西甯地方回匪尚未捕滅陝西雖漸就肅清而餘逆未淨道路均難免梗塞該堪布等必須繞路前進庶免阻隔著熙麟劉蓉玉通恩麟張集馨俟該堪布班墊曲扎囊素沙克嘉降白

等行至境內即各飭地方官妥為照料應付前進不得將該貢使截回亦不可任令阻滯其行抵直隸時著劉長佑一體照辦以示懷柔將此諭知劉長佑熙麟劉蓉玉通並傳諭恩麟張集馨知之○乙酉諭議政王軍機大臣等有人奏徒犯匿名逞兇等款請飭拏辦一摺據稱徒犯解雙幅假伊弟解雙全之名冒充直隸灤州莊頭向佃借錢並每畝勒增錢七百文賄託委員刑禁無辜縱令伊子解

金澤肆行不法毆斃人命該犯素與已獲正法之鳳凰山逆匪宋金堂等聯絡聲勢且與本州匪棍張三汰等往來夜聚明散兇橫異常請飭查拏等語罪犯匿名冒充莊頭已屬大干法紀又復似此倚勢逞兇陵虐地方實為閭閻之害著劉長佑督飭該地方官按照所奏各款嚴密訪查確實務將各該匪犯等悉數弋獲盡法懲治以除奸宄而安善良原摺著鈔給閱看將此諭令知之○又諭毛鴻

賓秦官軍疊破賊隘。匪黨投誠。斬獻首逆。留張運蘭防勦楚界。並粵庫支絀。籌辦鹽釐。情形各摺片。高州官軍於攻克白花塘等賊巢後。與內應匪首李安等內外夾擊。克復嵩坡安良堡。追至龍頭崗。復將該寨克復。乘勝攻拔黃塘。被脅難民吳公謨等。將大坡墟地方獻出。其化州所屬之寶墟。亦經黃興芳等投誠。內應與團眾內外夾擊。將賊巢攻破。賊黨鄭金。劉超。密約在信宜舉事。將逆首陳金缸。

並其眷屬親信黨與二百餘人殺盡。情願薙髮歸順。獻回信城。辦理尚為得手。惟東岸大井賊巢。尚為賊踞。信宜縣城。尚未收回。鄭金。劉超。與陳金缸互相吞噬。是否真心悔罪。尚未可靠。著毛鴻賓。郭嵩燾。崑壽督飭在事文武。勦撫兼施。速將信宜縣城收復。並將鄭金等投誠一事。妥籌辦理。不可稍涉大意。致餘黨復萌反側。崑壽所部兵勇。不可遽行撤退。以資鎮撫。總期一勞永逸。毋令餘匪復行滋蔓。

粵東軍務較鬆。楚南賊氛方熾。毛鴻賓現將張運蘭一軍留楚。勦辦李幅猷股匪。著卽飭令迎頭截擊。毋令闖入粵東江西邊境。劉德謙所部七百人。現已到粵。卽由該督妥為調度。至該督所稱。藩關各庫收支數目。入不敷出。各關所支稅銀。正額未充。必須另籌鉅款等語。現值粵東各屬客匪伏莽尚多。未能一律肅清。江南粵匪未平。需餉甚急。該督撫務當悉心經理。開源節流。力籌接濟。不得藉詞推諉。現在內務府庫項支絀。待用甚殷。歷任粵海關監督。於內務府應用之款。任意拖欠。疲玩已極。著毓清趕緊將欠解各款陸續籌解。以應急需。儻再遲延。推諉惟該督撫監督等是問。粵東鹽船走私積弊。日甚。毛鴻賓現商曾國藩。飭令總兵任星元統領水師。赴粵彈壓勦捕。著卽照所擬辦理。該督惟當籌添勇丁船礮。督飭該總兵實力巡查。力除積年舊弊。總期言行相符。不得有名無實。應辦

釐務亦當與郭嵩燾悉心籌畫妥定章程辦理力杜科派抑勒中飽分肥諸弊以裕餉源將此由六百里諭知毛鴻賓郭嵩燾崑壽並傳諭粵海關監督毓清知之○以翰林院侍講沈秉成司經局洗馬胡瑞瀾充日講起居注官右春坊右庶子夏同善翰林院侍講丁培鑑署日講起居注官○丙戌諭內閣官文等奏請將失守城池案内之該管鎮道知府各員免議等語上年髮捻先後竄陷湖北鄖

陽府屬之房縣等處城池該管文武各員於所屬州縣未能督率固守本有應得處分惟前任安襄鄖荆道另案降補同知金國琛力守襄樊疊次擊賊獲勝至房縣失守時係王璐護理安襄鄖荆道到任未久聞警飭屬力保襄樊賊知有備不敢回竄前署鄖陽鎮總兵訥欽前署鄖陽府知府艾浚美當賊匪圍攻郡城登陴堅守城垣賴以保全功過均足相抵訥欽金國琛王璐艾浚美所有此次應

得處分均著免其置議○又諭前據官文等奏請將勤辦髮逆出力之知縣諸鑣等開復革職留任處分當經降旨允准俟經吏部議照新章將該員等按二次得有勞績給予知縣虛銜頂帶茲據官文等奏諸鑣孫繼祖失守城池均於援兵未至之先帶勇克復並續著有勞績至署應城縣知縣艾鋌於游勇擾入城中當即集團擊退倉庫均未損失該員等均有微勞足錄可蓋前愆與日久被賊踞

擾者不同亦與隨同克復者有閒請仍准開復等語諸鑣孫繼祖艾鋌均著准其開復革職暫行留任處分○又諭駱秉章奏請將不職之州縣各員分別革職休致一摺四川署興文縣知縣候補知縣郭雲漢任性妄為不洽輿情現有控案亟須徹底根究署通江縣知縣題補廣安州知州姜鳳儀於援陝各營軍裝米石到境延不撥運廣元縣知縣韓道源該督委令採辦軍米因循疲玩不能隨時

接濟。該二員是否有心貽誤。亦須查實嚴懲。郭雲漢姜鳳儀韓道源均著卽行革職。撤回省城聽候查辦。撤任署丹棱縣知縣候補知縣胡子材操守不謹。性情卑鄙。著卽行革職。巫山縣知縣朱家炆年力衰庸。難期振作。著勒令休致。以肅官常。○諭議政王軍機大臣等。駱秉章劉蓉奏確查援陝各軍先勝後挫。實在情形。劉蓉另摺奏。漢中郡縣失陷。賊勢蔓延。現籌布置情形。又另片奏。請飭催李雲麟進駐興安。力圖進取各等語。陝南逆燄。鴟張不獨已陷各城。難於收復。卽附近興漢州縣亦甚可危。近日賊眾四出。時向通江南江毗連之龍池場等處。擄糧裹人。大有窺伺川疆之意。劉蓉現在督飭諸將。收集殘兵。嚴防各隘。並檄毛震壽將兩城潰卒。妥為賞遣。易佩紳所部。亦飭大加裁汰。一面派員回楚募勇三四十名。練成勁旅。擬俟果後九營到齊。進駐青石關。先固川省門戶。相機雕剿。或孤

軍未能獨進。則改由廣元趨寧羌。以圖褒沔。各等語。所籌均尚周妥。第添募之勇。到營尚在臘月。所調之副將唐星照又遠在江西。且須回湘募勇。亦恐緩不濟急。而毛震壽又係革職留營差委之員。尤恐威望不著。呼應不靈。設該匪乘機肆逞。則陝甘川楚邊境。在在可虞。劉蓉身任封圻。責無旁貸。著卽趕緊部署。就現有兵力。或分防青石關。徑由甯羌進圖褒沔。俾該匪偵知。蜀兵將至。有所顧忌。不敢紛竄為患。徐圖相機前進。方為妥善。留壩廳為入西安要路。劉蓉勢難兼顧。並著多隆阿酌度情形。如兵力有餘。卽抽撥馬隊千餘名。駐紮留壩。以遏該匪北竄之路。劉蓉到任尚需時日。張集馨署理撫篆。斷不可存五日京兆之見。所有應辦要務。必須實心整頓。其漢南一帶。應行防剿之處。並著隨時與多隆阿熟商妥辦。毋誤事機。劉蓉所統各軍。指日抵陝。所需餉項。如司庫稍有存款。張集馨仍

當力籌撥濟。以利軍行。李雲麟計已行抵興
郡。該京卿所部。係特派援陝之師。著俟布置
稍定。卽約會劉蓉分路進剿。以收夾擊之效。
現在竄鄂捻匪。疊經官軍剿敗。不日卽可撲
滅。其張總愚一股。亦經豫軍於魯山等縣跟
蹤追躡。諒亦不至闖入楚境。著官文嚴樹森
熟審近日軍情。如賊勢稍鬆。梁作楫等水陸
各軍。無須回顧襄樊。卽飭令汴流而上。進紮
興安。以壯李雲麟後路聲勢。正在寄諭間。據

熙麟奏。西安敗匪。紛竄崇信之神浴河。平涼
之白水鎮華家莊等處。請飭多隆阿迅催雷
正綰星速赴援等語。雷正綰前已統帶十營。
由醴泉直趨固原。著多隆阿飛催該提督鼓
行而西。毋稍遲滯。鳳翔餘匪。計已按捕淨盡。
並著催令陶茂林督隊赴甘。以期厚集兵力。
攻拔平涼等處。迅掃逆氛。熙麟仍當督飭各
軍。分投策應。雷正綰各營軍需。如有必需接
濟之處。並著妥籌接濟。將此由六百里諭知

官文。多隆阿駱秉章熙麟嚴樹森劉蓉李雲
麟。並傳諭張集馨知之。○又諭劉蓉奏。江西
袁州協副將唐星照前在川中。屢著戰績。請
飭就本籍衡湘一帶。募勇二千名。來營調遣
等語。陝南髮逆自竄陷漢中後。蔓延日甚。川
陝交界處所。一片賊氛。劉蓉自川援陝。前敵
各軍。經此挫衄。大有不振之勢。非再練精銳
之師。不足以新壁壘。副將唐星照既據劉蓉
稱其堪勝統將之任。卽著沈葆楨飭令迅回

本籍。於衡湘一帶。招募精壯勇丁二千名。分
作四營。派員統帶。前赴劉蓉軍營。以資調遣。
唐星照回湘後。著惲世臨催令選募成軍。趕
緊起程。所需槍礮軍裝各項。著卽由湖南撥
發。交該副將承領。以利軍行。李續宜前因患
病。請假回籍。現計假期已滿。病勢自當漸就
平復。而苗逆兇熾。日張。皖北軍務十分喫緊。
並著惲世臨催令該前撫迅卽起程赴皖。毋
任耽延。將此由五百里各諭令知之。○又諭

劉蓉奏籌辦川省鹽釐。應由井竈抽收。請旨飭辦一摺。據奏川省鹽筴之利。井竈實居其源。而商販特承其流。向來辦法。僅抽官鹽餘鹽。從未議及井竈。該撫擬仿就場起課之法。倡為按鍋計鹽。按鹽定釐之議。並擬編聯保甲。稽查偷漏。查川省各廠井竈。秦人十居七八。蜀人十居二三。如所收係秦人贖本者。即歸陝餉。所抽係蜀人贖本者。即歸川餉等語。劉蓉現辦漢南軍務。當陝省彫敝之後。無款

可籌。而漢中各軍新敗。必須添募勇丁。製備軍火鍋帳等項。需費尤鉅。自不得不借資鄰省。協濟川省竈戶。有井以為之本。與他省竈戶不同。該撫所陳按鍋計鹽。按鹽定釐之議。似屬可行。且係從未抽捐之戶。以秦蜀商人各協本省軍餉。自應情殷桑梓。踴躍急公。著駱秉章按照劉蓉所奏。飭令牛樹梅等認真興辦。惟事屬創始。必須於國用有裨。於竈戶無損。仍恐興辦伊始。有奸商劣紳。從中阻撓。

把持射利。亦不可不嚴為之防。其未盡事宜。著該督飭令該司道等妥為覈議。以期萬全無弊。至摺內所稱。如能歲籌二三百萬。不惟秦蜀實賴其利等語。該省竈戶。是否能籌此鉅款。並著該督酌量辦理。斷不可竭澤而漁。致使竈力疲敝。或至別滋事端。原摺著鈔給閱看。另片奏。四川勸辦山西陝甘等省捐輸。擬就章程四條。咨商駱秉章飭司道等妥籌辦理等語。該督即飭在局司道等曉以大義。

俾各情殷報效。惟須涓滴歸公。不得有名無實。用資協濟。將此諭令知之。○又諭劉蓉奏。上年回逆滋事。西同鳳各屬富戶。多年遷居山西。跡雖同於轉徙。家仍擁夫厚貲。亦應誼切梓桑。共相輸助等語。陝省彫敝已極。富賈巨商。散處山西者。定必不少。現在劉蓉辦理漢中等城勦匪事宜。需餉甚鉅。本省無可籌措。著英桂即飭鄭敦謹。王溥。遴派廉幹得力之員。分途勸辦。一俟收有成數。即隨時撥解。

劉蓉行營以資接濟。秦晉唇齒相依。該撫務當督飭該司道妥為勸導。不可有名無實。以期士飽馬騰。將此由五百里諭令知之。○又諭前因有人奏護理陝甘總督甘肅布政使恩麟辦理回務。專藉招撫為補苴之計。致令回勢鴟張。生民塗炭。省南省北一帶。滋蔓難圖。養癰貽患。有誤大局。請飭查辦等語。當經諭令多隆阿。照麟嚴密查奏。茲據恩麟奏。恩麟係伊族弟。懇請迴避一摺。已准其照例迴避。其恩麟被參一案。著改派慶昫會同多隆阿。按照所參各款。秉公查訪。據實具奏。甯夏與蘭州密邇。見聞較確。想慶昫必能嚴密確查。不敢稍涉徇隱。代人受過也。原摺著鈔給慶昫閱看。將此由五百里各諭令知之。○又諭照麟奏。甘省慶陽兵需支絀異常。請飭催山東河南四川。迅將部撥協餉。趕緊解赴等語。甘省回匪猖獗。該督駐軍慶陽督勦。現復添派雷正綰援軍赴甘會勦。當此兵勇雲集。

勦辦正期得手之時。需餉尤急。豈可令懸釜待炊。致兵勇有譁潰之虞。著閻敬銘張之萬。迅將戶部指撥協甘餉銀。飛速派員解赴西安。毋得稍有貽誤。該兩省協餉到陝。即著張集馨添派妥員。轉解涇州。設或道路未通。即由西安繞解慶陽。再由照麟派員解往。其部撥四川銀兩。即著駱秉章迅速如數籌撥。派員解赴蘭州省垣。為接濟多隆阿西路糧臺之用。毋誤要需。將此由五百里諭知駱秉章。

閻敬銘張之萬並傳諭張集馨知之。○又諭滿慶恩慶奏。代進廓爾喀國王表文一摺。廓爾喀額爾德尼王蘇熱達熱畢噶爾瑪薩哈。因奉到敕書。免其呈進例貢。俟同治六年再為進呈。感激恩施。呈遞謝恩表文。覽其所奏。情詞極為恭順。深堪嘉悅。至該國王表內所稱。咸豐二年專差呈進例貢途中正值軍務。噶箕人等曾受苦累等語。亦係實在情形。著俟同治六年應屆進貢之期。由駐藏大臣酌

度情形。先期奏聞。再降諭旨。將此各諭令知之。○以才能出眾。賞湖北知府黃昌輔。周樂花翎。黃昌輔暨鍾謙鈞均加鹽運使銜。○以湖北克復孝感等縣出力。賞副將蕭恆勝。參將曾紹霖。委參領吉凌阿。巴圖魯名號。參將佛爾國春等花翎。府經歷張開鎬等藍翎。餘加銜升敘有差。○以湖北紳團克復麻城等縣出力。賞在籍員外郎銜主事李廷蕭等花翎。同知孫福海等藍翎。餘加銜升敘有差。○以四川克復太平縣城。暨鶴遊坪。勦匪出力。賞遊擊章普堂等花翎。知縣黃鼎等藍翎。餘加銜升敘有差。○予四川援陝陣亡總兵官賀蘭桂等十一員祭葬世職加等。○予陝西南鄭殉難知縣周蕃壽祭葬世職加等。略陽陣亡知縣劉希寬祭葬世職。○丁亥。以神靈顯應。加江蘇太倉州城隍神封號曰昭佑。○諭內閣。御史劉毓楠奏請崇尚節儉。屏絕浮華等語。現屆國服期滿。一切尋常典禮。

照舊舉行。即如梨園演戲歌詠昇平。所以宣上德而體下情。本為例所不禁。惟值逆氛肆擾。兆姓流離。國用不充。元氣未復。正君臣交儆之時。豈上下恬熙之日。我兩宮

皇太后痛念

山陵未安。民生未奠。孜孜求治。宵旰不遑。所有內廷供奉。業已隨時酌減。爾內外大小臣工。各有職守。宜體此意。及時振作。共濟艱難。於一切應辦公事。矢慎矢勤。至如飲食宴會等事。概宜力求節儉。毋蹈奢靡之習。競尚聲華。毋貪耳目之娛。自忘職業。用副朝廷崇實黜浮。無敢戲豫之至意。○又諭前因御史奎英奏。內火器營冊報官員支領餉銀數目。查與額缺不符。開報烏槍護軍校等應領應放各款。亦多含混。當經降旨。令管理火器營王大臣查明具奏。茲據奏稱。烏槍護軍校希林泰等。係由正黃正白兩旗人員。借補鑲黃鑲紅兩旗之缺。其糧餉例由正黃正白等旗支領。

是以兩旗冊內各多護軍校一員。迨查鑲黃鑲紅各旗缺額錢糧數目統算均屬符合。並未逾額。至糧餉庫銀添裁清冊。向由各都統衙門冊報戶部。由火器營派員赴部投對支領。每月將領過銀數造報都察院江南道戶部等衙門。以備稽查。並無冊報查營御史成案。惟奎英所奏。因詳慎錢糧起見。請飭嗣後會同覈對等語。烏槍護軍校缺額既屬相符。卽非營員舞弊。浮冒開支。該御史所奏著毋庸議。至添造餉冊。既與舊章兩歧。而支領錢糧理應慎重。嗣後火器營於應領餉銀時。著俟戶部印領到營。卽知照查營御史訂期來營。會同營員覈對一次。以慎度支而歸簡易。

○又諭張之萬奏。部駁未經捐免歷俸之調補安陽縣知縣金寶符。經該撫查明該員歷俸業經捐免。奏請仍准調補。復接吏部咨稱查據戶部聲覆河南捐輸案內。並無該員報捐案據。礙難覈准。查該員捐免歷俸銀兩。本

年四月閒上兗咨部有案。請仍以該員調補等語。河南安陽縣知縣著仍准其以上蔡縣知縣金寶符調補。至金寶符捐免歷俸。已經咨部有案。何以數月之久。戶部並未行知吏部。輒以案據未到等詞咨覆。難保非吏部書吏與戶部書吏串通舞弊。積壓文卷。捏詞挑剔。展轉耽延。冀遂其索詐之計。亟應嚴切根究。著該部堂官督飭各該司員等。確實查明。從嚴懲辦。○諭議政王軍機大臣等。步軍統

領衙門奏。據奉天昌圖廳文童楊華貴等。以逸匪聚眾搶掠財物。殺害居民。蠹役夥盜分贓等詞。赴該衙門呈訴。朝陽逸匪白凌阿。才寶善等。前經官軍擊散。後疊飭盛京將軍。熱河都統等飭屬擒捕。雖據該將軍等奏稱屢獲匪犯多名。而首匪總未弋獲。現據楊華貴等呈稱。才寶善白凌阿等竄擾昌圖廳屬之榆樹臺等處。聚集賊盜多名。強搶五十餘社財物。共有二十餘家。並賄通官役于鳳等。夥

謀讎殺練勇多名。兩廳官長不為申理等語。此項賊匪盤踞昌圖廳境內。強搶殺害。實為地方巨患。而該廳並不究辦。復有聽從書役門丁賄屬蒙蔽。免究釋放情事。如果屬實。殊出情理之外。著玉明麒慶和潤德椿按照呈內所控各節。嚴飭所屬秉公查詢。一面遴派弁兵。將首要各犯悉數拏獲。盡法懲治。以息盜風。而安良善。至官役受賄通賊。尤為法所不宥。並著將單內所指兩廳猾蠹王靜安等

各名嚴行提審。毋稍輕縱。原呈二件。清單一件。均著鈔給玉明等閱看。將此各諭令知之。○又諭都興阿奏。水師拏獲洪逆親族解營。訊明正法。並諫壁等處勦賊情形。及懲辦廣勇逞兇人犯各摺片。總兵吳全美總統水師戰功屢著。此次復能留心訪察。緝獲渠逆親族。甚屬可嘉。即著都興阿飭令吳全美督飭在事員弁。迅將在逃之偽職曾超等悉數弋獲。盡法懲辦。毋令漏網。諫壁地處上游。素為

該逆垂涎。此次逆黨數千。聲稱投誠。旋即分撲江濱。意圖一逞。其計甚狡。現在撲營之賊。雖經都司吳連陞等奮勇迎擊。立時潰散。而逆蹤出沒無常。難保不再來窺伺。著都興阿飭令沿江水師。嚴加防範。馮子材魁玉等督飭陸路兵勇。隨時會同水師。實力防勦。毋稍疏虞。廣幫練局。與直隸新募勇丁。口角細故。膽敢糾眾放槍。實屬兇橫。都興阿現將滋事之陳阿齊張阿三等。正法梟示。藉儆兇頑。辦理甚屬認真。至設立練局。向係土著良民。互相保衛。此項廣幫名目。究竟始於何時。著都興阿知照吳棠及喬松年。剴飭該地方官妥為查辦。如該總局不過虛應故事。無益有害。即著趕緊裁撤。將廣勇設法遣散。遞回原籍。以靖地方。而安良善。將此由五百里各諭令知之。○又諭富明阿奏。到蒙籌勦情形。並請飭令翁同書來皖戴罪立功。歷陳淮蒙諸軍缺少鉛丸火藥各摺片。富明阿於抵蒙後親

督馬步各隊由渦河兩岸直逼賊營。該營濠深壘固。復以礮船護守浮橋。急切頗難得手。詹啟綸現在河南搶築七營。王萬清在河北搶築四營。英翰等督帶馬隊進攻蔡家圩一帶。截賊糧運。以牽賊勢。似此南北兩岸官軍漸逼漸緊。不難次第掃蕩。直抵蒙城。著該將軍迅即督同陳國瑞嚴飭各軍鼓勇前進。將城外賊壘設法鏟除。其浮橋一道最關緊要。務當激勵各營將領將開花礮擇要轟擊。密派軍士乘勢搶取。以期直達蒙城。則該逆自必解圍遁竄。城內情形危急。盼糧甚殷。實屬刻不容緩。富明阿擬將小澗集雜糧及屯營米石戴入礮船。乘風運送。自應如此辦理。但必須奪回浮橋。方無阻隔。所稱如浮橋一時不能即得。擬暗開地道設法運濟之處。能否確有把握。仍著富明阿審度情形斟酌妥辦。翁同書前因駕馭苗逆失宜。又未能固守壽州。致該逆得肆猖獗。獲咎甚重。即到營亦斷

不能得力。所請令該革員來皖効力之處。著不准行。該將軍如欲招致附苗各圩。自可咨會唐訓方。委派馬新貽妥為安撫化導。該藩司在皖北有年。熟悉地方情形。皖北紳民諒無不樂為之用也。李世忠尚能解運蒙城糧石。足見其心尚無他。該將軍可隨時相機籠絡。俾知奮勉立功。英翰一軍鉛丸火藥一概無存。豈不貽誤攻剿。雖經該將軍撥濟。仍著飛咨唐訓方源源撥解。毋令缺乏。並著查明貽誤情形隨時具奏。將此由六百里諭令知之。○又諭福陞奏滇餉無從商辦。請派大員統率並豫籌軍餉。請整頓銅廠鹽井各摺片。據稱雲南軍務緊急。勞崇光現駐黔省。往返咨商動輒數月。賈洪詔尚無入川確信。曾商之駱秉章籌餉赴昭。乃因川省需用浩繁。坐候兩月。無款可籌。瀘局捐項全被張亮基提撥。請揀派親信大員赴滇督辦。在各省酌量籌撥軍餉。運赴昭通接濟。又查滇省向有銅

鉛各廠。暨白黑琅等處鹽井。如官為辦理。每歲可得銀數萬兩。銅鉛各廠。如能認真攻採。可期豐旺。用以配搭鑄錢。亦可得數萬兩。但非先籌餉數十萬。不足以為進攻戰守。及採辦銅鉛各廠之資。若銅鑛果旺。可由昭通運川。仍在瀘局鼓鑄。變易銀兩。至於鹽務。遴派熟悉井地之員。認真整頓。再委武弁常川防守。以免再擾。從此可專力進征。勦撫兼用。各等語。所籌不為無見。著駱秉章勞崇光按照該提督所奏。酌度興辦。以裕餉源。至採辦銅鉛各廠。需費甚多。能否由川省先行提撥若干。此後滇省以銅鉛運川。在瀘局鼓鑄。即可陸續歸償。於川省亦無所損。其鹽井應如何派員整頓之處。並著駱秉章妥籌辦理。賈洪詔疊經諭令赴川。與駱秉章會商滇省軍務。何以此時尚無到川消息。現在行抵何處。著卽趙程前進。抵川後。將福陞所陳各節。與駱秉章籌議辦法。仍遵前旨。迅駐昭通。不准任

意耽延。致負委任。福陞以滇事為己任。力籌辦法。甚屬可嘉。著卽設法先赴昭通。妥籌勦辦。將此由六百里各諭令知之。○以鑲白旗蒙古副都統福鈴暫署正藍旗滿洲副都統。○以捐備馬匹。賞車臣汗扎薩克頭等台吉明珠爾多爾濟貝子銜。世襲罔替。○以安徽同亭勦擒獲勝。賞佐領壽昌巴圖魯名號。副都統克蒙額等升敘有差。○戊子月食。○上以三年服闋。遣惇親王奕誼詣隆福寺。

文宗顯皇帝暫安寢殿。恭代致祭。行釋服禮。○

上奉

慈安皇太后

慈禧皇太后詣

文宗顯皇帝聖容前。供奠。釋服。○

上詣景山

關帝廟拈香。○詣

奉先殿行禮。○諭議政王軍機大臣等。據張凱嵩奏。越南國王阮福時。因奉到

文宗顯皇帝遺詔。擬請遣使恭進香禮。又齋遞表文方物。慶賀登極等語。越南國備列藩封。虔修職貢。今該王阮福時。以接奉

遺詔。欲遣使臣遠來進香。自係出於至誠。惟是文宗顯皇帝梓宮。已於上年九月內奉移

山陵。該國王遣使進香。已在奉移之後。不及恭薦。著張凱嵩卽行知該國王。令其不必遣使遠來進香。其慶賀登極方物。亦無庸呈進。以示懷柔。藩服至意。將此諭令知之。○又諭閭

敬銘奏續獲賊目。餘匪殲除殆盡。籌辦善後。及酌留各營。擇要布置各一摺。據奏賊目劉厚得。張逢海。在陽穀縣之劉家樓潛藏。當經派弁帶勇擒獲。並將賊目程敬書於館陶縣地方拏獲。盡法處死。惟首逆宋景詩仍未就獲。元兇漏刃。棄眾潛逃。如果各該地方文武官紳嚴密兜拏。何難及早擒獲。閭敬銘前奏於宋逆翻山逃遁。卽稱東阿知縣吳樹聲等跟蹤追捕。嗣後作何究竟。豈得任聽該地方

官吏等妄行捏稟。毫無實際。宋景詩一犯著

閭敬銘懍遵疊奉諭旨。嚴督所屬迅速拏獲。務獲。斷不准任令免脫。致干咎戾。劉長佑亦卽嚴飭直省毗連各屬。一體拏拏毋稍鬆勁。東省防兵。該撫於定安保德兩軍外。酌留丁寶楨等營。分紮東昌屬境。都司馬春嶠一營。駐紮武定。守備郭大勝一營。駐紮德州平原等境。來往梭巡。所籌均妥。直東連界各屬。尚多騎馬賊匪。出沒肆擾。著劉長佑閭敬銘各飭兩省帶兵文武實力同緝。以靖地方。曹單一路。不可空虛。閭敬銘所留東治六營。扼要設防。並於綠營選練馬兵一營。以備防剿。均照所擬辦理。但須切實講求訓練。以歸實用。毋得徒託空言。虛糜餉項。自負委任。其餘勇丁。均卽全行遣散。陳貫甲懇求暫歸。安頓團眾。尚無反側情形。仍著閭敬銘遵照前旨。隨時察看。妥為安插。將此由六百里各諭令知之。○乙丑諭內閣。恩麟奏恭規避邊防要務

擅離職守。抗不回任之同知。請旨從嚴懲處。一摺。保升知府甘肅循化同知陳秉彝。於本年二月間。無故擅自晉省。經該護督以循化防堵緊要。飭令卽日赴任。輒敢藉詞道梗。屢在省外途次。潛行逗遛。延宕兩月之久。顯係膜視邊防。意存規避。居心巧詐。可惡已極。若不從嚴懲辦。無以肅吏治而儆效尤。恩麟僅請將該員革職。永不敘用。不足蔽辜。陳秉彝著卽行革職。永不敘用。並從重發往軍臺效力贖罪。以為規避取巧者戒。○又諭恩麟奏邊疆道缺需員。將應調應補人員。開單請簡。並請飭簡補之員。迅赴新任。一摺。甘肅鎮迪道員缺。著以應調之蘭州道文麟調補。西甯道員缺。著以應補之開復道員崇保補授。並著恩麟分飭該員等。迅卽赴任。以重職守。前任西甯道英綬。既經因病開缺。病痊後著該部照例辦理。恩麟所請將來仍發甘肅委用之處。著毋庸議。○諭議政王軍機大臣等。張

之萬泰。僧格林沁由汴赴援蒙城。張總愚股匪南竄。派兵追勦。並程二老坎股匪由楚回豫。欲歸皖巢。飭令各軍迎擊等摺。片。所稱僧格林沁統兵至汴。與張之萬同赴許防。已於初十日黎明拔隊。取道鄆陵扶溝。由陳宋各境馳赴亳州。進援蒙城。殊慰廑念。蒙城危殆已極。陳國瑞進攻賊壘。不能得手。富明阿到後。所擬設法運濟蒙邑城內糧餉。及斷賊糧道之處。均不知有無把握。僧格林沁現已由汴赴亳。著卽迅速赴援。以期立解蒙圍。其陳國瑞等軍。應作如何調度攻勦。諒該大臣必有成竹在胸。苗逆知該大臣大軍到來。亦必震懾軍威。但苗逆拌力死守。且詭詐百出。工於用計。僧格林沁督軍進勦。務當加意嚴防。妥籌進止。以策萬全。並著富明阿。唐訓方。俟僧格林沁到蒙。苗逆畏懼之時。卽酌量分兵。攻其要害老巢。及解散被脅從逆各圩。使兵力不聚於一路。令其面面受敵。不能被擊旁

竄方為妥善。富明阿、唐訓方等前奏招撫練董田端書等圖攻下蔡。此時苗逆畏懼。或回匿下蔡及懷遠等處。或調其死黨來蒙。併力死拒。均未可知。觀釁路瑕。惟在該將軍巡撫等隨時相機。以期得手。張總愚股匪懾於僧格林沁兵威。自遁魯山南。召以後節節遁由山僻小路。經張曜等沿路追擊。現復遁入鄧州境地。距老河口甚近。即著張之萬督飭張曜跟蹤追躡。如寇蹤入楚。即令踰境會合楚師盡力夾擊。以期就地殲除。官文嚴樹森亦即飭令鄂省官軍迎頭截擊。毋令此股匪徒得以竄擾老河口等處。肆行飽掠。其程二老坎等股匪現由楚境復竄光羅。總兵李殿元會合兵團疊加勦擊。勢將竄由光息遁回皖巢。即著張之萬嚴督該總兵與王文行等軍乘賊情歸奮力痛勦。毋稍鬆懈。僧格林沁取道歸陳。其兩郡防勦各軍應令如何嚴密布置。並著隨時妥籌具奏。程二老坎等股如回

毫巢。恐將又為苗逆羽翼。亦須及時先為掃除。以孤賊勢。張之萬遵將黑龍江餘丁五百察哈爾馬一千匹留豫。該省得此騎兵自足以資馳驟。第須認真操演。俾成勁旅。僧格林沁抵毫後。即派老成騎將赴張之萬軍營。俾資教練。該撫仍當督飭善慶等善為管帶。以資得力。將此由六百里各諭令知之。○又諭多隆阿奏派兵援商。山陽失陷。現飭由商州進克山陽。及督率各軍分勦五鳳山等處賊巢。各等語。李雲麟係專辦陝南軍務之員。現在山陽甫經接仗。即行失利。退紮高壩店。被匪闖入縣城。並未見該京堂奏報。著李雲麟據實奏聞。多隆阿現派營官藍斯明管帶四營馳往援應。著多隆阿即飭該營官由商州進兵。將山陽縣城迅圖克復。鳳翔回逆被勦。竄至岐山縣之南原橫水等處。難保不乘隙東竄。亟應分兵扼勦。並著多隆阿飭令派出之營官蕭何清所部會合金順、溫德勒克西

等馬隊迅速援勦。以圖聚殲。昨據熙麟奏。西安敗匪紛竄崇信之神浴河平涼之白水鎮等處。請飭雷正綰星速赴援等語。此時邠州一帶賊巢尚眾。雷正綰援甘之師尚多阻滯。著多隆阿懷遵前旨。飛催該提督節節掃蕩。趕緊前進。並催令陶茂林一俟鳳翔蕞事。迅速督隊赴甘。毋稍遲滯。多隆阿現已進軍醴泉。即著飭令派出各軍。分投進勦。俾陝省及早多清。可以專意勦辦甘肅回匪。熙麟前派辦團之軍功馮元佐。赴富平同官招募團勇。行抵底店地方。因與該團目程景鵬口角。被勇眾格殺身死。馮元佐與該團目究竟因何啟釁。並應如何將該團目懲辦之處。均未據該大臣詳細聲敘。著多隆阿張集馨會同熙麟查明辦理。據實奏聞。至馮元佐所募勇眾。既據多隆阿奏稱宜君一帶已無賊蹤。即著多隆阿飭令該州縣妥為遣散。以免別滋事端。正在寄諭間。據張集馨奏稱周有全統帶

礮船會同漢陰廳金鑑所捐礮船石泉甯陝團勇於九月二十三等日攻克茶鎮一摺。其詳細情形著劉蓉覆查據實具奏。所有礮船團勇應如何分撥布置之處。並著劉蓉妥為調度。漢郡西北褒沔留鳳等屬甚屬空虛。沔縣竄匪賴剝皮現與曹背時敗匪合股竄擾鳳縣方石鋪。又竄至兩當縣陝甘交界處所滋擾著劉蓉速撥勁旅分路掃蕩。妥籌兼顧。並著熙麟於陝甘交界處所派兵堵剿會合陝軍兩面進攻。以收夾擊之效。留壩被攻勢甚危急。著多隆阿懷遵前旨。抽撥兵勇前往駐紮。以遏賊竄之路。陝省各屬民團並著張集馨隨時鼓舞。俾資得力。將此由六百里諭知多隆阿熙麟劉蓉李雲麟。並傳諭張集馨知之。又諭郭嵩燾奏到任後體察各路情形等語。前據毛鴻賓奏廣東信宜逆首陳金缸為其黨鄭金劉超所誅。約期獻城。當經寄諭毛鴻賓等以官軍尚未入城。崑壽所部各

軍未可遽撤。鄭金劉超在賊中。內訌將陳金缸殺斃。獻城歸正。是否結實可靠。令該督撫等妥籌辦理。不可大意。茲據郭嵩燾所奏。賊之精銳。屯聚東岸大井兩處。亦經次第就撫。是信宜縣城自可剋期收復。惟賊情狡悍。鄭金劉超均為陳逆部下著名爪牙。此時該逆內訌自相殘殺。殊難恃為投誠確據。儻或敷衍了事。該逆未受懲創。名為就撫。實則陰蓄異謀。一經起事。又成燎原之勢。毛鴻賓郭嵩

燾。崑壽仍當乘軍情得手之際。懾以兵威。勦撫兼施。務使地方餘黨不至再萌反側。斷不可急於招撫。草率圖功。該署撫擬於撫局大定後。以一軍由信宜進勦廣西之容縣。以一軍馳赴陽春新甯。勦辦客匪。屆時即著飭令帶兵員弁。與粵西官軍會合夾擊。將范亞音李木火諸股實力勦除。以彰捷伐。肇屬土客仇釁甚深。現在廣海寨城雖經收復。餘匪自當一律蕩除。惟土客之案。勢不能盡數勦洗。

總須辦理得宜。一勞永逸。不使該匪肆行固結。亦不至事後再啟釁端。方為妥善。該督等惟當乘信宜歲事事機正順之時。體察情形。妥籌勦撫。毋貽後患。將此由五百里各諭令知之。○以陝西漢中攻克茶鎮要隘。予知府周有全等加銜升敘有差。○准候選府經歷繡綸。赴欽差大臣曾國藩江南軍營投效。○庚寅諭議政王軍機大臣等有人奏。西山附近一帶。搶刦之案。層見疊出。賊匪多屬回民。

膽敢自通姓名住址。被搶民人。因報官後並未緝獲。私聚多人。稟官約同練眾。欲自往擒拏賊。恐釀成仇殺。巨案等語。京畿重地。回匪膽敢肆行刦奪。並自通姓名住址。勒贖牲畜。實屬目無法紀。該管地方官。並不設法捕拏。以致該處居民聚集多人。私往掩捕。雖地方官暫行阻止。而盜風日熾。民累日深。設好事愚民煽惑糾合。鉅險械鬪。必至釀為仇殺巨案。亟宜趕緊緝拏。以除奸匪而消隱患。著

步軍統領衙門都察院五城御史遠派弁役訪確巢穴分投購緝密逮捕拏盡法懲治並著萬青黎卞寶第劉長佑各飭所屬該管地方文武員弁不分畛域一體兜擒毋任漏網儻該弁兵緝捕不力該地方官諱匿粉飾卽著嚴叅究辦不得姑容原摺均著鈔給閱看將此各諭令知之○又諭唐訓方奏督軍進抄蚌埠賊壘水陸接仗情形並請飭善慶統帶馬隊來臨各摺片唐訓方督率水陸各軍滾營前進攻剿蚌埠賊營以冀牽制圍蒙賊勢惟接仗數次僅平一壘而賊於兩岸俱釘巨椿誓死抵拒我兵猛力進攻徒傷精銳唐訓方現擬設法包抄斷其糧道惟宋慶一軍業經撥給陳國瑞調遣克蒙額馬隊又經富明阿帶領赴蒙兵分力單該撫請仍令善慶統帶留豫馬隊來臨助剿亦是實在情形僧格林沁辦理皖豫兩省軍務自能妥籌兼顧該大臣現已馳赴蒙亳著卽酌度情形如豫

省軍務稍鬆卽將此項馬隊調赴臨淮以資衝擊抑或由該大臣酌撥馬隊助剿之處均著妥籌辦理唐訓方當就現有兵力速籌包抄賊眾之計仍隨時返顧務策萬全唐訓方已抵蚌埠援蒙之師後路聲勢更壯著富明阿懷遵疊次寄諭督同陳國瑞設法救援蒙城毋稍遲誤李世忠督兵攻克柏家圩將苗眾悉數殲除附近民圩反正者百有餘處勦辦出力甚屬可嘉著僧格林沁等因勢利導傳諭李世忠乘勝進兵迅攻壽州等處賊巢以分賊勢將此由六百里各諭令知之○又諭左宗棠奏官軍進攻杭州兼圍餘杭疊獲勝仗現籌辦理情形一摺蔣益澧所部直擣杭州連破城外卡壘偪紮鳳山清波兩門魏喻義等攻餘杭縣城亦連破賊卡奪據寶塔山文昌閣險隘現在杭州餘杭逆首以鄧洸明汪海洋為最而陳炳文次之其逆謀以杭州為老巢以餘杭為犄角均盼嘉興湖州之

援嘉湖來杭之路。必由餘杭。自應先將餘杭攻克。遏賊來路。以期合圍杭省。餘杭險要。已得不難收破竹之效。著卽飭令魏喻義等迅圖攻拔。湖州援杭之賊。由武康一路而來。左宗棠卽飭蔣益澧等實力痛勦。毋任句合。現在嘉湖之賊。均併力趨援杭郡。李鴻章前有派兵攻嘉善之奏。若由嘉善平湖以攻嘉興。以太湖水師襲湖州。為攻瑕擣虛之計。必可得手。卽不能攻克。亦可牽制該逆。使不得併力於杭州。則蔣益澧等可以一鼓攻克二城。便可規取嘉湖。節節掃蕩。該撫卽相機督勦。以分賊勢。另摺奏。劉典等軍。截勦皖南賊匪。疊獲勝仗。訊據生擒賊供。逆目偽金王。偽平東王。偽黃天將等。欲由徽州竄過江西。如不能竄過。卽由昌化入浙。劉典現已移軍徽城。與唐義訓分勦橫村口等處賊匪。該逆遁歸旌德。現在曾國藩檄鮑超一軍由蕪湖進兵。埤南陵涇縣等處。檄江忠義等由青陽池州

進兵。攻石埭太平旌德等處。左宗棠擬俟嶺外肅清。皖軍攻廣德建平。扼東壩。浙軍卽由昌化於潛孝豐臨安各路。以規湖州。兩路聲勢聯絡。遙合長圍。漸逼漸緊。東南大局。自可日有起色。著曾國藩卽飭鮑超等軍。實力進攻。務將皖南各城。一律肅清。不得任令回竄。江西並會合浙軍。力圖攻勦廣德等處。徽防緊要。左宗棠飭劉典等妥籌防勦。不可稍為疏失。又片奏。王文瑞請假省母等語。王文瑞係實缺道員。此時軍務緊要。准其歸省。已屬格外推恩。著左宗棠卽飭該道趕緊回營。以資得力。將此由六百里各諭令知之。○改丁憂浙江按察使劉典為署任。仍帶兵勦賊。○以安徽蒙城守城出力。賞都司李德勝黃秉忠。已圖魯名號。知縣賀緒蕃。以同知直隸州知州用。並賞花翎。餘加銜升敘有差。○予浙江杭州等處陣亡參將朱連彪等祭葬世職加等。○辛卯諭內閣。前因李棠階奏稱福建

已。半參將奉旨發往新疆之蔡潤澤。該督不應以軍營乏人。奏請暫緩發遣。當經降旨。將該革員仍發往新疆。効力贖罪。茲據徐宗幹奏稱。該革員前因赴防江山。延未到防。經前任總督慶端奏參革職。奉旨發遣。惟查彼時委係前赴防所。因前署浙江藩司李元度駐紮江山縣城。恐賊竄入閩界。移知該革員無庸赴江。即在浙閩交界之峽口地方駐紮。曾經報明在案。並非無故違延。慶端前次奏請暫緩發遣時。未將遲延有因。詳細聲敘。且該革員扼紮峽口。堵剿賊匪。不無戰功可錄。請仍暫緩發遣。留營勦匪等語。已革參將蔡潤澤。既據該撫奏稱。係水師出色之員。即著暫緩發遣。留營効力。如再不知愧奮。著仍遵前旨。即行發遣。不准藉詞延宕。徐宗幹既查知蔡潤澤延未到防。事屬有因。何以事閱年餘。始行具奏。殊屬遲緩。著傳旨申飭。○又諭。徐宗幹奏。請將留閩差委各員。分別回任開缺。

等語。浙江杭州府東防同知孫欽。若既據徐宗幹稱。其稽覈省城各局。尚屬可靠。著准其暫留福建數月。將經手事件辦竣。仍著飭令迅回浙江本任。不准久延。浙江鎮海縣知縣桑樹勳。係實缺人員。若因經理軍務。率請開缺。既與定例不符。即以軍務而論。浙江省城未復。郡縣半多淪陷。福建惟臺灣匪徒尚未勦滅。其輕重情形。亦豈可相提並論。桑樹勳著仍令迅赴鎮海縣本任。該撫所請開缺。破格錄用之處。著不准行。至所請浙江候補知府甘炳。遇有閩浙兩省缺出補用。江蘇候補直隸州知州邵燮元。改歸福建補用。候選主事周懋琦。赴京分部學習之處。均與定章不符。著毋庸議。○諭。議政王軍機大臣等。御史華祝三奏。撫臣引疾。假期將滿。請令照舊供職一摺。據稱沈葆楨年甫四十有餘。其病非難速痊。所以力求引退者。特以協餉用人兩端。與曾國藩意見不合。而營員乘間伺隙。飾

非亂是是以沈葆楨知難而退現在該撫假期將滿諭令毋庸固辭並令該二員遇事熟商卽意見偶歧不妨各據一是請旨施行等語沈葆楨與曾國藩意見不合朝廷早有所聞此奏不為無因曾國藩辦理東南軍務需餉孔急而沈葆楨值地方彫敝之餘心存撫字或致蠲緩多而協餉未能如數至用人一項沈葆楨為地方大吏甄刻不得不嚴而曾國藩因軍營需才葑菲無棄亦恐有耳目難

周之弊該御史所稱此輩一經得志顛倒是非任意播弄亦所不免在該大臣等事屬有因初非自便其私惟天下事往往以小嫌而誤大局不可不思曾國藩沈葆楨皆賢能卓著公忠體國之臣如果尚有畛域未化各懷意見東南民生何日可冀朝廷尚安望二臣之共濟艱難耶經此次訓諭之後沈葆楨與曾國藩軍營協餉苟可設法卽當盡力籌措並著該撫於假滿後卽行銷假任事毋稍耽

延曾國藩於沈葆楨曾經甄劾前來投效之員亦當留意屏斥裁汰毋開小人幸進之門彼此函商共歸一是以古人廉頗藺相如寇恂賈復為法同心共事毋貽朝廷南顧之憂以全終始而保令名於二臣有厚望焉原摺均著鈔給閱看將此各諭令知之○又諭徐宗幹奏署陸路提督林文察現在署理水師提督應否飭令兼署請旨遵行一摺據稱閩省水陸兩提督未便並駐海外林文察前經

奏署陸路提督據報帶印東渡曾元福病已痊愈業赴嘉義接印可否改派曾元福接護陸路提督或仍令護理水師提篆等語林文察既已攜帶陸路提督印信赴臺卽著毋庸兼署水師提督臺灣軍務如林文察一人可以辦竣而曾元福才具尚堪勝任所有水師提督一缺卽著左宗棠等飭令曾元福內渡奏請接護僅曾元福必須留臺助勦卽著將水師提督印信送回內地由左宗棠等遴派

妥員奏請接署。以免偏重之虞。徐宗幹另摺奏查訊革員石棟大略供情。並據片稱。知府黃貽檀。訊無與石棟朋比勒索情事。各等語。石棟以提鎮大員。開設行店。與民爭利。其貪鄙已可概見。且其納賄營求一節。已由鈔出信札。查有確據。而該革員所供。仍復不實。不盡實屬狡猾。著徐宗幹催提已革遊擊石渠。並嚴飭李緯俞清音李松三到案。嚴行審訊。務令水落石出。從重懲辦。以儆官邪。至黃貽檀一員。如果實有情弊。豈能以捐輸軍餉。稍從寬貸。此時案證未齊。卽官紳等代為剖析。並無與石棟朋比勒索情事。亦難遽信。著於全案奏結時。再行請旨辦理。將此由四百里各諭令知之。○壬辰。諭議政王軍機大臣等。劉長佑奏。遵籌直隸抽練營兵。酌募勇丁。以重畿輔一摺。軍興以來。各省募勇勦賊。實因兵力不敷。一時權宜之計。而楚省勇丁。尤所向有功。直省前因勦賊喫緊。特將該督調任

畿輔。並節經諭令該督催調所募楚軍前來。以資應用。固以楚軍所至勦賊尚能得力。亦體該督廉頗用趙之意。必使其兵將相習。以盡所長。而速就功。若地方業經平靖。為畿輔屏藩。議立久遠之法。則改設營鎮。因地制宜。仍當一切俱從標兵規制。方為妥善。不惟盡用楚勇。南北風土不能相習。日久非宜。卽就地招募成軍。一切俱用勇營制度。亦恐諸多窒礙。直省現在雖已肅清。恐各屬地方伏莽尚多。豫捻陝回。亦須備豫。鎮遏劉長佑新募南來楚勇。自不能不酌留數營。以資調度。隨時防勦之用。俟直省營伍整飭之後。楚軍遠戍。久而思歸。卽可隨時陸續量為遣撤。若以選募新軍計及久遠。仍當就地取材。五方氣類。各有所宜。地勢人情。亦皆各有所習。燕趙民俗。古稱雄勁。果有善於用兵之人。加以簡練。詎乏可用之才。從來善用兵者。尤須所至之地。皆能善用其民。轉移強弱。乃為其用不

窮該督前奏軍制分數摺內所稱欲以南省營制教練北省之兵最為善策惟直省營伍廢弛已久本地練勇積弊更多此時就地選募新軍亦必須留楚省將弁以資教演該督此次奏稱增練精勇或募楚軍或即本省挑選原無成見即所稱以書生團練殺賊親黨鄰里所與立功不能不酌用楚軍亦屬實情朝廷破格用才惟恐倚任不專以資宏濟但茲事體重大總期如何有益如何經久無弊

方為盡善劉長佑仍當精思熟計以圖萬全治法无在得人並隨時隨地留意人材俾得相與有成期於有備無患至所稱再於燒鍋棉花等項以及天津獲鹿商賈輻湊各口岸試辦釐捐之處各省釐捐係屬萬不得已之舉南北省分地方情形各有不同畿輔捐釐向來未經試辦恐一經舉行所獲無幾而流弊繁興怨咨頻起有傷元氣不可不加慎重天津一處係屬向有釐捐該處商賈較多其

應如何抽收之處即著會同崇厚妥籌辦理將此諭令知之○又諭前因侍郎薛煥奏請飭直隸練兵四萬各直省分籌固本軍餉酌量數目奏明辦理當經寄諭該督撫等酌籌撥濟嗣據毛鴻賓奏直隸添兵籌餉窒礙情形復經諭知劉長佑就地方情形妥籌定議茲據劉長佑奏遵籌全局擬請抽練營兵酌募勇丁以重畿輔惟以此項軍餉責成十八省不獨瘡痍省分自顧不遑即完善之區亦

各日形支絀與其多派而徒有其名不如少派以期覈實擬於廣東釐捐項下每月提銀一萬兩江蘇江西福建兩湖山東山西四川河南各省每月提銀各五千兩其餘各省應免籌濟並將該督到任時指撥各省協餉一概停止等語所籌尚屬妥協直隸屏衛京畿現在宋景詩全股殲除正宜乘此休暇整頓營伍以重畿輔藩籬所有添設營鎮增補新軍需餉尤為緊要著各該督撫等按照所奏

按月如數籌撥卽與京餉搭解部庫以便由部撥解直隸省以應要需而資拱衛如有遲延卽照貽誤京餉律議處該督撫等務當迅速籌撥毋稍遲誤自千罪戾將此由五百里各諭令知之○又諭多隆阿奏鳳邠各路連日獲勝及漢南髮逆竄陷盤屋各摺片陶茂林一軍自解鳳翔圍後復將府東賊巢一律掃蕩八旗屯各處窩洞零匪亦經搜殺無遺餘賊向汧陽老崖一帶奔竄其竄至岐山另

股回匪復經蕭河清等漸次勦滅是陶茂林一軍正可乘勝將汧隴餘逆一鼓蕩平馳赴甘省著多隆阿卽行飭遵毋稍延滯雷正綰現克拜家河老巢擬進攻永壽東路賊巢俟永境肅清移營前進現在甘省望援甚急西安敗匪復紛竄崇信平涼等處勢且與甘肅回匪聯成一片該大臣務當懍遵疊次寄諭飭令雷正綰一軍迅速掃蕩而前赴甘助勦毋得節節阻滯致誤師行並飛檄曹克忠進

攻白吉原之軍迅克堅巢以便雷正綰赴甘之師通行無滯漢南髮逆由佛坪一路竄出新口峪攻陷盤屋縣城該處距省較近設被該逆久踞為患滋深且恐漢南各逆陸續上犯勾結回匪則邠乾各路官兵又須回顧雷正綰陶茂林赴甘之師或轉因此阻滯貽誤非輕多隆阿現檄穆圖善姜玉順兩軍會同溫德勒克西馬隊力圖恢復並卽日親督各營由興平一路前往督勦實為目前要著卽

著該大臣迅速進兵收復縣城盡殲醜類使興漢諸逆不敢再行上竄與回匪勾結鴟張方為妥善此次髮逆假冒官兵由南山出竄何以始終未據各路稟報著該大臣卽行查明奏奏前諭劉蓉就現有兵力或進紮青石關或由甯羌進規褒沔並令李雲麟馳紮興安與劉蓉分路進勦以牽賊勢現在逆氛紛竄山陽盤屋等處四出蔓延希圖分我兵力致令兼顧不遑賊情殊狡劉蓉等務當懍遵

前次諭旨迅圖進兵使該逆有所顧忌不至紛竄為患則山陽等處之賊自可次第鏟平而多隆阿大軍亦可分兵進剿漢南與劉蓉等共收夾擊之效。整屋離省不遠所有省垣防剿機宜著張集馨會同德興阿妥為布置毋稍疏虞。西安駐防營務廢弛亟應隨時整頓。多隆阿現已督軍在外所有西安將軍印務即著暫交德興阿就近兼署以重旗務。將此由六百里諭知多隆阿德興阿劉蓉李雲

麟並傳諭張集馨知之。又諭常清奏西南路夷匪驅逐出卡並防堵情形暨派員馳赴塔爾巴哈台各摺明緒等奏遵諭籌辦邊務一摺。俄夷在伊犁卡內沙爾雅斯地方多方誘敵我兵未為所誘併力驅逐該夷退敗仍在卡外盤踞並有布魯特薩爾坦伯克在山內為之謀主著常清即飭領隊巴哈善等相機防範毋稍疏忽該國頭人在各營遞字聲稱該國王已將此項滋事之人叫回治罪。意

欲求和已明知釁由己起乃越日所遞之字又復強橫反覆且暗寄私信與良善之哈薩克布魯特等勸其不可內附實屬詭譎異常。常清慮該夷假充商人乘虛內犯不肯將兵勇撤退仍飭各營加意嚴防該將軍職任封疆自應如此辦理惟此事總以速行了結為宜。前曾疊次寄諭明緒等飭令早將分界事宜辦結著明誼明緒仍遵前旨約會俄國使臣准照該使臣議單妥為辦理並著常清一

體知照各城如俄人前來尋釁即以此事告知以期速息兵端明誼此時計已與明緒會面著即妥為商酌如俄國使臣來議分界時即相度事勢按照該使臣議單速行辦結一切操縱機宜朝廷不為遙制諒該將軍等定能仰體此意妥為經畫也。巴哈善所部將士在西南一路巡邊於喀爾奇拉河續遇俄兵接仗獲勝並於南山灣遇賊擊退追逐出卡。此次該夷赴卡逞兵該國使臣未必知悉常

清以匡蘇勒官雜哈勞蒙蔽把持屢將該將軍咨與西悉畢爾衙門文書擅行拆閱將續行咨文轉由塔城遞往此次由塔城接遞之西悉畢爾衙門回文仍似雜哈勞所擬據常清將來文照錄呈覽所稱我兵首先尋釁欺壓該國商人並哈薩克布魯特屬於該國等語甚為狡猾本日已交總理各國事務衙門辦理矣該國住京使臣亦每自相迴護該衙門厯次與之辯論幾於舌敝唇焦除由總理

各國事務衙門轉諭該國住京使臣外常清仍當設法行文西悉畢爾據理駁斥一面嚴行防範毋稍大意前據總理各國事務衙門奏稱貿易圈俄官逃走一節已與該住京公使行文駁辯並將該領事官疑懼捏詞刁難情形揭破已由該公使知照該領事官折回著常清於該領事官折回時仍行派員保護並將該貿易圈貨物給回以免藉口所有屢次獲勝之出力將士並哈薩克布魯特等均

著常清存記彙案奏獎塔城卡外有俄兵占踞明緒現派員前往曉諭擬暫事羈縻俟其間卡再行用兵並令土爾扈特王台吉等派兵巡查游牧辦理均尚妥協至綽坦冒襲汗爵前據景廉奏明情尚可原曾降旨寬免其罪嗣經常清奏查阿勒坦父子下落並未將前奉諭旨聲明復諭令常清景廉飭令哈薩克各台吉公舉一應襲汗爵之人原未將綽坦汗爵革除續因景廉奏稱該游牧人等久

奉綽坦為汗且不肯歸附俄國復諭令明誼所有綽坦汗爵仍准其承襲明誼即將常清行查塔城咨文密行撤銷切勿輕行宣露現據明緒奏稱已將常清咨文宣示自係尚未接奉前次諭旨現當用人之際綽坦之去留殊有關係著明誼明緒仍遵前旨將准其承襲汗爵之諭速行宣示綽坦其應領敕書本日已敕令該衙門照例辦理頒給矣常清現派協領色布貞泰等馳赴塔城聽候差遣著

明誼。明緒於俄使會議邊界時飭令該協領等將有礙哈薩克布魯特遊牧生計之處悉心曉諭毋令侵占決裂將此由六百里各諭令知之。又諭常清奏伊犁軍餉不繼請飭部撥河東道庫銀數萬兩文祥奏哈密經費支絀請飭山西速撥銀數千兩以濟急需各等語著英桂卽飭河東道剋日撥銀數萬兩派員解交烏里雅蘇台徑由該處護解科布多再由科布多解交古城交常清派往迎提

之員接解前往伊犁並交英桂無論何款迅速籌銀數千兩派員由歸化城走北路轉解至哈密以資分撥毋得稍有遲誤將此由五百里諭令知之。又諭保恆文祥奏遵查前任辦事大臣與營員互相參訐各案大概情形並持參興泰謬執己見袒護家丁各一摺前任哈密辦事大臣興泰與營員恩賢互相告訐經保恆文祥將該營散放糧餉各帳查齊清算並將興泰家丁周喜等提質令將店

廠各帳交出旋據興泰咨稱上年十一月間調取各店帳目與端昌互相較對數目相符嗣因端昌病故各店廠帳目業已遺失保恆等當提端昌之家丁任泰等嚴訊據供端昌並未收此帳目及質之興泰家丁周喜等又復一味枝梧經委員加以恐嚇答責仍不吐實興泰輒於次日遞給保恆等信函袒護家人曉曉置辯希圖蒙混了結殊屬任性妄為且將店廠各帳輒稱遺失抗不交出清算更

難保無侵蝕營私等弊本日已明降諭旨將興泰革職歸案審辦著保恆提同革員恩賢全齡及識字李兆幅等隔別嚴訊並催提都司鍾齡迅速前赴哈密備質務將該革員等互相參訐各情逐一查訊明確並將營糧散放數目詳細覈算是否恩賢等任令營書侵那舞弊抑係興泰有朋比分肥等情均應徹底訊究以成信讞不准稍涉迴護文祥另片奏接奉寄諭與扎薩克郡王伯錫爾商辦開

墾事宜必須周歷相度方可有濟請將叅計案件由保恆審辦等語文祥現已與扎薩克郡王伯錫爾起程查勘地畝著仍遵前旨將哈密境內閒荒地畝可開墾者共有若干詳悉履勘務令有利可興足資軍食不得以事屬創始稍涉畏難有負委任文祥業已起程興泰等互相叅計一案卽著保恆督飭委員提集卷宗秉公審辦將此各諭令知之○又諭前因平瑞奏烏魯木齊牧廠閒曠地畝業

經招戶開墾升課當經諭令常清等於所屬各城一體勘辦茲據錫霖奏稱塔爾巴哈台東南一帶多係無水山場東北一帶雖不乏閒曠沃壤亦多因無水不能耕種惟西面巴克圖卡倫一帶土脈較潤尚可開墾現在俄人兵隊逼近卡倫勢難耕種請暫緩籌辦等語塔爾巴哈台西面巴克圖卡倫一帶現有俄兵逼近自難遽議開墾著照所請暫緩履勘一俟分界事宜辦結卽行妥議章程奏明

辦理其蒙古牧放孳生牛馬各廠擬挑選口老殘傷馬牛數千匹變賣抵餉騰出地畝亦可招戶升課著一併妥籌勘辦總須斟酌盡善期於兵食有裨將此諭令知之○西安將軍多隆阿出省勦賊以副都統德興阿兼署將軍○以謬執私見袒護家丁哈密辦事大臣興泰革職訊辦○以捐輸葉爾羌兵餉賞還已革回子扎薩克郡王阿克拉依都世職癸巳諭內閣朕奉

慈安皇太后

慈禧皇太后懿旨本日祁寯藻倭仁李鴻藻奏釋服逾期請嚴敬肆之分屏黜浮靡以新聖學固聖德一摺防微杜漸具見惻忱皇帝登極以來節經詔諭中外崇實黜華以敦郅治茲當釋服之初吉禮舉行誠如祁寯藻等所奏帝心敬肆於此分卽風氣轉移於此始一切玩好遊觀興作嗜好之聞不可不防其漸此中安危治亂之幾其端甚微而所關甚巨

現在皇帝雖已釋服痛念

山陵未安民生未奠各省地方軍興日久物力耗絀正我君臣上下艱難共濟之日豈宜稍涉恬熙致忘無逸之戒矧皇帝冲齡在位智慧漸開尤應遜志典學時以憂勤惕厲為心其於逸樂便安及玩好遊觀興作諸務一切嚴加屏斥卽內廷服御亦當概從節儉為天下先祁寓藻倭仁李鴻藻同心啟沃其各朝夕納誨陳善閉邪日以詩書牖迪養成令德

以端治本而懋躬行祁寓藻等原摺著交弘德殿用資省覽又諭嚴樹森奏特參原勘洲湖淤地不實之知縣及率行轉詳之知府請旨交部議處並請將原定租課免徵一摺湖北省濱江有蘆洲地定例五年大丈一次荆州府石首縣各洲地於咸豐十一年三月間據該知府唐際盛並該縣廷元稟報勘得淤地可以播種者至十三萬八千八百餘畝徵租至四千七百餘兩之多茲據該撫查明

石首縣團合劉發等洲地方浮泥滯沙水漲卽淹不堪耕種該地方官從前勘丈時並不認真履勘僅分遣書差隨同委員望地估畝派佃認租且將柴山民業併入淤地其久經定額之租亦復一律加賦有害民生無裨餉項辦理殊屬草率前任石首縣知縣廷元前任荆州府知府唐際盛著一併交部照例議處其原定租課卽著免其徵輸以順輿情而免拖累所有該處洲地仍責令該地方官俟

水涸後確切查勘其實在可以耕種升科者究有若干併入大文案內辦理以符定制毋許稍有不實不盡○諭議政王軍機大臣等有人奏劣員虐民釀變請飭查辦等語據稱温州吏治之壞其始由於前署温州府知府黃維詰已革平陽縣知縣翟維本前署瑞安縣知縣孫杰等縱匪殃民釀成會匪之亂旋被髮逆竄陷上年收復後知府周開錫試辦鹽釐經署永嘉縣知縣陳寶善勸其以殺立

威永嘉所轄之安溪地方以鹽稅過重偶有違言陳寶善力主用威捕得一人立時斬首其父母妻子同時含冤自盡幾至激變已革署平陽縣知縣蘇金策以留算交代為名仍辦平陽捐務與現署平陽縣知縣余麗元等帶同會匪蔡懋貞四出勒派寡婦孤兒亦無免者又瑞安雙穗場鹽大使程泰森入會通匪捐納知縣沈煥瀾在鹽局幫辦百端剝削致令鹽丁激變毀卡又托名捕盜稟設緝捕

勇船實無一船一勇不過藉資需索等情浙江各屬被賊蹂躪生靈荼毒慘不忍聞浙東八郡雖經次第攻拔而孑遺黎僅延殘息急需循良牧令善為拊循培養元氣方足以資安輯若如所參之陳寶善等貪虐病民各該地方甫經兵燹復又遭此不肖官吏刻剝殘殺實堪痛恨且恐各屬中劣員尚不止此亟應嚴行懲辦以儆官邪而蘇民困著左宗棠將被參各員確切查明嚴行參辦迅速奏

聞其黃維詰翟維本孫杰等三員是否尚在浙江並著查明據實奏安溪塘後孫坑等村義民應如何分別獎卹之處著左宗棠一併查奏原片著鈔給閱看將此諭令知之○又諭曾國藩奏金陵陸師疊克東南八隘克復秣陵關偽城並臚陳近日軍情李鴻章奏蘇州無錫疊勝情形請留黃翼升水師各摺片金陵官軍攻克上方橋高橋門雙橋門土山方山七甕橋二十餘壘並攻破博望鎮二

卡七壘將中和橋秣陵關一併攻克擊敗出城抗拒之賊曾國荃擬令蕭慶衍進紮孝陵衛經營城北漸成合圍之局辦理甚為得手著卽行令曾國荃督飭將士實力攻剿毋稍鬆勁古隆賢舉眾就撫收復石埭太平旌德三城朱品隆將降眾挑留千人編立營哨交古隆賢管帶責令立功贖罪著卽妥為撫馭仍隨時留心防範不可稍涉大意古隆賢為賊中巨擘本屬罪不容誅既係自拔來歸尚

可予以自新以期被脅各匪聞風效順本日
已明降諭旨賞給遊擊銜並准將該部下頭
目及辦理招撫各將士查明獎勵廣德招撫
事宜仍須審慎辦理現在水陸各軍已復東
壩鮑超即將由建平進勦廣德東壩為金陵
西南水陸要衝廣德為皖浙門戶與湖州毗
連一經得手則賊之險要已失著曾國藩卽
飭令鮑超迅速攻克廣德州並著左宗棠分
撥兵勇會同鮑超所部進取湖州以斷杭城
賊匪援應其東壩各軍仍由曾國藩飭令進
取溧水溧陽金壇等處以期與李鶴章規取
蘇郡之師漸相聯絡如此面面圍逼俾賊兼
顧不暇自可勢如破竹蘇州官軍攻克蠡口
黃埭等處賊營無錫官軍攻勦安鎮梅村西
倉茅塘橋等處援賊連獲大勝李鴻章現飭
程學啟等由泇關一帶抄襲蘇錫交通之路
以收前後夾擊之效著卽飭令該營將士將
此股援賊合力勦退以期分攻蘇錫漸次得

手現在官軍屢次獲捷一切攻勦事宜尤須
慎之又慎不可恃勝而驕李鴻章務當督飭
諸將穩紮營盤謀定後進毋稍輕率李鴻章
所部水師本形單弱分路防勦不敷應用現
當蘇錫攻勦喫緊之時黃翼升所統水師船
隻准其留於該處以資得力僧格林沁現已
由豫赴皖唐訓方分軍大小蚌埠以圖懷遠
潁州兵練亦攻破朱滑孜賊圩淮北各營聲
勢聯絡軍威較壯李世忠現在進軍姚家灣
以圖下蔡直搗苗逆老巢自可掣動蒙城賊
勢著曾國藩加意拊循多方激勵俾李世忠
進力攻拔該逆老寨令苗黨眾心離散進退
失據庶官軍易於進取石逆餘黨竄擾楚南
道州江省西南一帶空虛此時皖南一帶漸
次肅清江忠義一軍正可還駐饒郡回顧江
西席寶田一軍現赴贛州著曾國藩卽飭令
該員嚴防要隘毋令楚南賊匪竄入江境是
為至要將此由六百里各諭令知之○又諭

吳崇奏蒙軍進紮渦南。繪圖呈覽。並擒匪出。授徐境情形一摺。陳國瑞一軍在王窯以下。奪獲賊船。由淺水處所。躡過渦河南岸。搭造浮橋。卽親督馬步各軍過河。與賊力戰。擒築新營。包抄賊之東南兩面。復又派撥馬隊。抄襲後路。運糧之賊。現在河南連營二十餘座。副將張從龍夜擊賊營。已至蒙城南門濠邊。其南岸連營。與賊陸路糧道。已能窒遏。所辦尚為認真。惟西南兩面。尚無布置。城圍未能

遽解。僧格林沁刻下當已到毫。係由蒙之西北一路前往。富明阿等軍到蒙後。兵力較厚。卽可調撥。由西南面進剿。與陳國瑞一軍會合。夾擊斷賊糧道。力解蒙圍。臨渙一軍與賊相持。李大箇子等匪。忽又竄擾。逼近徐城。道員朱善張派兵堵守。姚廣武分隊回援。總兵鶴齡等水陸各軍。亦各分投防剿。卽著吳崇督飭各軍。實力扼剿。毋令蔓延勾結為患。本日曾國藩片奏李世忠進軍姚家灣。以圖下

蔡直擣苗逆老巢。唐訓方亦分軍大小蚌埠。以圖懷遠。潁州兵練攻破朱滑孜賊圩。潁郡西面漸已廓清。李世忠此次協助官軍進剿。頗能認真出力。其進軍以圖下蔡賊巢。正與前次寄諭相為脗合。僧格林沁等卽當隨時激勵用之。俾與富明阿陳國瑞等相為策應。以資得力。唐訓方為富明阿等軍後路聲援。兼顧臨淮。此時分軍以圖懷遠。使逆黨到處受敵。面面不能兼顧。所籌亦合機宜。均卽乘

機迅速辦理。各處練圩。當此僧格林沁到皖。官軍得手之際。其為賊裏脅者。尤必羣思反正。並著該大臣將軍督撫等。迎機招徠。以孤逆勢。攻剿更易得手。吳崇繪呈軍營形勢圖。留覽。將此由六百里各諭令知之。○命前任湖北鄖陽鎮總兵官訥欽赴直隸軍營。交總督劉長佑差委。○以江南官軍疊克城隘。出力。賞提督羅逢元。周惠堂。蕭開印。總兵官熊登武。王仕益。晏恭山。胡松江。朱洪章。正一品

封典提督張詩日。按察使劉連捷黃馬褂道員陳浸易良虎總兵官李瑞二。武義山。副將周光正。鄧吉山。吳隆海。張葉江。吳次漢。王上國。李大魁。周運斌。黃崇孝。周平福。陳友志。藍瑞祥。謝明久。熊紹濂。楊瑞堂。羅澤湖。張東陽。周濟盛。王永桂。廖世霖。鮑昌勝。謝得貴。彭玉堂。張國才。參將陳壽武。劉泰財。羅景集。李麟定。王恆豐。陳萬合。潘在田。聶福厚。巴圖魯名號。知府馮邦棟。參將李泰山等花翎。守備龔長升等藍翎。餘加銜升敘有差。予陣亡副將吳世仁等祭葬世職。○以江蘇通州等處疊獲通賊要犯。賞在籍翰林院編修李念詒四品卿銜。知府倪寶璜。守備余洪亮等花翎。知縣朱日升等藍翎。餘加銜升敘有差。○以堵築江蘇小六堡壩工出力。予道員顏培瑚等升敘有差。○以收復安徽石埭。太平。旌德。三縣城。賞投誠賊目古隆賢遊擊銜。○予江蘇松江等處陣亡知縣蔡良杰等祭葬世職。○

予江蘇軍營病故總兵官謝光晉祭葬卹廕。○予江蘇節年殉難中書科中書蘇福那等紳民婦女九百六十員名口分別旌卹如例。○予浙江節年殉難遊擊盛綬章等紳民婦女一千一百三十三員名口分別旌卹如例。○予湖北節年陣亡殉難外委錢得寬等紳民婦女二千二員名口分別旌卹如例。○旌表守正捐軀直隸博野縣民婦張王氏。

大清穆宗繼天開運受中居正保大定功聖智誠孝信敏恭寬毅皇帝實錄卷之八十二

大清穆宗繼天開運受中居正保大定功聖智
誠孝信敏恭寬毅皇帝實錄卷之八十三

教修

同治二年癸亥十月甲午諭內閣前因直東

等省交界處所賊蹤紛竄靡定特命劉長佑
督辦三省勦匪事宜茲據劉長佑奏稱直東
豫三省交界地方現已肅清請撤去督辦等
語直東股匪經僧格林沁會同劉長佑間敬
銘勦除殆盡卽照劉長佑所請毋庸督辦三
省勦匪事宜直隸山東河南交界地方如尚
有零匪出沒劉長佑仍當會合勦辦不得以
現無督辦之責稍存諉卸間敬銘張之萬亦
不准因撤去督辦遂存畛域之見直隸總督

久在軍營地方一切公事均關緊要著劉長
佑察看如果省外布置業已周妥卽行回省
任事將察吏安民詰奸弭盜一切應辦事宜
實心實力認真經理以副委任諭議政王
軍機大臣等劉長佑奏吳永敦在江北招募
楚勇現已成軍遵旨撥赴河南助勦並請令
吳再升馳赴河南會同吳永敦統帶交張之
萬調遣等語吳再升係吳永敦之兄若令戴
罪圖功自更得力著卽飭吳再升赴豫會同

管帶募勇並飛飭吳永敦折赴張之萬軍營
聽候調遣張之萬於此項募勇到後卽飭認
真訓練隨同進剿吳再升等能否得力並著
隨時察看具奏前命江長貴暫署直隸提督
當諭令劉長佑隨時察看據實具奏尚未據
督奏到昨日引見之前任湖北鄖陽鎮總
兵訥欽一員已降旨交劉長佑差遣該二員
孰為優劣並著體察奏聞毋稍瞻徇將此由
五百里各諭令知之○又諭憚世臨奏髮逆

圖藏事。不得稍有遲誤。將此由六百里各諭令知之。○以募勇滋事。貴州總兵官滕正富革職訊辦。○予廣西古城陣亡守備朱家福祭葬世職。○蠲緩廣東信宜茂名化高明恩平鶴山羅定七州縣被擾地方未完額賦有差。○乙未諭議政王軍機大臣等據閩敬銘奏本年六月二十二日有上海高和順米船由江南余山口放洋北上。駛至黑水外洋遇盜劫去貨物。並捐米一百餘石。拒殺水手鄭

明瑞現由石島口岸放洋。赴天津交兌等語。海運米船近年經過東洋頗覺安靖。何以黑水洋面忽有盜艇游弋肆劫。現在京倉所需米石全賴海運源源接濟。若不將洋面盜匪迅速撲滅。不獨為米艘商船之害。將來南糧北上亦在在可虞。於倉儲甚有關繫。閩敬銘現已咨會沿海各督撫一體兜拏。卽著曾國藩劉長佑李鴻章分飭舟師確探賊蹤協力勦捕。並著閩敬銘嚴飭總兵李懋元迅督水

由粵竄楚。截擊大勝。餘匪散走粵黔。現籌防剿情形一摺。髮逆竄入富賀界內。與廣東相距不過二三百里。現在該省兵力萃於肇慶高州。若此股乘虛直入廣東腹地深屬可虞。惲世臨現飭臬司張運蘭等軍由宜章橫出連山扼賊東趨之路。卽著毛鴻賓郭嵩燾督飭張運蘭等實力扼截。隨時與楚邊各軍互相聯絡。實力勦洗。杜其竄入江西之路。惲世臨嚴飭陳士杰王永章等軍力遏回竄毋稍

疏虞。至分竄黎平之賊。惲世臨已飭周洪印等分守沅靖各隘。相機堵剿。勞崇光張亮基務當督飭在事員弁迅速會合楚師力圖掃蕩。包茅仙一股雖經金太文等圍剿疊勝。而賊勢未衰。並著勞崇光等嚴飭金太文等乘勝進兵。盡殲醜類。毋留邊陲之患。李逆屢敗之後。兇焰漸衰。此次若不得逞。志於東。必將歸併潯州。與黃逆合股。著張凱嵩速派得力將弁迎頭截剿。期與黔楚各軍三面兜圍。迅

師將弁認真巡緝。務將此股盜犯悉數翦除。以靖洋面。儻該總兵陽奉陰違。或安坐衙齋。虛報出洋。躡緝卽著從嚴叅辦。毋稍寬縱。至此拏彼竄。原係該匪等慣技。况海面汪洋數千里。並無關隘。可以遏截盜蹤。必須南北各水師分巡合捕。方克有濟。曾國藩等務各檄飭沿海鎮將。嚴密捕拏。毋得稍涉大意。致滋延蔓。將此由四百里各諭令知之。又諭張集馨奏陝省各路逆匪紛竄。妥籌布置。省城

安堵。漢南團勇截賊獲勝。請令蔣常垣等籌費練團各摺片。前據多隆阿奏。盤屋失陷。該將軍已飛檄穆圖善。姜玉順兩軍前進。而自率各營由興平一路督剿。茲據張集馨奏。多隆阿已於盤屋城外紮營。圍繞三市。賊不得遁。此股逆匪輕裝遠馳。人數無多。藍逆亦在其內。如能全股聚殲。卽可除一巨患。著多隆阿卽督飭穆圖善等。剋期攻拔。毋任一名漏網。褻汙留鳳。節節空虛。並著多隆阿派兵聯

團實力守禦。以免逆匪乘虛竄入。山陽失守以後。未據李雲麟奏報。疊經諭令該京卿督兵攻克。著卽實力進攻。俟克復後。由興安一帶進剿。毋再延誤。該京堂以知兵自許。朝廷不惜破格錄用。乃前軍甫出。卽已潰敗。若不力圖振作。自問當得何罪。劉蓉身膺疆寄。責有攸歸。現在漢南一帶。賊勢猖獗。該撫自川起程。已逾數月。尚未抵陝。若必俟三省會剿始由巴州前進。則陝南地方。日見糜爛。賊勢

日見蔓延。以後更難著手。劉蓉當懷遵前旨。趕緊部署入陝。相機剿辦。俾各路官軍有所繫屬。不至互相觀望。貽誤事機。方為不負委任。盤屋距省較近。省垣防範。仍不可稍為鬆懈。著張集馨會同德興阿認真辦理。興安紳士蔣常垣等稟請於安康漢陰適中之地設局。攤糧辦團。旣係該紳士等敵愾情殷。保衛鄉里。著准其設局興辦。惟按畝攤糧。須歸公正紳耆經理。方免抑勒侵吞。諸弊該署撫仍

當嚴飭該紳士等。不得假公濟私致滋擾累。至刊發木質關防一節與體制不符。礙難照准。將此由六百里諭知多隆阿劉蓉李雲麟並傳諭張集馨知之。○補鑄福建延建邵道湖北監利縣憲圻巡檢各關防印信。從巡撫徐宗幹嚴樹森請也。○以隨營奮勉復山東降調知府王繼庭職。○丙申諭議政王軍機大臣等唐訓方奏官軍進剿壽州壘獲勝仗。勦撫兼施情形一摺。李世忠一軍由南岸進

兵。業經攻克柏家圩收撫民圩百餘處。茲復移師前進。距壽州十餘里。兩日之間攻克逆圩二十餘座。殺賊四千餘名。收撫投誠各圩十餘處。實屬奮勉出力。著曾國藩卽飭李世忠速將壽州攻拔一面飭令蔣凝學成大吉各軍會合進攻毋稍遲緩。紳練田端書等引眾二萬向官效順。著富明阿唐訓方仍遵前旨飭令進圖下蔡以制蒙城賊勢並著曾國藩檄令周寬世毛有銘各軍乘勢進攻。穎蔡

一帶各路同時並進。使苗逆應接不暇。勦辦當易得手。李世忠俟攻拔壽城後卽移軍西上。直搗下蔡。老巢與姚書田等練眾並周寬世等楚軍聯絡聲勢將穎蔡一帶賊氛悉行掃蕩。俾苗黨退無所據。該逆自不難速就殲擒。李世忠頗能用命。著僧格林沁等多方激勵。令其益加奮勉為國宣力。該提督統兵深入並著曾國藩代籌後路布置。毋令賊匪抄襲。蒙城濠外賊壘業經英翰攻克其一。若再

破一二壘糧路卽可通運。陳國瑞亦連日猛攻轟開賊營十餘丈。斃匪百餘名。勦辦甚為得手。惟蒙城待援情形十分危迫。而苗黨人數眾多。悉力抗拒賊營急切難破。昨覽吳棠繪呈之圖。官軍包賊營外槍築營盤。僅能過截東北兩面。未能合圍。著富明阿卽分軍進紮西南兩面。與陳國瑞聯絡聲勢斷賊糧路。僧格林沁現已移軍赴皖。著卽馳往蒙城嚴密布置。迅解城圍以救倒懸。唐訓方現已進

軍蚌埠著卽將沿淮一帶賊圩速行掃蕩進規懷遠力扼中權以斷蒙壽賊勢所有李世忠糧餉軍火著唐訓方源源接濟其陳國瑞所部軍餉火藥仍由吳棠隨時撥解毋令缺乏將此由六百里各諭令知之○又諭張凱嵩奏石逆餘黨分竄楚黔粵各邊界現飭追躡約會三省圍剿並潯州逆黨紛竄橫州勦辦情形各等語李幅猷本石逆黨中著名悍賊石逆被殲之後率其餘黨分投竄擾倭黔

倭楚轉徙靡常並擾及粵東西各邊界若令所至蔓延日久勢成流寇轉益鴟張勦辦更為費手必須楚黔粵三省官軍會合兜剿就地殲除著勞崇光張亮基惲世臨與毛鴻賓張凱嵩等嚴飭各該省帶兵文武互相聯絡探明賊蹤前截後追務令該匪不得喘息此等亡魂紛竄之賊尤須鄉團四面設防俾賊所至無所擄掠稟督官軍得以會合擊剿乃足制其死命並著各該督撫飭各地方認真

辦理其由賀縣竄至開建之賊毛鴻賓等督飭兩粵各軍乘勢殲除該處客匪尚多未靖毋令勾結為患惲世臨仍飭楚邊各軍相機堵剿潯州逆首黃三尚居平天寨負隅死守張凱嵩卽飭劉坤一等速籌攻擣容縣已經克復其首逆范亞音逃往大化等處係屬何州縣地方務須趕緊嚴行搜捕毋任渠魁漏網致貽後患其由潯分竄橫州之李亞得甘汰然等股並著張凱嵩飭令參將潘忠實等

軍迅速掃除漸次進國南太等處之賊以靖邊圉橫永一帶亦與廣東欽靈毗連總須兩省會合圍辦信宜縣城諒已收復高州餘匪辦理如何毛鴻賓等奏報當已在途亟應乘此激勵兩省官軍將高潯巨股一氣掃蕩其餘零匪自可乘機次第殄除也將此由六百里各諭令知之○以廣西鬱林攻克賊巢擢署知州王達材以知府用○予山東臨清陣亡守備張化龍等祭葬世職○丁酉諭內閣

都察院奏熱河民人張嘉祿遣弟張嘉宗以刑偏翻供等詞赴該衙門呈訴此案張嘉祿呈訴伊父張舉被喀拉沁旗蒙古莫敦海等圖財斃命蒙古委員三勝嘎復令眾兇將屍身搶去前據都察院兩次具奏疊經降旨交春佑麟慶提審定擬茲據張嘉宗控稱王府旗員不將二莫保得解審僅有敦莫海到案惟據一面之詞移稱該民人盜父屍骸復有旗下當差之陳宗維句串刑司丁書李太刑

偏干證姚福凝及看屍人林喜翻供旗員李連等係眾兇親屬延不解案希圖草率擬結等情案關圖財害命及刑書等串通刑偏至應徹底根究且係兩次降旨提訊之件何得任意耽延殊屬玩泄著麟慶迅卽催提各犯秉公嚴審務得確情按律定擬具奏原告民人張嘉宗該部照例解往備質又諭光祿寺卿潘祖蔭奏甘肅大吏辦理軍務乖方並鈔錄該處無名紳士信函一摺前經御史丁

壽昌奏參布政使恩麟辦事顛預曾經寄諭多隆阿照麟查參嗣因恩麟以恩麟係伊族弟奏請迴避復改派慶昫會同多隆阿查辦茲據潘祖蔭奏稱恩麟養寇病民玩誤粉飾濫保各款與丁壽昌奏參各情節大略相同其所遞甯夏並狄道河州各紳士信函內並有牽訴慶昫辦理偏袒之處該將軍既有牽涉之款自應一體迴避所有恩麟被參各款並慶昫辦理漢回互闢之案有無偏袒情節

均著交多隆阿彙入前次交查之案秉公確查據實具奏毋稍徇隱已革提督成瑞已革道員和祥甯夏縣知縣彭慶章被參各款並著多隆阿一併嚴切查明迅速覆奏陝甘辦理軍務但分良莠不分漢回疊經諭令帶兵大員及地方大吏勦撫兼施持平妥辦諒能懍遵不至稍形偏袒至九卿科道原許其陳奏事件惟潘祖蔭所遞甘省紳士信函並無名姓有類匿名揭帖該紳士等如果因時勢

迫切痛切肌膚何難聯名具呈向都察院控訴若隱匿姓名動輒向京卿科道私宅投遞懇其代奏恐各省紳士紛紛效尤致啟告訐之風不可不防其漸潘祖蔭率據匿名信函代為陳遞實屬冒昧不諳政體著傳旨嚴行申飭諭議政王軍機大臣等李鴻章奏官軍攻克許關等處進逼閭門並蘇松等府州紳民捐租助餉各摺片許關為閭門至無錫大道援賊腐集西路時與城賊往來策應此

次經程學啟等督軍攻克蘇城陸路盡斷賊勢已孤李朝斌等復由五龍橋偪攻盤門躡平賊壘五座李鴻章現親赴婁門調度擬即分門進攻是蘇城大有克復之機覽奏深慰廑繫惟現在忠侍各股尚踞無錫東北之茅塘橋等處雖許關既克勢難回援而城賊既窮難保該逆不拌死回救以顧巢穴著李鴻章一面飭令李鶴章等攔頭截擊以圖牽制一面督同程學啟等軍分攻各門使該逆兩

不相顧以期名城迅復早奏膚公仍須穩慎將事謀出萬全不可稍有疏失蘇城陸路既斷若當官軍克復之際誠恐該逆渡江北竄或擾及鎮防均不可不嚴為之備都興阿馮子材魁玉務各飭令水陸防師嚴密布置如敗匪紛竄卽行迎頭截擊力圖聚殲毋任鈇走蘇郡各屬紳民呈稱收復地方各業戶願於應收一半租息內以三分之一報捐軍餉又另提善後撫恤經費豫備克復蘇城後用

度具見惻忱惟地方新復民困甫蘇李鴻章惟當飭令所派委員會同該紳董體察民生困苦情形分別籌辦不得稍有抑勒以順輿情將此由六百里各諭令知之又諭富明阿奏攻剿情形添募勇丁並請催吳棠協餉各摺片富明阿一軍由渦河南北兩岸進援蒙城搶築營壘陳國瑞一軍攻克李圩英翰一軍於城西南各路斷賊糧運該逆見我軍攻之愈力拌死抗拒夜夜併力攻城官軍於

十月十五日。將城河以南兩營退入城門。河北兩營。為賊所踞。浮橋亦為所毀。賊復增添精悍。阻我進兵之路。致與城中聲息不通。蒙城危在呼吸。亟應設法援救。即著富明阿。唐訓方。就現有兵力。與陳國瑞等軍。聯絡聲勢。設法進援。派兵斷賊糧道。尤為目前要著。並著妥籌布置。僧格林沁。已由河南省城起程。著懍遵前旨。迅督大軍。星馳救援。力解蒙城之圍。以期轉危為安。檢首李大箇子。相盤等。

現在竄往徐宿之間。四出焚掠。徐宿一帶。為蒙城糧運必由之路。該處如被匪梗塞。關繫實非淺鮮。富明阿。業飭姚廣武。帶領馬勇四百名。跟蹤追剿。並著吳棠。派兵夾擊。妥籌兼顧。迅掃賊氛。以清餉道。富明阿。擬於宿州一帶。添募勇丁一千名。惟苗逆詭謀百出。且與捻匪互相勾結。黨與眾多。該將軍在宿州等處募勇。萬一苗捻各逆。陰遣死黨赴募。作為內應。一經墮其狡詐。勢必為該逆所乘。不可。

不豫為之防。富明阿。務當酌量情形。出以慎重。妥籌辦理。不可稍涉大意。富明阿。所稱八月間。由揚州起程。糧臺支發餉銀。軍火等項。支應亦俱無多。迄今五十餘日。未見續有報解。現將營中所屯之米。酌發接濟存米。一經發完。而協餉仍復不至。飢軍譁潰堪虞。至軍火器械等項。需用尤急。請飭按月撥解等語。蒙軍勢形岌岌。若兵糧軍火。更多缺乏。勢必立形決裂。大局何堪設想。著吳棠。督飭喬松。

年務。將每月應解富明阿。營糧餉軍火器械等項。按月如期撥解。如再稍涉遲逾。致誤戎機。必惟吳棠等是問。將此由六百里各諭令知之。○又諭富明阿。等軍。會攻圍蒙逆壘。該逆濠深壘堅。剿辦未能得手。亟應厚集兵力。以壯軍聲。庶可相機進取。該將軍所擬於宿州添募勇丁。新集之眾。恐難借資得力。現在直隸全境肅清。山東境內餘匪。該省兵力亦敷。剿辦所有直東兩省。從前調集添募之勇。

丁自應隨時遣撤劉長佑前派吳永款赴滬添募之勇丁一千名並蔣希夷所部豫勇八百名疊經諭令撥交張之萬調遣現在蒙城攻勦喫緊亟須添兵協助著劉長佑間敬銘查明直隸山東軍營內現在存營之勇可以遣撤者尚有若干名卽行遴委妥員帶赴蒙城交富明阿調遣並酌量籌給勇糧等項以利進行吳永款蔣希夷所部勇丁已先後撥赴豫省並著張之萬查明如兵力可敷防勦

卽於前二項勇丁內酌量分撥派員管帶赴蒙助勦該督撫等接奉此旨卽行妥籌調撥毋稍遲延並一面奏聞以慰廑繫聞山東有遣散之勇並未派員管帶回籍致有騷擾著間敬銘查明如有此項勇丁迅卽派員管帶飭赴蒙城以助兵力將此由六百里各諭令知之○又諭總理各國事務衙門奏貴州教民一案辦有端緒請將田興恕就近羈禁問擬完結以免異議一摺田興恕殺害教民一

案前經降旨將田興恕革職拏問仍著勞崇光張亮基在黔審訊乃事閱兩年此案尚未經訊辦田興恕赴川赴黔亦迄無定議茲據該衙門奏稱接勞崇光等來函以此案已與該處主教胡縛理商酌該主教允致柏爾德密信函有可使戍邊之語惟不願田興恕再回黔省似尚知中國辦案不能違例科罪又經總理衙門與柏爾德密重加辯論將中國定例及田興恕屢逢恩詔應行減等並其罪

名出入輕重必應按照定章辦理各節與之再三曉譬始據該公使聲稱止求就近在川訊辦但田興恕並未監禁必須監禁後照中國例辦理給予照會寄知本國卽可完結等語田興恕係奉旨拏問之員無論在何處查辦總應照例先行羈禁若令在外逍遙不惟無以服外國人之心卽中國亦安有此辦案之法著崇實駱秉章接奉此旨卽將田興恕設法查提到省羈禁毋令疑懼遠避致可以

照中國律例完結之案。又生枝節。田興恕到省羈禁後。卽著崇實駱秉章迅速奏報。勞崇光張亮基懍遵。疊次諭旨。速將此案卽在黔省秉公查辦。按例定擬具奏。以便總理各國事務衙門。照會住京公使。迅速了結。如不能將田興恕設法羈禁。或致令疑懼遠颺。滋生事變。惟崇實駱秉章是問。總理各國事務衙門措一件。均著鈔給閱看。總之此案雖係中外交涉。不能不持情法之平。如能照外間主

教及住京公使所議。按照中國律例了結。將來不至物議紛起。人心不服。則各該省教士。卽可永遠相安。所以保全中外大局者甚大。惟在崇實等體察妥善。迅辦至此案無論已結未結。均不准稍有傳播。致令不知輕重之人。造言生事。貽誤大局。如稍有傳播。亦惟崇實等是問。懍之慎之。將此由六百里各密諭知之。○又諭本日據總理各國事務衙門奏。請將田興恕就近羈禁。問擬完結。業經密諭

崇實駱秉章勞崇光張亮基設法。先將田興恕就近在川省羈禁。仍由勞崇光張亮基妥為擬議完結。並由總理衙門將一切原委專函附致矣。此事柏爾德密接到胡縛理信。函經總理衙門向其詢問。內有何語。旋據將信彙譯送。係將田興恕減死遣戍等事。均推柏公使主持。與勞崇光等譯寄之彙不符。惟不願田興恕回黔。意則相同。復經總理衙門將勞崇光等原函援引。例意之處。代為切實透

達。並告以田興恕屢次例應逢恩減等。照此來信。將田興恕發往新疆。不准援免。案可立結。該公使意漸活動。惟稱拏問之人並未監禁。必須監禁後。照中國例辦理。給予照會。寄知本國。卽可辦結。覈其前後情節。柏爾德密所稱不願田興恕回黔。但願將其就近監禁。以為拏問確據。報知本國。卽可通融完案等詞。尚非虛假。似此辦案。既合中國之例。又得情法之平。斷不可再事遷延。致有藉口。本日

已密諭崇實駱秉章將田興恕設法就近在川羈禁。著勞崇光張亮基一面將田興恕虐殺教民及被叅之案迅速妥為定擬援引律例具奏以服中外人之心毋得稍有推諉觀望或致事機中變總理衙門密片一件著鈔給勞崇光張亮基閱看。再此次胡縛理信函竟有傳說接到都中密寄各件均屬未能慎密此旨及鈔寄密片止准勞崇光張亮基親自拆閱此外雖委辦此案之員亦不准一人

與知將來完案時此二件毋庸覆奏以免秉筆者洩漏並毋庸錄寄川省致有傳揚儻機事不密惟勞崇光張亮基是問。接此旨時並著查看印卦如有驛站拆動情形卽據實查叅拆看之人以軍法從事將此再由六百里各密諭知之。○以安徽攻克渦河賊營擢遊擊駱得勝以副將用千總康錦標以守備用並賞花翎餘升賞有差予陣亡遊擊李仕貴祭葬世職加等。○戊戌以神靈顯應加江西

廣豐縣胡太保封號曰靈佑。○諭議政王軍機大臣等有人奏錦州副都統恩合辦理大凌河開墾馬廠荒地將東廠歸併西廠其東廠之地責令甲兵分領招佃取租議論亦似妥善惟甲兵所駐地方或遠在數百里以外礙難管業且廠地遊民一概不准承領失業堪虞不如准令墾地民人及附近各居戶呈報領種一律升科統由地方州縣徵解報部劃抵該處兵餉至恩合籌辦開墾創為甲兵

分領之議聽信佐領常貴依勒通阿劉三等頗有招權納賄之謠該副都統於查辦烏雲泰一案復代為彌縫掩飾請飭查辦各等語恩合向來辦事尚能認真此次辦理開墾荒地是否措置乖方有無前項情弊基溥阜保現已前赴錦州查辦事件著將此次所叅各節彙入前案東公查辦據實覆奏恩合前次叅辦烏雲泰等一案是否公允何以節次被人奏叅其中有無別情著一併詳細直陳毋

稍徇隱。另片奏東馬廐既經裁撤所出之地較前不啻倍蓰。請准各旗閒散及附近民人一體承領等語。是否可行。並著基溥、阜保詳察情形具奏。原摺片著鈔給閱看。將此諭令知之。○又諭。官文嚴樹森奏。毫捻竄入鄂疆。經官軍勦擊。遁回豫境。全楚肅清。一摺。毫捻程大老坎等。由豫入鄂。圖竄漢鎮。經楚軍分道扼擊。退踞宋埠中館驛一帶。官文等豫調周鳳山一軍。扼紮黃郡。舒保督率各軍力戰。

斬馘數千。該逆受創北遁。全楚肅清。而張總愚一股。又由唐鄧一帶。窺楚鄖陽及均州。光化勢甚喫重。著官文等飭令派出各軍。會合豫軍。將程大老坎一股。奮力夾擊。毋任再行竄擾。程逆是否殲斃。並著查明具奏。張總愚一股。由南召南侵。擾及唐鄧。前經諭令張之萬飭令在防將士。實力堵遏。並令張曜力顧西路。以杜紛竄。據該撫奏。已派兵分扼鎮平內鄉。何以此股逆匪。仍復擾及鎮平內鄉。鄧

州。足見平日所奏。全是紙上空談。毫無實際。張曜究竟現在何處。曾否與賊接仗。南召一帶團練。何以不能聯絡禦賊。毛昶熙係專辦團練之員。亦不得置身事外。著將近日常賊情軍情。據實陳奏。捻匪假道於豫。以擾楚疆。久成輕車熟路。中州門戶洞開。以鄰為壑。毫無布置。實堪痛恨。著張之萬、毛昶熙嚴飭張曜等。會同楚軍前截後追。不得以賊氛出境。遂為了事。若任令程大老坎飽颺回巢。張總愚

竄擾秦楚。必將該撫等重治其罪。決不寬貸。懍之慎之。鄖陽防務萬緊。道員梁作揖一軍。無論行抵何處。官文等卽檄令就地駐紮。兼顧鄖防。與歐陽正墉一軍互相策應。以固邊圉。毋稍大意。將此由六百里各諭令知之。○以江蘇克復太倉等州縣城出力。賞知府李銘皖副將黃登第等花翎都司鄧國釗等藍翎。餘加銜升敘有差。○以湖北勦辦捻匪。全省肅清。賞副都統舒保白玉搬指一箇。翎管

一支大小荷包各一對。委驍騎校依克吉善阿克都善。巴圖魯名號。餘加銜升敘有差。予陣亡佐領壽長等十員祭葬。世職加等。並入祀死事地方。暨各原旗籍昭忠祠。己亥。諭內閣。向例理事同知通判缺出。無論內地邊地。俱於保送記名之中書小京官筆帖式內。由吏部帶領引見補授。惟奉天府所屬之昌圖廳。所轄地方遼闊。應否於理事通判外。添設官職較大之員。以資彈壓。抑或就理事通

判一缺。酌量增改官階。及嗣後該廳員缺。應如何揀員升補調補。一切變通辦理之處。著吏部妥議具奏。○諭議政王軍機大臣等。王明等奏賊竄昌圖界之榆樹臺等處。兵團緝捕失利。調兵馳往勦辦一摺。景綸等奏探聞昌圖盜匪有欲進邊滋擾信息。派兵防堵等語。昌圖盜首滾地雷王五等與朱家城子匪首齊秀等互相勾結。有馬賊數百人。竄擾榆樹臺街內。佐領哈爾尚阿等帶領馬隊兵團

進攻。被賊圍困。衝散。候補佐領慶吉驍騎校文楷照磨徐崇均受傷落馬。不知下落。哈爾尚阿退至法庫邊門。該匪復在梨樹城等鎮肆擾。王明等已添調官兵二千餘名。馳往勦捕。景綸等已派兵四百餘名。沿邊防勦。著王明等嚴飭派出官軍。實力進勦。剋期蕆事。毋任再有竄越。景綸等飭令佐領常喜等會合和常等認真防堵。如該匪回竄朱家城子巢穴。卽飭竭力攻毀。毋留餘孽。昌圖賊匪滋擾。

歷經控告有案。該將軍兼尹等並不認真拏辦。任其蔓延。雖經民人楊華貴等呈控。於今秋七八月間。復起搶殺。何以未據該將軍兼尹等奏聞。及至寄諭詢問。始行陳奏。仍復含糊影射。並未將才寶善白凌阿等匪據實聲覆。何以憤憤若此。豈真謂朝廷不能執法從事耶。此等小醜倡亂。何至兵團望風潰散。損將喪師。總由平日不能認真整頓。及至禍機已伏。猶復上下諱飭。不肯遽行勦除。積習相

沿實堪痛恨。此股匪徒。人數無多。現既添調兵丁。不難一鼓殲滅。如再任令蔓延。定將該將軍等從重治罪。決不寬貸。才寶善、白凌阿等。本係熱河滋事之匪。恐其復行回竄。著麒麟慶嚴飭所屬。一律防範。並傳諭蒙古各王旗一體兜拏。不得觀望隱匿。以期早日廓清。景給另摺奏請養兵恤民一摺。所奏甚是。邊地緊要。嗣後自應停止徵調。該將軍等仍當隨時教練兵丁。休息民力。以固根本。將此由六

百里各諭令知之。○又諭駱秉章奏川省邊防喫緊。未能抽調兵勇赴甘。並李雲麟一軍所需軍餉。請仍由湖北撥解各一摺。陝南賊勢猖獗。自漢中郡縣淪陷後。該逆乘隙蔓延。不無窺伺川疆之計。川北防剿之師。必須嚴密周到。其與滇黔接壤處所。亦時虞寇蹤竄突。南北兼防。兵力已覺不厚。駱秉章現在添募楚勇。以資攻剿。所存各營兵勇。難以抽調赴甘。所奏均係實情。惟甘省既無知兵之將。

又無得力之兵。而回轍日張。地方糜爛。情形日甚。一日若不得一二支勁旅。速往援剿。恐民團解體。匪勢猖獗。以後更難收拾。著多隆阿遵照疊次諭旨。飭令雷正綰迅將永壽境內賊巢盡力掃蕩。乘勝赴甘。相機進剿。並著催令陶茂林將汧隴餘逆悉數殲除。剋期直達平涼。力圖收復。熙麟、恩麟均有地方之責。豈可一籌莫展。坐待援師。著卽激勵諸軍督同團練。將各路逆回痛加剿洗。俾雷正綰、陶

茂林兩軍聲勢益壯。則剿辦更易得手。多隆阿所部業已派撥二千營赴甘。近復調穆圖善、藍斯明等進取藍屋山、陽兩城。且陝回尚未肅清。仍須分兵按剿。漢南軍情萬緊。多隆阿有不遑兼顧之勢。劉蓉身為陝撫。陝事是其專責。著卽懍遵前旨。迅速拔營前進。將陝南各營兵弁極力整頓。收復漢南被陷各城。以輔多隆阿兵力。所不逮毋得以防守蜀境為辭。致滋玩誤。藍斯明前已進兵山陽。李雲

麟現在駐紮何處。前日接仗失利。何以尚未會同劉蓉奏報。著卽會商藍斯明合力進剿。迅圖克復。稍贖前愆。至漢南各營業歸劉蓉部署。所需餉項。向川省撥解。與李雲麟無涉。李雲麟軍餉。自應仍由鄂省接濟。著官文嚴樹森隨時撥解。以利軍行。將此由六百里諭知官文。多隆阿。駱秉章。熙麟。嚴樹森。劉蓉。李雲麟。並傳諭恩麟知之。○命翰林院編修車順軌充

實錄館詳校官。○庚子。諭議政王軍機大臣等。理藩院奏阿拉善蒙古官兵應否裁撤歸旗遊牧一摺。據稱阿拉善旗赴援慶陽官兵。前經陝甘總督咨令全行撤回。遊牧復經甯夏將軍咨令紮營該旗之塘口。迤北聽調。現據阿拉善王貢桑珠爾默特在該院呈報請示等語。此項官兵。本不得力。前經熙麟奏請將全隊撤回。自毋庸再留於塘口。迤北備調。著慶昫熙麟卽行飭令該官兵撤回遊牧。以示

體恤。將此由四百里各諭令知之。○又諭馮子材奏南路逆援廣集現籌進剿情形一摺。金陵官軍紮過孝陵衛。屢戰皆捷。乘勝攻克秣陵關等要隘。南路長圍漸合。鮑超一軍亦從東壩漂水轉戰而前。疊經曾國藩奏到各情。與本日馮子材所奏略同。金陵賊勢窮蹙。蘇常各逆首。悉索死黨數萬。盡銳下援。分屯句容。丹陽境內。以洪逆偽令併力死守。鎮防近接丹陽當上游埽蕩羣兇之時。自應乘此

力振軍威。用資犄角。惟鎮防兵力未厚。而賊勢尚眾。該提督等以賊情愈熾。我兵舉動尤當謀出萬全。所籌甚是。周妥著卽督令派出之總兵田宗揚等。將挑備各營勁旅。簡齊軍實。秣馬厲兵。聽候進止。先將沿途賊壘設法翦除。分兵進紮辛豐。其餘各營扼守鎮城。及雲臺寶蓋諸山。不得稍涉疏虞。一俟鮑超之軍由漂水進攻句容。卽令田宗揚等各營由辛豐滾營前進。規取丹陽。聯絡聲勢。以收夾

擊之效。此時金陵蘇州圍攻均可得手。各軍均當穩慎。以圖萬全。鎮防距賊密邇。尤須防賊勢窮鋌走。並著馮子材等懍遵。疊次諭旨。與都興阿南北兩岸。嚴行備禦。仍隨時稟商。曾國藩通籌戰守。以赴事機。將此由六里百諭令知之。○又諭前因鎮江軍營需餉甚迫。諭令廣東督撫。將應解鎮江協餉。不論何項。先行趕解銀十餘萬兩。茲據馮子材等奏稱。此項協餉。共應解銀六十餘萬兩。兩次委提。

僅據撥銀七千兩。鎮營上年閏八月。整頓清理之後。按月儘攤儘放。現又積欠新餉四十餘萬兩。飢軍譁潰堪虞。請旨飭催等語。金陵漸次合圍。城賊窮極思竄。鎮江適當其衝。防勦極為喫重。若因餉需告罄。稍有疏虞。東南全局。卽恐因之掣動。關繫實非淺鮮。著毛鴻賓郭嵩燾。懍遵前旨。不論何項。先行趕解銀數萬兩。並酌量情形。無論多寡。按月定數撥解若干。俾得源源接濟。鎮江軍務。現在極關。

緊要。儻該督撫任意遲延。致令餉項缺乏。貽誤戎機。恐毛鴻賓等不能當此重咎也。將此由六百里各諭令知之。○辛丑諭議政王軍機大臣等。有人奏。陪京重地。馬賊肆行一摺。據稱盛京省城附近。卽有匪徒結夥盤踞。往來行旅被刦者。層見疊出。承德開原廣甯甯遠等處。為尤甚。行旅受累不堪。各衙門摺差刦去衣物者。亦復不少。請飭查拏等語。盛京一帶。馬賊橫行。擾害閭閻。為時已久。總由該

將軍等不能督飭屬員認真辦理。以致粉飾養癰。盜風愈熾。亟應嚴行緝捕。以除奸宄。而靖地方。著玉明景霖和潤德椿。嚴飭所屬各衙門。不分畛域。協力緝拏。悉數弋獲。盡法懲治。並著議立緝限。嚴定處分。如有緝捕不能得力之員。卽著從嚴叅辦。捕盜乃地方官應辦之事。各該地方官。果能嚴飭差役認真躡緝。凡被刦之家。匪類窩聚處所。均可周知。該將軍等尤當嚴飭所屬。四出訪拏。並力行保。

甲以清匪蹤不准歸罪於被刦之家及鄰右村店之不報巧為諉卸原摺著鈔給閱看將此各諭令知之○又諭張之萬奏皖捻由楚歸巢並遏截張總愚股匪西竄遣撤吳永款募勇調張學醇赴豫各摺片皖捻程二坎分股由楚回竄豫疆經光山正陽息縣汝陽等處兵團截擊並經尹嘉賓一軍由淮店扼截敗匪全股遁出豫境該逆雖經回巢難保不糾集黨與復行竄豫著張之萬督飭在防將

士嚴密扼守毋令再行竄入邊境毛昶熙現駐歸郡防勦歸陳邊境是其專責著卽督率兵勇激勵團練進攻該逆老巢俾匪眾不得乘間再行出巢他竄毋稍玩誤息縣餘匪尚踞正息交界之談家園一帶著張之萬卽飭李殿元王文行等軍迅速埽除張總愚股匪竄撲鎮平內鄉浙川一帶勢將擾及商雒張之萬現雖分派兵勇赴西坪荆子關舊縣等處扼紮要路惟山大林深路徑叢雜著該撫

嚴飭地方文武分撥兵勇會合民團嚴密扼守飭令張曜力遏險要防其西竄並著多隆阿派撥兵勇力扼商雒毋令該匪竄入劉蓉張集馨亦當檄令毗連豫境各州縣聯絡鄉團堵截毋令與山陽一帶股匪勾合此股賊匪如不能西竄必將南趨楚境官文嚴樹森務當督率襄樊防兵實力堵遏並會合豫軍夾擊切勿稍分畛域前因蒙城兵力不敷諭令張之萬將吳永款蔣希夷所募勇丁派員

管帶赴蒙助勦茲據張之萬奏稱接劉長佑咨吳永款所部勇丁係在各處湊募恐難得力等語此項勇丁旣毋庸留豫亦毋庸赴皖著卽知會劉長佑檄令妥為遣散其吳永款一員著張之萬於其到豫後察看如該員尚能得力卽著與續行調赴豫省之吳再升一併留營酌量差委蔣希夷所部勇丁仍著該撫察看分別去留如豫省兵勇已數分布卽著仍遵前旨將蔣希夷所部酌撥赴蒙程大

老坎有無下落。前據官文等奏稱。殲斃賊首程姓。是否卽程逆弟兄。著卽確查具奏。張之萬奏請調前任安徽按察使張學醇。著卽准其調營。差委將此由六百里諭知。官文多隆阿。嚴樹森。劉蓉。張之萬。毛昶熙。並傳諭張集馨知之。○河南巡撫張之萬奏遵查宋逆回竄豫境。總兵楊長春等。委係帶隊沿途截擊。追入直境。與前次稟報尚無不符。報聞。○以山西巡撫英桂為福州將軍。戶部左侍郎沈

桂芬署山西巡撫。○予故福州將軍耆齡祭葬。諡恪慎。○予河南鎮平陣亡千總林宗魁。外委段明祭葬。世職加等。○壬寅諭內閣。御史富稼奏。近日捐納指省之員。弁皆緣有至契之人。為之引進。日尚浮華。往來宴會。毫不以功名為念。勒捐畝釐。橫加苛斂。書差勒索較賊尤甚。雖經上控。冤不得申。州縣囊橐飽滿。匪兌原籍有警。則焚毀冊卷。檢查無據。所報勦賊獲勝情形。真偽莫測。各上司受其欺

罔。遇此等債事失利之員。弁僅參降革留營。不日開復。請飭下各督撫及各路領兵大臣。詳查密訪。按照軍法從事。等語。覽其所奏。雖文理未見通暢。尚屬實在情形。文員貪污。武臣退縮。屢經嚴旨申誡。何以此等惡習。尚未肅除。各直省督撫及各路統兵大臣。受朝廷委任深恩。亟宜破除情面。認真整頓。嗣後如有指省分發之員。結黨營私。通同舞弊。苛索釐金。擾累百姓。及聞警逃避。鑽刺留營。為保

舉開復地步者。著各該督撫大吏等。指名嚴叅。從重治罪。如有瞻徇隱匿。或經朝廷訪聞。或被科道糾叅。定惟各督撫及統兵大臣是問。決不寬貸。將此通諭知之。○以刑部右侍郎吳廷棟兼署戶部左侍郎。管三庫事。○癸卯諭內閣。前因薛煥奏。江蘇常熟縣典史莫鍾琳。據該員家屬呈報陣亡。當經奉旨交部議卹。茲據李鴻章奏。咸豐十年八月間。賊犯常熟。該員帶勇抵禦。眾寡不敵。身受多傷。經

兵勇搶救得生。傷平後患病經年。繞至通州。始知家屬曾報陣亡。呈請撤銷卹典等語。莫鍾林既經遇救得生。何以遲至數年。始知家屬誤報陣亡。所稱養傷患病之處。殊難憑信。除將該員卹典撤銷外。其有無規避捏飾。仍著李鴻章確切查明。與江蘇失守城池人員案內一併從嚴叅辦。○諭議政王軍機大臣等。麒慶奏拏獲著名巨盜暨匪犯聞拏投首各摺片。熱河平泉州回民劉寬逞兇肆掠。積年巨盜。經麒慶派員緝獲。解至熱河訊明。實係盜首。現交承德府牢固監禁。該犯係著名盜首。且黨與眾多。亟宜速為誅除。以絕巨患。著卽飭令承審各員。卽將該匪所犯各案。嚴訊確供。盡法懲治。迅速了結。為從匪犯。仍著飭令派出委員。帶同番役等密速查拏。毋任一名漏網。其縱盜之地方官。有無賄屬情弊。並著悉心訪查。嚴行叅辦。綽金汰聚眾滋事一案。業令投首之那木薩賴專人覓獲。綽金

汰自行赴案矣。綽金汰係案內要犯。務須責令迅速查拏。分別訊辦。不得稍涉懈弛。將此諭令知之。尋奏劉寬現已訊明正法。據供向在平泉赤峰交界之處藏匿。此拏彼竄。以致久未弋獲。尚無賄脫情弊。惟該州縣等查拏不力。應請交部議處。從之。○又諭李鴻章奏無錫各軍擊退大股援賊。連獲大捷一摺。忠侍各悍酋。糾率大股。併力回援。冀擾蘇軍後路。經劉銘傳等滾營偏紮。晝夜苦戰。得以大挫其鋒。實屬奮勇出力。惟將士摧堅陷陣。攻勦過勞。而窮寇負隅死守。且訊據賊供。忠逆暫退蘇州北望亭一帶。仍欲繞由潁關背後援應蘇州。是賊黨雖敗。而援蘇之路未斷。李鴻章亟宜乘此兵威大振之時。督飭水陸各軍。併力攻克蘇城。並飭李鶴章劉銘傳等。乘勝進紮。圍攻無錫。使賊首尾不能相顧。則一處得手。其餘自成破竹之勢。現在聲威正盛。尤當謀出萬全。李鴻章仍須督率各軍。於奮

勇之中力求穩慎。迅奏膚公同膺懋賞。實有厚望焉。將此由六百里諭令知之。○又諭富明阿奏續報攻勦情形一摺。據稱本月十八九等日。詹啟綸等前偏賊壘紮營與英翰原紮之營聯為一氣。截賊糧運。英翰亦在蒙城南門外。槍築三營。又派程文炳等進紮要地。與陳國瑞聯絡應援。僧格林沁派翼長舒通額等帶馬隊二千名到蒙。國瑞亦於二十三日到蒙。僧格林沁現駐葛家樓。勦辦苗捻各圩。肅清後路。並李世忠攻克中心渡。及李萬春等賊圩。殺賊數千。急圖報國等語。蒙城合圍賊糧已斷。僧格林沁國瑞先後到蒙。軍威已振。現在附逆各圩紛紛投誠。實有可乘之機會。著僧格林沁等督飭各軍奮力進取。先解蒙城之圍。仍責令投誠各圩密圖首逆。如能函首來獻。餘黨自必瓦解。或以賊攻賊。令當前敵。而以勁軍繼其後。其真能出力者。免罪優獎。如不出力。立予正法。該親王等務當

妥速辦理。以紓朝廷南顧之憂。惟苗逆設計陰狡。僧格林沁等須刻刻防維。不可稍涉大意。李世忠屢克賊圩。殺賊不少。其所部傷亡亦多。著僧格林沁曾國藩加以獎勵。使其格外出力報效。並令其進取下蔡老巢。使苗逆腹背受敵。以收指臂之效。富明阿片奏援蒙各軍進勦機宜。咨報僧格林沁彙奏等語。嗣後皖省攻勦苗捻各路兵勇。及陳國瑞等軍一併統歸僧格林沁節制。以一事權。從此

各軍有所稟承。自不難迅奏膚公。剋期蕆事。李世忠立功圖報。其心無他。惟其手下人多有不安本分者。恐該提督有未能查知禁止之處。致為人言所指。近日間有武弁黃銀懷。自稱升用總兵。係李世忠部將。奉委到江西省城提取餉銀。迺購屋娶妻。窩娼聚賭。提刀逞兇。被人呈控有案。又有都司胡冠英。徐鳳和二員。赴新建屬之吳城鎮造船。其文移有管帶豫勝營提督王字樣。此等劣弁未知

是否李世忠部下。著曾國藩飭知李世忠。卽將該員等撤回管束。如係冒名提餉造船。卽知會江西巡撫。將該員拏辦。以示懲儆。富明阿前奏蒙城被圍。實由唐訓方不能豫先籌顧。又將英翰一軍撤回小澗集。致與城內聲氣不能相聯。使該逆得以乘隙肆志。至今補救為難等語。唐訓方辦理蒙城事宜。是否措置乖方。著僧格林沁查明具奏。原片著鈔給。僧格林沁閱看。將此由六百里各諭令知之。

又諭沈葆楨奏籌防西路布置情形一摺。石逆餘黨李幅猷一股。被官兵擊敗。回竄黔粵境內。是江省西南防務。可以稍鬆。惟該逆奔竄靡定。且永甯等縣有齋匪餘孽。乘機思逞。不可無得力兵勇扼要駐紮。以備不虞。沈葆楨現因席寶田江忠義兩軍請假休息。已檄調普承忠帶兵千人回顧吉安。並饒防之韓進春一軍馳回贛州。相機迎擊。布置甚為周密。著即嚴飭該護鎮等。速將齋匪餘黨。按

捕淨盡。仍隨時確探李逆蹤跡。如再由楚粵東竄。卽激勵軍士。協同地方團練。併力兜剿。俾完善之區。該匪無從闖入。方為妥善。該撫因西路有警。不敢拘定假期。現已力疾視事。具見以國事為重。忠蓋可嘉。所稱隨時參酌。以民力補兵數之闕。以吏治為軍政之根等語。洵能洞中窾要。著卽振刷精神。力圖整頓。務令治效蒸蒸日上。朝廷紓南顧之憂。方為不負委任。另片密陳李世忠委員黃銀懷來江索餉。並造船之胡冠英等形跡。均覺可疑等語。本日已諭令曾國藩轉飭李世忠將黃銀懷等迅速撤回矣。黃銀懷等近日作何舉動。該撫仍當密飭地方員弁認真查察。毋稍大意。將此由五百里諭令知之。命荊州將軍富明阿幫辦欽差大臣僧格林沁軍務。以安徽援剿蒙城擒匪出力。賞協領巴凌阿委參領托雲。佈告蒙阿巴圖魯名號。防禦色凌額等花翎。委防禦台費英阿等藍翎。餘加

新舊額賦

平陽縣志卷之三

四十三

點修總教習趙冠昌撰起居注太子太傅文淵閣領閣事翰林院掌院學士稽察欽奉王諭事件及子之昭修輯欽定四庫全書纂輯大臣鑄監鑄通志總纂

理吏部事務戶部工部事務七改軍功和五錢清冊七銀錢銀三十次月實案官官職職官冬子係大日閱領閣事經仁閣大學士並殿臚藏

正統漢州郡使管理二部先機并事為大臣輔國心軍功加一載偏帶子孫銀錢七十五兩宋聖祖勅為功臣子孫地產官太子太師孫師學內

學生宿舍教養上諸事件處理史稿總序
略論我國編輯大學在新南臺灣之發展與影響
三、廣東省圖書館之成立及其發展

[illegible]

同治二年癸亥十一月甲辰朔

慈安皇太后安平室問

先醫之神○諭內閣御史張盛藻奏請儲將

才以衛京師一摺據稱京師為根本重地懇

請嗣後簡用京師都統統領總兵大員及兵

部尚書侍郎必擇知兵善戰之人畀此重任

或在外省軍營擇其帶兵得力者先調來京。

任以都統總兵之職卽將現在都統總兵等

官酌發軍營學習陸續調回仍歸京職等語所奏殊屬非是我朝京營額設重兵分隸八旗都統及步軍統領衙門一切操防訓練章程經畫至為周備各都統統領總兵大員均受朝廷特簡與外省將軍督撫等體制相埒果能懷遵成憲講求武備於該管各營認真教練何難悉成勁旅以備折衝若如該御史所奏勢必將外省軍營知兵善戰之人全數調京而以舉朝都統等大員盡發軍營學習

此等政體實從來所未有該御史初膺言職於國家政務並不求其事之可行輒以此等荒謬窒礙之言率行陳奏實屬冒昧至所奏六部司員請仿河工學習之例由六部堂官保送軍營學習亦適啟鑽營徼幸之路徒事紛擾無裨部務所奏亦不可行另片奏近來升擢外省督撫往往令其毋庸來京請訓而藩臬道府各員亦多因督撫代奏緩其陛見竟有由微員擢至一二品官尚不知朝覲述

職為何事者所奏雖為整肅紀綱起見惟近來各省軍務緊要朝廷為地擇人原冀地方早就肅清故稍為變通以期於事有濟至予奪黜陟之權操之自上魁柄並不下移亦何至外省屬吏止知趨承督撫並不尊奉朝廷所奏亦屬失當均著毋庸置議該御史片內所稱請飭吏部嚴定章程除軍營帶兵各員暫緩引見外凡保舉至地方官者未經赴部引見人員不准到任已到任者咨取赴部並

定遲延處分等語著吏部妥議具奏○諭議政王軍機大臣等吳崇奏擒股西竄曹單派隊跟追並官軍連破蒙東賊壘閻敬銘奏南擒蠢動勢難分兵赴皖各一摺南擒相盤劉泉李大箇子由豐縣擾及山東之金鄉單縣嶧縣城武等處旋由西南各路回竄碭山一帶現在東境雖已無匪蹤惟南擒屢由金鄉等縣北犯已成該逆熟徑難保不再圖回竄著吳崇閻敬銘督飭兩省官軍會同進剿務

將此股殲除淨盡。不得以賊匪業經擊退。即可卸責也。現在東省勇丁。既據閭敬銘奏稱。所留無多。卽著毋庸抽調。赴皖助剿。其遣撤歸農之勇丁。能否散而不聚。有無後患。著閭敬銘體察妥為辦理。毋令今日後滋生事端。所練馬隊。並著該署撫督飭丁寶楨挑選額兵配騎操演。務使認真訓練。不可有名無實。蒙城官軍。已將正西及西南東南三面賊營包圍。陳國瑞現派遊擊李坤等在蒙南紮營一座。擬再添營兩座。四面長圍漸合。著吳棠督飭陳國瑞將蒙南營壘趕緊築成。我軍一經合圍。則賊之糧運卽斷。攻勦自易得手。僧格林沁已抵亳州。卽日進兵勦苗。國瑞馬隊已由徐赴宿。各該營餉需。並著吳棠隨時接濟。僧格林沁既已抵皖。所有該省軍情及應行請獎人員。著吳棠知會富明阿嗣後均由該親王陳奏。以一事權。將此由五百里各諭令知之。○又諭前因毛震壽奏陳漢南艱窘情

形。請於川省借地抽取鹽釐濟餉。當經諭令駱秉章按照所奏籌辦。嗣因劉蓉奏稱川省鹽釐應由井竈抽收。復經諭令駱秉章酌量辦理。茲據駱秉章奏稱川省鹽釐疊經酌定稅則。在渝城並富榮捷樂等廠設局分按斤包水引抽取。自滇匪闖入後。塞井夷竈。陝商在川貿易者。多將資本運回原籍。復被陝回焚掠。至今尚未全行復業。兼以淮運已通。楚鹽價減。川商無利可圖。請免予再抽。陝省加半鹽釐等語。自係為體恤商情起見。惟前據劉蓉奏稱川省各廠鹽筴之利。井竈實居其源。而商販特承其流。擬就井竈起課。按鍋計鹽。按鹽定釐。是駱秉章所謂鹽釐者。係就商運之鹽。分別按計斤包引數抽收。劉蓉所謂鹽釐者。係就井竈按鍋計鹽抽收。辦法本有不同。現在川省商力雖疲。而各處銷鹽之路尚無阻滯。劉蓉前任川藩一載有餘。所擬由井竈抽釐之法。自必確有所見。著駱秉章仍

按該撫原奏悉心妥籌覈實定議具奏以裕度支而資餉源將此諭令知之。以直隸天津疊次防勦出力賞參領春霖知府周家勳等花翎知州嚴祖全等藍翎總兵徐廷楷等加銜升敘開復有差。乙巳諭內閣都察院奏奉天民人徐雲峰呈控錢債案內牽涉巡城御史受賄勒結並巡視東城給事中劉毓楠奏訊據徐雲峰供稱有御史舒明家丁向被告索銀等情各一摺案關御史家丁詐贓勒結虛實均應徹底根究著刑部提集全案人證卷宗及袁繩武家人李貴等逐一隔別研訊務得確情按律定擬具奏御史舒明著聽候傳質一面將案內牽涉索賄之家人昇李勒令一併交出歸案審辦。又諭都察院奏奉天孀婦周趙氏以慘殺多命誣扳偏供等詞赴該衙門呈訴案關盜賊肆搶連斃一家數命情節較重業經被控二次交該將軍等嚴訊事歷四年之久不將本案清理反將

事主誣陷偏供荒謬已極著玉明和潤德椿迅卽親提人證卷宗秉公嚴訊務得確情按律定擬速奏毋得仍前玩泄呈內所指受賄之委員經書人等著該將軍等查明一併嚴行叅辦。又諭都察院奏湖北民人葉華品以隄潰停修全境被害等詞赴該衙門呈訴據稱公安縣歷年被淹皆因江陵縣南岸之毛家尖楊家尖等處隄潰所致公安民人撥助經費始行興工幫費用盡工卽停止本年復被江水漲淹等語隄工緊要民命攸關亟應設法修築以資捍衛惟此項工程是否向由紳民倡捐興修抑應由官為經理之處著官文嚴樹森體察情形妥籌辦理。諭議政王軍機大臣等大理寺卿賀壽慈奏本年皖捻由豫竄楚自襄陽以至黃麻七八百里中均遭荼毒使各屬團練猶齊兵力有助不至於此現在竄匪雖靖鄰氛未弭請飭認真整頓團練各等語團練保甲相輔而行本地方

大吏應為之事。湖北黃州等屬團練上年曾立戰功。著有成效。此時何以漸就廢弛。現在程二老坎雖已回巢。而楚邊已為該逆熟徑。張總愚竄擾浙川一帶。圖伺鄂疆。亟應乘賊蹤未及之先。力求整頓。著該督撫等於界連皖豫兩省地方。飭令各屬團練實力舉行。重加整飭。毋得有名無實。至所保在籍道員陳慶溥員外郎吳鼎元。督同勸辦之處。並著該督撫妥為察看。如該員等可期得力。卽飭妥

為辦理。賀壽慈原摺片二件。著鈔給閱看。又據都察院奏。公安縣民人葉華品呈稱。該縣自咸豐十年江陵之毛家尖隄潰漫。被淹四載。屢經督撫劄飭江陵修復。復由公安籌款幫費。均以無費停工。小民頻遭水患。淹斃餒斃慘不可言。懇恩早為修復等語。本日已明降諭旨。令官文等查明該處修隄之費。向來是否民捐民辦。抑應官為修理。酌量奏辦。惟覽該民人所呈。該縣連年被淹。流離困苦。經

費實無從出。官文嚴樹森尤當體察情形。如向係民捐。而現在民力實有未逮之處。亦當設法迅為捍築。保全民命。毋得徒事批飭興修。仍復任令地方官藉口修費延閣不辦。以重隄工。是為至要。葉華品原呈原圖著分別鈔錄發給閱看。將此由五百里各諭令知之。○又諭李鴻章奏進攻蘇城。踰毀賊壘二十餘座。及無錫近日軍情各摺片。李鴻章馳抵蘇州。周歷各門。督軍進攻。賊於葑齊婁盤各

門外密布長城石壘。而婁門外壘尤高堅。偽忠逆李秀城復由望亭帶領悍賊繞由泖關背後靈巖木瀆小路入城死守。李鴻章於上月十九二十等日。親督程學啟戈登等各軍奮力猛攻。將各門外長城十餘里賊壘二十餘座全行攻毀。東南北三面我軍已可徑抵城下。賊膽已寒。惟蘇州為忠逆巢穴。志必死守。城內賊眾尚十餘萬。無路逃生。不得不為困獸之鬬。且恐忠逆詭詐。仍欲出擾我軍後

路圖解重圍著李鴻章督飭各軍乘勝轟打當茲功在垂成尤應嚴密戒備不可稍涉疏懈以策萬全城中逆酋乞為內應未知是否可信李鴻章督飭程學啟等妥籌辦理毋稍大意無錫各軍乘勝偪勦李鶴章劉銘傳等復將附城三里街及萬壽橋賊壘數十座全行擊潰錫城東面已無賊營南北惟高橋及望亭兩處賊壘林立即著李鴻章督飭李鶴章劉銘傳等速即進攻高橋直逼城下仍將

郭松林等遊擊之師相機調度力圖合圍務使蘇錫兩城之賊不能相顧官軍得以早復名城同膺懋賞實殷厚望將此由六百里諭令知之又諭唐訓方奏陳圍攻蚌埠並壽州蒙城軍情與富明阿前奏蒙壽情形大略相同蚌埠逆匪併力抗拒官軍唐訓方屢次進攻未克現已挖掘長濠將該圩圍困其附近民圩亦經該撫開導令其轉相招徠以孤賊勢該撫現回臨淮派兵進紮湖溝辦理招

撫各圩事宜惟蚌埠懷遠為蒙壽兩城適中扼要之區非速行攻拔不能斷蒙壽兩處逆匪聲援現當蚌埠攻勦喫緊之際該撫遽行回駐臨淮恐前敵諸軍因此鬆勁湖溝地方既有陳松一營由固鎮移紮該處足資防禦該撫俟辦理反正各圩已有頭緒後仍當親往蚌埠督飭前敵各軍將該圩速行攻拔以便進克懷遠不可坐失事機李世忠一軍屢克賊圩多處前因其距壽州城外僅十餘里

諭令曾國藩飭令該提督將壽州速行攻拔並飭蔣凝學成大吉各軍會合進攻復據富明阿奏稱已咨該提督令其進取下蔡力圖苗逆老巢此次該撫所奏亦有函催該提督速進為搗穴焚巢之計現在李世忠應否先取壽城或越過壽城先搗下蔡老巢之處著唐訓方商同該提督斟酌辦理總須顧定後路毋為匪眾抄襲方為妥善將此由五百里諭令知之○予江蘇蘇州陣亡副將尹連陞

祭葬世職加等。○句到本年並上年朝審情實罪犯停決斬犯二人絞犯三人餘十二人予句。撥湖北江海關稅銀三萬兩解赴安徽臨淮以濟軍餉。丙午諭議政王軍機大臣等玉明等奏盜匪回竄吉林長春廳屬之靠山屯等處仍催兵追勦一摺據稱該匪竄至梨樹城肆擾後齊秀等竄回江東滾地雷王五等竄至吉林之靠山屯等處地方約有五六百人景綸等已派兵役四百名馳往防勦玉明前調官兵二千餘名亦已陸續前進。如果匪徒僅止五六百人玉明所派官軍已數千人諒茲小醜不難剋日殲除惟玉明所派帶兵之員係屬何人未據陳奏儻將領不得其人則散而無紀何能得力著玉明等於該處品級較大各員遴選知兵能戰者將調派各兵交其統帶迅催星夜趕赴賊眾處所奮力進勦儻派出之員帶隊不力觀望遷延或遇賊卽潰卽著嚴叅懲辦盛京為根本重

地平日養兵丁坐耗餉糈及匪黨竊發任令肆意侵擾毫無阻遏該將軍等自問當得何罪該匪已竄吉林所屬地方著景綸嚴催和常喜等遇賊卽擊與盛京派出各軍合力兜擊就地殲除毋稍大意吉林兵數較單仍著玉明等飭令兵弁會合追捕不得稍分畛域致誤事機寶善早經起程著卽星馳前進將勦匪一切事宜會同玉明等妥籌辦法毋稍稽遲將此由五百里各諭令知之○又

諭唐訓方奏官軍攻克蚌埠要隘並收復懷遠縣城一摺懷遠一城東據臨淮上游西為壽州下蔡正陽等處門戶西北由渦河直達蒙城最關險要苗逆自占踞該城後率眾逾萬於蚌埠南北兩岸拒守阻官軍進取之路經唐訓方調派水陸各軍層層圍裹賊勢不支逆黨張士端窮蹙求撫先後將蚌埠要隘及懷遠縣城獻出唐訓方現已督帶將領整隊入城其尤為出力各員均照所請先予獎

欽惟張士端係苗逆死黨屢抗官軍前經降旨革職儻能悔過自新擒斬苗逆方准開復今力竭勢窮始行反正城雖獻而首逆未除未便遽准開復原官念其獻出城隘尚知順逆降旨先行賞給遊擊銜仍著唐訓方用為前隊嚮導官軍攻取苗逆老巢若能使元兇授首自當格外恩施准予開復李世忠聞知蚌埠收復即親率李顯發等馳赴懷遠會合夾擊勦辦甚覺奮勉現在懷城已克李世忠

一軍應否進攻壽州抑或直擣下蔡著僧格林沁曾國藩商同唐訓方等酌量調遣毋誤事機臨淮一帶水師現在作何布置如淮流尚未枯涸唐訓方應督飭礮船由懷遠汴流而上南可以攻取正陽壽州斬關奪隘北可以攻取下蔡老寨埽穴擒渠惟當與李世忠所部水陸並進使該逆應接不暇諒不難剋日殲擒蒙城糧食將盡危迫萬分所存小澗集雜糧前據富明阿奏礮船既不能運送開

它地道又徒勞無功半月以來城中情形若何聲息能否相通朝廷實深慮念苗練回撲蒙城時馬新貽因救援臨淮未回蒙邑英翰以數千人扼紮小澗集所恃以守城殺賊者僅練總李南華一軍耳其奮發有為之概求之將弁中不可多得現被苗練圍攻日蹙若不設法援救恐壯士聞而灰心苗逆亦因之得志著僧格林沁督同富明阿等迅飭諸軍一面截賊糧運一面挑選勁旅分攻賊營務

期糧道可通城中得有接濟方為妥善若徒以外圍賊營為事遷延日月坐令蒙邑被陷縱能攻破賊營恐所得不償所失也將此由六百里各諭令知之○又諭張集馨奏彙報各路勦匪獲勝情形並周有全李雲麟各軍擊賊獲勝等摺片曹克忠一軍由三水直抵白吉原誘賊出戰斃賊甚多賊向固原而遁雷正綰自攻克拜家河後肅清永壽立解邠州城圍將亭口賊巢攻克現與曹克忠約會

夾擊陶茂林自克麻子崖後復攻克桃園堡火燒村等賊壘多處惟鳳翔府北尚有大股賊巢直達汧隴著多隆阿卽飭陶茂林將郡北大股逆匪埽除直達平涼力圖收復雷正綰當乘此聲威卽行入甘節節埽蕩如沿途尚有阻隔著熙麟派兵迎探會合進剿並激勵兵團俾益加鼓舞以收廓清之效陝西餘匪未靖更當飭令曹克忠一軍實力進剿埽除餘孽再行節節前進盩厔一城前據多隆

阿奏業經合圍近日當已攻拔著卽督同穆圖善等認真勦辦山陽逆匪圖竄商州雖李雲麟等小有擒獲尚未據報克復張集馨摺內有李雲麟連日未曾出隊及藍斯明人馬俱受槍傷等語著劉蓉飛催李雲麟迅將山陽攻復盡殲醜類如任令竄擾商州定惟李雲麟是問多隆阿卽飭藍斯明會同李雲麟相機兜剿藍斯明受傷情形並著查明具奏李雲麟前派之守備龍常等赴石泉同守城

垣現據漢陰紳士稟稱龍常胡文勝駐紮城內與民團雜處恐誤事機張集馨已令其會同守隘並令周有全就近調撥擇要嚴防著劉蓉卽行知照李雲麟飭令龍常等扼要駐紮毋令賊氛擾近城垣是為至要漢中賊勢極為猖獗劉蓉當剋日進剿並知照多隆阿撥兵合擊以期早日殄除不得再有遲誤程景鵬殺斃馮元佐勾引土匪謀逆張集馨已令同官縣知縣周文會等拏辦程景鵬不服

拘拏業被眾勇砍斃眾勇悉遵約束現復出示曉諭願歸農者聽其歸農願赴甘者卽由雷致遠帶赴慶陽所辦尚屬妥協此起圍丁如由雷致遠帶赴慶陽著熙麟加意約束毋令滋事張集馨片內又稱寨內安靜可無他虞等語程景鵬既經誅鋤眾勇散遣自應將該寨平毀若仍留空寨恐復有匪徒占踞為患將來是否另派公正紳耆興辦並著查明具奏其未獲之韓可英等仍飭地方文武嚴

緝不獲一名漏網將此由六百里諭知多隆
阿熙麟劉蓉雷正綰並傳諭張集馨知之○
以安徽攻克蚌埠並收復懷遠縣城賞投誠
內應張士端遊擊銜予總兵官王才秀等升
敘開復有差○撥工部火藥十萬斤解赴陝
西軍營備用○丁未諭內閣僧格林沁等奏
督軍進援蒙城斬馘首逆苗沛霖生擒悍黨
踴平賊壘立解城圍一摺苗逆糾黨數萬圍
攻蒙城經富明阿陳國瑞等先後督兵馳救
疊有斬擒而賊眾且悍圍城三匝營壘如林
十月十四等日僧格林沁督帶馬步各軍馳
赴亳州先將附逆之蔣集匪首陳萬幅擒斬
並攻破楊家寨賊巢遂與國瑞等軍會合進
逼二十五日富明阿國瑞進攻正南一面斷
賊糧路賊匪併力撲城並出犯長濠官軍槍
礮齊施斃賊極多當將蔡家圩及賊營二十
四座攻破二十六日僧格林沁親督大軍分
路進攻何建龍於西南一面進剿礮無虛發

傅振邦陳國瑞帶勇齊進攻破賊營賊勢大
亂英翰卽由正南詹啟綸由正西繼進各軍
一齊吶喊同時分登賊壘槍擊矛刺斃賊無
數餘匪奔竄復經陳國瑞托倫布詹啟綸截
殺殆盡其河南賊壘三處河北賊營五座亦
經陳國瑞姚廣武等軍攻破首逆苗沛霖於
昏夜之中越濠圖竄經總兵王萬清親持短
兵奮力砍斃搶屍入營呈驗屬實是役共計
殺賊數千名奪獲軍械贏馬旗幟刀矛無算
蒙城之圍立解逆黨苗金開張建猷趙克沅
等亦經副將張從龍擒獲解營著卽訊明正
法苗沛霖以諸生充當練總擢至道員不思
圖報高厚竟敢怙惡不悛屢降屢叛戕官踞
城荼毒生靈罪大惡極現經僧格林沁等督
兵砍殺戮屍梟示洵足以申國憲而快人心
僧格林沁甫抵蒙城元兇授首具見調度有
方深堪嘉尚著交部從優議敘富明阿國瑞
著一併交部從優議敘記名總兵陳國瑞著

俟補總兵後以提督記名簡放總兵詹啟綸著遇有提督缺出儘先提奏總兵王萬清著賞給勁勇巴圖魯名號蒙城官紳李南華等固守待援時逾數月卒能保全要地實屬異常奮勉李南華前經唐訓方保奏降旨以副將補用著再加恩交軍機處記名遇有總兵缺出請旨簡放署蒙城縣知縣賀緒蕃著免補知縣以同知直隸州知州補用並賞加四品銜以示優獎其餘解圍出力及嬰城固守

之員弁官紳著僧格林沁等查明擇尤保奏候旨施恩○又諭李鴻章奏督軍攻勦蘇州城垣賊勢窮蹙內應官軍入城截殺克復省城一摺覽奏實深欣慰蘇州省城被逆匪占踞四年之久經李鴻章督隊進攻連克婁齊葑盤四門外長城賊壘城內賊膽已寒乞為內應十月二十日偽忠王李秀城見官軍攻逼日緊城賊散亂帶死黨萬餘宵遁專交老賊偽暮王譚紹洸拌死固守二十三、四等日

程學啟李朝斌黃翼升等親督水陸各軍分路進攻晝夜不撤愈逼愈緊戈登亦親抵城根開礮轟擊二十四日偽暮王譚紹洸上城抵拒正在對眾指揮偽王郅雲官等商令偽天將汪有為出其不意將譚紹洸乘隙刺殺並殺斃譚逆死黨千餘開門迎降程學啟等帶隊入城彈壓並按斃悍賊數千名李朝斌等復由盤門等處截殺多名解散數千人立將蘇州省城克復仍著李鴻章督令將士乘

勝進攻常州會師金陵埽穴擒渠廓清江境協辦大學士兩江總督曾國藩遣將助兵克復名城著交部從優議敘李鴻章自簡任江蘇巡撫以來悉心調度謀畫萬全疊下堅城戰功屢著此次督軍克復蘇州省城尤堪嘉尚著加恩賞加太子少保銜並賞穿黃馬褂以示優獎黃翼升李朝斌均著賞給雲騎尉世職並交部從優議敘程學啟著賞給雲騎尉世職並賞穿黃馬褂權授江蘇省總兵戈

登帶隊助勦洞悉機謀尤為出力著賞給頭等功牌並賞銀一萬兩以示嘉獎諭議政王軍機大臣等僧格林沁奏督軍進援蒙城蹕平賊壘殲斃首逆立解城圍一摺苗沛霖怙惡不悛屢降屢叛前乘官軍回救臨淮糾合醜類圍撲蒙城深濠固壘志在必得自僧格林沁督師抵蒙軍威大振南路運糧之賊營及蔡家圩逆眾聞風潛遁該親王復親督將領分路進攻蹕平賊壘多座苗沛霖暗越長濠希圖免脫經王萬清短兵砍斃立解城圍覽奏曷勝欣慰現在元兇就戮壽州下蔡等處賊膽已寒亟宜乘勝進兵埽除巢穴且懷遠縣城昨據唐訓方奏業經收復著僧格林沁飭令富明阿督同陳國瑞等迅速進取下蔡苗逆老巢唐訓方恪遵昨日諭旨商同李世忠率水陸各軍分勦壽州踞匪並著曾國藩嚴飭駐守潁六之文武員弁會師夾擊務將苗逆餘黨悉數殲除毋令一名漏網至

擒首李大箇子竄回岳家集相盤等占踞石弓山等處程二老坎復回亳州有出巢肆擾之信加以苗逆餘黨隨在可以併入現在僧格林沁在皖恐匪眾不敢回巢四出紛擾該大臣已派蘇克金等分路攻勦一經得手更恐伺隙旁竄楚豫山左各邊境不可不加意防範力遏賊氛著官文吳棠嚴樹森張之萬閻敬銘分飭所屬豫為戒備實力截勦儻匪蹤竄擾何省地方即惟何省督撫是問不能寬貸也張之萬奏留之黑龍江餘丁及察哈爾馬匹已據僧格林沁派令色爾固善赴豫教練著張之萬隨時整飭俾成勁旅其張總愚一股現竄何處並著張之萬督飭張曜等趕緊殲除毋貽鄰患本日據李鴻章馳奏蘇州省城業經官軍克復計可乘勝進取無錫常州近來各路軍營更番奏捷天時人事大有轉機各路統兵大臣及各該督撫等受朝廷委任深恩其各振刷精神力圖埽蕩廓清

函夏有厚望焉將此由六百里各諭令知之○又諭李鴻章奏督軍攻勦蘇州克復省垣一摺逆匪盤踞蘇城與金陵杭城互為犄角蘇城得手他處自不難迎刃而解惟忠逆帶所部萬餘由光福靈巖一帶小路搭橋而去此路係前次該逆首由許關潛入蘇城之路恐復自立一幟擁眾踞我要隘或竄出重圍紛擾他處希冀分我兵力著李鴻章迅即查明忠逆實在下落具奏譚逆授首其手下之偽大王天將等如何安置降眾除解散外分隸各營共有若干俟部勒稍定可以進攻常州該撫能否在蘇城駐守居中調度抑或親赴無錫常州督勦之處均著酌度妥辦上海一隅為華洋交涉要地餉源所繫劉卹膏等日後能否辦理裕如並應否酌留武職大員在彼駐紮彈壓李鴻章仍當隨時兼顧以期周密忠逆兇狡異常人數尚眾此次見蘇城人心散亂即率眾潛逃失勢之賊其部下亦

必各懷離異著李鴻章一面設法用計誘擒一面檄令無錫等處官軍慎重防範來則痛加勦截該逆不得志於蘇必將肆虐於浙左宗棠務飭蔣益澧等嚴行防勦蘇垣既克杭省賊勢漸孤並著飭令各軍奮力攻克以成破竹之勢金陵至蘇之路已斷惟恐該逆仍思鋌走曾國藩須飭曾國荃加意慎防並乘隙圖取石城如能句合內應較有把握此外皖南江西鎮江江北等處頭頭是道曾國藩都興阿沈葆楨馮子材魁玉等當各飭將弁慎固地方毋令敗匪肆意闖入此次攻克蘇城戈登甚為奮勇出力著李鴻章傳旨嘉獎本日已明降諭旨賞給戈登頭等功牌並賞銀一萬兩以示嘉獎所有銀兩著李鴻章籌款賞給外國本有寶星名目崇厚等曾經製造有式諒李鴻章亦必知之所有賞給頭等功牌即可仿照變通辦理本日據僧格林沁奏蒙城解圍苗逆授首北路亦漸可廓清揚

州及裏下河一帶防務已鬆都興阿駐紮揚州保衛裏下河等處完善之區現在江南賊勢日熾亟須飭令水陸各營嚴密整備不可稍有罅漏為賊所乘曾國藩總統諸軍尤當督飭各處帶兵大員慎益加慎以成全功同膺懋賞有厚望焉將此由六百里各諭令知之○以克復江蘇蘇州省城予奏事官恆裕等優敘○以克復江蘇蘇州府城賞總兵官陳有昇成俞卿李恆嵩從一品封典總兵官

周正林鄭國魁副將田名魁陳忠德參將葉廷杓巴圖魯名號守備謝梁鎮花翎餘加銜升敘有差予陣亡遊擊張福都司衛龍勝守備顏榮合千總方榮海把總方有桂等祭葬世職加等○戊申諭內閣劉長佑奏請將隨營差委人員仍歸廣東補用等語江蘇候補同知劉廷璣經該督由廣西帶赴廣東旋由廣東帶至直隸奏明俟軍務告竣仍回廣東補用嗣經部議以江蘇係軍務省分不准改

歸他省茲復奏稱該員熟悉兩廣情形請仍歸廣東補用軍務省分候補人員例不准改歸他省且粵省信宜容縣軍務業將竣事與江蘇究有區別劉廷璣著仍照部議歸於江蘇候補所請歸於廣東補用之處著不准行○又諭曾國藩奏提督丁憂懇請開缺回籍奔喪等語福建陸路提督王明山現丁母憂例應回籍守制該員在曾國藩軍營帶兵打仗向稱得力王明山著准其開缺回籍奔喪

以遂孝思仍著於百日後即回安慶軍營帶兵勦賊○又諭毛鴻賓奏請將刦盜重案酌擬章程變通辦理等語廣東省各屬刦盜重案日常數起而弋獲者甚屬寥寥其申報獲犯者往往聲明帶病旋即報故總由地方官捕務久弛甚或以盜案處分綦重希圖搪塞積習相沿轉致兇惡眾著之犯瘐死獄中幸逃顯戮殊不足以昭炯戒亟應量為變通以除積弊著照毛鴻賓所擬嗣後廣東省除廣

州府屬及佛岡直隸同知拏獲逆匪盜犯仍行解省勘審外其距省較遠之各府廳州縣所獲拜會從逆拒敵官兵及疊次行劫夥眾持械拒捕傷人罪應斬梟斬決各犯由各該州縣審實後卽解送該管道府覆審錄供具詳該督撫覈明情節確實卽行飭令就地正法一俟軍務完竣盜匪斂戢卽行奏明仍照舊章辦理此外尋常命盜案件著仍照例勘解以符定制○諭議政王軍機大臣等劉長

佑奏畿輔軍務已竣遵旨回省酌留兵勇妥籌分布一摺劉長佑以直境漸就肅清各營標兵從征日久擬令暫為休息概予撤回歸伍其各營勇丁除撤遣外現存余承恩練勇一千名崔福泰勇丁五百名李明惠陳飛熊等楚勇二千一百名並祝塏舊募豫勇一千五百名共練勇五千餘名分布開東長及廣平威縣衡水河間等處以資捍衛所籌尚屬周妥現在直東交界伏莽尚多此項勇丁自

不能不酌留分布以備隨時按捕防勦之用惟將來地方一律平靖增設營鎮議及久遠如該督前奏抽練營兵酌募勇丁各事宜仍須懷遵前諭一切俱從標兵體制募勇一節仍當於本省地方招募教練較為得宜其現在撤存楚勇一俟全境清謐仍可隨時妥為撤遣或調赴他省有賊處所勦賊較為妥善至畿輔東西大道騎馬賊匪出沒剽掠該督現將各營選留膽壯馬勇二百名分赴大道

各州縣按緝此係何項馬勇統帶之員究係何人儻或以軍營遣撤毫無紀律之眾任其散布各州縣地方不但不能得力且恐借按緝為名到處騷擾或竟暗與馬賊通氣剽掠分肥均不可不嚴為之備著劉長佑認真察看如不可留卽當一律裁遣毋滋後患該督現已定期回省卽著將吏治營伍一切應辦事宜實力整頓以副朝廷簡任畿疆至意提督鄭魁士自到營以來追勦賊匪頗著勞績

現以舊傷觸寒舉發著准其回籍調養以示體恤其已革總兵伊綿阿並准其留於大名防所以資得力將此諭令知之○又諭曾國藩奏克復水陽等隘甯國等縣城池勦撫兼施一摺皖南水路官軍陸續攻克水陽新河莊東壩各隘高淳甯國建平溧水四城賊目楊友青楊柳谷鄭魁武張勝祿等或率眾投誠或獻城內應辦理甚為得手惟投誠留營之眾須隨時留意妥為駕馭毋令再有反覆其遣散之眾亦須令其呈繳軍械分散行走毋聽其隨地屯集復成巨股江中二逆乘虛竊踞廣德州城該處為江皖門戶最係扼要之區曾國藩務當乘此聲威派撥勁旅迅速馳往將該城攻拔以期與浙師聯絡皖南境內已無大股賊匪曾國藩派撥諸軍分駐青陽等各城著卽飭令駐守各軍將附近餘匪分路勦除並飭前敵水陸各營乘勝由東瀾高溧一帶分途進取自當勢如破竹李鴻章

一軍既克蘇城無錫常郡自可迎刃而解該大臣當檄飭各營將士與李鴻章聯絡聲勢節節進取為合圍金陵之計仍須慎益加慎毋稍大意將此由六百里各諭令知之○又諭張集馨奏收復山陽縣城石泉擊賊獲勝雷正綰等軍勦辦情形請保出力紳團並定遠廳團勇防勦得力各摺片山陽縣城踞匪經李雲麟藍斯明兩路進攻該逆乘夜東竄至中村銀花一帶當將縣城退出此股逆匪已距商州不遠該處界連秦豫楚三省山徑紛歧設為該匪盤踞勢將滋蔓難圖且與豫省之淅川鎮平內鄉等處甚近尤慮其勾結張總愚股匪蔓延秦豫現在山陽縣賊匪雖經棄城東遁並未大受懲創著李雲麟懍遵前旨迅將此股殄滅淨盡儻任其盤踞商城致與豫捻勾合惟李雲麟是問龍常一軍遷延數日始由興安進至石泉復節次退至池河漢陰沿途滋擾以致民心疑懼幾誤大局

總由李雲麟紀律不嚴所致守備龍常著卽先行革職仍著李雲麟查明該革員如有縱勇滋擾情節卽著嚴叅重懲毋稍姑息其所部隴軍多有城固潰勇極不安分恐蹈漢南城固覆轍句結外匪著卽責成李雲麟查察如不可用卽行遣撤興安一帶防堵緊要兵力甚單李雲麟務當將中村銀花一帶股匪速行勦盡卽由商州移師興安聯絡鄉團認真防守周有全所統礮船現經鄂省檄調東

回鄖陽惟茶鎮地方最當衝要非得此軍扼守不能杜賊紛竄周有全前已有旨令其暫署陝安道篆務著官文嚴樹森飭令該員速赴新任並將所部礮船仍歸該員統帶前進扼要防守不得藉詞奏留武關一帶地近商州著多隆阿撥兵嚴密扼守雷正綰曹克忠陶茂林各軍分路勦辦白吉原等處之賊該匪現聚麟遊一隅著多隆阿卽飭令該將士等繞出賊前杜其竄往平涼之路所有陝省

西南兩路各州縣出力團練卽著張集馨加意激勸其實在出力者查明保奏以資鼓勵毋許冒濫定遠廳三面皆賊並無官兵助勦該處民團同心禦侮屢卻兇鋒殊堪嘉尚如再能始終奮勉卽著查明奏獎並著劉蓉進圖漢南速行攻克毋令該匪四出紛擾日滋蔓延將此由六百里諭知官文多隆阿劉蓉嚴樹森李雲麟並傳諭張集馨知之○又諭毛鴻賓等奏收復信宜縣城陳逆餘黨全行

解散並容縣岑溪次第克復石逆餘黨現竄懷集縣境檄調楚軍進勦各摺片此次高州軍務雖經崑壽督軍前往疊破賊之堅巢軍威丕振該督督辦全省軍務尤須慎益加慎不可稍自矜飾降眾人數太多又有同時投誠之化州石水堡西甯排阜加益陽春八甲雙濬等處餘匪一時解散均未大經懲創務須妥籌辦理不可稍涉苟且致令反側滋生事端信宜等處善後事宜尤須切實講求辦

理容縣岑溪相繼收復兩廣軍情同時得手其由容岑逃往藤縣之羅洞等處餘匪卽著毛鴻賓等嚴飭方耀等軍會合西師乘勢掃除務期淨盡毋留餘孽並著與張凱嵩飭令唐啟蔭蔣澤春會同督率文武紳團合力防勦並將一切撫綏善後各事宜妥為辦理廣海客匪遁歸老巢著該督撫速飭卓興得勝之師移勦陽春一路大彰捷伐務令刁頑咸知悔懼仍督令地方官吏勦撫兼施設法妥

為解散安插俾客土羣端永絕方為妥善石逆餘黨李幅猷由蜀繞黔闖入楚境復擁眾竄擾粵節經諭令楚黔兩粵各督撫合兵勦辦茲據毛鴻賓所奏李幅猷自率大股竄往廣西其黨李幅曾貴在廣西懷集縣之石瑩阮尾樹柵屯糧將圖久踞該處逼近廣東陽山縣境逆黨之計圖負阻垂涎粵東膏腴可想而知毛鴻賓現已檄調張運蘭一軍由郴州度騎田嶺直抵連州順流進勦卽著該

督與惲世臨嚴飭此軍星速進兵務乘石瑩等賊壘未堅迅速掩捕並令現駐宜章之楊虎臣所部嚴堵該逆竄越江楚之路此股餘匪游弋楚粵邊界已久人數尚眾若使負隅久踞及遣黨四出乘隙鳴張勦辦又將費手毛鴻賓惲世臨張凱嵩等卽當各督楚粵諸軍會合兜勦乘賊游魂殘喘之際一鼓殲除儻或進勦不能實力各懷觀望致令餘匪仍復蔓延必惟該督撫等是問另片奏請將刦

盜重案酌擬章程變通辦理等語業照所請明發諭旨准行粵東民俗頑悍者多當此地方積亂之後自應設法變通辦理以資整頓但人命至重亦須嚴飭地方官吏不得藉此擅作威福任意草菅致滋流弊將此由木百里各諭令知之○命署直隸提督江長貴赴安徽軍營勦賊以前任湖北鄖陽鎮總兵官訥欽署直隸提督○以河南歸德鎮總兵官蕭孚泗為福建陸路提督記名總兵官李臣

典為河南歸德鎮總兵官。以戰功疊著。賞兵部右侍郎彭玉麟黃馬褂。以收復江南高淳甯國建平溧水各縣城。賞投誠賊目楊柳谷等職銜有差。以克復廣東信宜縣城。予提督崑壽優敘。賞在籍主事陳蘭彬五品頂帶花翎。投誠賊目鄭金更名紹忠。劉超更名維義。並賞職銜有差。賞土爾扈特署盟長喀屯鄂斯庫吉爾噶勒孫布彥烏勒哲依圖黃馬褂。在乾清門行走。予廣東高要等處陣亡千總尹作煥等祭葬世職。己酉。諭議政王軍機大臣等。左宗棠奏截剿竄浙逆匪疊勝。現在籌辦情形。入皖浙軍。應調回進剿各摺片。逆首偽金王等由甯國縣竄入浙境。蔓延昌化於潛一帶。經劉典自績溪飭派總兵黃少春等回浙進剿。斃賊二千餘名。立將昌化縣城收復。該逆後股復由甯國竄至孝豐。分擾臨安。雖經官軍擊敗。而湖州孝豐一帶竄賊甚多。天目山麓時有大股賊蹤出。

沒浙省援皖之軍。自應調回。迅籌進剿。現在皖南軍事大定。昨據曾國藩等奏到。東壩甯國高淳溧水各城次第俱下。惟廣德尚為賊踞。皖軍得手。逆賊南趨浙境。必然之勢。昨已諭令曾國藩速調勁旅。進克廣德堅城。與浙軍互相聯絡。左宗棠現檄劉典所部。由昌化於潛趨臨安。進剿孝豐。並將王開琳一軍。調回策應。即著飭令劉典等迅速進兵。收復孝豐。為規取湖州之計。並與皖南進攻廣德之師。互為聲援。杭州餘杭賊勢如故。該督現擬即日移軍富陽。督軍先克餘杭。然後悉力杭州。諒不難次第掃蕩。現在蘇州省垣。業已克復。皖南亦漸就廓清。各路軍情。同時得手。金陵杭州兩城。各軍已薄城下。立盼捷音。該督其迅奏膚公。同膺懋賞。有厚望焉。將此由六百里諭令知之。○又諭多隆阿奏。邠乾肅清。援軍入甘。並圍攻盤屋。勒辦各路情形。請飭甘省設立轉運糧臺等摺片。李雲麟奏。追剿

鎮安竄匪山陽失守旋克各情一摺曹克忠與雷正綰之軍於邠州長武一帶將白吉原等處老巢回匪痛加殲戮賊現尚聚麟遊一隅陶茂林將鳳翔東北賊壘先後埽除復埽盡附郡村落各賊巢軍聲殊振多隆阿現以麟遊之賊飭曹克忠統率所部相機進擣與雷正綰之軍遙為聲援可收前後夾擊之效並飭陶茂林乘勝進攻汧隴以期迅速赴甘會合雷正綰之軍節節埽蕩所籌均合機宜

著卽懷遵昨寄諭旨飭令各將士務將麟遊等處之賊趕緊殲除淨盡並須繞出賊前杜賊再行西竄之路此時陝省回氛漸戢而餘燄尚多甘省則惡氛一片恐鳳隴邠乾等處被擊之賊紛紛西遁必至聚集愈多勦辦愈形費手雷正綰現抵靈臺已入甘境陶茂林所部由汧隴而前卽當聯合一氣前截後追毋令逆氛得以竄入平涼等處多隆阿馳抵盤屋城下著卽迅速籌攻毋為此一隅所牽

致稽全局該將軍擬令曹克忠七營之兵廓清麟遊一帶敗匪卽移紮岐山鎮遏留壩等處上犯之賊及為陶茂林後路聲勢布置洵不可少現據李雲麟所奏藍二順股匪由山陽竄走中村銀花其前隊復東竄大吉河瓦房灘一帶離豫境僅百餘里而商雒適當其衝總兵藍斯明之軍由多隆阿派令由商境進勦著卽嚴飭扼勦賊之東竄商州北犯雒南各路如其兵力不敷卽由多隆阿酌量撥

兵援濟豫境浙川楚境鄖陽均屬毗連並著官文嚴樹森飭令駐鄖官軍隨時偵緝與秦豫兩省之軍相為援應張總愚一股刻下竄至何處尤應豫防其與藍逆竄合張之萬嚴督豫軍實力截勦此時三省之軍果能乘賊奔竄併力以圖諒亦不難盡殲醜類萬不可稍存畛域之見陝南軍務正當喫緊劉蓉何以尚未入境著卽懷遵前旨星馳前進力圖恢復漢中等城藍逆一股出竄漢洋賊勢稍

分尤應乘勢進攻李雲麟回紮九里坪擬取道米糧川以渡蜀河返顧興安據稱藍逆身帶重傷此股賊目損傷過半但有勁旅窮追不難殄滅若徒係紙上空談不以追賊自任力籌堵剿將來藍逆之勢復張及興安之賊再有分股北竄商潼定惟該京堂是問雷正綰等各軍入甘本日業經寄諭熙麟等卽於甘省設立轉運糧臺以為支應並嚴催英桂等將晉省應撥協餉星速撥解惟甘省既餉

源匱絀萬難足恃而晉餉亦解到需時雷正綰等之軍由陝入甘仍著張集馨由陝省源源籌濟毋令缺乏致誤軍行前交多隆阿會查恩麟各件嗣復有明降諭旨撤去慶昀專交多隆阿查辦卽著該將軍於將來到甘後再行秉公確切查明辦理李雲麟所請將援陝楚軍保獎之處著准其咨行官文等查保毋許冒濫將此由六百里諭知官文嚴樹森張之萬多隆阿雷正綰劉蓉李雲麟並傳諭

張集馨知之又諭多隆阿奏雷正綰一軍現已馳抵甘境陶茂林一軍俟汧隴廓清後亦可迅速赴甘請飭熙麟就近設立糧臺源源轉運等語該二營軍火餉需五宜寬為籌備以利攻勦熙麟恩麟身任甘省大員籌餉濟軍責無旁貸卽著熙麟等悉心規畫設立轉運糧臺將雷正綰等軍所需糧餉等項迅籌撥解以資軍食該督等務當於萬難籌措之中設法接濟恩麟前次奏撥山西協餉係

指撥雷正綰軍營之用並著英桂鄭敦謹懷遵前諭督同河東道於省庫運庫無論何款先行籌撥銀數萬兩剋期解甘以濟要需甘省地方彫敝英桂鄭敦謹惟當不分畛域儘力籌措陸續解赴甘省毋稍延誤將此由六百里諭知熙麟英桂並傳諭恩麟鄭敦謹知之庚戌諭內閣麒麟慶奏查明蒙古驛站牧廠請旨撥給荒地一摺據稱熱河圍邊以內海薩什巴爾台地方向設蒙古驛站由昭烏

達盟八旗派撥披甲馬匹支應當差。自移設喀喇沁旗之梅倫溝該處站兵卽將荒地開種。現在奏請招墾圍邊地畝。自應將驛站仍移原處。而梅倫溝之當差人等戶口繁多。歷有年所。未便另行遷移。又昭烏達之西爾嘎驛站馬匹均在圍邊牧放。亦應酌留地畝。以資當差。請將圍邊荒地撥出八十頃。補給喀喇沁旗其梅倫溝驛站酌留四十頃。西爾嘎驛站酌留三十頃。藉資牧放。各等語。所奏自

係實在情形。卽著照麒慶所議分別撥給。以示體恤。另片奏圍場哨地額設各兵均有隨缺地畝。惟蒙古兵二百名僅有甲缺銀糧。並無隨缺額地。請酌量撥給等語。著准其於左翼四旗閒荒地畝內撥給二百頃。以遂生計。而昭平允。○諭議政王軍機大臣等。麒慶奏緝拏要犯彌勒僧格。托古勒台二名。由吉林解往熱河。行至大石橋店門。彌勒僧格乘閒逃跑。請飭訊明嚴緝等語。彌勒僧格一犯。係

盜首白凌阿之甥。倚恃社首妄拏無辜。並疊被控告結盟擾害各情。當降旨嚴拏懲辦。前經誘獲旋復逃走。其為積慣為匪。怙惡不悛。已可概見。現經哲里木盟長並郭爾羅斯等旗弋獲。由郭爾羅斯旗解交伯都訥副都統衙門轉解熱河。並由盛京兵部派騎都尉恩瑞帶領兵丁接解。何以行至大石橋地方。卽被乘閒搗壞拷扭逃跑。無蹤其中顯有賄縱情弊。抑或另有別情。著玉明卽將恩瑞及接

解兵丁等嚴行審訊。從重辦理。仍一面飭該管地方官上緊緝拏。務獲毋任漏網。玉明於盛京地方盜犯肆意橫行。不能認真辦理。及鄰境拏犯假道行走。仍不能妥為接遞。且此等重犯逃脫。並不卽時奏聞。希圖掩飾了事。懈玩已極。儻日久未能弋獲。任令遠颺。該將軍等自問當得何罪。寶善曾否到任。並著一體嚴緝。毋稍疏懈。該犯恐遁回吉林。或至熱河潛匿。著景綸麟瑞麒慶等各飭所屬。購錢

密拏歸案嚴辦。將此各諭令知之。又諭前因衛榮光奏請嚴緝北路奸匪。暨責成河北鎮道防河。令各州縣實行保甲。降旨令劉長佑等按照所陳各節酌覈試辦。茲據閻敬銘奏國家設立營制。星羅密布。法本周詳。經武整軍得人。乃能集事。今欲於直東豫三省之交別擇統領。添設一軍。若湊撥各省之兵。則主客不習。若復召已散之勇。則奸宄易藏。且三省地界遼闊。設遇寇警。非救援不及。即觀望不前等語。所奏亦係實在情形。黃河缺口以後。由直隸之東明開州等處串入山東之濮范一帶。泛蕩紆迴。已成水套。向為匪徒淵藪。其由東省至河南內黃滑濬等處。尚隔大名府界。中有斜徑之路。河北彰衛懷三府界連畿輔。均不可不豫籌防範。直東交界現有定安一軍彈壓。閻敬銘復酌留勇隊分布東昌。河北鎮楊長春久經行陣。打仗頗能奮勇。若該三省督撫各就現有兵勇實力整頓。自

不難剔除伏莽。淨絕匪蹤。著劉長佑閻敬銘張之萬嚴飭各該地方文武認真整飭。遇有各該省犬牙相錯地方。如何聯絡設防之處。卽行會同妥議章程。如遇匪徒竊發。卽督率兵練迅速拏辦。或被勒竄擾鄰封。務當乘勝越境追剿。會同鄰省將弁合力兜擒。各該督撫果能不分畛域。互為聲援。較之專任一員作為統領者。更有裨益。至舉行保甲清查戶口。實為弭盜安民之本。閻敬銘現已飭屬興辦。並著劉長佑張之萬飭令各州縣實力奉行。毋得有名無實。宋景詩蹤跡若何。此等稔惡兇徒。斷不可令其漏網。閻敬銘務當派員嚴密躡緝。期於必獲。該逆是否遁回商邱原籍。並著張之萬委派幹員密速掩捕。毋任稽誅。東昌府一缺。近日甚關緊要。應否歸地方揀員調補。及東省營汛兵額應須酌撥移紮之處。著閻敬銘會同譚廷襄妥議具奏。將此由四百里各諭令知之。辛亥諭內閣。劉長

佑奏軍務告竣請將丁憂改留署任之知府開缺一摺直隸丁憂儘先補用道署廣平府知府余承恩前因軍務緊要帶勇需員降旨改留署任茲據劉長佑奏稱軍務業已告竣未便以丁憂人員久任實缺請開余承恩知府之缺仍令統帶所部勇丁撙捕巡防明春防捕事竣再行回籍並請將該員俟服闋後以道員仍歸直隸儘先補用等語鹽運使銜儘先補用道署廣平府知府余承恩著准其

開缺該員勦賊奮勉帶隊亦能恩信相孚在直隸各軍中最高為得力將來如仍以道員簡用未足盡其所長著加恩俟服闋後以總兵用○又諭張集馨奏請將玩視軍糧之知縣革職等語陝西永壽縣知縣許縉於應供雷正綰營中軍食並不運送轉將上站運送軍火車輛全行截留又不將乾州醴泉等處解到麪斤驗收轉運迨營中催取竟敢置若罔聞一味延抗殊出情理之外張集馨僅請予

以革職不足蔽辜許縉著即行革職並著張集馨將該革員提省嚴訊治以應得之罪以為貽誤軍需者戒○諭議政王軍機大臣等劉長佑奏軍務告竣請將丁憂署廣平府知府余承恩開缺一摺已明降諭旨准其開缺並因余承恩帶隊得力加恩俟服闋後以總兵用矣朝廷文武並重因材器使且以道員而擢膺總兵尤為不次殊恩劉長佑當傳知該員令其知感知奮至該督因直省撙捕巡

防均關緊要擬於余承恩部勇內挑留千人仍令該員統帶俟明春防捕事竣再行給假回籍自係實在情形即著照所議辦理將此諭令知之○又諭富明阿奏苗黨勦洗殆盡皖北漸就肅清請撤回揚防官兵一摺苗逆就殲以後壽州下蔡等處自必望風瓦解李世忠等在穎壽如何得手陳國瑞等是否將下蔡老巢掃平近日軍務情形著僧格林沁詳細馳奏江南蘇州府城克復後現在緊攻

無錫常州金陵亦漸合圍。若偏之愈緊。恐逆眾窮極思竄。江北實當衝要。沿江綿長二百餘里。港汊紛歧。裹下河一帶完善之區。髮逆久已注意。揚防存兵無多。不敷分布。若有貽誤。關繫非輕。援蒙各軍。為數不少。況首逆已誅。皖事漸定。江北援軍當可酌量調回。著僧格林沁悉心籌畫。如富明阿所帶各兵無須留辦防務。即將揚防派來之兵全數撤回。以資調遣。李世忠、蔣凝學、進勦、賴壽各軍著僧

格林沁會同藩飭令實力進攻。不得因有大軍在皖。稍存推諉觀望之心。其蒙城附近各圩。僧格林沁、唐訓方派兵次第收復。務期一律肅清。苗逆黨與亦必須殲除淨盡。毋貽後患。江北防務都興阿、吳棠當就現有兵力。悉力嚴防。毋以目前無事。稍涉大意。江面水師都興阿尤宜悉心整頓。以資得力。富明阿另奏傷疾復發。請回清淮調理一片。富明阿著賞假一箇月。前赴清淮安心調理。仍著隨時

察探江北軍情。與都興阿協力相機辦理。將此由六百里各諭令知之。又諭前據李雲麟奏藍二順股匪由山陽竄走中村銀花一帶。當經諭令李雲麟以追賊自任。力籌堵剿。毋任分股北竄。商潼等處。茲據張集馨奏山陽竄出逆匪已由瓦房灘竄商南城下。盤踞東岡。勢甚危迫。藍斯明進紮武岡。所部僅二千人。未免單弱。多隆阿分兵四出。勢難抽撥。而李雲麟銳意西行。不但商南城圍無兵可

解。設該匪竄入龍駒寨。則糧道後路梗塞。深為可慮等語。山陽失守以後。李雲麟既不能迅圖攻克。已難辭咎。現在該匪紛竄商南。該京堂又全軍西行。並不駐軍截剿。前奏既知藍斯明兵力單薄。又不分兵協助。設此股賊匪蔓延楚豫。完善地方。該京堂自問當得何罪。著懍遵前旨。督率兵勇。迅解商南城圍。剿除藍逆。稍贖前愆。興安防守事宜。李雲麟自應妥籌兼顧。至規復漢中郡縣。則須俟劉蓉

督兵入陝會商夾擊。方克有濟。李雲麟於區區山陽一城尚不能剋期攻拔。輒欲由興安進兵西上。獨不思漢南羣盜如毛。豈李雲麟一軍所能埽蕩者。且舍目前之賊不勦。而欲遠勦興安之賊。揆之兵家緩急機宜。豈有如此辦法。著卽迅速回軍援勦。毋令賊氣擾及商雒。自滋罪戾。多隆阿盤屋之師。計日卽可得手。能否添撥數營。助藍斯明攻勦之處。或就曹克忠等援甘各軍內調回數營。以資截

勦。均著該大臣迅速斟酌調派。毋稍稽遲。陝南賊勢如此披猖。劉蓉何以尚無入陝消息。著卽恪遵疊次寄諭。星速前進。扼紮青石關一帶。一面牽制賊勢。一面知會李雲麟兩路進兵。次第恢復漢南郡縣。方為不負委任。至川北防務。駱秉章已豫為布置。諒可無虞。劉蓉身為陝撫。責有攸歸。豈能專顧川邊。置陝事緩急於不顧。張集馨署理撫篆。地方防勦事宜亦應認真整飭。豈可因人成事。莫展一

籌。該省回匪巢穴業經多隆阿埽除殆盡。其商南竄匪張集馨責無旁貸。著卽一面飛咨李雲麟回軍援勦。一面檄飭地方文武揀發得力兵將嚴扼要隘。並會同李雲麟所部併力勦洗。力解商南城圍。以輔多隆阿兵力。所不逮。毋得徒事求援。致負委任。將此由六百里諭知多隆阿。劉蓉。李雲麟。並傳諭張集馨知之。○直隸總督劉長佑奏遵查長蘆懸岸尚有五十餘處。現卽招商認運。擬請循舊給

票。並將積欠銀兩催令按引攤完。下部議。尋議官商運鹽仍宜發給部引。以便稽查。所請給票之處應無庸議。至趕緊招商催追積欠應如所奏辦理。從之。○以正白旗漢軍副都統文謙署右翼前鋒統領。○補鑄貴州都勻府知府長寨同知。獨山定番二州知州。荔波縣知縣。儒學三脚地州同。方村縣丞。各印信關防條記從巡撫韓超請也。○予安徽蒙城陣亡守備袁國華把總劉國珍祭葬。世職加

等。壬子諭議政王軍機大臣等唐訓方奏。蒙城解圍陣斬苗逆。現與臨軍攻破下蔡老巢一摺。苗沛霖伏誅後。陳國瑞卽派宋慶督領所部進克苗逆老巢。李世忠派副將何璜帶練助勦。旋將下蔡攻克。苗逆妻子均就誅戮。現在逆黨苗添慶宋景詩等。餘眾不滿三千。向西南竄去。著唐訓方會商陳國瑞。飭令宋慶探明賊蹤。實力追勦。務將苗逆餘黨肅除淨盡。如宋慶兵力不敷。勦辦應如何添派

勁旅會同掃蕩之處。著僧格林沁富明阿國瑞。唐訓方酌度情形。相機布置。務將竄出之苗添慶宋景詩等逆黨。悉數擒獲。毋任漏網。宋景詩一犯。自山東潛逃。現復率眾由下蔡向西南竄去。恐其遁歸商邱原籍。及與竄豫之張總愚等捻股合夥。著張之萬。懷遵前旨。遴派幹員。於由皖入豫一帶。及商邱地方。認真勦截。並設計誘擒。毋任惡首逃逸。正在寄諭間。吳棠奏捻首李大箇子等股匪。由山東

之單縣魚臺。阻水折回豐碭。經兵練截殺。竄回永城之岳家集。著張之萬督率兵勇。乘其情歸迅速。殄除清淮所派援蒙各軍。應否抽撥北勦永宿捻匪之處。著僧格林沁酌量調遣。徐宿餉道最關緊要。著吳棠卽飭派出之副將楊文全。駐紮蕭碭。嚴防該捻回竄。以顧糧道。將此由六百里各諭令知之。○予山東長山合門殉難候選訓導張光諱暨眷屬等分別旌卹如例。○予山東日照陣亡殉難團

長高芳等紳民婦女四十七名口分別旌卹如例。○蠲緩山東泗水荷澤淄川鄆城濮陽陽壽張城武鉅野東阿曹定陶范金鄉單濟甯歷城章邱齊河齊東禹城臨邑長清陵平原肥城東平平陰惠民青城陽信利津蒲臺曲阜鄒滕嶧陽穀聊城博平茌平清平莘冠堂邑魚臺夏津鄒平長山新城泰安萊蕪樂陵濱恩高唐武城觀城嘉祥商河蘭山鄒城海豐費莒沂水日照益都臨淄昌樂諸城樂

安安邱甯陽滋陽汶上新泰霑化高苑臨朐
掖昌邑八十二州縣被水被旱被風被雹被
蟲被擾地方新舊錢漕有差

上以冬至祀

天於

圓丘自是日始齋戒三日○癸丑諭議政王軍
機大臣等前因奉天府屬之昌圖廳所轄地
方遼闊應否於理事通判外添設官職較大
之員以資彈壓或於理事通判一缺酌量增

改官階降旨令吏部議奏茲據奏稱請將該
廳通判調缺改設理事同知題缺加四品銜
由奉天興京通判二缺內揀選題升等語昌
圖廳所轄地方幅員甚廣訟獄繁多每遇命
盜械鬪各案相驗踴勦往返動經數日茲據
吏部議將此缺改設同知加四品銜於該處
地方情形能否相宜此外有無應行變通之
處著玉明和潤德椿確切查明據實覆奏現
任該廳通判色勒被控情節較重於此缺斷

難勝任卽著玉明等於奉天興京兩通判內
揀選精明幹練熟悉情形之員題升斯缺方
為妥協如不得其人再行奏請簡放至該處
地方素多盜匪緝捕最關緊要應否添設武
員兵丁之處著玉明等悉心妥議具奏昌圖
廳所轄一帶地方詳細界址並著玉明等繪
圖貼說具奏吏部原摺著鈔給閱看將此各
諭令知之又諭張之萬奏毫捻竄踞浙川
窺伺陝疆並藍逆竄近西坪程逆回巢投誠

續竄股匪屯踞沈邱等處正息一帶勦辦土
匪情形各摺片張總愚股匪屯踞浙川廳境
經總兵張曜分派各營力據險要築壘扼守
並將圍攻駐馬板山兩寨之賊擊退此股逆
匪日夜窺伺秦境經張曜分軍扼紮嚴備西
北賊計未逞惟豫省兵力本單藍逆一股又
由山陽商州一帶竄近西坪雖豫軍擊退而
大股仍盤踞護水關界嶺等處設與張總愚
合併則賊勢蔓延益難收拾張之萬現飭葛

承霖統帶湘勇四營。蔣希夷所部楚勇並駐守兩河口之張士元兩營。前往浙川一帶防剿。著卽嚴督諸軍。星夜前進。並飭令張曜分撥諸軍。四面圍逼。以期聚而殲旃。李雲麟勦辦山陽股匪。據報連獲勝仗。何以該逆復有大股盤踞護水關等處。竄近西坪。該京卿勦辦此股。不思乘勢東追。輒行舍而西上。實屬有意趨避。著懷遵疊次寄諭。速統所部折回東路。繞向西坪扼紮。迎頭截擊。以斷藍張二

逆合併之路。儻任令該二逆句合。致成巨患。李雲麟自問當得何罪。荆子關西坪一帶。為秦豫交界要區。著多隆阿速飭藍斯明帶兵前往。與李雲麟分路扼紮。以固陝省藩籬。並著添撥兵勇。前往商雒一帶。嚴密堵扼。以為李雲麟藍斯明二軍後路聲援。一面將圍攻商州之賊。迅速殲除。其地方紳團。卽由劉蓉張集馨檄令該處文武。聯絡鼓舞。以助兵力。所不及。仍著劉蓉迅速入陝。不得逗遛川境。

致與該省聲息懸隔。張總愚股匪。如被豫軍勦急。難保不北竄河陝。南趨襄鄖。並著多隆阿張集馨將潼商一路。嚴行籌防。英桂將蒲州一帶。界連陝洛要隘。豫籌防堵。鄂省現已無賊。張曜所部兵力甚單。著官文嚴樹森速派得力兵勇。越境馳赴浙川。助勦殄豫境之寇氛。卽以固楚省之藩籬。毋許稍分畛域。前此余際昌在方家寨勦匪陣亡。卽由兵力太單所致。官文嚴樹森當引為前車之鑒。趕緊

派兵協助。毋蹈從前覆轍。程二老坎分股由楚續竄。與前股回竄各匪。屯聚沈邱太和阜陽邊境。經尹嘉賓等軍。及各路民團。由沙河南北兩岸。沿途截擊。殲斃甚多。現經毛昶熙派兵屯紮周口。著張之萬毛昶熙分飭尹嘉賓徐連陞。並李大成蔣東才等軍。會合鄉團。分路堵截。悉數殲除。毋留餘孽。程逆一股。前在豫省唐縣時。不過數千。自入鄂境後。長驅而東。蹂躪千里。自光羅分股入豫。人數業已

逾萬且有所擄楚軍號衣多件著官文嚴樹森確切查明。係屬何路兵勇敗挫毋得諱敗為勝。稍事粉飾。程二老坎之弟程大寬並程大老坎之子程友正赴營納款。經毛昶熙解赴僧格林沁軍營。該逆竄擾數省焚掠千餘里。罪不容誅。自應卽行正法。或須暫示羈縻。為誘擒首逆程二老坎之處。著僧格林沁斟酌辦理。正息一帶伏莽尚多。著張之萬飭令王文行李殿元王玉佩等軍將談家園踞賊速行掃蕩。並將曹魁一股殄除淨盡。以靖南圉。至毛昶熙駐軍歸德。前次皖捻出巢。既未能力圖扼截。又不能進擣老巢。為牽制該捻回顧之計。此次程逆等股匪回巢。又不能迎頭截剿。該侍郎安居歸德城內。莫展一籌。卽如程大寬等投誠一事。應准與否。尚無決斷。必須解赴僧格林沁軍營定奪。如此懦怯巧滑。誠不知其所司何事。著卽迅督兵圍進攻附近匪圩。並將沈阜一帶捻股掃除。毋再任

意玩誤。致干重咎。將此由六百里諭知僧格林沁。官文多隆阿嚴樹森劉蓉英桂張之萬毛昶熙李雲麟並傳諭張集馨知之。○吏部等部奏遵查金寶符捐案。四月間並未咨部。直至十月二十九日始行遞到。應請飭下各直省督撫。凡捐免歷俸之案。務於上兌後卽行專摺具奏。從之。○以起任遲延革雲南布政使蕭浚蘭等職。○以江西萬載縣捐輸軍餉永廣學額八名。客籍二名。○以廣東捐輸軍餉永廣鄉試中額一名。增城三水花三縣學額各一名。○予河南亳州陣亡都司劉進貞祭葬世職。

大清穆宗繼天開運受中居正保大定功聖智
誠孝信敏恭寬毅皇帝實錄卷八十四

實錄卷八十四

十一

大清穆宗繼天開運受中居正保大定功聖智
誠孝信敏恭寬毅皇帝實錄卷之八十五

聖祖高皇帝實錄卷八十五

聖祖高皇帝實錄卷八十五

聖祖高皇帝實錄卷八十五

聖祖高皇帝實錄卷八十五

聖祖高皇帝實錄卷八十五

敘序

同治二年癸亥十一月甲寅諭內閣僧格林

沁奏攻克西陽集賊寨及收復下蔡壽州攻
克苗家老寨一摺蒙城解圍苗逆伏法以後
西陽集逆匪仍敢負隅死拒十月三十日僧
格林沁調隊合攻先以炸礮環擊繼以噴筒
火箭毀燒寨內房屋煙燄衝天人聲鼎沸國
瑞等由西面攻入傅振邦等由南面攻入將
寨內賊匪按殺其翻牆撲河出竄之賊復經
舒通額等帶兵截殺統計斃賊三千餘名生
擒匪首葛春沅葛玉汰葛占青葛東楊孟舉

就地正法。並派恆齡等收復葛家圩等十處。其魏羣兒等寨亦俱薙髮投誠。總兵陳國瑞等收復苗家老寨。及壽州下蔡等處。將苗沛霖妻孥誅戮。搜捕苗姓二十餘人。生擒苗希年父子。其前獲之苗黨張建猷趙克沅續獲之孫夢卜管侍詳等。犯均於訊明後凌遲處死。辦理甚為得手。仍著僧格林沁等督飭各軍。乘勝將潁上等處一律克復。肅清皖境。毋留餘孽。○諭議政王軍機大臣等。僧格林沁

大軍自力解蒙圍。陣斬首逆後。乘勝進兵。收復壽州。下蔡。苗家老寨。勢如破竹。惟潁上正陽等處。尚未克復。自應一氣掃蕩。廓清全淮。著僧格林沁督飭陳國瑞。宋慶等。將潁上正陽一帶賊圩。趕緊攻克。盡行平毀。其已經收復各地方。並著曾國藩。唐訓方。慎選賢守令。妥為安輯。務令各務農業。將荒廢地畝次第耕種。俾衣食有資。不至流而為匪。方為妥善。李大箇子等投誠一節。及苗金開等獻出壽

州。是否誠心反正。抑係暫時為免死之計。若輩狼子野心。難保不復萌反側。著僧格林沁嚴飭陳國瑞等。妥為鈐束。毋稍大意。昨據唐訓方奏。苗添慶。宋景詩等。餘眾不滿三千。向西南竄去等語。此次僧格林沁摺內。亦稱苗添慶等向西逃遁。宋景詩是否在內。現在竄往何處。著僧格林沁。曾國藩。唐訓方。各派兵弁。嚴密兜拏。毋令免脫。其駐守潁六之成大吉等軍。著曾國藩嚴飭。其搜剿圩賊。盡力協

助。壽州收復後。李世忠所部進城。擅殺守門勇丁五名。又於圍攻下蔡時。因宋慶不肯讓給。調隊攻打。爭功尋釁。實屬不成事體。僧格林沁現派陳國瑞前往彈壓。卽著該親王會同曾國藩。唐訓方。將啟釁根由。秉公查辦。擒首李大箇子。魏羣兒等。雖已投誠。而相盤尚未殄滅。深恐被勦情急。東竄徐宿一帶。著吳崇嚴飭在事員弁。實力防勦。不得稍有疏虞。杭州將軍雖已簡放。國瑞現派副都統明興

署理。暫可毋庸到任。福州副都統一缺。將軍英桂到後。亦可兼顧。蘇克金到任。亦可暫緩也。將此由六百里各諭令知之。○以雲南按察使林鴻年為布政使。記名按察使劉嶽昭為雲南按察使。○予安徽西陽集陣亡參將許得祭葬。世職加等。○乙卯冬至祀天於圓丘。遣惇親王奕諒恭代行禮。○遣官祭永陵。

福陵。昭陵。昭西陵。孝陵。孝東陵。景陵。泰陵。泰東陵。裕陵。

昌陵

昌西陵

慕陵

慕東陵。○遣官祭

文宗顯皇帝

孝德顯皇后暫安寢殿。○遣官祭

端慧皇太子園寢。○停次日朝賀。○諭內閣。

前因內務府奏。職官捏造文憑。撞騙黑地。並究出武弁收受銀兩各情。當經降旨將筆帖

式錫山。護軍校吉存革職。交該衙門嚴審。茲

據總管內務府王大臣等奏。審明職官偽造

戳記。指官撞騙。按律分別定擬一摺。此案已

革護軍校吉存。以武職微員。妄行干預黑地。

引誘鄉愚。捏稱黑地。歸內務府編放莊頭。播

傳京外。招集軍民。希圖誑騙。復與已革從九

品銜劉玉山商議。偽造錢糧衙門戳對六字。

刻成戳記。鈐用。並刷印偽照。先後發給。共誑

騙薊州等處民人藍諸等銀至一千餘兩之

多。實屬膽大藐法。吉存著照所擬從重發往新疆充當苦差。遇赦不赦。已革候補筆帖式錫山。因吉存轉託欲將黑地仍歸內務府查收。該革員探知吉存得財甚多。亦萌漁利之念。遂詐稱奉議政王及內務府大臣寶鑒派赴寶坻等處招集鄉愚。偽寫堂諭。私發諭帖。雕刻木戳等件。接收李占鼇等呈詞。給發收租偽票。騙得地租束錢一千四百串。計贓在二百兩以上。亦屬藐法。錫山著照所擬從重

發往新疆效力贖罪。已革從九品銜劉玉山。隨同包攬黑地。聽從吉存捏造。戮記難保。無欺瞞得財情事。著照所擬杖一百。徒三年。該犯等尚有呈控薊州書吏侵吞租項一案未結。著交通永道歸案審明。再行定地充徒。民人張幅山。向錫山呈報黑地。為人作保。黨鳳順。給錫山墊辦日用。意圖從中漁利。且與張幅山同為李占鼇等作保。均屬知情干預。于潤卽潤禧佟致和。岳六。均給監諸託辦莊頭。

賺用銀兩。已革從九品銜繆特瑞。為民人李玉文謀領地畝。付給吉存銀兩。方幅慶。為劉芸國等謀充莊頭。均屬不安本分。除于潤業經病故外。方幅慶著革去莊頭。與張幅山。黨鳳順。佟致和。岳六。繆特瑞。均照所擬杖六十。徒一年。未獲之楊玉山等。仍著分別嚴拏。錫山潛在寶坻等處撞騙地租。該地方官失於覺察。著直隸總督順天府尹查取職名。交部議處。吉存包攬黑地。誑騙多贓。該管內務府護軍統領毫無知覺。殊屬聾瞶。著兵部查取職名議處。其失察錫山出境撞騙之該管內管領族長等。均有應得之咎。著一併交部查取職名。照例議處懲辦。餘著照所擬辦理。黑地升科。早經戶部奏明。統歸地方官辦理。如查明實係黑地。自應照例升科。如係招搖撞騙。應卽嚴行拏辦。嗣後直隸等省地方。如有捏稱各該衙門大臣派令辦理地方一切公事者。該地方官務須索取文憑。以為證

驗一面行文該衙門查覈。僅查係虛無。即將其人從嚴訊辦。其或指稱各該王大臣之名。在外省招搖屬託事件者。卽著各該地方官隨時稟明上司。嚴拏懲辦。將此通諭知之。○又諭鑲紅旗滿洲奏。已革騎都尉兼一雲騎尉桂芬。因犯革職杖徒罪名。所遺世職。其子潤康熙例不准承襲。桂芬伯始祖阿蘭泰一支。亦係因犯罪不入襲次。除此二支並無別房應襲之人。可否仍准潤康熙承襲。抑或照例

過三輩後再行奏請承襲。請旨遵行等語。著該旗仍照定章。將此世職過三輩後再由桂芬支派內揀選。奏請承襲。○丙辰

聖祖仁皇帝忌辰遣官祭

景陵○

上詣

壽皇殿行禮。○諭內閣。御史劉慶奏。學政任滿回京。被偏自盡。請飭查訊一摺。據稱前任湖北學政俞奎垣之父俞進麟。歷任甘肅州縣

公私各事。悉交伊長子俞奎文經理。俞奎文專務聚斂。行為卑鄙。於該學政任滿赴甘省親時。意其必有多金。又其弟俞奎端亦覬覦伊兄宦囊。為捐主事。孰知該學政居官清潔。行李蕭然。不遂所欲。遂唆怨其父。日夕苛求。百端搆陷。上年賊偏涇州。俞進麟不候交代。聞警逃逸。該學政隨侍回京。沿途復為一兄一弟種種刁難。本年二月間行至涇州。復以輿從細故。捏訴伊父。致令該學政投井身死。

經涇州知州查訊。俞奎文慫令伊父不准相驗等語。俞奎垣以弟兄構陷。死於非命。捏稱病故。含混具報。天倫骨肉之際。竟有似此喪心殘忍。出乎情理之外者。且據奏各情。俞奎垣居官清介。為之父兄者。方獎勵之不暇。何乃反以宦囊蕭索。致不相容。情殊駭異。案中虛實根由。亟應徹底根究。以重人命。而扶倫常。著派倭仁李棠階會同刑部。將此案提集人證。悉心研鞫。務得確情。定擬具奏。至俞奎

垣曾為伊兄俞奎文呈請封典。並伊次子過繼俞奎文為嗣。該御史請飭部查明。追奪斥革。並將俞奎垣之子歸宗。另繼之處。著派審大臣會同刑部於定案時。訊明辦理。○諭議政王軍機大臣等。有人奏土匪窩藏賊盜。請旨飭拏一摺。據稱風聞順天府大城縣土匪李玉峰與弟李五。素稱無賴。咸豐三年賊竄大城。白楊橋一帶。李玉峰同弟李五乘機勾結棍徒。四鄉搶掠。被官兵砍去左耳。近復招

集亡命。嘯聚多人。結黨橫行。與騎馬賊交結往來。坐地分贓。並有蠢棍吳慶雲代為黃緣。該縣捕役得贓。為之包庇等語。土匪窩藏賊盜。通同蠢徒。大為民害。亟應捕除。以靖地方。著萬青藜下實第劉長佑。按照摺內所指盜賊衙役各姓名。派員密捕務獲。按律懲辦。毋任遠颺。以清盜源。而重捕務。原摺均著鈔給閱看。將此各諭令知之。○又諭。前因盛京東邊一帶曠閒山場。流民聚眾私墾。諭令玉明

恩合嚴密訪查。妥議具奏。茲據玉明奏稱。自東邊門外至渾江。東西寬百餘里。至二三百里不等。南北斜長約一千餘里。多有墾田建房。栽漫伐木等事。自渾江至靉江。東西寬數十里。至三四百里不等。南北斜長約二千餘里。其間各項營生。與前略同。惟人皆流徙。聚集甚眾。已有建廟演戲。立會團練。通傳轉牌等語。該處地方遼闊。山樹重深。匪民易於匿處。以致屯聚日多。且性情頑梗。罔知繩墨。其

屯聚地方。又多與朝鮮邊境毗連。所有防範事宜。均須詳慎妥協。不可稍涉大意。著該將軍隨時查看情形。總期於潛移默化之中。寓杜漸防微之意。以期周密而昭慎重。玉明身任將軍。於一切地方公事軍務。總當力求整頓。加意激勸。前奏榆樹臺勦賊失利一摺。內稱佐領慶吉等及所帶槍兵。多有被困陣亡者。何以至今尚未查明請卹。殊屬憤憤。著卽將是日陣亡之文武官員兵丁等。迅速查明。

分別奏咨請卹。將此諭令知之。○又諭李鴻章奏。無錫官軍連克高橋望亭等賊壘。擊退各股援賊。漸次合圍一摺。李鴻章劉銘傳等軍擊退無錫大股援賊。踴毀三里街萬壽橋賊壘。後復於十月二十。二十一。二十六等日。將高橋新安望亭等處賊壘攻克。其忠護二逆率黨來撲。萬壽橋官軍營盤亦經各軍奮力擊走。賊率其黨遁回常州。該逆自蘇城遁出。糾黨回援無錫。並將洋匪所搶小輪船往

來衝擊。據獲賊供。有忠護兩逆。皆以此次輪船炸礮不能打開萬壽橋營盤。無錫不保。當速援金陵。再圖竄路等語。現在蘇錫之交。雖已肅清。而賊情狡譎。難保不拌死復來。水陸各路。悉其衝撲。李鴻章仍當督飭劉銘傳等各軍。加意嚴防。並飭郭松林。周盛波。穩紮穩進。一俟無錫南北兩門及惠山紮定合圍。後卽與劉銘傳等併力進攻。速復錫城。其賊以輪船由常州之孟河口等處出江。繞竄圖援。

金陵亦在意中。並著曾國藩令曾國荃與都興阿於南北兩岸防江。各水師嚴為之備。毋稍疏虞。李鴻章另片奏。蘇州乞降。內應之賊目邵雲官等降眾二十餘萬。於投誠後仍復挾眾種種要求。恐貽後患。傳令該降酋等八人來營。多方開導。堅不允從。當將邵雲官等立予駢誅。現在降眾人等業已繳呈軍械。乞就遣散。李鴻章卽日入城駐守。督率官紳分投撫恤。人心大定。所辦並無不合。而戈登乃

因該撫先期調令常勝軍回駐崑山。未得入城。忽生異議。強謂李鴻章辦理錯誤。有欲帶常勝軍與官兵開仗之語。招去邵雲官義子邵勝鏢。及久從蘇賊之廣東人千餘名。意殊叵測。又慫恿英國提督伯郎。繙譯官梅輝立。來蘇辯詰。其悻悻之意。見於詞色。據稱申請公使與總理衙門議定。再將常勝軍作何區處。其意殆挾此軍與我為難。洋人不明事理。性多謬執。往往而然。其於殺降一節。亦曾與

總理衙門常時議論。不以為然。而不知此中權衡。自有一定之理。殊難與為曉譬。當此時事多艱。中外和好。此等唇舌。我自不值與之深辯。然其藉端曉瀆。亦惟有據正理駁斥。以折其心。李鴻章辦理此事。甚為允協。嗣後於勦撫一切事宜。仍期準情酌理。一歸至當。豈能妄為外國人之所牽掣。將來英國公使。如果向總理衙門議及此事。亦必據正理駁斥之也。蘇城散遣降眾二十餘萬人。數過多。著

李鴻章妥為籌辦。毋稍大意。一面詳悉奏聞。將此由六百里各密諭知之。○又諭。官文嚴樹森奏。湖北漢鎮地方。久為髮捻垂涎。該鎮前濱大江。東西及後湖沿隄一帶。處處可達皖豫。春冬水涸。無險可守。現就該鎮地勢。三面築堡開濠。設立礮臺。以補長江之險。所需經費。該鎮商民皆願抽捐房租。現於十月興工開濠。一面購備本樁石塊。築設堡牆礮臺。責令於來年春間一律完竣等語。所籌尚屬

周妥。即著照所擬辦理。所稱各國洋行。及所買地基。擬即一併包入。外國商民藉資捍衛。該洋人自無不欣然樂從。惟此事總須內地官員自為經理。不可假手洋人。從前上海曾有築堡開濠保衛地方之舉。洋人代為經手。藉此百計浮開。索費甚鉅。一切頗形掣肘。此次如不慎之於始。恐蹈上海前轍。並著官文嚴樹森妥籌辦理。將此由四百里密諭知之。○湖廣總督官文奏。請將安徽已革副將貴

廷芳暫緩發遣。調赴湖北軍營差委。允之。○予江蘇望亭等處陣亡遊擊周學林。守備王舒甲。把總孫勳煥等。祭葬世職加等。○予江西南豐等處殉難文生黃鳳翔等。紳民婦女九名。口分別旌卹如例。○丁巳諭內閣。前因給事中博桂。御史劉慶先後奏。參錦州副都統恩合等各款。當經降旨。交基溥阜保查辦。茲據奏稱。查明原參各情。請將該員等分別免議。議處各摺片。此案恩合被參之款。既經

查明或事出有因。或物議訛傳。其開墾大凌河馬廠。令甲兵分領招佃。係援照成案。以專責成。偷墾之地。仍令原人領種。並無失業。至查辦烏雲泰一案。亦未彌縫掩飾。均無不合。即著毋庸置議。錦州府知府慶銘。於長盛永漏稅罰銀一案。尚未辦結。輒向幕友穆繼謀漏洩。以致該幕起意詐索長盛永贓錢二千餘串。而於穆繼謀與李洛玉等交通出入衙署。毫無覺察。實非尋常疏忽可比。錦縣知縣

劉杞。於採買運京米石時。屬書吏向商人借錢。雖無勒派不償情事。究屬非是。慶銘劉杞均著交部議處。舉人穆繼謀。於長盛永漏稅之案。聞該府慶銘有罰銀究案之語。從中誑騙得贓。實屬卑鄙。著即行斥革。聽候部議。開墾牧廠事宜。仍著恩合照所擬章程認真辦理。嚴杜奸民包攬之弊。俟辦竣後再行詳細奏報。○諭議政王軍機大臣等。前據理藩院以土默特旗貝勒散巴勒諾爾贊等呈報綽

金汰。那木薩賚等糾眾焚燒搶擄。懇請查拏等情。具奏當經降旨。令麒慶確查。並諭令玉明等派兵協緝。嗣因麒慶以綽金汰等藉差項過重為詞。抗差滋事。復於委員查辦後。仍行聚眾持械。忽聚忽散。究屬不法等情。覆奏復批。令該都統密飭委員等迅緝務獲。茲據麒慶奏稱。綽金汰業已自行投案。據該犯供稱。實因該旗派差過重。邀人求減差錢。並無搶刦情事等語。該犯既係邀人求減差錢。並

未搶刦。何以該貝勒旗屢次與熱河都統文內。總以綽金汰等毆官搶人為詞。且以糾眾焚燒搶擄。赴理藩院呈訴。究竟有無其事。及因何啟釁。根由必須質訊明確。方可以折服其心。那木薩賚一犯。前因查拏緊急。已據麒慶奏稱自行投到。著該都統即將該二犯親提嚴訊。並將案內牽涉之旗員提傳到案。嚴切根究。務當持平辦理。以成信讞。將此諭令知之。○又諭李鴻章奏官軍克復無錫金匱

縣城一摺暨陳近日賊情及籌辦大略情形一片覽奏甚為嘉悅李鶴章能與其兄同心勦力為國宣勤此次未行破格之獎正為該員係李鴻章之弟以示該撫功不自私俾得推勞將士鼓舞眾心李鶴章當益自勉勵指日常郡金陵次第奏捷克成全功更當與劉銘傳郭松林等同膺懋賞至所稱忠逆李秀城自十年春間臺陷蘇杭各處盡得東南財賦之區日益強悍至去歲賊勢屢挫各城反

正精銳散亡洪逆驚惶無措猶賴忠逆回援金陵主持守局而該逆以蘇州為分地事急仍須反顧其部眾逆首尤以譚紹洸鄒雲官陳炳汶鄧洗明黃子澄等為尤眾且悍此次蘇錫兩城之克勦除逆首殆盡解散逆眾均各數逾億萬李秀城之巢穴既失黨與已殲該撫據獲賊供均稱該逆踉蹌西走隨行僅止兩萬餘人將赴金陵設法解圍計不得施則挾洪逆並其母妻眷屬由浙皖交界竄走

江閩以尋回粵之路李鴻章自入蘇城徧察賊中規畫守禦頗饒賊智深以此首逸出江閩恐仍蔓延為患其常州護逆陳坤書不甚耐戰杭州之陳炳汶鄧洗明聞忠逆勢敗思歸多不願從惟溧陽侍逆李侍賢戰守俱悍且與忠逆同惡相結而陳鄧等逆首以嘉湖蓄糧甚多必須死守幸而官軍各路布局皆穩金陵杭州再有一處得手賊更瓦解該撫擬即日馳赴錫城籌布進取令程學啟會同

李朝斌劉秉璋潘鼎新水陸各軍由平望太湖平湖乍浦兜剿浙省之賊冀與左宗棠蔣益澧之軍前後夾擊李鶴章劉銘傳各軍進圖常州宜興兜剿蘇境之賊冀與曾國荃鮑超之軍前後夾擊以分各路賊勢而固蘇滬藩籬所籌均極周至即著曾國藩飭令曾國荃與左宗棠聯絡進止督率各路將領與李鴻章部勒諸軍相為策應相機進取如賊欲由浙皖毗境竄出江閩各路或由乍浦海口

登船逃逸。並著曾國藩、左宗棠、豫籌堵截。沈葆楨現已力疾視事。其於江省饒信等防。經營有素。此時尤當嚴密設防。不可稍涉疏虞。並與曾國藩、左宗棠隨時函商布置。所有江忠義、席寶田等軍。現在是否尚駐贛饒境內。亟應妥籌調度。以赴事機。曾國藩前奏鮑超及王可陞等軍。分駐東壩、漂水、高淳及皖南甯池等屬。左宗棠前奏劉典、王開琳各軍。以次由孝豐等處進發。兼顧皖防。諒皆各有成

算在胸。與李鴻章所籌定相符合。金陵漸已合圍。杭州亦已分軍進擣。時勢均有可圖。該督撫等務須聯絡一氣。層層進逼。萬不可稍涉遷延。惟賊勢雖衰。而人數尚眾。總宜力求穩慎。以保萬全。縱或各城收復稍稽。斷不可令李秀城潰圍逃逸。務將此賊就地芟除。絕其根株。免致竄擾。完善辦理。更形費手。李鴻章所部各軍。因天氣苦寒。多有積勞致病。須略加休養。即著加意拊循。養蓄精銳。慎重進

取可也。將此由六百里各諭令知之。○又諭富明阿奏。近日招撫情形。並將援蒙之揚軍撤回。籌辦皖北善後一摺。總兵詹啟綸等軍攻克歐王堡賊圩。後四路兜剿。連日收撫一百數十圩。參將王品裕督同投誠練總詹文魁等。拏獲苗逆家屬。並收撫民圩十一處。以上反正各圩。應如何加意拊循。妥為控制之處。著唐訓方督飭按察使英翰相機辦理。毋令再萌反側。逆屬苗徐氏逆子苗連生業經

解交僧格林沁軍營。著該親王訊明辦理。蘇常各軍均極得手。髮逆紛紛擁至江邊。深恐鉞走北岸。揚軍單薄。不敷分防。僧格林沁富明阿將揚營援蒙之軍。先行撤回三千五百人。令詹啟綸統帶。仍回揚州原防。所籌甚是。本日據李鴻章奏。無錫業已克復。南岸攻勦愈緊。北岸防務愈形喫重。若稍有疏虞。致令金陵、常州等處之賊竄入江北。完善之區。卽南岸壘奏捷音。亦復所得不償所失。著都興

阿富明阿。吳崇分督水陸各軍。嚴密堵禦。力過該逆北渡之路。不可稍涉大意。皖北之患。實由民圩過多。練總權大所致。各團練總文職保至府道以上。武職保至二三品。仗勢自豪。不但生殺之權。地方官不能專主。甚至鄉井小民。止知有練總之尊。不知有官長之令。積習日久。黨與既多。勢益強橫。有一大練總而管至百數十圩者。稍有所拂。即藉尋仇為名。糾眾燒殺。如苗沛霖之釀成巨患。率皆由此。若不妥籌善後。隱弭此患。恐跋扈箠擊之徒。暗伏亂萌。又蹈苗逆覆轍。若僧格林沁將如何遣散各處民圩。漸削練總之權。俾團練無從抗官之處。悉心籌畫。妥為辦理。並著曾國藩。唐訓方。督飭地方文武。力加整頓。此後該處民練總。須官為督辦。毋再畀權練總。致成尾大不掉之勢。方為妥善。將此由六百里各諭令知之。○命前任翰林院侍講楊泗孫仍在南書房行走。○以克復江蘇。無錫金匱。

兩縣城。賞總兵官周盛波。陳東友。從一品封典。總兵官羅得陞。副將顏邦桂。彭述清。易用剛。李正珮。易宏達。遊擊張紹崇。胡金元。劉克仁。董大義。劉啟福。謝連陞。道員符信。同知劉盛藻。知州余思樞。邑圖魯名。號並賞劉勝藻。花翎。餘升敘開復有差。○以熱河拏獲盜首出力。予府經歷呂景恬等優敘。○戊午。諭議政王軍機大臣等。都興阿奏。逆匪圖竄北岸。現經布置截剿。馮子材等奏。南路潰賊。併注鎮防。連日統籌戰守。並諫壁等處防剿情形。各摺片。蘇州無錫各城。先後克復。忠侍各逆。竄併丹句一帶。蜂屯蟻聚。約有六七萬眾。賊勢如羣川赴壑。鎮防實首當其衝。馮子材等調張文德所部四營。即日回防。以厚兵力。並令田宗揚一軍。歸併丹徒駐紮。聯絡東南聲勢。所籌均尚周妥。即著督飭在防各軍。實力扼守。以靜待動。以逸待勞。庶戰守皆有把握。不至為窮寇所乘。鮑超全軍。現紮東壩。此時。

溧水已復。自應進圖句容。以斷忠逆援救金陵之路。著曾國藩飭令該提督迅速進兵。將句容踞逆殲除。該逆不能回援金陵。勢必猛撲京口。亟圖一逞。如馮子材等兵力不敷。分布。並著曾國藩飭令曾國荃撥兵協助。可使金陵暫緩合圍。斷不可令鎮城有失。都興阿片內有探聞忠逆欲合護侍各逆乘火輪船礮船竄擾江陰。並欲渡北。圖解金陵之圍等語。江陰現係駱國忠駐守。其兵力是否足資

抵禦。應否添兵協助。著李鴻章迅籌布置。嚴飭防江師船扼勦。並防其由江陰口岸渡江而北。江北防務甚關緊要。都興阿當遵疊次諭旨。督飭水師嚴防北竄。毋得稍有疏虞。忠逆既竄丹陽城內。常郡守禦自必空虛。李鴻章昨奏兵勇血戰經年。擬暫為休養。惟機有可乘。時不可失。著該撫揀擇選鋒乘勝前進。如能一鼓攻克。則丹句之賊勢必望風瓦解。想李鴻章必能相機辦理。籌畫萬全也。將此

由六百里各諭令知之。○又諭左宗棠奏克復甯波等府縣。英法領事夏福禮等九員助勦出力。請旨嘉獎。並由該督傳旨賞給物件等語。英國領事夏福禮總兵咄樂德克都司陂格樂繙譯官有雅芝。兵船醫官參將銜伊爾雲。水師都司費達士。法國參將權授中國兵官德克碑。稅務司日意格。教主田壘。思上年隨同官軍克復甯波各城。實屬奮勇出力。宜加賞賚。以示嘉獎。各國助勦出力獎勵。有

僅傳旨嘉獎者。有行知各該國主自行給獎者。有賞銀牌者。有賞銀兩者。其功績大小不同。故獎賞亦厚薄有別。日前李鴻章奏克復蘇州省城。戈登尤為出力。曾經降旨賞給頭等功牌。並銀一萬兩。聞此外另由李鴻章賞賚銀七萬兩。浙省助勦之英法領事等官夏福禮等九員。協同克復甯波慈谿等城。甚為出力。惟究非克省可比。若賞給銀兩。恐以戈登為比。實難為繼。若賞給物件。過優。恐戈登

又有藉口。緣日前陣亡之勒伯勒東曾賞貂皮。英國住京公使曾援以為戈登請經總理衙門告知。係因陣亡而賞。戈登實非其比。該使亦即中止。左宗棠所請傳旨賞給該員等物件。是否已有成說。惟未明言何項賞件。礙難懸擬。著將各該員等勞績細加察覈。應如何分別賞賚銀兩物件功牌之處。一面酌擬賞件頒發。一面奏聞。並摘錄此旨內嘉獎數語宣示。至功牌為外國人所重。無論或賞銀

兩。或賞物件。均不可無功牌。功牌如外國寶星之類。崇厚、李鴻章並曾製造有式。可仿照辦理也。該督曾否進紮富陽。近日軍情並著隨時報聞。以慰塵繫。將此由五百里諭令知之。○以浙江克復甯波等城出力。賞知府邊葆誠、遊擊吳長安等花翎。知縣沈兆元等藍翎。餘升敘有差。○以江蘇上海拏獲逆首洪秀泉親族。擢把總凌國祥以守備用。並賞花翎。餘加銜升敘有差。○以營利私逃浙江知

縣張樹松革職逮問。○予浙江上虞陣亡在籍光祿寺署正潘治安。知縣陳景祺。祭葬世職加等。○己未諭內閣。張之萬奏甄別庸劣各員。請分別革職降補一摺。河南署鹿邑縣知縣王毓昌性耽安逸。不理公事。魯山縣知縣左德溥居心巧詐。委任吏胥。署魯山縣知縣左駿章嗜酒任性。動作輕躁。寶豐縣知縣余光斗昏庸無能。諸事廢弛。商邱縣知縣茅豫春才識昏庸。辦事竭蹶。前署甯陵縣知縣

周廣德貪利營私。聲名狼藉。以上各員均著即行革職。前署商邱縣事柘城縣知縣謝國輔小有才具。輕浮自喜。惟年力尚強。著以縣丞降補。該員前有已徵未解之款。尚未交清。茅豫春、周廣德均有已徵未解之項。為數甚鉅。均著勒限嚴追。如逾限不交。即著從嚴叅辦。○諭議政王軍機大臣等。張凱嵩奏容縣官軍掃蕩匪巢。並東師越境會剿。收復岑溪縣城各摺片。廣西官軍於攻復容縣後。乘勝

攻克大化賊巢。生擒范亞音之弟范六。並將餘匪分別勦撫。容境大致肅清。惟首逆范亞音在逃。未獲。必應趕緊躡緝。毋令免脫。其由岑溪逃往藤縣糯崗之匪。喘息一定。亦恐滋蔓難圖。著毛鴻賓、郭嵩燾、張凱嵩督飭兩省官軍。分投搜捕追躡。務令渠魁就縛。萌禁悉除。以靖疆圉。各路投誠之人。必須地方官妥為鈐束。並著張凱嵩嚴飭覃遠璉、盧定勳等督率官紳。設局立團。悉心查辦。總期撫綏安

定。後患不萌。方為妥善。前據毛鴻賓奏。李幅猷一股。竄至廣西懷集縣之石塋地方。樹柵屯糧。意圖久踞。茲據張凱嵩奏。署懷集縣知縣況逢春等。督團截殺。殲匪甚多。復會合東省勇練。填濠焚柵。槍礮齊施。該逆腹背受敵。奪路狂竄。僅餘殘匪一、二千人。由陽山之白帶寨岡竄去。現在廣東兵勇趕到。督隊跟追。其前竄開泰縣屬一股。忽於十月十一日自焚其巢。全股突向永從縣竄去等語。李幅猷

股匪。經此次痛創之後。餘黨尚有一、二千人。亟應各省合兵夾擊。聚而殲旃。著毛鴻賓、勞崇光、張亮基、郭嵩燾、張凱嵩、惲世臨等各飭在事員弁。實力堵截。嚴密兜拏。或懸賞購獲首逆。或設法解散脅從。務將積年巨憝一鼓殲除。毋令豕突狼奔。餘燼復熾。方能永靖邊陲。至貴州永從縣境與廣西之羅城接壤。若由永城走古州。繞出荔波獨山。可入廣西之河池思恩等州縣。此股逆匪。本有趨粵之志。

自應扼要嚴防。著勞崇光等迅派兵勇迎頭截勦。張凱嵩飭令副將黃仲慶等。探明賊蹤所向。嚴密堵勦。毋得稍有疏虞。將此由六百里各諭令知之。○補鑄直隸滄州知州。四川高縣知縣各印信。從總督劉長佑。駱秉章請也。○以河南倡捐京倉米價。予巡撫張之萬學政景其澐布政使王憲。署按察使王正誼等議敘有差。○以捐備甘肅餉需。予河南布政使王憲優敘。○予河南各屬陣亡殉難紳

民婦女一千三百三十三名口分別旌卹如
例○庚申諭內閣恭親王寶鋆奏詳查

定陵各段已修工程據承修大臣移付內稱均
屬堅固一摺現在

定陵及

妃園寢已修工程經恭親王等移付承修大
臣逐項詳查已據覆稱均屬堅實鞏固並無
偷減草率等弊嗣後應修各工仍著承修工
程大臣督飭住工監督隨時敬謹稽查總期

一律完固不得稍有疏懈並著恭親王等隨
時督率以昭慎重另片奏工作喫緊之際匠
役雲集請飭馬蘭鎮總兵認真彈壓等語

陵寢重地理宜嚴肅轉瞬春融工作匠役倍多
於前著承修工程大臣輪流住工與常川住
工之大臣全慶實力稽查嚴為約束並著責
成文俊撥派弁兵官役常川在工認真彈壓
如有匠役結夥滋事即行嚴拏從重懲辦以
免效尤儻派出兵投並不實力奉行有意徇

縱或劣弁藉端勒索即著恭親王等據實嚴
叅○又諭前任安徽巡撫李續宜由諸生帶
勇勦賊忠勇奮發沈毅有為與其兄原任浙
江布政使李續賓勦力行間受

文宗顯皇帝特達之知洊擢封圻轉戰湘鄂江
皖數省屢克名城戰功卓著咸豐十年間逆
匪石達開竄擾湖南該員統師援勦力解寶
慶之圍厥功尤偉朕御極後調任湖北安徽
巡撫辦理一切深合機宜上年因丁母憂賞

假回籍治喪本年復准開缺專辦皖北軍務
旋因患病節次賞假在籍調理方冀漸起沈
疴長資倚任茲聞溘逝悼惜殊深李續宜著
加恩照總督軍營病故例賜卹任內一切處
分悉予開復應得卹典該衙門察例具奏並
准於湖南湖北安徽省城寶慶府城及原籍
湘鄉縣城建立專祠其歷年戰績著官文曾
國藩詳查具奏宣付史館伊父李登勝著賞
給人淺四兩交憚世臨頒給祇領並著該地

方官以時存問。伊子一人尚幼。若俟及歲時。由該部帶領引見。以示篤念。蓋臣錫類推恩。至意。尋予祭葬卹廕。諡勇毅。○又諭。前因富明阿奏直隸勒休千總譚興魁勦賊出力。懇請開復原官。仍以守備儘先補用。當經降旨允准。茲據兵部奏稱。休致人員。例不准其開復。惟該員因從軍傷疾舉發。呈請告病。因係軍政之年。是以照例勒休。情尚可原。此次勦賊陷陣。亦屬首先出力。應否准其開復。請旨。

遵行等語。譚興魁著准其開復原官。仍以守備儘先補用。嗣後仍不得援以為例。○又諭。惲世臨奏。李逆股匪窮蹙。投誠生擒首逆一摺。李幅猷股匪自遁入廣東連陽山內之石瑩阮尾一帶。負嵎固守。經福建按察使張運蘭等督率湘軍。於十月十一十四等日。馳抵寨岡石瑩等處進剿。賊目二十餘人詣營乞撫。十七日賊目等將石瑩阮尾賊壘概行焚毀。呈繳軍械旗幟偽印偽照多件。除積年悍

賊偽旗帥向日鼎等三十餘名業經正法外。其乞降之餘黨三千餘人。分別遣散安插。首逆李幅猷逃至連州所屬之鐵阮。復經兵勇奮力衝殺。悉數擒縛。又拏獲偽軍略曾漬。伍幅勝二名。一併解赴廣東訊明辦理。連陽地方一律肅清。辦理甚為認真。著惲世臨飭令張運蘭等乘此聲威。將逃竄餘匪會同粵黔各軍合力殲除。毋留餘孽。○諭議政王軍機大臣等。劉長佑奏報回省日期。暨按捕餘匪。

請保出力員弁各摺片。直隸地方現就肅清。復將屢叛屢降之積匪楊朋嶺伏法。其元城縣通賊之革生錢洛汶等亦經按捕誅戮。辦理甚為妥協。直境匪徒經此次勦除痛懲。理宜淨絕根株。究竟各屬現尚有無潛藏巨慙。仍著該督隨時訪察辦理。毋稍懈弛。劉長佑現已回省。所有地方善後一切應辦事宜。著即認真率屬妥籌辦理。俟有就緒。再行奏請來見。候旨遵行。至另片奏直省吏治營伍均

多廢弛所擬整頓大概情形自應一切破除情面整躬督率辦理但須事事務求實效在力行不在多言至欲訪求公正紳士詔以地方利弊得失惟在該督悉心延攬以資考鏡古人采及芻蕘隨事隨時皆資訪察固不獨於紳士為然果得地方公正紳士自足以通達輿情維持治理也將此諭令知之○又諭都興阿奏擊勦龍虎埭竄賊獲勝劉巷降眾潰圍逃出現飭稽查情形一摺蘇垣敗賊竄

擾丹陽一帶突至江邊經總兵李起高等軍擊退劉巷朱家圩等處又有賊眾數千意圖渡江撲犯太平洲旋見鎮海巷對江之龍虎埭有賊馬步隊一二千人馳驟而來我軍撥隊扼險登岸迎擊賊始回竄劉巷以下該逆窮極思竄鋌而走險旁擾鎮城北犯揚防均屬意中之事著都興阿富明阿馮子材魁玉懍遵前旨督飭各軍扼要布置嚴密堵禦如鎮營兵力不敷防勦並著都興阿撥兵策應

總之揚州鎮江兩軍雖營分南北實則同辦一事必須聯絡一氣互為聲援方不至為賊所乘不得稍分畛域致誤戎機昨據馮子材等奏九月間常州逃出難民賀姓等約五六百人由孩溪諫壁赴丹徒柏家橋卡外投誠時餘千賊壘出賊追逐難民呼號求救總兵田宗揚往援賊已回遁當將此起難民交招撫局給貲遣散茲據都興阿奏鎮軍投誠逆首張九元為賊所覺悉力圍攻該降眾稟乞

田宗揚往援因該卡子藥俱盡力不能支止得帶隊隨同官兵衝出當飭李起高及丹徒縣知縣馮渭查明止准於十一月初八一日北渡初九日即行禁止等語與馮子材等所奏均不相符是否該營稟報不實以致彼此兩歧著都興阿富明阿馮子材魁玉查明具奏其未經衝出之降眾自必陸續北來都興阿現飭副將孫文友等於沿江過渡地方設局稽查並派侍衛訥楞額挑馬隊百名前往

沿江一帶彈壓。卽著飭令各該員認真盤詰。以免奸匪瀾跡。此項降眾應如何飭令地方官分別遣散設法安插之處。著李鴻章妥為辦理。將此由六百里各諭令知之。○又諭。吳崇奏徐宿援蒙官軍回顧本境一摺。總兵姚廣武一軍於十月二十八日攻克宿境之宋家圩。將擒首宋小喜擒獲正法。現經僧格林沁飭令該總兵帶隊回宿。清理宿西各擒圩。卽著吳崇督飭姚廣武迅將宿西伏莽次第

掃除。以靖地方。將此由五百里諭令知之。○又諭。惲世臨奏李幅猷股匪窮蹙投誠首逆就獲並援勘黎平情形一摺。李幅猷以石逆餘黨著名兇悍。現經官軍拏獲解赴廣東。卽著毛鴻賓郭嵩燾將該犯等三名訊明後盡法懲治。該逆全股前據楚粵兩省奏報實有三四萬之眾。此次惲世臨所稱餘眾僅三千餘人。其大股究歸何所。且以積年竄擾蜀黔楚粵悍賊現雖窮蹙乞降難保不陰謀反側。

惲世臨所稱分別遣散安插之處能否不貽患將來。著毛鴻賓惲世臨郭嵩燾飭令地方官及帶兵員弁實力搜捕。妥籌辦理。其已降之眾如有叵測卽當一律剿除。以清後患。至該逆前竄開泰縣屬一股昨據張凱嵩奏全向永從縣竄去。又稱李幅猷與其弟李幅忠面議投誠遲疑未決。意欲他竄等語。此次惲世臨奏稱該逆分股李七竄擾黎平洪州所等處復竄至下溫攻陷成應洪營盤成應洪

不知下落現經周洪印等追剿復退竄宰宰四寨地方等語。所稱李七是否卽係李幅忠其宰宰四寨之賊是否卽竄往永從之股分擾蔓延現在李幅猷既經生擒該逆黨與自已聞風膽落正宜乘此聲威合黔粵及楚省官軍埽清全股以靖邊圉而免蔓延著勞崇光張亮基惲世臨張凱嵩懍遵前旨督飭各該省官軍會合兜剿毋得藉口邊防株守境內儻意存觀望任令匪蹤鋌走將來竄往何

路肆擾。即將何省會勦不力之員。弁從重治罪。決不寬貸。此次成應洪既與周洪印約會進攻。何以該逆竄向洪州下溫。攻陷營盤。未見周洪印接應。難保非該副將心存畛域。坐視不援。卽著憚世臨查明。叅奏成應洪下落。並著勞崇光、張亮基查明辦理。將此由六百里各諭令知之。○又諭閻敬銘奏東昌布置。摘定現擬回省。並訪聞卽縣鄉民張本功等聚眾抗糧。拏獲正法各摺片。閻敬銘自八月間督軍駐紮東昌。迄今將及三月。督率各州縣。按拏匪黨三千數百名。正法。民情漸知懾懼。現今定安等軍會同地方官巡緝餘匪。實行保甲。並責成署東昌守曹丙輝認真整飭。其毗連徐宿及單縣馬良集並韓莊廬均已派員帶兵扼守。仍著督飭認真辦理。以靖地方。李大箇子股匪。前據僧格林沁奏報該匪首到營投誠。惟相盤等股仍行負固。東省與徐宿毗境。並著閻敬銘嚴飭派出之王心安

等軍。慎密防維。毋令捻蹤闖入。閻敬銘現屆服闋。本日業經降旨補授山東巡撫。著於回省後。卽將察吏整軍及該省應辦各件逐一實心講求。力加整頓。俾地方日有起色。方為不負委任。卽縣鄉民張本功等聚集匪眾多。意圖入城抗糧。經該撫派調勇丁會同地方官將該匪首等緝獲。正法辦理。甚為妥速。東省地方彫敝。民困未紓。該大吏等固宜加意拊循。惟此等不法匪徒。膽敢糾眾抗官。實為法所難容。此外各州縣似此者。恐尚不少。仍著切實訪拏懲辦。以儆刁頑。各屬黑團。並著設法曉諭解散。為首匪犯嚴緝正法。毋任一名漏網。兗沂曹一帶伏莽尚多。該撫擬諸務清釐。明春出省前往巡察。著照所擬妥為辦理。至淄川、白蓮池等處。隨同僧格林沁官軍勦匪出力官紳人等。均係著有微勞。惟僧格林沁前次請獎所部員弁。人數無多。原以賞功之典。宜從覈實。所有淄川等處隨同出

力各員弁。著閻敬銘擇尤彙保。毋許冒濫。將此諭令知之。○又諭多隆阿奏官軍收復山陽。商境肅清。並圍攻盤屋各路。彙報軍情一摺。此股賊匪竄走。官軍追剿。一及之於東岡。再及之於富水關。沿途斬獲而外。究竟尚有若干。現由西坪竄越豫境。自應不分畛域。踰境窮追。藍斯明兵力未厚。現在張總愚大股盤踞浙川。尤虞其與藍逆一股勾合。為患復擾陝境。多隆阿所奏。飭令藍斯明嚴扼武關。兼顧潼商一帶。仍恐不敷堵剿。著卽懍遵前旨。酌量分撥兵勇。俾得越境追剿。與豫省之軍前後夾擊。張曜所部。現已前往浙川防剿。張之萬並派令葛承霖蔣希夷。所帶湘楚各營。前往協助。前奏已將西坪竄來之匪擊退。著卽嚴飭該總兵親督各軍。與秦軍聯絡。實力扼截。張曜接仗一切情形。張之萬切須隨時查察。如果防剿不力。徒為紙上空談。致令藍張二逆乘間竄合。仍復蔓延。必惟張曜是

問。卽張之萬亦不能當茲重咎。前因藍逆竄至商境。與豫鄂均屬毗連。曾經諭令官文嚴樹森。卽飭鄖防之軍相機越剿。此時賊蹤所向。如須鄂軍相為策應。張之萬卽遵奉前旨。飛咨鄂省鄖防兵勇會合圍剿。毋失事機。豫省此時東路稍紓。其亳州一帶捻匪。有僧格林沁大軍督剿。張之萬卽當權衡緩急。量移東路各軍。以顧西圍。該撫應否親赴西路。以資巡察。著卽酌量情形辦理。多隆阿督攻藍屋。諒不難於得手。務須迅速奏功。毋為一隅之地致牽全局。雷正綰之軍已由靈臺前進。並著迅飭陶茂林之軍速清汧隴。轉戰而前。與雷正綰會合甘境。以厚兵力。仍督令曹克忠。埽除麟遊一帶餘匪。進紮岐郿。毋稍稽滯。其李雲麟所部。疊經寄諭。責令回軍援剿商南之賊。該京堂計已接奉此旨。此時劉蓉曾否入陝。仍未奏來。何以如此濡遲。漢南羣盜如毛。劉蓉之軍如未入陝。李雲麟一軍亦斷

不能獨力削平。商境肅清情形究復如何。如或商潼賊勢尚重。藍斯明一軍勢難獨支。多隆阿仍遵前旨。飛咨李雲麟回軍與藍斯明併力合剿。並著該京堂星速返旆。毋得藉詞避就。自蹈愆尤。劉蓉仍遵疊次諭旨。速整軍威。由青石關進紮。以復漢疆。並將陝南一路軍情詳細奏聞。毋再延宕。將此由六百里各諭令知之。○又諭多隆阿奏回匪勢窮乞撫。並請將甘省兵勇統歸雷正綰調遣。熙麟專辦糧臺各等語。陝省回匪蓄謀倡亂。經多隆阿督軍痛加勦洗。所有兇悍逆黨業已殲除殆盡。現惟汧陽隴州麟遊尚有零星匪徒。陶茂林由鳳翔進兵至汧陽交界地方。回眾老弱婦女頂香跪地哭泣求撫。該回眾既經畏威悔罪。自可寬其一綫。予以自新。前經疊降諭旨。准予良回投誠。著多隆阿即遵奉前旨。妥為辦理。並刊刻謄黃。徧行曉諭。總令其將戕官踞城首惡捆獻。其餘一切脅從。概行赦

宥。則回眾可期漸次解散。至甘肅固原州為提督駐紮之所。踞城者多係叛兵。平涼回匪陷城戕官。兇惡已甚。該大臣當飭雷正綰等大申撻伐。以懲兇頑。俟匪勢窮蹙後再行分別招撫。以期一勞永逸。此外陝甘各路零匪。果有誠心悔禍。自拔來歸者。即由該大臣設法安插。毋稍大意。雷正綰已抵甘省涇州地方。著即迅速前進。痛掃逆氛。所有該省兵勇均著歸雷正綰調遣。以一事權。甘肅省垣緊要經理需人。熙麟俟道路稍通。即應前赴省城。現在省東一帶回匪已有雷正綰督軍勦辦。熙麟著俟雷正綰進抵平涼後。即酌度情形。馳赴蘭州。整頓吏治。並辦理河州狄道等處防勦事宜。其雷正綰軍營糧臺。即由熙麟督飭所屬辦理。設法接濟。毋令缺乏。將此由六百里各諭令知之。○實授閩敬銘山東巡撫。○以已革阿勒楚喀副都統德楞額署伯都訥副都統。○予江蘇龍虎埭陣亡都司陳

奇珍。把總陳勝明。祭葬世職加等。○予江蘇溧水陣亡知縣張毓林祭葬世職。○辛酉諭內閣。都察院奏。世襲輕車都尉佛保。刑部筆帖式秀林。以投效軍營等詞。赴該衙門呈訴。據稱佛保秀林之祖父兄弟。或在四川江南陣亡。或在直隸山東陣亡。佛保秀林志切殺賊。各請投效軍營等語。前據都察院節次奏稱。知縣王宜勳等情願投營報效。先後降旨允准。發往軍營差委。原因各路軍務方殷。各該員等志切復仇。情殷殺賊。是以俯允所請。以作其忠義之氣。惟邇來各處軍營。頗不乏人。若復紛紛投效。藉此進身。以為將來保舉地步。未免開徼幸取巧之門。不可不示以限制。所有佛保秀林呈請投效軍營之處。著不准行。嗣後如有似此呈請投效者。該衙門即不必具奏。○諭議政王軍機大臣等。戶部奏酌撥來年京餉。開單呈覽一摺。歷年京餉。向係豫撥各省地丁鹽課關稅雜款。以備次年

開放之用。咸豐十一年以後。每年均撥七百萬兩。責令分限解齊。惟山西年清年款。他省多不能依限報解。且有逾限不解者。雖因防勦喫緊。奏請留支。或改解軍營。徑行劃撥。而藉詞諉卸。亦所不免。京餉關繫緊要。豈容任意拖延。現經戶部奏請豫撥同治三年京餉。擬在地丁鹽課關稅等項內。共撥銀五百萬兩。限於明年五月前解到一半。十二月初間全數解清。係斟酌各省緩急情形辦理。且均係應解正項。其近年瑣屑之款。悉予刪除。原為各該省易於遵解起見。並非部庫現有贏餘。可以從緩籌撥。朝廷俯念各省情形。准如該部所請。樽節動撥。各該省將軍通商大臣督撫鹽政監督並藩運各司等。受恩深重。具有天良。自應查照戶部指撥銀數清單。按限如數解齊。不得稍有貽誤。以重要需。且該部指撥各款。為數亦視歷年較少。並非強以所難。儻再任意截留改撥。藉詞宕延。定將該將

軍等從重懲處。決不寬貸。至部庫每屆年終。放項較多。前經戶部於八月間奏提本年京餉。復經奏咨疊催。各該省報解仍屬寥寥。實屬任意延誤。著卽迅速解到。以供支放。不得仍前延緩。致干重咎。懍之慎之。原摺並豫撥銀數單各一件。均著鈔給閱看。另片奏。江西省兵餉。除贛關稅銀留抵外。共需銀十八萬五千餘兩。係由該部在該省地丁銀兩內撥給。該省上年春秋兩撥。並本年春撥冊報地丁銀內開除留支餉數。遞有加增。統計元年兵餉。多至八萬九千餘兩。經該部將二年分四季兵餉。在於該省地丁項下撥給前冊。多開銀兩內作抵。該省本年秋撥冊內。僅就二年分應需餉數覈計。復多開除銀一萬二千九百餘兩。連前統計。多至十萬二千餘兩。如此逐年遞增。有加無已。終無劃抵之日。該省於應撥滇黔甘閩等省協餉。藉口本省軍需。絲毫未解。而於本省兵餉。又復開除溢額。含

混不清。實屬有意冒銷。著沈葆楨嚴飭該藩司。按照該部所查情節。限兩箇月。詳細具報。由該撫查明覆奏。其應撥滇黔甘閩等省協餉。仍著分別籌解。毋再遲延。原片著鈔給閱看。將此由五百里諭知福州將軍辦理三口通商大臣。各該省督撫鹽政。並傳諭各該關監督知之。○又諭。玉明等奏。疏防盜賊入境。及緝賊潰退各員。請旨叅辦一摺。已明降諭旨。將色勒等分別革職嚴議矣。滾地雷王五等股匪。回竄吉林長春廳屬之靠山屯等處。雖經玉明等催兵進剿。現在並未將如何分路堵禦。如何進兵接剿。妥籌辦法。相機布置。僅以接奉諭旨。再行嚴催等詞。草草塞責。該將軍兼尹等。身膺重寄。似此漫不經心。何以克副委任。盜首齊秀齊海。逃回江東。玉明等卽聽其自然。並未派兵躡緝。亦未聲明江東係何處界址。才實善。白凌阿。是否涸跡其中。迄今時閱數旬。猶尚懵然未覺。辦賊之法。必

須時加偵探。洞悉賊情。方能制賊死命。若謂責成委員。即可將就了事。將來該匪無撲滅之期。則該將軍兼尹等自問能諉過卸責否耶。景綸等自上月奏報賊匪回竄長春廳後。未據續報。剿辦情形。賊竄吉林境內。為時已久。未見景綸等速籌剿捕之方。實屬不知緩急。盛京與吉林同辦一事。儻任令該逆日肆蔓延。各該將軍兼尹等自問當得何罪。著玉明、景綸、寶善、麟瑞和潤德椿督飭派出各軍。

會師夾擊。以期聚而殲旃。各該將軍兼尹等務當嚴飭各軍。聯絡一氣。合力剿辦。不得意存畛域。互相推諉。伯都訥副都統現派德楞額署理。該員曾經身歷戎行。如吉林帶兵無人。應否卽令德楞額前往管帶。著景綸、麟瑞酌量辦理。通判色勒業經革職。其被參賄和釀亂各情。著和潤德椿仍遵前旨。將該員一併親提審訊。據實參辦。玉明等請頒梨樹城照磨印信。已諭知禮部辦理矣。照磨徐崇帶

團前赴榆樹臺。與賊接仗。斷非攜印前往。何以遂至遺失。難保無該匪赴署搶刦情事。著玉明、寶善和潤德椿查明據實具奏。將此由五百里各諭令知之。尋奏遵查徐崇帶團緝賊時。因隻身在署。並無眷口看守印箱。故攜印前往。以致陣亡遺失。委無別情。報聞。○又諭前據僧格林沁奏攻克苗家老寨。下蔡壽州等情形一摺。內稱十一月初一日收復壽州。初三日有李營大隊進城。卽殺守門勇丁

五名。經我軍迎敵。將該隊逐出城外。擒獲五十餘人。內有提督蔣立功一名。又初三日李世忠督兵圍攻下蔡。以宋慶不肯讓給。調隊攻打。宋慶之軍亦出隊迎敵。將其擊退。李隊遂往下蔡附近。尚未撤隊。經派陳國瑞親往下蔡等處。會同李世忠妥為彈壓。並咨唐訓方詳查啟釁緣由。酌辦等語。昨又據吳崇奏李世忠查封西壩之鹽。至數十萬包之多。淮北鹽務疲敝。悉由李世忠把持盤剝所致。豫

勝營勇李世忠向不發給口糧全以擄掠為事近在懷壽一帶焚掠之慘甚於盜賊自五河以下至滁州來安全椒天長及江浦六合等處經李世忠勇隊盤踞至六年之久州縣官不敢理事居民搬徙不敢還鄉以致田畝荆榛屋廬瓦礫數百里內人煙斷歇苗平而淮北猶安李存而淮南仍困請密飭僧格林沁曾國藩察看情形宜及僧格林沁等軍全在皖境之時早為辦理各等語李世忠跋扈恣肆盤踞利源其勇隊分踞多縣不能約束騷擾病民終為淮南巨患朝廷早已洞悉止以淮南之苗患未除是以隱忍未發未幾而壽州下蔡等處無端尋釁又復見告以官軍業經得手之處膽敢調隊攘奪攻打且殺害守門勇丁多名其居心叵測目無法紀可見僧格林沁所謂先事羈縻俟唐訓方查覆到日再行酌辦者諒已胸有成見未便明言今覽吳崇密陳皖北隱患一摺其辦法似尚周

妥可行惟調其所部實缺人員赴任一節宜加參酌著僧格林沁曾國藩吳崇唐訓方詳細密函籌商即將李世忠調赴曾國藩軍營折以正言曉以大義令其隨營勦賊如彼以部中乏餉為詞即諭以官為給餉毋令其再擅利權並勒令將所踞城池釐卡鹽利交出歸官一面於各城及要隘處所分撥隊伍嚴陣以待挑選其營中得力弁勇編成隊伍分隸楚南良將各營其部曲來自逆黨及著名兇惡者概予芟除遣散如李世忠俯首聽命即可留營錄用若敢抗不遵調則是顯然背叛僧格林沁等即一面請旨革職一面聲罪致討斷不可稍存姑息僧格林沁等於計議將定未辦此事之先即須豫為貫注一氣同時並舉使其猝不及防不可稍有參差落後不能應手之處並往來密函籌商均各親自拆閱不准漏洩一字吳崇摺著鈔給僧格林沁曾國藩唐訓方閱看僧格林沁摺著摘鈔

給曾國藩閱看。再本日據戶部奏。淮北票鹽提充軍餉。請分別截留。以保正課一摺。亦因皖徐平靖。淮北銷路漸通。亟宜將餉鹽分別截留。以挽額綱。而裕正課。著曾國藩嚴飭鹽運使忠廉。設法遵照辦理。喬松年於鹽務情形。素所熟悉。並著吳棠接此旨後。將此旨內鹽務及戶部摺內應辦各條。密行摘錄。知照喬松年一體幫同辦理。戶部摺並著鈔給僧格林沁。曾國藩。吳棠。唐訓方閱看。將此由六

百里密諭僧格林沁。曾國藩。吳棠。唐訓方。並傳諭喬松年知之。○又諭張之萬奏藍逆由西坪入豫。官軍兩面受敵。旋復擊退。情形各摺片。藍逆大股。麇至西坪。經張曜整軍馳往策應。見賊中藍旗紅旗花旗約有七八千之眾。荆子關娘娘洞寺處防兵均有腹背受敵之虞。張總愚股匪。諗知藍逆前來。句約合股。復屢向西北各路衝突。情形岌岌可危。幸張曜於重陽店擊退藍逆撲營之賊。追殺至花

園關。復直襲西坪賊壘。攻其不備。逆賊被創狂奔。花園關之賊亦棄壘而逃。逐北五十餘里。該逆踉蹌西遁。逃至陝西商南之青山口。距荆關八十餘里。此股逆匪由漢中分股東趨。勢本兇悍。李雲麟初次於山陽接仗。即經失利。旋以賊股東竄。即稱收復山陽。率師西行。置賊不顧。反稱敗殘。餘匪勢已窮蹙。不難剿除。而此次竄往西坪大股。蟻聚蜂屯。賊勢竟如此浩大。若非張曜分投策應。勉力支撐。

必至兩股合併。秦豫均受其害。該京堂以知兵自任。入陝剿賊。尚無寸功。即居心如此巧滑。工於趨避。縱賊鄰封。該京堂止知自為身計。獨不知國憲具在。不能為該京堂少恕耶。現在藍逆雖遁往商南。而其蓄意東趨。冀與張總愚句合。屢據奸細所供如繪。勢將乘隙復來。且商雒密邇潼關。尤當派軍馳剿。以杜蔓延。著多隆阿。懍遵疊次諭旨。酌撥兵勇。分扼潼商。即飭藍斯明之軍。繞前截擊。李雲麟

迅卽激發天良。會合藍斯明實力勦除。毋得縱賊紛竄。致干重罪。晉省沿河毗連潼商一帶。英桂沈桂芬務卽激勵防河將士。豫籌堵禦。以杜奔軼。張逆屢次突圍。均經各營擊退。張之萬前奏。有就浙川山內圍逼坐困之語。諒非徒託空言。著卽檄飭葛承霖督率湘軍。會合張曜各營。乘藍逆甫退。外賊旣斷之餘。迅將張逆一股。圍逼聚殲。剋期肅事。一面飭令敖天印兩營。嚴扼荊子關一帶。以防藍逆

再逞。官文嚴樹森前經寄諭。令其酌撥官軍入豫會勦。豫鄂唇齒相依。浙川與鄖陽尤為密邇。該督撫務當不分畛域。剋日撥兵入豫。以免張逆潰圍出竄。又將擾及鄂疆。諒官文等必能領會機宜。妥籌調撥也。劉蓉並著懷遵疊諭。星速進發。籌復漢疆。與多隆阿及鄂省援軍分籌進取。毋稍宕延。將此由六百里各諭令知之。○又諭駱秉章奏滇撫已抵川省。並訪聞滇省大概情形。暨川省需餉孔殷。

請於來年續辦。按糧津貼各一摺。雲南巡撫賈洪詔於十月初七日行抵川省。與駱秉章面籌進取。適值潘鐸家丁周升到川。當向詢悉滇省大概情形。不特大理逆回杜汶秀等恃險負隅。堅不受撫。卽省回馬復初及岑毓英。楊振鵬等。亦俱心懷叵測。該督所陳賈洪詔如銳意輕進。恐蹈潘鐸覆轍。擬俟探明東昭一帶情形。再由賈洪詔奏聞辦理。自係實在情形。滇南全省糜爛。惟東昭尚屬完善。且

與川黔等省毗連。為入滇緊要門戶。非有大員前往駐紮。不足以資控制。並恐該回逆等從而生心。乘隙窺伺。賈洪詔仍當懷遵前旨。探明情形。馳赴東昭。與福陞會商妥辦。督飭該處兵練。嚴密防範。毋稍疏懈。並著駱秉章勞崇光。將滇省應辦各事宜。與賈洪詔籌商辦理。至將來肅清滇省。必須川黔等省合力進剿。而川省現在兵分餉絀。未能兼顧。勞崇光。賈洪詔身任該省督撫。責無旁貸。萬不可

稍存畏難之心。致負委任。駱秉章亦當不分畛域。妥籌兼顧。滇省在川官員。並著賈洪詔飭令隨赴東昭。以備差委。毋任逗遛。駱秉章奏。川省需餉。請於同治三年分續辦按糧津貼。以資接濟。著照所議。督飭地方官妥為辦理。將此由五百里各諭令知之。○又諭駱秉章奏。花縣開挖煤窯。請旨飭禁一摺。據稱廣東花縣象山腳等處產煤。自乾隆四年以後。疊經封禁。咸豐十一年間。劣紳盧桂芳串通

土棍王汶田等。勾引南海奸商在象山腳等處開採煤泥。附近墳墓慘遭毀棄。聚匪愈多。劫盜頻仍。請飭永遠封禁等語。象山腳等處煤窯。久經勒石封禁。何以該地方官輒輕聽劣紳蒙稟。詳准奸商開挖。以致匪徒聚集。日眾。被劫及毀墓開棺之案層見疊出。該地方官又不根究致患因由。嚴行封禁。難保無受賄故縱情弊。該處山徑叢雜。接連數縣。奸匪易於潛蹤。若再任其聚集蔓延。勢將釀成巨

患。著毛鴻賓郭嵩燾速將該處盜匪嚴緝務獲。該處煤窯永遠封禁。以杜亂萌。並將摺內所指之劣紳奸商土豪等。按名提訊。嚴行懲辦。該地方官如有賄縱情事。一併確查嚴參。不准代為徇隱。駱秉章原摺著鈔給閱看。將此各諭令知之。○又諭張凱嵩奏。谷縣官軍生擒范逆一摺。范亞音以積年巨魁。流毒兩省。自蔣澤春克復容縣後。該逆竄往實家寨地方。經官軍密約內應。立將范亞音生擒。就

地寸磔。逆弟范六。一併斬梟。實足以快人心。而彰國憲。惟容岑一帶。伏莽尚多。藤縣蒼梧平南各路土匪。亦未遽淨。著張凱嵩即飭蔣澤春督率全軍。會同潯梧兩府。乘首逆就殲。賊勢瓦解之餘。迅將各路餘匪。按捕淨盡。毛鴻賓郭嵩燾。即飭方耀一軍。會同西省官軍。實力勦除。以清積孽。范逆就擒後。該省著名悍逆。自以黃三為最。該逆踞伏天平寨。地險巢堅。復有由潯分竄橫州之李亞得。甘汰然

等股。句結永淳土匪。分我兵力。尤應合兩省官軍。會克堅巢。誅鋤巨惡。著張凱嵩督飭劉坤一。迅將黃三一股。擣穴擒渠。次第廓清。橫州等處之賊。李幅猷於連陽就擒。全股肅清。廣東兵力。自己已之餘。並著毛鴻賓。郭嵩燾。崑壽。派撥勁軍。與劉坤一合力痛剿。速籌歲事。現在廣西右江軍務。漸已就緒。其左江一帶。有無另股。並著張凱嵩妥為辦理。肅清全粵。以副委任。另片奏馬平縣擒匪梁扶英。歷年

稔惡。曾受偽封。深居犄地。柳慶之民。受其荼毒。經代辦提督蕭榮芳等督率兵練。攻破各寨。直擣其巢。力戰合圍。遂將該逆土博老巢。攻毀。生擒梁扶英正法。餘匪擒斬殆盡等語。勦辦尚為出力。仍著督飭地方文武。搜捕逸匪。撫綏難民。將善後事宜。妥為籌辦。出力員弁紳團。准其擇尤彙案保奏。毋許冒濫。廣西各屬。似此等匪徒嘯聚之處。恐尚不少。並著該撫通飭所屬。認真勦辦。毋留亂萌。將此由

五百里各諭令知之。○以廣西容縣勒匪獲勝。生擒首逆范亞音。賞道員蔣澤春。巴圖魯名號。同知鍾慶魁等花翎千總張元宗等藍翎。餘升敘有差。○以緝捕玩誤。奉天通判色勒革職訊辦。佐領哈爾尚阿下部嚴議。予陣亡佐領慶吉。驍騎校文楷。照磨徐崇。祭葬世職。○予四川各屬殉難漢屯官弁兵勇。穆騰額等三千一百五十八員名。分別賞卹如例。○壬戌諭議政王軍機大臣等慶昫等奏。甯

夏漢城內亂。並迎催道員和祥。路阻未能前進。各摺片。據稱十月二十三日四更後。滿城中聞東路火器發聲。料是漢回又關。黎明派員查探。途遇難民墜城逃命。城門兩日未開。其中是何情形。無從得知。並迎催和祥之委員行至納家牯地方。因回匪攔路。未能前進。各等語。覽奏實堪詫異。前據慶昫等奏甯夏回目較前斂跡。咸稱團練一散。即當遵繳器械。聽憑官辦。各謀生理。並令本地紳耆。曉以

利害。俾息殺機。何以此次忽有爭鬪之事。是否侯雲登剛愎釀亂。抑係撤圍後回眾滋事。近日城中情形究竟如何。慶昫等摺聲敘殊未明晰。著熙麟。恩麟。確切查明。據實具陳。毋得稍涉含糊。侯雲登及城內文武各員下落。一併查奏。道員和祥著催令迅速赴任。該員係前經獲咎之員。是否可靠。並著熙麟等詳加察看具奏。靈州平羅各缺。何以尚無人到任。殊屬不成事體。該督等務當嚴飭委署各員。速即赴任。如再玩延。即著從嚴叅辦。昨因雷正綰抵甘。諭令熙麟於該提督抵平涼後。即飭赴蘭州。整理一切防勦事宜。近省一站。即已文報不通。恩麟所司何事。著即派兵疏通驛路。熙麟亦即督率所部。逐節掃蕩。直達省垣。以重職守。正在寄諭間。據張集馨奏。甘肅甯夏靈州相繼失守。靈州與陝西定邊毗連。賊若東竄。不但擾及陝境。延安等府。滋蔓難圖。並慶陽餉道。亦恐梗阻。且恐闖入晉省。

完善之區。該署撫已飛調延綏鎮兵一千名。派署遊擊慶連統帶。赴定邊屯紮。仍恐兵力單薄。不敷堵禦。著多隆阿。雷正綰於涇州防兵內酌撥數營。前赴定邊。先行扼紮。協力防剿。並於正甯一帶。派兵堵禦。使平固逆匪。不至回竄。三水淳化復擾秦疆。仍一面力籌進剿。迅殄逆氛。毋任延蔓。張集馨當飭北山沿邊州縣。趕緊集團堵禦。以壯聲威。山西邊境界連甘肅。德勒克多爾濟當整頓綏遠城官

兵。豫備防堵。毋任匪蹤闖入邊界。英桂尚未起身。沈桂芬將次抵晉。著即檄飭沿河州縣實力防堵。並飛調弁兵。相機堵剿。以固疆圉。甯夏漢城既失。滿城獨力難支。著熙麟。恩麟。迅即派兵援救。慶昫等務當固守待援。毋再一意主撫。致誤事機。甯夏靈州失守。詳細情形。並近日甘省軍情。著熙麟。張集馨查明隨時具奏。將此由六百里諭知多隆阿。慶昫。常陞。德勒克多爾濟。熙麟。雷正綰。英桂。沈桂芬。

並傳諭恩麟張集馨知之○又諭慶昫等奏甯郡漢城內亂危急堪虞滿城有兵無餉難言戰守請飭迅催各省撥餉等語本日又據張集馨奏甯夏靈州相繼失守是該將軍等軍營需餉尤為急迫著英桂沈桂芬閻敬銘張之萬迅將戶部指撥之款星速籌解一面飛咨沿途地方文武各官添派兵弁妥為護送俾免疏虞將此由六百里各諭令知之○癸亥諭內閣曾國藩奏提督呈請開缺回籍養親據情代奏一摺福建水師提督楊岳斌因父母年逾七十母病現又增劇懇請開缺回籍養親具見孝思惟楊岳斌督率水師剿賊十年戰功懋著此時金陵合圍正賴該提督等和衷努力共奏膚公未便於軍務喫緊之時遽易生手楊岳斌省親一事著俟克復金陵後再行請旨此時毋庸開缺回籍惟念楊岳斌軍旅羈身伊父母年邁多病未能歸省著加恩賞給人漫四兩藉資調攝以示錫

類推思至意○諭議政王軍機大臣等曾國藩奏提督李世忠率師疊破苗圩會復懷遠縣城一摺另片奏金陵軍營布置情形並收復潁上正陽各城等語李世忠因苗逆倡亂自率所部先後削平四十餘圩並會同唐訓方收復懷遠縣城勦辦甚屬出力著准其開復革職留任處分以昭激勸其餘出力員弁並著曾國藩擇尤奏請獎勵潁上正陽兩城業經蔣凝學毛有銘等次第收復附逆各圩亦各聞風反正惟苗添慶等率黨遁逃該大臣仍當飭令蔣凝學等嚴密搜捕務絕根株金陵之師開挖地道轟城該逆竟能搶堵缺口未竟大功殊為可惜現在曾國荃已督飭各軍進紮孝陵衛城絕賊糧運惟有穩紮營壘逐漸緊逼俾該逆首無路可竄將來城下之日洪逆生擒東南數省一律肅清不至再煩兵力方為妥善楊岳斌因母病增劇懇請開缺回籍省親具見孝思該大臣務當諄飭

該提督暫抑私情。勉成大功用。副朝廷優加委任至意。曾國藩另奏。酌保賢員以備器使。一摺。所請將陳濬等以道員記名。請旨簡放之處。覈與吏部定章不符。已另交軍機處存記。候旨錄用。將此由五百里諭令知之。○又諭。前因僧格林沁。吳崇奏稱李世忠盤踞利源。殺害勇丁各情。當經密諭僧格林沁。曾國藩等會同密商妥辦。本日據曾國藩奏李世忠率練會勦苗逆。削平各圩。有裨大局。懇請

開復該提督革職留任處分。並請保其餘出力員弁。本日業於另寄曾國藩諭旨內允准。曾國藩於李世忠在壽州下蔡等處跋扈情形。發摺時似係尚未知悉。朝廷亦就事論事。姑允所請。賞功罰罪。本屬並行。曾國藩亦可因此次加恩。曉以大義。儻該提督感激悔悟。恪遵曾國藩劄調。前赴軍營。遣散部眾。將所踞城池鹽利釐卡交出歸官。如可調遣布置一切。悉由僧格林沁。曾國藩等妥籌善後。如

抗不遵調。僧格林沁。曾國藩等仍當懷遵本月十八日密寄諭旨。密函會商妥辦。毋稍姑容。此旨並著該大臣等密函知照。吳崇。唐訓方可也。將此由六百里各密諭知之。○以安徽收復和州等城出力。賞總兵官葛清泰。副將胡秀。世肅。元龍。孔相通。何雲峻。王玉藻。參將巢端南。都司石來之。色圖。魯名。號。遊擊王鵬翥等花翎。千總胡致崑等監翎。餘升敘有差。

大清穆宗繼天開運受中居正保大定功聖智誠孝信敏恭寬毅皇帝實錄卷之八十五

大清穆宗繼天開運受中居正保大定功聖智
誠孝信敏恭寬毅皇帝實錄卷之八十六

聖母殿及宮前屋宇落成後生員入木石梓木通開開新翰林院等處學士徐學欽上諭等件及等處禮部等處
御史郭希顏戶部三庫等處加五級陞學士加五級紀錄二十次有差等處監生劉繼漢貢士彭子芳貢士劉繼開等
正以應州州學正等處文生徐學欽等陞內外監國司公署功加一級陞學士加五級紀錄十七次有差等處監生
學士月學等處上諭等件及國史館司馬等處徐學欽等陞內外監國司公署功加一級陞學士加五級紀錄十七次有差等處監生
加六級紀錄十九次有差等處監生劉繼開等陞內外監國司公署功加一級陞學士加五級紀錄十七次有差等處監生

同治二年癸亥十一月甲子諭議政王軍機

大臣等。都興阿奏。續陳江北情形。並聲明。從前並無咨調援皖各軍一摺。前因富明阿奏。接據都興阿咨稱。賊眾屢由包港小河等處出竄。裏下河防不勝防。請將由揚撥援臨淮兵勇撤回。當諭僧格林沁酌量調遣。茲據都興阿奏。該將軍並無咨調揚軍回防之事。且臨蒙軍情喫緊。輒將兵勇調回自顧。亦不應如此。不知緩急。在都興阿自以臨蒙軍務緊急。不分畛域。故為此奏。而富明阿所稱江北

防務喫緊。擬請調回揚防兵勇。係在苗逆就
殲。皖事漸定之後。亦尚非心存諉卸者。比惟
該將軍既稱並無此項咨文。富明阿何以據
咨入奏之處。著富明阿明白回奏。至江北軍
情。既據都興阿奏逆賊自龍虎埭敗退後。數
日來均無動作。三江營七濠口等處均尚安
靜。沿江水師扼泊甚為嚴密。惟當此南岸軍
務得手之時。誠恐該逆併力北犯。且丹徒一
帶及六圩港等難民北渡甚夥。尤恐涸跡

其中此時揚軍防勦機宜尤當慎之又慎著督飭在防水陸各軍妥籌戰守不可稍有自恃如鎮城情形喫重仍須撥兵協助毋稍疏虞將此由六百里各諭令知之尋富明阿奏前因接准都興阿咨鈔奏臺有南岸敗賊鋌而走險等語是以奏請撤兵回防都興阿咨臺本無請撤揚軍之議報聞又諭熙麟奏甯夏靈州相繼失守雷正綰兵已入甘境接仗獲勝並請飭陝西供支糧餉各摺片甯夏

府城內回民與城外賊匪勾結。內外交訌。於十月二十四日失陷。靈州城亦於次日相繼失守。該回逆等好亂性成。非痛加勦洗。不足以淨根株。此股賊首。係陝西投賊之武進士王錫爵。經官軍擊敗。竄匿靈州之金積堡。勾串疊次偽為投誠之馬化澄。率其黨與兩日之內。頓陷州郡兩城。實堪痛恨。前據恩麟奏馬化澄在署臬司楊柄銓行營投誠。此次又復鼓眾煽亂。連陷二城。可見恩麟前此辦理草率。難保非遷就了事。粉飾入奏。著熙麟速飭毗連甯靈各州縣文武。督率兵勇。鼓勵鄉團。嚴扼要隘。以防該匪紛竄。並飭派出之延綏鎮兵五百名。迅赴花馬池駐紮。嚴扼該匪竄陝之路。張集馨前已調延綏鎮兵一千名。前赴定邊。著卽飭令統帶之遊擊慶連。與花馬池防兵互相聯絡。以壯聲援。並著多隆阿。雷正綰。遵奉前旨。於涇州防兵內酌撥數營。馳赴定邊。協力防剿。毋稍大意。此時甘省逆

氛徧地。雷正綰軍營兵力尚單。所有陶茂林曹克忠兩軍。卽著多隆阿迅催前進。馳往甘省助剿。毋許稍事逗遛。平涼賊匪攻撲涇州。經雷正綰督兵擊退。並解靈臺縣城圍。正可乘此聲威。進克平涼。以次收復固原。其甯靈鹽茶廳等處逆匪。怙惡不悛。均須次第勦洗。不可輕率議撫。致貽後患。甯夏一帶驛站。多有夫馬俱無之處。積壓公文摺報甚多。且有批摺寄諭多件。經熙麟專差弁兵逐站清查。分別齎送蘭州慶陽。自十月十七日以後。兩旬有餘。又未接省城文信。若謂道途梗塞。文報難通。何以熙麟遣往弁兵。又可行抵省城。可見恩麟一味顛預。並未辦理公事。著熙麟卽行嚴飭恩麟。設法疏通文報。以通省垣信息。投賊之武進士王錫爵。是否回人。並著熙麟查奏。將此由六百里諭知多隆阿。熙麟。雷正綰。並傳諭張集馨知之。尋熙麟奏。遵查王錫爵籍隸雲南。實係回民。報聞。○以故圖謝

圖汗車林多爾濟子那遜綽克圖襲爵。○乙丑。諭內閣各省設立團練。原以助守望而禦寇盜。輔兵力之不足。其能協助官兵。保衛桑梓者。固不乏人。乃或有不肖團長。以有寨可踞。藐視官長。甚至擅理詞訟。聚眾抗糧。挾仇械鬪。其尤甚者。竟至謀為不軌。踞城戕官。卽如山東之劉得培。河南之李瞻。安徽之苗沛霖等。先後倡亂。皆由團練而起。雖螳臂當車。終歸翦滅。而國家已重煩兵力。良由辦團之

人良莠不齊。間有一二團長。倚勢跋扈。承辦團練紳士。不能卽時舉發。遂有尾大不掉之勢。國家使民自衛以衛地方。似此奉行不善。流弊滋多。殊非杜漸防微之意。現在賊氛漸就削平。除直隸山東團練已由官為經理。所有河南省團練事宜。著卽照直隸山東兩省統歸官為經理。以一事權。如果地方官吏認真從事。與百姓聯為一氣。則民方恃以保衛。閭閻斷不至有抗拒情事。著張之萬督飭各

守令。實心實力辦理。不可有名無實。至各直省舉行團練。均須慎選賢能之員。悉心妥辦。務使收守望相助之效。而無藐法抗官之弊。以資捍衛而立防閑。方為妥善。將此通諭知之。○又諭僧格林沁奏遵查從前蒙城復行被圍情形一摺。前此苗逆撤退蒙圍。全股下竄之時。安徽巡撫唐訓方以臨淮緊急。將藩司馬新貽所部。由蒙城調回。致蒙城守禦單薄。墮賊奸計。復行被圍。該撫僅派宋慶統帶

千人前往。未將馬新貽調回蒙城。復未能親督兵勇迅速赴援。以致日久重煩兵力。實屬措置乖方。其遽報收復懷遠情形。亦屬未能明晰。唐訓方著交部議處。○人諭僧格林沁奏。訊明署州判婪贓不法。請旨嚴辦等語。署宿州州判候補縣丞吳璵。經僧格林沁派令隨同舒通額等清查民寨。乃該州判並不同行。縱勇在陳家圩搶掠居民衣物。復訊據該署州判供認。在張家樓蔣家樓等處。因按查

擒匪。先後勒罰制錢數百千文不等。民人陳繼曾控告岳發年霸占伊妻一案。輒聽岳發年許給錢文。遽行釋放宿州地方。久被擒匪肆擾。現在甫經肅清。該地方官宜如何加意拊循。力求整頓。乃該署州判竟敢營私。飭法婪索多贓。實出情理之外。若不從嚴懲辦。何以儆貪墨而飭官方。吳璵著卽在軍前正法。以昭炯戒。現在直隸山東安徽河南江南各省。漸次廓清。所有辦理善後地方。最關緊要。

各該督撫務當飭令該地方官。潔己愛民。妥為經理。如查有此等貪贓不法。重為民害之員。卽著奏明照此辦理。如該督撫姑息顛預。不將此等劣員叅辦。一經朝廷訪聞得實。或被控告糾叅。定將該督撫嚴懲不貸。將此通諭知之。○諭議政王軍機大臣等。王明等奏官兵勦辦盜匪獲勝情形。景綸等奏拏獲首夥各匪正法。並特叅防勦不力員弁各摺。據王明等所稱。滾地雷王五竄至吉林屬界半

拉山門。經協領穆錦馳擊獲勝。追至園內砬子溝。先後斃匪多名。及賊目孫四海等數名。所有竄入園場之賊。擊斃殆盡。另股賊匪。聞風星散。景綸所奏逆匪經奉省官兵擊敗。由蕭赫站雙岔子溝竄入園場。其齊秀齊發等十八名。經兵勇先後擒獲。正法各等語。此股逆匪。以王五為盜首。現在該逆分股漏刃。脫逃。亟應乘其亡魂喪膽之餘。合兩省官軍。殲擒首逆。埽清餘孽。豈容任其免脫。景綸等於

賊擾昌圖廳時。報稱派兵防堵。迨賊竄入吉林所屬之長春廳靠山屯。及占路半拉山門等處。該將軍並無一字奏報。卽此次摺內所稱拏獲賊匪齊秀等。亦未聲明兵勇如何接仗。賊由何路竄走。而於奉天兵勇將園場之賊擊斃殆盡。亦罔聞知。該將軍於所轄境內。軍情賊勢偵探。尚未明悉。奏報亦復寥寥。誠不知所司何事。實屬顛預。著王明景綸。迅卽督飭兩省官軍。探明賊蹤。實力會合勦辦。務

將逆首王五等按名弋獲。盡殲醜類。不准一名漏網。並不得以此次一經奏奉。卽為了事。儻該將軍等任令匪蹤四竄。或縱首逆脫逃。必惟玉明、景綸等是問。才實善白凌阿。雖據賊供並未在此股賊內。殊難憑信。仍飭帶兵員弁。查明實在下落。與王五等一併購綫捕拏。毋任竄逸。將此由五百里各諭令知之。○又諭僧格林沁奏擒獲擒首相盤等犯。收復額上正陽等處。皖境漸清。現撥馬隊赴豫進

剿張總愚股匪等各摺片。籌辦均為妥協。覽奏欣慰。苗逆伏誅。其黨瓦解。石弓山擒首相盤。猶敢負隅抵拒。現已破巢擒戮。與著名巨擒葛小牛、鄒喚林、龔耀等。均各擒獲斬梟。永宿一帶。及蒙亳阜陽境內各圩寨。均各歸正。潁州等處。及渦河南岸。亦當次第清釐。苗逆所踞各處。均經官軍先後收撫。會擒匪首。殲除殆盡。皖境漸就肅清。其尚有各圩寨及零星餘匪。應行控捕淨盡。以絕根株之處。仍著

妥為辦理。免留餘孽。其程二老坎。及李大箇子、魏羣兒。赴營乞降。均准效力贖罪。仍應隨時查察。是否真心悔罪。分別辦理。苗金開係苗逆死黨。屢經竄擾豫省。著名兇惡之犯。尤須加意察看。妥籌辦理。毋貽後患。皖北善後事宜。當此地方新復。腥穢甫蠲。瘡痍滿目之際。一切撫綏教養。尤關緊要。全在地方官吏。慎選賢能。收令妥為經理。卽著曾國藩與唐訓方。嚴督所屬。詳切講求。實力辦理。懷遠投誠之張士端。業經給予遊擊虛銜。礙難收回。所有獻出壽州之李萬春。獻出額上之方長華。與張士端事同一律。其應如何酌加獎勵之處。仍著僧格林沁擬定具奏。正陽收復之時。道員蔣凝學。何以有爭奪開礮致傷兵勇之事。竟與李世忠前事相同。此次蔣凝學係與何人爭奪。因何致有爭端。著僧格林沁。曾國藩查明據實奏聞。不准稍涉徇庇迴護。豫省現惟張總愚股匪。鵠張為患。現有張曜督

軍勦辦。僧格林沁復經派撥蘇克金等馬隊前往勦辦。正與本日寄諭該親王之旨。適相符合。具見老成謀國。思慮周詳。深堪嘉許。該親王於皖境肅清後。卽當移軍豫省。中州平定可期。毛昶熙所部勇丁。原屬權宜辦理。以助兵力之不及。此時兵力足敷應用。著毛昶熙卽行散遣。均令歸農。以節糜費。而免滋事。該侍郎卽回京供職。將該省團練事宜。仍歸張之萬督率地方官吏。妥為辦理。張之萬身

任封圻。於軍務團練等事。均屬責無旁貸。尤應及時整飭。以副委任。團練用民自衛。修堡築寨。以資守望。而禦寇賊。詎非良法。乃或奉行不善。往往輒滋弊端。甚有敢行倡亂。如苗沛霖劉得培李瞻等。致煩兵力。本日復經明發申諭。各該督撫諒能善體此意。得人而理。期於有備無患。是為至要。將此由六百里各諭令知之。○又諭。前據慶昫等奏。甯夏漢城內亂。張集馨熙麟奏報甯夏靈州相繼失陷。

甘肅回氛甚熾。亟宜增兵調將。以固秦晉邊防。現在多隆阿在藍屋。為一隅所牽掣。漢南賊勢猖獗。劉蓉尚無入陝消息。而張總愚一股盤踞浙川山內。藍逆由山陽出竄。仍在商南之青山口。距荆關僅八十餘里。陝豫軍務方殷。而甘肅平固未復。甯夏靈州又陷。該回逆東犯秦晉。北竄蒙古。皆可長驅直入。陝省西北定邊一帶。計惟多隆阿所部之兵。就近可以調往扼紮。而多隆阿既須援甘。又須防

陝。非由各處撥兵赴陝。多隆阿亦難分兵兼顧。刻下最要者。惟浙川之張總愚一股。該匪負隅死拒。一日不了。則河南湖北陝西三省。皆不得安枕。楚豫兵力。亦難勻撥赴陝。著張之萬督同張曜及派出各兵。認真進剿。如兵力尚單。卽飛咨僧格林沁等。調撥馬隊助剿。楚省鄖陽防兵。現因商雒浙川一帶。賊蹤未淨。固不可以移動。而麻黃裏棗一帶防兵。與其設防於境內。不如兜剿於鄰封。官文向能

不分畛域。嚴樹森亦豈得偏持成見。存此疆彼界之心。致成不了之局。貽禍生靈。著卽嚴飭在防各軍。赴豫會剿。張之萬久駐許昌。殊無裨益。著懷遵前旨。移營進紮浙川一帶。就近督剿。兼遏賊匪紛竄之路。所有張總愚一股。卽著責成楚豫二省。協力剿除。儻任蔓延竄越。或時日久稽。卽惟官文。嚴樹森。張之萬。是問。苗逆授首以後。餘黨以次伏誅。壽穎各城均已收復。現止剿辦零星股匪。可以無須

大兵屯聚。浙川張總愚一股。經楚豫兩省兵力夾剿。亦可迅速完竣。是皖省張德勝。蔣凝學。成大吉諸軍。及楚豫兩省得力勁軍。均可移緩就急。分撥赴陝。進紮商雒荆關等處。要隘歸多隆阿劉蓉調遣。以便多隆阿添兵助剿。平固漢南。及扼防陝省西北邊界。陝甘兩省軍務。方有起色。此中布置機宜。必須先事籌畫。臨時始有成算在胸。著僧格林沁官文。曾國藩多隆阿等。會商妥籌調度。以期一勞

永逸。屆時何營可以留防。以資扼守。何營可以赴陝。歸多隆阿調遣之處。並著迅速會商妥協。一面調撥。一面奏聞。現在皖北及豫省零匪。卽可由僧格林沁。張之萬。唐訓方。督同陳國瑞。張曜等軍。實力剿除。楚豫交界捻股。卽由曾國藩責令皖北楚軍。會同豫軍。分投辦理。吳棠嚴飭姚廣武等。肅清徐宿一帶。捻圩。均須剋日掃蕩。一律肅清。不得稍有遷就。以致重煩兵力。皖北肅清以後。陳國瑞一軍

應否移紮徐宿。以資彈壓之處。著僧格林沁。吳棠等。屆時酌量具奏。至僧格林沁大軍一俟皖省肅清。卽可移紮豫境。就近督飭將弁相機剿辦。如楚豫將弁各懷觀望。不肯奮勇勦洗。卽著從嚴叅辦。毋稍姑容。李雲麟當懷遵節次嚴諭。回軍商南。勦除藍逆餘匪。不准遷延。劉蓉速紮青石關。與多隆阿聯絡聲勢。力圖克復漢南各城。毋得再有濡遲。目下東南事勢。大有轉機。而西北逆氛尚熾。該大臣

督撫等各有地方帶兵之責。務宜通籌全局。及早圖維。乘此聲威。削平醜類。如有所見。不妨據實奏聞。以收集思廣益之效。將此由六百里各諭令知之。○又諭。多隆阿奏病勢增劇。請假調理一摺。披覽殊深廕繫。著卽賞假一月。俾得離營安心調理。藍屋合園業已月餘。攻擣正當與緊。諸將士必須有所稟承。方不至事機有誤。並著照所擬。卽責令穆圖善暫行接辦。務令一切遵守布置。妥為辦理。遇有緊要機宜。該將軍仍須隨時指示。俾有遵循。多隆阿仍卽趕緊調理。速就痊可。赴營任事。以慰懸廑。本日又據李雲麟奏稱鎮安山陽洵陽等縣交界。回匪滋擾。經該京堂督兵擒獲首匪。餘眾繳械乞降。分別安撫。擇其壯佼數百人。立為龍軍。歸化一營。隨同勦賊等情。著准其將此次出力員弁。附案擇尤酌量保奏。新立之歸化一營。仍應隨時防範。毋稍疏虞。另片所稱現在擬由西鄉進剿。劉蓉欲

改由甯羌進兵。請飭仍照前議。進由青石關。以便居中調度等語。卽著劉蓉查照該京堂咨會情形。妥籌進止。惟李雲麟前將藍二順股匪。委之藍斯明一軍。捲旆而西。此時藍逆竄回商南。賊勢正張。斷非藍斯明一軍所能獨辦。節經寄諭該京堂回軍會剿。以贖前愆。李雲麟如執意西行。以勦辦興漢為詞。是直處心趨避。且獨不思商於一路。藍逆如再鴟張。於該京堂一軍後路。大有妨礙。仍著懷遵前旨。迅速回剿。與藍斯明併力圖功。將商南之匪。悉數殲除。方可專意再圖興漢。劉蓉於陝南勦賊事宜。籌定後。究由何路進兵。速卽奏聞。將此由六百里諭知多隆阿。劉蓉李雲麟。並傳諭張集馨知之。○又諭。吳桂奏。川擒各匪。竄踞秦豫交界。並聞甘省甯夏靈州。繼陷。分飭所屬加意探防。一摺。前因藍張兩股匪徒。各竄秦豫交界之商南浙川地方。及甘回疊陷甯夏靈州。疊經寄諭晉省。實力籌防。

並相機堵剿。茲據英桂奏稱。晉省沿河口岸林立。地廣兵單。現飭副將羅承勳。帶楚勇五百名。扼紮蒲解一帶。以為遊擊之師。何路緊急。卽赴何路策應。以防藍張二逆。並以甘回攻陷甯夏靈州口外各廳。多屬毗連。雖有滿蒙官兵千餘名。及大同鎮兵練沿河設備。仍恐不足扼守。已令總兵慶德就近嚴防。將遼州潞安防兵。飭令歸伍。以備調遣。著卽照所擬。飭令慶德羅承勳嚴密防剿。藍張二逆其勢駸駸。屢欲合併。僅有豫省張曜之軍。堵拄其間。陝省商潼一路。僅藍斯明一軍。甚屬單薄。且恐秦豫兩軍。併力勦辦得手。則賊勢乘閒奔突。晉省沿河毗境。更宜嚴防。英桂尚未離晉。沈桂芬何日可以抵任。務卽飭令沿河地方。並羅承勳等嚴密戒備。不得稍涉疏虞。甘回逆猷突張甯夏靈州。猝被攻陷。此與他賊不同。其種類到處皆有。不可不豫為之防。晉邊口外各廳。多連甘境。卽綏遠歸化二城

及張家口。皆可由蒙古草地直達甘省。而蒙古未必能設偵探。尤恐甘回狡詐。潛行假道。或遣奸回四出誘煽。著英桂沈桂芬速飭口外各廳。密行梭巡。防患未然。德勒克多爾濟阿克敦布等。亦卽廣設偵探。於綏遠歸化二城張家口各處。循環邏察。並須遠探蒙古境地。彼此聯絡。聲息相通。以為備豫。綏遠城察哈爾官兵。並著該將軍都統等勤加訓練。以備不虞。毋稍懈弛。將此由六百里各諭令知之。○又諭。丁曰健奏。出師放洋。由省對渡淡水滬口。現擬添勇籌勦一摺。臺灣匪徒滋事日久。亟應速為勦除。徐宗幹現挑省兵四百名。派參將田如松統帶赴臺。丁曰健亦自省徑渡淡水之滬尾口登岸。馳至艋舺。左宗棠徐宗幹卽飭吳鴻源曾元福曾玉明各軍分路並進。丁曰健卽由淡水大甲而南。會齊諸軍進克彰化斗六。以期漸次肅清。該道現因兵力尚單。擬令軍功范義庭等招募勇丁。前

赴竹塹城聽候調用。著卽慎加挑選。毋令奸細涸跡。致與賊匪句合。丁曰健擬令彰嘉各營。及湯得陞所帶兵勇。由西螺虎尾溪一帶進發。聯絡彰化。令凌定國所率義民。剋期會勦。參將關鎮國率駕紅單礮船。赴梧棲港口。會同同知王楨勇丁。合攻葭投莊等處。疏通鹿港後路。並派兵與通判張世英之師。直搗賊巢。該道卽由牛馬頭直勦竹阮。收復大肚溪。先克彰城。次取斗六。所籌尚合機宜。卽著

照所擬辦理。前據徐宗幹奏稱。林文察已抵蚶江口。配船候渡。現在已否抵臺。著左宗棠。徐宗幹。迅飭該署提督。速行渡臺。督兵會勦。毋稍遲緩。正在寄諭間。據丁曰健續奏。直抵彰化逆巢。連獲大捷。並請將出力官紳兵勇等。擇保各摺片。此次丁曰健由淡水進至大甲。將匪首劉阿妹掩捕正法。派勇馳往內山。分勦犁期店一帶賊巢。牽制內山逆匪。不令出援。葭投而親至梧棲港。派撥勇練。分路進

攻彰化境內賊巢。連日陸續攻破田中央海玻璃水裏港福州厝各賊莊。並將蘆仔底等十餘莊。及無名小莊十餘所。同時平毀。復將葭投尾莊外賊營三座。及八張犁何厝莊賊營七座。焚毀。斷賊糧道。其凌定國一軍。亦先後攻破竹仔腳等大小賊莊二十餘處。並將海峰崙陳啞狗老巢焚毀。生擒逆首林振等十三名。被脅各莊望風歸順。現在鹿港至北斗大路業已疏通。辦理甚為得手。丁曰健熟

悉臺灣情形。且素能與該處紳勇聯絡。此次抵臺後。調集鄉團。分路勦賊。所向有功。該義勇等。隨同出力。亦屬可嘉。著丁曰健。卽激勵各義勇等。乘勢攻拔葭投。以次進取彰化。並飭凌定國等。迅拔斗六。殲擒戴逆。一面催督曾元福等。會合夾擊。毋任延宕。所有此次水陸兩軍出力之員。弁兵勇紳民人等。著丁曰健。暫行存記。俟彰化斗六攻克後。彙案奏請獎勵。將此由五百里諭知左宗棠。徐宗幹。並

傳諭丁曰健知之。○以防勦不力革吉林佐領和常職。摘佐領常喜同知崇連通判松鶴頂翎。○丙寅。諭議政王軍機大臣等。李鴻章奏官軍進規嘉善。攻克張涇。匪逆壘相機。偏勦縣城。並規復常州情形。馮子材等奏南路近日軍情。忠逆帶隊潛入金陵。各摺片。張涇。匪為嘉善東隅要隘。現經官軍攻克。賊膽已寒。著卽督飭劉秉璋等。進逼縣城。並飭程學啟。李朝斌。水陸並進。迅掃賊氛。以孤浙西賊

勢。左宗棠前已進攻餘杭。現在嘉善之師。正當得手。著該督分撥所部將士。會合兜剿。速克堅城。劉銘傳等軍。由焦塾三河口進紮。與李鶴章會攻常州。步步為營。辦理甚為周妥。卽著李鴻章嚴飭劉銘傳。李鶴章等。穩慎籌辦。毋稍大意。馮子材接據曾國荃函稱。忠逆已於本月十一日。帶馬隊數百。潛入金陵。步賊仍紮句容等處。現在金陵業經合圍。著曾國藩飭令曾國荃等。督飭各軍。嚴加備禦。密

速圍攻。斷不可令忠逆乘隙他竄。李鴻章奏。據逆首黃子澄供稱。忠逆欲突入金陵。將洪秀泉之子擁戴出城。竄擾江西。雖未必盡屬可信。然不可不加以嚴防。著沈葆楨督飭江西各軍。豫為防範。扼守要隘。毋令竄入江境。致滋蔓延。蘇城降眾難民。尚有十數萬之多。著李鴻章飭令郭柏蔭等。妥為安插。毋令滋事。戈登近日動靜若何。雖經總理各國事務王大臣。向該國公使開導。仍著李鴻章留心偵察。妥籌駕馭之方。馮子材另片奏。陣城劉巷守卡賊目張九沅棄卡來歸等語。前據都興阿奏。逆首張九沅投誠。為賊所覺。悉力圍攻。張九沅力不能支。帶隊隨同官軍衝出。與馮子材等所奏不符。當經諭令都興阿等查明具奏。仍著馮子材等據實奏聞。將此由六百里各諭令知之。○以漕運總督吳棠捐輸軍餉。永廣安徽盱眙縣學額一名。○予江蘇張涇匪等處陣亡副將王玉林都司包清旭。

把總陳勝明祭葬世職加等。○丁卯以京畿雪澤愆期

上詣

大高殿祈禱行禮。○遣恭親王奕訢詣

時應宮。惇親王奕誼詣

昭顯廟。鍾郡王奕詒詣

宣仁廟。孚郡王奕譞詣

凝和廟拈香。○諭內閣祁寓藻奏弭盜安民必資循吏請分別表彰錄用一摺原任同知

劉大紳於乾隆年間歷任山東新城等縣捕蝗辦賑深得民心教士以朱子小學為本成就甚多原任按察使李文耕由山東守令洊至臬司除奸戢暴盡心教化察吏安民誠意周悉已故大順廣道劉煦歷任直隸守令樸誠廉敏有守有為民情愛戴上年賊匪肆擾三郡士民倚若長城以上三員均循聲卓著遺愛在民著國史館咨行直隸山東各督撫詳摭該故員等生前政績編入循吏列傳以

資觀感所保之直隸任縣知縣張光藻獻縣

知縣陳崇砥知縣王蘭廣山東知縣蔣慶第

山西徐溝縣知縣程豫汾陽縣知縣吳輝祖

著各該督撫給咨送部引見至教習期滿知

縣江南優貢端木埰候選知縣山西舉人秦

東來據祁寓藻奏稱該二員品學兼優著吏

部查明在部投供之端木埰帶領引見並咨

山西巡撫查明在籍之秦東來飭令赴部帶

領引見候旨錄用軍興以來徵兵籌餉不能

不藉資民力非得賢有司拊循化導不足聯

絡眾志消患無形且兵燹之後百姓顛沛流

離蘇疾苦而起瘡痍舍循良守令又將奚屬

耶嗣後各省大吏務宜加意訪查具有政績

官聲遺澤在人者著奏明宣付史館編入循

吏列傳至現任各官內實係清靜不擾惻悃

無華者並著臚列事蹟據實保奏聽候簡用

其伏處之士潛修力行堪膺循吏之選者亦

准一體保薦以期政平訟理吏治蒸蒸日上

有厚望焉○論議政王軍機大臣等恩合奏。辦理招佃墾種牧廠荒地。現因冰雪蒙蓋。未能完竣。一摺。據稱廣甯屬界牧廠。經該副都統督率佐領分段查丈。招佃認墾荒地。二十二萬餘畝。按上中下則。共收押荒銀二萬兩。查出私開地畝。依照上則。共收押荒銀四百兩零。十月間大雪蓋地。不能行繩分段。暫行停止等語。著照所請。所有開墾事宜。俟明歲春融。再行辦理。所收押荒銀兩。統俟查辦完竣。再行奏明。分別劃抵解部。所奏援案緩年起科。及造冊送部各事宜。均照所擬辦理。將此諭令知之。○又諭慶昫等奏甯夏漢城已成叛亂。滿城情形危急。雷正綰奏現在甯靈相繼失守。請飭山陝兩省。速派勁兵截勦。各一摺。前據慶昫奏甯夏回眾。近尚安靜。惟須撤去團練。該回民始繳器械。並將辦理不善之道員侯雲登撤任。應足服該回眾之心。何以復糾眾入城。竟將侯雲登殺害。是該回匪

居心狡猾。陽言就撫。陰謀倡亂。已顯而易見。慶昫等尚欲以理義與之剖論。何毫無主見。一至於此。該逆膽敢圍撲滿城。登梯而入。傷我佐領等官。覽奏實深憤恨。慶昫等不能先事豫防。為該回匪所愚弄。實難辭咎。但事已至此。惟有亟圖補救。勉贖前愆。著慶昫等激勵滿城弁兵。嚴密守禦。所有填寫銅頂功牌。分別賞給之處。即著照所擬辦理。滿城旗戶餉需不繼。每月餓斃者。至二百餘名之多。殊堪憫惻。前此部撥甘餉。疊經催令各該督撫迅解。諒已撥解在途。著英桂等添派兵弁。由草地星速護解。如緩不濟急。照麟。思麟。均有地方之責。豈可坐視不顧。著該督等設法接濟。毋誤要需。平固未復。甯靈又失。照麟等所司何事。亟應竭力籌辦。剋日救援。毋得坐失事機。致干重咎。雷正綰現派馬天祥等扼紮環縣。以固慶陽。著侯涇城稍鬆。即督率各營相機進取。陶茂林。汧隴之師。勒撫兼施。計日

即可竣事。著多隆阿飭令該提督馳赴甘境。會同雷正綰合力勦辦。甯夏境地與山陝毗連。亟宜加意防範。晉省現有楚勇千名。著英桂、沈桂芬儘數調赴定邊。協同張集馨派出防兵扼紮防勦。惟晉省河防亦關緊要。著閻敬銘迅即選派得力兵勇千名。星馳赴晉。交英桂、沈桂芬調遣以補其缺。所調山西楚勇著英桂、沈桂芬迅飭先行起程。不得專待山東各勇到後始行前進。並著劉長佑挑派勁

旅二千名。交訥欽統帶。星速馳由朔平綏遠歸化一帶進趨甯夏。以勦為防。德勒克多爾濟等所部兵丁節經諭令該將軍等認真操演。該兵弁技藝自必可觀。即著德勒克多爾濟、塔清阿等懍遵前旨。整頓士馬。嚴密布置。為訥欽一軍後路策應。如敢有名無實。致該匪乘虛闖入。或策應不力。惟該將軍等是問。曹克忠埽蕩麟遊回匪。曾否肅清。定邊所紮秦晉各軍。不可無大員統領。曹克忠帶兵素

稱得力。且相距尚屬不遠。其能否酌帶所部調赴定邊。將山西楚勇一千並歸統帶進攻甯夏之處。著多隆阿迅速斟酌調派。如曹克忠一時未能調往。應否改派何員前往。並著多隆阿迅籌辦理。刻下甯夏滿城萬分危急。所調援軍由定邊朔平綏遠歸化分道並進。不可株守一隅。務當以勦為防。與多隆阿派出援甘各軍前後夾擊。方為妥善。以上所調直隸山西各軍及曹克忠所部餉需均著由

直隸山西兩省源源運解接濟。阿拉善等旗地界毗連甯靈等城。難保回逆不出邊滋擾。著德勒克多爾濟迅速知照嚴密防範。雷正綰另片奏行營軍火無多。請飭陝省撥解等語。所有雷正綰軍營應用鉛丸火藥仍著張集馨照舊接濟。毋令缺乏。將此由六百里加緊諭知多隆阿、慶昫、德勒克多爾濟、英桂、劉長佑、熙麟、雷正綰、閻敬銘、沈桂芬、常陞、塔清阿。並傳諭恩麟、張集馨知之。○又諭明誼等

奏接奉寄諭。遵旨覈辦一摺。據稱接奉前旨。向俄人告知。現已由總理各國事務衙門。准照該國使臣議單辦理。並飛咨常清派員告知該帶兵官。靜候該使臣來塔會議。並請該將軍將查辦各情。及究應由何處為界。切實咨覆。限該委員於開年正月內。趕到塔城。以便妥立一切章程。備與俄使前來定議等語。俄國分界事宜。前經總理各國事務衙門定議。准照該國使臣所開議單辦理。原以常清

曾有兵單餉缺戰守兩難之奏。即明誼等前此片奏。亦有審度時勢。於利害兩形之下。酌其重輕。勉圖收束等語。是以因勢利導。就此轉圜。於守約之中。寓弭兵之計。惟尚須俟該國使臣來塔城會議。方能定准。其究應由何處為界。止可按照條約辦理。如該使肆意侵佔。該將軍等仍當據理與之辯論。未可盡讓之。總理各國事務衙門。遂謂可將就了事也。伊犁前此有俄兵闖卡撲營。雖被我兵擊退。

難保不再來窺伺。現在已未撤隊。辦理是何情形。久未據常清奏報。聞靈州一路驛站梗阻。頗有公文摺報在途遺失。現在甯夏漢城及靈州相繼不守。此後西路摺報。著常清等派員偵探。改道速遞。以免貽誤。並著飛催該委員等。於來年正月趕到塔城。妥立章程。與俄使定議。近日辦理情形。仍著詳悉具奏。明緒等即備文催令俄國使臣。於來春到塔勘分地界。雜哈勞雖已帶隊旋回。轉瞬春融。難保不復出滋擾。該將軍等仍當嚴飭塔城在事各員。並分咨烏科二城各飭所屬。嚴為戒備。令其靜候分界。毋滋釁端。綽坦准其承襲汗爵。已催令該衙門將敕書趕緊頒發。明誼等務當宣布朝廷威德。俾知感畏。以堅其內附之心。使之樂為我用。將此由五百里各諭令知之。○補鑄鑲黃旗漢軍佐領圖記。從都統春佑請也。○補鑄江西龍池司巡檢印信。從巡撫沈葆楨請也。○予江蘇崑山等處殉

難文生蔡延祥等男婦二十六名口分別旌卹如例。○戊辰諭內閣。前因李鴻章奏請飭部揀發州縣二十員。前赴江蘇差委。業經批示准行。因思內外臣工所保各員。內有貴州舉人鄭珍。莫友芝。前奉天知縣安徽進士張保衡。浙江附生朱榮。前廣西候補知縣陳勸。前浙江桐廬縣教諭王引孫。湖南候選訓導向師棟。候選知縣鄧瑤。候選同知朱宗程。江西廣豐縣進士鄭維駒。金谿縣舉人徐仗祖。

廬陵縣廩生王其淦。江蘇候補縣丞趙烈文。卽用知縣常甯縣教諭成果。道十四員。均著發往江蘇。以知縣用。並著吏部查明各該員原籍地方。行令各該督撫飭令迅卽前赴江蘇差委。仍著該部照該撫所請於科甲出身州縣內。揀發十員前往。○又諭正白旗滿洲秦世爵病故無嗣。應否仍准承襲。開具家譜請旨一摺。據稱該旗所管三等子爵鄂素病故無嗣。經該旗咨查吏部。當據覆稱。應以那

彥成長子容安之子孫承襲。惟容安前係獲咎之員。鄂素所出子爵。應否停襲。抑或照吏部覆文。將容安子孫帶領引見等語。鄂素之曾祖那彥成。前於嘉慶年間。因親督兵勇。攻復滑縣城池。勲勞懋著。奉

旨賞給三等子爵。准予世襲。現在鄂素病故。襲次未完。所有此項三等子爵。著仍准其承襲。卽由該旗將容安之子孫揀選帶領引見。○又諭兵部奏。廢員捐輸抵作臺費補繳清款。可否釋回。請旨遵行一摺。已革兵部尚書穆蔭所捐銀兩。著准其抵作臺費。俟扣滿三年後。卽行釋回。○又諭御史呂序程奏。請飭查逆產及荒廢地畝。安置難民。降眾一摺。軍興以來。各直省被賊地方。小民顛沛流離。轉徙失業。疊據江蘇安徽各督撫奏。到新復州縣。哀鴻遍野。滿目瘡痍。小民以兵燹餘生。復困於飢寒。而莫之或恤。為民司牧。良用惻然。現在蘇州省城克復。高瀍溧水無錫金匱。疊下

堅城皖北苗逆伏誅下蔡壽州潁上各城次第收撫皖南旌德太平建平甯國亦均陸續肅清方將與吾民同登衽席惟地方新復既多難民亦眾顛連無告倍可哀矜卽各營遣散降眾均皆朝廷赤子自拔來歸亦宜早為之所以免散亡因思各省州縣被賊盤踞多年其土著之賊及勾結入夥者所有逆產自宜查明入官至附近賊匪村莊淪為賊產者亦應勘明給還原主以恤流氓著各該督撫於新復各處督飭各該州縣確切查明實在逆產入官其荒廢地畝有原業主者卽行給領尚未查得業主者卽著暫行造冊登記將此兩項地畝仿照山東招墾章程分別酌給難民降眾量為耕種以資衣食俟業主續歸再行給還所有一切事宜並著各該督撫妥議章程慎選廉明守令妥為經理不准假手吏胥致滋紛擾抑勒諸弊至凡屬軍務省分如有收復城池圩寨者均著隨時一律辦理

以副朝廷矜念窮黎至意○又諭愛仁奏訊明勝保案内汪曜奎寶型二員被叅各款定擬一摺此案汪曜奎雖訊無攬捐舞弊及買送勝保民女等情惟於勝保家人買取民女係由該員之姪說合謂為毫不知情殊難憑信又於淮甯縣辦理勸捐嘖有煩言且在勝保軍營疊次辦捐兼管營務種種黃緣包攬已可概見實屬卑鄙不堪寶型雖無索取馬承恩銀兩情事惟於施鵬兩次赴營交米均由該員經手又收受食物其交結包庇情弊顯然且據愛仁訪聞該員嗜好太多聲名狼藉實屬不堪造就愛仁僅請將該二員罷斥殊屬失之輕縱汪曜奎寶型均著卽行革職永不敘用並從重發往新疆充當苦差由愛仁飭交該地方官迅速起解以示懲儆○諭議政王軍機大臣等有人奏騎馬賊匪劫案疊出聞南黃村賊目大半與南路廳捕頭勾串安定門外奶子房地方有搶劫銀兩車廐

槍斃人命之案。請飭查拏等語。近畿一帶。騎馬賊肆行搶劫。疊次諭令直隸總督等協力緝拏。不啻三令五申。乃盜風仍未稍戢。搶劫重案層見疊出。捕務殊屬廢弛。至官役窩藏匪黨。與馬賊通同一氣。尤屬大干法紀。著步軍統領衙門。順天府五城御史。直隸總督。嚴密訪查。認真按捕。務將各該地方馬賊悉數兜拏。盡法懲治。並將句串窩匪捕頭一併查拏。懲辦毋任一名漏網。以靖奸宄而安行旅。

原片著鈔給閱看。將此各諭令知之。○又諭。愛仁奏。訊明汪曜奎實型參款。請予罷斥。並請將張維義交熙麟等查辦各摺片。汪曜奎被參攬捐分肥。買送民女。及實型被參收受施鵬餽送。並索取馬承恩銀兩各款。雖經訊無實據。惟該二員聲名狼籍。久經著聞。斷非無因。僅予罷斥。不足蔽辜。本日已明降諭旨。將該二員發往新疆充當苦差矣。張維義現在熙麟軍營帶兵。既據愛仁查訊閤丕敏等

與張維義並無夥輾之處。著愛仁即行交熙麟。由該督就近查辦。其閤丕敏。李祝齡。施鵬。盧殿標四員。現已由陝解晉。經愛仁研訊。已有端倪。著即確切根究。務得實情。毋稍輕縱。愛仁俟閤丕敏等案審結後。即行來京。將此諭令知之。○又諭。愛仁奏。訊明汪曜奎被參各款一摺。據汪曜奎供稱。並無為勝保買民女為妾之事。惟十一年十月間。有勝保家人吳貴赴上海。戴五品翎頂。向該參員族姪汪祿兆等聲稱。係大營委員候補直隸州知州。並攜勝保信函。有吳貴買辦一切。託代招呼之語。及吳貴為勝保買民女皮氏。係汪祿兆等。在場說合等情。本日已明降諭旨。將汪曜奎革職。發往新疆充當苦差。吳貴以家人假冒職官。不法已極。且係勝保案内要犯。亟應嚴拏。訊究。據汪曜奎供該犯籍隸直隸。著順天府五城御史。直隸總督。即將吳貴迅速嚴密訪拏。務獲解交刑部審辦。將此各諭令知

之○以記名提督楊明海為山東兗州鎮總兵官○予軍營病故山東兗州鎮總兵官扎隆武祭葬卹廕○予山東益都等處陣亡殉難紳民婦女一萬一千九百八十三名口分別旌卹如例○己巳賑吉林打牲烏拉被災旗丁並緩額徵穀石○庚午諭內閣憚世臨奏分別舉劾各員一摺除摺內保薦各員另行存記候旨錄用外湖南候補知縣趙德瑩才具平庸著以府經歷縣丞銓選城步縣知

縣黃枋性耽安逸不洽輿情試用知縣吳本芝軟弱多病難期振作均著勒令休致升用知縣劉桂馨才識平庸聲名甚劣候補知縣周繼芬文理荒謬不堪造就候補府經歷梁作霖卑鄙平庸岳州府經歷鄭蘭芳辦事糊塗桂東縣典史曹繼升才具庸劣不知檢束邵陽縣典史蔡鼐干預詞訟劣蹟甚多安鄉縣典史謝典徽任性妄為永興縣典史向元和聲名狼藉並江縣典史徐鴻供職不勤濫

干民事均著卽行革職至所稱湖南候補直隸州知州陳長春輕浮巧滑聲名平常新化縣知縣余國琛庸懦無能嘉禾縣知縣胥春霖性情浮躁該撫均尚請以州同府經歷縣丞等官改選未免失之姑容朝廷於循良之吏往往破格擢用若此等劣員仍任其濫膺名器何以嚴甄劾而肅官方以上三員均著一併革職○諭議政王軍機大臣等李鴻章奏分攻常州獲勝情形一摺常州逆匪堅守待援經李鶴章等分路進攻連克賊營二十餘座收降二萬餘人丹陽宜興來援各路亦經紮斷該逆諒難久踞卽著飭令李鶴章等迅速圍攻力拔堅城毋令護逆乘間免脫劉銘傳督隊受傷殊堪廕念該撫卽傳諭該員加意調治仍一面裹創督戰以竟全功降眾二萬餘人必須妥為安置投誠賊酋邵小雙現經派令駐守奔牛鎮石城一帶堵擊丹陽援賊是否可靠仍當隨時察看毋稍大意另

片奏收復平湖縣城並乍浦嘉善賊酋亦具稟投誠等語著卽飭令劉秉璋等相機妥辦如措置就緒卽行詳細馳奏將此由六百里各諭令知之○又諭唐訓方奏親歷下蔡壽正等處查看派兵駐守並統籌善後一摺張之萬奏苗捻餘黨羣趨汝南與土匪合股毛昶熙移軍督剿張曜一軍擊敗板橋川賊匪現飛飭葛承霖等助剿各摺片毛昶熙前有旨令其回京供職現在陳大溥等股句合苗

黨有馬步五千餘人由岳城一帶南竄談家圍並攻陷正陽之袁寨等處信陽境內龍井洋河等寨均有賊蹤勢甚猖獗毛昶熙以汝事日亟擬拔隊南征著將宋防諸事妥為經畫卽日親督邵春仁勇隊進紮陳州一面親赴汝甯前敵督飭諸軍迅圖掃蕩張之萬派出之王玉佩等營並歸毛昶熙調遣該侍郎卽將此股賊匪迅速剿除再行回京供職板橋川之匪驟撲臥龍岡營壘仍圖西竄與藍

逆句合葛承霖蔣希夷各隊均已赴宛僧格林沁亦撥蘇克金等馬隊助剿張之萬當懷遵前旨移營前進督飭張曜等力圖勦辦務將張總愚一股以精銳步隊逼之出險俾蘇克金馬隊利於馳擊方能悉數撲滅僧格林沁已將皖境各捻及苗逆餘黨辦有頭緒未盡事宜可移交唐訓方妥籌辦理該大臣酌度情形如可移營赴豫卽擇適中之地駐紮以資策應或添撥兵勇派得力將弁帶赴板

橋川會剿責令剋日蒞事以免再有句結唐訓方所奏派兵駐守以期永遠肅清各情均中竅要至皖北地方遼闊人情强悍寇盜易滋如有應行添設重鎮及改設州縣藉資控扼之處著與僧格林沁面商並咨會曾國藩妥籌具奏將來僧格林沁帶兵赴豫唐訓方有地方之責無可推諉著懷遵疊次寄諭悉心妥辦毋令一夫失所以副朝廷委任之意將此由六百里各諭令知之○湖南巡撫譚

世臨奏遵籌綠營兵制。除鎮筵鎮四營。綏靖鎮兩營。乾州保靖沅州靖州永綏永順古文坪鎮溪河溪等協營。均控制苗疆。界連黔蜀。應悉仍其舊。以重邊防。此外撫標兩營。永州鎮三營。長沙長安嶺東臨武桂陽宜章綏甯等協營。暨澧州永定九谿寶慶武岡各營。均請停額二成。提標五營。暨常德岳州辰州衡州等協營。均請停額四成。所停之額。俟軍務告竣。裁撤之勇丁有願入營者。照額挑補。下

部議從之。○調福州副都統色爾固善為甯古塔副都統。○以記名總兵官余福象為陝西漢中鎮總兵官。○予故前任陝甘總督易崇榮葬如例。○予河南汝甯陣亡把總何明亮祭葬世職。○蠲緩直隸豐潤武清薊東安完。東鹿。天津。青。靜海。滄南。皮。鹽山。大名。懷來。玉田。衡水。深。甯河。安肅。鉅鹿。甯晉。二十一州縣被災地方額賦並旗租倉穀有差。○辛未諭內閣寶璽奏。太監出言無狀。請旨嚴懲一

摺。尚書寶璽於本月二十七日。前赴壽莊和碩公主府內照料。該府首領太監張玉蒼。輒因上駟院羸馬不佳。意圖挑換。向寶璽出言無狀。並有傳令該大臣親身排車之語。倚勢作威。陵辱朝廷大臣。實屬膽大妄為。殊出情理之外。若不嚴行懲辦。將來各處太監紛紛效尤。流弊何所底止。此風斷不可長。張玉蒼著即革去首領太監。交慎刑司嚴行審訊。按律定擬具奏。尋奏。張玉蒼應照例杖一百。徒

三年。仍發往吳甸鋤草。一年期滿釋回。以示懲儆。從之。○諭議政王軍機大臣等。景綸等奏。擒獲巨盜。審明正法。一摺。盜匪滾地雷王五。自咸豐十年間。即在朝陽。與白凌阿。才寶善等。恃眾搶劫。到處焚掠。本年由昌圖廳竄至靠山屯。分股逃竄。以圖牽掣官兵。經通判松鶴督帶練役。追至獐壯溝。將該犯拏獲。地方可冀漸就肅清。惟白凌阿。才寶善尚在逃未獲。且此次首盜王五餘黨尚夥。若不趕緊

按捕淨盡。終恐餘孽復萌。仍著景綸等督飭在事文武員弁。務將白凌阿才寶善迅速拏獲。並按捕王五夥黨餘匪。以期淨絕根株。將此由五百里諭令知之。○又諭。王憲奏邊陲地方緊要。請將隴西縣丞仍改為漳縣知縣。一摺。甘肅鞏昌府屬之漳縣。於道光九年改為隴西鄉。設立縣丞。歸併隴西縣管轄。原為因時制宜起見。茲據王憲奏稱漳邑原設縣治。距隴西七十里。西南接洮州。岷州東南接

岷州甯遠。延袤三百餘里。毗連皆係邊要。地方遼闊。自裁併隴西。改設縣丞。後書役刁詐盜賊出沒。土棍強橫。有非縣丞所能治理。且該處舊有鹽井。課項攸關。甘省回逆。倣擾河河狄道等處。均與漳邑舊治相去非遠。尤非縣丞所能籌辦。各等語。隴西界連邊徼。復近回氛。練勇籌防。在在均關緊要。該藩司籍隸漳縣。於該處地勢情形。所籌尚為明晰。現值滿目兵燹。地方彫敝之際。所有改官定制。苟

於時事有裨。不妨量為變通。著熙麟於到省後。詳察情形。妥議章程具奏。固不必徒事紛更。亦無庸拘泥成例。總期斟酌盡善。經久可行。方為妥協。原摺著鈔給閱看。將此諭令知之。○又諭。滿慶等奏。縷陳藏務情形。請准糧員寬限赴京。又藏中因防範奸細。修砌牆垣。廓爾喀願助唐古特防勦。逆夷匪搶去報匣佛匣。現在飭緝。請留丁憂之拉里糧員差委。請催查辦藏務大臣。遞解呼徵呼圖克圖

來藏各摺片。並鈔錄斷牌。照譯藏格巴都爾夷信。及檄文底稿呈覽。覽奏不勝詫異。李玉圖一員。疊經有旨。令其迅速來京。與呼徵質對。而滿慶等乃欲將呼徵解藏質對。請將李玉圖留藏備質。且以該糧員經手那匪帳目。接濟兵食。藉詞挾制。李玉圖若不來京。要案何能訊出。著懍遵疊次寄諭。仍飭李玉圖迅速來京。毋得再涉遷延。致干重咎。藏中因防範奸細。修砌牆垣。現將官兵移紮正街。向來

駐藏大臣衙署。建蓋城外。當日必有深意。滿慶等何以欲移建城內。卽有不法番民來藏。句結。何至不能嚴拏懲辦。豈移居城內。遂可為藏身之固耶。此等辦法。殊不可解。廓爾喀願助唐古特防勦。該大臣等將其大小礮位鉛藥借用。已令四川總督酌撥價銀。惟滿慶等摺內。既有廓爾喀素性狡詐之語。此次因其致信來藏。輒行借用礮位等件。但恐將來需索無厭。亦須妥為防範。以弭嫌隙。夷

匪將報匪佛匪搶去。著卽督飭江有福迅速帶兵嚴拏。已諭令駱秉章派兵清理驛路。及時整頓。以免文報阻滯。丁憂之拉里糧員陳廷傑著准其暫留幫辦防堵事務。俟瞻對事竣。卽飭回籍守制。福濟等赴藏遲延。已經嚴旨申飭。並催令剋日前進。滿慶恩慶。惟當就現在情形。妥為辦理。並派兵弁疏通道路。俾福濟等早日抵藏。以息爭端。將此由五百里諭令知之。○又諭。前因滿慶恩慶奏。滙陳呼

徵捏具冤詞。聲明原案始末等情。當經諭令福濟景紋。趕緊赴藏。不准再事耽延。迄今月餘。尚未據福濟等奏報起程。實屬不知緩急。本日復據滿慶等縷陳近日臺藏情形。並達賴喇嘛以商屬僧眾。日盼欽差來藏查辦事件。咨請代奏。請飭催福濟等兼程前來。察看臺站及藏中情形。如所奏事情一有虛偽。從重治罪等語。福濟等一日不到藏地。藏眾卽一日不安。滿慶等轉得與汪曲結布互相勾

結。朋比為奸。福濟等久已奉命赴藏。尚待滿慶等及達賴喇嘛再三奏請。催令前來。已屬不成事體。著福濟景紋。迅卽遵照前旨。星馳前進。如再自耽安逸。託故不前。則是昧良喪心。萬難寬宥。豈謂朝廷不能執法從事耶。福濟等其懍之。呼徵前已病故。滿慶等佯為不知。請押解來藏質對。殊屬狡詐。已嚴飭滿慶等。仍令李玉圖迅速赴京。丁憂之拉里糧員陳廷傑。已准滿慶等暫留差委。仍著駱秉章

選派委員接管糧務。及乍察防堵事宜。俾李
玉圖得以交卸起程。不至藉詞狡展。並著駱
秉章商同崇實。另派明幹員弁。隨同福濟等
赴藏。審辦一切案件。較為有益。駐藏大臣衙
署。向在城外。茲據滿慶等奏。因藏中防範奸
細。修砌牆垣。遂將官兵移紮正街。並該大臣
等亦移居商上官房。殊出情理之外。是否滿
慶等被汪曲結布挾持。一切不能自主。崇實。
駱秉章。必有所聞。卽著據實詳奏。並著福濟。

景紋。於到藏後。將衙署因何遷徙之處。一併
查明具奏。瞻對夷匪。擾及站路。關繫甚大。不
可不調兵勦辦。據滿慶等奏。稱西俄洛塘兵
李宗勝接遞報匣。佛匣行至麻格宗三道橋
地方。被崇喜土司之弟任爭格納槍去。有無
別情。是否屬實。著駱秉章查明辦理。並著恪
遵前旨。挑派得力兵勇。前往瞻對。將滋擾逆
夷。痛加勦洗。務令驛路疏通。附近土司。各安
生業。以副朝廷撫綏遠方至意。至廓爾喀願

助唐古特防勦瞻逆一節。業經滿慶等婉詞
拒絕。惟現已借用該國大小礮位鉛藥。不可
不酌給價銀。俾免異日藉口。著駱秉章咨行
滿慶等。將廓爾喀所開礮位鉛藥價值清單
照數撥給銀兩。以敦和好。而示大方。廓爾喀
素性狡詐。福濟等務當明示羈縻。密加防範。
毋得稍涉大意。崇實本由駐藏大臣改任將
軍。藏事敗壞至此。該將軍亟須商同駱秉章。
福濟。景紋。設法辦理。如福濟。景紋。辦理不能

妥協。惟有仍令崇實前往。斷不准該將軍卸
責也。原摺片六件。並斷牌信玉檄諭共四件。
均著鈔給崇實等閱看。將此由五百里各諭
令知之。○以吉林拏獲盜首。開復知府銜通
判松鶴摘頂處分。並賞花翎。○壬申。諭議政
王軍機大臣等。正白旗滿洲奏。副參領恆矜
呈訴苗練仇殺案內。副將被戕冤抑一摺。據
稱咸豐十年間。逆練苗沛霖。因副將徐立壯
不肯從逆。將其家屬誘執。全行殺害。徐立壯

因與苗逆相尋仇殺嗣壽州團長孫家泰。因苗逆圖攻州城。斬其黨與七人。苗逆挾恨。圍偃壽州。勢甚危迫。當事者竟將徐立壯正法。孫家泰監禁。冀安反側。該副將全家被害。一身正法。雖云釁起私仇。實由不肯從逆所致。請飭查辦。以彰忠義等語。苗沛霖已正刑誅。其從前與苗逆為仇。如該副參領所呈徐立壯。孫家泰等。不甘從逆。卽屬義民。乃竟駢首就戮。並恐有地方官冀安苗逆反側。故置之死地者。亟宜確切查明。俾死者不至含冤於地下。徐立壯等被殺。有無冤抑。其時該地方官等。辦理有無謬誤。著僧格林沁。曾國藩。唐訓方。查明據實奏聞。不准因已往之事。稍涉遷就。此外壽州等處。官紳團眾。與苗練為難。被害冤抑者。尚不乏人。如黃鳴鐸。蒙時中等案。詳細情形。及啟釁根由。並黃鳴鐸現在下落。均著一併查明具奏。將此各諭令知之。○又諭都興阿。奏嚴防北岸。並稽查北渡情形。

一摺。蘇城賊目邵雲官等。既經伏誅。所有散遣降眾二十餘萬人。數過多。前經李鴻章奏明。分別給貲。散遣回籍。惟是否由江南岸陸路行走。抑有兩湖。江安等處之人。由江面水路行走。及渡江北歸者。著李鴻章查明轉飭。滬軍及淮揚水師。將渡江降眾。分起撥船上送。如係江安及儀揚附近之人。均由儀徵登岸。以便稽察遣散。其兩湖安徽等處之人。卽由淮揚水師查明。撥船順江上送。以免驚擾。裏下河完善腹地。毋稍疏忽。現在南岸各州縣大半克復。該降眾有籍隸南岸各州縣。及該處難民人等。如有地方可以安插。卽可無須分飭渡江。所有前留濟渡難民之六圩港口。卽由都興阿。富明阿。暫時封禁。以防奸匪。涸跡。此後如須有仍前設渡之處。應由李鴻章隨時察看情形。與都興阿。富明阿。會商奏明辦理。此時南岸軍務得手。北岸防堵尤宜格外加嚴。著都興阿等。將儀徵渡口。妥為防

範其下游泰興陸路一帶。卽著飭令派出之副將劉成元督兵駐守。認真堵禦。並飭侍衛訥依楞阿於沿江一帶嚴密探防。仍督令吳全美等水師將沿江各口岸節節布置。不准以空言敷衍了事。將此由五百里各諭令知之。○又諭閻敬銘奏遵派赴晉防河楚勇。擬請改赴陝省。以資得力。及山東省暫宜留勇一面練兵。並請多募北方將士。以儲將材各摺片。前因甯夏靈州被陷。雷正綰請飭山陝

派兵截勦。當以晉省現有楚勇千名。諭令英桂。沈桂芬儘數調赴定邊扼勦。而晉省防河亦關緊要。諭令閻敬銘由東派兵勇千名赴晉。以補其缺。茲據閻敬銘奏稱查有駐紮單縣勇丁二營。共一千名。尚屬精壯。遊擊劉漢秀雷顯揚管帶亦稱得力。惟思陝甘回逆勢趨西北。與其派兵赴晉。在蒲州一帶駐守河干。不如徑赴陝省。專力進勦。厚陝之兵力。卽以固晉之邊防。且此軍由單赴蒲。與由單赴

陝道里不甚相懸。又本多隆阿舊部由陝來東。與雷正綰陶茂林曹克忠等同隸一軍。心力齊一。調遣更必得力。應令改行赴陝等語。軍行以徑捷而易為功。兵將必相習乃得其力。閻敬銘所撥劉漢秀等一軍。自應改為徑赴陝省助勦。以資便利。著卽飛飭劉漢秀等。卽由單縣取道汴梁。徑入潼關。星速進發。並著多隆阿飛檄迎提。到陝後由該將軍酌量調度。仍遵前旨。遴選得力之將管帶。派赴定

邊扼紮。以勦為防。與雷正綰陶茂林等軍兩面夾擊。規復甯靈等城。晉省防河楚勇如未起程。卽仍駐蒲防。毋庸調往。或已起程。而兵力不敷。卽准其於直隸所調之訥欽所帶兵勇二千名內。於過晉時酌留一千。以補河防。著英桂。沈桂芬遵照酌量辦理。至閻敬銘片奏東省現在不能不暫留勇隊。以資鎮壓。並為一面練兵之策。尚屬因時制宜。著照所議辦理。其所陳兵之強弱。兇乎將領。自古名將

本多北人。今欲漸強北方之兵。必先廣儲北方之將。等情。從來兵隨將轉。一定之理。近年南省楚軍雄勁。良由曾國藩。胡林翼等。倡率鄉里。教練成才。俾得轉相汲引。故能所向有功。而北省風氣未開。多隆阿曾與胡林翼等。摩厲勇略。獨著其所部將領。如曹克忠。石清吉等。亦皆北人。近日皆能殺敵致果。現當北省講求武備之際。卽著該將軍隨時留意。多募北方將士。教習戰陣隊伍。步伐攻守。俾之

閱歷深透。廣儲將才。擇其樸誠忠義有勇知方者。列名保舉。用備北省各路提鎮參遊大小各職之選。所到責成。整飭營伍。簡閱訓練。庶幾北路各軍。皆有強將而無弱兵。用符強幹弱枝之意。諒多隆阿久在兵間。必能仰體此意。以謀久遠也。閻敬銘身任封圻。東省切近畿疆。尤為要地。既能言之井井。亦必克見諸施行。沈桂芬由卿貳外。權節鉞山西地方。表裏山河。民風樸厚。該署撫蒞任後。於整軍

經武。亦當時時在念。用固屏藩。是所殷望。將此由六百里各諭令知之。○又諭德勒克多爾濟等。奏籌備綏歸兩城守禦。及邊防河防布置情形一摺。所奏甯夏府西路要區。鄂爾多斯七旗遊牧附近邊界。綿亙千餘里。現有烏蘭察布。伊克昭兩盟官兵分駐沿邊沿河扼堵。其烏喇特旗遊牧附近黃河之應防處。所現有烏喇特西公旗官兵駐防。均經該將軍等檄令該帶兵貝子扎那格爾等。相度形勢。偵探賊蹤。聯絡堵截。並令伊克昭烏蘭察布盟長。各飭所屬扎薩克。將官兵器械嚴加整飭。以備調發。仍飭托克托等廳地方文武。督率鄉團巡防協助。該將軍等現將綏遠滿營官兵。時加訓練。豫備應援。籌布尚屬妥協。但須照所奏實力辦理。不准徒託空言。有名無實。致滋貽誤。前諭英桂。沈桂芬將晉省現有楚勇千名。調赴定邊防剿。並令劉長佑於直省挑派勁旅二千。交訥欽管帶。由朔平綏

遠歸化一帶進趨甯夏以勦為防當飭德勒克多爾濟等整頓士馬以為訥欽一軍後路策應訥欽之軍行經綏歸一帶即當星速前行該將軍等不但不得稍有挽留並須懍遵前旨整飭官兵以為後應如有稍涉疏懈不自振作專恃訥欽一軍防剿以致或有策應不能得力之處必惟德勒克多爾濟等是問仍著謹遵疊次諭旨與英桂沈桂芬一體廣設偵探梭密巡防其烏蘭察布伊克昭兩盟官兵駐紮沿邊沿河地方究竟是否得力前據熙麟奏稱阿拉善旗蒙兵有一軍數百人而槍械並無者伊克昭等盟官兵亦屬未經征戰其軍械是否整齊士馬有無疲弱並著查明確實具奏至德興阿片奏西安旗營凍餒情形時屆嚴冬禦寒無具自係實情即著英桂沈桂芬於晉省無論何款迅速撥借銀二萬兩即日委解赴陝以蘇軍困晉省與奏中地切輔車於該旗營苦况諒亦深悉務即

趕緊籌撥毋稍諉卸將此由五百里各諭令知之

大清穆宗繼天開運受中居正保大定功聖智誠孝信敏恭寬毅皇帝實錄卷之八十六

大清穆宗繼天開運受中居正保大定功聖智
誠孝信敏恭寬毅皇帝實錄卷之八十七

教修

同治二年癸亥十二月癸酉朔

上詣綏履殿問

慈安皇太后安平安室問

慈禧皇太后安至壬寅皆如之○諭內閣載肅

奏交審案件請添派大員會審一摺盛京刑

部司員縱放盜犯戴維邦一案閱時甚久且

有賄縱重情著添派寶善會同載肅嚴飭所

屬緝獲要犯趕緊審訊完結毋再宕延○又

諭官文奏烏拉壯丁征勦出力援案懇請歸

入吉林旗檔一摺前因楚軍征勒喫緊當派

烏拉打牲壯丁等六百名赴湖北隨營調遣。茲據官文奏稱該壯丁等到楚後均能奮勇出力。自應量予恩施。著照所請。所有此項壯丁六百名戶口一併永遠歸入吉林各旗冊檔。與各旗丁一體挑補甲缺。當差以示矜恤。而昭激勸。○以翰林院侍讀學士全順為內閣學士兼禮部侍郎銜。○喀喇沁扎薩克都楞郡王色伯克多爾濟於養心門內瞻覲。○甲戌諭內閣。戶部奏遵覈已革戶部司員奕

遷等被叅原案據刑部文稱該司員等代換寶鈔已據供認贓私確鑿並無屈抑惟該革員呈稱咸豐十年二月間定案後承審官並未傳該革員等覆訊仍照前供擬結以致含冤莫白等語著派賈楨單懋謙調集全案卷宗再行秉公覆覈具奏○諭議政王軍機大臣等戶部奏專撥新疆南北兩路經費以濟兵食一摺新疆為甘省屏蔽藩南北兩路各城募布星羅深資控馭近來餉糈支絀各省指

撥之餉。往往遷延不解。該駐防換防兵丁。艱窘堪虞。若不量為變通。籌款撥解。勢必日形苦累。斷難望其實力巡防。著駱秉章於四川正餘濟楚鹽釐撥銀十萬兩。按糧津貼撥銀五萬兩。間敬銘於山東甲子年應徵地丁撥銀五萬兩。鹽課撥銀二萬兩。張之萬於河南甲子年應徵地丁撥銀三萬兩。清查案內提解銀四萬兩。沈桂芬於山西勸捐歸補籌解京餉項內撥銀十萬兩。統合四十萬兩之數。

著該督撫等委派妥員。繞解甘肅安肅道庫。由安肅道委員遞解鎮迪道庫收儲。以備新疆各城分提之用。甘省不得自請截留。其各城需用若干。及如何分撥之處。並著照麟於此項餉銀到日。飛咨伊犁將軍。咨商各城參贊都統大臣等。查明各緩急情形。通籌勻撥。仍著伊犁將軍將各城應需若干。先行奏明。一面知照陝甘總督。轉飭鎮迪道陸續分提。以免貽誤。而昭平允。將此各諭令知之。○又

諭有人奏順天府屬順義縣知縣徐恩洽。聽信門丁王二。多方婪索。改票換差。株連無辜。兵差過境。出票拉車。得銀入己。並藉清查地畝為名。任令盡役需索。該員前在阜城署任。亦因清查地畝。百般苛索。幾釀巨患等語。近畿重地。豈容不肖州縣。肆擾閭閻。若如所奏各情。實屬貪婪溺職。任性妄為。著萬青藜卞寶第按照所參各節。確切查明。據實奏。毋稍徇隱。原摺著鈔給閱看。將此諭令知之。○

又諭李鴻章奏。官軍連復平湖乍浦海鹽各城一摺。十一月初八日。潘鼎新等軍入平湖。將逆酋陶雲從等各館悍賊誅殺。旋將乍浦海鹽及澈浦鎮收復。現派四營守平湖。三營守乍浦。二營留守金山衛海鹽。仍令降眾自守。海鹽澈浦。雖去蘇較遠。然無官兵派守。仍令降眾駐紮。恐不可靠。歸逆鄧洸明等三萬餘眾。入援嘉興。意圖復奪各城。若復有失。則前功歸於烏有。著李鴻章督飭潘鼎新

劉秉璋妥為調度。隨時相機策應。毋稍大意。並著飭令程學啟速攻平望嘉善。此二城一經得手。便可會合浙軍。圖取嘉湖。劉銘傳受傷以後。常州是否接仗。並著催令迅克。以期漸次廓清。餘杭杭州。近日軍情若何。左宗棠前奏。擬令劉典所部各營。由昌化於潛趨臨安。進勦孝豐。規取湖州。並即日親紮富陽。督飭各軍。先克餘杭。然後悉力杭州。分規湖郡。日來尚未見有奏報。殊深廑繫。該督全局胸

羅。前以髮逆圖竄江皖。故以全力協助曾國藩防勦浙西。保全後路。未能分兵攻勦嘉湖。現在皖南州縣克復殆徧。滬軍亦已收復乍浦海鹽等城。聲勢可期。聯絡該督當督飭蔣益澧劉典迅圖攻克各城。並派兵與李鴻章之軍會合。以圖嘉興湖州。所有近日一切布置接仗情形。著該督隨時迅速具奏。李鴻章另片奏令黃翼升帶水師五營馳往臨淮。已於十一月十五日啟行等語。苗沛霖現已授

首餘黨亦次第殲除。臨淮一帶兵力足數分布。而蘇浙交界正在得手。需兵助勦黃翼升。如可留在蘇浙一帶。必能更為得力。著李鴻章咨商曾國藩唐訓方妥籌調度。即令折回。或派在蘇浙一帶防勦。或令扼紮緊要江口。以益兵力。均著妥籌調派。戈登在崑山。近日作何動靜。並著附報奏聞。將此由六百里各諭令知之。○以克復浙江平湖海鹽兩縣。暨乍浦鎮城。予遊擊徐道奎優敘。賞投誠賊目

熊建勳三品頂帶花翎。○以壞亂營規。革江蘇軍營參將李長樂職。○乙亥諭議政王軍機大臣等。馮子材等奏官軍分紮甘棠橋南路屯壘。疊以大股猛撲。屢戰屢捷。賊眾大創。奔潰一摺。忠逆遁往金陵。其死黨仍在丹句一帶。歸偽然王陳逆調遣。偽護王陳坤書所部悍賊亦歸併丹句。為數甚多。二十一二等日。由馬陵分路撲營。雖經各營將士奮力擊退。而官軍傷亡不少。著馮子材魁玉督飭鎮

營將弁戰守兼資。務將各路賊匪悉數殲除。毋使窺覲鎮城。久踞要地。並隨時偵探。如常州攻勦業已得手。卽酌量分軍會合。滬軍相機進取。丹陽總須自行紮穩。先為不可勝以待敵之可勝。諒該提督等用兵有年。必能領會也。將此由五百里諭令知之。○禮部以明年元旦禮節請得旨是。照例行禮奉

慈安皇太后

慈禧皇太后懿旨。停止筵宴。其在外公主福晉

命婦進內行禮之處。並著停止。○補鑄廣東佛岡同知惠來西甯二縣儒學陽山縣淇潭堡巡檢肇慶城守營三江口協左營右營守備各關防印信條記。從兼署巡撫勞崇光請也。○予江蘇丹陽陣亡遊擊李士喜都司古龍光千總王忠福祭葬世職加銜。○丙子諭內閣。吳棠奏在籍藩司應交罰款請免再繳等語。江蘇在籍藩司王藻前因辦理勸捐未經報銷案內奉

旨罰交銀三十萬兩。茲據吳棠奏稱該員前後已繳銀十三萬七千餘兩。其餘銀兩實已無力完繳。所有王藻欠交銀兩。卽著免其再繳。○諭議政王軍機大臣等。官文嚴樹森奏訪查原保知府身家不清。據實檢舉一摺。據稱湖北補用知府周有全。曾充前署嘉魚縣。已故知縣錢炳熙長隨。蒙混投入軍營。效力多年。疊著戰績。歷經官文胡林翼李續宜唐訓方嚴樹森保奏。洊升今職。彼時未及詳其家

世。今訪詢得實。請將周有全拔去花翎革職。永不敘用等語。朝廷名器不可濫膺。周有全既係身家不清。經官文等訪查確實。自應照例辦理。惟各路軍營帶隊人員。流品不一。若斯之類。恐復不少。周有全既以戰功卓著。保升今職。若遽將其罷斥。在該員固無足惜。特恐各路軍營。其有出身卑賤。未經查出者。因之心懷疑懼。貽誤事機。亦不可不先為籌及。著該督等查明周有全現在管帶礮船。於興

耶一帶防勦究竟是否得力。如或改膺武職。有無窒礙之處。著卽酌覈奏明。再降諭旨。將此諭令知之。尋奏。遵查周有全管帶水師。頗著戰功。防勦亦甚得力。未便以出身卑賤。沒其微長。擬請以都司改補。從之。○又諭熙麟。奏雷正綰涇州獲勝一摺。所奏涇州勝仗。與雷正綰前奏情形略同。甯夏靈州被陷之後。該處軍情緊急。現在雷正綰之軍。挖勦涇州附城游匪。當已淨盡。其與陶茂林之軍合力

勦辦。汧隴靈臺一帶後路各賊。亦當悉就掃除。卽著該提督一鼓作氣。直取平涼。由固原鹽茶轉戰而前。進勦甯靈。回匪克復城池。迅殄兇鋒。甯靈被陷時。已旬餘。該處逆情究竟如何。甯夏滿城存亡未卜。慶昫不見奏報。時亦逾旬。均著熙麟等迅速查明。卽行馳奏。以慰廑念。熙麟另片奏馮元佐被害。程景鵬已經格殺等情。仍著張集馨將程景鵬餘黨李彥彪。劉錫俊。韓可英。高學汰。楊老五等逸犯

五名。嚴密緝拏。務獲懲辦。不准一名漏網。惟熙麟所稱馮元佐戰功。疊著被殺。甚慘。請給四品封典之處。與多隆阿。張集馨。疊次所奏。均不相符。多隆阿等所奏。馮元佐本非安分之徒。歷有聚眾抗糧情事。其被眾殺害。皆因鄉民素來深嫉所致。其團眾亦向不安分。張集馨所奏。馮元佐並有聚眾肆行刦殺等情。與程景鵬無異。若不加查察。遽行給予卹賞。恐不足以服人。且熙麟所請賞給四品封

典。亦與體例不符。著該督等再行確查。如馮元佐尚有應卹之處。亦卽另擬具奏。將此由六百里諭知熙麟。雷正綰並傳諭張集馨知之。○兩江總督曾國藩等奏。遵旨審明已革沐湯縣知縣蔣懋勳被參各款。請卽予革職。以示懲儆。得旨。徐德嘉。徐周氏。係句匪擾害地方之犯。該縣蔣懋勳因擒匪。逼近將其就地正法。如果屬實。辦理尚無不合。遽予革職。殊覺所罰過重。惟此案情節有無不實不盡。

及蔣懋勳平日居官聲名何如。有無不洽與情之處。著吳棠再行就近詳查。據實具奏。○賞正黃旗漢軍參領明瑤副都統銜。為哈密幫辦大臣。○以棄隊潛逃。陝西軍營千總劉大元革職拏辦。○予甘肅平涼殉難總兵官呂元。知府田壽增。知縣張仁源。祭葬世職。加等。於死事地方暨原籍建立專祠。佐領雙英等分別賞卹附祀。○丁丑諭內閣。都察院奏。山東嶧縣民人韓培忠等以巨匪擾害。懇請

勦辦等詞。赴該衙門呈訴。據稱該縣賊匪崔錫爵等謀逆。於咸豐十一年春間。約巨匪劉方印。王羊等。在齊村築壘。偪令滕嶧各寨。每畝出錢接濟。該民人不允。崔逆曾令王羊等將該村圍困。嗣經該縣知縣張姓調團彈壓。竟被刦殺練丁孫承全等六十餘人。並該民人之姪武生韓全密。姪孫韓繼霞及李其耐一併被殺。本年該縣知縣勦辦雲谷山逸賊。王羊等抗拒。竟將該知縣殺害等語。案關巨

匪謀逆。戕官害民。亟應痛加懲辦。著閻敬銘督同臬司。親提嚴訊。如果屬實。卽著認真捕拏。盡法懲治。知縣張姓。係屬何名。是否被戕。著該撫查明具奏。○又諭。前因光祿寺卿潘祖蔭升任給事中。卞寶第給事中。朱潮。及陝西在籍道員李宗沆等。先後參控副將閻丕敏。道員李祝齡。副將張維義。施鵬等。於賊竄陝境。未能堵禦。各情。並據多隆阿奏。閻丕銘有餽賊火藥情事。復據參將盧殿標之妻

赴京呈控。問官勒供等情。先後降旨。交愛仁密查訊辦。茲據審明定擬具奏。此案陝西候補參將盧殿標。於賊竄商南時。任令紳民兩次餽賊銀兩。該員既屬知情。同議卽與通賊無異。盧殿標著卽革職。照擬斬監候。秋後處決。革職留任甘肅中衛協副將閻丕敏。雖查無擁兵自衛。棄隘逃走。餽賊火藥各情。惟於參將盧殿標任聽民眾餽賊銀兩。漫無覺察。且身為統兵大員。辦理商雜防務。於賊竄富

水關時。未能攔截。實屬昏庸。懦閣丕敏著。卽行革職。發往新疆效力贖罪。革職留任陝西候補道李祝齡奉委督辦民團於賊入陝境。未能集團堵禦。革職留任陝西潼關協副將張維義帶兵援應。雖無臨敵先潰情事。惟接仗失利。未能遏賊西竄。李祝齡張維義均著卽行革職。發往軍臺效力贖罪。已革副將施鵬奉調帶兵出省。並不迅速進兵。輒敢節節逗遛。著卽發往新疆充當苦差。商南縣紳

董廉生孟習孔貢生王允升從九品銜井維憲監生張逢元等於賊匪圍城時。並不協同守禦。輒因民眾攤銀給賊。冀解城圍。隨同附和。雖非甘心餽賊。然該生監等非無知愚民可比。似此苟且無恥。罔知大義。僅予斥革。不足蔽辜。孟習孔王允升井維憲張逢元均著發往新疆效力贖罪。其偷運火藥送賊之保丁何老五著陝甘總督一體嚴拏務獲。從重治罪。已革道員戴鸞翔承審盧殿標一案。訊

無勒供等情。毋庸再行置議。該革員前已降旨發往軍臺。著卽與閣丕敏等一併交該地方官分別迅速起解。○又諭前署廣西提督江忠義由文員帶兵勦賊。屢復名城。戰功疊著。以道員擢署貴州巡撫。復擢署貴州廣西提督。懋著勲勤。本年夏間。督兵赴援江西。敗賊於湖口青陽。江境肅清。厥功尤偉。方冀干城之選。禦侮長資。茲據沈葆楨馳奏。該員以積勞傷疾。舉發。竟於新建縣屬之吳城病故。

中道殞折。未竟其才。披覽遺章。殊深悼惜。江忠義著加恩照總督例賜卹。予諡。其生平戰績。著宣付史館立傳。並於江西省城安徽青陽及本籍地方建立專祠。准其入城治喪。任內一切處分。悉予開復。應得卹典。該衙門察例具奏。伊子江孝詒著俟及歲時。由吏部帶領引見。候旨加恩。以示篤念蓋臣至意。尋予祭葬。諡誠恪。○諭議政王軍機大臣等劉長佑奏遵旨挑兵赴甘防勦一摺。據稱提標各

營。與宣化鎮標。地處直隸北境。與塞外風土相宜。兩標各挑精壯五百人。通永鎮標擬挑四百人。天津正定兩標各挑三百人。合為二千人。交訥欽統帶赴甘等語。卽著照所擬迅速辦理。該署提督由直隸至朔平歸化。所需餉項軍火。現已由劉長佑源源接濟。至訥欽一軍。如應進趨甯夏。其所署直隸提督一缺。及所需餉項軍火。應如何解交之處。均著臨時再行請旨辦理。前因閻敬銘奏遵派赴晉

防河楚勇。請改赴陝省。當諭令英桂。沈桂芬。晉省防河楚勇。如未起程。卽仍駐河防。毋庸調往。或已起程。而兵力不敷。尚須添補。卽准其於直隸所派之訥欽所帶兵勇二千名內。於過晉時酌留一半。以補河防。著訥欽於抵晉後。會合英桂。沈桂芬酌量辦理奏聞。將此由四百里各諭令知之。○又諭張之萬奏張總愚股匪被擊東竄。現籌會剿。苗捻餘黨。勾結汝南土匪。竄擾信陽州境。請留毛昶熙督

辦各一摺。張總愚股匪由浙川之板橋川為張曜偏剿。乘夜出竄。欲往魯山嵩縣交界四標樹地方暫紮。再繞由潼關西竄。與陝省逆匪勾結。張曜所部跟蹤追擊。賊由內鄉東北一帶竄至南召。張之萬所派道員葛承霖湘勇。已由宛郡而趨南召。與張曜等追兵成夾擊之勢。惟張曜等均由西南追剿。而東北一面空虛。路通河陝。非得馬隊縱橫抄截。不能得力。僧格林沁所派蘇克金帶領馬隊。已至

許昌。卽著僧格林沁嚴飭蘇克金迅速進兵。與張之萬所部及張曜之軍會合兜剿。張之萬卽移軍汝州。督飭色爾固善楊海泰等馬步各隊。覘賊所向。聯絡接應。官文嚴樹森仍遵前旨。速飭鄂邊各軍。越境剿賊。使賊面面受敵。得以迅期蕩平。免致再為楚患。並著張之萬仍飭留駐荆關之教天印孫之友各營。嚴防川匪。與陝省官軍會圖藍逆。蔣希夷周登高兩營。槍紮四標樹。尤須飭令嚴密堵禦。

不可稍有鬆懈。苗逆餘黨高三牛落紅等與正息土匪句合竄擾信陽。現踞游河集等處。其勢尚張。所奏銅鐘陡溝等處勦擊情形。究竟是否確實。張之萬派出馬步各隊及毛昶熙所派之黃貴誠等營。陸續到汝毛昶熙前已有旨。令其暫留豫省。著卽統率汝南諸軍速將游河集等處大股實力殲除。張之萬仍飭總兵李殿元。知府劉成忠等。將現踞談家園之袁王兩寨餘匪一鼓聚殲。毋留餘孽。宛汝之間地屬毗連。且多險阨。該撫與該侍郎尤應迅圖掃蕩。毋使各匪得以竄合為患。致勦辦又形費手。將此由六百里各諭令知之。○又諭前據御史華祝三奏沈葆楨假期將滿。請令照舊供職。當經諭令曾國藩。沈葆楨各泯畛域。毋存意見。並令該撫於假滿後卽行銷假任事。茲據沈葆楨奏。已於十月初三日銷假視事。並滙陳與曾國藩共事情形。尚無意見不合之處。該二臣果能屏除己見。共

濟時艱。東南吏治軍務均可籌商整理。朝廷亦藉以紓南顧之憂。此後該撫當與曾國藩益加和衷。遇事妥商籌辦。以期於事有濟。匪首羅衍義等糾眾滋事。圖占城池。經各該地方官捕獲。先後正法。辦理尚屬認真。惟散處餘匪尚未按名弋獲。著卽督飭各該地方官設法搜捕淨盡。毋任一名漏網。其茶陵縣所載姓名。咨會惲世臨派委文武協同會拏。務期淨絕根株。不准稍留餘孽。江西副將唐星照尚在湖南原籍。著沈葆楨卽知會惲世臨飭催該副將迅由湖南募齊勇丁。趕赴劉蓉軍營。毋稍延誤。江忠義所部將士。久經行陣。亟須遴員統帶。著該撫商同曾國藩迅速辦理。將此由四百里諭令知之。○以鑲藍旗蒙古參領察隆額署鑲紅旗漢軍副都統。○翁牛特都楞郡王布爾那巴達喀喇沁扎薩克頭等塔布囊德勒格爾於養心門內瞻

觀○戊寅

孝惠章皇后忌辰遣官祭

孝東陵○以雪澤未霑

上於

大高殿設壇祈禱親詣行禮○遣恭親王奕訢

詣

時應宮悼親王奕諒詣

昭顯廟鍾郡王奕詒詣

宣仁廟孚郡王奕誥詣

凝和廟拈香○諭內閣閣敬銘奏請仍抽收

蘆鹽釐金一摺據稱前奏抽收蘆鹽釐金均

經戶部議駁惟查直隸大名暨河南滑濬內

黃一帶鹽路實係暢銷體察商情亦無苦累

請仍抽收裕餉等語所奏自係實在情形即

著照間敬銘所請准其設局抽收以資接濟

惟該撫必須慎選賢員覈實經理永杜侵漁

培克諸弊其東省鹽務該撫亦務當督同恩

錫實力整頓俾稅課日有起色方為不負委

任○諭議政王軍機大臣等丁曰健奏勦破

葭投老巢撲滅逆匪巨股一摺臺灣官軍自

攻克水裏港福州厝等數十匪莊北路逆匪

漸就窮蹙逆首陳鯨等率黨竄守葭投老巢

經丁曰健派令文武員弁移營進逼由水師

蔡等處奮力進攻搶入葭投莊內生擒偽先

鋒等多名全股匪徒殲斃殆盡立將葭投克

復自彰化鼇頭地方至大肚溪以北匪莊四

十餘里一律肅清著丁曰健乘勝進攻彰城

迅圖克復現在林文察已飭林文明募勇馳

赴嘉義縣城著左宗棠徐宗幹飛飭林文明

趕緊招募齊集起程會合曾元福各軍進攻

斗六丁曰健亦即乘此聲勢會合各軍分路

進取迅克彰城埽清羣孽毋稍延緩將此由

五百里諭知左宗棠徐宗幹並傳諭丁曰健

知之○以江蘇甘泉縣捐輸軍餉永廣學額

六名○予江蘇安徽江西節次陣亡傷亡知

府朱聲隆等三百二十七員名祭葬世職加

等○予江蘇安徽兩省合門殉難員外郎封職孫贈祖等一百三十三名口暨紳民婦女等九百名口分別旌卹如例○己卯諭議政王軍機大臣等熙麟雷正綰奏官軍攻克王村花所鎮匪巢連獲大勝並雙廟集勝仗殲斃賊目木三各摺片雷正綰甫抵甘省卽已屢獲大勝此次踴平王村花所鎮逆巢南北兩原之賊相繼竄匿自當乘此聲勢節節掃除著雷正綰督飭各將士先將杜家溝逆巢

攻克並催令曹克忠相機兜剿熙麟卽飭附近各州縣一體率團堵禦以壯聲威陶茂林在汧隴一帶當已將餘匪一律殄滅著多隆阿卽催令該署提督將靈臺崇信華亭等匪剋日殄除會同雷正綰大軍進取平涼固原廓清甘境用慰朝廷西顧之憂多隆阿近日病勢若何曾否輕減蓋座圍攻已久何以尚未克復炸礮為攻堅利器是否敷用該大臣營中熟諳施放者諒不乏人著嚴飭穆圖善

等實力攻拔毋任久踞甯夏漢城失守後侯雲登及城中文武各員有無下落滿城近日戰守若何久未據慶昫奏報殊深懸繫著熙麟迅將甯夏實在情形備細訪聞據實具奏將此由六百里各諭令知之○江甯將軍都興阿奏查明降眾投誠與鎮營所奏並無兩歧現已撥隊渡江與鎮營聯絡聲勢藉資策應得旨據奏劉巷降眾投誠與馮子材前奏難民賀姓等係屬兩事尚無不實之處鎮城

防勦喫緊該將軍當飭統帶勇丁之鄭啟貴隨時聯絡策應仍嚴飭吳全美等水師實力巡防江面毋稍鬆懈○以甘肅攻克王村花所鎮賊巢賞參將譚玉龍巴圖魯名號餘加銜升敘開復有差予陣亡都司戴洪立守備殷康順祭葬世職加等○庚辰諭內閣李棠階奏保舉人才以備任使一摺前直隸候補道王檢心前任浙江杭嘉湖道黃宅中前陝西候補知府齊琮候選知府原峰峻均著吏

部迅速行知各該員原籍巡撫飭令來京交部帶領引見候旨錄用○又諭官文奏各省優貢業經奉旨准照拔貢一體覆試錄用湖南省選舉優貢懇照中省定額辦理一摺湖南省近歲以來人材蔚起講求實學即如各路軍營以諸生而委身戎馬建立勲勞擢膺封疆將帥之任者不一而足庠序之中經明行修踐履克敦者諒更不乏其人加恩著照所請湖南選舉優貢准與湖北一律按照中

省四名定額舉行即以同治三年甲子科為始由該省學政會同該督撫覈實辦理該督撫學政等仍當慎選賢才考求素履為國儲賢以收實用如或不得其人仍當任缺毋濫以體朝廷循名責實之意現當破格求才之際各直省於優貢一途均當痛除向來虛冒積習訪舉潛修積學之士廣其登進為國得人以副殷望○諭議政王軍機大臣等李鴻章奏攻克平望鎮及九里橋黎里等賊壘並

常州之軍攻克孟河海鹽之軍攻克璆城等摺片馮子材魁玉奏擊退丹句屯賊一摺平望鎮為蘇浙兩省樞紐賊之精銳併聚程學啟等各軍破壘之後賊猶格鬪逾時則其兇悍可想李鴻章現派陸營填紮奪賊石城並以水師泊鶯脰湖礮船紮牛頭河以杜賊匪繞竄之路常州各軍攻破孟河汎城擊退句容來援悍賊海鹽之軍攻奪璆城石壘李鴻章以賊中聽歸各逆酋均集嘉興杭州海甯

等處必復來爭潘鼎新所部兵力稍單暫撫降眾用之並帶所部移紮乍浦以扼海口形勝兼顧平湖復調唐宏成之軍協守海鹽而程學啟由平望進紮劉秉璋由嘉善進取以為面面牽制之勢辦理均極妥協即著李鴻章督飭各軍穩慎進攻不可稍涉大意嘉興克復即與浙省之軍會取湖杭常郡克復即與鎮城之軍會攻丹句並著曾國藩隨時妥籌兼顧商令曾國荃乘此賊勢大蹙面面受

敵之時。相機進取。擣穴擒渠。毋令洪逆與李秀城伺隙圖竄。左宗棠亦卽督令浙西各軍迅速進攻。期與蘇軍聲勢相倚。以收夾擊之效。忠逆之子。句結丹句悍賊黃逆。撲犯甘棠橋。官軍新營馮子材所派各軍力戰退賊。殲厥渠魁。鎮城戰守尚為穩固。仍著馮子材等嚴行備禦。防勒兼施。並著都興阿嚴防北岸。以杜竄越。與南岸馮子材等聲息相通。飭令水陸各軍鎮定堵剿。毋稍懈弛。李鴻章所奏

忠逆所購小火輪船。聞已統赴溧陽。究竟是。何詭謀。溧陽僅通運河。輪船何以能往。是否圖入太湖竄走。及繞越東壩。仍須飭令各路水陸諸軍嚴行防範。至新復浙西府縣。此時杭城未克。浙省不能顧及。自應暫由蘇省就近妥籌彈壓撫綏。卽著照李鴻章所請。於收復浙省府縣。卽由該撫慎選妥員暫委代理。此係權宜辦法。仍著左宗棠一俟浙省兵力能及。卽統由浙省委員接替。其李鴻章所請

飭令候守應實時幫同關道黃芳籌辦洋務。作為通商大臣衙門隨員。以資得力之處。卽著照所擬辦理。戈登於賞給銀兩。不敢遽領。卽俟其回國時。再行賞給。及將功牌仿照外國寶星式樣製造。一併發給。以示優賞。並已諭令總理各國事務衙門。速將前事定議。知照矣。前據曾國藩等奏。忠逆已竄入金陵。何以本日李鴻章奏。尚往來應援。常郡該逆究在何處。著曾國藩李鴻章查明具奏。將此由

六百里各諭令知之。○湖廣總督官文等奏。請將聞拏投首之已革副將盧得勝。懇恩免死發遣。得旨。盧得勝著發往新疆充當苦差。遇赦不赦。○山西巡撫英桂奏。請將火器營副參領祥安等獎勵。得旨。所請祥安。默德禮。獎敘。均與例不符。著毋庸議。該二員如果著有勞績。著沈桂芬存記。仍督令製造火器。源源接濟。陝甘軍營。俟晉省北路防剿事竣。再行請獎。但須就本營升階保奏。不得違例奏

請。○以故伊克明安輔國公烏爾圖那遜孫
巴克默特多爾濟襲爵。○以鑲白旗滿洲副
都統德懋署正白旗護軍統領。○以東河防
汎出力。賞道員德蔭周煦徵。敬和等。加銜升
敘有差。○以安徽蒙城解圍出力。賞遊擊李
有才。劉福興。都司戴錦芳。巴圖魯名號。騎都
尉福珠隆阿等。花翎。筆帖式文煜等。藍翎。餘
加銜升敘有差。○以江蘇甘棠橋勦匪獲勝。
賞還副將楊青山頂翎。○以江蘇官軍攻克

平望鎮等處賊壘。賞副將龔生陽。阮炳福。巴
圖魯名號。于總兵官劉士奇等。升敘有差。陣
亡守備孟得元等。祭葬。世職加等。○以江蘇
馬岡陣亡守備林成。祭葬。世職加等。○科爾
沁扎薩克圖謝圖親王。巴實多爾濟等六人。
巴林扎薩克郡王。那木濟勒旺楚克等二人。
喀爾喀扎薩克郡王。托克托琥圖魯等五人。
敕漢郡王。布彥德勒格。喀固魯克齊。阿巴哈
納爾扎薩克貝子。桑齊薩喇特多布。阿巴噶

扎薩克郡王。瓦津達拉。扎賚特扎薩克郡王。
阿勒坦鄂綽爾蘇。呢特扎薩克郡王。托第布
木。土默特扎薩克貝勒。散巴勒諾爾贊。茂明
安貝勒。格楚克。郭爾羅斯扎薩克鎮國公。噶
爾瑪斯迪。於養心門內瞻覲。○辛巳諭內閣。
吏部奏。遵議巡撫處分。請予降級留任等語。
安徽巡撫唐訓方。於苗逆圍攻蒙城時。未將
馬新貽一軍調回。復未能親督兵勇。迅速赴
援。已屬措置乖方。其奏報收復懷遠情形。亦

復含糊。未能明晰。經僧格林沁遵旨查明。據
實覆奏。該部議以降三級留任。不准抵銷。唐
訓方既於調度軍務。一切未能合宜。卽屬難
勝巡撫之任。著卽開缺。以布政使降補。○諭
議政王軍機大臣等。前據僧格林沁遵旨覆
奏。唐訓方於皖北軍務。措置乖方。降旨交吏
部議處。本日據吏部議以降三級留任。不准
抵銷。尚覺從輕。已明降諭旨。將唐訓方以藩
司降補。安徽巡撫。令喬松年補授矣。喬松年

接奉諭旨。卽著馳赴新任。所有應辦事宜。卽著實力整頓。次第經理。皖北地方新復。投誠各圩。人心尚未大定。苗捻餘孽潛匿散處。搭捕安撫。均關緊要。喬松年受朝廷拔擢之恩。身膺重寄。於地方吏治軍務。均應實力講求。以期無負委任。該撫初抵皖省。情形尚未熟悉。一切勦撫機宜。並地方應辦事件。著僧格林沁。曾國藩隨時指示。喬松年亦當隨時咨詢商榷。以期辦理盡善。至江北糧臺。必須大

員督辦。關擊甚重。萬啟琛已調補江甯藩司。著曾國藩飭令迅赴江北。辦理糧臺事宜。以資接替。而重職守。將此由四百里各諭令知之。○以前任宗人府府丞溫葆琛為宗人府府丞。○以江甯布政使喬松年為安徽巡撫。調江蘇布政使萬啟琛為江甯布政使。以江蘇按察使劉郇膏為布政使。督糧道郭白蔭為按察使。○壬午。諭內閣。麒麟慶奏審明蒙古人等互相誣控。按例定擬一摺。此案土默特

貝子旗已革台吉嘎爾瑪斯第因借給阿育爾喇嘛錢文無償。將地畝指典抵欠。而地畝係業經其兄賣給已革管旗章京烏爾圖那素圖之業。烏爾圖那素圖贖罪回家。該台吉疑係私逃。卽令其子阿育巴咱及家人等前往圍拏。索詐贏頭錢文。後因烏爾圖那素圖翻悔未給。遂開列七款。赴三座塔稅務衙門具控。烏爾圖那素圖並不赴案質訊。邀同葉什桑保。亦將嘎爾瑪斯第臚列多款。赴熱河

都統衙門呈告。現經訊明。嘎爾瑪斯第等並無私立綽號。及聚會台吉商議別事等情。烏爾圖那素圖亦無私將軍營帶回大礮賣給賊匪情事。互控各情。均屬誣捏。嘎爾瑪斯第以獲咎被革之員。復因地畝細故。圍拏烏爾圖那素圖。偏索錢物。並捏詞具控。實屬不安本分。好訟多事。烏爾圖那素圖既經被控有案。自應遵傳赴質。乃抗傳不到。復捏造重情。邀人赴熱河越訴。希圖准狀。居心更屬險詐。

嘎爾瑪斯第烏爾圖那素圖均著照例發往河南山東交驛站充當苦差由理藩院定地發配事犯雖在恩詔以前不准援免○諭議政王軍機大臣等本日據步軍統領衙門奏湖南已革巡撫李際晟遣抱告家人吳汰呈控知府李逢春等扶嫌叅革監禁擬遣一摺屬員於被叅後許告上司例應立案不行惟覽該員所控呈詞各款如李逢春覓得張姓婢女獻於毛鴻賓作妾佞諛希寵並主使

毛鴻賓私那庫銀五千兩賄通肅順旋因肅順伏法毛鴻賓差武弁張玉恩乘驛追趕又李逢春為楊鼎勳等屢謀優缺於親喪期年之內買倡為妾包庇劣幕江錫九強娶良女為妾王一陶等新置田房極多並經歷李撫辰等皆為李逢春執鞭通賄等語如果屬實於吏治官箴大有關繫毛鴻賓現經升任兩廣總督其眷口自己攜赴任所著瑞麟就近嚴密訪查該督之妾有無張姓婢女是否李

逢春所獻據實奏聞其委同知江肇成帶銀到京賄通肅順及李逢春與楊鼎勳胡鑄黃維瓚等朋比為奸各情節仍著官文密派妥員逐一確查覆奏毋稍瞻徇原呈一件單一件均著鈔給官文瑞麟閱看將此各密諭知之○又諭德勒克多爾濟等奏遵旨設探邏察挑派滿蒙官兵操防策應並訥欽一軍請由山西派員籌備口糧各摺片綏遠歸化一帶邊境遼闊現經德勒克多爾濟等調沿邊

兩盟蒙古官兵一千名俟訥欽之師馳抵甯夏即將此項官兵作為前隊相機繼進設仍恐兵力單薄再將沿河駐紮之旗綠官兵一千名作為中隊策應並另調官兵前防河汎均照所議辦理惟操防巡察須在在認真不得以業經調派遂謂可以卸責另片奏訥欽一軍請飭山西撫臣籌備口糧接濟可以進行等語訥欽一軍曾否起程定於何處進取著劉長佑與該署提督妥商即日拔營前進

如由朔州等處進發。可以遄行。卽無庸取道草地。設由口外行走。卽飛咨沈桂芬。該署撫當派妥員。隨同訥欽行營。籌備柴薪豆草口糧。源源接濟。不得有誤。師行。將此由六百里各諭令知之。○又諭前因山陽敗匪。竄犯商南。疊經諭令李雲麟回軍勦辦。茲據該京卿奏。商南之賊。有藍斯明等夾擊。定可收功。目下各營將抵興安。斷難再退。聞西鄉踞城之賊。因楚師西上。已有懼意。此時進攻西鄉。則

漢中可望轉機。退勦川匪。則興郡亦成危局。現時賊匪由富水關竄至郿西之趙家川等處。據生擒賊供。該逆欲分為兩支。一由郿西下四十里之天河口偷渡。一由郿陽上三十里之武陽等處偷渡。竹山竹谿回川。武陽一帶。有梁作揖截勦。郿西一路。經李雲麟調總兵蔣運喜率義勝兩營回援。並派水師前往堵禦等語。著官文嚴樹森卽飭令梁作揖等將武陽等處股匪實力殲除。如兵力尚不敷

勦辦。卽著酌度調派。務將此股竄匪盡數殲滅。毋任再有竄越。李雲麟既經劉蓉調赴興安。著卽將西鄉踞匪先行攻克。會商劉蓉分路進兵。以期節節掃蕩。該京卿既稱進兵之後。儻所辦不能有功。卽請置以重刑。諒必確有把握。如任漢中之賊竄犯興安。闌入完善之區。定惟該京卿是問。另摺一件。留中備覽。將此由六百里各諭令知之。○又諭憚世臨奏楚軍防勦髮逆及苗教各匪情形。請飭黔

粵兩省派兵會勦一摺。李七為李幅猷悍黨。兇狡異常。黔中苗教各匪雖煽亂數年。其眾究係烏合。若再與該逆合而為一。習其伎倆。必為楚粵黔三省大患。此股悍匪竄入黎平境內。為時已多。總未據勞崇光張亮基將實在勦辦情形詳細入告。該督撫不能乘賊初至之時。迅圖殄滅。必待該逆養成羽翼。滋蔓難圖。重煩兵力。貽誤封疆。自問當得何罪。著卽迅派得力兵勇。趕赴黎平一帶迎頭截擊。

盡殲醜類。不准再有遲誤。黎郡與楚粵犬牙相錯。防不勝防。苗教各匪。又有下竄沅晃之勢。亟宜豫籌布置。著張凱嵩遴派勁旅。由融縣懷遠等處進兵。會合夾擊。惲世臨仍飭周洪印等軍力扼要隘。一俟黔粵兵勇到齊。即行出境會剿。務將李七一股悉數埽蕩。庶苗教各匪。懾於聲威。勦撫均易得手。該督撫等務當合三省兵力。殄此巨患。肅清邊陲。不得各分畛域。貽誤戎機。正在寄諭間。據毛鴻賓

奏。生擒李幅猷詳細情形。李幅猷擒獲。前據惲世臨奏到。業經明降諭旨宣示矣。至陽山縣一帶土匪竊發。亟應迅速勦除。著督飭張運蘭移軍前往拏辦。總期盡數殲擒。不准一名漏網。致留餘孽。毛鴻賓另摺奏。懇陳廣東釐務情形。期於興利除弊等語。辦理釐務全在經畫得人。方能涓滴歸公。而商民亦不至擾累。該督務當會商郭嵩燾。董率屬員。力除積弊。覈實抽收。以奏裕國恤商之效。將此由

六百里各諭令知之。○又諭。傳諭蒙古王公貝勒貝子等。前因有人控告盜匪白凌阿。在土默特旗地方燒殺姦淫。結盟搶掠。其外甥彌勒僧格相助為惡。疊經降旨查拏。而白凌阿至今未獲。其彌勒僧格一犯。由吉林解往熱河。行至大石橋店門。又復乘間逃跑。現聞白凌阿。彌勒僧格。均仍逃入土默特。教漢旗籍。該旗王貝勒等。並有庇護隱匿情事。近來各旗地方。馬賊橫行。正當認真協緝。如罪大

李奎李

李奎

惡極之白凌阿等。尤當嚴拏。務獲。豈容任令脫逃。土默特貝勒散巴勒諾爾贊。教漢扎薩克郡王達維多克丹。平日不知振作。近復庇護盜匪。情殊可惡。著該王貝勒及各蒙古王公貝勒貝子。會同巡緝。迅將白凌阿。彌勒僧格二犯。拏交熱河都統審辦。儻能迅速緝獲。該蒙古王公等。捕務勤奮。必當量予恩施。若敢任意容隱。縱盜養奸。將來別經發覺。訊明由何旗隱匿。定將該旗之王公貝勒貝子等

治罪決不寬貸。至盛京吉林熱河等處。遇有馬賊出沒。官兵捕拏之際。如竄入蒙古各旗地界。則該蒙古等尤當協同會緝。實力擒捕。其有公文移會該旗之處。卽當迅速移覆。彼此聲息相通。互為巡緝。以清奸宄。不准顛預了事。置之不答。該蒙古王公貝勒貝子等。迅卽遵諭行。○以鑲黃旗蒙古都統明慶署正黃旗蒙古都統。○以妄拏無辜。湖南知府鄂堃撤任查辦。知縣史長華革職訊辦。○追予貴州修文陣亡知縣韓夢琦入祀原籍廣東惠州府昭忠祠。予武生晉昌。生員陳壽期等一併附祀。○追予廣東南海等處陣亡千總仇國安等一百七十八員名。分別賞卹如例。○蠲緩湖南澧武陵龍陽安鄉沅江華容湘陰益陽芷江麻陽黔陽會同綏甯臨湘巴陵十五州縣暨岳州衛被水被旱被擾地方新舊額賦有差。

大清穆宗繼天開運受中居正保大定功聖智誠孝信敏恭寬毅皇帝實錄卷之八十七

大清穆宗繼天開運受中居正保大定功聖智
誠孝信敏恭寬毅皇帝實錄卷之八十八

臣等謹將本年以來各省督撫奏請開辦煙館逐漸增加請旨嚴禁等語是兵丁吸食洋藥之禁各該省仍未實力奉行此風不止則精壯者必成孱弱孱弱者悉成無用於整軍經武之道大有關繫著黑龍江將軍及各省將軍都統副都統恪遵前旨一體設法嚴禁不得虛應故事有名無實其綠營兵丁恐亦不能掃除積習並著各省督撫提鎮嚴行查察儻有仍前吸食不知自新者即當斤革懲辦至內外文武官員均各有應盡職守一經吸食洋藥則百事廢弛關繫尤重著各該管上司留心訪查遇有此等官員即行奏請罷斥不准姑容徇隱此旨並著該部行知各該省將軍督撫提鎮等曉諭旗綠各營俾各懷遵痛加肅洗以肅戎行諭議政王軍機大臣等有人奏甘肅巨蠹彭沛霖納賂行私壟斷公事被罪發遣又以行賄援例邀免寄寓省城把持一

同治二年癸亥十二月癸未

孝和睿皇后忌辰遣官祭

昌西陵諭內閣巴揚阿奏請旨嚴禁駐防官兵吸食洋藥及現在辦理大概情形一摺洋藥一項前於咸豐九年開經惠親王等奏定弛禁章程內官員兵丁吸食洋藥仍照定例辦理上年因王慶雲奏請嚴定限制復明降諭旨諄諄告戒原以兵丁奮力戎行不宜以有用之精神日形消耗也乃本日據巴揚阿奏現在整頓荊州駐防營伍查係有癮之人

切黨與四布力庇革員成瑞和祥並與署秦州知州姚近斗結為心腹姚近斗恃有奧援專事苛斂道員林之望督兵天水鎮時姚近斗徑自赴省將糧臺款項盡行攜去貽誤軍行請飭查辦等語已革知縣彭雨亭卽彭沛霖係奉旨發往黑龍江充當苦差之犯豈容援例邀免近復盤踞省垣把持公事可惡已極著照麟仍遵前旨迅將該革員起解發往黑龍江充當苦差不得任聽逗遛自干咎戾其如何行賂援例邀免發遣署總督恩麟署藩司文麟受其欺蔽並庇護劣員朋比為奸及林之望勒辦徵縣等處逆匪姚近斗恃彭沛霖關說行賄屢誤軍需各情著多隆阿照麟雷正綰確切查明據實奏參毋稍徇隱原片均著鈔給閱看將此各諭令知之○又諭前因張集馨奏山陽竄賊逼近商南李雲麟追斬無多全軍西行李雲麟所派之守備龍常於石泉一帶地方滋擾逗遛請旨革職並

請將統帶礮船得力之周有全暫署陝安道篆等情先後降旨允准茲據李雲麟臚列張集馨居心險詐徇私廢公各款蹟奏參一摺據稱該京堂攻克山陽血戰二十餘次張集馨則奏稱並未出隊該京堂之軍入陝後張集馨不給餉需且劄飭所屬不准應付絲毫於營官則任意劄付撓亂將弁莫知道從張集馨曾受署石泉令陸莖私惠署陝撫後惟其言是聽陸莖以饒賊為守備龍常所評因誣龍常以退守時兵勇滋擾張集馨卽具奏參革並函致陸莖以快其心周有全曾充長隨因夤緣陸莖得以署理陝安道前李雲麟統軍抵興安時該署知府謝復榮以奉有張集馨嚴劄不准兵勇入城且云恐有通賊情事致各勇聞而驚疑各等語李雲麟督軍援陝所需月餉楚省僅供其半張集馨身任封圻理宜劄飭地方官設法接濟若果如李雲麟所奏則張集馨有意掣肘不顧大局實出

情理之外。惟李雲麟所稱楚軍驚疑解體。幾成不測。未免意圖聳聽。李雲麟於山陽竄賊。未能追剿。屢奉嚴旨詰責。今乃云非將士之前。實糧餉之不繼。是否巧於藉詞。至龍常一員。有無逗遛滋擾情事。抑係張集馨偏聽誣劾。周有全現已撤陝安道署。任其從前有無夤緣陸壘。陸壘有無隨同鄉民餽賊情事。張集馨之劄飭所屬。不准給餉。不准兵勇入興安府城。及箝制李雲麟所部將士。究竟是。何居心。是否屬實。著劉蓉按照李雲麟指參各節。確切訪查。秉公據實覆奏。毋稍徇袒。徇隱。致有不實不盡。陸壘如實有前項款蹟。即著撤任。奏參原摺著鈔給閱看。將此密諭知之。○又諭駱秉章奏漢南賊勢蔓延甚廣。剽悍大隊。廣聚黃官嶺等處。銳意窺川。此時劉蓉若徑帥各軍。出青石關。以規漢南。賊得分道衝突。以全力抗拒。難期得手。須俟新募楚勇到齊。兵力既厚。數路並進。大張捷伐。漢中

可望肅清。川境不致蹂躪等語。自係為慎重軍務起見。惟漢中賊勢猖獗。與其各處設防。不如一力進剿。且劉蓉受命撫陝。將及半載。該撫於九月間。奏請派員回湘募勇三四千名。有計須臘底取齊。三路進剿之語。並云俟所調果後九營到後。親自統率進駐青石關。激勵諸軍。先固川疆門戶。駱秉章現已飛飭果後九營。由保甯馳赴巴州。聽該撫調遣。並調參將許蔭棠一軍。馳赴通江。及武字定武兩營。黎鴻鈞所部六千餘人。分布各隘。兵力不為不厚。即新募楚勇計時亦應到川。著劉蓉即行統率各軍。星速前進。駐紮青石關。力圖克復漢中。城固等處。會合李雲麟等約期進攻。以符三路進剿之原議。李雲麟昨奏通籌大局。以西征為急。目下行抵興安。聞西鄉踞城之賊。因楚師西上。已有懼意。此時進取西鄉。則漢中可望轉機。等語。當諭令該京卿即照所請。速攻西鄉。踞匪並會商劉蓉分路

進兵以期節節掃蕩該撫務當與駱秉章妥籌迅進並與李雲麟商酌辦理以解漢南倒懸之危近數十日未接劉蓉來報是否已由巴州進紮青石關並著迅速馳奏無得任意遲緩盧又熊是否死於城固城下其餘文武下落究竟若何留壩褒城新集一帶賊勢若何沔縣如何收復之處據駱秉章奏難以確探著劉蓉於行抵漢中後查明速奏將此由六百里各諭令知之○以四川蕩平逆匪郭

幅潰全股出力賞參將朱洪勝等花翎知縣文康等藍翎餘加銜升敘有差○予江蘇長洲等處殉難布政司理問張景杲等紳民婦女四百餘員名口分別旌卹如例並予建祠

○甲申

孝德顯皇后忌辰遣官祭

暫安寢殿○諭內閣萬青藜卞寶第奏甄劾不能勝任各員請分別降革休致一摺順天府南路同知費濤於所轄捕盜營未能認真督

緝捕務難期得力著以簡缺同知歸直隸省另行補用署房山縣知縣吳山壽性情浮滑聲名甚劣著卽行革職署平谷縣知縣張鶴千孱弱多病難期振作著卽勒令休致候補府經歷陸銓擅離差委地方久無下落著卽行革職此外如有貪劣不職之員仍著萬青藜等隨時甄別以肅吏治而飭官方○諭議政王軍機大臣等都興阿奏南岸逆匪竄擾水師獲勝情形並總兵稟詞張惶各摺片孟河以上起駱港一帶有賊匪滋擾經總兵吳全美親督礮艇擊退並將圍攻小河石橋灣降眾營壘之賊擊敗該將軍現飭遊擊鄭啟貴管帶援兵二千於渡江後卽紮丹徒鎮沿江策應著卽督令實力巡防並飭水師各營將士嚴密堵截毋任逆艘偷渡北岸沿江一帶陸洲既有賊蹤卽著都興阿嚴飭水師勦洗不可任其久踞致滋蔓延前據李鴻章奏稱招撫奔牛降眾攻克孟河賊壘等情現在

小河孟河地方賊勢甚熾。必須江北援師協力進剿。隨時策應。毋令降眾營壘為賊困逼。該營降眾係何人為首。並著都興阿查明具奏。泰興靖江一帶。都興阿亦當飭令在防將士嚴加防堵。以保完善。至總兵黃開榜。接准吳棠函開。有豫勝營軍火等件。來至蔣壩。並委員家信有所說。豫勝營礮船不知是何命意等語。現在李世忠在臨。隨勒立功。尚未回防。黃開榜聞該營礮划駛入三河。卽飛稟請

調水師入湖防守。恐涉張惶。致駭聞聽。據都興阿奏。所鈔委員家信。詞亦含混。無甚確實。何以吳棠輒由六百里排單。行知黃開榜。現在情形究竟若何。著吳棠確切查明具奏。並著都興阿。吳棠於豫勝營將士經過地方。妥為駕馭。毋稍輕率。將此由五百里各諭令知之。尋吳棠奏。遵查前月杪。有豫勝營礮船由三河下駛高寶。因未准李世忠咨會。遂由六百里函致黃開榜。令其就近查問。嗣據報此

項船隻係護送副將李顯發家眷前赴六合沿途並無滋擾。報聞。○予安徽蒙城傷亡總兵官王萬清祭葬。世職加等。諡勤勇。○予浙江杭州等處殉難生員夏拜颺等紳民婦女九十三名口分別旌卹如例。○予浙江湖州殉難在籍知縣楊光烈等紳民婦女一百二十五員名口分別旌卹如例。○予浙江歸安合門殉難候選訓導孫鳳翔等男婦十員名口分別旌卹。並立祠建坊如例。○乙酉

上復詣

大高殿祈雪壇行禮。○遣恭親王奕訢詣

時應宮。惇親王奕訢詣

昭顯廟。鍾郡王奕詒詣

宣仁廟。孚郡王奕譞詣

凝和廟。拈香。○諭內閣。都察院奏坊官呈控

書吏蒙蔽選缺一摺。據稱北城委用候選兵

馬司副指揮沈桂森呈控吏部文選司書吏

鄭慎言等將該員應選到班各缺蒙蔽騰挪

致三次到班未選。屢經赴部呈請更正。俱為該書吏等牽引旁例批壓等語。沈桂森所控各情。是否該書吏等舞弊。騰那抑係該員希圖選缺。飾詞狡訟。亟應嚴切訊究。以清選法。此案著交刑部提集人證卷宗。秉公嚴訊。明確據實。奏聞辦理。○又諭前據大理寺卿賀壽慈奏。請飭湖北整頓團練。並保在籍道員陳慶溥等督同勸辦。當經諭令官文嚴樹森於界連皖豫兩省地方實力整飭。並察看陳慶溥能否得力。茲據官文等覆奏。團練派員專辦。利少弊多。請由各該州縣自行經理。並稱陳慶溥年輕望淺。不能服眾。難期得力等語。湖北省沿邊各屬團練。既據官文等聲稱不必派員專辦。著卽責令各該州縣認真辦理。毋任廢弛。並慎選賢能。牧令聯絡紳民。以收實效。至京外臣工保舉人員。原期名實相符。備資驅策。賀壽慈輒以年輕望淺之陳慶溥請令辦理團練。殊屬輕率。朝廷設不加詳

察遠行任使。豈不貽誤公事。似此保薦不實。殊負朝廷博採旁諮至意。賀壽慈所奏著毋庸議。○又諭殺虎口監督俊達奏。請嚴禁奸商繞越由地方官協查。並禁東西邊口私行出入貨物。各一摺。殺虎口徵收稅課。向以邊牆及黃河為界。商人載運貨物。例須直赴殺虎口輸稅。不許繞避別路私行。至附近黃河之托克托城地方。設有黃甫川稅局。凡殺虎口應徵稅貨。由黃河順流而下者。均應赴黃甫川稅局輸稅。後方准入陝。其由陸路進口之牲畜貨物。如由托克托城赴陝運渡黃河西岸者。卽由殺虎口起票。歸托克托城木稅局驗票放行。近來奸商多由托克托城黃河東岸藉詞西渡。偷漏關稅。總由地方官不肯協同查拏。所致著德勒克多爾濟沈桂芬嚴飭該地方文武協同該監督所派差役實力稽察。嚴拏偷越。以重稅課。毋得視為具文。至山西沿邊各口。自殺虎口起東一帶至新平

口止西一帶至陝西神木口止。皆係應禁牲畜貨物私行出入之路。近來各邊守口弁兵多不在彼直班稽查。以致奸商屢有繞越偷漏之案。實屬玩懈。著沈桂芬張集馨轉飭所屬文武地方官。自殺虎口起。東邊一帶至新平口內。除得勝口照例徵稅。甯魯口嚴稽過貨外。其西邊一帶至陝西神木口止。所有私行出入貨物牲畜。均著嚴行禁止。並飭守口弁兵。常川駐守。實力盤查。毋得仍前玩忽。○

又諭毛鴻賓郭嵩燾奏請將聲名平常之府縣各官。分別降革一摺。廣東署潮州府知府候補同知直隸州知州汪政年。力就褻性情貪鄙。卸任署佛山同知候補知府三多。居心庸劣。習氣太深。准補德慶州知州蔣元裕。行止卑污。不知自愛。澄海縣知縣張景耀。貪污嫺惰。聲名最劣。均著卽行革職。署和平縣知縣朱世忠。人品輕肆。難資委任。署東莞縣知縣朱用孚。習為輒熟。一味逢迎。均著以府經

應縣丞降補。以肅官方。其餘所屬官吏。如有庸劣不職者。著毛鴻賓郭嵩燾再行詳查。從嚴參辦。○諭議政王軍機大臣等。據官文奏。憑陳團練流弊情形等語。團練本以輔官兵之不足。止能用之於暫。不能持久。可以戢土匪。不足以當大敵。本日據官文嚴樹森所陳。甚為明晰。著照所擬。仍由各該州縣自行經理。鄂省西北邊防。正當喫緊。官文嚴樹森當嚴飭各該州縣。不可廢弛團務。又必須選擇

賢能之地方官。督率紳民認真妥辦。俾守望既可以相助。而權亦不至歸諸民間。仍一面練兵籌餉。力求制敵強兵之策。方為不負委任。將此各諭令知之。○又諭多隆阿奏遵籌全局一摺。所奏東南軍務及善後事宜。均與前寄諭旨大意相符。西北陝甘一路。係多隆阿專責。整屋圍攻已久。屢據該將軍奏稱。即可得手。此次復稱藍逆外援已絕。著卽督令穆圖善等。迅卽進攻。克復此城。其漢南之賊。

與洋縣之賊互殺並可因賊自相擾亂之際乘機蹈釁用閒出奇以圖漢洋之賊鳳縣地方團勇既將兩當竄賊擊退藍屋攻克後自可速行分兵掃蕩留壩等處踞賊漢南軍務迄未得手節經催令劉蓉迅卽由川入陝以資統率該撫軍威重整新募勇營約亦可到諒必不日可以進兵藍二順股匪尚在商南藍斯明所部嚴抗武關兵力尚單曾否分兵往助著卽飭令實力籌勦與豫省留駐荆關之教天印等軍會合速將趙家川黃家塢一帶之賊殄除麟遊餘匪曹克忠何以尚未全行掃蕩亦卽督令趕緊辦理以為雷正綰後路策應甘省甯靈繼陷許久慶昫不見續報恐甯夏滿城亦不可知著多隆阿探查實在是何情形隨時具奏該處回氣尤熾雷正綰之軍必須速克平固轉戰而前以彰捷伐並著飛催陶茂林速將鳳郡料理就緒迅由汧隴進發與雷正綰會合以厚兵力至所請將

留守廬州之石清吉梁美材等七營赴陝助勦及江南兵勢稍紓另撥數營馳赴陝營之處均俟僧格林沁曾國藩等遵籌大局情形覆奏到時再行酌量諭知辦理原摺留中備覽將此由六百里諭令知之又諭多隆阿奏請飭催各省協餉一摺多隆阿辦理陝西賊匪並分軍援應甘省攻勦均在喫緊之際而各營欠餉疊疊不特各軍譁潰堪虞且停兵待餉必將貽誤戎機著官文劉長佑嚴樹森周馥銘張之萬沈桂芬迅將應撥多隆阿軍餉照各該省協濟原數按月源源報解毋令缺乏將此由五百里各諭令知之○豁免陝西華乾郿咸甯長安高陵三原涇陽咸陽大荔鎮安山陽渭南臨潼鄠興平富平醴泉藍田朝邑蒲城華陰武功永壽長武二十五州縣被擾地方新舊額賦並緩徵來年上忙錢糧○緩徵陝西孝義耀潼關三水淳化商南六廳州縣新舊額賦並豁免上年暨本年

道倉糧石○阿巴噶卓哩克圖郡王剛噶爾倫布等三人喀爾喀扎薩克親王達木吹等二人浩齊特扎薩克郡王濟克登噶維張鄂爾多斯扎薩克貝子三齊密都布翁牛特鎮國公永龍扎魯特鎮國公達瓦甯保烏珠穆沁輔國公車林多爾濟蘇尼特輔國公布彥特古斯茂明安扎薩克頭等台吉扎薩克達爾呼於神武門內瞻覲○丙戌諭內閣本日據議政王軍機大臣等接准吏部知會現出

有雲南鹽法道吳惠元告病一缺請旨簡放等語吳惠元自上年八月開簡放雲南鹽法道迄今今年餘尚未到任○因因病率請開缺實屬有心規避吳惠元著卽勒令休致○又諭沈葆楨奏請將貪庸不職之知縣分別革職勒休一摺○江西安遠縣知縣徐德儀居心貪鄙聲名狼藉萬安縣知縣蔡迪康嗜好昏迷丁胥橫恣前署武甯縣試用知縣莊祖基縱容胥役物議沸騰前署金谿縣試用知縣郭

慶熙舉動躁妄不協輿情均著一併革職進賢縣知縣星聯才識昏庸公事廢弛著勒令休致以肅官方○諭議政王軍機大臣等羅惇衍奏劣紳勾通外國勒還鉅款請收回印票以杜後患一摺據稱已故候選道伍崇曜捐輸銀三十二萬兩該紳與咪國要在粵海關索本息銀四十七萬餘兩今該紳已於十月二十四日病歿恐海關原給印票一落於咪夷之手則持券來索又費唇舌且釀事端請

令兩廣總督察看妥辦等語所籌不為無見此項銀兩無論借自何人總以速行歸款為妥著毛鴻賓郭嵩燾毓清查前項銀兩曾否勒捐歸補陸續清還現在尚欠若干能否令伍崇曜子弟自行籌補若干其不敷者官為勸捐清結惟海關印票總以先行收回為最要之著免致咪國執持原券致多饒舌該督等務須妥速籌商豫弭後患原摺著鈔給閱看將此諭令知之○又諭恩慶奏青州旗營

餉米缺乏請飭山東巡撫寬為籌撥一摺據稱該營官兵因糧餉缺乏已將所有物件變賣餉口現在無可折變衣服履穿形同乞丐該處地近海濱入冬以後男婦赴鄉乞食死者甚多請飭山東巡撫將欠放俸餉兵米等項迅速籌撥以蘇民困並請將貽誤兵米之知府懲處等語本日已明降諭旨將青州府知府高鎮摘頂勒解卽著閻敬銘飭令該府迅將去冬欠放米石勒限一箇月埽數解營

並將積欠銀兩米石勒限嚴催如數撥解此後該營應領俸餉米折馬乾兵米等項著該撫寬為籌撥務令源源接濟毋再遲延干咎原摺著鈔給閻敬銘閱看將此諭令知之○又諭前因麟興等奏派員查勘科布多所屬之哈屯河一帶行至庫克烏蘇因路險林雜不能前進當經諭令該大臣揀派妥員探明路徑前往茲據麟興奏稱委派驍騎校瑞成等四員名於九月二十五日啟行十月初七

日據該委員回城稟稱於九月十四日由阿勒坦淖爾烏梁海遊牧查至庫什業莫多吹河地方見有俄人十餘名在彼貿易並無兵隊阻截十八日至海青大壩雪大無路可行請將人馬落入雪內之筆帖式存保鼓勵等語所奏殊未明晰瑞成等係九月二十五日前往查勘何以九月十四日行抵阿勒坦淖爾烏梁海地方又何以十月初七日卽行回城往返如此之速且此次委員業已行至海

青大壩是否由庫克烏蘇經行若已過庫克烏蘇則前次委員所稱路險林雜實屬荒謬自應將該委員據實奏劾乃麟興並未將一路查勘情形詳敘但據瑞成等大雪封山不能前進等詞率行入奏而措詞又多自相矛盾之處可謂糊塗已極著麟興明白回奏疆界重務不得不認真查辦豈可半途而廢轉瞬春融雪霽仍著麟興嚴飭原派之委員瑞成等前往哈屯河查勘明確俾與俄人分界

時得以斟酌定議。儻該委員等託故不前。卽著從嚴參辦。存保並未行至。應行查勘之處。有何微勞足錄。所請賞加五品頂帶著不准行。將此諭令知之。○以督催駐防兵米不力。摘山東知府高鎮頂帶。○以江西官軍勦辦安徽竄匪出力。賞副將韓進春巴圖魯名號。守備董德春花翎千總劉文華等藍翎。餘加銜升敘有差。○以江西青田鋪勦賊出力。賞訓導李香筠等藍翎。餘升敘有差。○予江西

南城陣亡學正劉焜元祭葬世職。○追予江西故道員屈蟠附祀提督饒廷選道員羅澤南廣信府專祠並入都司李棉兆張時雨等章田渡合祠。作為正祀。○丁亥諭內閣。昨據御史孟傳金奏直隸南宮縣辦團紳士二品頂帶候選同知郝來麟獨力捐貲帶團禦賊。捐辦團費約有二萬九千餘兩。該員前在崇厚軍營捐銀一萬二千兩。以道員不論雙單月儘先選用。並賞換花翎。經部覈議銀數不

敷。飭令補交銀七千九百六十兩。今郝來麟辦理團練。又捐如許鉅款。覈與補交銀數尚餘銀二萬一千兩。請旨仍以道員不論雙單月儘先選用。並賞換花翎。如蒙俞允。仍請飭直隸總督查明奏辦。謹將該員辦團禦賊情形及捐貲細數開具清單呈覽。等語。各省辦理團練紳民捐貲出力。經該督撫奏請鼓勵。無不立沛恩施。優加獎敘。其間有未經給獎者。原准言官隨時奏聞。請旨辦理。郝來麟及

其叔郝開周連年捐輸軍餉。疊經分別

賞給舉人翎支官階頂帶。其急公好義久已著聞。並非湮沒未彰者。可比此次捐辦團練經費勦賊出力。孟傳金如有所聞。原不妨奏請飭查。交部覈獎。乃孟傳金輒為該員擅請以道員不論雙單月儘先選用。並賞換花翎。既不俟部臣確覈。復不待外省詳查。僅憑該御史一言。卽欲仰邀俞允試問。有此政體否。且另單所開辦團捐數分毫必載。孟傳金既云

得自訪聞何以計及鎔銖詳悉至於如此難保無輾轉屬託情弊孟傳金不勝御史之任姑從寬免其深究著仍回原衙門行走以示薄懲至郝來麟捐輸團費及禦賊出力之處仍著劉長佑確切查明如應行給予獎勵卽著覈實奏請不得因孟傳金此奏失當稍存成見○諭議政王軍機大臣等張凱嵩奏擊潰橫州股匪現攻黃逆老巢並擒斬蒼梧藤縣土匪安插懷集等處難民各摺片黃逆踰

伏平天寨又遣黨分竄橫州妄冀死灰復燃經張凱嵩派令劉坤一等督軍截擊水陸獲勝擒斬賊匪多名橫州一帶均已廓清勦辦甚屬奮勉惟黃逆負隅阻險李亞得隻身逃遁均難免再事勾結復成巨患亟應乘此聲威督軍勦洗著卽督飭劉坤一等統率全軍併力攻取賊寨務須殲除首惡以淨根株投誠之甘太然等眾仍飭令妥為駕馭潘炳是否殲斃仍著查明具奏另片奏道員蔣澤春

將范亞音之養子梁亞五與范逆家屬在石表山擣巢聚殲罕有漏網藤縣匪首陳超關等經副將唐元芳督勦窮蹙脅從各匪斬陳超關以獻額懇投誠業經唐元芳督該處紳團遣散惟蒼梧藤縣逸盜土匪恐復不少該撫仍當責令蔣澤春唐元芳等實力搜捕卽遣散安置各匪亦隨時令地方文武查察如有依險聚眾復圖嘯聚者卽須嚴密捕拏以清亂源懷集等處難民遣散甚眾該撫擬立法編查妥為綏輯著卽照辦廣西自倡亂以來越時已十餘載今幸漸次蕩平該撫務當通飭所屬招集流亡俾粵民各安耕鑿以期肅清轄境現在該省何處有賊股數大小如何次第勦除之處並著張凱嵩詳查具奏將此由五百里諭令知之○諭土默特貝勒散巴勒諾爾贊前因盜匪白凌阿彌勒僧格逃入土默特放漢旗籍諭令散巴勒諾爾贊等將該二犯拏交熱河都統審辦惟該貝勒現

因年班來京。回旗尚需時日。僕機事稍有洩漏。致該匪等聞風遠颺。則緝獲更行費手。著散巴勒諾爾贊。卽日起身回旗。責成該貝勒會同教漢扎薩克郡王達維多克丹等。懍遵前旨。迅將白凌阿。彌勒僧格。拏獲解交熱河都統訊辦。若敢任意容隱。縱盜養奸。或稍有漏洩。致令遠颺。必將該貝勒等治罪。決不寬貸。○引見候選知縣端木埰。得旨著以內閣中書卽補。○督辦河南團練大臣毛昶熙奏。

馳抵汝甯。勦辦皖捻。得旨著卽嚴飭王文行等軍速將鮑進朝寨攻克。一面調度各軍。由談圩以次埽蕩。將著名捻首悉數殲除。皖捻及陳大澹等竄入桐柏交界。尤須嚴飭尹嘉賓等兜截殲擒。勿任一名漏網。切不可徒託空言。毫無實效。○改山東東昌府知府為要缺。由外揀員題補。仍兼補河工人員。從巡撫閻敬銘請也。○予山東兗州傷亡遊擊焦其洲祭葬世職。○旌表守正捐軀山東歷城縣

民婦孫張氏。○戊子諭內閣。理藩院奏蒙古各扎薩克旗地方。拏獲搶劫盜案。請仍遵舊章辦理一摺。前因各省地方官捕務懈弛。劫案繁興。當經通諭各直省將軍督撫等。飭所屬地方明白曉示。如遇搶劫盜匪。准兵役等格殺勿論。茲據理藩院奏稱。蒙古各扎薩克旗與內地州縣有閒。如遇搶劫盜匪一體照依內地章程。准其格殺勿論。並拏獲者立卽訊明正法。恐辦理未能詳慎。或致妄殺無辜。

請旨仍遵舊章辦理等語。所陳自係實在情形。嗣後蒙古各扎薩克旗地方。緝捕盜賊及拏獲搶劫重案。著仍遵照舊章分別辦理。至各該扎薩克旗與內地毗連地方。遇有搶劫盜匪。向係解交州縣官勘辦。近聞不肖官吏。於各該旗解到案犯時。每致多方需索。甚至得賄賣放。該蒙古旗官弁畏其抑勒。或將劫案隱匿不報。以致盜風日熾。殊屬不成事體。並著各將軍都統督撫等。嚴飭毗連蒙古各

扎薩克旗之沿邊各廳州縣遇有各該旗解
交刦盜案件卽行分別勘詳辦理毋得任令
吏胥橫索致案牘或有稽壓如查有地方官
吏仍蹈從前惡習恣意勒索卽著指名從嚴
叅辦毋稍徇隱以清盜源○又諭嚴樹森奏
甄別州縣等官請旨分別革職休致改補一
摺湖北保升同知直隸州知州鍾祥縣知縣
長壽縣浮鄆謬輿論沸騰同知銜署公安縣
知縣張吉徵猥瑣卑劣聲昭著均著卽行
革職永不敘用同知銜宜都縣知縣劉鳴珂
才識迂庸不知振作保康縣知縣方兆科老
弱多病聲名平常揀發知州英福氣情神昏
難期整飭均著勒令休致同知銜署江夏縣
事黃岡縣知縣鄭慶華才欠開展緝捕不勤
難勝繁劇著撤任開缺遇有相當簡缺酌量
補用○又諭張之萬奏哨官藏留婦女訊明
正法並請將築營遲緩之遊擊等弁分別懲
處等語河南帶勇哨官守備蘇大起於賊中

救出婦女擅敢私自藏留經營官羅輔臣飭
令放回復敢抗辯不遵實屬目無法紀業經
張之萬於訊明後卽行正法足以肅軍律而
儆效尤遊擊蔣希夷所部築營遲緩著摘去
頂帶千總蔣心正恒怯無能著卽行革職以
示懲儆○又諭雲南提督福陞前有旨疊諭
飭赴昭通駐紮本日據駱秉章奏該提督現
駐川省惟以索支養廉為事詢以籌辦滇省
事宜所言一無可採且違旨飭其前赴昭通
而該員輒謂雖駐川省卽可作為已赴昭通
等語謬妄糊塗至於此極提督膺統兵重寄
似此闊茸無能之輩必致貽誤事機且該員
以辦理軍務大員輒敢自便身圖意存欺飾
尤屬可惡福陞著卽行革職以示懲儆○諭
議政王軍機大臣等前因理藩院奏匪犯綽
金汰那木薩賚等聚眾訛索燒毀馬甲巴育
泰房屋搶刦章京哲克通額等驢馬等情諭
令麒麟慶查明將該犯等一併緝拏茲據理藩

院奏稱據塔布囊察固特古爾圖等呈稱東土默特旗蒙匪綽金汰等聚人至數千名之多執攜鳥槍器械抗拒官兵並將塔布囊庫納西哩殺斃等情該蒙匪等始以老人會名目斂錢搶物嗣復糾合多人持械逞兇藐法抗官若不趕緊撲捕恐將來愈聚愈眾勢必釀成巨患除綽金汰那木薩齊二犯業已自行投案現交該都統訊辦外其餘各犯著麒慶會同卓索圖盟長等速派官兵前往該旗

按名實力查拏嚴行懲辦毋任一名漏網並將餘黨解散以靖地方而安善良原摺著鈔給閱看將此諭令知之○又諭張之萬奏毫捻避兵遁入山內皖捻被勒竄往桐柏各一摺張總愚竄走宛南前經寄諭僧格林沁飭令蘇克金馬隊與張之萬所部張曜各軍會合進剿茲據張之萬奏稱該撫進軍汝州賊知官兵已由襄郟而前旋由魯山退回南召縣境之李青店等處張曜等軍連日於板山

坪追擊獲勝葛承霖之軍亦進逼至留山堡與賊接仗各有斬擒惟李青店白土岡等處在南召迤西山深徑窄非得步隊偏賊出險則騎兵終無用武之地卽著張之萬嚴督張曜葛承霖等軍各由西北兩面併力夾擊偏賊東趨地勢較寬之處僧格林沁仍遵前旨飭令蘇克金帶領馬隊豫備卽由魯山抄進與張之萬所部諸軍會合兜擊此賊前有仍圖西北竄擾秦疆之意其四棵樹地方路由

嵩縣直達河陝防剿尤關緊要張之萬現飭親軍由魯山進紮務須實力辦理並飭葛承霖等相楚各勇力爭李青店西北之險卽可斬關奪隘與張曜等合力進逼使賊不得依山負固以老我師至汝南一帶賊由尖山竄往桐柏與毛昶熙日前所奏略同其正陽土匪余瞎子等因捻逆遠颺其勢已孤軌敢向王文行等陷降王文行等嚴行拒絕卽將該匪寨乘機攻破勒撫兼施所辦尚好著張之

萬卽飭王文行等軍將談家圍賊寨乘勢進攻盡殲醜類並著毛昶熙嚴督黃貴誠尹嘉賓等將竄往桐柏之捻股密速剿辦迅殄游氛毋令匪等得以暇息再行滋蔓蒙亳等處善後有無就緒僧格林沁卽行馳奏將此由六百里各諭令知之○又諭張集馨奏清查西同二府叛絕各產辦理大概情形一摺據稱西同兩府回匪聚眾倡亂偏地蹂躪村鎮為墟經多隆阿督兵勦洗將東路肅清所有各處叛產例應入官卽使偶有逆回逸出悔罪投誠亦斷無給還叛產之理且漢回仇隙已深若令叛回仍歸故土與漢民共井同村勢必復起干戈致令後患無窮等語所奏自係實在情形惟該處逆匪未被勦滅者為數尚恐不少將來官兵凱撤後或不免有陸續潛回舊土者若概予准其再入本境又恐貽患鄰封其應如何籌辦俾兩無窒礙之處著劉蓉張集馨妥為經理所有西同兩府及邠

乾兩州叛產統計約在萬頃以上此項地畝與其招佃認墾不如作為屯田可以絕回民之覬覦而永遠相安兼可節省兵餉寓兵於農如能作為旗兵之產尤屬合宜一切辦理章程均著劉蓉張集馨詳細妥籌奏明辦理其餘未經查出各叛產均著張集馨督飭委員速行清查至西同鳳三府並乾邠兩州所屬被擾地方赤地千里漢民慘遭焚殺戶口完全者甚少其逃亡在外者固宜招集歸來令其認領舊產各安生業如果戶絕丁亡卽應將田產歸官張集馨務當揀派公正委員認真清查毋任官吏影射蒙混致滋流弊將此諭知劉蓉並傳諭張集馨知之○又諭雲南提督福陞謬妄糊塗本日已明降諭旨將其革職並授唐友耕為雲南提督矣滇省全局糜爛將來籌辦進剿機宜非借川省兵力無從措手唐友耕在川帶兵向稱得力本日將其簡放正以該員近在川省可與駱秉章

賈洪詔等籌商進取之方為後來規復雲南
地步著駱秉章於接奉此旨後即傳知該員
令其馳赴昭通駐紮會商賈洪詔將滇省進
兵事宜豫籌布置其昭通練頭李芝順現在
聚眾滋事並即設法彈壓解散唐友耕舊隸
駱秉章麾下該督尤當飭令奮勉圖功以副
委任一切勦辦機宜亦即詳為指示該提督
現在駐紮何處並著駱秉章迅速揀員接替
以重防務將此由五百里諭令知之○以故

一等公恆山弟嵩山三等承恩公繼善于肇
馨三等子永恰布子雙瑞二等男桂林子治
和三等男耆紳子托雲保襲爵○以都察院
左都御史載齡為兵部尚書工部右侍郎全
慶為都察院左都御史調盛京戶部侍郎和
潤為工部右侍郎管錢法堂事○以內閣學
士寶珣為盛京戶部侍郎兼管奉天府府尹
事毓祿署兵部左侍郎○以理藩院尚書存
誠兼鑲白旗漢軍都統○以四川重慶鎮總

兵官唐友耕為雲南提督○以政績優異擢
湖北知州牟嗣龍知縣方大澍以知府用○
予故兵部尚書愛仁祭葬諡清恪○予河南
南召陣亡千總廖尚烈祭葬世職加等○予
江蘇贛榆陽湖等縣殉難主簿趙振綱等紳
民婦女二千二百九十二員名口分別旌卹
如例○續修廣東駐防旗營兵房從總督毛
鴻賓等請也○蠲緩河南鄭禹睢許鄆裕祥
符陳留杞通許尉氏洧川鄆陵中牟滎陽滎

澤沁水商邱甯陵鹿邑夏邑永城虞城柘城
淮甯西華項城沈邱太康扶溝臨潁襄城鄆
城安陽湯陰臨漳林內黃武安涉汲新鄉獲
嘉淇輝延津濬滑封邱考城河內濟源原武
修武武陟孟溫陽武洛陽偃師鞏登封新安
靈寶南陽鎮平泌陽新野葉正陽上蔡西平
遂平確山固始七十五州縣被旱被水被擾
地方新舊額賦有差○己丑命戶部尚書寶
璽為

實錄館總裁官刑部左侍郎靈桂為副總裁官。

○命理藩院右侍郎額勒和布為國史館副總裁官。○命工部尚書文祥管理藩院事。○

調鑲黃旗蒙古副都統載容為鑲白旗滿洲

副都統以已革直隸總督文煜為鑲黃旗蒙

古副都統乾清門侍衛照祥為正紅旗蒙古

副都統委散秩大臣文壽署鑲紅旗蒙古副

都統正黃旗護軍參領毓福署正黃旗漢軍

副都統正紅旗護軍參領海英署鑲白旗漢

軍副都統。○以記名總兵官曾克勝為四川

重慶鎮總兵官。○補行同治元年大計江西

卓異官十一員不謹官二員浮躁官二員罷

輟官一員才力不及官一員福建卓異官八

員不謹官二員浮躁官一員才力不及官三

員年老官一員有疾官一員湖北卓異官五

員浮躁官一員年老官三員有疾官一員湖

南卓異官八員不謹官一員浮躁官二員罷

輟官三員才力不及官二員年老官一員山

西卓異官十二員不謹官一員浮躁官三員

才力不及官一員四川卓異官十三員不謹

官十二員浮躁官六員罷輟官四員才力不

及官一員貴州卓異官四員不謹官三員浮

躁官一員廣東卓異官十員不謹官二員浮

躁官二員罷輟官四員才力不及官二員年

老官十一員有疾官三員廣西卓異官九員

不謹官二員浮躁官二員罷輟官二員才力

不及官三員有疾官二員東河卓異官一員

年老官一員有疾官一員熱河卓異官一員

分別議敘處分如例。○賑吉林甯古塔等處

被水旗民並給房屋修費銀豁免被災較重

地方新舊銀穀緩徵各項額賦有差。○庚寅

諭內閣國子監司業馬壽金奏請慎簡學官

以崇教化一摺自來化民成俗必資學校之

振興上年十二月間曾明降諭旨令各省學

政督率各學教官讀書立品訓導諸生並隨

時宣講

聖諭以期經正民興共臻上理茲據馬壽金奏稱近來地方大吏於州縣之賢不肖尚能據實薦劾而於教職一官則概未齒及老邁戀棧而過示優容年少輕浮而不加甄劾以致為是官者類廢是甘不知振作請飭各省督撫詳加考察至宣講

聖諭尤為化導之本並請飭令學臣實力奉行等語所奏不為無見方今大江南北漸就肅清一切撫綏安輯疊經降旨責成地方官吏

妥為辦理而教養兼施使百姓革面洗心不致再為教匪邪說所煽惑學校之設尤關緊要著各省督撫學政於通省學官詳加考察罷其老邁黜其輕浮其品學兼優循循善誘者務當隨時獎勵以風其餘並著各省學臣督飭教官實力宣講

聖諭考其勤惰分別勸懲庶幾經明行修邪惡不作至書院義學亦培植人材之一助乃近來風氣延請者多徇私情為師者止圖修脯

陋習相沿牢不可破並著各省地方官力除積弊毋徒遷就官紳務各延請耆碩以副敦崇實學至意漕運總督吳棠奏總兵陳國瑞因病乞假並派員暫統所部得旨陳國瑞在山東安徽勦賊最為出力現在因病回浦著賞假兩箇月安心調理所部兵勇吳棠已派郭寶昌等暫行統帶宜飭令勤加操演以備調遣仍傳諭陳國瑞妥速醫治一俟痊愈即行接統所部駐紮徐州以資鎮撫○以兵

部尚書載齡管戶部三庫事○予安徽蒙城等處傷亡參將李開春等祭葬世職○旌表守正捐軀直隸磁州民婦蕭趙氏○辛卯諭議政王軍機大臣等譚廷襄奏統籌黃河下游現行地勢擬請濬支渠以減漲水培土埝以衛農田一摺據稱自咸豐五年河南蘭陽汎北岸潰決由直隸之長垣東明開州至山東之濮州范縣壽張橫穿運河過張秋鎮入大清河而直抵利津海口其間經行之數十

州縣被災輕重不等大約張秋以上地勢平衍本無收束張秋以下循順歸槽又苦於狹不能容旁溢為害本年尤甚欲求下游之永奠必須開支渠以減漲水查徒駭河尚寬深馬頰則大半淤淺必將此二河設法疏濬再將各缺口逐一堵合並將河流刷及城垣之處築壩攔護至張秋以上若能相地築隄束水自是一勞永逸之法惟工繁費鉅力有不及應先將開濮兩州之金隄趕緊堵築其濮

范與荷澤比鄰之史家隄亦一併堵築並將舊有土埝加高培厚擇緊要處設法接修而後逐漸布置等語所籌自係實在情形著劉長佑閻敬銘按照該署河督所奏嚴飭該管道府督令各州縣趁此冬春水小源微將可以施工之處趕緊勸令分投興辦以資保衛並會同譚廷襄妥籌辦理不得遷延觀望致直東一帶居民日久不能安業別滋事端原摺著鈔給閱看將此各諭令知之○又諭沈

桂芬奏奉調楚勇遵旨仍留晉防並陳籌防戒備情形一摺晉省防河楚勇既據沈桂芬覆奏尚未起程已遵旨仍駐蒲防兵力自可敷用訥欽所帶兵勇二千即可毋庸酌留晉省訥欽前奏已於十二日自保定起程馳赴宣化即著迅速前進點齊所調各兵趕赴朔平歸化一帶確探賊蹤妥籌勦辦並著劉長佑將該署提督一軍糧餉軍火源源接濟沈桂芬所陳晉省西南防堵情形及西北口外

邊防籌畫尚屬周密即照該署撫所奏辦理至舉辦團練最易有名無實務須官為經理督飭公正紳士認真講求以資捍衛沈桂芬摺著鈔給劉長佑訥欽閱看將此諭令知之○補鑄福建漳州鎮總兵官關防從代理總督徐宗幹請也○准前太常寺卿原任工部尚書廖鴻荃前光祿寺卿楊慶琛重與鹿鳴宴賞廖鴻荃太子少保楊慶琛二品頂帶○緩徵山東臨清陵館陶邱朝城曹霑化德平

八州縣暨屯坐各衛被水被蟲被擾地方節年額賦並學租鹽課有差）壬辰諭議政王軍機大臣等庶子夏同善奏請籌撫恤難民一摺東南新復地方所有婦女及老弱廢疾窮民湯火餘生顛連困苦卽予以田畝亦不能耕作謀生閱該庶子所奏情形殊堪矜憫著曾國藩左宗棠李鴻章加意撫恤飭令所屬各地方官多設收養處所籍其姓氏里居榜示俾其親屬得以認領至收養之資酌撥

正款是否可行或先行借撥正款籌辦一面倡率勸捐或卽行倡捐辦理之處均由該督撫等酌量妥籌總期於難民中之婦女及老弱廢疾者得邀撫恤不至甫離水火仍復流亡用副軫念災黎至意該督撫等籌定辦理情形卽著隨時遇便馳奏原摺著鈔給閱看將此各諭令知之）又諭曾國藩奏接奉疊次諭旨覆陳一摺所稱李世忠蔣凝學在壽州正陽等處啟釁情節及鮑超兵力止能力

扼東壩暫難分攻廣德成大吉石清吉兩軍已由官文調赴鄂省防剿其餘未可輕動各條著卽照該督所擬妥籌辦理惟蘇常一帶軍情正在得手賊勢趨重丹句金陵意圖奪圍上窺馮子材兵力苦單亟盼鮑超之軍會攻句容而鮑超力扼東壩旣不能與之會攻又不能分攻廣德止是相持局面日久終慮變生該大臣仍當於慎重之中力求出奇制勝之策方為妥善陝甘逆氛甚張多隆阿亟

須添調兵勇分投勦洗前據該將軍奏以淮北現就肅清懇將留守廬州之石清吉梁美材所部七營調赴陝省助剿如江南兵勢稍紓並懇另撥數營馳往以厚兵力等語其需兵情形非常緊迫今據奏石清吉等營已由官文調赴鄂省著該大臣卽咨商官文先其所急酌度辦理諒該大臣等均不至有畛域之見也摺片二件均著留中所有李世忠蔣凝學啟釁各節應俟僧格林沁喬松年覆奏

到時再降諭旨李世忠如不敢往見僧格林沁當仍遵前旨調至軍營諭令遣散部眾交還城池退出釐卡停給餉鹽以期消患無形如招而不至或至而不從卽著僧格林沁妥籌辦法不可遷就姑息一面迅速奏聞將此由五百里密諭知之○又諭慶昫常陞秦守城鉛藥不足請飭籌撥解等情形一摺當茲回逆兇鋒鴟張甯夏滿城危急亟須寬籌守備之具而軍火尤屬急需卽著沈桂芬在於

殺虎口一帶營頭趕緊籌撥火藥五千斤烘藥五千斤鉛子六千二百斤火繩五千丈剋期揀派妥員解往甯夏滿城備用其應由草地行走抑或可由內地取道前往卽由沈桂芬偵查確實酌量情形辦理總期此項軍火得以迅速解到甯夏滿城俾應急需無稍延誤該撫前奏晉省防河楚勇業已遵旨留防當經寄諭劉長佑訥欽飭令迅將直省派撥官兵卽由訥欽帶領速由歸朔一路進發現

在甯夏滿城待援孔急訥欽接奉前旨務當星速帶兵前進行抵歸綏一帶偵察甘省軍情力圖援救慶昫仍當激勵城中軍民竭力固守以待援濟並著行知阿拉善旗就近先籌接濟糧餉軍食等項該王旗向有鹽池水利生聚頗殷此時如可接濟地與甯夏毗連運解尚能應急將來軍餉解到或事平之後籌款歸還諒該王旗力有可及必能踴躍急公力籌協濟也雲騎尉連惠攜眷潛逃著卽

革職以昭炯戒並著慶昫等嚴拏務獲處以軍法慶昫連次所報軍情均係摺差齟齬是否驛路不通故由差弁專齎之處著該將軍等據實奏聞如驛路尚可通行此等軍情要件仍應由驛馳遞奏報以期迅速而符定制將此由六百里各諭令知之○以江蘇江都縣捐輸軍餉永廣學額六名○以河南捐輸軍餉永廣開封府學額四名鄧州一名○以河南總兵官陳祿興等藝勇糧永廣太康縣

學額三名○以奉天昌圖廳緝捕出力賞還
佐領常喜同知崇連頂翎○以江西湖口安
徽青陽等城防勦出力賞副將彭永清喻賢
能陶日昇胡大勝參將張鼎峰劉星翥鄒紹
益巴圖魯名號參將劉高陞等花翎守備鄭
芬榮等藍翎餘加銜升敘開復有差○以甘
肅甯夏勦匪出力賞佐領薩英額協領銜予
陣亡佐領海郎阿曉騎校伊勒哈春祭葬世
職加等雅爾杭阿祭葬世職兵丁賞卹如例
○予故山東長清縣知縣舒化氏署金鄉縣
知縣吳楷入祀名宦祠從巡撫譚廷襄請也
○予福建故翰林院編修趙在田山東故四
川南江縣知縣劉伯蘊魚臺縣訓導楊玉相
湖南故甘肅甯朔縣知縣周錫溥四川故鄆
縣舉人楊大舟入祀鄉賢祠從總督駱秉章
巡撫徐宗幹毛鴻賓譚廷襄閻敬銘請也○
展緩兩淮富安安豐梁垛東臺何垛丁谿草
堰劉莊伍祐新興廟灣板浦中正臨興十四

場被水被風被潮寔地節年折價錢糧有差

大清穆宗繼天開運受中居正保大定功聖智
誠孝信敏恭寬毅皇帝實錄卷之八十八

大清穆宗繼天開運受中居正保大定功聖智
誠孝信敏恭寬毅皇帝實錄卷之八十九

監修此書者是日籍赴居法官太子大傳文部閣顧問中嶋隆次實政學士精敏敏事上諭事件感念略備撰載武英大學士軍機大臣陳璧瑞潘祖蔭實

[illegible]

正紅旗滿洲都統管理王無尤豫寺事務內大臣額爾公軍功加一級尋帶加六級紀錄十二次在宗室裁撤親禁自願即日議起居官太子太傅翰林院掌院

學生楊慶松於上週事件被罰之新聞後，於原班繼續升大學士兵部尚書兼職大臣兼督學司管理戶部三庫事務國子監事務內九級軍功五級儒學

加六銀貳錢十九文^上 沈姓發賣本朝服衣冠是據官廳上明署權部^上的書理之部三庫事務^上帶和五版記錄十二文^上 檢桐等奉

秋分

同治二年癸亥十二月癸巳諭內閣德興阿

奏請將發遣大員改發軍臺。責令呈交臺費。買補馬匹等語。已革江南河道總督庚長。係因失陷地方。從寬發遣之員。情罪較重。上年經瑛榮咨行刑部。奏請查辦。援免復經勝保奏請留營效力。疊經降旨駁斥。德興阿何得。以買補馬匹為詞。再為乞恩。所請著不准行。仍著懷遵前旨。卽行發往新疆效力贖罪。毋許再有逗遛。○諭議政王軍機大臣等。光祿寺少卿鄭錫瀛奏。請設屯田養兵。以節經費。

一摺。據稱各直省及東三省等處駐防綠營滿漢兵丁七十一萬九千餘名。歲需餉銀一千六七百萬餘兩。京城各旗營滿漢額兵十五萬一千餘名。需餉五百餘萬兩。尚不在此數內。國家歲入之款。約計四千數百萬兩。兵餉一項。已用其半。請將被擾省分。於城邑克復後。查明業戶已絕荒田。圈為官地。募民屯種。僉以為兵。並酌給駐防滿兵田畝。令其收取田租。抵作兵餉。計江浙皖陝甘等省兵餉。每歲可節省數百萬兩。並請將俸薪等項。及馬乾銀兩。一併酌給荒田。令其認墾招佃。抵作領款等語。國家歲出各款。以兵餉為最鉅。現在江浙皖蘇浙陝甘各省。被擾較重。各區戶口稀少。多有無主閒田。果能開設屯田。所節兵餉。為數甚鉅。於經費不無裨益。著兩江閩浙陝甘各總督。並江蘇安徽浙江陝西各巡撫。各就地方情形。分別酌擬章程。妥議具奏。並將業經克復地方。先行辦理。如實係無主

荒田。即可募民屯種。並須選派廉明委員。認真清查。毋任蒙混騷擾。至摺內所陳山東河南湖北湖南江西及川黔兩廣等省各屬被擾地方。有無閒田。可以開屯之處。均著各該省督撫確切查明。各就地方情形。分別酌度辦理。不得以創始為難。藉詞推委。尤不可假手吏胥。強奪民間有主之田。致令紛紛擾害。另片奏請飭將山東等省查出叛產。給予兵丁屯田。著山東陝西各巡撫妥為經理。並著

皖豫黔粵各督撫。將捻匪土匪各叛產。一律查辦。甘肅回匪叛產。俟軍務完竣後。由該督查明辦理。至臺灣營制。向由內地營兵換班戍守。將來地方肅清。所有查出叛產。應如何變通營制。開設屯田之處。著閩省督撫體察情形辦理。原摺片各一件。均著鈔給閱看。將此各諭令知之。○又諭御史裘德俊奏直隸善後章程。亟宜抽撥團丁訓練一摺。團練之舉。本屬有治人無治法。行之不善。則東豫皆

其前鑒。況抽練鄉兵。若非賢良牧令。恩威並用。駕馭有方。使權不下移。而民無擾累。則流弊更不可勝言。設遇不肖州縣。藉端苛索。抽丁派費。吏胥因緣為奸。上下成思中飽。小民已不聊生。加以每縣聚集百餘人。游手無著。恃強陵弱。擾害鄉閭。甚或聚眾把持。養成尾大不掉之勢。一有亂萌。響應尤易。均不可不遠慮及之。著劉長佑按照所奏各情。細心酌覈。就地方情形。權其利弊。是否可行。如有窒礙之處。亦即據實奏聞。朝廷於科道條陳。原無成見。惟在該督妥為斟酌辦理可也。原摺著鈔給閱看。將此諭令知之。○又諭恩麟奏

陝西髮逆回匪。紛竄甘境。請飭陶茂林馳赴秦州。多隆阿分兵援甘。各摺片。漢南一帶。徧地賊氛。沔縣略陽。尤為髮逆淵藪。疊撲徽縣。兩當各境內。均經該地方官督團擊敗。其郿縣一股。由鳳縣分竄徽縣。兩當者。亦經該城文武激勵兵團擊退。至涇州所屬之崇信靈

臺均有回匪巢穴。與陝西邠州鳳翔賊匪聲息相通。現在鳳翔回匪紛竄甘省。鹽固匪徒分擾會甯靖遠。另股賊匪潛竄慶陽後路。將環縣所屬之紅德城攻陷。恩麟請飭陶茂林就近馳赴秦州援應。多隆阿分兵援剿。並令四川援兵趕緊赴甘之處。自係為軍情緊要起見。惟陶茂林一軍。先須將陝省汧隴麟遊及甘省靈臺崇鎮等處各賊剿洗。與雷正綰合取平涼。由固原鹽茶轉戰而北。進取甯靈。勢難徑赴秦州。恩麟惟當就現有兵力。將會靖秦階各要隘分布。並飭該地方文武聯絡鄉團。嚴密防剿。以顧東南兩路。毋得專待援師。致誤事機。陝省南防興漢北防甯夏。東南之商南潼關亦復兼顧。蓋屋踞匪尚未攻克。勢難再分大支勁旅。繞赴甘省西路。為兩面夾擊之舉。惟陶茂林一軍久駐麟遊。日久尚未蒞事。現在勦辦情形。究竟若何。著多隆阿迅飭該提督將麟遊一帶賊匪趕緊掃除。進

攻平涼。毋稍遲緩。紅德城踞賊即著速飭曹克忠會同甘省之師。力籌攻克。以清慶陽後路。陝省防剿緊要。多隆阿未能赴甘。前經諭令雷正綰於到甘後。各營將士均歸該提督節制。該提督務當統籌全局。督飭諸軍。速將各路賊匪掃蕩。毋許遷延觀望。並著熙麟籌辦糧臺。供支軍火。毋令缺乏。甯夏漢城失守。已疊據慶昫熙麟奏報。恩麟所稱漢團王添德率眾燒殺回莊。未必即係侯雲登所遣。恐回匪藉詞滋事。亦未可定。該匪業已踞城戕官。斷難再行議撫。前已諭令訥欽帶直隸官兵二千。由朔平歸綏相機進發。以為甯夏援師。並由山東調撥楚勇赴陝。由多隆阿酌量派赴定邊。以資防剿。川省官兵現由劉蓉統率。由褒斜一路進剿漢南。恐亦未能撥赴甘省。劉蓉入陝後。如漢南軍務迅即蕩平。可以分顧甘省。即由熙麟恩麟與該撫籌商調撥可也。將此由六百里諭知多隆阿熙麟雷正

綰。並傳諭恩麟知之。○又諭總理各國事務衙門奏詳陳辦理俄國分界委曲情形一摺。據稱常清等疊次奏報俄夷闖卡撲營。餉缺難支。明誼所奏亦以常清所稱餉缺難支。均係實情。如俄國遣使復來。當與明緒等酌其輕重。免圖收束。此次奏報。則稱西界事宜已由總理各國事務衙門准照議單辦理。並稱伊犁已獲勝仗。似易轉圜。與前此兩害相形。酌其輕重等詞不符等語。夷務之壞皆因從前內外臣工互相推諉。近來時局艱難。中外臣工豈可再蹈故轍。若各存諉卸。且於奏陳措內隱約其詞。豫為卸責地步。設因此延閣。別生枝節。致成決裂。益難收拾。且地隔數千里。或萬里之遙。亦難悉由都中懸揣。即將來烏梁海等眾。哈薩克布魯特等部。作何撫慰安置。亦須由該將軍等躬親其事之時。就近酌度情事辦理。伊犁偶獲小勝。未必可恃。著明誼等於會議時。即就當時情形。徑行酌辦。

不得游移瞻顧。動輒咨商總理衙門。以致貽誤事機。如果能挽回一二於大局不無裨益。斷不可意圖卸責。將就了事。原摺著鈔給閱看。將此由五百里各諭令知之。○甲午上復詣

大高殿祈雪壇行禮。○遣恭親王奕訢恭祀

天神壇。惇親王奕誼恭祀

地祇壇。肅親王華豐恭祀

太歲壇。鍾郡王奕詒詣

時應宮。孚郡王奕譞詣

昭顯廟。禮親王世鐸詣

宣仁廟。睿親王仁壽詣

凝和廟。拈香。○諭內閣御史周恆祺奏州縣失守城池。請先行撤任查辦等語。州縣失守城池。處分綦重。各督撫或一時無暇查辦。往往有遲至年餘始行辦理者。在該州縣以失守人員。在任候議。既已措置乖謬。安望其奮發有為。且豫知其終必離任。即不免公事廢

弛任意侵漁。以為日後罷官地步。地方業經殘破。災黎更受剝削。其害曷可勝言。嗣後各該督撫如遇有賊匪竄擾之處。萬一城池有失。應行查辦。卽先將該州縣一面撤任查叅。一面派員接署。不得仍蹈從前顛預延閣積習。以重地方而肅吏治。○又諭前因穆騰阿。伊昌阿奏。接據瑛榮咨稱。旗丁多奎逃後。被獲。訊有通賊情事。並指出斥革閒散德哩布。訥爾金等。均係投賊。惟所供情節。種種支離。

請飭撫臣覆訊等語。當經諭令陝西巡撫嚴訊確情。覈實辦理。並將隱匿不報之協領訥爾吉春等。一併交部議處。茲據張集馨奏。提集人證。逐層研鞫。德哩布等均係幼童。德哩布卽元兒。因出城檢麥。被勇丁疑賊拷打。偏認通匪。其所供賊在三招偷竄地道等詞。查看實無其事。訥爾金卽豬娃。因乘空出城。被勇捉獲。令與德哩布同認奸細。並無確實證據。多奎亦係被拏。偏供所稱伊堂兄多福於

上年四月從賊一節。查多福本年五月間曠班斥責出城。糴麥。不知下落。斷無於上年四月間先期從賊之理。其為年穉膽小。畏刑妄供。尤無疑義。至德哩布等及多福逃走日期。均經該管官呈報有案。並未隱匿。請分別釋放。開復處分各等語。德哩布。訥爾金。多奎。旣訊無通賊等情。著一併卽行釋放。交各佐領嚴加管束。部議降調之協領訥爾吉春。德營佐領伍忠。額多。鑾布。均著開復原叅處分。以

昭平允。穆騰阿等。接據瑛榮咨查。並不確查。咨覆。亦不待審明。定招。會詳。叅辦。輒卽先行入奏。辦理實屬麤率。除瑛榮業經革職發遣。無庸議外。穆騰阿。伊昌阿。均著交部議處。其妄拏無辜之勇丁。並著張集馨查明從嚴懲辦。尋兵部議。穆騰阿。伊昌阿。均降一級留任。得旨准其抵銷。○諭議政王。軍機大臣等。有人奏倉務向有影射把持之人。雖例禁褻嚴。而此去彼來。漸有牢不可破之勢。此項人一

日不除。倉弊卽一日不清。另片奏。風聞海運倉有張姓卽張四。左姓卽唐六。把持倉務。影射辦事。請飭查拏各等語。倉儲重地。豈容此輩作奸漁利。百弊叢生。著步軍統領衙門順天府五城一體訪拏。以除倉蠹。而重積儲。至所稱張四。唐六。於官員領秋季俸米多。方勒捐。猶復兌土攪沙。尅減斛面。雖經逾限。未放之粟甚多。種種舞弊。尤難姑容。並著步軍統領衙門於拏獲該犯等後。解交刑部嚴訊。確

情按律定擬。該監督有無扶同蒙混舞弊情事。著鍾岱。宋晉。確切查明。據實具奏。其逾限未放俸米。並著查明趕緊開放。○又諭李鴻章奏。克復嘉善縣城。及常州近日軍情各摺片。江蘇官軍。自連復平乍海鹽。惟嘉善一城。尚為嘉興東面之蔽。此次該降酋率眾投誠。藩籬盡撤。自應乘勝進規。嘉興以掣抗湖各賊之勢。卽著李鴻章督飭潘鼎新。劉秉璋等。相機攻取。毋稍疏虞。左宗棠近日久無奏報。

不知有何布置。現在滬軍與浙軍聲息漸通。如須與浙軍會合攻勦之處。著該撫卽行飛催。並將浙省軍情。迅速具奏。常州踞逆陳坤書。現又糾合漳然各逆。圍攻奔牛營盤。圖抄劉銘傳各營之後。雖經官軍分投迎勦。大獲奇捷。而奔牛之圍未解。賊援亦未全退。亟宜悉破羣賊。以期漸次得手。李鴻章已調楊鼎勳六營。況文榜兩營。赴常協助防勦。並派程學啟馳往策應。所籌均屬周密。卽著督率各

軍迅解重圍。攻克常郡。不得稍涉大意。另摺奏減成酌徵冬漕。統共起運漕白正耗等米十二萬二百餘石。隨給沙船耗米九千八百三十餘石。飭令一律收齊。仍議由海運津以資便捷等語。李鴻章於新復地方。卽能酌量情形。籌畫天庾正供。具見辦事認真。深堪嘉尚。又片奏松太等屬減價折徵。酌定每石收足制錢六千四百五十文。一切公用均在其內。由官買米起運等語。均照所請妥速辦理。

將此由六百里諭令知之○守護

東陵貝勒奕助等奏

定陵應種樹株已派員豫行採覓屆時敬謹移種得旨上程處移知數目著奕助等遵照成案先行敬謹採覓毋稍延緩○三口通商大臣崇厚奏天津府地方於本月十九日得雪盈寸得旨京師是日得雪尚未及寸惟有齋心默禱仰祈

昊天垂佑渥沛祥霽也○以收復浙江嘉善縣

城賞投誠賊目陳占榜等職銜有差○喀爾喀扎薩克貝勒錫里巴扎爾扎布等十人土爾扈特郡王凌扎棟魯布阿拉善鎮國公沙克都爾扎布察哈爾扎薩克頭等台吉瑪爾清津布等六人喀喇沁扎薩克公銜頭等塔布囊烏凌阿等二人於神武門外瞻觀○乙未

上御撫辰殿大幄次賜蒙古王貝子公額駙台吉暨呼圖克圖等宴並賞賚有差○諭議政

王軍機大臣等馮子材等奏鎮防近日軍情暨揚營兵勇來鎮駐紮日期各摺片南路各股悍賊遁回丹句各巢負隅不出馮子材等現飭張文德等將前敵各營深溝高壘以防衝突自可穩固無虞至圍攻奔牛營盤之賊昨據李鴻章奏官軍奮力迎擊已獲大捷重圍指日可解惟該逆一經敗潰勢必鉅而走險紛竄旁趨鎮城尤當其衝馮子材等惟當督同內外將弁隨時戒嚴相機進取不得稍涉大意揚防派出之遊擊鄭啟貴等現已屯紮丹徒鎮一帶並著飭令實力扼紮毋稍疏虞田宗揚現丁母憂懇請回籍守制情詞懇摯自未便強令居官著准其開缺惟田宗揚久歷戎行在鎮防諸將中頗稱得力現當防勦喫緊之際應否暫留軍營以資熟手之處著馮子材等斟酌辦理將此由五百里諭令知之○以貴州松桃協副將黃武賢為甘肅西甯鎮總兵官○賞土爾扈特郡王凌扎棟

魯布三眼花翎。鄂爾多斯貝子三濟密都布雙眼花翎。阿拉善鎮國公沙克都爾札布等花翎。○丙申。諭內閣。刑部奏遵例查明免勾官犯。開單呈覽一摺。已革安徽巡撫翁同書著加恩發往新疆効力贖罪。已革佐領長生。已革筆帖式連馨均著加恩減等發落。○又諭前據宗人府等衙門奏職官誘姦民女。捏詞誣控。並究出行賄屬託等情。請將侍衛趙慎之等分別革職解任審訊。先後降旨允准。

茲據宗人府刑部會同審明。按律分別定擬具奏。此案已革頭等侍衛世襲輕車都尉趙慎之。先與李王氏之義女成兒通姦。欲買為婢。因李王氏不允。輒將成兒藏匿。捏寫賣身字據。飾詞妄控。實屬無恥已極。趙慎之著照擬銷除本身旗檔。從重發往黑龍江安置。並不准其留養。已革步軍統領衙門筆帖式覺羅炳戢。因趙慎之託伊打點官司。輒起意誣騙得錢三百六十千文使用。實屬卑鄙不堪。

炳戢著照擬從重發往黑龍江。交該將軍嚴加管束。刑部郎中恆坦承審此案。於炳戢代趙慎之向伊情託時。並不正言拒絕。輒允代為辦理。迨趙慎之供出實情。始行回堂派審。雖訊無得受賄私情弊。實屬不知檢束。恆坦著交部嚴加議處。工部主事全霖捐職從九品王鐘。於趙慎之託寫呈詞親供。並不問明虛實。率行代為謄寫。均屬不合。全霖著交部議處。王鐘著准其照律納贖答罪。案內在逃。

之捐職衛千總于永祥著步軍統領衙門順天府五城一體嚴拏務獲究辦。○又諭前因御史劉慶奏。任滿學政俞奎垣回京。在途被倡自盡一案。當經降旨交倭仁。李崇階會同刑部訊明辦理。茲據奏稱。原參俞奎垣激怒其父俞進麟。致俞奎垣投井身死。不准地方官相驗。到京捏報病故一節。訊據俞進麟供稱。伊子俞奎垣於湖北學政任滿。請假赴俞進麟甘肅涇州任所省視。及俞進麟告病開。

缺帶同家眷回京。行至涿州。俞奎垣因俞奎文申飭其車夫嬾惰。向俞進麟訴說。俞進麟瞋其不應以此瑣瀆。訓斥數語。俞奎垣即走出村外投井殞命。俞進麟查知。覓獲屍身。盛殮。並未報驗。到京赴翰林院衙門呈報病故等情。並稱伊子三人。素皆和睦。毫無嫌隙。俞奎垣屍未報驗。實因痛子情切。委無別故。亦未向該州賄屬研詰。俞奎文及俞奎端供亦相同。其劉慶所奏俞奎文有欲取玉器。俞奎

端欲捐主事各情。均供並無其事。俞奎垣死由輕生。俞奎文。俞奎端。既無向俞進麟唆逼構陷等情。惟於家庭不善調處。著照所擬。俞奎文。俞奎端。均照不應律。笞四十。照律准其納贖。至俞進麟聞警潛逃一節。既據訊明係於告病開缺交卸後。於平涼府守候交代。業已算清。惟未經結報。該員急欲回京就醫。不及等候。請咨屬實。俞進麟雖無聞警潛逃情事。惟於交卸後不候交代清結。擅自回京。又

於伊子俞奎垣自盡。並不報官相驗。捏報病故。殊屬不合。著先行交部議處。其涇州任內交代。究係曾否算結。著陝甘總督迅即查明辦理。其俞奎垣為俞奎文請封。係屬情願。將本身妻室應得封典。照例呈請。肥封兄嫂。並無欲為胞叔俞大椿請封。而俞奎文偪令為己請封之事。著即免其追奪。又俞奎文過繼俞奎垣次子為嗣。雖經查明俞奎文並無威偪俞奎垣致令自盡情事。惟俞奎垣之死。究

由俞奎文斥罵車夫而起。著照所擬。比照例載應繼之人。先有嫌隙。則於親族另行擇繼之例。斷令歸宗。另行擇繼。此案俞奎垣之死。既據劉慶奏聞情節支離。虛實均應徹底根究。且其中又有俞進麟聞警潛逃等情。不能置而不問。據倭仁等訊明俞奎垣實係輕生自盡。俞進麟。俞奎文等均無偪勒唆陷各情。事關倫紀。該御史所奏與現審情形不符。殊屬失實。姑念御史原准風聞言事。免其置議。

○又諭賈洪詔奏提督意不在公難期得力等語。據稱雲南提督福陞向駱秉章指陳滇省軍務毫無實際。復欲索銀鉅萬。交伊進剿。又欲為其子指捐四川官階。以欠伊養廉作抵。其子郭拉豐阿品素不端。於賈洪詔委申有謀幫辦昭通事務。輒欲派其子同往。並欲與賈洪詔會銜咨催。張亮基欠餉。種種謬妄。營私實出情理之外。福陞前經駱秉章奏參。降旨革職。著與其子郭拉豐阿一併勒令回

旗。母任在川逗遛。○諭議政王軍機大臣等。左宗棠奏官軍攻剿杭州餘杭踞逆。疊獲大勝。蓮覆杭嘉湖減漕情形。及臬司劉典回籍治喪各摺片。現在杭州之賊聞風恟懼。餘杭賊勢亦將回顧。杭城老巢均有可乘之機。左宗棠即日拔營進紮餘杭之橫谿頭。相機督剿。令蔣益澧進攻古塘堅壘。復飭楊昌濬偵探餘杭賊勢。相機截擊。所籌均極周密。即著督飭各軍乘勝進取。力圖恢復兩城。以紓殷

盼。昨據李鴻章奏滬軍收復嘉善縣城。已諭令進規嘉興。以掣杭湖各賊之勢。左宗棠前奏亦已分兵進規湖州。杭賊向賴嘉湖援賊接濟糧運。此時各軍同時並舉。該逆實有顧不遑之勢。如杭餘兩城一處得手。則浙西三郡可期功收破竹。漸次底定。即著該督妥為籌策。用副馳驅。洋將德克碑此次會攻杭城賊壘。甚為出力。著左宗棠仍飭令勉籌會剿。迅奏膚公。署浙江臬司劉典丁憂懇請回

籍治喪。已由左宗棠飭令起程。惟現在浙西軍務攻剿正形喫緊。該臬司帶兵甚為得力。著左宗棠飭令趕緊料理。一俟治喪事竣。即行赴浙剿賊。以副委任。杭嘉湖三屬向徵漕糧。浮收過重。該督擬俟地方收復後再行分別議減。浙東地丁積弊亦甚。均應查明辦理。現在溫州尚稱完善。該督已督飭該管道府將一切陋規裁革。除正額照常徵解外。其餘浮費減去錢四萬五百餘千。米三百餘石。足

見體恤民瘼。實心任事。其浙東各屬。並著一律辦理。將來杭嘉湖克復後。卽著該督慎選賢明守令。剔除積弊。將徵數妥立章程。分別議減。期於永遠遵守。以副朝廷軫念窮黎之意。將此由六百里諭令知之。○又諭徐宗幹奏克復彰化縣城。曾玉明。丁曰健奏會師克復彰化。並攻克要隘情形。各一摺。臺灣逆匪日久蔓延。從未大受懲創。經丁曰健攻拔葭投。與曾玉明會師進攻彰化。並將鹿港至寶

斗一帶道路疏通。其南路匪莊亦經吳鴻源。曾元福先後攻克多處。林文察現已放洋收泊臺灣。著左宗棠。徐宗幹。卽知照該署提督。迅卽馳赴嘉義。會同曾元福相機進攻。速清餘孽。斗六逆巢。已經官軍圍困。著曾玉明。丁曰健激勵諸軍。迅將賊首戴萬生斬擒。毋令免脫。內山貓霧巡檢地方。業經攻克。著卽飭令林文明等軍。合剿四塊厝林逆老巢。以期山內地方一律肅清。將此由六百里諭知左

宗棠。徐宗幹。並傳諭曾玉明。丁曰健知之。○又諭劉蓉奏漢南賊情。及楚軍扼守川疆。各州縣防剿等情。現籌進剿。查明漢中城固失守情形。酌擬清查叛產。興辦營田。並舉所知各員。請飭調任。使各摺片。所奏各路賊匪紛竄情形。尚為明晰。漢南一帶州縣派團防。剿等情。與多隆阿。張集馨疊次所奏大致相同。卽著劉蓉速由廣元進發。到甯羌後。籌定一切進止機宜。速行具奏。所擬唐友耕等軍。與

李雲麟會赴西鄉。以圖洋縣。為東路之師。江忠濬楚省到來。會同何勝。必蕭慶高。朱桂秋各軍。由青石關徑擣漢中。為南路之師。而該撫催調唐星照。曾傳道兩軍。率由甯羌規取褒沔。自西路進。仍符原議三路進兵之策。均著照擬迅速辦理。惟進兵須至三月。則此兩月未能進兵之前。仍當督飭各軍穩守。養成精銳。及時而動。本日亦經寄諭賡章。速飭唐友耕等各軍到防。與劉蓉熟籌相機進取。

憚世臨嚴催唐星照趕緊募軍赴陝。唐友耕等軍尚未募齊。驟難出境會師。李雲麟未可孤軍深入。著卽暫駐石泉茶鎮。扼賊竄路。一俟諸軍取齊。卽當約期並進。李雲麟與劉蓉相距較遠。所有東路軍情。卽准暫由李雲麟單銜奏報。其酌擬陝省清查叛產籌辦營田諸務。卽著劉蓉按照所奏。與張集馨詳悉妥籌。實力舉辦。楊寶臣業已簡授河東道。河東鹽務緊要。該撫請將該員發往陝西差委之處。

著毋庸議。李宗沆、劉餘慶二員皆在陝西本籍。卽著劉蓉傳旨飭令會同地方官。將清查叛產籌辦營田各事宜妥為興辦。黃輔辰一員著卽存記以備簡任。該員現在成都。著劉蓉卽調至軍營。以資臂指。其陝安道何丙勳升用知府。張黻華二員既據該撫奏稱均為可用之才。著卽飭令何丙勳督同張黻華馳赴興商一帶。將釐捐兩項妥為籌辦。隨時撥解李雲麟所部隴軍、澄漢等營月餉之需。

李雲麟於一切進止仍應與劉蓉熟商實力辦理。毋稍貽誤。將此由六百里各諭令知之。○又諭劉蓉奏遵旨籌辦並酌定援軍餉額分任責成以符三省會勘原議一摺。漢南軍務疊經諭令秦楚蜀三省妥籌會勘所需軍餉。自應由三省分籌。據劉蓉奏稱前經詳定川省所派四軍由川撥餉。李雲麟所部各軍卽由鄂省接濟。漢南一軍由陝省供支。官文等於李雲麟健毅六營。梁作楫凱字五營。月

需餉銀均屬竭力籌濟。川軍新挫之後亦經劉蓉函商駱秉章就四軍月餉之數裁汰募補以資整頓。駱秉章允將援陝諸軍月餉八萬有奇。按時撥解。是川鄂諸軍均係自裹行糧。惟李桓所募之義勝軍月餉虛懸罔著。梁作楫所部凱字五營既經鄂省調回則義勝軍月餉卽應仍由鄂省籌濟餉需以符定議。至李雲麟新募之隴軍各營及澄漢水師口糧軍火鄂省力難兼顧現已由劉蓉飭令道

員何丙勳等。於興商一帶辦理釐捐。隨時撥解。劉蓉現在進紮甯羌。力圖進克興漢之策。所募親兵。及添設牌礮營頭。以為破賊之用。所調副將唐星照。由湘募勇四五千名。亦於臘底春初。可以到營。所需軍火口糧。尤應寬為籌備。以資飽騰。方不至有停兵待餉之虞。著官文。駱秉章。嚴樹森。各按所定月餉六萬八萬之數。隨時撥濟。毋使稍形缺乏。並著張集馨督率藩司迅速籌款。每月撥銀二萬兩。

解赴劉蓉軍營。毋稍延玩。前諭張集馨以陝省叛絕各產。招民認墾。不如興辦屯田。茲據劉蓉所奏各情。與前諭旨正相符合。劉蓉所保之李宗沆。劉餘慶二員。已諭令劉蓉傳知該員等。專司襄辦。著張集馨卽揀派司道得力大員。總司其事。會同確實查明。分別村莊畝數。酌定章程。與劉蓉會商詳悉妥籌。實力舉辦。劉蓉遵查漢中城固失守。殉難各員。業經降旨。均照所請。分別懲卹。惟其中盧又熊。

一員。開城出走。縱勇肆掠。情尤可惡。漢中失陷之後。盧又熊行至漢岸。無船可渡。其黨四散。該員亦不知實在下落。諒必潛逃各處。著官文。駱秉章。嚴樹森。張集馨。於湖北四川陝西各省。一體嚴拏。務獲就地正法。以為炯戒。劉蓉現已進紮甯羌。籌畫進兵。將來川省援軍。分西南兩路進剿。則東路更形喫重。鄂省前將派駐興安之梁作楫。所部調回以防豫。捻現在張總愚股匪離鄂較遠。卽著官文。嚴

樹森。於該省各營抽調一軍。仍駐興安。以防賊竄回鄂之路。並與李雲麟之軍聯絡策應。防剿兼施。其與豫省毗連沿邊各處。仍須嚴密布置。毋稍疏虞。駱秉章於陝南軍務。素能竭力兼顧。並著速飭唐文耕。唐大有等軍。迅卽到防。與李雲麟所部會合。進取西鄉一路。以圖洋縣。與劉蓉進規褒沔之師。相為策應。迅奏膚公。將此由六百里諭知官文。駱秉章。嚴樹森。並傳諭張集馨知之。○又諭劉蓉奏。

前經奉調之湖南在籍總兵唐星照因奉母未克來營。請旨飭催等語。現在漢南軍務喫緊。正當移孝作忠。以濟時艱。該總兵務宜力圖報稱。著憚世臨迅催唐星照招募成軍。兼程馳赴劉蓉軍營。以備調遣。毋許再有推委。將此由五百里諭令知之。○又諭毛鴻賓。郭嵩燾奏各屬土客構禍日深。現在辦理情形。悉陳廣東隱患。籌修礮臺各摺片。肇慶各屬土客仇殺日深。又有土匪李四各股攪雜其

中。陽江蔣朝剛一軍。陽春侯勉忠一軍。兵力單薄。僅能自守。卓興所部。現可起程前赴陽春。相機布置。並委知府史樸等調處肇慶土民事宜。開平恩平客民。就便察看大湖山曹冲等處。隨地安插。卽著照毛鴻賓郭嵩燾所擬督飭派出各員弁。酌度情形。或痛加勸洗。而使之知畏。或加意拊循。而使之知感。分別妥為辦理。該督撫惟有持平酌覈。分良莠。不分土客。勸懲一秉大公。庶釁端日弭。兩造漸

可相安。廣東隱患日積。盜風四起。州縣自顧考成大率諱盜為竊。改重為輕。以致伏莽倍甚。從前各屬降匪及各路裁汰遣回之勇丁。日聚日多。金陵蘇杭逆黨亦多有逃回者。肇慶土客游蕩無歸。肆行劫掠。禍患所伏。誠不可不豫為之防。該督撫籌辦情形。均中窺要。除暴安良諸要務。首在州縣得人。則地方方能漸臻安謐。毛鴻賓郭嵩燾務當慎選賢能。牧令擇人而任。為斯民培養元氣。以杜亂萌。

而除民害。方為妥善。所籌擇要修築礮臺。請將虎門殘廢礮臺基石。移修內河礮臺之處。著卽照毛鴻賓等所擬妥為辦理。其省河西礮臺等處。及東西岸內港各礮臺。是否均屬扼要。應行存留。並著分別查勘酌辦。將此由六百里諭令知之。○又諭賈洪詔奏現辦滇省軍務情形。豫籌餉需。並部選分發人員。請以到營日期。作為到省。疊請調員。差委各摺片。滇省糧餉。全賴四川籌濟。現在陝南軍務

未平。勢難分撥。並昭東二屬。亦有回黨分布。賈洪詔與駱秉章會商。先行揀員更換昭通鎮府。與民團聯絡防守。俟川省能接濟兵餉。卽親赴昭通督辦。所籌向係實在情形。惟東昭與川省毗連。為入滇緊要門戶。現已有回黨窺伺。尤應加意嚴防。賈洪詔現因兵力不敷。暫駐川省。卽著與駱秉章會籌。遴派得力之員。迅赴昭通。籌辦防勦。仍著賈洪詔隨時詳察。如所委鎮府各員到任後。兵民聯絡足資防守。此後或可乘機進取。仍須大員前往督辦。賈洪詔惟當審度時勢。熟籌進止。毋得稍存畏蕙之見。遷延歲月。坐失機宜。所稱東川營參將楊盛宗辦事勇往。其父楊玉衡深識機宜。並臨安之梁士美。田仲興等。不肯附回。業經該撫密劄獎勵。卽著賈洪詔飭令楊盛宗等與臨安十一土司激勵兵練。互為聲援。滇省需餉孔亟。賈洪詔飭蕭浚蘭將未用實官照委員勸辦減成收捐。並令張兆辰將

未變鉛斤。派員領赴川湖銷售。各節均著照所議辦理。蕭浚蘭簡授滇藩。時逾三年。延不赴任。前經吏部奏參降旨革職。茲據賈洪詔奏稱。係因滇省回踞。未能前進。請將該員與林鴻年留營襄辦。均照所請留營差委。至部選路南州知州文鴻盛。前經部議。以到任逾限革職。賈洪詔現委該員署大關廳同知。與定例不符。著另行遴員接署。文鴻盛如才尚可用。卽准其暫行留營。一併差委。以觀後效。其所陳滇中現為回踞。該員等未敢輕入。尚存自愛之見。與尋常規避有異。亦係實情。嗣後該省部選分發各員。卽著照賈洪詔所請。以到該撫行營之日。作為到滇日期。蕭浚蘭文鴻盛二員。現准留營。如能奮勉從事。著有勞績。仍可奏請錄用也。另片奏差委需員。請調尹善廷等赴營。業經降旨照准。惟尹善廷一員。前在皖省軍營。辦理苗逆事宜。諸多未善。該員到營後。著賈洪詔隨時察看。如不得

力。卽行奏明撤回。本日復據御史張澐卿奏訪聞總兵馬如龍於回眾之中。實屬稍知大義。現有大舉規復迤西之議。請飭川省選派勁旅。交勞崇光督率相機進取。以壯聲援等語。馬如龍與杜逆構釁。是否激於義憤。抑係專欲遂其吞并之謀。殊屬未可深恃。著駱秉章。勞崇光。賈洪詔確切查明。如馬如龍誠心效順。或可用為前驅之處。惟在該督撫等妥商會辦。張澐卿原摺著鈔給閱看。將此由六

百里各諭令知之。○以克復福建彰化縣城。賞守備鄭榮等花翎。舉人蔡鴻猷等五品銜。藍翎。餘加銜升敘有差。○以陝西石泉茶鎮堵剿出力。予守備蕭祿等升敘。○以陝西漢中城固兩城被賊竄陷。革副將盧又熊。徐邦導。遊擊王其發。楊發祥。都司白鳳鳴。穆懷德。守備顏作棟。張宜華。千總胡尚瀛。童正國。訓導魯炳堽職。與已革知州袁昌鵬均逮問。代理城固縣知縣張開鑒革職留營。予陣亡護

總兵官遊擊陳天柱祭葬世職如總兵官例。○予浙江杭州等處陣亡副將扈照乾等祭葬世職加等。○予浙江餘姚殉難在籍員外郎謝敬祭葬世職如道員例。○緩徵浙江餘姚。上虞。新昌。嵊。四縣被擾被旱地方下忙錢糧暨石堰場應徵電課。○丁酉

孝莊文皇后忌辰。遣官祭

昭西陵。○諭議政王軍機大臣等。閻敬銘奏。查辦逆產。遷移災民情形。請將沿河州縣管轄地方。仍循舊制一摺。鄒縣白蓮池逆產。經該撫派員查出一百五十三項七十餘畝。堂邑之甘官屯。劉貫莊附近逆產二十六項八十餘畝。又堂邑革冠館朝各縣逆產六十二項十畝零。房屋九百九十五間。觀城縣逆產十畝。臨清州逆產三項九畝零。據該撫聲稱。曹單等處強悍貧民。未便移諸兗州荒亂之地等語。所奏不為無見。其黃河以南。東阿。平陰等處。及河北災民。均因安土重遷。不願分投

遷徙。自係實在情形。著卽照所議停止。其鄒曲泗滕費五縣。未經認領荒地三百三十二頃餘畝。著卽照該撫所議。以一年為限。如果係逃亡之戶。地有原主。於限內回籍認領者。卽仍給予耕種。逾限未領。然後入官。惟地方胥吏。於清查叛絕各產時。則侵吞入己。於逃戶歸籍認領原產時。則多方需索。或虛捏逃戶姓名。倩人代領。據為利藪。或地方奸民。任意侵冒。各種情弊。皆所不免。閻敬銘務當嚴

督各該地方官認真經理。不得任聽書吏奸民叢滋弊竇。致令利歸中飽。其沂郡所屬土匪。及淄川土匪叛產。亦著閻敬銘實力清查。毋任隱漏。前據光祿寺少卿鄭錫瀛奏請查明無主荒地屯田養兵。並清查叛產。辦理屯田各摺片。當經諭令各該省督撫酌量辦理。昨據劉蓉奏稱陝省逆回叛產不下數百萬畝。擬於清查後籌辦營田。以資軍餉。並將叛產絕產分別詳查。妥籌舉辦等語。現在東省

白蓮池及堂邑等處叛產。並兗郡荒地絕產。是否可以辦理屯田之處。著該撫因地制宜。熟籌妥辦。總期於國計民生兩有裨益。至僧格林沁所奏黃河南北各州縣所轄地方。請以河為分界之處。既據閻敬銘查明事多窒礙。著卽仍循舊制。以歸簡易。該撫仍當督飭沿河各州縣。於隔河所轄地方。隨時巡查撫綏。毋稍疏忽。將此由六百里諭令知之。○又諭雷正綰等奏官軍攻克党原等賊巢。立解

鎮原城圍。並陶茂林現已到沂。亟籌進剿各摺片。熙麟奏遵查甘省近日軍情。摺雷正綰之軍攻克王村花所鎮賊巢。後涇境已無賊蹤。而鎮原境內之党原北原地當衝要。為賊所踞。經雷正綰親督各軍進剿。直薄賊壘。誘賊離巢。總兵成祿魏添應等伏兵齊起。奮力勦擊。當將兩原賊巢掃蕩。進紮鎮原附城一帶。按剿立解城圍。餘賊敗向平涼遁去。雷正綰以乘此聲威。自應直進平涼。而陝之汧隴

甘之靈崇等處賊巢聯絡不惟涇州空虛卽慶陽亦無屏蔽且恐賊得回竄邠長繞至官軍後路必得陶茂林一軍速由鳳翔前進會同勦除秦隴兩省毗境賊氛方可合力以圖進取與熙麟所奏請飭多隆阿迅催陶茂林等所部與雷正綰合籌進勦之意正同陶茂林現在已將鳳回收撫帶領各營到汧進勦卽著雷正綰督率各軍速與陶茂林前後夾擊將汧隴及靈臺崇信之賊痛加勦洗以清

後路該提督等卽當合兵一路直取平涼以成破竹之勢甯靈相距道路雖較遠遠第使官兵迅克平涼由鹽固轉戰而前自足以褫奸回之魄各地方望援孔亟亦必聞聲響應逆回馬化澂分股攻撲中衛地方係與蘭州等處接壤熙麟務須飭令甘省文武多派兵勇嚴扼中衛並激勵各屬官民悉力備禦嚴防奸宄窺覷保全河西三郡毋致為賊所乘致勦辦更形棘手張集馨於白集原遺糧撥

出二萬石解涇接濟軍食此時自己運到甘省民力彫殘餉需萬難籌畫陝省自潼關以至長武東西大路業已肅清商賈定漸復業其未遭兵燹各屬亦應尚有積糧雷正綰等軍進勦正當喫緊慶陽亦缺乏堪虞仍著張集馨竭力妥籌源源接濟鳳翔回民雖經陶茂林收撫其善後事宜並著張集馨督飭該地方官妥慎籌辦務令各回民革面洗心各安生業毋致再生事端前所調派晉省撥赴

定邊一軍嗣由山東改撥單縣所紮楚勇一千名卽由東省取道汧省徑赴潼關此時當可到防訥欽所帶直隸一軍亦將可到歸綏以圖進取雷正綰務當乘此迅速合軍鼓勇直前以拯隴急而紓西顧熙麟密摺一件另封原稟二件均留中備覽將此由六百里諭知熙麟雷正綰並傳諭張集馨知之○又諭熙麟奏直隸山西調派來甘兵勇請由各該省自行籌給糧餉軍火等語甘省地瘠民貧

自軍興以來。悉索敵賦庫款一空。若各省援軍雲集。糧餉軍火。各該省不自寬為籌備。必至停兵待餉。貽誤事機。直隸訥欽一軍業已起程。由歸朔一路進發。並經疊諭劉長佑。沈桂芬將該營糧餉軍火。源源接濟。不得有誤。師行。惟此軍行抵歸綏一帶。後自應偵探賊情。進趨甯夏。力籌會剿。屆時此軍去直愈遠。千里運糧。尤恐緩不濟急。著沈桂芬於訥欽一軍。懷遵前旨。將糧餉軍火。隨時解運。劉長佑亦當於訥欽之軍。竭力籌濟。如以道路遼遠。卽由山西轉撥。以期迅速。至山東所撥劉漢秀一軍。徑赴陝省定邊。原係換替晉省應撥援甘之勇。山東去甘愈遠。輸挽尤屬不易。此軍糧餉軍火。著一併責成沈桂芬源源接濟。隨時委解。本日劉長佑奏保直隸勦匪出力各員單內。除業將遮克敦布原保人員未經註明勞績者。扣除毋庸給獎外。其餘所請。亦均未免失之過優。此次姑准所請。嗣後該

督於應辦事宜。務須覈實辦理。將此由六百里各諭令知之。○命禮部右侍郎吳存義提督浙江學政。○以直隸官軍擒斬首逆張玉懷等出力。賞道員劉策先守備常開運。巴圖魯名號。參將湯繼揚。知州劉秉琳等花翎。委參領戴綱阿等藍翎。餘加銜升敘開復有差。○予直隸永年肥鄉等處陣亡員弁參領噶拉炳阿等暨紳民婦女五千九百一員名口分別旌卹如例。○蠲免山東鄒滕費三縣暨屯坐各衛被擾地方新舊錢漕。並緩徵滕縣同治三年上忙錢糧。○戊戌諭議政王軍機大臣等。阿克敦布等奏遵奉諭旨。派佐領伊什貢布等前往綏遠歸化二城偵探。並派佐領額勒洪額等在大境門輪流稽查。現在甯夏及黃河兩岸回匪盤踞。並無北竄聲息。綏遠等處回民均各安業。沿河口岸及毗連甘省之蒙古地方。早已設防。復安設坐探。派兵分紮。又派佐領伊勒當阿等赴綏遠歸化二

城接探。並張家口稽查保甲。察哈爾訓練兵丁各等情。蒙古地方設防。土著回民。現雖安靜。仍應嚴防外匪潛來勾結。著阿克敦布。廉至。督飭派出之佐領等。認真偵探。隨時馳報。不得有名無實。張家口稽查保甲。察哈爾訓練官兵。仍須實力奉行。毋稍疏懈。並隨時知照綏遠歸化兩城。彼此聯絡聲勢。以固邊防。蒙古民人。素性嗜利。恐甯夏逆回。設計與之勾通。該將軍等。務須剴切曉諭蒙古民人。勿

貪該逆回之利。致為所愚。其毗連甘省之蒙古地方。據稱早已設兵防堵。恐不可恃。切須加意偵探。德勒克多爾濟等前奏遵旨設探。還察。挑派官兵策應。俟訥欽之師馳抵甯夏。卽將所謂兩盟蒙古官兵一千名。作為前隊。相機繼進。務當懷遵前旨。認真操防。巡察不得以有訥欽援師可恃。遂於本境防軍。稍形鬆懈。將此由四百里各諭令知之。○以內閣學士殷兆鏞署禮部右侍郎。○以工部尚書

李棠階都察院左都御史全慶充經筵講官。

○
上以歲暮禋祭

太廟。自是日始齋戒三日。○己亥。諭內閣本日據倉場衙門並查倉御史瑞亨奏請將放米逾限之倉監督德賡張茂昭。交部照例議處等語。賡賡張茂昭著與放米逾限之祿米。南新舊太北新富新各倉監督。一併先行交部議處其餘放米未完五倉。均著勒限於年內

一律趕放全完。毋再玩泄。至嗣後分旗按限遞放及應如何責成各該員自行關領或仿照甲米章程彙總由該佐領親身關領之處著八旗都統會同妥議具奏。○又諭前因前任御史孟傳金奏參冀州知州丁學易及署知州裴姓有縱役諱盜性耽安逸以致民團破敗各款當經諭令直隸總督查明具奏。茲據劉長佑奏丁學易在任一年平日官聲尚好惟上年七八月間因患目疾未能與紳董

接見面商團務致招物議。丁學易請假調治。代理州事裴福德聯絡紳團。拏獲土匪。尚屬認真。迨十一月間賊逼冀州。裴福德督團接仗。力保危城。實無性耽安逸及縱役諱盜情事。各等語。前任冀州知州丁學易因目病微恙。輒將團練要務延閣不辦。實屬未愜輿情。該員前經崇厚奏請勒令休致。因其被參有案。降旨先行革職審辦。現既查明尚無實在劣蹟。著免其提審。仍勒令休致。代理州事裴

福德被參各情。既無其事。卽著無庸置議。○又諭僧格林沁等奏查驗額毫等處圩寨。擒斬苗黨擒首多名。皖北漸就肅清。一摺。僧格林沁一軍自殲除苗逆。蒙城解圍後。派令恆齡等帶隊分往額毫等處清理圩寨。先後拏獲匪犯冉廣詩。王際組。王應荳。並通苗之練總王金奎。朱鑫。卽朱品三。方金鑄。吳琪樹。吳正誼。並其妻劉氏。一律駢誅。復攻毀姚得沈圍寨。將該犯擒斬。擒拏著名擒首葛大牛。侯

豹兒與鄒煥林一併正法。其苗逆之妻徐氏。逆子連生。及苗希年等從逆叛黨。概行誅戮。皖北一帶現就肅清。洵足以快人心。而申天討。所有各該處善後事宜。卽著該地方官認真講求。妥為辦理。○又諭前因李世忠所部勇隊與陳國瑞所部在下蔡壽州互鬪。致提督朱元興。杜宜魁被戕。曾經諭令僧格林沁秉公查辦。茲據僧格林沁等奏稱查明啟釁原委。分別懲辦。並將投誠苗黨定擬等語。苗

沛霖族姪苗金開被擒後。經陳國瑞帶赴壽州等處。收復城關。並勸令踞守壽州之李萬春。踞守正陽關之朱萬澄投誠。原可貸其一死。乃因提督朱元興等四五人未戴官帽。欲進壽城。輒行互鬪。將該提督等殺斃。業經僧格林沁將苗金開。及李萬春。朱萬澄一併正法。實屬罪有應得。至降眾邵徵詳。雖經隨同官軍收復城關。勸令苗黨歸正。惟以二品職官。甘為苗逆主使。究屬不顧廉恥。張士端因

獻出懷遠縣城。曾經賞給遊擊虛銜。乃投誠後。復任令苗黨蘇會雲逃走。其為有意疏縱。已可概見。花翎副將邵徵詳。遊擊銜張士端。均著卽行革職。發往黑龍江交該將軍嚴加管束。方長華前曾保至五品花翎。被苗逆僞脅。派守額上縣城。聞苗黨被官軍擊敗。旋即擒斬苗黨多人。獻出縣城。尚屬情有可原。著革職。免其置議。副將康錦文帶領苗金開收復壽州。於該犯等滋事之時。不能彈壓。致有

殺害職官之事。亦難辭咎。康錦文著卽行革職。仍留吳棠軍營差遣。以觀後效。○又諭唐訓方奏。參劾劣員。以肅吏治一摺。代理額上縣知縣侯補府經歷張祖溶。貪庸不職。難期造就。知縣用候補縣丞徐璜。居心刻薄。候選縣丞吳仁榮。品行卑污。均著革職。捐升道員候補知府趙季輔。前署泗州任內。經徵地漕等銀。短交銀七千餘兩。迄今數載。尚未清交。實屬任意抗延。趙季輔著先行革職。飭令藩

司勒限兩箇月。將該員交代覈算清楚。如有虧那情事。卽著從嚴參辦。以重庫款。○諭議政王軍機大臣等。僧格林沁等奏查驗額亮等處圩寨。擒獲擒首苗黨多名。皖北漸就肅清。張之萬奏西路擊賊獲勝。商令蘇克金移營夾擊。並誘擒擒首正法。進圍鮑寨各摺片。額亮等處圩寨。經僧格林沁派恒齡等前往查驗。並攻毀姚得洗賊圍。擒獲著名擒首葛大牛。侯豹兒。並拏獲苗黨王金奎等犯正法。

所辦均屬妥協。皖北一帶。漸就肅清。現在有無匪黨藏匿。僧格林沁仍飭各路實力搜捕。以期一律廓清。不留遺孽。所有發往黑龍江之邵徵詳。張士端。著僧格林沁交地方官卽行起解。蘇克金一軍。經該大臣派令帶領馬隊赴豫駐紮魯山。據張之萬奏。恐賊匪東竄。商令該副都統移紮南召左近。以利抄擊。據蘇克金覆稱。該逆盤踞山中。難期蕞事。現飭南召縣並添派官兵偵探。該副都統整隊以

待一有確信。即便進兵等語。著僧格林沁檄令蘇克金擇要扼紮。如該匪出竄。卽會同豫軍實力夾擊。毋稍觀望。張曜現紮板山坪。若馬隊由張曜營壘之南前進。馬步相輔而行。先破白土岡。進逼李清店。可以制其要害。著張之萬飛檄色爾固善等。取道南召鎮平。與張曜會合。飭吳再升。葛承霖分股扼紮。誘賊出險。與蘇克金馬隊痛殲醜類。以靖地方。知府劉成忠。參將王文行等軍。計擒擒首黃梅

寒。鮑憬潮二名正法。並將悍黨三四百名追捕斬戮。所辦甚妥。現在餘逆尚踞鮑寨。著毛昶熙督飭各營力圖攻拔。卽乘勝進剿。談家園。以期節節掃蕩。此次攻破余寨。擒斬黃鮑二逆出力各員。著張之萬等先行存記。俟汝郡肅清。彙案保獎。張之萬另片奏副將黃貴誠。由信陽帶兵追賊至吳家店。因口糧缺乏。未能前進。請將該副將摘頂等語。黃貴誠追賊未能向前。實屬不知緩急。著摘去頂帶。以

示薄懲。已諭知官文等派兵會合夾擊。著張之萬仍責令黃貴誠實力追剿。不准稍存畛域之見。將此由六百里各諭令知之。○又諭僧格林沁等奏。蒙亳一帶賊氛甫滅。請於適中之地增設文武。酌添防兵。以資控制等語。安徽蒙亳東西相距二百餘里。河南永城縣與安徽潁州府亦南北相距二百里左右。數年以來。苗捻構亂。經官軍勦洗後。元兇授首。裹脅逃散。其間平原曠野。地廣人稀。加以素習强悍。寇盜易滋。雉河集為蒙亳永宿潁適中之地。相距均在百里以外。該大臣擬請添設重鎮。或酌設州縣各官。以資治理。所籌甚中。竊要著曾國藩。喬松年。審度時勢。酌量情形。遴選職分較大武員。統帶數營。駐紮該處。以資彈壓。庶可清理伏莽。永消反側。其辦理善後各事宜。尤屬刻不容緩。應如何酌設州縣各缺。以專責成之處。並著詳細籌商。妥議章程具奏。唐訓方現已以藩司降補。所有前

存臨淮之欽差大臣關防一顆。著喬松年於到任後。派員親齎赴京恭繳。以昭慎重。將此各諭令知之。○又諭僧格林沁奏遵旨密陳一摺。前因曾國藩覆奏。李世忠尚無背叛情形。當經密諭該大臣李世忠。如不敢往見僧格林沁。卽遵旨調至該大臣軍營。散其部眾。消患無形。茲據僧格林沁覆奏。李世忠背叛情形。尚未顯露。似難驟繩以法。現在金陵軍情緊要。請飭曾國藩速調李世忠前赴該大

臣軍營助剿。曉以大義。令將所踞城池。釐卡交出。歸官各等語。所籌辦法。與該大臣前奏均屬符合。卽著曾國藩迅將李世忠調赴該大臣軍營。一切遵照前旨酌量妥辦。並由該大臣隨時密商僧格林沁。毋稍洩漏。僧格林沁原摺留中。另鈔給曾國藩閱看。將此由六百里各密諭知之。○又諭張之萬奏。皖匪由桐柏南竄隨州。派兵追剿。並飛咨楚省撥兵夾擊等語。皖匪於上月二十七日。竄撲桐柏。

固縣寨地方。分股由小林店竄赴楚境。另股三四十名。進薄桐柏縣城。被該處兵團擊退。遂由盤古山等處擁眾南走。與前竄楚境之股會合。竄擾隨州之新城集。張之萬已嚴飭黃貴誠等拔隊跟蹤堵剿。惟隨州新城集一帶。四面皆山。儻被該匪久踞。必至滋蔓難圖。著官文嚴樹森。迅派得力將弁。帶兵前往隨州。與豫省官軍兩面夾攻。務殲窮寇。毋任闖入楚境。將此由五百里諭令知之。○又諭沈

葆楨奏。籌防東路情形一摺。另片奏。請飭在籍總兵江忠朝來江。接統江忠義所部等語。金陵踞匪。現經官軍圍逼。將來賊勢窮蹙。必分股肆竄。徽饒各郡縣。防剿不容稍鬆。昨據左宗棠奏。臬司劉典回籍治喪。接辦徽防之員。恐未必能如該臬司足資捍禦。江省東路邊境。更宜加意嚴防。沈葆楨現派韓進春駐紮樂平。並調席寶田。陳鳴志等移師於祁景之間。聯絡聲勢。布置尚屬周妥。卽著該撫督

飭在防文武員弁認真訓練兵勇嚴密戒備。毋得稍有疏虞。在籍總兵江忠朝既據該撫稱其智勇足備。著准其調赴江省接統精捷營。以資得力。據譚世臨奏茶陵州屬之小田村與江西永甯交界地方。現有匪徒聚集。經該州訪獲匪首黃桂芳供與龍泉縣鄒木匠謀約鄧永會匪滋事等語。永甯等縣土匪疊據沈葆楨飭屬拏辦。恐尚有餘孽踰伏竄匿。仍著該撫嚴飭各該地方文武逐加搜捕。有

犯必懲務絕根株毋貽後患。將此由五百里諭令知之。○又諭譚世臨奏防剿黔匪並辦理土匪情形一摺。李七為李幅猷悍黨竄入黎境為時已久。總未見勞崇光張亮基遣派勁兵迎頭截擊。以至餘燼復燃。裹脅日眾。若不迅速殲除。其患伊于胡底。著勞崇光張亮基懍遵前旨趕緊遣派得力兵勇馳赴黎平一帶痛加勦洗。該逆現有窺伺大榕江漸入粵境之意。張凱嵩務當派兵迎擊毋令賊蹤

得以入境。譚世臨已飭周洪印移師黎平。並令趙福元等於楚粵交界之處周密布置。卽著飭令在事員弁聯絡聲援妥籌防剿。不得稍有疏虞。該督撫等務當合力同心殲此巨憝。儻敢畛域攸分致令賊氛肆擾。何省勦不力。卽惟該省大吏是問。益陽會匪餘黨竄匿龍陽沅江華容安鄉一帶陰圖糾眾報復。經趙煥聯等督團往捕。拏獲龐在恆等多名。惟首匪羅明慶等聞風遠颺。必須悉數捕獲。

至茶陵州匪首黃桂芳耒陽縣匪首李淚英羅良心等既經分別訪獲而餘匪亦須拏淨盡。著譚世臨督飭所屬認真稽查嚴拏究治。毋令此拏彼竄芽蘖復萌。本日沈葆楨奏江忠義一軍接統乏人。請飭江忠朝來江統帶等語。著譚世臨傳知在籍總兵江忠朝迅速前赴江右接統精捷營以副委任。將此由六百里各諭令知之。○以直隸山東安徽疊次勦賊出力賞佐領訥蘇肯等花翎六品頂

帶護軍烏爾恭阿等藍翎。餘升敘開復有差。
○以直隸等省勦匪出力。賞欽差大臣僧格
林沁護衛圖伯特巴圖魯名號。二等護衛翰
額木圖等花翎。○以安徽蒙城守城出力。賞
軍功葛晉祺等藍翎。練丁銀一萬兩。○予安
徽全椒傷亡參將張東皋祭葬世職。○蠲緩
直隸開東明長垣三州縣被水地方新舊錢
糧地租。蠲出借倉穀。並減免差徭。○展緩湖
北沔陽荊門漢陽漢川黃陂鍾祥京山潛江。

天門江陵公安石首監利松滋枝江武昌嘉
魚孝感黃梅廣濟二十州縣暨屯坐各衛被
水被旱地方新舊正雜額賦有差。○展緩湖
北沔陽漢陽黃陂天門江陵公安石首監利。
松滋九州縣被水地方新舊糟糧。○庚子。

上以歲暮裕祭

太廟前期親詣行禮。○遣官祭

太廟中殿

後殿。○諭內閣前因御史劉慶奏參直隸臬強

縣知縣王蘭廣失守縣城。苛派殃民各節。當
交劉長佑查辦。茲據劉長佑奏稱。王蘭廣前
經署直隸總督崇厚。蒙參賊匪闖入縣城案
內。將該員奏請暫行革職聽候查辦。經該督
查明上年東匪逼近。臬強有零匪十餘人。洩
入東門。該縣立時殺斃二名。餘匪逸去。賊蹤
並未停留。此次所參失守縣城一節。委無其
事。又該員募勇口糧。均係自行那墊。陣亡團
眾業經請卹。並無加派差徭。匪不請卹各情。

懇請開復等語。暫革藍翎。運同銜候補直隸
州知州臬強。縣知縣王蘭廣被參各節。既經
查明並無不合。且據劉長佑奏稱。該員在肥
鄉等處督隊勦賊。尚屬奮勉。著准其開復原
銜。暫行革職處分。該員前經大學士祁寯藻
奏保。仍著劉長佑給咨送部帶領引見。○又
諭。張之萬奏。查明庸劣各員。據實甄劾一摺。
河南署偃師縣知縣秦文翰。積案不結。遇事
苛斂。新安縣知縣韓經畬。縱任門丁。濫責生

監於兵差車馬亦多濫派。光山縣知縣沈振鈞嗜酒濫刑。且有私設釐卡。冒開勇糧情事。孟津縣知縣王雲漢辦案草率。聲名狼藉。均著卽行革職。前署新野縣知縣丁嘉言柔懦無能。且有被參案件。著卽行革職。以懲貪劣而肅官常。○諭議政王軍機大臣等。前因總理各國事務衙門奏陳辦理俄國分界委曲情形。當經諭令明誼。明緒於會議時徑行酌辦。不得游移瞻顧。茲據明誼等奏行文俄國。

約派使臣前來商辦安插內服哈薩克等人。取一摺。俄國分界事宜。已經明誼等行文該國。准照該使臣議單辦理。並約該國派員前來商辦換約。現在大雪封山。計該國使臣前來。約在明春。著明誼等卽遵照前次寄諭。將分界事宜。徑行斷結。不得再行咨商總理各國事務衙門。以致往返稽延。俾該國藉口另生枝節。總以妥速為要。不可意存諉卸。至烏梁海蒙古並內服之哈薩克布魯特及伊犁

距近邊卡居住之索倫四愛曼人等有礙生計之處。亦應豫為籌畫。其塔城所屬藩部。卽由明誼等查明情願內附人眾若干。設法籠絡。毋任與俄人勾結。一面查明卡內空曠處所。以便於定界後酌籌內徙。並著明誼等速卽知照常清麟興廣鳳等。迅將所屬蒙古烏梁海及哈薩克布魯特。一並豫籌安置處所。妥議章程辦理。至伊犁各城有礙蒙古人等生計數處。能否令俄國讓出數百里。以便安置此項人眾之處。並著明誼等於該使臣會商時。相機辦理。毋稍拘執。將此由五百里各諭令知之。○賞科爾沁扎薩克圖郡王索特那木倫布木。科爾沁郡王濟克默特朗布。敖漢郡王布彥德勒格。呼固魯克齊黃纒。蘇尼特郡王托第布木。阿巴噶郡王瓦津達拉三眼花翎。○以直隸永定河防汛出力。予道員徐繼鏞等升敘開復有差。○朝鮮國使臣趙然昌等三人於午門外瞻觀。○是日甲子年。

立春順天府進士牛春山寶座○辛丑拾祭

太廟遣恭親王奕訢恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵○遣官祭

文宗顯皇帝

孝德顯皇后暫安寢殿○遣官祭

端慧皇太子園寢○遣官祭

太歲之神○諭議政王軍機大臣等林文察奏克復斗六土城嘉義肅清移兵彰化一摺官軍攻克彰化後林文察會同總兵曾元福進攻斗六逆巢並將附近逆黨巢穴數十莊悉數攻毀復誘令斗六賊匪出巢設伏擊敗悍賊乘勢攻拔斗六土城陣斬甚多擒獲偽軍師元帥等勦辦尚屬認真惟首匪戴萬生現在逃往彰化洪逆所住之北勢涵莊與林

逆所踞之四塊厝地方皆為該逆老巢族類甚繁且恐勾結內山番族復致滋蔓著徐宗幹卽飛速行知林文察並飭曾元福予曰健合力進攻務期破毀老巢將戴萬生洪橫林歲三逆悉數擒斬其首匪陳亞狗所踞之大突等莊亦著速行攻克將該匪首一併殲擒毋任再行竄逸林文察等務當乘此軍威力加埽蕩並與曾玉明予曰健和衷商辦迅奏膚公毋得稍分畛域將此由五百里諭知徐

宗幹並傳諭林文察曾玉明子曰健知之○
以福建攻克斗六賊巢嘉義肅清賞知府曾
登洲都司陳兆熊等花翎都司蕭瑞芳等藍
翎餘加銜升敘開復有差○命福州將軍英
桂在紫禁城騎馬○壬寅申刻

上詣綏履殿

慈安皇太后前行禮平安室

慈禧皇太后前行禮○諭議政王軍機大臣等
李雲麟奏會攻漢郡分兵留守興安並派水

陸各營堵剿藍逆股匪一摺據稱劉蓉所部
於十二月初三日由甯羌鐵鎖關進趨褒沔
並飭南路湘果各軍由青石關同時並進催
令該京卿迅擣西鄉並咨明四川總督分派
唐文耕留防太平之四千餘人會剿探聞西
鄉洋縣踞匪因川軍雲集圖竄漢陰興安東
犯襄郡現已分擾石泉之馬家寨等處經該
京卿派兵擊退藍逆一股擾及上津欲由甲
河等處偷渡回川已飭派出之兵會梁作揖

一軍追剿興安新舊兩城已派兵留守俟與
劉蓉會晤共商妥策等語覽其所奏仍係豫
籌布置須俟與劉蓉會晤方可共商進兵劉
蓉現已行抵何處著即催集各軍會剿新集
賊巢李雲麟迅飭各營進擣西鄉以成三路
會剿之局務須督飭各將弁認真剿辦切不
可徒託空言致干咎戾李雲麟進止著劉蓉
仍遵前旨妥籌調度另片奏石泉縣知縣陸
莖於賊至則獻物以求和賊去則殺人以滅
口該京堂派防石泉陸莖不令進城石泉為
李雲麟進兵要路果如所奏實屬目無法紀
關係非輕前此龍常與陸莖互訐之案孰虛
孰實著劉蓉將此次李雲麟參劾陸莖各情
彙入前案一併秉公查辦據實覆奏原片著
鈔給劉蓉閱看將此由六百里各諭令知之
○又諭李雲麟奏請飭催協餉等語據稱前
任江西藩司李桓奉命援陝所需兵餉由山
東河南每月協撥銀各一萬兩嗣李桓告病

該京堂接辦軍務。而義勝一軍。及新立水陸數營。餉無所出。請旨飭催等語。李雲麟現在進兵石泉。與劉蓉會剿漢中。軍情緊要。需餉尤刻。不容緩。該京堂所部。均仰給楚省協濟。惟李桓舊部之餉。本由山東河南協撥。豈可虛懸無著。致誤戎機。著張之萬查照前議。按月如數撥濟。並著閻敬銘迅速籌銀數萬兩。均各徑解陝省興安。交李雲麟軍營。以資飽騰。而利攻勦。毋得再事遲延。將此由五百里

各諭令知之。○是年。旌表孝子湖北等省孔興德等八名。孝義山西省孫福貴等二名。孝友湖南省趙世翥等二名。悌弟湖北省羅亮侯一名。孝女湖南省李玉音等二口。烈婦直隸等省王寅清妻吳氏等三十八口。烈女河南等省張輔德未婚妻彭氏等六口。義士湖北省張玉階等二名。守節合例滿洲護軍台興妻訥佳氏等一百二十一口。蒙古馬甲明泰妻杜佳氏等二十五口。漢軍馬兵郎陞妻


蔣氏等二十九口。內務府拜唐阿奎英妻王氏等三口。各省駐防閒散馮天榮妻孫氏等一百六十一口。奉天等省高萬鍾妻魏氏等五千三百十七口。夫亡殉節湖北等省樂慶雲妻范氏等十四口。百歲壽民婦四川等省吳學灝等十一名。口。五世同堂湖南等省周克靜等三十六家。六世同居安徽省丁焰一家。均給銀建坊如例。○會計天下民數穀數。除奉天江蘇福建雲南廣西浙江陝西甘肅

安徽貴州未經冊報外。直隸等省通共大小男婦二萬三千三百九十五萬八千四百三十五名。口。存倉米穀三百萬一千二百四十六石八斗六升五合七勺。

大清穆宗繼天開運受中居正保大定功聖智
誠孝信敏恭寬毅皇帝實錄卷之八十九

實錄卷之八十九

三



統一書號: 11018·1355—46

定 價: 42.00 元